


Xtidxcoob Dios ni  
biädnä dad Jesucrist



New Testament in Zapotec, Mitla (MX:zaw:Zapotec, Mitla)

**Xtidxcoob Dios ni biädinä dad Jesucrist**  
**New Testament in Zapotec, Mitla (MX:zaw:Zapotec, Mitla)**

copyright © 2006 Wycliffe Bible Translators, Inc.

Language: Zapotec, Mitla

Translation by: Wycliffe Bible Translators, Inc.

Zapoteco, Mitla [zaw], Mexico

**Copyright Information**

© 2006, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Zapotec, Mitla

© 2006, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 7 Nov 2023 from source files dated 29 Jan 2022

5cff1274-8dc3-5398-a94d-f6033bb363c9

## Contents

San Mateo . . . . .	1
San Marcos . . . . .	48
San Lucas . . . . .	78
San Juan . . . . .	129
Hechos . . . . .	166
Romanos . . . . .	212
1 Corintios . . . . .	230
2 Corintios . . . . .	247
Gálatas . . . . .	258
Efesios . . . . .	264
Filipenses . . . . .	270
Colosenses . . . . .	274
1 Tesalonicenses . . . . .	278
2 Tesalonicenses . . . . .	282
1 Timoteo . . . . .	284
2 Timoteo . . . . .	289
Tito . . . . .	293
Filemón . . . . .	295
Hebreos . . . . .	296
Santiago . . . . .	310
1 Pedro . . . . .	315
2 Pedro . . . . .	320
1 Juan . . . . .	323
2 Juan . . . . .	328
3 Juan . . . . .	329
Judas . . . . .	330
Apocalipsis . . . . .	332

## Guijtz Ni Bacuaa Mateo

### *Retoxpengoldoo Jesucrist (Lc. 3:23-38)*

- <sup>1</sup> Guijtz ni rusule' laj retoxpengoldoo xten Jesucrist xi'n toDavid, xi'n toAbraham.
- <sup>2</sup> Abraham gujc xtd Isaac, Isaac gujc xtd Jacob, Jacob gujc xtd Judá con rebejtzni.
- <sup>3</sup> Judá con Tamar gujc xczajzn Fares con Zara. Fares gujc xtd Esrom, Esrom gujc xtd Aram. <sup>4</sup> Aram gujc xtd Aminadab. Aminadab gujc xtd Naasón. Naasón gujc xtd Salmón. <sup>5</sup> Salmón con Rahab gujc xczajzn Booz. Booz con Rut gujc xczajzn Obed. Obed gujc xtd Isaí. <sup>6</sup> Isaí gujc xtd reii David. David con nani gujc cháäl Urías gujc xczajzn Salomón.
- <sup>7</sup> Salomón gujc xtd Roboam. Roboam gujc xtd Abías. Abías gujc xtd Asa. <sup>8</sup> Asa gujc xtd Josafat. Josafat gujc xtd Joram. Joram gujc xtd Uzías. <sup>9</sup> Uzías gujc xtd Jotam. Jotam gujc xtd Acáz. Acáz gujc xtd Ezequías. <sup>10</sup> Ezequías gujc xtd Manasés. Manasés gujc xtd Amón. Amón gujc xtd Josías. <sup>11</sup> Josías gujc xtd Jeconías con rebetzni cheni huij reben Israel pres lo guedx Babilonia.
- <sup>12</sup> Che gudejd huij rebejnnga pres Babilonia, dxejc guyu' xi'n Jeconías, Salatiel. Salatiel gujc xtd Zorobabel. <sup>13</sup> Zorobabel gujc xtd Abiud. Abiud gujc xtd Eliaquim. Eliaquim gujc xtd Azor. <sup>14</sup> Azor gujc xtd Sadoc. Sadoc gujc xtd Aquim. Aquim gujc xtd Eliud. <sup>15</sup> Eliud gujc xtd Eleazar. Eleazar gujc xtd Matán. Matán gujc xtd Jacob. <sup>16</sup> Jacob gujc xtd José cháäl Marii nani gujc xnan Jesús ni birilaj Crist.
- <sup>17</sup> Ni'cni gujc tzudaj xfamil reni agudejd gubi'reni lo guedxliujre che gubajnlj toAbram cheni gubajnliza toreii David. Tzudajza rexagdoo najc reni gudejd cheni gubajnlj toDavid cheni huijli reben Israel pres Babilonia. Stzudaj rexagdoo najc reni gudejd cheni biriilireni pres Babilonia che gojlli Crist.

### *Cheni gojl Jesucrist (Lc. 2:1-7)*

- <sup>18</sup> Scree gujc cheni gojl Jesucrist. Abia'n xnanni, Marii, diidx guchnaani José ni gac cháälni. Per ansde xca' sa'reni, Marii agac nuxi'nni sa'csi biäd Sprit Dxan xten Dios lojni.
- <sup>19</sup> José com najcni te beñsa'c, di rlazjni nuro'nni Marii nez loj rebejn te niachebereni, ni'c bejnni xhigab Guñonxhiga'tzni Marii. <sup>20</sup> Xhigabga cayujnni cheni baluiloj te xangl Dios lojni, lo bacal räjpni lojni:
- José xajg toDavid, na'c guidxeyblu xca'lu Marii gacni cháällu sa'csi xi'nni nani chu najc xten Sprit Dxan xten Dios. <sup>21</sup> Che gaal xi'nni cuälajluni Jesús sa'csi laani guslaani rexpejnni lo rextojlreni.
- <sup>22</sup> Guiraa redee gujc si'c te guzojb diidx ni gunii tej ni bacuaa xtidx Dios. Räjpni:
- <sup>23</sup> Suu te dxapxteeb báz, sajl te xingaanni nani guirilaj: Emanuel, (lajni säloj Dios nabajn con nuure).
- <sup>24</sup> Che gubajñ José lo bacal, bejnni si'cni räjp xangl Dad lojni. Cua'ni Marii gujc cháälni.
- <sup>25</sup> Luxh dini niembeeni si'c cháälni dxejli cheni gudejd gojl xingangalojni ni gulälajni Jesús.

## 2

### *Che biädhuij reben nanduxh ni laa remagos lojni*

- <sup>1</sup> Cheni gojl Jesús nen guedx Belén xten guedx Judea, najc Herodes reii xten guedx Judea. Dxejc bidzujñ reben najn ni najc remagos, siädreni nejz cadre rliejn gubijdx, bidzujñreni guedx Jerusalén. <sup>2</sup> Rniabdiidxreni:

—¿Con reii xten reben Israel nani golgaj, ä? Nurnu abihuiinu xpajlni laadxlinu, ni'cni siopdonnuni.

<sup>3</sup> Che biejn diajg reii Herodes diidxga, guyuduxhni yärsia' näjza guiraa reben Jerusalén.

<sup>4</sup> Dxejcti batie'ni guiraa rebixhojzro ni rnibee loj rebixhojz, näjza guiraa renani ruluii xleii Moisés lo rebejn te gunabdiidxni lojreni:

—¿Caro gaal Crist?

<sup>5</sup> Laareni räjpreni:

—Neñ guedx Belén xten guedx Judea sa'csi si'c gunii niguii ni bacuaa xtidx Dios che räjpni:

<sup>6</sup> Luj guedx Belén xten guedx Judea, dilu gajc maazru huin loj reguedxro xten guedx Judea sa'csi neñ guejdxre guirii tej nani guinibee, te ni ga'p rexpänä Israel.

<sup>7</sup> Dxejcti guredx-xhiga'tz Herodes remagos te gunabdiidxni gucti biricaj bajl nani bahuiireni. <sup>8</sup> Dxejcti baxhalnireni guedx Belén, räjpni lojreni:

—Colchäj ro'c, colnabdiidxsa'c xcuent biuuxga te che abidxältuni jiädniitu loä te näjza narä chaganäni.

<sup>9</sup> Che biejn diajgreni xtidx reii, sä'tireni. Bajl nani bahuiireni lagajc lajdxreni laitis nijdni lojreni. Che bidzujnlireni cadre yu' bázga, dxejcru guzobdx bajlga. <sup>10</sup> Che bahuii remagos loj bajlga, rbalazduxhneni. <sup>11</sup> Si'c bidzujnreni. Che biu'reni neñ yu', bahuiireni lo bázga con xnanni Marii. Dxejcti bazuxhijbreni, gojnreni bázga, baxhalreni rexcäl'nasa'creni bazalajzreni oor, näjza yaal näjza yalnejh. <sup>12</sup> Che agojl guibi'reni, gunixcälreni, räjp Dios lojreni:

—Na'c guibi'tu nez loj Herodes.

Dxejcti gunaazreni garenca nez yuj, gubi'reni lajdxreni.

### *Che siini Egipto*

<sup>13</sup> Che sii remagos lajdxreni, biääd te xangl Dios baluilojni lo José lo bacal, räjpni:

—Huistie, cua' biuxe're näjza xnanni, huinäreni Egipto. Ro'c guläjz che guiniäli lojlu. Siguiil Herodes biuxe're sa'csi rlanjz ni ju'tnini.

<sup>14</sup> Dxejc huistiegajc José, cua'ni biuxe're näjza xnanni, lagajc yäälga biriireni, siireni nez Egipto. <sup>15</sup> Ro'c guyu'reni cheni gujtli Herodes. Guiraa dee guzajc te guzobj diidx ni bacuaa niguii ni gunii xtidx Dios che räjpni: “Egiptoli guredxä xi'nä.”

### *Che guinibee Herodes gujt rebiuxbäs*

<sup>16</sup> Che guchee Herodes abasguee remagosni, bidxechduxhni. Gunibeeni guet guiraa rebiuxniguii ni yu' tio'p ijz näjza rebiuxe' ni yu' guxiiru dxej, guideb neñ guedx Belén näjza reguejdx ni re' gabiga, si'cti redxej ni räjp remagos lojni. <sup>17</sup> Dxejc guzobj diidx ni bacuaa Jeremías ni gunii xtidx Dios che räjpni:

<sup>18</sup> Biejn xse' bejn neñ guedx Ramá, te yälhuinduxh, te yälrbedxdij, yälrbedxneñ:

laa Raquel ni roon yejc rexi'nni.

Naaddini jiäjł lajzni sa'csi agujt rexi'nni.

<sup>19</sup> Cheni gujt Herodes, dxejc lo te bacal huiluiloj xangl Dios loj José neñ Egipto.

<sup>20</sup> Räjpni:

—Huistie, cua' biuxe're näjza xnanni, gubisac nez Israel sa'csi agujt renani rlanjz ju't biuxe're.

<sup>21</sup> Dxejcti huistie José, cua'ni biuxe' näjza xnanni. Gubi'reni Israel. <sup>22</sup> Luxh che biejn diajgni rnibee Arquelao guejdx Judea lacuaa Herodes, xtadni, bidxejbni nuini ro'c. Dxejc gunisac Dios lojni loj te bacal, ni'c huijni lo reguejdx xten Galilee. <sup>23</sup> Dxejc biädläjzni neñ guejdx ni laa Nazare't te si'c guzobj diidx ni bacuaa niguii ni gunii xtidx Dios cheni räjpni: “Sirilajni nazaren.”

### 3

*Juan Bautist basule' xtidx Dios loj rebejn*  
(Mr. 1:1-8; Lc. 3:1-9, 15-17; Jn. 1:19-28)

<sup>1</sup> Nen redxejga biääd Juan Bautist lo reyubijdz xten guedx Judea, ro'c cagulijdxni,  
<sup>2</sup> cayäjpni:

—Colgusiechljaztu rextoljtu sa'csi xcälrnibee Dios abidzungajxhni.

<sup>3</sup> Juan najc nani basä't Isaías, te niguii ni gunii xtidx Dios, cheni bacuaani:  
Riejn xse' te ni rbedxa' nez lo reyubijdz:

“Colguslii xnezyuj Dad, colguslii xnezyulajzni.”

<sup>4</sup> Najcw Juan xquichlajd cameii. Naliib te duguijd xque'ni. Rajwni guxha't näjza dzujn xten baseerguijxh. <sup>5</sup> Riääd reben guedx Jerusalén näj guiraa reben Judea näjza rebejn ni tre' gajxh nez ro' gueu Jordán, riädcuadiajgreni xtiidxni. <sup>6</sup> Che ruxhobdojlreni xtojreni, rutiobnis Juanreni ro' gueu Jordán.

<sup>7</sup> Che bahuiini siääd xhidajl reben guidoo ni najc refarisee näjza ni najc resaducee, rlanjreni gutiobnisnireni, räjpni lojreni:

—La'tu benguidxduxh, najctu si'c bäl. ¿Chu balijdxtu guxuntu loj xcälrdxe'ch Dios ni siääd? <sup>8</sup> Colguibansa'c si'cni nungäjł te fiipac rebejn guliipac abasiechljaztu. <sup>9</sup> Na'c litis guntu xhigab naatu: “iNi nurnu najcnu rexagdo toAbram!” Rniliä lojtu, sajc xca' Dios reguijre gunni gacreni rexi'n toAbram. <sup>10</sup> Asojb guibyajg lo xlobaa reyajg, luxh guiraa reyajg nani di ninexhsa'c xcaj lojni, sidinni te checni. <sup>11</sup> Narä guliicani rustiobnisä con nis si'c te seen cheni abasiechljaztu, abaxhobdojltu. Niluxh nani siääd detzä sutiobnisni la'tu con Sprit Dxan xten Dios näjza con guiboo. Rnibeeruni loä. Bensacduxhni. Nicla xcura'chni digacdi chanää. <sup>12</sup> Aca'ni xhi cojn gusiani triuu xtenni te chuchee triuuga nen ngodx xtenni. Dxejcti guixhtriuuga, suze'cni guijxhga lo guiboo ni rejc par tejpas.

*Che gurobnis Jesús*  
(Mr. 1:9-11; Lc. 3:21-22)

<sup>13</sup> Dxejc birii Jesús nez Galilee, bidzujñni ro' gueu Jordán cadre yu' Juan te gutiobnis Juanni. <sup>14</sup> Niluxh naaddi Juan gutiobnis Jesús. Räjp Juan lojni:

—Luj nanab gutiobnislu narä, niluxh naj alga luj siäädlu loä te gutiobnisälu.

<sup>15</sup> Dxejc räjp Jesús lojni:

—Basaan gacni si'c naj, sa'csi nanab gusoobnu guiraa ni rlanj Dios gac.

Dxejctiru batiobnis Juan Jesús.

<sup>16</sup> Cheni gulujx gurobnis Jesús, birigajcni lo nis. Dxejc bixal xhaguibaa, bahuiini siädäjt Sprit Dxan xten Dios si'c te palom, biäjtni lojni. <sup>17</sup> Dxejc xhaguibaali biejn diajgreni te xse' ni räjp:

—Dee najc xi'nä ni sanälazä. Laani rbanälazä.

### 4

*Che huij Jesús lo reyubijdz*  
(Mr. 1:12-13; Lc. 4:1-13)

<sup>1</sup> Dxejc bejn Sprit Dxan xten Dios huij Jesús nez lo reyubijdz te nejzga nuhual bendxab Jesús.

<sup>2</sup> Che gulujx bacua'n Jesús tiuu gubijdx, tiuu guxhijñ, gulaanni. <sup>3</sup> Sas biääd bendxab lojni, räjpni:

—Palga guliilu Xi'n Dioslu, gunibee gac reguijre yätxtiil.

<sup>4</sup> Badzu' Jesús diidxre lojni, räjpni:

—Loj reguijtz xten Dios caj scree: “Xhet ganaxdi yältxtiil guibajñ rebejn; sibajñzani con guiraa diidx nani rnii Dios.”

<sup>5</sup> Dxejcti huinä beṇdxab Jesús guedx Jerusalén. Gulä'pnini jiaa yejc xques guidoro. Dxejcro räjp beṇdxab lojni:

<sup>6</sup> —Palga Xi'n Dios luj, bitiäjs lo yujli, sa'csi scree caj loj rexquijtz Dios: Sinibee Dios rexanglṇi ga'preni luj; siliäsreni luj con ṇaareni didi gacnaj ni'lu lo reguijga.

<sup>7</sup> Badzu' Jesús diidxre lojni, räjpni:

—Caj loj rexquijtz Dios: “Na'c fallu Dad ni najc Xtioslu.”

<sup>8</sup> Stee huält huinä beṇdxab Jesús yejc te danro. Dxejcti baluiini lojni guiraa reguejdx, reguedxro ni tre' lo guedxliuj näj guiraa xcälṇasa'creni. <sup>9</sup> Dxejcti räjpni loj Jesús:

—Guiraa redee sunidxä lojlu palga guzuxhijblu nez loä te gaṇlu narä.

<sup>10</sup> Dxejcti räjp Jesús lojni:

—¡Huij nez rec beṇdxab! Scree caj loj rexquijtz Dios: “Dad Xtioslu gaṇlu; lojtisni chulu.”

<sup>11</sup> Dxejcti gubicaj beṇdxab loj Jesús. Dxejc biäd rexangl Dios biädhuiireni Jesús.

### *Gusloj Jesús cayujn xtzuunni*

*(Mr. 1:14-15; Lc. 4:14-15)*

<sup>12</sup> Che biejn diajg Jesús yu' Juan neṇ ladzguiib, huijni nez Galilee. <sup>13</sup> Dxejcti gudejdni guedx Nasare't, huiläjzni guedx Capernaum ni tre' gajxh nez ro' nis, nez reguejdx Zabulón con Neftalí. <sup>14</sup> Si'c gujc te guzojb diidx ni bacuaa Isaías ni gunii xtidx Dios:

<sup>15</sup> Lajdx Zabulón, lajdx Neftalí, nezyuj ni rij nez ro' nisdoo, stelaad gueu Jordán, Galilee cadro rbäjz rebejn nani di gac repxeṇ Israel.

<sup>16</sup> Rebejn nani rbäjz neṇ te yälçäy abahuiireni te bajlga, luxh bajlga basaniṇ xcäriejn renani nabajṇ lo xcälrdxejb, lo xpalaa yälgujt.

<sup>17</sup> Dxejcli gusloj cagulijdx Jesús, räjpni:

—Colgusiejchlaztu, colguxhobdojṇ te guibaṇsa'ctu sa'csi abidzuṇgajxh xcälṇnibee Dios.

### *Che gurejdx Jesús tajp xpejṇni*

*(Mr. 1:16-20; Lc. 5:1-11)*

<sup>18</sup> Sasaj Jesús nez ro' nisdoo xten Galilee che bahuiini lo tio'p niguii. Tejṇi laa Simón, ni laaza Pedr. Steeni najc lagajc bejtzni, ni laa Andrés. Dzuun ni rujnreni najc rniaazreni bäjṇ, ni'c cacuaareni guijxh lo nisdoo. <sup>19</sup> Dxejcti räjp Jesús lojreni:

—Coltanajṇ narä. Naj riniaaztu bäjṇ, niluxh narä gunä cuedxtu rebejn.

<sup>20</sup> Lagajc dxejc basa'nreni xquijxhreni te sanajlreni laani.

<sup>21</sup> Che gudejdreni ro'c, bahuiini loj stio'p niguii, Jacob con bejtzni Juan. Yu'reni neṇ te barcw con xtadreni, ni laa Zebedeo cayunsa'creni guijxh. Dxejc gurejdx Jesúsreni.

<sup>22</sup> Lagajc dxejc basa'nreni barcw näjza xtadreni te sanajlreni Jesús.

### *Cagului Jesús xhidajṇ bejn*

*(Lc. 6:17-19)*

<sup>23</sup> Sasajti Jesús guideb nez región xten Galilee, caguluiini neṇ tejga rexquidooreni. Cagusule'ni redidxcoob xten xcälṇnibee Dios. Cagusiajczani guiraa yälracxhuu ni rajc rebejn guejdxga, guiraa yälguijdx. <sup>24</sup> Biejn diajg rebeṇ Siria diidx xcuent ni cayujn Jesús. Sas biädnäreni guiraa rebeṇracxhuu ni cayajc guiraloj yälguijdx, yälṇayan; guiraa reni rajc yejcreni, guiraa reni rajc malyälguijdx, reni rajc yälguidxbej, guiraareni abixuṇ tiejxhreni. Dxejcti basiajṇ Jesús rebejṇga. <sup>25</sup> Xhidalduxh beṇ Galilee huinajṇni, näj rebeṇ reguedx Decápolis, näjza rebeṇ guedx Jerusalén, näjza rebeṇ Judea näjza rebejn ni tre' stelaad gueu Jordán.



<sup>1</sup> Che bahuii Jesús loj reben xhidajl, huä'pni yejc te dajn. Dxejcti gubig rexpejn̄ni ni gurejdxni lojni. <sup>2</sup> Dxejc gusloj caguluii Jesús reni'c, scree räjpni:

*Rebejn ni sibaalajz*  
(Lc. 6:20-23)

<sup>3</sup> —Sibaalajz rebejn nani nanchee rquinduxhreni xcälracnäj Dios, sa'csi laareni nungäjreni xcälrnibee Dios.

<sup>4</sup> 'Sibaalajz rebejn nani rac-huin lajzreni xcuent rextojreni, sa'csi sudzucaj Dios xtojreni, susiäjlni lajzreni.

<sup>5</sup> 'Sibaalajz rebejn nani nadolajz nani rrajz guntis si'cni rnibee Dios, sa'csi sacnäj Diosreni lo xcälhabajnreni lo guedxliujre.

<sup>6</sup> 'Sibaalajz rebejn ni nastoocanu rliaanreni, riojreni, sa'csi rrajzreni guibaṅsa'ctisreni nez loj Dios, sa'csi sudeed Dios lojreni guiraa ni rniabreni.

<sup>7</sup> 'Sibaalajz rebejn nani rulaslajz sa'reni, sa'csi sulaslajzza Diosreni.

<sup>8</sup> 'Sibaalajz rebejn nani najc nayatis lastooreni rujnreni rehxigabsa'c xten Dios sa'csi suhuiireni lo Dios.

<sup>9</sup> 'Sibaalajz rebejn nani ruscuecdxilajz sabejnreni, sa'csi laareni sirilajreni rexi'n Dios.

<sup>10</sup> 'Sibaalajz rebejn nani rusutijp lajzreni che rusacsí bejnreni sa'csi nabaṅsa'creni nez loj Dios, sa'csi xtenreni najc xcälrnibee Dios xhaguibaa.

<sup>11</sup> 'Colspaalajztu che gusacsí bejntu tilnäjnreni la'tu, guiniireni guiraloj didx-xhii xcuent xtidxä. <sup>12</sup> Colguibaalajz, colbalajz sa'csi xhaguibaali sunidxduxh Dios xcuent xtzuntu. Sigajcza basacsíreni reniguii ni gubajn galoo ni gunii xtidx Dios.

*La'tu najctu si'c sejd lo guedxliujre*  
(Mr. 9:50; Lc. 14:34-35)

<sup>13</sup> Räjpzani:

—La'tu najctu si'c sejd lo guedxliujre. Palga di sejd gac nadzujy, ¿xho gacsacni nadzujy? ¿Xhi gun bejn̄ni dxejc? Susälreni sejdga detz yu', suläj bejn̄ yejcn̄i.

<sup>14</sup> 'La'tu najctu si'c te bianij lo guedxliujre. Te guejdx nani tre' jiaa yejc te dajn, digacdi guiga'tzni. <sup>15</sup> Digacdi xcaguij te bajl dxejcti jiäuuni neṅ te caj. Maazru huen soobni jiaa neṅ te gandilieer te gusanijni loj guiraa rebejn ni tre' neṅ yu'. <sup>16</sup> Xcälhabaṅsa'ctu najc si'c te bajl loj reben̄ guedxliuj. Suhuiireni xtzunsa'ctu dxejc siliä'preni xpala'n xtadtu ni yu' xhaguibaa.

*Ruluii Jesús xcuent leii*

<sup>17</sup> Räjpzani:

—Na'c guntu xhigab siädgudzucaä leii xten toMoisés, niclaza rediidx ni baluii redad ni gunii xtidx Dios. Xhet siädzucad̄dini, narä siälä te guluiäpacni si'cni najcni. <sup>18</sup> Rniliäpac, dxejli che ni nitloj guibaa näjza guedxliuj, nicla tej letr ni caj loj leii di nit. Sajcpac guiralii ni caj lo reguijtzga. <sup>19</sup> Ni'cni chutis ni rrajz gusaan te diidx nani caj loj leii, mase te didxbäzni, luxh ruluiini gun bejn̄ si'c, laani guxiduxh sajcn̄i lajdx Dios guibaa. Niluxh renani rucudiajg xtidx leii, luxh rujnpacreni si'cni caj lo leii, ruluiizani leii, beṅsacduxh gacni lajdx Dios guibaa. <sup>20</sup> Ni'cni rniä lojtu, palga ditu gunsacru xtzun Dios, ditu guibaṅsa'cru loj reni najn xcuent xleii toMoisés, näjza loj reben̄ guidoo ni laa farisee, dipactu jiu' lajdx Dios xhaguibaa.

*Ruluii Jesús xcuent yälrdxe'ch*  
(Lc. 12:57-59)

<sup>21</sup> Räjpzani:

—Abiejnza diajgtu nani gunii rebengoldoo: “Na'c ju'tlu. Chutis te nani ju't sa'ni, sinärenini lo guxhtis te jiäuuni neṅ latzguiib.” <sup>22</sup> Niluxh narä rniä chutis nani guidx-echduxh lo sa'ni sijni lo guxhtis. Chutis ni guinii didxnaj lo sa'ni, sijni lo juejz. Chutis



ni gäb lo sa'ni: “benayälajz” sidejndi loj yälguxhtis xten Dios, sijni gabijl cadro cayejc guiboduxh.

<sup>23</sup> 'Che sanälu gojn guidoo te gusa'nlu lo bacuug, palga guinaj lajzlu yu' chu lo cadxe'chlu, <sup>24</sup> basansijc gojn xtenlu lagajc ro'c, huisiälxgaa diidx con sa'lu, dxejcti guibi'lu te gac gusa'nlu gojn xtenlu.

<sup>25</sup> 'Palga yu' chu rdxe'ch lojlu, basquejn basiäjl diidx con laani lagajc cheni sasanäjluni lonezyuj te di gutedni luj lo juejz. Luxh juejz sutedni luj loj reguixhajj te gusaüreni luj neñ latzguib. <sup>26</sup> Rniliäpac lojlu: “Dilu guirii ro'c palga dilu cue'c guiralii meel nani guiniabni lojlu.”

### *Rului Jesús xcuent yälrusquee sa'ni*

<sup>27</sup> Räjzani:

—Abiejn diajgtu guniireni galoo: “Na'c guesnäjtu gunaa nani di gac chäältu.” <sup>28</sup> Narä rniä, chutis te nani fii loj te gunaa dxejcti guisia' lajzni gunaaga, abejnni dojl neñ lastooni. <sup>29</sup> Palga balojlu ladbee rujn rujnlu dojl, gulääni basälni te laad sa'csi hueenru gunijtlu te balojlu quela chää guideb tiejxhlu gabijl. <sup>30</sup> Palga naalu ladbee rujn rujnlu dojl, batiu'ni sa'csi hueenru gunijtlu te naalu quela chää guideb tiejxhlu gabijl.

### *Rului Jesús xcuent yälrur'o'n chääl bejn*

*(Mt. 19:9; Mr. 10:11-12; Lc. 16:18)*

<sup>31</sup> Räjzani:

—Abiejn diajgtu guniireni galoo: “Chutis niguii ni rlajz guro'n chäälni, nanabtis gudeedni te guijtz nani rnii abaro'nni chäälni.” <sup>32</sup> Narä rniä, niguii nani guro'n chäälni niluxh xhet dojldi bejn chäälni, niguiiga sujn gun chäälni yälgubejxh, niluxh chutis ni guchnaa gunaaga sujnzani yälgubejxh.

### *Rului Jesús xcuent che ria'n diidx*

<sup>33</sup> Räjzani:

—Abiejn diajgtu gunii rebengool: “Che ria'nlu diidx lo Dios gunlu xhi gunlu, na'c jial lajzlu; basa'pac xtiidxlu lo Dios.” <sup>34</sup> Narä rniä, na'c gunlu juraar, nicla tej mood, nicla por xhaguibaa, sa'csi ro'c najc lajdx Dios, <sup>35</sup> nicla por loj guedxliuj sa'csi ro'c rsiuj ni'ni; nicla por guedx Jerusalén sa'csi ro'c najc guedxlajdx reiuro, <sup>36</sup> niclaza por lagajc bituiejclu, sa'csi digacdi guncheelu te guichyas niclaza te guichnol, nicla tej guijch. <sup>37</sup> Nanab guiniitisl: “Mbaj” o “Ajndi”. Palga yu' xhiru rniilu, beñdxab najc ni rujn rniiluni.

### *Chanälajzni rebejn ni rdxe'ch lojni*

*(Lc. 6:29-30)*

<sup>38</sup> Räjzani:

—Abiejn diajgtu gunii rebengool galoo: “Te baloj por ste baloj, te läjy por ste läjy, nalajznu bejn lo sa'lu si'ctis ni rujnni lojlu.” <sup>39</sup> Narä rniä, na'c tilnäjl te bejn ni bejn te cos guijdx lojlu. Palga chääzni ladbee lojlu badeed stelaad lojlu chääzni. <sup>40</sup> Palga yu' chu rlajz tilnäjl te xca'ni xcamangwlu, badeedza näj xsa'cwlu lojni. <sup>41</sup> Palga yu' chu guinibee guulu xcargwni te kilómetro, huinäni tio'p kilómetro. <sup>42</sup> Nani guiniab xhi guiniabxlia'ni lojlu, badeedni. Nani guiniablaa xhi guinablaani lojlu na'c gudxoijnluni lojni, na'c gäblu: “Xhetini.”

<sup>43</sup> 'Abiejn diajgtu gunii rebengool: “Colchanälajz sa'tu. Colguidxe'ch loj renani rdxe'ch lojtu.” <sup>44</sup> Narä rniä lojtu, colchanälajz rebejn ni rdxe'ch lojtu. Benle' yej reni rgue lojlu. Colyejn dxunsa'c loj renani rdxe'ch lojtu. Colcuejdx, colnab loj Dios xcuent rebejn nani rdxagdijltu, rusacsireni la'tu, <sup>45</sup> te si'c gactu xi'n xtadtu ni yu' xhaguibaa nani rujn rii xcubijdxni lo rebeñsa'c sigajcza lo rebeñ guijdx. Rujnzani riajb nisguij lo rebeñsa'c sigajcza lo rebeñguijdx. <sup>46</sup> Palga la'tu chanälajz lagajctis rebejn nani rinälajz la'tu, ¿xhi gaan guntu dxej? Najctu lagajc si'c najc rebejn ni rutie' meel ni rajx lo gubier. <sup>47</sup> Palga

guiniitu: “Xchan”, lagajctis loj resa'tu, ¿xhini'c rujntu ni najc hueenru lo chutis bejn? ¿La et sigajcdiza rujn rebejn nani di gumbee Dios? <sup>48</sup> Colyajc beŋsa'c si'c ni najc xtadtu ni yu' xhaguibaa.

## 6

### *Rului Jesús xho gudeedni gojn*

<sup>1</sup> Räjpzani:

—Na'c gusäbdiidx guntu dzunsa'c nez loj rebejn te fiitisreni xhi rujntu. Palga gusäbdiidxtu di xtadtu ni yu' xhaguibaa guniidx xhi xca'tu. <sup>2</sup> Che gudeedlu gojn, na'c güilu diidx xhi badeedlu. Na'c gunlu si'c rujn rebejn nani rusguee neñ reguidoo, näjza lad nezyuj. Rujnsireni si'c te ruhuii rebejn xhi rujnreni te rliä'p rebejn xpala'nreni. Narä rniä acua'reni gaan xtenreni. <sup>3</sup> Luj che gudeedlu gojn xtenlu, na'c gachee nicla tej xamiigwlu xhi badeedlu, <sup>4</sup> te gac gojn xtenlu xhiga'tz. Dxejcti xtadlu ni cahuii nani bejnlu xhiga'tz, sacnäjni luj nez loj rebejn.

### *Rului Jesucrist xho cueedx, guiniabni lo Dios*

*(Lc. 11:2-4)*

<sup>5</sup> Räjpzani:

—Cheni rbejdx, rniabtu lo Dios, na'c guntu si'c rujn rebenguidoo ni rusguee. Rchagljazreni rniabreni lo Dios rsiuliireni neñ reyu' cadre riel xtidx Dios, näjza guiraa resquiin, näjza nez ronejz te ruhuii rebejn xho rujnreni. Rniliäpac, acua'reni gaan xtenreni. <sup>6</sup> Naj luj cheni cueedx, guiniablu lo Dios, biu' neñ xyu'lu. Basäuu ro' yu'ga, dxejcti xhiga'tz gunii loj xtadlu ni yu' xhaguibaa. Dxejcti xtadlu ni cahuii xhi rujnlu xhiga'tz, sacnäjni luj nez loj rebejn.

<sup>7</sup> Cheni caniitu lo Dios, na'c guinisactu balti huält rediidx nani aguniitu. Si'c rujn rebejn nani di gumbee Dios. Naareni sa'csi sanuutis rniireni xhidajl diidx balti huält, siejn diajg Dios. <sup>8</sup> Na'c guntu sigajc ni rujnreni, sa'csi anajn xtadtu xhini'c rquiintu che guiniabtuni lojni. <sup>9</sup> Ni'cni scree colguinii lo Dios:

Xtadnu ni yu' xhaguibaa dxan najc lajlu.

<sup>10</sup> Sujiääd xcälrnibeelu;

bejn si'cni rlajzlu lo guedxliujre sigajc rujnlu xhaguibaa.

<sup>11</sup> Nadxej baniidx xcu'nnu sa' ni rdaunu guira dxej.

<sup>12</sup> Basiäj] lajzlu redojl] xtennu si'c riäj] lajznu redojl] xten rebejn ni rujn dojl] loonu.

<sup>13</sup> Na'c gusaanlu jiaabnu xhigabguijdx,

baslaa nuure lo dojl],

sa'csi xten guejblu najc yälrnibee, yälnadip näjza yälrdimbicha' par tejpas.

Sugacni si'c.

<sup>14</sup> Palga la'tu gusiäj] lajztu redojl] ni rujn rebejn lojtu, xtadtu ni yu' xhaguibaa susiäj]za lajzni rextoj]tu. <sup>15</sup> Palga ditu gusiäj] lajztu redojl] ni rujn rebejn lojtu, sigajcza xtadnu ni yu' xhaguibaa di lajzni jiäj]za rextoj]tu.

### *Rului Jesús xho gucua'n bejn*

<sup>16</sup> Räjpzani:

—Che rucua'ntu na'c guntu si'c rujn rebejn nani rusguee; rumbaa lojreni te fii rebejn cagucua'nreni. Rniliä acua'reni rexgaanreni. <sup>17</sup> Niluxh la'tu, che rucua'ntu, colcun yejcti, colquiib lojtu <sup>18</sup> te na'c gachee rebejn cagucua'ntu, xtadtistu suhuii cagucuanxhiga'tztu. Xtadtu ni cahuii xhi cayunxhiga'tztu suniidxni xhi xca'tu nez loj rebejn.

### *Yälnasa'c ni yu' xhaguibaa*

*(Lc. 12:33-34)*

<sup>19</sup> Räjpzani:

—Na'c gapdajntu yäl<sub>n</sub>asa'c lo guedxliujre cadro rajw reman o rribtiejn xhixtentu, niluxh richu' gubaan rolijz bejn te rbajnreni. <sup>20</sup> Hueenru ga'ptu xcäl<sub>n</sub>asa'ctu xhaguibaa cadro di reman gauu, diza rehxixtentu cuibtiejn, diza regubaan jiu' te cuanreni. <sup>21</sup> Sa'csi cadro yu' xcäl<sub>n</sub>asa'ctu, ro'cza naga' lastootu.

*Bianij xten tiejxhtu*

*(Lc. 11:34-36)*

<sup>22</sup> Räjpzani:

—Bianij xten tiejxhni najc balojni, ni'cni palga rhuisa'c balojtu, guideb tiejxhtu yu' lo bianij. <sup>23</sup> Niluxh palga rebalojtu di fisa'c, guideb tiejxhtu yu' lo nacäy, ni'cni palga bajl nani yu' tiejxhtu dini gusanij, jlinacäiboo najc guidebtu!

<sup>24</sup> 'Nicla te bejn di gacdi gun dzuun loj tio'p lam tejsi junt, sa'csi sibälazni tejni laga sanälajzni steeni. Digacdi guntu xtzuum Dios palga caguuiltistu xcäl<sub>n</sub>asa'ctu lo guedxliujre.

<sup>25</sup> 'Ni'cni rniä lojtu, na'c chutu yärsia' por xcäl<sub>n</sub>abajntu, xhicha gautu, xhicha yätu, niclaza naatu xhicha lajd gajcwtu. Yäl<sub>n</sub>abajn sajcru lo yäl<sub>r</sub>ajw, luxh sajcru tiejxhtu lo xhajbtu. <sup>26</sup> Col<sub>h</sub>uii remane' ni rtajt xhaguibaa. Direni cue'c binij, dizareni guilia' gäjl, dizareni cuchee xhi gaureni nen yu', luxh xtadtu ni yu' xhaguibaa rudeedni xhi rajwreni. ¿Laa xhet sajcdirutu loj remane'ga, ä? <sup>27</sup> ¿Chu tej la'tu sa'csi ru'tu yärsia' sajc tiobrutu ste bo'c jiaaru?

<sup>28</sup> ¿Xhicuent runduxhtu xhigab xcuent xhajbtu? ¡Col<sub>h</sub>uii reguii ni tre' nesiät! ¿Xho roobreni? ¿Xho rialreni? Direni gun dzuun, dizareni guzaa xhajbreni. <sup>29</sup> Narä rniä lojtu, nicla rei Salomón guideb najcwni rexabsa'c xtenni di nisiuchee si'c rsiuchee tej reguiiga. <sup>30</sup> Palga Dios rujn rajc recuaan ni yu' nesiät ni rial nadxej luxh guixee ahuejcreni, ¿xhixh dini gunduxhru par la'tu, bejn nani guxii rililajz? <sup>31</sup> Ni'cni na'c chutu yärsia' guntu xhigab: “¿Xhicha guidaunu, xhicha guidunnu, xhicha gacwnu?” <sup>32</sup> Sa'csi rebejn nani di gumbee Dios xhigabtisga rujnreni, caguuilreni guiraa recosga. Niluxh xtadtu ni yu' xhaguibaa anajnni xhini'c rquiintu. <sup>33</sup> Col<sub>q</sub>uilxgaa yäl<sub>r</sub>nibee xten Dios näjza yäl<sub>n</sub>abansa'c si'cni rlajz Dios dxejc sica'tu guiraa ni rquiintu. <sup>34</sup> Ni'cni na'c gunduxhtu xhigab xho tedtu dxej guixee. Combast tedtu trabajw nani riääd dxej con dxej.

## 7

*Na'c cubeetu sa'tu*

*(Lc. 6:37-38, 41-42)*

<sup>1</sup> Räjpzani:

—Na'c cubeetu sa'tu te na'cza cubee Dios la'tu. <sup>2</sup> Sa'csi sigacni rgubeetu sa'tu, sigajcza sigubee Dios xhi rujntu; niluxh lagajc si'cni rutiexhtu lo bejn, si'cza sutiexh Dios lojtu.

<sup>3</sup> ¿Xhicuent ruhuiilu loj guijxh ni yu' baloj sa'lu, luxh dilu fii yagro nani yu' lagajc balojlu?

<sup>4</sup> ¿Xhicuent gäblu lo sa'lu, nädonnu cuää guijxh ni yu' nen balojlu, luxh dilu fii loj yagro ni yu' nen balojlu? <sup>5</sup> Ben<sub>g</sub>uidx ni rusguee, guläxgaa yagro ni yu' balojlu te gac fisa'clu te cuäälü guijxh nani yu' baloj sa'lu.

<sup>6</sup> 'Na'c guluiitu guiraa rextidx Dios loj chutis bejn sa'csi yu'reni najc si'c bä'cw, xlia'si rca'renini; sibi'reni, sauya'reni luj. Sigajcza recos sa'cru, na'c gudeedtuni loj chutis bejn, sa'csi yu'reni najc si'c cuch rbälazreni cossa'c najcreni si'c cuch ni ruläj yejc xhitis xhi cos.

*Col<sub>n</sub>ab, col<sub>q</sub>uil, col<sub>g</sub>usejz rolä'*

*(Lc. 11:9-13; 6:31)*

<sup>7</sup> Räjpzani:

—Col<sub>n</sub>ab lo Dios te guniidxni nani rniabtu. Col<sub>q</sub>uilni te guidxäjltuni. Col<sub>n</sub>ii rolä', te guixalni jiu'tu. <sup>8</sup> Chutis ni rniab lo Dios sica'ni nani rniabni, nani rguuil xhi cos nez loj Dios rdxälzani nani rguuilni; nani rusejz rolä', suxhalzarenini lojni.

<sup>9</sup> '¿La yu' chu tejtu che guiniab xi'nni te yätxtiil, alga gudeedni te guij, ä? <sup>10</sup> O palga guiniabni te la' bälj, ¿la sudeedni te bäl? <sup>11</sup> Palga la'tu ni najc beñ guijdx rajc rudeedtu cossa'c loj xi'ntu, aticaxh xtadtu ni yu' xhaguibaa. Laani suniidxni cossa'c loj renani guiniabni lojni.

<sup>12</sup> 'Ni'cni guira'ti cos ni rlanjtu gunnäj beñ la'tu, sigajcza colyennäjreni, sa'csi si'c caj lo leii xten toMoisés, näjza lo diidx ni bacuaa redad ni gunii xtidx Dios.

*Rolä' xten yälñabajñ najc dää*

*(Lc. 13:24)*

<sup>13</sup> 'Coljiu' nez rolä' nani najc dää, sa'csi gulajg najc rolä', gulajg najcza nezyuj nani rinä beñ lo yälrunijt, luxh xhidajlreni riu' nejzga. <sup>14</sup> Sa'csi dää najc rolä', dääza najc nezyuj nani rinä beñ nez loj yälñabajñ, niluxh guxii najc renani rdxäl nezyujga.

*Ninexhsa'c ni rcaj loj te yajg rujn gumbeeni yajgga*

*(Lc. 6:43-44)*

<sup>15</sup> Räjzani:

—Colñatiro rebeñ nani rlanj gusguee la'tu. Rniisireni rusule'reni xtidx Dios. Rluisi nadolajzreni si'c te xiil, niluxh direni gac. Alga si'c loob najcreni, rutie'chreni beñ si'c re'ch xiil che riädchu' loob lojreni. <sup>16</sup> Dzuun nani rujnreni sujn gumbeetureni. Anajntu di uub xcaj lo reyaguejch, diza iigw xcaj lo guechbiojb. <sup>17</sup> Ni'cni lo guiraa reyagsa'c rcaj ninexhsa'c lojni, per lo guiraa reyajg ni xhet yagsa'c di, ganax ninejxh ni di ganaxsa'c rcaj lojni. <sup>18</sup> Digacdi xcaj ninexhdxuudx loj te yajg ninexhsa'c. Di gacdi xcaj te ninexhsa'c loj te yajg ni di gac yagsa'c. <sup>19</sup> Guiraa reyajg nani di ninexhsa'c xcaj lojni, nanab guidinni te checni. <sup>20</sup> Sigajcza sajc gumbeetu beñsa'c sa'csi rujnreni dzunsa'c.

*Xhet guiraadi beñ jiu' lo xcälñibee Dios*

*(Lc. 13:25-27)*

<sup>21</sup> Räjzani:

—Xhet guiraadi renani rnii, “Dad, Dad”, jiu' lo xcälñibee Dios xhaguibaa. Ganaxtis renani rujn si'cni rlanj Xtadä ni yu' xhaguibaa. <sup>22</sup> Sidzujñ dxej sinii xhidajl beñ loä: “Dad, Dad, con lajlu basule'nu xtiidxlu, con lajzalu biläanu rebeñdxab, con lajzalu biennu remilagwr.” <sup>23</sup> Dxejc säpä lojreni: “Dina gumbeä la'tu. Colbicaj loä beñlatsiaj.”

*Tio'p cimient*

*(Lc. 6:47-49; Mr. 1:22)*

<sup>24</sup> Räjzani:

—Chutis nani rucudajg diidx nani cania, luxh ruzoob xtidxä, laani najc si'c te beñsin nani basoob rolijzni yejc te guilaj. <sup>25</sup> Che biajb nisguij, biäjt nis gueuu, gubi' bej, bidinreni yejc yu'ga sas di yu'ga niajb sa'csi sojbni yejc guilajga. <sup>26</sup> Nani riejn diajgni xtidxä, luxh dini guzoob xtidxä najc si'c te beñ gualajz nani basoob rolijzni lo yujxh. <sup>27</sup> Che biajb nisguij, biäjt nis gueuu, gubi' beduxh bidinreni yec yu'ga. Dxejc ligurebän yu'ga. Lacti xhiroob banijt beñga.

<sup>28</sup> Che gulujx gunii Jesús rediidxga, lacti bidxeloj rebeñ rediidx ni baluiini, <sup>29</sup> sa'csi baluiini rebeñ si'cpac te nani rnibee, xhet si'c ruluiidi rebeñ ni najn leii.

## 8

*Rusiajc Jesús te beñ ni ral tiejxhni*

*(Mr. 1:40-45; Lc. 5:12-16)*

<sup>1</sup> Che biäjt Jesús yec dajn, xhidajl beñ huinajlni. <sup>2</sup> Dxejcti biääd te beñracxhuu ni ral tiejxhni nez loj Jesús. Bazuxhibni, räjzni:

—Dad, palga rlanjzlu, sajc gusiajclu narä.

<sup>3</sup> Dxejcti basгаа Jesús ñaani, gudajznni dade'ga con ñaani, räjzni:

—Rlazä jiajclu. Siajc tiejxhlu.

Lagajc dxejc gubica j guejdx ni raĵ tiejxhni. <sup>4</sup> Dxejcti räjp Jesús lojni:

—Arniä, rut lojdi gäblu xhi guzajclu. Huijtis lo rebixhojz te badeed gojn ni gunii to Moisés gudeed bejn ni riajc, te fii rebixhojzga abiajclu.

*Rusiajc Jesús te xmos capitán roman*

*(Lc. 7:1-10)*

<sup>5</sup> Che biu' Jesús guedx Capernaum, bidzujn te capitán roman nani rnibee te gayuu soldaad. Gunabduxhni lo Jesús, <sup>6</sup> räjpni:

—Dad, xmosä naga' rolizä. Di gacdi guiniibni luxh cayanduxhni.

<sup>7</sup> Räjp Jesús:

—Do'o te gusiacäni.

<sup>8</sup> Dxejcti räjp capitán lojni:

—Dad, xhet sacädi; di nungäjl jiu' guejblu rolizä. Guiniitis te diidx, siacgajc xmosä.

<sup>9</sup> Narä nacäza xmos rebejn ni rnibee, niluxh rnibeäza te gayuu soldaad. Che rniä lo tejni: “Huij”, rijni. Che gäpä loj steeni: “Gudaa”, riädgajcni. Che gäpä loj xmosä: “Bejn dee”, rungajcni.

<sup>10</sup> Che biejn diajg Jesús si'c, bidxeloduxhni, räjpni loj renani siädna jni:

—Rniliäpac lojtu, nicla neñ guideb reguedx Israel dina nidxälä te bejn ni rililajz si'c rililajz dade're. <sup>11</sup> Niluxh rniä, sirii xhidajl beñzajt nez ladjiaa, nez ladjiat, te jiädcuenäjreni Abram, Isaac, Jacob lajdx Dios xhaguibaa. <sup>12</sup> Luxh rebeñ Israel nani niajc xi'n Dios sijreni te laad lo yälkäjy cadro soonreni, sauya'reni läjyreni, sidejdtisreni trabajw par tejpas.

<sup>13</sup> Dxejcti räjp Jesús loj capitán:

—Gubi' rolijzlu. Sigajcni huililajzlu, sigajcza gacni.

Dxejc lagajc orga biajc xmosni.

*Rusiajc Jesús xnansueegr Pedr*

*(Mr. 1:29-31; Lc. 4:38-39)*

<sup>14</sup> Che bidzujn Jesús rolijz Pedr, bahuiini naga' xnansueegr Pedr, cayacxhuuni, yu'ni xliaa. <sup>15</sup> Dxejc gudajntis Jesús naani, birigajcni xliaaga. Dxejcti huistie nane'ga, gusloj cagudeedni xhi gau Jesús.

*Rusiajc Jesús xhidajl beñ racxhuu*

*(Mr. 1:32-34; Lc. 4:40-41)*

<sup>16</sup> Che biu' guxhijn, biädnäreni loj Jesús xhidajl bejn ni yu' rebeñdxab lotooreni; con xtiidxni gunibeeni birii guiraa rebeñdxabga. Basiajczani guiraa rebeñ racxhuu. <sup>17</sup> Si'c bejn ni te guzobj diidx ni bacuaa todad Isaías, ni gunii xtidx Dios, che räjpni: Lagajc laani cua'ni rexcälracxhuunu, sanäzani rexcälñayannu.

*Reni rlajz ninajl Jesús*

*(Lc. 9:57-62)*

<sup>18</sup> Che bahuii Jesús tre' xhidalduxh rebejn guideb gabi cadro suga'ni, gunibeeni tednäjni rexpejn pacni stelaad ro' nis. <sup>19</sup> Dxejcti biäd te beñnajn loj Jesús, räjpni:

—Mastr, sisiaäza cadrotis chäälu.

<sup>20</sup> Räjp Jesús lojni:

—Rebäjz rajpreni xpiliääreni, remane' ni rutajt xhaguibaa rajpreni xpitiääzreni, niluxh narä Xi'n Dios ni gujc Niguii dina gapä cadro gaa yecä.

<sup>21</sup> Stee rexpejn pacni räjp lojni:

—Dad, basaan chaxgaä ladxä te chacuatzá xtadä.

<sup>22</sup> Räjp Jesús lojni:

—Gudanajl narä. Basaan sugucua'tz resabengutreni rebejn nani najc si'c bengut sa'csi najcreni beñdojl.



*Basiacdxí Jesús te beduxh**(Mr. 4:35-41; Lc. 8:22-25)*

<sup>23</sup> Che biu' Jesús neñ barcw, biu'za rexpejn̄pacni lagajc neñga. <sup>24</sup> Dxejc huäjs te bedonduxh lo nisdoo. Lirusiääzni barcw neñ nisdoo. Luxh Jesús nagayejsni. <sup>25</sup> Dxejcti huij rexpejn̄pacni huicuäänni, räjpreni:

—Dad, gucnäj nuure te di guetnu.

<sup>26</sup> Dxejc räjp Jesús:

—¿Xhicuent rdxejbtu, bejn̄ ni guxii rililajz?

Dxejcti huistieni, gudidxa'ni lo bej näjza lo nisdoo, te biacdxireni. <sup>27</sup> Dxejc bidxelo-duxh rexpejn̄pacni, räjpreni:

—¿Chuni'c najc niguiire? ¡Ahuilaa xho rucuadiajg bej näjza nisdoo xtiidxni!

*Rebendxab ni yu' lajdx regadarenos**(Mr. 5:1-20; Lc. 8:26-39)*

<sup>28</sup> Che bidzujñ Jesús stelaad nisdoo cadro najc lajdx regadarenos, tio'p bejn̄ ni yu' bendxab lastooreni biädchaglojreni Jesús. Rebejn̄ga riireni neñ rebaa, nialazduxhreni, ni'cni rut rajcdi rdejd nezyujga. <sup>29</sup> Guredxa'reni räjpreni:

—¿Xhicuent siädchu'lu loonu luj ni najc Jesús Xi'n Dios? ¿La siäädlu ree te gusacsílu nuure luxh gad galđi xor̄nu, ä?

<sup>30</sup> Nez te laad, zijte' cadro suga'reni, cayajp bejn̄ xhidalro cuch. <sup>31</sup> Dxejcti gunab rebendxabga loj Jesús, räjpreni:

—Palga cuäálu nuure, basaan jiu'nu neñ recuchre.

<sup>32</sup> Dxejcti räjp Jesús:

—Colchäj.

Dxejcti biriireni neñ lastoo redade'ga, huichu'reni neñ recuchga. Dxejcti guiragajc recuchga caguxun̄reni, huitejbreni ro' te guilaj, biääzreni neñ nisdoo, gujttireni neñ nis.

<sup>33</sup> Rebejn̄ ni cayajp recuchga, baxun̄reni, huijreni lajdxreni, huiyeireni diidx guiraa ni guzajceni näjza ni guzajc redade' ni guyu' rebendxab lastooreni. <sup>34</sup> Dxejcti guiraa rebenguejdxga huichaglojreni Jesús. Che bahuiireni lojni, gunabduxhreni lojni, jiunejzni lajdxreni.

**9***Basiajcx Jesús te bejn̄ nani abixu'ñ tiejxhni**(Mr. 2:1-12; Lc. 5:17-26)*

<sup>1</sup> Dxejcti biu' Jesús neñ barcw. Gudejdn̄i stelaad ro' nis te bidzujñni lajdxni. <sup>2</sup> Ro'c biädnäreni lojni te bejn̄ nani abixu'ñ naani, ni'ni. Naga'ni lo te da'. Che bahuii Jesús lacti rililajzreni, räjpni loj benracxhuuga:

—¡Baspaa lajzlu xi'nä! Agubicaj rextojllu.

<sup>3</sup> Dxejcti gaii benñajn̄ ni ruluii xleii Moisés cayujn̄reni xhigab ensilaareni, caniyaj dee Dios con rextiidxni. <sup>4</sup> Dxejc gucbegajc Jesús xhi xhigab cayujn̄reni, dxejc räjpni lojreni:

—¿Xhicuent cayujntu xhigabguijdx neñ lastootu? <sup>5</sup> ¿Con ni najc guyasiru? Guiniä lo te bejn̄: “Agubicaj rextojllu”, o guiniä lo te bejn̄: “Huistie, guzaj.” <sup>6</sup> Dec gunä te gacbeetu Xi'n Dios ni gujc Niguii rajp yäl̄rnibee lo guedxliujre te gudzucajni dojl.

Dxejcti räjpni loj benracxhuuga:

—Huistie, cua' xta'lu, huij rolijzlu.

<sup>7</sup> Dxejcti huistie benracxhuuga, siini rolijzni. <sup>8</sup> Che bahuii rebejn̄ lojni, bidxelo-duxhreni, gulä'preni xpala'n Dios, ni badeed yäl̄rnibeega loj rebejn̄.

*Che gurejdx Jesús Mateo**(Mr. 2:13-17; Lc. 5:27-32)*

<sup>9</sup> Dxejcti birii Jesús cadro basiajcní beṇracxhuu, sä'tini. Dxejc bahuiini loj te dade' ni laa Mateo. Sobga'ni loj te yagxhiil cadro rbej reni ruquijx xcuent guiraloj. Dxejc räjp Jesús lojni:

—Gudanajl narä.

Dxejcti huisuni, sanajlni Jesús.

<sup>10</sup> Cheni sobga' Jesús lo mex cayajwreni rolijz Mateo, biäädza xhidajl rebejn nani ruquijx xcuent guiraloj, ni najc rebejn ni di gac xpeṇ Israel, gurejzareni lo mex näj Jesús näjza reni najc rexpejnṇpacni. <sup>11</sup> Che bahuii rebeṇ guidoo, ni laa refarisee, xhi cayujn Jesús, räjpreni loj rexpejnṇpac Jesús:

—¿Xhicuent raunäj xmastrtu rebejn nani ruquijx xcuent reyuj näjza rebejn ni di gac xpeṇ Israel?

<sup>12</sup> Che biejn diajg Jesús xhi guniireni, räjpni lojreni:

—Rebejn nani nadaan dini guiquiin chu gusiajcní, niluxh rebejn racxhuu ni'c rquiinreni chu gusiajcní. <sup>13</sup> Colchäj te colchaseed xhi säloj diidxre ni caj loj reguijtz: “Yälrlulaslajz rlazä, dina rlazä guniidxtu guidxaa loä.” Sa'csi narä dina niädtedxä rebeṇsa'c, narä siädtedxä rebeṇdojṇ te gusiechlajzreni.

*Gunabdiidxreni xcuent yälrucua'n*

*(Mr. 2:18-22; Lc. 5:33-39)*

<sup>14</sup> Dxejcti biääd rexpejnṇpac Juan loj Jesús räjpreni:

—Nuure con refarisee rcua'nnu xhidäl huält, ¿xhicuent di rexpejnṇpac lu gucua'n, ä?

<sup>15</sup> Räjp Jesús lojreni:

—Che ruchṇaa te bi'n, ¿xhixh rac-huin lajz regolnejdx laga suga' bi'n con laareni? Palga yu' xhi sac bi'nga, dxejc sii soonreni, sucua'nreni.

<sup>16</sup> Rut gundi remiend te ladbiejw con te la' ladcoob sa'csi sixu'n ladcoobga, sutiäjsruni ladbiejwga, sajc xhiroobru cadro biräjsga. <sup>17</sup> Niclaza gac guida' bincoob neṇ reguidbiejw, sa'csi reguidbiejw siräjsni dxejc sixe' bin, sinijtza reguijdgä. Ni'cni nanab guida' bincoob neṇ reguidcoobza, te si'c nicla tejreni di nit.

*Xindxa'p Jairo näjza gunaa nani gudajn xhajn Jesús*

*(Mr. 5:21-43; Lc. 8:40-56)*

<sup>18</sup> Laṇ ni caniini rediidxga, biääd te dade' ni rnibee neṇ guidoo xten rexpejn Israel. Bazuxhijbni nez loj Jesús räjpni:

—Entis gujt xindxa'pä. Gudaa, badzuub ṇaalu yejcní te guibaṇsacni.

<sup>19</sup> Dxejcti huisu Jesús, sanäni Jairo. Näj rexpejnṇpacni sanajlrenini. <sup>20</sup> Luxh guyu' te gunaracxhuu nani agujc tzubitio'p ijz cayajcní yälguidxbäii. Bidzujṇni nez dejtz Jesús, gudajṇni ro' xhajn, <sup>21</sup> sa'csi bejṇni xhigab neṇ lastooni: “Palga sajc canätis ro' xhajn, siacä.” <sup>22</sup> Dxejc gubiré Jesús bahuiini loj gunaaga, dxejc räjpni:

—Gulecdxilajzlu xindxa'pä. Yälirililajz xtenlu abasiajclu.

Luxh lagajc dxejc biajc gunaaga.

<sup>23</sup> Cheni biu' Jesús rolijz dade' nani rnibee neṇ xquidoo rexpeṇ Israel, bahuiini rebejn ni roṇ bizej näjza xhidajl rebejn ni cabedxa' cayoon, li te biejy cayajc, dxejc <sup>24</sup> räjpni loj rebejṇga:

—Colguibicaj. Nagayejstis dxa'pga, gajdni guet.

Dxejc rebejṇga alga ruxhiznäjreni Jesús. <sup>25</sup> Cheni abirii rebejn neṇ yu', biu' Jesús, gunaazni ṇaa dxape', dxejc huistie dxape'ga. <sup>26</sup> Dxejcti bire'ch diidxga guiraa neṇ reguejdx ni tre' nejzga.

*Basiajc Jesús tio'p lotiä'p*

<sup>27</sup> Che birii Jesús ro'c, huinajl tio'p bejṇni nani di fii. Rbedxa'reni roonreni räjpreni:

—Balaslajz nuure, Xi'n toDavid.



<sup>28</sup> Che bidzujñ Jesús cadre caya'nni, gubigreni lojni. Dxejcti gunabdiidx Jesús lojreni, räjpn:

—¿La rililajztu sajc gunä ni rniabtu?

Redade'ga basejc diidx, räjpreni:

—Sajc gunluni, Dad.

<sup>29</sup> Dxejcti gudajnni balojreni, räjpn:

—Sugacni si'cpacni rililajztu.

<sup>30</sup> Lagajc dxejc bixal balojreni. Sas räjppac Jesús lojreni:

—Arniä, na'c chayeitu diidxre, te rut gacheedi xhi guzajctu.

<sup>31</sup> Cuantsi biriireni ro'c guslojreni cagutie'chreni diidx xcuent Jesús guideb gabi neñ reguejdxga.

### *Basnii Jesús te gop*

<sup>32</sup> Che biriireni cadre biajc baloj rebejnğa, biääd sgaii bejn biädnäreni te gop loj Jesús. Yu' xpriit beñdxab neñ lastoo bejnğa. <sup>33</sup> Che barilaagw Jesús xpriit beñdxab neñ lastoo beñgopga, guslogajcni caniini. Rdxeloduxh rebejn räjpreni:

—Gajdpacnu guihui sa' redzuunre lajdx rexpejn Israel.

<sup>34</sup> Dxejc rebeñ guidoo ni najc refarisee, räjpreni:

—Rbääni rexpriti beñdxab con yälrnibee xten beñdxabro.

### *Rulaslajz Jesús rebejn*

<sup>35</sup> Gudejd Jesús guiraa reguedxro näjza reguedxbäz, basule'ni xtidx Dios neñ reguidoo xten rexpejn Israel. Basääbni diidx xten xcälrnibee Dios. Basiajczani guiraloj yälracxhuu, guiraloj yälguidx ni rajc bejn neñ reguejdxga. <sup>36</sup> Che bahuiini loj rebeñ xhidajl biaduxhni rebejnğa sa'csi rdebya' lajzreni, rac-huin lajzreni, najcreni si'c najc rexiiil nani di ga'p baxtoor. <sup>37</sup> Dxejcti räjpn loj rexpejn pacni:

—Guliipac xhidalduxh beñ guedxliuj di gan xtidxä, luxh guxii najc reni guluiireni; najcni si'c gäjł ni agojl guilia', niluxh ruti mos ni guilia'ni. <sup>38</sup> Colnab lo Dad nani najc xtenni guedxliujre te guxhalni rebejn ni sajc guluii rebeñ guedxliujre, gacreni si'c mos ni rlia' gäjł.

## 10

### *Gule Jesús guitzubitio'p rexpejn pacni*

(Mr. 3:13-19; Lc. 6:12-16)

<sup>1</sup> Dxejcti gurejdxni guitzubitio'p rexpejn pacni, badeedni yälrnibee lojreni te gurilaagwreni rexpriti beñdxab lastoo bejn näjza te gusiajcreni guiraloj yälguidx näjza yälracxhuu.

<sup>2</sup> Laj reguitzubitio'p rexpejn ni guleni najc: Simón, ni laaza Pedr; Andrés bejtz Simón; Jacobo xi'n Zebedeo; Juan bejtz Jacobo; <sup>3</sup> Felipe; Bartolomé; Tomás; Mateo, ni najc colectoor; Jacobo, xi'n Alfeo; Lebeo ni rniireni Tadeo; <sup>4</sup> Simón, te bejn ni yu' loj recananita; Judas Iscariote, nani bateed Jesús ladznäa rebejn nani rdxe'ch lojni.

### *Baxhal Jesús rexpejn pacni gutie'chreni diidx*

(Mr. 6:7-13; Lc. 9:1-6)

<sup>5</sup> Guitzubitio'p rebejnre baxhal Jesús. Balijdxniren räjpn:

—Na'c chäätu nez cad yu' rebejn ni di gumbee Dios. Na'c jiu'tu lajdx rebeñ samaritan.

<sup>6</sup> Colchäxgaa lo rexpejn Israel nani agunijt neñ dojl. <sup>7</sup> Colchäj, colzäbdiidx lo rebejn, colye'tz lojreni xcälrnibee Dios abidzunağaxh. <sup>8</sup> Colgusiajc beñ racxhuu, colgusiajc tiejxh rebejn ni ral guejch tiejxhreni, colguspajn beñgut. Colgurilaagw xpriit beñdxab lastoo rebejn. Ligaj cua'tu yälrnibee, ligajza colyejn dzuun.

<sup>9</sup> Räjpzani:

—Na'c chanätu oor, niclaza pla't, niclaza coobr nen̄ xdobdäjltu, <sup>10</sup> niclaza guijxh na'c chanätu lo nejz. Na'cza chanätu tio'p xhajbtu, nicla gura'ch, nicla baston̄ sa'csi bejn̄ ni rujn̄ dzuun nungäj̄l xca'ni xhi gauni.

<sup>11</sup> Räjpzani:

—Che guidzujntu xhitis te guedxro, xhitis te guedxbäz, col̄quiil te beŋsa'c. Rolijztisni col̄jia'n dxejli ni jiunejztu guejdxga. <sup>12</sup> Cheni jiu'tu nen̄ yu', col̄nii xtidx Dios lo rebejn̄ga. <sup>13</sup> Palga najcreni bejn̄ ni numbee Dios, sujia'n yäl̄rbedxilajz loj rebejn̄ga. Niluxh palga direni gac beŋsa'c, naaddireni xca'reni xtidx Dios, suguibi' yäl̄rbedxilajzga lojtu, col̄jiunejz ro'c. <sup>14</sup> Palga direni gusaan jiu'tu rolizreni, palga di rlanjreni gucuadiajgreni xtiidxtu, dxejc col̄jiunejz roliz bejn̄ga, o col̄jiunejz guejdxga, dxejc col̄cuijb guxhuj ni'tu si'c te seen gulälazreni xtidx Dios. <sup>15</sup> Rniliäpac lojtu, dxej ni gun Dios xcäl̄guxhtisni, te yäl̄guxhtisoru gun Dios rebejn̄ga, quela yäl̄guxhtis ni gujc reben̄ guedx Sodoma näj Gomorra.

### *Yäl̄rusacsí ni siääd*

<sup>16</sup> Räjpzani:

—¡Col̄huiire! Narä suxhalä la'tu si'c xile' nez loj reloob, ni'cni col̄gacnasiñduxh si'c najc te bäl̄, col̄yajcza nadolajz si'c te palom. <sup>17</sup> Col̄natiro rebejn̄ sa'csi suteedreni la'tu ladzn̄aa rexcuxhtisreni, siguijnzareneni la'tu nen̄ xquidooreni. <sup>18</sup> Sinäzareneni la'tu nez loj regubier, nez loj rereii xcuent rextidxä, te gusule'tu xtidxä nez lojreni näjza nez loj rebejn̄ nani di gumbee Dios. <sup>19</sup> Cheni chanäreneni la'tu nez loj reguxhtis, na'c guntu xhigab xho guiniitu, niclaza guntu xhigab xhicha ni'c guiniitu, sa'csi lagajc Dios suniidx diidx guiniitu orga. <sup>20</sup> Sa'csi et la'ditu ni guinii dxejc, Sprit xten Xtadtu Dios ni yu' nen̄ lastootu, laani guinii nen̄ lastootu.

<sup>21</sup> 'Luxh rebejn̄ suteedreneni lagajc bejtzreneni ladzn̄aa reni ju'treni. Redad suteedreneni lagajc xi'nreneni, rexi'n bejn̄ sidxe'chzareneni lo xcuzajnreneni te ju't bejn̄ xcuzajnreneni. <sup>22</sup> Guiraa rebejn̄ guedxliuj sidxe'chreneni lojtu xcuent xtidxä. Nani chanuu lo xtidxä dxej lultli, ni'c sujn̄ gaan yäl̄nabajn̄ par tejpas. <sup>23</sup> Che guirinajlreneni la'tu te gusacsíreneni la'tu nen̄ te guejdx, col̄guxun̄ ro'c, col̄chäj stee guejdx. Rniliä lojtu, ditu gun gaan tedtu guiraa reguejdx xten rexpejn̄ Israel ansde jiääd Xi'n Dios ni gujc Niguii.

<sup>24</sup> 'Di te bejn̄ ni casieedgaj ben̄roru lo xmastrni, diza te mos gac ben̄roru lo xlam̄ni. <sup>25</sup> Te bejn̄ ni casieed, rsieedruni te gacni si'c najc xmastrni, sigajcza rujn̄ mos, riuni xtidx xlam̄ni te gacni si'c najc xlam̄ni. Palga rbälajreneni Beelzebú nani rnibee ben̄dxab, ¿xho direni cuälajza Beelzebú rexi'nni, ä?

### *Chuni'c nanab guidxejbni*

*(Lc. 12:2-9)*

<sup>26</sup> Räjpzani:

—Ni'cni na'c guidxejbtu rebejn̄, sa'csi anajntu xheti te cos ni niäuu lojni ni di guidzujn̄ dxej guixal lojni, te fii chutis bejn̄ lojni. Xhetiza te cos xhiga'tzdi ni di guidzujn̄ dxej siejn̄ diajg bejn̄ xcuentni. <sup>27</sup> Diidx nani rniä lojtu guxhij̄n, col̄guiniini che nianij lo guedxliuj. Rediidx nani rniä chigaj rodiajgtu, col̄guiniini dip, jiaali col̄zuj, guredxa' te jiejn̄ni. <sup>28</sup> Na'c guidxejbtu renani rugu't bejn̄, sa'csi direni gun gaan ju'treni xaim bejn̄. Col̄guidxejbru nani rugu't tiexh bejn̄ näjza xaim bejn̄ nen̄ gabijl.

<sup>29</sup> '¿La di bejn̄ guto' tio'p manbäz ni rutajt por te centaab, ä? Luxh racbee Xtadnu ni yu' xhaguibaa che riajb tejni lo yuj. <sup>30</sup> Näjza rexquidxejclu nagab tebgajreneni. <sup>31</sup> Ni'cni rniä na'c guidxejbtu; sajcrutu lo te chinaa manbäz ni rutajt.

### *Renani rusule' xtidx Jesucrist nez loj rebejn̄*

*(Lc. 12:8-9)*

<sup>32</sup> Räjpzani:

—Chutis renani rusule' xtidxä nez loj rebejn, narä siniäza xcuentni nez loj xtadä ni yu' xhaguibaa. <sup>33</sup> Guiraa renani di gusule' xtidxä nez loj rebejn, sigajcza narä dina guiniä xcuentni nez loj xtadä ni yu' xhaguibaa.

*Rlia' Jesús sa' bejn*

*(Lc. 12:51-53; 14:26-27)*

<sup>34</sup> Räjzani:

—Na'c guntu xhigab siädnää yälrbexilajz lo reben guedxliujre, xhet yälcedxidi ni siädnää, yälrdxagdijl siädnää. <sup>35</sup> Narä siädnää yälrdxagdijl te bi'n con xtadni; te dxa'p con xnanni; te gulijzni con xnansueegrni. <sup>36</sup> Ni'cni lagajc resa'tu ni yu' rolijztu sidxe'chreni lojtu.

<sup>37</sup> Nani sanälajzru xtadni, xnanni, luxh narä dini chanälajz, digacdi gacni xpenä; nani sanälajzru xingaanni o xindxa'pni, di gacdiza gacni xpenä. <sup>38</sup> Nani di guu xcrujzni, nalajznu tedni trabajw, jädnaajni narä, di gacdi gacni xpenä. <sup>39</sup> Nani guidxäl xcäl'nabajjni lo guedxliujre, sunitni yäl'nabajn xhaguibaa. Luxh nani gunijt xcäl'nabajjni lo guedxliujre xcuent rextidxä, sidxälni yäl'nabansa'c xhaguibaa.

*Gaan nani xca'ni*

*(Mr. 9:41)*

<sup>40</sup> Räjzani:

—Nani guniidx rolijzni jia'ntu, runiidxzani rolijzni jia'nä; luxh nani ruscuääz narä rolijzni, rolijzni ruscuääzzani Gueb Dios nani baxhal narä. <sup>41</sup> Nani guscuääz te niguii ni rnii xtidx Dios rolijzni sa'csi baxhal Dios niguiiga, sica'za bejnga lagajc gaan ni xca' niguii ni rnii xtidx Dios. Nani guscuääz te beṅsa'c rolijzni sa'csi beṅsa'cni, sica'zani lagajc gaan ni xca' beṅsa'cga. <sup>42</sup> Chutis nani gudeed mase te xhijgtis nis niäljuj xcuentä lo rebiuxe're, rniliäpac lojtu, direni gunijt, sica'pacreni nani nungäj xca'reni.

## 11

*Renani baxhal Juan Bautist loj Jesús*

*(Lc. 7:18-35)*

<sup>1</sup> Che gulujx baluii Jesús rexpejn pacni xho gunreni dzuun, dxejcti biriini ro'c te saluiini, chasule'ni diidx lajdx rexpejn pacni.

<sup>2</sup> Juan yu' neṅ latzguiib. Che biejn diajgni xhi cayujn Jesús, baxhalni tio'p xpejn pacni <sup>3</sup> te huinabdiidxreni:

—¿La luj ni najc Crist ni jiaäd, ä?, o ¿la silääznu chu stee bejn?

<sup>4</sup> Dxejcti badzu' Jesús diidxre räjpni:

—Cołchäj, colye'tz loj Juan recos nani riejn diajgtu, näjza recos nani ruhuiitu. <sup>5</sup> Reni di fii, ruhuiireni; reni di sa, arsiäjreni, reni rał tiejxhni, abiajč tiejxhreni; reni di jien diajg, ariejn diajgreni; rebengut, ahuaäjzreni, gubansacreni. Dxejcti loj rebejn proob nani cabäjz xcälracnäj Dios cagusule'reni xtidx Dios ni ruslaa bejn neṅ dojl. <sup>6</sup> Chicbaa renani di jieed narä.

<sup>7</sup> Cheni sii rebejnga gusloj Jesús canii loj rebejn xcuent Juan:

—¿Chuni'c huihuiitu nez loj reyubijdz? ¿La te biquii ni rusniib bej, ä? <sup>8</sup> ¿Xhini'c huihuiitu? ¿Te bejn ni sucheduxh, ä? Ni najntu rebejn nani sucheduxh rbäjzreni rolijz rereii. <sup>9</sup> La'tu ¿xhicuent huijtu ro'c? ¿Te fiitu te niguii ni rnii xtidx Dios, ä? O'n. Rniliä lojtu, luxh dini gac bejntis ni rnii xtidx Dios; beṅroruni. <sup>10</sup> Laa Juan nani rusä't ni bacuaa lo reguijtz cadre caj scree:

Narä suxhalä te niguii nani guinii xtidxä nez lojlu;  
laani susucheeni nezyuj nezlojlu.

<sup>11</sup> Guliipac rniä, loj guiraa rexingaän xten gunaa, nicla tejni gajd guiricaj ni najc te beṅsacduxh loj Dios si'c ni najc Juan Bautist. Niluxh bejn nani najc beṅ huinru lo xcälrnibee Dios xhaguibaa, bejnga maazru sajcnii loj Juan.

<sup>12</sup> 'Cheni gucli dxej ni gusloj rusule' Juan Bautist diidx najli, yu'duxh reni rlanjpac jiu'reni lo xcäl'nibee Dios ni yu' xhaguibaa con yälrdxe'ch, sas reni nadxecha' rlanjreni cuäxuuni xcäl'nibee Dios. <sup>13</sup> Guiraa reniguii ni gunni xtidx Dios näjza xleii Moisés, gunixgaareni recos ni churu gac, galooli hasta che biäädli Juan Bautist. <sup>14</sup> Palga rlanjztu chalilajztu, lagajc Juan najc Elías, niguii xten Dios nani bia'n diidx jääd. <sup>15</sup> Nani sobdiajg diidx, gucuadiajgni.

<sup>16</sup> ¿Xhicojn guntebloä rebejn nani tre' naj, ä? Najcreni si'c najc rebiuux nani rguijt nez lo guii cadro rdo', rbejdxreni lo sa'reni, <sup>17</sup> rniireni: "Bielnu bizej te guya'tu luxh ditu nuya'. Dxejcti bielnu redij ni nabaduxh luxh dizatu nioon." <sup>18</sup> Sa'csi che biääd Juan dini niajw dizani niä', luxh räjp rebejn najcni te xpejn bendxab. <sup>19</sup> Dxejcti biälä narä, Xi'n Dios ni gujc Niguii, rauä, rä'ä dxejcti räjp rebejn: "Niguiire rauxha't, rätejzani bin, najcni xamigw rebendojl näjza reniguii ni ruquijx xcuent reyuj ni rajx lo gubier." Luxh loj rebejn ni najc xpejn Dios yuduxh xcäl'najn Dios, ni'cni baxhalni guiro'p rebejnre.

### *Reguejdx gualajz (Lc. 10:13-15)*

<sup>20</sup> Dxejcti gusloj Jesús gudil'näjni rebenguejdx cadro benduxhni remilaagwr, sa'csi naaddireni gusiechlajzreni xtojlneni, sanuutis nabajlneni nen dojl. Dxejcti räjpni:

<sup>21</sup> —¡Gumatiru guedx Corazín! ¡Gumatiro guedx Betsaida! Paru nen guedx Tiro näjza guedx Sidón niajc remilaagwr nani gujc guedx lajdxtu, cadxejli nusiejch lajzreni xtojlneni, cadxejli niajcwreni nen godx, nidäáb cobdäj yejcreni. <sup>22</sup> Luxh rniä lojtu: che guidzujn dxej ni gun Dios xcäl'guxhtisni, sidejdrutu castiigw loj rebejn ni guläjz guedx Tiro näjza guedx Sidón. <sup>23</sup> Luj guedx Capernaum di gunlu xhigab chäslu xhaguibaa; jäjt nen baa jiajblu, sa'csi paru nen guedx Sodoma niajc sa' remilaagwr nani gujc guedx lajdxlu, pet najli tresijc guejdxga. <sup>24</sup> Luxh rniä lojtu, dxej ni gun Dios xcäl'guxhtisni, trabajwduxhru tedtu loj rebejn Sodoma.

### *Coltaa loä, te gusilajztu (Lc. 10:21-22)*

<sup>25</sup> Laa dxejcnä räjp Jesús:

—Rliä'pä xpala'nlu Xtadä, Dad xten xhaguibaa näjza guedxliuj, sa'csi bacua'tzlu recosre lo rebenajn, lo rebejn ni racbee, te baluiiluni loj rebenadolajz ni najc si'c biuxbäz. <sup>26</sup> O'n. Guliini, Xtadä, sa'csi rujnlu xhigab si'c najc hueen gacni.

<sup>27</sup> Guiraa recosre abaniidx Xtadä loä, rutru numbeedi xingaanni; xtadtisni rumbeeni. Rutruza numbeedi xtadni, xtebtis xingaanni, näjza loj renani gudeed xingaanni gumbee xtadni. <sup>28</sup> Coltaa loä guiraatu nani abadxajg, nani rsina', narä sunidxä yäl'rusilajz lojtu. <sup>29</sup> Colguisheed guntu dzuun si'cni ruluiätu. Colhuiu xho runä, xho nacä nadolajz, dizana gacä ben'nayedxlajz nen lastoä, ni'cni sidxäl xaimtu yäl'rusilajz. <sup>30</sup> Sa'csi guyasi najc xtzunä ni ruluiätu, dizani gac naganduxh.

## 12

### *Rutie' rexpejn Jesús triuu dxej ni rusilajzreni (Mr. 2:23-28; Lc. 6:1-5)*

<sup>1</sup> Che sasaj Jesús nez loj reyuj cadro naga' triuu, luxh dxejga najc dxej ni rusilajz rexpejn Israel, calaan rexpejnpacni, guslojreni calädxa'reni dojl lo triuu te cayajwrenini.

<sup>2</sup> Che bahuii reben guidoo ni laa farisee, räjpreni loj Jesús:

—Ahuii xho rujn rexpejnpaclu dzuun nani di nungäjl gunreni dxej nani rusilajz bejn.

<sup>3</sup> Luxh laani räjpni lojreni:

—¿La gajdtu gojl xhi caj loj reguijtz xcuent ni bejn toDavid che gulannäjni rexpejn, ä?

<sup>4</sup> Biu'reni xquidoo Dios, gudajwreni yätxtiil nani di nungäjl gauni, nicla laani, niclaza rebejn nani sanäni, sa'csi yätxtiilga rebixhojztis rajwni. <sup>5</sup> O ¿la gajdtu gojl lo reguijtz

xten leii cadro caj xcuent rebixhojz, ä? Laareni riu'reni nen reguidoo dxej ni rusilajz bejn, rujnreni xtzunreni niluxh xhet dojldi rujnreni. <sup>6</sup> Narä rniä lojtu, ree suga' tej nani sajcro loj guidooga. <sup>7</sup> Paru niacbeetu xhi säloj dee: “Yälrlulaslajz rlazä, xhet yälrejtdi guidxaa”, ditu nucuaquij redee ni xhet bejndi. <sup>8</sup> Sa'csi narä Xi'n Dios ni gujc Niguii rnibeä dxej ni rusilajz rebejn.

*Niguii ni rxu'n naani*

*(Mr. 3:1-6; Lc. 6:6-11)*

<sup>9</sup> Che birii Jesús ro'c, biu'ni te xquidobäzreni. <sup>10</sup> Ro'c suga' te bejn ni gubijdz te naani. Luxh sa'csi caguilreni xho gucuaquijreni Jesús, gusloj canabdiidxreni lojni, räjpreni:

—¿La rusaan leii gusiajcnı beñracxhuu dxej ni rusilajz bejn, ä?

<sup>11</sup> Badzu' Jesús diidxre lojreni, räjpni:

—Chutejtu ni rajp te xiil niluxh palga guitejbni nen bisie che gal dxej ni rusilajz bejn, ¿xhixh dini cuää xiilga nen bisie, ä? <sup>12</sup> Sacduxhru te bejn loj te xiil, ni'cni susaan leii gun bejn dzunsa'c dxej nani rusilajz bejn.

<sup>13</sup> Dxejcti räjpni loj dade'ga:

—Baslii naalu.

Che basliinini, dxejc biajc naani, gujcnı tebloj si'c najc stelaad naani. <sup>14</sup> Dxejcti birii reben guidoo ni laa farisee, bachagsa'zarenı te bia'nrenı diidx ju'trenı Jesús.

*Diidx ni guniireni xcuent Jesús*

<sup>15</sup> Che gucbee Jesús xhi xhigab cayujnreni, biriini ro'c. Xhidajl bejn sanajlnı, dxejc basiajc Jesús guiraa rebenracxhuu. <sup>16</sup> Dxejc räjpni lojreni:

—Na'cpac gäbrenı chu najcni.

<sup>17</sup> Si'c gujc te gusojb diidx ni gunii Isaías ni gunii xtidx Dios che räjpni:

<sup>18</sup> Deeni najc xmosä nani aguleä, laani sanälazä, laani rbanälazä, sudedä sprit xtenä lojni te gusule'ni yälğuxhtis xtenä lo guedxliuj.

<sup>19</sup> Dini tilnäj bejn, dizani cuedxa'; rudza jiejni diajgni xse'ni lad nezyuj.

<sup>20</sup> Dini qui'ch nicla te nijt ni cabiejc, dizani gusuii te duxiil ni cayujn guxh, dxejli che gunni gaan guinibeenı yälğuxhtis.

<sup>21</sup> Lajtisni sustioob lastoo reben ni digac xpejn Israel.

*Rucuaquijreni Jesús rajpni yälrnibee xten bendxab*

*(Mr. 3:19-30; Lc. 11:14-23; 12:10)*

<sup>22</sup> Dxejcti biädnärenı loj Jesús te bejn ni di fii, dizani guinii, yu' te bendxab lastoonı. Dxejcti basiajc Jesúsni, te gujc guniini, te gujczä bahuini. <sup>23</sup> Guiraa rebejn bidxelojrenı, räjprenı:

—¿Xhaa laa Xi'n toDavidni, ä?

<sup>24</sup> Che biejn diajg reben guidoo ni laa farisee rediidxga, räjprenı:

—Bejnre rbää rebendxab con yälrnibee xten Beelzebú ni rnibee loj rebendxab.

<sup>25</sup> Che gucbee Jesús xhi xhigab cayujnrenı, dxejc räjpni:

—Guiraa yälrnibee nani rlia' sa'ni sinitloj; te guedxro sigajc te famil nani rlia' sa'reni, nani ridilnäj sa'reni, sinitlojrenı. <sup>26</sup> Sigajczä palga bendxab rbää sabendxabni, silia' sa'reni, dxejc ¿xho gac chanuu xcälrnibeereni? <sup>27</sup> Palga narä rbää rebendxab con yälrnibee xten Beelzebú, ¿chu xcälrnibee rajc rbää rexpejntu bendxab, ä? Ni'cni lagajc laareni suluiireni xhet laadi rujntu xhigab. <sup>28</sup> Palga narä rbää rebendxab con Xpırit xten Dios, guliipacni abidzujn xcälrnibee Dios lojtu.

<sup>29</sup> 'Bahuilaare. ¿Xho gac jiu' te bejn cuan roliz te bendaan, xho gac cuanni xhixten bejnga, palga dini gulibxgaani bendaanga? Che abiliib bejnga, sajc cuanni rexhixten bejnga.



<sup>30</sup> 'Nani xhet yu'di xladä, rdxe'chni loä. Nani di jiädnaĵl narä, rutie'chni reni siädnaĵl narä.

<sup>31</sup> 'Ni'cni rniä guira'ti doĵl, guira'ti yälrusguee xte bejn saĵc gusiäĵl lajzni xtebtis yälrniyaj Sprit Dxan xten Dios di Dios gusiäĵl lajzni. <sup>32</sup> Chutis ni guinii xhi te diidx yälrniyaj Xi'n Dios ni guĵc Niguui saĵc gusiäĵl lajzni, luxh chutis ni guiniyaj Sprit Dxan xten Dios, di Dios gusiäĵl lajzni, nicla lo guedxliujre, niclaza xhaguibaa.

*Sajc gumbeetu bejn xcuent diidx ni rniireni*  
(Lc. 6:43-45)

<sup>33</sup> 'Palga nasa'c te yajg sicaj ninexhsa'c loĵni, per che di yajg gac yagsa'c, xho xcaĵ ninexhsa'c loĵni. Ni'cni huenliisi siembeetu te yajg che fitu xho najc ninejxh ni rcaĵ loĵni. <sup>34</sup> Sa' la'tu beņguijdx ni najc si'c te bäl niälasduxh, ĵxho gac guiniitu te didxsa'c?, ni ro' bejn rniitis rexhigab ni yu' neņ lastoo bejn. <sup>35</sup> Te beņsa'c rniini didxsa'c, sa'csi ganax xhigabsa'c yu' neņ lastooni, te beņguijdx rniitisni cosguijdx sa'csi ganax xhigabguijdx yu' neņ lastooni. <sup>36</sup> Narä rniäza, guiraa redidxguijdx nani rni bejn sudeedreni cuent lo Dios cheni gunni yälguxhtis, <sup>37</sup> sa'csi lagajc rextiidxlu suĵn guinii Dios najclu beņsa'c, lagajc rextiidxlu suĵn gunijtlu lo Dios.

*Rebeņguijdx rniab te milagwr si'c te seen*  
(Mr. 8:12; Lc. 11:29-32)

<sup>38</sup> Dxeĵcti rebeĵn ni rului xleii toMoisés näjza reben guidoo ni laa farisee, räĵpreni loĵ Jesús:

—Mastr, nuurnu rlaĵznu guihuiinu te seen; bejn te milagwr te finuni.

<sup>39</sup> Badzu' Jesús diidxre, räĵpni:

—Rebeņguijdx ni rusguee rniab te seen, niluxh xhetru seendi fiireni xseentis Jonás, dade' ni gunii xtidx Dios. <sup>40</sup> Sa'csi lagajc si'cni guyu' Jonás xque' te bälro choņ dxeĵ, choņ yääl, si'cza chu Xi'n Dios ni guĵc Niguui neņ lastoo guedxliuj choņ dxeĵ, choņza yääl. <sup>41</sup> Cheni gac yälguxhtis xten Dios pet sistie rebeĵn ni siääd Nínive te fiireni gac yälguxhtis rebeĵn ni tre' lo guedxliuj naj, niluxh säĵb rebeĵn Nínive abaniĵt rebeĵnre sa'csi reben Nínive basiejch lajzreni, bia xtoĵlreni che basule' Jonás xtidx Dios loĵreni. Luxh nani yu' loĵtu naj, sacduxhruni loĵ Jonás. <sup>42</sup> Näjza reiņ xten reben sur sistieni te fiini gac yälguxhtis rebeĵn ni tre' lo guedxliujre naj, niluxh näjzani säĵbni abaniĵtreni. Sa'csi laani zitduxh biriini te biädcuadiaĵgni reyälnajn xten Salomón, luxh nani yu' loĵtu naj nanduxhruni loĵ Salomón.

*Te spritdxuudx ni rbisac*  
(Lc. 11:24-26)

<sup>43</sup> Räĵpzani:

—Cheni rii te spritdxab neņ lastoo te bejn, ricanzajni nez lo reyubijdz, ritiilni cadro gusilajzni, per cad rdxäldini. <sup>44</sup> Dxeĵcti rujnni xhigab, naani, guibisacä cadro biriä. Cheni rbisacni ro'c, rdzujņni si'c rdzujņ te bejn neņ te yu' ni naya neņni, naliobsa'cni, sucheeni, luxh rut rbäĵzdi ro'c. <sup>45</sup> Dxeĵcti rijni, rixiini sgajdz sprit nani najc nadxuudxru loĵni te jiädläznäĵrenini neņ lastoo beņga. Dxeĵcti rxhiņduxhru beņga loĵni guĵcni galoo. Sigajcza gac rebeĵn ni tre' lo guedxliujre naj.

*Xnan Jesús con rebeĵtzni*  
(Mr. 3:31-35; Lc. 8:19-21)

<sup>46</sup> Lal ni caninäĵni rebeĵn, bidzujņ xnanni con rebeĵtzni, suga'reni rolä' rlaĵzreni guiniireni loĵni. <sup>47</sup> Dxeĵcti biääd tej ni räĵp loĵ Jesús:

—Xnanlu näjza rebeĵtzlu suga' rolä' rlaĵzreni guininäĵreni luĵ.

<sup>48</sup> Laani badzu'ni diidx lo beņga räĵpni:

—ĵChuni'c najc xnanä? ĵChuni'c najc rebetzä?

<sup>49</sup> Dxeĵcti basgaani naani nez loĵ rexeĵn pacni, räĵpni:

—¿Redee najc xnanä redeeza najc rebetzä! <sup>50</sup> Chutis nani rujn si'cni rnibee Xtradä ni yu' xhaguibaa ni'c najc betzä, ni'c najc bisianä, ni'cza najc xnanä.

## 13

### *Xcuent bejn nani rbe'c binij*

*(Mr. 4:1-9; Lc. 8:4-8)*

<sup>1</sup> Lagajc dxejga birii Jesús royu'ga, huicueni nez ro' nisdoo. <sup>2</sup> Xhidalduxh bejn bire' cadro suga'ni, sas biu'ni nen te barcw, ro'c gurejni. Dxejcti rebejn gurej nez lo plaii. <sup>3</sup> Dxejg gusloj cagului Jesús con recuent, räjpni:

—Colcuadiajg. Birii te dade' ni rbe'c binij te cue'cni binij. <sup>4</sup> Laḷ ni cabe'cni binij yu' binij ni bitejb gajxh nez ro' nesiuj, biääd remane' ni rutajt, sas gudajwreni binijga. <sup>5</sup> Yu' binij ni bitejb nez nen reguij cadro guxii yu' yuj. Gulengajc binijga sa'csi direni nibej jäät nen yuj. <sup>6</sup> Che birii gubijdx, bigolreni sa'csi xhetiza xlobaani, dxejg gubijdzni. <sup>7</sup> Yu'za binij ni bitejb nen reguejch. Che guroob reguejchga, dini nusaan niroob regäje', gubijdzitireni. <sup>8</sup> Guyu' binij ni gurej lo reyusa'c, ro'c gucduxhni. Yu' binij cuaj te gayuu, yu'za binij cuaj gayojñni, yu'za ni cuaj galbitzuuni loj cade tej binij ni gurej. <sup>9</sup> Nani rsobdiajg diidx gucuadiajgni diidxre.

### *Xhi pajr najc recuent xten Jesús*

*(Mr. 4:10-12; Lc. 8:9-10)*

<sup>10</sup> Dxejcti gubig rexpejn pacni, gunabdiidx lojni, räjpreni:

—¿Xhicuent rusule'lu diidx loj rebejn con recuent?

<sup>11</sup> Dxejcti badzu' Jesús diidx rajpni lojreni:

—Sacnäj Dios la'tu te gacheetu recos xhiga'tz xten xcälrnibee Dios xhaguibaa, luxh laareni digacdi gacheerenini. <sup>12</sup> Chutis ni arajp yälracbee, sica'runi te gapruni yälracbee. Sas nani guxii rajp yälracbee, guiraa yälracbee ni rajpni sibicaj. <sup>13</sup> Ni'cni rniä lojreni con recuent sa'csi mase cadxelojreni, direni fii, mase cacuadiajgrendi di diajgrendi jiejn, xhet racbeedireni. <sup>14</sup> Laareni najcreni si'c te soob diidx ni gunii Isaías, dade' ni gunii xtidx Dios, che räjpni:

Siejn diajgpactu, niluxh xhetliidi gacheetu,  
sidxelojactu, niluxh ditu fii.

<sup>15</sup> Sa'csi guyalajz rebejnre, lastooreni najc si'c te guij,  
di diajgrendi jiejn,

luxh niäuzä balojreni, didi fisa'creni con balojreni,  
didi jiejnza diajgrendi, didi gacheeza lastooreni,  
didi gusiejch lajzreni guibi'reni loä te gusiaca lastooreni.

<sup>16</sup> La'tu colguibalaznäj balojtu sa'csi rhuisa'ctu, riensa'cza diajgtu. <sup>17</sup> Rniliäpac, xhidajl redade' ni gunii xtidx Dios, näjza xhidajl bensä'c rlazduxh nuhüi sa' recos ni cahuiitu, luxh direni nuhüini, rlazzreni niejn diajgrendi sa' rediidx nani cayejn diajgtu, luxh di diajgrendi niejnni.

### *Rusule' Jesús xcuent bejn ni rbe'c binij*

*(Mr. 4:13-20; Lc. 8:11-15)*

<sup>18</sup> Colcuadiajg xhi säloj xcuent bejn nani rbe'c binij. <sup>19</sup> Rebejn nani rucuadiajg diidx xten xcälrnibee Dios, niluxh direni gacheeni, najcreni si'c najc binij nani bitejb nez ro' nesuyj; riääd bendxab rudzucajni rediidx nani biu' nen lastooni. <sup>20</sup> Rebinij nani bitejb nez nen reguij, najc si'c rebejn nani rucuadiajg diidx, gustli rca'reni diidxga, <sup>21</sup> luxh guxii yu' xlobaani, direni sutijp. Che rdejdreri trabajw, che rdxe'ch bejn lojreni, sa'csi rucuadiajgrendi xtidx Dios, rusiejch lajzreni, rbälazni diidxga. <sup>22</sup> Rebinij nani gurej nen reyaguejch säloj rebejn nani rucuadiajg rextidx Dios rujnrureni te gunreni dzuun te ga'preni yäl'nasa'c ni yu' lo guedxliujre. Dxejcti rexcäl'nasa'c xten guedxliujre



rusgueereni. Guiraa recosre rutau lo xtidx Dios nen lastoo rebejnre, dini gusaan gac te cosechsa'c nen lastoo rebejnre. <sup>23</sup> Dxejc rebiniy nani rtejb lo reyusa'c, ni'c najc si'c rebejn nani rucuaiajg xtidx Dios, nani racbee diidxga, nani rutie'ru sa'reni te racxhidajlreni. Yu' bejn ni najc si'c binij ni gujc te gayuu; yu' bejn ni najc si'c binij ni gujc gayojn; yu'za bejn ni najc si'c binij ni gujc galbitzuu.

### *Xcuent triuu cadre guyu' cuanguejch*

<sup>24</sup> Dxejc bij Jesús stee cuent, räjpni:

—Xcälrnibee Dios xhaguibaa najc si'c te bejn nani gule'c ganax triusa'c lo xyujni. <sup>25</sup> Laļ nagaguejs bejnga, biäd te bejn nani rdxe'ch lajz loj xpaxhuaan binijga, biädle'cni bedz cuanguejch lo xtriuu bejnga, dxejcti sääni. <sup>26</sup> Cheni gulejn triuuga, birii doj lojni, dxejc biricaj näjza cuanguejch ro'c. <sup>27</sup> Dxejcti räjp remos lo xlamreni; “Dad,  la et ganax triusa'c di gule'clu, ä?  Caxh bazaj cuanguejchre?” <sup>28</sup> Räjp xlamreni: “Te bejn ni rdxechlajz loä biädle'cchani.” Dxejcti gunabdiidx rexmosni räjpreni: “ La rlajz guejblu cholädxanu recuanguejchga, ä?” <sup>29</sup> Dxejc räjp xlamreni: “Na'c, sa'csi che guiliäädxtu cuanguejchga, nägajcza triuu guiliäädxtu. <sup>30</sup> Colsaan tiobreni tebloj. Che guire' cose'ch, dxejc guinibeä remos gutiexgaareni cuanguejch, guliibrenini gacni ters, dxejcti checni. Dxejcti sajc gutie'reni triuu chucheeni nen yu'.”

### *Xcuent bedz muxhtas*

*(Mr. 4:30-32; Lc. 13:18-19)*

<sup>31</sup> Bijza Jesús stee cuent räjpni:

—Xcälrnibee Dios xhaguibaa najcni si'c te bedz muxhtas nani cue'c te bejn lo xyujni. <sup>32</sup> Guli bejdzga najc b ze'ru loj guiraa rebejdz, per che roob yajgga, rajcni guroobru loj guiralii recuaan, rajcni te yagro, luxh riäd remane' ni rutajt riädyujn xpitiä zreni lo xajcw yajgga.

### *Xcuent levaduur*

*(Lc. 13:20-21)*

<sup>33</sup> Bijzani stee cuentre, räjpni:

—Xcälrnibee Dios xhaguibaa najc si'c levaduur nani rugu'ch te gunaa lo choņ mediid arin, dxejc ni'c rusaguijni guideb cojbga.

### *Xhicuent baluii Jesús ganaxtis con cuent*

*(Mr. 4:33-34)*

<sup>34</sup> Baluii Jesús guiraa rebejn ganaxtis con recuent, xhetiru stee mood nuluiini, ganaxtis con cuent guniini lojreni. <sup>35</sup> Si'c bejn ni te guzojb xtidx dade' ni gunii xtidx Dios che bacuaani lo reguijtz, räjpni:

Suiy  diidx con recuent,

suiy  diidx xcuent recos ni naga'tz che bencheeli Dios guedxliuj.

### *Rusule' Jesús xcuent cuanguejch nen triuu*

<sup>36</sup> Dxejcti basadiidx Jesús rebejn, biu'tini nen yu' cadre bire' rexpejn pacni lojni, räjpreni lojni:

—Basule' loonu xcuent cuanguejch ni guyu' loniaa.

<sup>37</sup> Räjp Jesús lojreni:

—Bejn nani rbe'c retriusa'c, najc Xi'n Dios ni gujc Niguii; <sup>38</sup> loniaaga najc guedxliuj; retriusa'c najc rebejn nani najc xpejn Dios, nani rucuaiajg xtiidxni; recuanguejchga najc rebejn ni najc xpejn bendxab. <sup>39</sup> Bejn nani rdxe'ch lajz najc lagajc bendxab. Cose'ch säloj che nitloj guedxliuj; reni gutie' cose'ch najc rexangl Dios. <sup>40</sup> Sigacni guire' recuanguejch te ch äni lo guiboo te checni, sigajcza gac che gac fis guedxliuj. <sup>41</sup> Xi'n Dios ni gujc Niguii suxhal rexangl ni te jäädgutie'reni, te jäädlääreni lo xcälrnibeeni guiraa renani rujn riajb bejn nen dojl, näjza reni rujn cosguijdx. <sup>42</sup> Susälreni rebejn ga nen te or cadre

cayecduxh. Ro'c sonduxhreni, sauya'reni läjyreni. <sup>43</sup> Dxejcti rebeṅsa'c sidimbicha'reni si'c gubijdx lo xcälrnibee Xtadreni. Palga sobdiajgtu, colgucuadiagsa'c.

### *Te cossacduxh ni naga'tz*

<sup>44</sup> Räjpzani:

—Si'cza xcälrnibee Dios xhaguibaa najc si'c te cossacduxh ni naga'tz lo te yuj loniaa. Bidxäl te dade'ni, luxh bacuatzsacnini. Dxejcti rbalajzni, huijni, huito'ni guiraa xhix-tenni te rajpni meel siini yujga.

### *Perl nani sacduxh*

<sup>45</sup> Räjpzani:

—Xcälrnibee Dios xhaguibaa najcza si'c najc te dad rapduxh nani caguiil perlsa'c te siini. <sup>46</sup> Che bidxälni te perlsa'c, tejni sacduxh, bato'ni guiraa xhixtenni te gusiini perlga.

### *Guijxh ni rniaaz bäjl*

<sup>47</sup> Räjpzani:

—Xcälrnibee Dios xhaguibaa najcza si'c te guijxh ni rusäl bejn lo nis te rniaazreni guiraloj cuaa bäjl. <sup>48</sup> Cheni agudxajni, rbäärenini nez ro' nisdoo, te ro'c rbereni loj rebäjl. Rebäjl ni najc hueen rucheeni neṅ te dxijm; nani di gac hueen rusälrenini te laad. <sup>49</sup> Si'cza gac che gac fis guedxliuj; sirii rexangl Dios te sudzucajreni rebeṅguijdx lo rebeṅsa'c. <sup>50</sup> Dxejcti susälreni rebeṅguijdx neṅ te or cadro cayecduxh; ro'c sonduxhreni, sauya'reni läjyreni.

### *Te beṅ rajp*

<sup>51</sup> Dxejcti gunabdiidx Jesús lojreni, räjpni:

—¿La racbeetu guiraa ni caniä lojtu, ä?

Dxejcti räjpreni:

—O', racbeenuni Dad.

<sup>52</sup> Dxejcti räjpni lojreni:

—Cheni rsieed te bejn nani najn leii xcuent yälrnibee xten Dios xhaguibaa, najcni si'c te lam nani rajc rbää lo rexcäl'nasa'cni recos ni nacoob, näjza recos bieju.

### *Jesús lo guedx Nazare't*

(Mr. 6:1-6; Lc. 4:16-30)

<sup>53</sup> Che gulujx basule'ni recuentre, biriini ro'c, sääni. <sup>54</sup> Huijni lagajc lajdxni. Ro'c gusloj caguluiini neṅ xquidobäzreni ro'c. Dxejcti rdxeloduxh rebeṅ ro'c, räjpreni:

—¿Caro bisieedni reyäl'najre? ¿Xho rajc rujnni remilagwr? <sup>55</sup> ¿La et laadi dee ni najc xi'n carpinteer, ä? ¿La et Mariidi najc xnanni? Dee ni najc bejtz Jacobo, José, Simón con Judas. <sup>56</sup> Luxh rebisiajnni rbäzreni lo guejdxre. ¿Cacharo bisieedni guiraa nani caguluiini?

<sup>57</sup> Dxejcti cayujnreni xhigab chugan la guliini, dxejc räjp Jesús lojreni:

—Guiraa rebejn rinälajz te niguii nani nrii xtidx Dios, biädla rebeṅ lajdxpacni direni jiu xtiidxni.

<sup>58</sup> Ni'c dini niujn xhidal milagwr ro'c sa'csi direni chalilajz xtiidxni.

## 14

### *Che gujt Juan Bautist*

(Mr. 6:14-29; Lc. 9:7-9)

<sup>1</sup> Lagajc neṅ redxejga Herodes, ni laaza tetarca, biejn diajgni diidx xcuent ni cayujn Jesús. <sup>2</sup> Dxejc räjpni lo rexmosni:

—Dee najc Juan Bautist. Pet agubaṅsacni lo rebeṅgut, ni'cni rajpni yälrnibee te rujnni remilagwr.

<sup>3</sup> Si'c gunii Herodes sa'csi laani basäuuni Juan neñ latzguiib. Niluxh gunibeeni biliibni con caden neñ latzguiib xcuent Herodías, ni gujc chääl bejtzni Felipe. <sup>4</sup> Bidxe'chni sa'csi räjp Juan lo Herodes:

—Et laadi rujnlu rbäznäjlu chääl bejtzlu.

<sup>5</sup> Rlajz Herodes nugu'tni Juan, luxh rdxejbni rebenguejdx, sa'csi guiraareni rniireni Juan najc te niguii ni rnii xtidx Dios. <sup>6</sup> Dxejc che gojl laj Herodes gujc lanij, birii xindxa'p Herodías te baya'ni nez loj regolnejdx. Luxh sa'csi bidxaglazduxh Herodes baya'ni, <sup>7</sup> räjpni loj gunaaga:

—Gunab xhitis ni rlaizlu, sa'csi gudix lazä gunidxä ni guiniabtislu.

<sup>8</sup> Dxejcti gunaaga, abalijdx xnannini, räjpni lo Herodes:

—Loj te platón baniidx bitiuwejc Juan Bautist.

<sup>9</sup> Diidxga benhuin lastoo reii Herodes, per sa'csi abia'n diidx, niluxh abiejn diajg rebejn, gunibeeni gudeedreni nani guiniab gunaaga. <sup>10</sup> Dxejcti gunibeeni biru' yejc Juan Bautist neñ latzguiib. <sup>11</sup> Sas biädnäreni yejcti lo te platón, badeedrenini loj gunaaga. Dxejcti gunaaga badeednini lo xnanni.

<sup>12</sup> Dxejcti bidzujñ rexpejn Juan sanäreni togoolga te huicua'tzrenini. Dxejcru huisa'nreni diidx loj Jesús.

### *Bayaan Jesús gaii miñ bejn*

(Mr. 6:30-44; Lc. 9:10-17; Jn. 6:1-14)

<sup>13</sup> Che biejn diajg Jesús xhi guzajc Juan, xtebni huä'pni neñ te barcw huijni stee laad nez lo reyubijdz. Che gucbee rebejn caro sääni, huinajlreni Jesús lo yuj. Guiraa neñ reguejdxga biriireni. <sup>14</sup> Che birii Jesús neñ barcw, bahuiini loj xhidalduxh bejn, dxejc balazlajznireni, basiajcti rebejn nani racxhuu. <sup>15</sup> Cheni acayu' guxhijñ, gubig rexpejn pacni lojni räjpreni:

—Rut rbäjzdi nez lo reyubijdzre, niluxh agudxej naj. Basadiidx rebejn te jiireni nez rerench te chasiireni xhi gaureni.

<sup>16</sup> Räjp Jesús:

—Xhicuent jiireni. La'tu colgudeed xhi gaureni.

<sup>17</sup> Dxejcti räjpreni:

—Xhetru rajpdinu ree. Gaiitis yätxtiil näjza tio'p bäjl rajpnu.

<sup>18</sup> Laani räjpni:

—Coltanäni ree.

<sup>19</sup> Dxejcti gunibeeni gurej rebejn lo guixa'. Dxejcti cua'ni guigaii yätxtiil näjza guiro'p bäjl, guläsni lojni xhaguibaa, badeedni xquixhtios lo Dios, dxejcti gula'ni reyätxtiil. Badeednini loj rexpejn pacni. Dxejcti rexpejn pacni gudisrenini loj reben xhidajl. <sup>20</sup> Guiraareni gudajw, gudxaj xque'reni. Dxejcti batie'reni yätxtilbiujy nani bia'n. Si'cti tzubitio'p dxijm gudxajni. <sup>21</sup> Renani gudajw najcreni si'cti gaii miñ niguii, xhet näjdi regunaa niclaza rebiuux bigab.

### *Gusaj Jesús lo nisdoo*

(Mr. 6:45-52; Jn. 6:16-21)

<sup>22</sup> Sas gunibee Jesús biu' rexpejn pacni neñ barcw te ganidreni tedreni stee lad nis lañi casadiidxni rebejn. <sup>23</sup> Che gulujx basadiidxni rebejn, huä'p Jesús yecdajn te xtebni guninäjni Dios Xtadni. Che gojl guxhijñ, ro'c sugaxteb Jesús. <sup>24</sup> Luxh barcw galäii lo nis sasaj. Cagusnibduxh reol barcw, liriääzni lo nis sa'csi cabi' beduxh cadre sääreni. <sup>25</sup> Rsildooru gubig Jesús, bidzujñni lojreni, siädsajni lo nisdoo. <sup>26</sup> Che bahuii rexpejn pacni siädsajni lo nisdoo, bidxejbreni, räjpreni:

—Colhuii te fantasmni —guredxa'reni sa'csi bidxebduxh'reni.

<sup>27</sup> Dxejc gunii Jesús lojreni, räjpni:

—Na'c guidxejbtu, laa naräni; colsutijp lastootu.

<sup>28</sup> Dxejcti gunii Pedr lojni, räjpni:

—Dad, palga lujni, gunibee jiälä lojlu nez lo nisre.

<sup>29</sup> Räjp Jesús:

—Gudaa pues.

Dxejcti birii Pedr nen barcw gusajni lo nis te sääni nez loj Jesús. <sup>30</sup> Che bahuii Pedr beduxh ni cabi', bidxejbni, dxejc gusloj cayääzni nen nisdoo. Guredxa'ni, räjpni:

—Dad, igulää narä!

<sup>31</sup> Lagajc dxejc gunaaz Jesús naani, räjpni loj Pedr:

—Guxii rajplu yälirilajz. ¿Xhicuent guctio'p lajzlu?

<sup>32</sup> Che huä'preni nen barcw, guläzgjajc bej. <sup>33</sup> Dxejcti renani sää nen barcw bazuxhibreni nez loj Jesús räjpreni:

—Guliipacni najclu Xi'n Dios.

*Basiajc Jesús reben racxhuu guedx Genesare't*

*(Mr. 6:53-56)*

<sup>34</sup> Che gudejdreni lo nis, bidzujpreni nez lo reyuj xten Genesare't. <sup>35</sup> Che biembee reben ro'cni, batie'chreni diidx guideb gabi lajdxreni. Dxejcti biädnäreni guiraa reben racxhuu lojni. <sup>36</sup> Gunabduxhreni gusaanni canreni ro' xhajbtisni. Dxejcti guiraa renani gudajn xhajbni, biajcreni.

## 15

*Nani ruxhin bejn*

*(Mr. 7:1-23)*

<sup>1</sup> Dxejcti gubig gaii rebejn nani ruluu leii näjza rebejn guidoo ni laa farisee. Siädreni guedx Jerusalén, räjpreni loj Jesús:

<sup>2</sup> —¿Xhicuent di rexpejnpacku jiu xcostrumbr rebenool? ¿Xhicuent direni gusoob yälrdiib naareni che rajwreni?

<sup>3</sup> Badzu'ni diidx, räjpni:

—¿Xhicuent di la'tu gusoobzatu xtidx Dios? Dee alga riurutu rexcostumbrtu. <sup>4</sup> Dios gunibeeni xho guntu che räjpni: “Gojp xpala'n xtadlu, xnanlu”, näjza “Nani guiniyaj lo xtadni o loj xnanni, suguetni.” <sup>5</sup> Luxh la'tu rniitu sajg gäb chutis bejn loj xtadni o loj xnanni: “Digacdi gacnäätu sa'csi guiraa ni rapä abadedäni lo Dios.” <sup>6</sup> Luxh chutis ni guinii si'c, xhetru nanabdi gacnäjni xtadni o xnani. Si'c ni cabälaztu rextidx Dios te gac chanuutu rexcostumbrtu. <sup>7</sup> ¡Bejn ni rusguee najctu! Laaca gunii Isaías, bejn nani gunii xtidx Dios xcuentu cheni räjpni:

<sup>8</sup> Rebenuejdxre con ro'reni rliä'preni xpala'nä niluxh lastooreni zijt suga' nez loä.

<sup>9</sup> Xlia'si rajpreni narä, sa'csi ruluireni si'c xtidxä reyälrnibee xten reben guedxliuj.

<sup>10</sup> Dxejcti gurejdxni rebejn, räjpni lojreni:

—Colcuadiajg, colyabee. <sup>11</sup> Nani riu' ro' bejn di guxhin bejnga, sanga nani rii ro' bejnga ni'cni ruxhin bejnga.

<sup>12</sup> Dxejcti rexpejnpacku gubig lojni, räjpreni:

—¿La najnlu bidxe'ch rebejn farisee che biejn diajgreni diidx ni guniilu?

<sup>13</sup> Dxejc laani räjpni:

—Xhitis yajg nani di Xtadä ni yu' xhaguibaa nusuj siliädxa'ni guideb xlobaani.

<sup>14</sup> Colgusaanreni; lotiä'preni, ruluireni nezyuj lo salotiä'preni. Luxh palga te ben lotiä'p guluii canejz chää stee lotiä'p, guiro'preni sitejbreni nen te gueed.

<sup>15</sup> Räjp Pedr loj Jesús:

—Basule' cuentre loonu.

<sup>16</sup> Räjp Jesús:

—¿La näjza la'tu ditu gacbee, ä? <sup>17</sup> ¿La ditu gacbee guiraa ni rajw bejn ru' xque'ni, dxejcti che rdejdn xque'ni, abigo'nni? <sup>18</sup> Niluxh diidx nani rii ro' bejn, nen lastoo bejn

riini; dee ni ruxhiñ bejn. <sup>19</sup> Sa'csi nen lastoo bejn ri rexhigabguijdx xten rebejn ni rugu't sa'ni; xten rebejn ni rusguee gunaa; xten rebejn ni rusguee chääl sa'ni; xten rebejn ni rbajn; xten rebejn ni rnii didxxhii lo sa'ni; xtenza rebejn ni rutijl sa'ni. <sup>20</sup> Laa sa' recosre ni ruxhiñ bejn. Che dini gusoob recostumbr xte yälrdiib naani, di ni'c guxhiñ bejn.

*Te gunazit nani huililajz xtidx Jesús*

(Mr. 7:24-30)

<sup>21</sup> Biriiti Jesús ro'c, sääni nez región xten Tiro näjza Sidón. <sup>22</sup> Nejzga rbäjz te gunaa cananee, cabedxa'ni biädni lo Jesús, räjpni:

—Dad, xi'n toDavid, balaslajz narä. Xindxa'pä yu' xpej beñdxab lastooni, niluxh cagusacsíduxhnini.

<sup>23</sup> Xhet räjpdi Jesús lojni. Dxejcti biädnduxh rexpejñpacni lojni, räjpreni:

—Barilaagw gunaare, didi rbedxa'ni siädnejni luj.

<sup>24</sup> Dxejcti räjp Jesús lojni:

—Dios baxhal narä lojtis xpen Israel nani agunijt nen dojl.

<sup>25</sup> Dxejcti gubig gunaaga, bazuxhibni nez loj Jesús, räjpni:

—Dad, gucnäj narä.

<sup>26</sup> Dxejc räjp Jesús lojni:

—Di gac hueen xca' bejn xcuxtiil rexi'nni gusälñini lo rebä'cw.

<sup>27</sup> Dxejc räjp gunaaga lojni:

—Guliini Dad, näjza rebä'cw rajw te la' yätxtiil ni rtejb lo mex xten xpaxhuaanni.

<sup>28</sup> Dxejcti räjp Jesús lojni:

—Nane', lacti guroob najc xcälirililajzlu. Sugac si'cni rlajzlu.

Lagajc dxejc biajc xindxa'pni.

*Basiajc Jesús xhidäl beñ racxhuu*

<sup>29</sup> Birii Jesús ro'c gudejñni nez ro' nisdoo ni laa Galilee. Huäpgajcni yejc te dajn, ro'c gurejni. <sup>30</sup> Xhidajl bejn bidzujñ cad sobga'ni. Siädñäreni rebeñ ni rajc ni'ni, rebeñ ni najc lotiä'p, rebeñ gop, rebeñ ni xheti naani, näjza xhidälro beñ racxhuu, bidzunnäjrenini nez loj Jesús. Dxejcti basiajcnireni. <sup>31</sup> Ni'cni lacti bidxeloduxh rebeñ xhidajlga che bahuiireni rnii regop, riajc reni xheti naani, rsiaj reni rajc ni'ni, ruhuii relotiä'p, dxejc rliä'preni xpala'n Xtios rexpen Israel.

*Badeed Jesús xhi gudajw tajp miñ bejn*

(Mr. 8:1-10)

<sup>32</sup> Gurejdx Jesús rexpejñpacni räjpni lojreni:

—Riaä rebejñre sa'csi agujc choñ dxej yunäjreni narä luxh xhet ca'direni gaureni. Di rlazä guxhaläreni jiireni rolizreni palga gajdreni gau didi guidxajgreni lo nezyuj.

<sup>33</sup> Dxejcti räjp rexpejñpacni lojni:

—¿Xho guidxälñu xhi gau rebeñ xhidajlre nez lo reyubijzre cadre rut rbäjzdi, ä?

<sup>34</sup> Räjp Jesús lojreni:

—¿Bal yätxtiil ca'tu?

Räjpreni:

—Gajdztisni, näjza gaii bälbäze'.

<sup>35</sup> Sas gunibee Jesús cue rebejn lo yuj. <sup>36</sup> Dxejc cua' Jesús guigajdz yätxtiilga näjza rebäj, badeedni xquixtios lo Dios dxejc gula'ni reyätxtiilga näjza rebäjga badeednireni loj rexpejñpacni. Dxejcti laareni gudisreni yätxtiilga con rebäjga lo rebejn xhidajlga.

<sup>37</sup> Guiraareni gudajw, gudxaj xque'reni. Che gulujx gudajwreni, batie'reni reyätxtiil ni bia'nga, gudxaj gajdz dxijmni. <sup>38</sup> Renani gudajwga najc si'cti tajp miñ bejn, niluxh xhet näjdi regunaa niclaza rebiuux bigab. <sup>39</sup> Dxejcti basadiidx Jesús rebejn, biu'tini nen barcw te gudejñni lo nisdoo nez región xten Magdala.



## 16

*Reben̄ guidoo ni laa farisee nājza saducee rniabreni te milagwr si'c te seen*  
(Mr. 8:11-13; Lc. 12:54-56)

<sup>1</sup> Refarisee nājza resaducee bidzuj̄nreni lo Jesús, gunabreni gunni te milagwr, gudeedni te seen ni rien̄ xhaguibaali. Niluxh cagusguesireni, sa'csi rlajzreni guiga' Jesús. <sup>2</sup> Dxejc badzu' Jesús diidxre rāj̄pni lojreni:

—Che rajl gudxej, rniitu: “Saru gac te dxej guixee sa'csi naxniaa xhaguibaa.” <sup>3</sup> Che rajl rsil rniitu: “Etladi gac te dxej nadxej sa'csi naxniaa xhaguibaa niluxh tre' za.” Xhoxh numbeetu xhi säloj reseem ni rien̄ xhaguibaa, luxh ditu gumbee xhi säloj reseem xcuent redxejre, nalajznu recos ni cayajc. <sup>4</sup> Reben̄ guidxre, reben̄ gualajz rniab te senro, te milagwr, luxh dirureni fii stee milagwr; suhuiitisreni xsen Jonás.

Dxejcti basa'n Jesúsreni ro'c, sä'tini.

*Levaduur xten refarisee*  
(Mr. 8:14-21)

<sup>5</sup> Che gudejd rexpejn̄pacni stelaad nisdoo biäl-lajzreni ninäreni yätxtiil. <sup>6</sup> Dxejcti rāj̄p Jesús lojreni:

—Bacuadiajg, col̄nati levaduur xten refarisee nājza resaducee.

<sup>7</sup> Dxejcti bejn̄reni xhigab neñ lastooreni: “Si'c caniini sa'csi dinu niopnā yätxtiil.”

<sup>8</sup> Luxh gucbee Jesús xhigabga, dxejc rāj̄pni lojreni:

—¿Xhicuent rujntu xhigab xhet yätxtiildi ca'tu, ä? ¿Huinuxh najc xcäl̄rililajztu! <sup>9</sup> ¿La gajdtu gacbee? ¿La diza lajztu guinaj che gudisä gaii yätxtiil gudajw gaii mīl bejn̄, ä? ¿Bal dxijm̄ni batie'tu, ä? <sup>10</sup> ¿La diza lajztu guizaj che gudisä gajdz yätxtiil gudajw tap mīl bejn̄, ä? ¿Bal dxijm̄ni batie'tu? <sup>11</sup> ¿Xhicuent ditu gacbee et yätxtiildi cagusä'tä cheni caniä lojtu col̄nati levaduur xten refarisee nājza resaducee?

<sup>12</sup> Dxejcru gucbeereni dini niāj̄p: “Col̄nati levaduur xten yätxtiil.” Laani caniini: “Col̄naati yäl̄rului xten refarisee nājza resaducee.”

*Bicāj̄p Pedr Jesús najc Cristpac*  
(Mr. 8:27-30; Lc. 9:18-21)

<sup>13</sup> Che bidzuj̄n Jesús región xten Cesarea xten guedx Filipo, gunabdiidx Jesús loj rexpejn̄pacni, rāj̄pni:

—¿Chu naj rebejn̄ nacä narä Xi'n Dios ni gujc Niguui?

<sup>14</sup> Laareni rāj̄preni:

—Yu'reni naj luj najclu Juan Bautist; yu'zareni rnii luj najclu Elías, peta sgaiireni rnii luj najclu Jeremías o stee niguii ni rnii xtidx Dios.

<sup>15</sup> Dxejcti rāj̄pni lojreni:

—La'tu, ¿chuni'c rniitu nacä?

<sup>16</sup> Dxejc rāj̄p Simón Pedr:

—Luj najclu Crist, Xi'n Dios nani nabajn̄.

<sup>17</sup> Badzu' Jesús diidxre, rāj̄pni:

—Chicbaalu, Simón Pedr, xi'n Jonás, sa'csi xhet bejn̄di baluii dee lojlu, Xtradätis ni yu' xhaguibaa baluiinini lojlu. <sup>18</sup> Narä rniä lojlu, luj najclu Pedr, nani säloj: “Te guij.” Sa'csi sibäxtiejlu guidxagsa'za renani rililajz xtidxä, niluxh che guetreni, direni nitloj. <sup>19</sup> Narä gunidxä yäl̄rnibee lojlu te gulijdxlu rebejn̄ nani ahuiilajz xtidxä. Xhitis ni gusaanlu gunreni, o xhitis ni dilu gusaan gunreni, susoob Dios xtiidxlu.

<sup>20</sup> Dxejcti gunibee Jesús rutlojdi gäb rexpejn̄pacni laani najc Guejb Crist.

*Gunii Jesús xho guetni*  
(Mr. 8:31-9:1; Lc. 9:22-27)

<sup>21</sup> Lagajc dxejc gusloj cagusule' Jesús diidx lo rexpejn̄pacni, guniini lojreni xho nan-abpac chääni guedx Jerusalén te ro'c tedni trabajwduxh ladzn̄aa reben̄gool xten guidoo,

ladzṇaa rebixhojz, nājza rebejn ni najn xleii Moisés. Guniizani sugu'trenini, niluxh ni riojn dxej sibansacni lo rebeṅgut.

<sup>22</sup> Dxejcti huinā Pedr Jesús te laad, gusloj cadilṇājnini, rājṇni:

—¡Gacnāj Dioslu, Dad! ¡Gurniälojlu gaclu si'c!

<sup>23</sup> Dxejc gubiré Jesús, rājṇni lo Pedr:

—¡Gubicaj loä beṅdxab! Na'c rusiejytislu loä. Luj dilu gun xhigab xten Dios, alga xhigab xten rebeṅguedxliuj rujṇlu.

<sup>24</sup> Dxejcti rājṇ Jesús loj rexpejṇpacni:

—Palga yu' chu tejtṇ rlaṇz guirinajl narä, sucuälazni lagajc laani, suguuni xcrujzni, nalajznu tedni trabajw, sujiädṇajlṇi narä. <sup>25</sup> Sa'csi nani rlaṇz gunni gaan xcälṇabajṇni, sunijṇtṇini. Luxh nani runijṇt xcälṇabajṇni por narä, sidxälṇi xcälṇabajṇni par tejpas. <sup>26</sup> Sa'csi ¿xhi gaan gun te bejṇ palga ga'ṇni guideb guedxliuj, luxh nit xaimni lo Dios, ä? o ¿la yu' xhi gudeed bejṇ te siini xaimni? <sup>27</sup> Sa'csi narä Xi'n Dios ni gujc Niguii siälä lo yälrdimbicha' xten Xtadä con rexanglṇi, dxejcti siguixä tebgaj bejṇ si'ctis ni gujc xtzuunni. <sup>28</sup> Rniliäpac lojtu, loj reni tre' ree ṇaj, yu'reni di guet dxejli ni fixgaareni jiälä narä Xi'n Dios ni gujc Niguii lo xcälṇribeä.

## 17

### *Chuni'c najc guroob*

*(Mr. 9:2-13; Lc. 9:28-36)*

<sup>1</sup> Che gudeed xho'p dxej, huinā Jesús Pedr, Jacoob, con Juan betz Jacoob, xtebreni huijreni jiaa yejc te dajṇ. <sup>2</sup> Dxejcti nez lojreni bidxaa xho rujṇ lojṇi. Lojṇi gusloj rdimbicha' si'c gubijdx; xhajṇni gujc nolbāj si'c te bajl. <sup>3</sup> Dxejc bahuigajczeni loj Moisés nājza loj Elías, cayujyreni diidx con Jesús. <sup>4</sup> Dxejcti rājṇ Pedr loj Jesús:

—Dad, ¡huenduxh suga'nu ree! Palga rlaṇzlu, sajc jiennu choṇ yuguijxh, tejni gac xten guejblu, steeni gac xten Moisés, steeni gac xten Elías.

<sup>5</sup> Laṇni canii Pedr, biājṇ te za ni rdimbicha' guideb gabireni; neṇ zaga biejn te xse' ni rājṇ:

—Dee najc xi'nä ni sanälazä, ruspaduxhni lazä, colcuadiajg xtiidxni.

<sup>6</sup> Che biejn diajg rexpejṇpac Jesús diidxga, bazuxhijbreni, basajbreni lojreni lo yuj, bidxebduxhreni. <sup>7</sup> Dxejcti gubig Jesús lojreni, batzuubni ṇaani yejcreni, rājṇni:

—Colchasulii, na'c rdxejbtu.

<sup>8</sup> Che guläs lojreni, lojtis Jesús bahuiireni, rutru suganäjdini.

<sup>9</sup> Cheni sayäjtreni yejc dajṇga, gunibee Jesús lojreni, rājṇni:

—Rutlojdi gäbtu xhini'c bahuiitu dxejli ni guibansacä narä Xi'n Dios ni gujc Niguii lo rebeṅgut.

<sup>10</sup> Dxejcti gunabdiidx rexpejṇpacni lojṇi:

—¿Xhicuent rnii rebejṇ ni najn xleii Moisés ganid Elías nanab jiääd, ä?

<sup>11</sup> Badzu' Jesús diidxre, rājṇni:

—Guliini siädxgaa Elías, laani gunsa'cni guira'ti, <sup>12</sup> niluxh narä rniä lojtu, abiääd Elías, di rebejṇ nienbeeni, luxh bennäjrenini si'ctis ni rlaṇzreni, basacsíduxhrenini. Sigajcza gunnäjreni narä Xi'n Dios ni gujc Niguii, susacsíduxhreni narä.

<sup>13</sup> Dxejcti gucbee rexpejṇpacni caniini xcuent Juan Bautist.

### *Jesús basiajc te biuux ni guyu' xpej beṅdxab*

*(Mr. 9:14-29; Lc. 9:37-43)*

<sup>14</sup> Cheni bidzujṇreni cadro tre' xhidajl bejṇ, gubig te bejṇ lojṇi bazuxhijbni, dxejc rājṇni:



15 —Dad, balaslajz xinä sa'csi laani cayacxhuuni, rajcni yälguidxbej, rusacsíduxh yälguidxgani, yu' huält rtejbni lo guiboo yu' huält rtejbni lo nis. 16 Biädnääni loj rexpejnpaclu, luxh di niajcdi nusajcrenini.

17 Jesús badzu' diidxre lojreni räjpni:

—Beñguijdx, bejn ni di chalilajz, ¿gucli yu'ä lojtu? ¿Cati gac gunä huant la'tu? ¿Coltanä biuuxga ree!

18 Dxejcti gudilnäj Jesús beñdxab ni yu' lastoo biuuxga, gunibeeni biriini, lagajc dxejc bjaic biuuxga.

19 Dxejc guninäj rexpejnpacni Jesús te laad, gunabdiidxreni räjpreni:

—¿Xhicuent di niajcdi nibäänu beñdxab neñ lastoo biuuxga?

20 Jesús räjp lojreni:

—Sa'csi la'tu guxiduxh rililajztu. Rniliä lojtu, paru najc yälrililajz xtentu si'cti te bejdz muxhtas, sajc gäbtu loj dajn rec: “Gubicaj ro'c, gudejd stelaad”, luxh sibicaj dajnga. Palga rililajzpaclu, xhetliidi yu' ni di gacdi guntu. 21 Niluxh sa' beñdxabre, dini guirii palga ditu guiniabduxh lo Dios, gucua'nzatu.

*Jesús rusule' stehuält xho guetni*

*(Mr. 9:30-32; Lc. 9:43-45)*

22 Lalni sasajreni nez región xten Galilee, räjp Jesús:

—Sutedreni narä Xi'n Dios ni gujc Niguii ladzña rebeñdojl te gusacsíreni narä.

23 Niluxh sugu'treni narä, dxejc ni riojn dxej sibañsacä lo rebeñgut.

Che biejn diajgreni diidxga, guc-huinuxh lajzreni.

*Gudijxni impuest xten guidoo*

24 Che bidzujn Jesús näjza rexpejnpacni guedx Capernaum, biääd rebejn ni rusquijx xcuent guidoo lo Pedr, gunabdiidxreni lojni, räjpreni:

—¿La di xmastrtu quiix impuest xten guidoo?

25 Räjp Pedr:

—Rguijxnini.

Che biu' Pedr neñ yu', ganid Jesús gunii lojni, räjpni:

—¿Xhi rchalolu, Simón? ¿Chuni'c rusquijx rebejn ni rnibee lo guedxliujre? ¿Chuni'c rguijx reimpuet, recuyo't? ¿Rebeñ lajdxreni o rebeñzajt?

26 Badzu' Pedr diidxre räjpni:

—Rebeñzajt.

Räjp Jesús:

—Ni'cni di rexi'nreni quiixni. 27 Luxh te di guidxe'chreni, huij ro' nisdoo, bacuaa ansuel, gulää bäl ni guiniazxgaalu. Ro' bälga sidxällu te melpla't ni sajl te chatijxlu impuest xcuentä näjza xcuentlu.

## 18

*¿Chuni'c sajcru lajdx Dios xhaguibaa?*

*(Mr. 9:33-37; Lc. 9:46-48)*

1 Laa dxejcní gubig rexpejnpac Jesús lojni te gunabdiidxreni:

—¿Chuni'c sajcru lajdx Dios xhaguibaa?

2 Dxejcti gurejdx Jesús te biuxbáz, bazujnini nez galäiireni, 3 dxejc räjpni:

—Rniliäpac lojtu, palga ditu gusiechlajztu, palga ditu gac nadolajz si'c te biuxbáz, ditu jiu' lajdx Dios xhaguibaa. 4 Ni'cni chutis bejn nani gac nadolajz si'c biuxe're, laani gac ni sajcru lajdx Dios xhaguibaa. 5 Chutis ni riu te sa' biuxe're, sa'csi rinälajzni narä, lagajc narä riuni.

*Riezgw jiajbni neñ dojl*

*(Mr. 9:42-48; Lc. 17:1-2)*

<sup>6</sup> Räj pzani:

—Chutis ni gudzucaj lo xnezyuä te sa' biuxe're ni ahuililajzni xtidxä, maazru huen niliib te guij xten molin dojb yejnni, chatejbni loj nisdoo, palga gunni jiajb tej reni'c lo dojl. <sup>7</sup> Proobza guedxliuj sa'csi yuduxh xhigabguijdx lojni. Sa'csi nanabpac chu xhigabguijdx. Gunatiro, bejn ni ruzobloj rexhigabguijdxre, ni rujn riajbza lo dojl reni rililajz xtidxä, ni najc si'c biuxe're.

<sup>8</sup> 'Palga ni'lu o naalu gun jiajbllu lo dojl, batiu'ni. Hueenru jiu'lu lo xcäl'nabajn Dios nitiujnglu o natiujnglu lacuaa jiilu con guiro'p ni'lu o guiro'p naalu lo balduxh ni rejc par tejpas. <sup>9</sup> Palga te balojlu rujn riajbllu lo dojl, gulääni. Hueenru jiu'lu lo xcäl'rnibee Dios najclu lotiä'p lacuaa chu guiro'p baloj chazäl'reni luj lo balduxh ni rejc par tejpas.

### *Xcuent xiil ni gunijt*

*(Lc. 15:3-7)*

<sup>10</sup> Räj pza Jesús lojreni:

—Colnatiro, andi cuälaztu rebejn ni najc si'c biuxbäzre ni sasaj lo xnez Dios, sa'csi rexangl Dios ni cahuiireni, guiraatis dxej yu'reni loj Dios. <sup>11</sup> Sa'csi Xi'n Dios ni gujc Niguii biäd te guslaani rebejn nani agunijt neñ dojl.

<sup>12</sup> Räj pzani:

—¿Xho rhuiitu? Palga rajp te bejn te gayuu xiil, dxejc nit tejni, çlaa dini gusaan stabitzubigaaga ni yu' neñ gurajl te chatiilni xile' ni gunijt, ä? <sup>13</sup> Luxh palga guidxäl'ni xile'ga, rniliä lojtu, sibalazduxhruni xcuent xile'ga luxh guxiiru guibanäj lajzni xcuent rexiil nani di ninijt. <sup>14</sup> Sigajcza Xtradnu ni yu' xhaguibaa di rlaiz nit lo Dios nicla tej reni ahuililajz xtiidxni, ni najc si'c biuxbäzre.

### *Xho gunnäjlu bejtzlu*

*(Lc. 17:3)*

<sup>15</sup> Räj pzani:

—Palga gun bejtzlu te cosguijdx lojlu, guninäjni xtebtislu, gojs lojni xhi dojl bejnni lojlu. Palga saru gucuadiajgni xtiidxlu, abiäj'lajztu. <sup>16</sup> Palga naaddini gucuadiajgni, dini jiu xtiidxlu, dxejc huinä stee o stio'p bejn chaninäjluni, te guiraa ni guiniitu jiejn diajg rebejn'ga, te arajplu tio'p o choñ testiigw. <sup>17</sup> Palga di bejtzlu gucuadiajg xtidx rebejn'ga, luxh dizani jiu xtiidxreni, neñ guidoo huile'c xquejlu loj rebejn ni ricuadiajg xtidx Dios. Palga dizani jiu rebeñ guidoo, sugacni nez lojlu si'c te beñguijdx ni di gumbee xtidx Dios o si'c rebejn nani rusquijx loj rebejn nani ruto'.

<sup>18</sup> 'Ni'cni rniliäpac lojtu, guiraa yäl'guxhtis xten bejn ni di gusiechlajz xtoj'lreni ni guntu lo guedxliuj, si'c jia'nni xhaguibaa; guiraa redojl nani gusiäj'lajztu lo guedxliuj sa'csi basiechlajz beñdojl'ga, si'cza jia'nni xhaguibaa.

<sup>19</sup> 'Sigajcza rniä lojtu, palga tio'ptu tejsi xhigab guntu xhini'c guiniabtu lo Dios, che guiniabtuni lo Dios, Xtradä ni yu' xhaguibaa suniidxni ni rniabtu lojni. <sup>20</sup> Sa'csi cadrotis nadxagsa' tio'p o choñ bejn sa'csi rinälajzreni narä, anasuga'ä galäii rebejn'ga.

<sup>21</sup> Dxejcti gubig Pedr loj Jesús, gunabdiidxni:

—Dad, çpalga gunijt betzä loä, bal huält nanab gusiäj'lazä? çLa sajl gajdzli huält, ä?

<sup>22</sup> Badzu' Jesús diidxre lojni räj pni:

—Dina guiniä gajdztis huält, rniä gayoñbidzuu huält, nalajznu si'ctiza huält basiäj'lajzlu.

### *Xcuent tio'p bejn ni nazäab meel*

<sup>23</sup> 'Xcäl'rnibee Dios xhaguibaa najc si'c te reii ni rlaiz gunni cuent lac nazäab rexmosni lojni. <sup>24</sup> Agusloj cayujnni xcuentni chela bidzunäj'reni te mos ni nazäab balti mil lojni.

<sup>25</sup> Luxh mosre xhet rajpdini te quiixni rexti'nni, ni'c gunibee reii guido'ni si'c sclav, näjza chääl'ni, näjza rexi'nni, nägajcza guiralii xhixtenni, te gaxh xti'nni. <sup>26</sup> Dxejcti mosga bazuxhijbni loj xlamni, gunabduxhni lojni, räj pni: "Guläzsijc tiop-choñ dxej, Dad, te

gac quixä xti'nä.” <sup>27</sup> Dxejcti lamga balazlajzni xmosni, badzucajni guiraa ni nazäab mosga lojni, baslaanini. <sup>28</sup> Cheni birii mosga rolijz xlamni, bidxaagni stee samosni ni nazäab bale'si beex lojni. Gunaaznini, baxhiya'ni yejnini, dxejc räjpni: “Gudijxga ni nazääblu loä.” <sup>29</sup> Dxejcti ste mosga bazuxhijbni lojni, räjpni: “Guläzsijc. Siguixäca guiraa ni nazäbä lojlu.” <sup>30</sup> Luxh steega naaddini, alga huisäugacni samosni nen latzguiib te bejnini gaan gudijxni guiraa ni nazäabni. <sup>31</sup> Cheni bahuii sgaii mos xhini'c bejnini, gucnaduxhlaizreni, huiye'tzreni lo xlamreni xhi huiyejnini. <sup>32</sup> Dxejcti gurejdx xlamreni mosga, räjpni lojni: “iMos guijdx! Narä badzucaä di'n ni nazääblu loä, sa'csi gunabduxhlu loä. <sup>33</sup> Si'cza niunnäjlu sa'lu, nulazlajzluni sigajc ni balazlazälu.” <sup>34</sup> Sas lacti bidxechduxh lamga, gunibeeni biäuuni te gudijxni guiragajc ni nazäabni lo xlamni.

<sup>35</sup> Baluux Jesús cuentga, räjpni:

—Sigajcza gunnäj Xtadä ni yu' xhaguibaa guiraa rebejn ni di gusiälajzpac guiraa redojl ni rujn resa'ni lojni.

## 19

*Jesús ruluii xcuent yälru'ro'n sa'ni*  
(Mr. 10:1-12; Lc. 16:18)

<sup>1</sup> Che gulujx gunii Jesús recuente, biunejzni Galilee, huijni lo región xten Judea, stelaad gueu Jordán. <sup>2</sup> Xhidajl bejn birinajlni, ro'c basiajcnii rebenracxhuu, <sup>3</sup> dxejc gubig referisee lojni, rlaizreni gusguesireni Jesús ni'c räjpreni lojni:

—¿La sajc guro'n te niguii chäälni che rlaiztisni, ä?

<sup>4</sup> Badzu' Jesús diidxre lojnini, räjpni:

—¿La gajdtu goj lo reguijtz nani bacuaa toMoisés cadre caj xho benchee Dios bejn galooli: “Niguii näjza gunaa bencheenireni?” <sup>5</sup> Guniiza Moisés: “Ni'cni gusaan niguii xtadni con xnanni te xca'ni chäälni, dxejc dirureni gac tio'p, tejtis bejn najcreni.” <sup>6</sup> Ni'cni dirureni gac tio'p, anajcreni tejtis bejn, digacdi guilia' rebejn lo sa'ni nani abachagsa' Dios lo sa'ni.

<sup>7</sup> Dxejcti gunabdiidxreni lojni, räjpreni:

—¿Xhicuent gunibee Moisés gudeed niguii te guijtz lo chäälni te si'c gac guro'nni gunaaga, ä?

<sup>8</sup> Räjp Jesús lojnini:

—Sa'csi najc lastootu si'c te guij, ni'c basaan toMoisés baro'n niguii chäälni, niluxh galodoo et si'cti gujcnii. <sup>9</sup> Luxh rniä lojtu, niguii nani gusaan chäälni, luxh xhet dojl di bennäj chäälni stee niguii, dxejcti guchnaani ste'ca gunaa, rujnni dojl. Sigajcza niguii ni guchnaa gunaaga ni abaro'n chäälhini, rujnza niguiiga dojl.

<sup>10</sup> Dxejc räjp rexpejn pacni lojni:

—Palga si'c najc xcuent niguii con chäälni, hueenru na'c guchnaani.

<sup>11</sup> Jesús räjp lojnini:

—Xhet guiraadi bejn rajc gacbee rediidxre, rebejntis ni rudeed Dios te xcäriensa'c ni'ctis racbee. <sup>12</sup> Yu' xhicuent digacdi guchnaa niguii: yu'reni digacdi guchnaa sa'csi si'c gojlreni; yu'reni digacdi guchnaa sa'csi baxhiñ sabejnreni; yu'zarenii digacdi guchnaareni sa'csi rlaizreni gunreni xtzuuntis Dios. Nani rajc racbeenii rediidxre, sugacbeenireni.

*Biädnäreni rebiuux loj Jesús*  
(Mr. 10:13-16; Lc. 18:15-17)

<sup>13</sup> Dxejcti biädnäreni rebiuxe' loj Jesús te gudzuubni naani yejcreni, guiniabni lo Dios xcuentreni. Luxh rexpejn pacni gudilnäjä rebejn ni siädnä rebiuxe'ga. <sup>14</sup> Dxejc räjp Jesús lojnini:

—Colgusaan guibig rebiuxe' loä, na'c gudxojtreni, sa'csi xcälrnibee Dios xhaguibaa najc xten reni nadolajz si'c najc rebiuxe're.

<sup>15</sup> Che gulujx badzuubni naani yejc rebiuxe', biunejzni ro'c.

*Te beñ ni rajp guninäj Jesús  
(Mr. 10:17-31; Lc. 18:18-30)*

<sup>16</sup> Dxejc biääd te bi'n lo Jesús, gunabdiidxni lojni; räjpni:

—Mastr sa'c, ¿xhini'c nanab gunä te xca'ä yälñabajñ lo Dios par tejpas?

<sup>17</sup> Dxejc räjp Jesús lojni:

—¿Xhicuent rniilu maestr sa'c narä? Diostis najc sa'c. Per par rñajzlu xca'lu yälñabajñ lo Dios, bazoob rextidx Dios ni caj lo xleii Moisés.

<sup>18</sup> Dxejcti räjp bi'nga lojni:

—¿Xhi rediidxga?

Dxejc räjp Jesús lojni:

—Na'c ju'tlu, na'c guesnäjlu bejñ nani di gac chäällu, na'c cuanlu, na'c guiliäslu didxxhii xcuent bejñ. <sup>19</sup> Bazoob xtidx xtadlu con xnanlu, huinälajz sa'lu si'cni sanälajzlu lagajc luj.

<sup>20</sup> Dxejcti räjp bi'nga lojni:

—Guiraa rediidxre runä che nacäli biuux. ¿Xhiruxni'c riäädx gunä?

<sup>21</sup> Dxejc räjp Jesús lojni:

—Palga rñajzlu gaclu beñsa'c lo Dios, huij, bato' guiraa ni rajplu, dxejc gudisni lo rebenproob, dxejc xhaguibaa sapduxhlu xhixtenlu. Dxejcti gudaä te jiädñajllu narä.

<sup>22</sup> Cheni biejn diajg bi'nga rediidxre, guc-huinduxh lajzni sa'csi rajpni xhidalduxh xhixtenni.

<sup>23</sup> Sas Jesús räjp loj rexpejñpacni:

—Rñiliäpac lojtu, naganduxh jiu' te beñ rajp loj xcälñabee Dios. <sup>24</sup> Rñisacä lojtu, guyasiru ted te cameii neñ baloj te guux; naganduxhru jiu' te bejñ ni rajp lo xcälñabee Dios.

<sup>25</sup> Che biejn diajg rexpejñpacni rediidxre, bixeloduxhreni, dxejc canabdiidx loj sa'reni:

—¿Chuni'c sajc jiu' lo xcälñabee Dios?

<sup>26</sup> Dxejc bahuidzu'tz Jesús lojreni, räjpni:

—Naganduxh gun rebejñ dee, Diostis sajc gun guiraloj.

<sup>27</sup> Dxejcti Pedr räjp lojni:

—Nuurnu basa'nnu guiraa xhixtennu te siopnalnulu. ¿Xhini'c jia'pnu ro'c?

<sup>28</sup> Jesús räjp lojreni:

—Rñiliäpac lojtu, la'tu ni biädñajltu narä, che guscobä guiraa recos cheni cueä narä, Xi'n Dios ni gujc Niguii, lo yagxhil cadre guinibeä lo guiraa reben guedxliuj, la'tu ni siädñajltu narä sibejzatu lo tzubitio'p yagxhil te guinibeetu loj guitzubitio'p guejdx xten rexpejñ Israel. <sup>29</sup> Luxh guiraa rebejñ ni basa'n rolijzni o rebejtzni, o rebisiajnni, o xtadni, o xnanni, o chäälni, o xi'nni, o rexhujni, te siädñajlni narä, rebejnga sajc te gayuu huält locni gojpni, nägajc ga'preni xcälñabajñ Dios par tejpas. <sup>30</sup> Rebejñ nani rchalo najcreni beñroru lo sa'reni nez loj Dios, reni'c gac bejñ ni guxii sajc nez loj Dios. Rebejñ nadolajz ni di guchalo sajcrureni lo sa'reni, reni'c sajcrureni nez loj Dios.

## 20

*Xcuent reni rujn dzuun*

<sup>1</sup> Räjpzani:

—Xcälñabee Dios najc si'c te bejñ ni najc baxhuaan xten te renchro. Rsildooru biriini te satiilni mos gun dzuun lo xyujni, lo reyaguub. <sup>2</sup> Che bixelalni gaii mos, bachaagni diidx. Bia'nreni diidx quiixnireni te denaar tebdxej cade tej remosga. Dxejc baxhalñireni loj xyujni sayujñreni dzuun. <sup>3</sup> Birisacni, satiilni sgaii mos si'cti rcagaa, rsil. Bidxaagni sgaii bejñ ni xhet cayujndi, suga'sireni nez lo guii. <sup>4</sup> Räjpni lojreni: “Näjza la'tu colchayujñ dzuun lo xyuä. Narä siguixä si'cni riäjñ xca'tu.” Sä'ti rebejnga lo dzuun. <sup>5</sup> Birisac dade' si'cti läiidxej, birisaczani si'cti rcachon gudxej. Bidxaagni sgaii bejñ, sigajcza räjpni loj

rebejn<sub>ga</sub>. <sup>6</sup> Dxejc si'cti rcagaii birisacni, huijni lo guii. Ro'c bidxäl<sub>ni</sub> sgaii bejn ni xhet cayujndireni, suga'sireni nez lo guii. Dxejc räjpni lojreni: “¿Xhicuent suga'tu ree guideb dxej xhet cayujnditu?” <sup>7</sup> Dxejc räjpreni lojni: “Sa'csi rut siädtildinu te choyennu dzuun.” Dxejcti räjpni lojreni: “Näjza la'tu colchayejn dzuun lo xyuä. Narä siguixsa'cätu.” <sup>8</sup> Che biu' guxhijn, räjp lam lo mos ni rnibee remos: “Gurejdx remos te quixlureni. Gudixxгаа reni biu' gudxejru lo dzuun. Lult gudijx reni biu' ganid lo dzuun.” <sup>9</sup> Dxejc ganid biu' remos ni agudxej biu'reni lo dzuun. Cade tejreni cua' te denaar, si'cni rca' ni rujn dzuun guideb dxej. <sup>10</sup> Cheni biu' reni biu' lo dzuun rsildoo, bejnreni xhigab sica'rureni meel, per sigajcza laareni cua'reni te denaar cade tejreni. <sup>11</sup> Che cua'reni xcuentreni gusloj cadxe'chreni lo baxhuaan xten dzuunga. <sup>12</sup> Räjpreni: “Redee ni biu' lult lo dzuun pet teb ortis bejnreni dzuun, luxh gudijxlureni sigajcni gudijxlu nuurnu, luxh biennu dzuun guideb dxej, luxh biennu dzuun lo yäl<sub>nan</sub>laa.” <sup>13</sup> Dxejc räjp lamga lo tejreni: “Xamigwä, xhet cosguijdxdi cayunä lojlu. ¿La xhet bia'ndinu diidx te denaar quixälu tebdxej? <sup>14</sup> Huij, cua' xmeellu. Narä rlazä quixä bejnre ni biu' lult sigajc ni gudixä lojlu. <sup>15</sup> ¿La di gacdi gunä si'ctis ni rlazä con xmelä? ¿O rdxechlajzlu loä sa'csi nacä hueen, ä?” <sup>16</sup> Ni'cni reni biääd lult sajcreni tebloj con reni biääd ganid, luxh reni biääd ganid sajcreni tebloj con reni biääd lult.

*Gunisac Jesús xho guetni*  
(Mr. 10:32-34; Lc. 18:31-34)

<sup>17</sup> Che sasaj Jesús lo nezyuj sääni Jerusalén, huinäni rexpejn<sub>pac</sub>ni te laad te räjpni lojreni:

<sup>18</sup> —La'tu ruhuiitu sosaanu nez guedx Jerusalén. Ro'c narä, Xi'n Dios ni gujc Niguui, siabä ladz<sub>naa</sub> reni rnibee lo rebixhojz, näjza lo rebejn ni najn leii. Laareni sinibeereni guetä. <sup>19</sup> Suteedreni narä ladz<sub>naa</sub> rebenzijt te cubeereni narä quininreni narä, dxejc gucuaareni narä lo cruzj. Luxh ni riojn dxej, sibansacä loj reben<sub>gut</sub>.

*Ni gunab xnan Jacob näjza Juan*  
(Mr. 10:35-45)

<sup>20</sup> Dxejcti gubig xnan Jacob näjza Juan, xi'n Zebedeo loj Jesús. Bazuxhijbni nez loj Jesús, te gunabni lo Jesús. <sup>21</sup> Gunabdiidx Jesús lojni:

—¿Xhini'c rlanjzlu?

Räjp gunaaga lojni:

—Che jiu'lu lo xcäl<sub>rn</sub>ibeelu, gunibelaa cue tej rexi'nä xladbeelu, steeni cue xladbä<sub>jgw</sub>lu.

<sup>22</sup> Dxejc räjp Jesús:

—¡Ditu gan xhini'c rniabtu! ¿La sajc tedtu yäl<sub>rsacsí</sub> sa'ni tedä? ¿La sajc tedtu trabajw<sub>duxh</sub> sa' ni nanab tedä?

Dxejc räjpreni:

—Sajc tednuni.

<sup>23</sup> Dxejcti räjp Jesús lojreni:

—Guliipacni. Sidedxgaatu trabajw, sidedxgaazatu yäl<sub>rsacsí</sub>. Et narädi cueä reni cue xladbäg<sub>wä</sub> o xladbeä. Xtadä ni yu' xhaguibaa alaguleni rebejn<sub>ga</sub>.

<sup>24</sup> Che biejn diajg stzuu rexpejn<sub>pac</sub> Jesús, bidxe'chreni loj guiro'p rexi'n nane'ga.

<sup>25</sup> Dxejc gurejdx Jesús reni, räjpni:

—La'tu najntu xho rujn regubier ni rnibee lo rebenzijt, rnibeereni rebejn<sub>ga</sub> si'c xlam<sub>reni</sub>. Luxh reni najc rebenro lojreni runnä<sub>jreni</sub> rebejn<sub>ga</sub> si'ctis ni rlanjzreni. <sup>26</sup> Et si'cni gunditu la'tu loj rebejn. Chutis rlanjz gac be<sub>nro</sub> lojtu, nanab gunni dzuun gacnä<sub>jni</sub> guiraliitu si'c te mos. <sup>27</sup> Luxh chutis tejt<sub>ni</sub> rlanjz guiliä'p xpala'nni, nanab gacni si'c xmos lo guiraliitu. <sup>28</sup> Sigajcza biääd Xi'n Dios ni gujc Niguui. Dini niniab mos chu lojni, alga laani najc xmos bejn, badeedzani lagajc yäl<sub>na</sub>baj<sub>n</sub> xtenni te gudijxni bas<sub>la</sub>ani xhidal bejn ni yu' lo dojl.



*Jesús rusiajc tio'p lotiä'p*  
(Mr. 10:46-52; Lc. 18:35-43)

<sup>29</sup> Che gojl guiriireni guedx Jericó, xhidalduxh bejn sanajlni. <sup>30</sup> Dxejcti sobga' tio'p bejn ni di fii cuä' nez yuj. Che biejn diajgreni sadejd Jesús ro'c, gusloj cabedxa'reni:

—Dad, Xi'n toDavid, balazlajz nuurnu.

<sup>31</sup> Gudilnäj rebejnreni, te gusäuren ro'reni. Luxh laareni dipru guredxa'reni:

—¡Dad, Xi'n toDavid, balazlajz nuurnu!

<sup>32</sup> Dxejc guzudxi Jesús, gurejdxni reni di fii, räjpni lojreni:

—¿Xhini'c rlanjtu gunä?

<sup>33</sup> Räjpreni lojni:

—Dad, rlaaznu guixal balojnu te gac finu.

<sup>34</sup> Dxejc balazlajz Jesúsreni, gudajnni balojreni. Sas biacgajc balojreni, gujc bahui-ireni, sanajltireni Jesús.

## 21

*Biu' Jesús guedx Jerusalén*  
(Mr. 11:1-11; Lc. 19:28-40; Jn. 12:12-19)

<sup>1</sup> Cheni Siäddzungenajxhrene guedx Jerusalén, bidzujnreni te guedxbäz ni laa Betfagé, cuä' dajn ni laa Oliib. Baxhal Jesús tio'p xpejnpacni, <sup>2</sup> räjpni lojreni:

—Colchäj loj guedxbäzre ni tre' nez lojtu. Ro'c guidxältu te burgunaa caduu näjza teburhuin. Colguxhecni, coltanäni loä. <sup>3</sup> Palga yu' chu naa: “¿Xhini'c rujntu?”, colye'tz lojni: “Dad caquiinnini terate'. Suxhalgajcnini.”

<sup>4</sup> Luxh guiraa dee gujc te guzobj diidx ni gunii dade' nani bacuaa xtidx Dios agujc xchero, che räjpni:

<sup>5</sup> Colye'tz loj reni rbäjz guedx Sión,

bahuii xreilu siääd lojlu,

nadolajzni bijbni te burbäz, te burbäz, xi'n man ni rujn dzuun, ni ruu cargw.

<sup>6</sup> Dxejcti huij rexpejnpacni, bejnreni si'c gunibee Jesús gunreni. <sup>7</sup> Biädnäreni burga näjza burbäz xi'nni. Gudixhrene xhajbreni detz burbäzga, dxejc gubijb Jesús burbäzga.

<sup>8</sup> Xhidalduxh bejn tre' ro'c, luxh yu' reni gudixh xhajbreni lo nez yuj, peta sgaiireni batiu' balajg te gudixhrene rebalajg lo nez yuj cadre ted Jesús. <sup>9</sup> Rebejn ni nijd, näjza reni siääd dejtzn gusloj cabedxa'reni, räjpreni:

—¡Xchej guibajn Xi'n toDavid! ¡Chicbaa ni siääd xcuent Gueb Dios! Rliä'pnu xpala'n Guejblu Dios.

<sup>10</sup> Cheni biu' Jesús nejn guedx Jerusalén, guiraa reben guejdxga gusloj camojm, yu'reni canabdiidxreni loj sa'reni:

—¿Chucha najc bejnre?

<sup>11</sup> Yu'zaren räjp:

—Dee najc Jesús, niguii ni rusule' xtidx Dios. Guedx Nazare't xten Galilee siäädni.

*Basia Jesús guidoro*  
(Mr. 11:15-19; Lc. 19:45-48; Jn. 2:13-22)

<sup>12</sup> Dxejc biu' Jesús nejn guidoro xten Dios, guläani guiraa rebejn ni caguto' näjza rebejn ni casii. Barexhättni remex xten reni ruchaa meel xten rebejn, näjza reyagxhil xten reni ruto' repalom. <sup>13</sup> Dxejc räjpni lojreni:

—Loj reguijtz ni bacuaa rebenaloo caj: “Sirilaj xquidoä yu' xten yälrbejdx, yälrniab loj Dios.” Niluxh la'tu abejntuni xpiliää gubaan.

<sup>14</sup> Lagajc nejn guideoga, gubig loj Jesús gaii bejn ni di fii näjza gaii bejn ni rsiacoj, luxh basiajcnireni. <sup>15</sup> Cheni bahuii reni rnibee loj rebixhojz, näjza reni najn leii remilagwr ni

bejn Jesús, luxh biejnza diajgreni xho cabedxa' rebiuxe' caniireni: “Rliä'pnu xpala'nlu Xi'n to'reii David”, bidxe'ch rebixhojzga. <sup>16</sup> Dxejc räjpreni loj Jesús:

—¿La riejn diajglu xhi caniireni, ä?

Badzu' Jesús diidxre lojreni räjpni:

—O'n, riejn diagäni. ¿La gadtu goļ lo reguijtz ni bacuaa te dade' ni gunii xtidx Dios? Ro'c caj xcuent redee, cadre caj rediidxre:

Abejnlu goļ rebiuux näjza rebäznite' dij ni rliäpsa'cpac xpala'n Dios.

<sup>17</sup> Dxejcti basaan Jesúsreni, biunejzni ro'c sääni guedxe' ni laa Betania, ro'c gudejdni yääl.

### *Te yag iigw ni gubijdz*

*(Mr. 11:12-14, 20-26)*

<sup>18</sup> Cheni bara yääl, rsilru gubisac Jesús guedx Jerusalén. Laļ ni sääni, gusloj calaanni.

<sup>19</sup> Bahuiini loj te yag iigw cuä' nezyuj. Gubigni gajxh ni' yajgga, per xhet ninejxhdi bidxälni, ganaxhtis balajg caj lo yajgga. Dxejc räjp Jesús lo yajg iigwga:

—ıNuncru xcaj nicla tej ninejxh lojlu!

Dxejcti gubidzgajc yajgga. <sup>20</sup> Cheni bahuii rexpejnpacni, bidxeloduxhreni, gunabdiidxreni loj Jesús:

—¿Xhi cuent gubidzgajc yajgga?

<sup>21</sup> Räjp Jesús lojreni:

—Rniliäpac lojtu, palga chalilajzfactu, luxh ditu gun tio'p lajztu, xhet ganaxdi sa' cosre guntu, palga gäbtu lo te dajn: “Gubicaj ro'c, gusuj galäii nisdoo”, si'c gacni. <sup>22</sup> Guiraa ni guiniabtu loj Dios, palga chalilajzfactu, suniidxnini.

### *Xcälrnibee Jesús*

*(Mr. 11:27-33; Lc. 20:1-8)*

<sup>23</sup> Dxejcti biu' Jesús neņ guidoro, dxejc laļ ni caguluiini rebejn gubig reni rnibee loj rebixhojz näjza rebęgool, gunabdiidxreni lojni:

—¿Xhi yälrnibee rajplu ni'cni rajc rujnlu recosre? ¿Chuni'c baniidx yälrnibeere lojlu?

<sup>24</sup> Badzu' Jesús diidxre lojreni räjpni:

—Sigajcza narä gunä te yälgunabdiidx lojtu; palga sajc gudzu'tu diidxga loä, dxejc guiniä lojtu chuni'c baniidx yälrnibee te runä recosre. <sup>25</sup> ¿Chuni'c gunibee gutiobnis Juan ni rutiobnis? ¿La Dios o la beņ guedxliuj?

Dxejc gusloj cayäjp lo sa'reni, palga jie'tznu Dios gunibeeni, dxejc sinajni loonu, ¿xhicuent ditu nililajz xtiidxni? <sup>26</sup> Palga jie'tznu bejn guedxliuj gunibeeni, dxejc sixa't rebejn yejcnu sa'csi guiraareni rililajzreni Juan najc te Dade' ni gunii xtidx Dios. <sup>27</sup> Dxejc räjpreni loj Jesús:

—Dinu guidon.

Dxejc räjp Jesús lojreni:

—Sigajcza narä dina guiniä caro siääd yälrnibee te runä guiraa recosre.

### *Te dade' ni guyu' tio'p xi'nni*

<sup>28</sup> Jesús räjp lojreni:

—Guidon xho guichalootu diidxre. Te dade' guyu' tio'p xi'nni. Räjpni loj xingangalojni: “Xi'nä, nadxej chayujnlu dzuun cadre care' uub.” <sup>29</sup> Dxejc badzu' xi'nni diidx lojni, räjpni: “Di rlazädi cha'a.” Luxh che gojl ste ra't, basiejch lajzni säätini sayujnni xtzun xtadni. <sup>30</sup> Dxejc räjp dade'ga lo stee xi'nni: “Xi'nä, nadxej chayujnlu dzuun.” Dxejc badzu' xi'nni diidxre, räjpni: “Mbaj, dad, sia'ä.” Luxh dini nij. <sup>31</sup> Loj guiro'preni, ¿chuni'c bejn si'cni rlazj xtadni?

Dxejc räjpreni:

—Xingangalooni.

Dxejcti räjp Jesús lojreni:



—Rniliäpac lojtu, reni ruquijx guiraloj, näjza regunabdxab ganidreni jiu'reni lojtu loj xcälrnibee Dios, <sup>32</sup> sa'csi Juan ni rutiobnis biädluini la'tu xho guibajntu, luxh ditu nililajz xtiidxni. Biädla reni ruquijx guiraloj, näjza regunadxab huililazduxhreni xtiidxni. Niluxh la'tu bahuiitu guiraa recosga, ditu nusiechlajz te nililajztu xtiidxni.

### *Xcuent remosgüijdx*

(Mr. 12:1-12; Lc. 20:9-19)

<sup>33</sup> 'iColcuadiajg stee cuentre! Guyu' te dade' ni najc baxhuaan xten te renchro, gule'cni yaguub loj xyujni, bateedni bazaa guideb gabi yujga. Gudäänni te gueed te gujcní te tanc te chuchee nisuubga che rxii reuub. Bencheezani te yu' ni najc jiaaro te ro'c cue te ni fii guideb loj xyujni. Badedlaani yujga loj gaii bejn ni rujn dzuun, sä'tini te biaj zijtro. <sup>34</sup> Che agojl guire' cose'ch baxhał baxhuaanga gaii xmosni loj xyujni te chaxiireni cose'ch ni riäjł xca' baxhuaanga. <sup>35</sup> Dxejc reni biannäj yujga gunaazreni remosre, gudijnreni tejni, bagu'treni steeni, bacuaareni guij yejc steeni. <sup>36</sup> Dxejc baxhałsac baxhuaanga sgaii mos. Niluxh reni biannäj yujga sigajcza bennäjreni remosga.

<sup>37</sup> 'Dxejcti bejn baxhuaanga xhigab: “Maazru huen guxhałä xi'nä; sucuadiajgrureni xtiidxni.” <sup>38</sup> Cheni bahuiireni lo xi'n baxhuaan xten yujga, bejnreni xhigab: “Deeni jiannäj yujre; do'o guigu'tnuni te jiannäanu yujre.” <sup>39</sup> Dxejcti gunaazrenini, guläärenini te laad, dxejc bagu'trenini.

<sup>40</sup> Dxejc gunabdiidx Jesús räjpni:

—Che jiääd baxhuaan xten yujga, ¿xhi gunnäjni rebejn nani biannäj xyujni?

<sup>41</sup> Dxejc räjpreni loj Jesús:

—Dini gulazlazj rebeņguijdxga, sugu'tnireni, sudedlaani xyujni loj ste'ca bejn nani gudeed cose'ch ni riäjł xca'ni che gał guire' cose'chga.

<sup>42</sup> Dxejcti räjp Jesús lojreni:

—¿La gajdtu goł lo reguijtz nani bacuaa dade' nani gunii xtidx Dios galoo? Rediidxre caj ro'c:

Guij nani gulälaz reni runchee yu',  
cua' Dios lagajc guijga gudixhnini squiin yu',  
sajcruni loj guiraa reguij.

Dee bejn Gueb Dios, luxh rdxeloduxhnu dzunrore ni bejnni.

<sup>43</sup> 'Ni'cni rniä lojtu, sibicaj xcälrnibee Dios lojtu, sidejdni loj rebejn nani gudeed ni riäjł xca' xcälrnibee Dios, nalajznu renani chalilajzpac xtiidxni. <sup>44</sup> Luxh xcuent guijga: nani jiajb lo guijga, silia'ni, per nani guitejb guijga yejcní, li siujyni, gacni däj.

<sup>45</sup> Che biejn diajg reni rnibee lo rebixhojz näjza refarisee recuent ni canii Jesús, gucbeerene cagusä'tni lagajc laareni. <sup>46</sup> Rlajzreni niniaazrenini, per bidxejbreni rebejn sa'csi salilajz rebejn najc Jesús bejn ni rnii xtidx Dios.

## 22

### *Xcuent yälruhnaa*

<sup>1</sup> Guslosac canii Jesús lojreni con recuent, räjpni:

<sup>2</sup> —Xcälrnibee Dios najc si'c te reii ni bejn te sa' te guchnaa xi'nni. <sup>3</sup> Baxhałni rexmosni te saxiireni regelnejdx chääreni sa', niluxh rebejnre di rlajzdireni. <sup>4</sup> Dxejc baxhałsacni rexmosni, räjpni: “Colye'tz loj reni abidon, agujc comiid. ¡Abagutä balti gonsa'c, gonguro! Anacchee guira'ti yälrajw. Coltaa.” <sup>5</sup> Niluxh reni abidonga di niu xtiidxreni. Tejni sahuui rexyujni, steeni säa lo rexnegosni, <sup>6</sup> dxejcti sgaii reni niajc biooz gunaazreni rexmos reii, basacsíreni remosga, sas bagu'trenini. <sup>7</sup> Che biejn diajg reiiiga, bidxe'chduxhni, baxhałni rexsoldaadni te sagu'treni guiraa rebeņguijdxga, te saze'czareni guejdx cadre rbäjzreni. <sup>8</sup> Dxejcti räjpni loj rexmosni: “Guiraa dee anacchee, di nungäjł jiäädru reni abidon. <sup>9</sup> Colchäj, pues, lo resquiin lo nezyuj, colcuejdx chutis bejn ni guidxaagtistu.” <sup>10</sup> Birii

rexmosni, sääreni lo nezyuj. Dxejc bachagsa'reni guiraatis bejn ni bidxaagreni, reni najc beñgüjdx sigajc reni najc beñhüeen te gudxaj roliz reiiga.

<sup>11</sup> 'Dxejc biu' reii biädhüini loj rebiooz. Bahüini loj te bejn ni sobga' ro'c, luxh xhet xhablanijdini najcwni. <sup>12</sup> Dxejc räjp reii lojni: “Xamigwä, ¿xho bejnlu biu'lu ree luxh xhet xhablanijdilu najcwlu?” Dxitis sobga' bejnga, xhet rniidini. <sup>13</sup> Dxejc räjp reii loj rexmosni: “Colguliib ni'ni näjza naani, colsälni detzyu' cadre nacäy te ro'c gonduxhni chubejli reläjyni.” <sup>14</sup> Sa'csi xhidajl najc reni bidon luxh guxii najc reni bibe.

### *La sajc quiixni impuest*

*(Mr. 12:13-17; Lc. 20:20-26)*

<sup>15</sup> Dxejcti sii refarisee, bia'nreni diidx sigüilreni xho gunijt Jesús te diidx te guiga'ni. <sup>16</sup> Ni'c baxhalreni gaii xpejnreni näjza gaii bejn ni nadxaag Herodes te räjpreni loj Jesús: —Mastr, anajnnu rniilu ganax didxlii, rulüizalu xtiidxpac Dios, luxh dilu jiu xhi rnii rebejn, sa'csi dilu cue bejn ni sajcro lo stee bejn. <sup>17</sup> Gunii loonu, pues: ¿La laaca najc quiixnu impuest lo César ni rnibee loonu o et laadi?

<sup>18</sup> Dxejc gucbee Jesús xhet laadi xhigab cayujnreni nen lastooreni, dxejc räjpni lojreni: —¿Beñgüjdx! ¿Xhicuent rlajztu guquüiltu narä? <sup>19</sup> Colgului te meel lö.

Dxejc badeedreni te meel ni laa denario. <sup>20</sup> Che bahüi Jesús loj meelga, gunabdiidxni lojreni, räjpni:

—¿Chuni'c caj lo meelre?

<sup>21</sup> Dxejc räjpreni:

—Loj César.

Dxejc räjp Jesús lojreni:

—Colgudeed lo César ni riäjl xca' César, colgudeedza lo Dios ni riäjl xca' Dios.

<sup>22</sup> Che biejn diajgreni rediidxre, bidxeloduxhreni. Dxejc basaanrenini, sä'tireni.

### *Canabdiidxreni xho gac che guibansac rebejn*

*(Mr. 12:18-27; Lc. 20:27-40)*

<sup>23</sup> Lagajc dxejga bidzujn gaii reni laa saducee, reni di chalilajz sibansac bejn loj rebengut. Gubigreni loj Jesús, gunabdiidxreni, <sup>24</sup> räjpreni:

—Mastr, si'c naj toMoisés, palga yu' te bejn ni abachnaa, luxh ruti xi'nni che guetni, riäjl guchnaa bejtzni biuudga te chu xi'nreni xcuent bejtzni. <sup>25</sup> Mbaj. Loonu yu' gajdz nigüi ni najc bejtz sa'reni. Betzgoolga bachnaa, dxejc gujtni, luxh di xi'nni niu'. Basa'nni chäälni lo bejtzni. <sup>26</sup> Sigajcza gusajc ni ro'p bejtzni; sigajcza gusajc ni riojn bejtzni. Si'c huinuu gujc che basa'li guigajdz bejtzga. <sup>27</sup> Sas che gujt guiraareni, näjza gunaaga gujt. <sup>28</sup> Che guibansac rebejnga lo rebengut, ¿chu tej lo rebejtzga gac chäälpac gunaaga, ni guiraareni bachnaareni gunaaga?

<sup>29</sup> Dxejcti badzu' Jesús diidxre lojreni, räjpni:

—Et laadi rujntu xhigab sa'csi ditu gacbee xtidx Dios niclaza xcuent xcälrnibee Dios.

<sup>30</sup> Ni che guibajn rebengut, diru yälruhnaa chu, diruza bejn gudeed rexindxa'preni guchnaa. Dxejc sajcreni si'c rexangl Dios ni yu' xhaguibaa. <sup>31</sup> Dxejc xcuent yälrbansac loj rebengut, ¿la gajdtu goj reguijtz ni bacuaa toMoisés che räjp Dios xcuent retoxtad-goldoonu: <sup>32</sup> “Narä nacä Xtios Abram, Xtios Isaac, näjza Xtios Jacob”, ä? Dios di gac Xtios bengut, Xtioistis rebejn ni nabajn najcni.

<sup>33</sup> Che biejn diajg rebejn xtidx Jesús, bidxeloduxhreni diidx ni rulüini.

### *Diidx ni maazru sajc*

*(Mr. 12:28-34)*

<sup>34</sup> Che gucbee refarisee basäu Jesús ro' resaducee, bidojpreni, bachaagreni diidx.

<sup>35</sup> Dxejc tejreni nani najn leii, rlajzni guquüilni Jesús ni'c gunabdiidxni lojni räjpni:

<sup>36</sup> —Mastr, ¿xhi diidx ni gunibee Dios sajcro lojreni caj lo leii?

<sup>37</sup> Räjp Jesús lojreni:

—Nani rnii scree: “Huinälajz Dad Xtioslu guideb lastoolu, guideb xaimlu, näjza guidebgajc xcäriejnlu.” <sup>38</sup> Diidxre ni gunibee Dios najc ni sajcru, luxh ganidni siädni loj rextidx Dios. <sup>39</sup> Ni ro'pga sigajcza najcni: “Huinälajz resa'lu sigajc ni sanälajzlu lagajc luj.” <sup>40</sup> Guiro'p remandamientre nanab te guzoob bejn guiraa rediidx ni bacuaa toMoisés näjza ni bacuaa redade' nani gunii xtidx Dios.

*¿Chu xi'n najc Crist?*

*(Mr. 12:35-37; Lc. 20:41-44)*

<sup>41</sup> Lałni tre' refarisee, gunabdiidx Jesús lojreni, räjpni:

<sup>42</sup> —¿Xhi rujntu xhigab xcuent Crist? ¿Chu xi'n najcni?

Räjpreni lojni:

—Laani najc xajg toDavid.

<sup>43</sup> Räjp Jesús lojreni:

—¿Xhicuent räjp David “Xtadä” lojni che basanij Sprit Dxan xten Dios lastooni? Ni'c bacuaa toDavid rediidxre:

<sup>44</sup> Dad Dios räjp lo Xtadä, gurej xladbeä lał ni gudzugä guiraa reni rdxe'ch lojlu ladzni'lu.

<sup>45</sup> Palga lagajc David rnii: “Dad” lojni, ¿xho mood najcni xi'nni?

<sup>46</sup> Dxejc rut gujcdi badzu' nicla te diidx lojni, luxh dxejliga rutru gojpdı xhi diidx niniabdiidxrureni lojni.

## 23

*Rucuaquij Jesús refarisee näjza rebejn nani najn leii*

*(Mr. 12:38-40; Lc. 11:37-54; 20:45-47)*

<sup>1</sup> Dxejc räjp Jesús loj reben xhidaalga näjza loj rexpejn pacni:

<sup>2</sup> —Rebejn ni najn leii näjza refarisee rajp yäl najn te gusule'reni xleii Moisés. <sup>3</sup> Ni'cni colguzoob guiraa rextiidxreni, na'c guntu sa' recos ni rujnreni, sa'csi laareni rniireni xhini'c guntu, dxejcti lagajc laareni direni gun ni rnibeereni guntu. <sup>4</sup> Rnibeereni gun rebejn cos naganduxh ni najc si'c te cargw naduxh ni di gac guu bejn, per laareni nicla con te bicuenaareni direni gusniibni. <sup>5</sup> Guiraa recos ni rujnreni, rujnrenini te fiitis rebejn. Rchaglajzreni rcaj lo cuajsreni näjza roxhajn gureni recaje' cadre yu' tla' guijtz ni caj xtidx Dios lojni. Rustioolzarenı xi' xhajnreni. <sup>6</sup> Rlajzreni ganidreni tedreni lo mex che gal te lanij; rlajzreni cuereni lo rebancw ni suga' delant nen reguidobáz. <sup>7</sup> Sigajcza rlajzreni guchagro' bejn naareni nez lo guii, guiniiza rebejn “Mastr” lojreni.

<sup>8</sup> Na'c gusaantu guinii rebejn “Mastr” lojtu, sa'csi tejtisni yu' ni najc Mastr, laani najc Crist. Peta la'tu guiraatu najctu tejsi sa'tu. <sup>9</sup> Na'c guiniitu “Xtadä” loj te ben guedxliuj sa'csi yu' tejtis ni najc Xtadtu, ni'c najc Dios ni yu' xhaguibaa. <sup>10</sup> Na'cza gusaantu guiniireni lojtu “Mastr” sa'csi yu' tejtis Mastr, ni'c najc Crist. <sup>11</sup> Ni yu' si'c mos lojtu ni'c najc benroru loj resa'ni. <sup>12</sup> Sa'csi chutis ni rchaloni najcni benro lo sa'ni, ni'c sustuiyá lojni, chutis ni najc nadolajz loj Dios, ni'c sunáni benro lo sa'ni.

<sup>13</sup> ¡Proobzatu remastr xten leii näjzatu refarisee, najctu ben guijdx! Sa'csi rudxoju jiu' rebejn loj xcäl rnibee Dios. Lagajc la'tu ditu jiu' luxh dizatu gusaan jiu' rebejn ni rlajz jiu'.

<sup>14</sup> ¡Proobzatu remastr xten leii näjzatu refarisee, najctu ben guijdx! Sa'csi rudzucajtu roliz renanbiuud lałsi cabedx canabduxhtu lo Dios, naatu gusguetu bejn si'c. Sa'csi rujntu scree, siabduxh fis xten Dios yejctu.

<sup>15</sup> ¡Proobzatu remastr xten leii näjzatu refarisee, najctu ben guijdx! Zijt rijtu lo renezyuj näjza lo nisdoo te guntu gaan guchaa mase tejtis bejn xmoodni te ganı Dios si'c rajntuni. Luxh che ahuililajz bejn ga xtiidxtu, rujntuni tio'p huält maazru te xi'n gabijl loj ni najctu.

<sup>16</sup> ¡Proobzatu, najctu si'c lotiä'p, rlajztu guluiitu nezyuj! La'tu ni rnii palga te bejn guiniliipac xtiidxni guzä'tni guidoro, xhet sajcdi xtiidxni. Palga guiniliipacni guzä'tni oor ni yu' nen guidoo, dxejc sii rniliini dxejc nungäjł guzoobni xtiidxni. <sup>17</sup> ¡Ben nayääl,

benlotiä'p! ¿Xhini'c sajcrú? ¿La oor la guidoro ni rundxan oorga? <sup>18</sup> Rniizatu: “Palga te bejn guiniliipacni guzá'tni lo bacuug ni yu'nen guidoro, di xcuentdi xtiidxni. Luxh palga yu' chu guiniliipac guzá'tni gojn ni dzuub lo bacuug, dxejc sii rniliipacni dxejc nungäj̄l gusoobni xtiidxni.” <sup>19</sup> ¡Ben nayääl, ben lotiä'p! ¿Xhini'c sajcrú? ¿La gojn o la bacuug nani rundxan gojnga, ä? <sup>20</sup> Nani ruzä't lo bacuug che rniliipacni, et ganaxdi lo bacuug ruzä'tni, näjza guiraa ni tre' lo bacuug ruzä'tni. <sup>21</sup> Ni ruzä't guidoro che rniliipacni, et ganaxdi guidoro ruzä'tni, näjza Dios ni rbäjz za nen guidoro ruzä'tni. <sup>22</sup> Sigajcza ni ruzä't guibaa che rniliipacni caguzä'tzani yagxhilo xten Dios näjza lagajc Dios ni sobga' ro'c.

<sup>23</sup> ¡Proobzatu remastr xten leii näjzatu refarisee, najctu benguijdx! Bedzxtiil, anis näjza comin ni rajptu, rudeedu lo Dios tej tantga yejc cade te tzuu, niluxh ditu jiu ni sajcrú lo xtidx Dios, cadre caj xcuent yäl̄nabanya, yäl̄rulazlajz, näjza yäl̄rililajz. Deeza ni riäj̄lpac guntu lāl ni cayujnzatu steega. <sup>24</sup> ¡La'tu, lotiä'p ni rlajz guluii nezyuj! Riutu rediidx ni guxii sajc, niluxh rediidx ni sacduxh ditu jiuni, najctu si'c bejn ni rbää te rex lo xpla'tni dxejcrú räjmni te cameii.

<sup>25</sup> ¡Proobzatu remastr xten leii näjzatu refarisee, najctu benguijdx! Rusiatu detz bas näjza pla't luxh nen̄ni najc-dxuudx. Sigajcza la'tu riuduxhtu recostumbr, luxh lastootu guidxa yäl̄gubaan näjza yäl̄rdxe'chlajz. <sup>26</sup> Farisee ni najc lotiä'p: gudibxgaa nen̄ bas näjza nen̄ pla't, dxejc näj dejtzn̄i sajc naya.

<sup>27</sup> ¡Proobzatu remastr xten leii näjzatu refarisee, najctu benguijdx!, sa'csi najctu si'c rebaa ni nacchesa'c; nolbäjreni, saru rluuini, luxh nen̄reni guidxa dzujt xte bengut näjza bälyudx. <sup>28</sup> Sigajcza najctu la'tu. Saru rujn lojtu, rchalo rebejn najctu beñsa'c, niluxh lastootu guidxa yäl̄rusguee näjza yäl̄guyalajz.

<sup>29</sup> ¡Proobzatu remastr xten leii näjza refarisee, najctu benguijdx! Runcheetu xpa redade' ni gunii xtidx Dios galoo, rusucheedzatu ro' xpa rebejn ni gujc beñsa'c, <sup>30</sup> dxejc rniitu: “Paru nibaj̄n̄nu nen̄ redxej ni gubaj̄n̄ retoxtadgoldoonu dinu niacnäj reni bagu't redade' ni gunii xtidx Dios.” <sup>31</sup> Lagajc con rediidxre rcäjptu najctu rexajg renani bagu't redade' nani gunii xtidx Dios. <sup>32</sup> ¡Col̄guscuääz guntu sa' recos ni guläxtiej retoxtadgoldootu!

<sup>33</sup> ¡La'tu ni najc si'c bäl̄, la'tu ni najc si'c te bitiääz guidxa bäl̄nialajz! ¿Xho guntu te na'c chäätu gabijl par tejpas? <sup>34</sup> Ni'cni, guxhalä rexpenä ni guinii xtidxä, näjza beñnaj̄n, näjza mastr. Luxh yu'reni sugu'ttu sucuaatureni lo cruzj; yu'zareni siguijntu nen̄ reguidobäz, sirinajltureni guejdx por guejdx. <sup>35</sup> Si'cza yejctu jiajb xtiejn guiraa reben̄nadolajz ni bagu't bejn xchejli toAbel ni gujc nadolajz, xchejliza Zacarías, xi'n Berequías, ni bagu'ttu nen̄ guidoro gajxh lo bacuug. <sup>36</sup> Rniliäpac lojtu, dojl̄ xten guiraa recosga siajb yejc rebejn ni tre' lo guedxliuj̄ naj̄.

*Jesús biin xcuent guedx Jerusalén*

*(Lc. 13:34-35)*

<sup>37</sup> Räj̄pza Jesús:

—¡Jerusalén, Jerusalén! Xpejn̄lu rugu't redade' ni rnii xtidx Dios, rucuaazareni guij yejc rebejn ni ruxhal̄ Dios te gusule'reni xtiidxni lojtu. ¡Balti huält rlazä nutie'ä la'tu si'cni rutie' guidco'c rexquidbäzni nen̄ xhigani, per ditu nicäj̄b! <sup>38</sup> Col̄huii xho jianxteb xquidootu cuälazrenini. <sup>39</sup> Rnixgää lojtu, naj̄ dirutu fii loä, dxejli che guiniitu: “Benle' Dios nani siääd xcuentni.”

## 24

*Jesús räjp sibijl guidoro*

*(Mr. 13:1-2; Lc. 21:5-6)*

<sup>1</sup> Birii Jesús nen̄ guidoro te asiini, dxejc gubig rexpejn̄pacni lojni, gusloj caguluiireni reyuduxhga lojni. <sup>2</sup> Dxejc räjp Jesús lojreni:



—¿La ruhuiitu guiraa reyu're? Rniliäpac nicla tej guij di jia'n yejc sa'ni ree; guiragajc reyu're sibijl.

*Cos ni guluiloj gac fis*

*(Mr. 13:3-23; Lc. 21:7-24; 17:22-24)*

<sup>3</sup> Dxejcti huijreni yejc te dajn ni laa Oliib. Che gurej Jesús ro'c, biääd rexpejn pacni lojni te xhiga'tz gunabdiidxreni lojni:

—Rlaaznu guiniilu loonu guc gac guiraa recosre. ¿Xhi seen guluiloj ameer jiäädlu näjza che ameer nitloj guedxliuj?

<sup>4</sup> Dxejc räjp Jesús lojreni:

—¡Colnatiro te rut gusgueedi la'tu! <sup>5</sup> Sa'csi su' xhidajl reni jiääd, naareni: “Narä nacä Crist”, luxh susgueereni xhidajl bejn. <sup>6</sup> Siejn diajgtu xcuent cadre cayajc guer, näjza xcuent cadre rlanj chu guer, na'c guidxajt sa'csi si'c nungäj gac, niluxh gajd gal di nitloj guedxliuj. <sup>7</sup> Sa'csi siäjs te nación sidilnäjni stee nación; te yälrnibee sujn guer con stee yälrnibee, luxh su' gubijn, su' yälgujdx, su'za xuduxh xhidajl lajt. <sup>8</sup> Luxh guiraa redee cuäxtiejtis retrabajwduxh ni churu chu.

<sup>9</sup> 'Dxejc guteedreni la'tu ladznaa rebejdojl te gusacsireni la'tu, te gugu'tzaren i la'tu, luxh guiraa rebejn sidxe'ch lojtu sa'csi sanälajztu narä. <sup>10</sup> Neñ redxejga, xhidajlreni sibälaz xcälirilajzreni, sidxe'ch lo sa'reni, suto' sa'reni lo sa'reni. <sup>11</sup> Dxejc siricaj xhidajl bejn ni rusguee, gäbreni xcuent Dios rniireni, luxh susgueereni xhidajl bejn. <sup>12</sup> Sa'csi lacti suduxh yällatsiaj lo guedxliuj, diru bejn chanälajz sa'ni. <sup>13</sup> Dxejcti bejn ni chasanäj xnezyujtis Dios, ni'c sun gaan xca'ni yäl nabajn par tejpas. <sup>14</sup> Luxh sisiule' xtidx Dios guideb lo guedxliuj te gacbee guiraa rebejn guedxliuj xtiidxni; dxej cru jiääd fis xten Dios.

<sup>15</sup> 'Cheni fiitu asobga' te beñguidxduxh neñ yu' ni najc dxan neñ guidoro, si'cni gunixgaa toDaniel ni gunii xtidx Dios gacni, bejn ni goj dee sugacbeeni nani rojni, <sup>16</sup> dxejc renani rbäjz lo guedx Judea, suguxunreni gucuatxlojreni neñ dajn. <sup>17</sup> Bejn ni niä'p yejc xyu'ni dxejga di gal di jiäjtne te chalääni xhixtenni neñ xyu'ni; <sup>18</sup> bejn nani cayujn dzuun lo niaa, na'c guibi'ni niclaza chaxhiini xhajbni. <sup>19</sup> ¡Proobza regunaa ni nuxi'n, näjza reni cagusiä' báz neñ redxejga! <sup>20</sup> Colnabduxh loj Dios xhet neñdi redxej ni cayacnalduxhdi nanab guxunditu, niclaza dxej che rusilajz bejn. <sup>21</sup> Sa'csi su' trabajwduxh neñ redxejga, sa' ni gajd bejn fii dxejli ni guzobloj guedxliuj, luxh che tedni, diru guibi' chuni. <sup>22</sup> Luxh palga di Dios gutiu' yejc redxejga, nicla tej bejn di laa. Luxh sutiu' Dios yejc redxejga sa'csi rinälajzni reni aguleni.

<sup>23</sup> 'Neñ redxejga palga yu' chu naa lojtu: “Colhuii, aree Crist”, o “Colhuii ani arec”, na'c chalilajztuni. <sup>24</sup> Siääd xhidajl niguii ni rusguee, gäbreni najcreni crist; sidzujnza rebejn ni rusguee ni gäb xtiidx pac Dios rusule'reni; luxh sujnreni remilagwr sujnzaren i senro, parsi gusgueereni, susgueduxhreni rebejn, niluxh rlanjreni gusguezaren i rebejn ni agule Dios, ni rililajz xtiidxni. <sup>25</sup> Agunixgää lojtu xhini'c gac. <sup>26</sup> Ni'cni palga naareni lojtu: “Bahuii, a crist yu' nez lo reyubijdz”, na'c chäätu; o palga naareni: “A crist suga' neñ yu're”, na'c chalilajztureni. <sup>27</sup> Sa'csi si'cni guideb xhaguibaa rien che rdinya' ladjiaa näjza ladjiatli, si'cza suhuiitu loä, Xi'n Dios ni gujc Niguii, cheni jiälsacä lo guedxliuj. <sup>28</sup> Ni najntu cadre naga' te mangut, ro'c re' regelbetz.

*Cheni jiädsac Xi'n Dios ni gujc Niguii*

*(Mr. 13:24-37; Lc. 21:25-33; 17:26-30, 34-36)*

<sup>29</sup> Räjpzani:

—Cuantsi ted guiraa retrabajwduxh, sicäy lo gubijdx, diruza bäi gusanij, sitejbza rebajl ni yu' xhaguibaa, sinibduxhza guideb xhaguibaa. <sup>30</sup> Dxejcti suhuiireni xhaguibaa seen xten Xi'n Dios ni gujc Niguii, luxh guiraa rebejn ni rbäjz neñ guiraa reguejdx lo guedxliujre, sonduxhreni suhuiireni siääd Xi'n Niguii lo reza xhaguibaali. Siäädni



con yälrnibee näjza yälrdimbichaduxh. <sup>31</sup> Dxejc suxhalni rexanglni con te trompet ni guscuedxa'reni dipduxh te guire' guiraa rebejn ni aguleni lo guidajp lajd squiin guedxliuj, guideb lo guedxliuj näjza xhaguibaa.

<sup>32</sup> 'iColguisieed ni ruluii yajg iigw! Che naren reṇaani che cabääni be'n, asiääd bäi curex, <sup>33</sup> sigajcza cheni fiitu cayajc guiraa recosre, sacbeetu asiädgajxh fis, rolä'li abidzujñni. <sup>34</sup> Rniliäpac lojtu, guiraa redee sajc laḷ ni nabajn gaii rebejn ni suga' ree ṇaj. <sup>35</sup> Guibaa näjza guedxliuj sinitloj, niluxh xtidxä di nitloj.

<sup>36</sup> 'Rut najndi xhi dxej, xhior gacni, nicla rexangl Dios, niclaza Xi'n Dios; Dad Diostis najn.

<sup>37</sup> 'Sigajcni gujc neṇ redxej che gubajn toNoé, si'cza gac che jiälä Xi'n Dios ni gujc Niguii. <sup>38</sup> Neṇ redxe galoo, cheni gajd nisguiduxhga jiajb, rebejn ni nabajn dxejc cayajwreni, cayä'reni, caguchṇaareni, cagudeedza bejn xindxa'preni guchṇaa, dxejli cheni biu' Noé neṇ barcwro. <sup>39</sup> Direni niacbee xtiidxni; cheni biäädli nisguiduxh ni sanä guiraareni dxejcru gubeereni. Sigajcza gacni che jiälsacä narä Xi'n Dios ni gujc Niguii. <sup>40</sup> Neṇ redxejga palga cayujn tio'p bejn dzuun lo niaa tejni guibee, steeni sia'n. <sup>41</sup> Palga cayo't tio'p gunaa xobniil, tejni guibee, steeni sia'n.

<sup>42</sup> 'Ni'cni colṇsusiṇ, sa'csi ditu gan xhi dxej jiääd Dad xtentu. <sup>43</sup> Colṇanchee, paru niacbee baxhuaan xten yu' cor yääl niääd gubaan ni siädlan rolijzni, nisiusiṇni dxejc, dini nusaan niu'ni rolijzni te cuanni. <sup>44</sup> Ni'cni colṇsusiṇza la'tu, sa'csi siääd Xi'n Dios ni gujc Niguii lagajc or ni ditu gun xhigab jiäädni.

### *Xcuent te mossa'c näjza te mosguijdx*

*(Lc. 12:41-48)*

<sup>45</sup> 'iChuni'c najc mossa'c ni ruzoob diidx, ni basannäj xlamni rebejn ni yu' rolijzni te gudeedni xhi gaureni ä? <sup>46</sup> Chicbaa mos ni saru cayujn xtzuunni che guidzujñ xlamni. <sup>47</sup> Rniliäpac lojtu, lamga susa'nni sa' mosga te fiini guiraa xhixteni. <sup>48</sup> Dxejc palga mosga di gusoob xtidx xlamni, gunni xhigab: "Sacladuxh guibi' xlamä", <sup>49</sup> dxejc guisloj cagusacsíni resamosni, guislojni gaunäjni, yänäjni rebengu. <sup>50</sup> Dxejc sidzujñ xlamni dxej che dini gun xhigab jiäädni, luxh or ni dini gan guidzujñni. <sup>51</sup> Dxejc siguinduxhni mosguijdxga, surilaagwnini te guidxagsa'ni sabenguixdxi, dxejc sonduxhni, chubejli reläjyni.

## 25

### *Xcuent tzuu gunaa*

<sup>1</sup> Räjpa Jesús:

—Pues xcälrnibee Dios najc si'c tzuu gunadxa'p nani cua' xcandilse'treni te huijreni te sa'. <sup>2</sup> Gaii regunaaga nasiṇ, sgaiireni nayääl. <sup>3</sup> Reni nayäälga sanäreni xcandilreni, niluxh direni nica' sijl se't. <sup>4</sup> Niluxh reni nasiṇga sanäreni sijl se't te guze'creni neṇ xcandilreni. <sup>5</sup> Sa'csi bi'nga di nidzungaj, gunaaaz bacal regunadxa'pga, gudiejstireni. <sup>6</sup> Dxejc si'cti garol yääl, biejn te xse' ni räjp: "Bi'n asiääd, colchäj, colchachaglojni." <sup>7</sup> Guiraa regunaare huistieguxuṇreni, dxejc bensa'creni xcandilreni, te cuaguijreni. <sup>8</sup> Dxejc guigaii regunayääl räjpreni loj reni nasiṇ: "Colṇunidxlaa te bo'c se't gusanijnu xcandilnu, sa'csi arlajzni jiuini." <sup>9</sup> Dxejcti regunanasin räjp lojreni: "Digacdini, dxejc dini gal nicla par nuurnu nicla par la'tu. Colchäj cadre ruto'reni se't colchazii xse'ttu." <sup>10</sup> Lalni sasii guigaii regunaa-nayäälga se't, bidzujñ bi'n. Regunaa-sin ni cabäjz bi'n biunäjrenini lo sa', biäuuti ro lä'. <sup>11</sup> Cheni bidzujñ regunayäälga, räjpreni: "Dad, Dad, baxhal ro lä'." <sup>12</sup> Dxejc räjpni lojreni: "Rniliäpac lojtu, dina gumbeätu."

<sup>13</sup> Dxejc Jesús räjp lojreni:

—Colṇsusiṇza, sa'csi ditu gan nicla xhi dxej nicla xhi or siääd Xi'n Dios ni gujc Niguii.

### *Xcuent lam ni badeed meel*

<sup>14</sup> 'Xcälrnibee Dios xhaguibaa najc si'c te bejn ni agojl guirii chääni zijt te biaj. Gurejdxni rexmosni, badeedni meel lojreni.

<sup>15</sup> 'Lo tejni badeedni si'cti gaii miḷ meel, lo steeni badeedni si'cti tio'p miḷ, dxejc steeni cua' te miḷ. Loj tejnani badeedni si'cti ni rujnni xhigab sajc gunnäjreni dzuun, dxejcti biriini xpiajni. <sup>16</sup> Ni cua' gaii miḷ meel bejn te dzunro, bejnni gaan sgaii miḷ meel. <sup>17</sup> Sigajcza ni cua' tio'p miḷ meel, bejnni gaan stio'p miḷ. <sup>18</sup> Dxejcti ni cua' te miḷ meel, huicua'tzni xmeel xlamni neḅ te gueed ni gudäänni lo yuj.

<sup>19</sup> 'Gudejdti balti bäii, dxejc gubi' xlam remosga, bejnni cuent loj guiraareni. <sup>20</sup> Che bidzujḅ ni cua' gaii miḷ meel, bidzunnäjni sgaii miḷ meel ni bejnni gaan, räjpni loj xlamni: "Dad, baniidx guejblu gaii miḷ loä. Aree sgaii miḷ meel ni benä gaan." <sup>21</sup> Räjp xlamni lojni dxejc: "Hueenca, mos hueen najclu, rusoobzalu xtidxä. Sa'csi gujclu beḅsa'c con te cos báz, naj sunidxä guinibeelu xhiroobru. Biu' loä, bibalaznäjä narä." <sup>22</sup> Che bidzujḅni ni cua' tio'p miḷ meelga, räjpni loj xlamni: "Baniidx guejblu tio'p miḷ meel loä, aree stio'p miḷ meel ni benä gaan." <sup>23</sup> Räjp xlamni lojni: "Mbaj. Mos hueen najclu rusoobzalu diidx. Sa'csi gujclu beḅsa'c con te cosbáz, naj sunidxä guinibeelu xhiroobru. Biu' loä, bibalaznäjä narä." <sup>24</sup> Che bidzujḅ mos ni cua' te miḷ meel, räjpni lo xlamni: "Dad, ananä najclu te bejn ni di gulazlajz; rca'lu cose'ch cadre dilu nibe'c binij, rutojpszalu cadre dilu nutie'ch binij. <sup>25</sup> Ni'cni bidxebä, huicua'tzä xmeellu neḅ yuj. Niluxh axh aree xmeellu." <sup>26</sup> Dxejc räjp xlamni lojni: "iMos guijdx, mos ploj! Najnlu rca'ä cose'ch cadre dina nibe'cä binij, rutopä cadre dina nutie'chä binij. <sup>27</sup> Riäjl nisa'nlu xmelä neḅ te bancw te che nibi'ä nicasacä xmelä con xi'nni ni niujni gaan." <sup>28</sup> Dxejc räjpni loj reni suga' ro'c: "Colgudzucaj te miḷ meel ni ca'ni colgudeedni loj ni rajp tzuu miḷ meel. <sup>29</sup> Sa'csi loj ni rajp sudedäru, niluxh ni xhet rajpdi sudzucää tudxe'n nani rajpni." <sup>30</sup> Dxejc räjpni: "Colca' mosre ni xhet sajcdi, colguzälḅni lo yälḅnacäy, cadre chu yälḅronduxh, näjza yälḅrajw reläy bejn."

### *Yälḅuxhtis xten reguejdx*

<sup>31</sup> 'Che jiädsac Xi'n Dios ni gujc Niguui con yälḅrdimbicha' xtenni, siädñäni rexangl Dios. Dxejc sibejni lo tron ni rdimbicha' xtenni te guinibeeni. <sup>32</sup> Dxejc sidojp nez lojni guiraa rebeḅ guedxliuj. Dxejc sibeni lojreni, silia'ni sa'reni si'c rujn te baxtoor cheni rbeni rexiil loj redxib, te rlia'reni loj sa'reni. <sup>33</sup> Suzujni rexiil xladbeeni dxejc redxib xladbäjgwni. <sup>34</sup> Dxejc säjb rei loj reni suga' xladbeeni: "Colḅtaa, la'tu ni beḅle' Xtaä. Coljiu' lo yälḅrnibee ni guc-chee cheni guzoblojli guedxliuj. <sup>35</sup> Sa'csi che calanä la'tu baniidx xhi gudauä, che cayolä, la'tu baniidx xhi gu'ä. Che cuanzaä si'c te beḅzijt, la'tu banidxlaatu cadre bia'nä. <sup>36</sup> Che xheti xhabä, la'tu baniidxni, che gucxhuä, la'tu biädhuiitu narä, che guyu'ä neḅ latzguiib, biädhuiitu narä." <sup>37</sup> Dxejc sinii reni suga' xladbeeni, säjbreni: "Dad, ¿guc bahuiinu gulaanlu, baniidxnu xhi gudajwlu? ¿Guc bahuiinu cayojllu, baniidxnu xhi gu'lu? <sup>38</sup> ¿Guc bahuiinu najclu si'c te beḅzijt, baniidxnu cadre bianlaalu, o biäädx xhajblu, baniidxnu xhi gojtlu? <sup>39</sup> O ¿guc bahuiinu cayacxhuulu, o yu'lu neḅ latzguiib, biophuiinu lojlu?" <sup>40</sup> Dxejc reiiga säjb lojreni: "Rniliäpac lojtu, xhitis xhi bejntu loj te rexpeḅnä ni rniitidxä mase proobreni, lagajc loä bejntu recosga."

<sup>41</sup> 'Dxejc säjpszani loj reni suga' ladbäjgwni: "Colḅguibicaj loä, beḅguijdx, colchäj lo balduxh ni cayejc par tejpas ni cayejc par beḅdxab ni rnibee näjza rexpeḅdxabni. <sup>42</sup> Sa'csi gulanä, luxh ditu nuniidx xhi niauä; biolä, per ditu nuniidx xhi niä'ä; <sup>43</sup> cuanzaä si'c te beḅzijt, luxh ditu nunidxlaa cadre nia'nä, biädxza xhabä, niluxh ditu nuniidx xhi niacwä; gucxhuä, guyu'äza neḅ latzguiib, niluxh ditu niädhuii loä." <sup>44</sup> Dxejc laareni säjbreni: "Dad, ¿guc bihuiinu calaanlu, o cayojllu, o canzajlu si'c te beḅzijt, o cayäädx xhajblu, o cayacxhuulu, o yu'lu neḅ latzguiib, luxh dinu niacnäjlu?" <sup>45</sup> Dxejc säjb reiiga lojreni: "Rniliäpac lojtu, loj xhitis ni ditu niacnäjä rebejḅ ni rililajz xtidxä, mase proobreni naräni ditu niacnäjä." <sup>46</sup> Dxejcti sij rebejḅre lo yälḅrusacsí par tejpas, per rebejḅ ni nadolajz, ni agule Dios, sijreni lo xcälḅnabajḅ Dios par tejpas.

## 26

### *Bejnreni xhigab xho guiniaazreni Jesús*

(Mr. 14:1-2; Lc. 22:1-2; Jn. 11:45-53)

<sup>1</sup> Che gulujx gunii Jesús rediidxre, räjpni loj rexpejn̄pacni:

<sup>2</sup> —Anajntu stio'p dxejtis cayääd̄x gac lanij ni laa pascw. Luxh suteedreni narä, Xi'n Niguii ladz̄naa reni gucuaa narä lo cruzj.

<sup>3</sup> Dxejc bidojp rebejn̄ ni rnibee rebixhojz, näjza remastr xten leii, näjza rebeṅgool lo rexpejn̄ Israel. Lo xle' Caifás, ni rnibee loj rebixhojz, bidojpreni. <sup>4</sup> Ro'c bachaagreni diid̄x xho guiniaazreni Jesús con yäl̄rusguee, te ju'trenini. <sup>5</sup> Luxh räjpreni lo sa'reni:

—Na'c jiennuni nen̄ redxe lanij, te di gun rebejn̄ bieiduxh.

### *Te gunaa ni biäd̄nä perfum*

(Mr. 14:3-9; Jn. 12:1-8)

<sup>6</sup> Che yu' Jesús gued̄x Betania, rolijz Simón te bejn̄ ni basiaj̄cni che raḷ tiejxhni, <sup>7</sup> ro'c gubig te gunaa lojni, ca'ni te vasguij ni laa onix, guidxani te perfum ni sajc melro. Che sobga' Jesús lo mex, bachajni perfum yejc Jesús. <sup>8</sup> Che bahuii rexpejn̄pacni xhi cayuj̄nni, bidxe'chreni, gusloj cayäj̄preni:

—¿Xhicuent casäl̄xlia'ni perfumga? <sup>9</sup> Perfumre niajc nido'ni, nirii xhidaj̄l meel lojni te niacnäj̄ni rebeṅproob.

<sup>10</sup> Biejn̄ diaj̄g Jesús xhi caniireni, dxejc räjpni lojreni:

—¿Xhicuent cadxe'chnäj̄tu gunaaare? Ni te coshueen najc dee nani bejn̄ni loä. <sup>11</sup> Ni guirasi dxej su' rebejn̄ ni xhet rajpdi lojtu, peta narä guxii dxej su'ä lojtu. <sup>12</sup> Nani bejn̄ gunaaare che bachajni perfumre guideb lagaa tiexhä, najcni par guzucheeni narä te guiga'tzä. <sup>13</sup> Rniliäpac lojtu, cadrotis gusule'reni xtidxä lo guideb gued̄xliuj, sujyreni diid̄x xcuent ni bennäj̄ gunaaare narä, te guinaj lajzreni gunaaare.

### *Judas bato' Jesús*

(Mr. 14:10-11; Lc. 22:3-6)

<sup>14</sup> Dxejc lo retzubitio'p rexpen̄pac Jesús birii tej ni laa Judas Iscariote, huininäj̄ni rebejn̄ ni rnibee loj rebixhojz, <sup>15</sup> räjpni:

—¿Lac guniid̄xtu loä te gutedä Jesús ladz̄naatu?

Dxejc badeedreni galbitzuu melpla't lojni. <sup>16</sup> Dxjecli caguiil Judas xho gutedni Jesús lojreni.

### *Lult xchej xten Jesús*

(Mr. 14:12-25; Lc. 22:7-23; Jn. 13:21-30; 1Co. 11:23-26)

<sup>17</sup> Primer dxej lanij, dxej ni rajwreni yät̄xtiil ni di saguij, gubig rexpejn̄pacni loj Jesús, räjpreni lojni:

—¿Caro rlajzlu chozucheeni te gaulu xchej xten lanipascw?

<sup>18</sup> Dxejc räjpni lojreni:

—Colchäj̄ lo guejdx rolijz te dade', colye'tz lojni: “Si'c naj Dad mastr: Asiäddz̄ungajxh xor̄ni, ni'cni rolijzlu gaunäj̄ni rexpejn̄ni xchej lanipascw.”

<sup>19</sup> Bejnti rexpejn̄pacni si'cni gunibee Jesús gac, bazucheereni xchej xten pascw.

<sup>20</sup> Che biu' guxhij̄n, sobga' Jesús lo mex con retzubitio'p xpejn̄pacni. <sup>21</sup> Laḷ ni cayaj̄wreni räjpni lojreni:

—Rniliä lojtu, yu' tejt̄u ni guto' narä.

<sup>22</sup> Dxejc guc-huinduxh lajzreni, räjpreni lojni:

—Dad, ¿andi naräni?

<sup>23</sup> Dxejcti räjp Jesús lojreni:

—Ni gaunäj̄ narä nen̄ tejt̄is pla't, laa ni'cni guto' narä. <sup>24</sup> Xi'n Dios ni gujc Niguii sajc si'ctis ni caj loj guijs̄t̄x xten Dios, per gunatiro bejn̄ ni guto'ni. Huenru na'c niaj̄l bejn̄ga.

<sup>25</sup> Dxejcti gunii Judas, ni caguto' Jesús, räjpni:

—Mastr, ¿andi naräni?

Jesús räjp lojni:

—O'n, lujni.

<sup>26</sup> La<sub>l</sub> ni sobga'reni cayajwreni, guläs Jesús yätxtiil, badeedni xquixtios lo Dios, dxejcti gula'nini, badeednini loj rexpejn<sub>pacni</sub>, räjpni:

—Col<sub>tajw</sub>; dee najc si'c tiexhä.

<sup>27</sup> Dxejc guläsni te vas, badeedni xquixtios lo Dios, dxejcti badeednini loj rexpejn<sub>pacni</sub>, räjpni:

—Guiraatu col<sub>yä</sub>'<sup>28</sup> sa'csi dee najc si'c xtienä; ni'cni riannää la'tu te didxcoob, luxh rejnre sixe'ni xcuent xhidajl bejn te gus<sub>laanireni</sub> nen <sub>dojl</sub>.<sup>29</sup> Luxh rniä lojtu, diruna yä'ä nis nani rii yejc uub, dxejlini yänäsacätu lo xcäl<sub>rnibee</sub> Dios, Xtadä.

### *Räjp Jesús sibälaz Pedroni*

*(Mr. 14:26-31; Lc. 22:31-34; Jn. 13:36-38)*

<sup>30</sup> Che gulujx bil<sub>reni</sub> te dij, biriireni, sääreni lo dajn ni laa Oliib. <sup>31</sup> Dxejc räjp Jesús lojreni:

—Guiragajctu sactio'p lajztu xcuentä, susa'ntu narä naguxhijn sa'csi lo reguijtz xten Dios caj scree: “Sugu'treni baxtoor dxejc sire'ch rexiil.”<sup>32</sup> Dxejc cheni guiba<sub>nsacä</sub> lo rebengut, ganidä cha'ä regiön Galilee, dxejcti jiäd<sub>najltu</sub> narä.

<sup>33</sup> Dxejc räjp Pedr loj Jesús:

—Masque guiraareni cuälazlu, narä dina cuälazälu.

<sup>34</sup> Dxejc räjp Jesús lojni:

—Rniliä<sub>pac</sub> lojlu, lagajc guxhijn<sub>re</sub>, nicla gajd guidgäi cuedxa', luxh luj alagulälazlu narä cho<sub>n</sub> huält.

<sup>35</sup> Räjp Pedr loj Jesús:

—Masque riäj<sub>l</sub> guetnääl<sub>u</sub>, dina cuälazälu.

Dxejc sigajcza gunii guiraa rexpejn<sub>pacni</sub>.

### *Gurejdx-gunab Jesús loj Dios nen Getsemaní*

*(Mr. 14:32-42; Lc. 22:39-46)*

<sup>36</sup> Dxejcti bidzuj<sub>n</sub> Jesús näjza rexpejn<sub>pacni</sub> te lajt ni laa Getsemaní, räjpni lojreni:

—Col<sub>cuésijc</sub> ree la<sub>l</sub> ni cuedx-guiniabä lo Dios.

<sup>37</sup> Dxejc sanäni Pedr näjza guiro'p xi'n Zebedeo, luxh gusloj cayachuinduxh lajzni, cayu'zani yärsiaduxh. <sup>38</sup> Dxejc räjpni lojreni:

—Te yäl<sub>huinduxh</sub> yu' lastoä; astoocanu agojl guetä. Col<sub>jia</sub>'n ree, col<sub>tie</sub>'ch bacal <sub>lojtu</sub>.

<sup>39</sup> Dxejc guzaj Jesús stla', guzuxhijbni dxejc basajb lojni lo yujli, gusloj cabedx-canabni lo Dios:

—Xtadä, palga saj<sub>cni</sub>, basanlaa tedcaj trabajwduxhre ni tedä, te na'c tedäni. Xhet si'c<sub>di</sub> ni rlazä gacni; si'c<sub>pacni</sub> rlaz<sub>zlu</sub> gac, si'c gacni.

<sup>40</sup> Dxejcti gubi'ni cadro suga' guichon <sub>rexpejn<sub>pacni</sub></sub>, che bidzuj<sub>n</sub>ni ro'c, nagayejsreni. Räjpni lo Pedr:

—¿La di niaj<sub>c</sub>di nutie'chtu bacal <sub>lojtu</sub> nicla tebor, ä?<sup>41</sup> Col<sub>guibaj<sub>n</sub></sub>, col<sub>nab</sub> lo Dios te na'c jiaj<sub>btu</sub> nen <sub>dojl</sub>. Guliipacni, lastootu nadip, niluxh tiej<sub>xhtu</sub> rdxajg.

<sup>42</sup> Gubi' Jesús stehuält, gurejdx-gunabni loj Dios, räjpni:

—Xtadä, palga digacdi tedcaj tedä trabajwre, sugacni si'ctis ni rlaz<sub>zlu</sub> gacni.

<sup>43</sup> Dxejc gubisacni, bidxäl<sub>ni</sub> rexpejn<sub>pacni</sub>, nagayejsreni sa'csi yuduxh bacal <sub>lojreni</sub>.

<sup>44</sup> Basaannireni, dxejc sä<sub>sacni</sub>, gurejdx-gunabni lo Dios ni rioj<sub>n</sub> huält, gunisacni lagajc rediidx ni guniini galoo. <sup>45</sup> Dxejc huij<sub>ni</sub> cadro suga' rexpejn<sub>pacni</sub>, räjpni lojreni:

—¡Naj sii, col<sub>guejs</sub>, col<sub>gusilajz</sub>! Abidzuj<sub>n</sub> or <sub>ni</sub> gutedreni Xi'n Dios ni gujc Niguui ladz<sub>naa</sub> rebendoj<sub>l</sub>.<sup>46</sup> ¡Col<sub>chastie</sub>, col<sub>cho</sub>!', col<sub>huui</sub>! Asiääd nani guted narä ladz<sub>naa</sub> rebendoj<sub>l</sub>.

*Gunaazreni Jesús sanärenini pres  
(Mr. 14:43-50; Lc. 22:47-53; Jn. 18:2-11)*

<sup>47</sup> Lalni canii Jesús bidzujn Judas, nani najc tej retzubitio'p xpejn pacni. Bidzunnäjni xhidalduxh bejn ni ca' espad, ni ca' garo't, najcreni xpejn reni rnibee rebixhojz, näjza xpejn rebengool xten rexpejn Israel. <sup>48</sup> Judas, ni bato' Jesús, abadedxgaani te seen lojreni räjpni:

—Nani guchagro'ä, ni'c najc laani; colguiniaazgajcni.

<sup>49</sup> Dxejc gubigni loj Jesús, räjpni:

—Xchan, Dad Mastr.

Dxejc bachagro'ni lojni. <sup>50</sup> Jesús räjp lojni:

—Xamigwä, ¿xhi siäädlu?

Dxejcti gubig rebejn lojni, gunaazrenini.

<sup>51</sup> Per tej reni suganäj Jesús gulääni te spaad, batiu'ni diajg te mos xten rebixhojz ni rnibee. <sup>52</sup> Dxejc räjp Jesús lojni:

—Guluchee xspaadlu loj xse'ni. Guiraa reni rucuanäj con spaad, lagajc con spaad guetreni. <sup>53</sup> ¿La ditu gan sajca guiniabä lo Xtaä, luxh laani suxhalgajcni gayonbitzubitio'p mił xanglni gacnäjä narä? <sup>54</sup> Dxejc xho gac soob diidx ni caj lo reguijtz xten Dios ni rnixgaa riäjł gac guiraa recosre lagajc si'cni cayajcni.

<sup>55</sup> Dxejc räjp Jesús loj rebejn xhidajlga:

—¿La siädñätu spaad näjza garo't te guiniaaztu narä astoocanu nacä si'c te gubaan? Ni guirasi dxej gureä galäiitu, baluiätu nen guidoro, luxh ditu niniaaz narä. <sup>56</sup> Niluxh guiraa recosre cayajc te soob rediidx ni caj lo reguijtz ni bacuaa redade' ni gunii xtidx Dios.

Dxejcti guiraa rexpejn pacni basanxtebreni Jesús, baxunreni lojni.

*Jesús nez loj rebixhojz*

*(Mr. 14:53-65; Lc. 22:54-55, 63-71; Jn. 18:12-14, 19-24)*

<sup>57</sup> Reni gunaaz Jesús huinänini nez loj Caifás, ni rnibee loj guiraa rebixhojz, bidzujnreni cadro abidojp guiraa rebejn nani ruluii leii näjza rebengool xten xpejn Israel. <sup>58</sup> Dxejcti zit-zijt biädñajl Pedr rebejn ga, bidzujnlireni lole' xten bixhojz ni rnibeega. Ro'c biu'ni, gurenäjni rexquixhajg bixhojzga te ro'c bia'nni te fini xhini'c gac.

<sup>59</sup> Reni rnibee rebixhojz, näjza rebengool con guiraa reni räjp yälrnibee gusloj caguüilreni xhitis te diidx, masque xhet guliidini, te gucuaquijreni Jesús te guinibeereni guetni.

<sup>60</sup> Niluxh xhet bidxäldireni, luxh gubig xhidajl bejn, guniireni xhidajl didx-xhii xcuent Jesús. Dxejcti bidzujn tio'p dade' ni gunii didx-xhii, <sup>61</sup> räjpreni:

—Niguiire gunii scree: “Narä sajca gutzulä guidoro xten Dios, sajca gunchesacäni nen choñ dxej.”

<sup>62</sup> Dxejc gusulii dade' ni rnibee lo rebixhojz, räjpni loj Jesús:

—¿Xhicuent xhet rniidilu, ä? ¿Xhini'c canii reniguiire cagucuaquijreni luj?

<sup>63</sup> Niluxh dxitis suga' Jesús. Dxejcti räjp dade' ni rnibee loj rebixhojz lojni:

—Rnibeä guiniliilu, guiniliipaclu con laj Gueb Dios nani nabajn. Gunii don, ¿la luj najc Crist, Xi'n Dios?

<sup>64</sup> Jesús räjp lojni:

—Lagajc guejblu naj si'c. Niluxh empac rniä lojtu, desde najli suhuiitu cueä narä Xi'n Dios ni gujc Niguii xladbee Dios ni rnibee, suhuiizatu jiälä lo reza ni tre' xhaguibaa.

<sup>65</sup> Dxejc batiäjs dade' ni rnibee loj rebixhojz xhajbni, räjpni:

—¿Niguiire aguniyajni Dios con xtiidxni! ¿Xhiru testiigw rquiinnu? Abiejn diajgtu didxyaj xtenni. <sup>66</sup> ¿Xhi rchalotu?

Dxejc basejcreni diidx:

—¿Abiga'ni! Riäjł guetni.

<sup>67</sup> Dxejc batiobxhejnreni lojni, gudijnrenini. Yu'reni gudajp lojni, <sup>68</sup> räjpreni lojni:

—Palga najclu Crist, gunii chuni'c gudijnlu.



*Di Pedr nicäjp numbeeni Jesús**(Mr. 14:66-72; Lc. 22:56-62; Jn. 18:15-18, 25-27)*

<sup>69</sup> Laḷ ni cayajc reni'c, Pedr sobga' lole'. Dxejc gubig te dxape' ni rujn dzuun ro'c, räjpni lojni:

—Näjza luj cuansanäjlu Jesús, ni siääd nez Galilee.

<sup>70</sup> Per di Pedr nicäjp nez loj guiraareni, räjpni:

—Dina ganä xhini'c caniilu loä.

<sup>71</sup> Asii Pedr nez ro' puert, che bidxaagni stee dxape' ni rujn dzuun ro'c. Dxape're räjp loj reni suga' ro'c:

—Näjza dade're cuansanäj Jesús ni siääd Nazare't.

<sup>72</sup> Dxejc basguee Pedr stehuält, räjpni:

—Rniliäpac dina gumbeä dade'ga.

<sup>73</sup> Che gojl sterate', gubig reni suga' ro'c loj Pedr, räjpreni:

—Guliini; näjza luj najclu te xpejn; huenliisi riejn diidx ni rniilu.

<sup>74</sup> Dxejcti guslojni cagueni, caguzä'tni Dios, räjpni:

—Dipacna gumbeä niguiiga.

Guniitisni si'c, chela guredxa' te guidgäi. <sup>75</sup> Dxejcru banalajz Pedr rediidx ni gunii Jesús lojni che räjpni: “Che gajdli guidgäi cuedxa', choḅ huält alaguniilu dilu gumbee narä.” Dxejc birii Pedr ro'c, gusloj cayonduxhni.

**27***Batedreni Jesús loj Pila't**(Mr. 15:1; Lc. 23:1-2; Jn. 18:28-32)*

<sup>1</sup> Che bianij lo guedxliuj, guiraa reni najc rebixhojz ni rnibee näjza rebenḡool xten rexpejn Israel bia'nreni diidx xho gunreni ju'treni Jesús. <sup>2</sup> Baliibrenini, guläärenini ro'c, huisa'nrenini loj Poncio Pila't, ni najc gubernadoor.

*Xho gujt Judas*

<sup>3</sup> Dxejcti Judas, ni bato' Jesús, che bahuiini bacuaquijreni Jesús, basiejch lajzni, guchuin lajzni, dxejc huidzu'ni galbitzuu meel pla't loj rebixhojz ni rnibee näjza loj rebenḡool.

<sup>4</sup> Räjpni:

—Banitduxhä lo Dios sa'csi bato'ä te bejn ni xhet bejndi.

Dxejc räjpreni lojni:

—Xhixh gunnu. Ni'c najc xcuentlu; lujti najn.

<sup>5</sup> Dxejc bacuaa Judas meelga lo yuj neḅ guidoro, biriitini ro'c. Sas huijni, baliibni te duu guejn, gojlni lo te yajg, ro'cti gujtni.

<sup>6</sup> Rebixhojz ni rnibee batojpreni meelga, räjpreni:

—Di gac di guizäḷnu meelre neḅ caj gojn sa'csi najcni xcuent xtiejn te bejn.

<sup>7</sup> Dxejc bia'nreni diidx con meelga siireni te la' yuj xten te dade' ni runchee guejs te ro'c gucua'tzreni rebenḡijz. <sup>8</sup> Ni'cni najli rniireni yujga: “Yurejn”. <sup>9</sup> Si'c gusojb diidx ni gunii Jeremías, dade' ni gunii xtidx Dios galoo che räjpni: “Cua'reni galbitzuu melpla'tga si'cti basoob rexi'n Israel sajc bejnḡa. <sup>10</sup> Con meelga guziireni yuj lo bejn ni runchee guejs, sigacni gunibee xtadnu Dios.”

*Gusuj Jesús nez loj Pila't**(Mr. 15:2-5; Lc. 23:3-5; Jn. 18:33-38)*

<sup>11</sup> Bidzunnäjreni Jesús loj Pila't ni najc gubernadoor. Dxejc gunabdiidxni, räjpni lo Jesús:

—¿La luj najc reii xten rexpejn Israel, ä?

Räjp Jesús lojni:

—Najcni si'cni najlu.

12 La<sub>1</sub>ni cabe'c rebixhojz ni rnibee näjza rebengool rexquej Jesús xhetliidi guniidi Jesús.  
 13 Dxejc räjp Pila't lojni:  
 —¿La di diajglu jiejn guiraa rediidx ni caniireni cagucuaquijreni luj, ä?  
 14 Per xhetliidi diidxd basejc Jesús, nicla xcuent tejsi diidx ni bacuaquijrenini. Ni'cni bidxeloduxh gubernadoorga.

*Gunibeereni guet Jesús*

*(Mr. 15:6-20; Lc. 23:13-25; Jn. 18:38-19:16)*

15 Neñ redxe lanij rajpreni costumbr ruslaa Pila't tej bejn ni cue rebejn loj reni yu' nen latzguiib. 16 Neñ redxejga guyu' te bejn ni sääb xtiidxn ni laa Barrabás. 17 Cheni tre' guiraareni ro'c, gunabdiidx Pila't lojreni:

—¿Chuni'c rlanjtu guslaä, la suslaä Barrabás o Jesús ni laa Crist?

18 Sa'csi najn Pila't rdxe'chlanjreni lo Jesús, ni'c bateedrenini lojni.

19 La<sub>1</sub> ni sobga' Pila't lo yajgxhiil cadre rujnni yälguxhtis, baxha<sub>1</sub> cháäl<sub>1</sub>ni diidx lojni, räjpni:

—Xhet gundilu dade'ga ni xhet bejndi, sa'csi nuchej nadxuudx gunixcalä xcuentni.

20 Niluxh rebixhojz ni rnibee näjza rebengool baquuilreni rebejn te gunabreni laa Barrabás, näjza te guet Jesús. 21 Dxejcti gunii gubernadoor stehuält, räjpni lojreni:

—¿Chu tej loj guiro'preni rlanjtu guslaä?

Dxejc guredxa'reni, räjpreni:

—¡Barrabás!

22 Gunabdiidx Pila't, räjpni:

—¿Xhi gunnä Jesús ni laaza Crist?

Guiraareni guredxa':

—Bacuaani lo crujz.

23 Dxejc räjp Pila't lojreni:

—¿Xhi latsiaj bejnni?

Niluxh laareni guredxa'rureni, räjpreni:

—¡Bacuaani lo crujz!

24 Che bahuii Pila't xlia'si caniini, alga gusloj rebejn cayujn te bieiduxh, cua'ni nis, gudiibni naani nez lojreni, räjpni:

—Dina xcaquiä xtiejn bejnre ni xhet bejndi. La'tu colh<sub>1</sub>uii xho guntu. Xcuenttitu najcni.

25 Dxejc guiraa rebejn<sub>1</sub>ga badzu' diidxre, räjpreni:

—Suxcaquijnu xtiejn<sub>1</sub>ni, nuurnu näjza rexi'nnu.

26 Dxejc baslaa Pila't Barrabás, dxejc gunibeeni gudijnreni Jesús dxejc bateednini ladz<sub>1</sub>naa rebejn te gucuaarenini lo crujz.

27 Dxejc hui<sub>1</sub>nä resoldaad xten gubernadoor Jesús lo pretoor, yu' cadre rujnreni yälguxhtis, ro'c batojpreni guiraa resa'reni. 28 Dxejc gulääreni xhajbni, bashuajcwrenini te lad xniaa. 29 Dxejc bencheereni te coron guejch, basälrenini yej<sub>1</sub>cni, basälreni te yabixijl naani, xladbeeni, sas bazuxhijbreni nez lojni guslogajc caguxhisnäjrenini, räjpreni:

—¡Collä'p xpala'n reii xten rexpejn Israel!

30 Sas batiobxhejnreni lojni, cua'reni yabixijlga te ni'c batiäjlreni yej<sub>1</sub>cni. 31 Che gulujx baxhiznäjrenini, gulääreni lad xniaa ni najcwni. Dxejc bashuacwsacrenini lagajc xhajbni, sanätirenini te xcajni lo crujz.

*Bacuaareni Jesús lo crujz*

*(Mr. 15:21-32; Lc. 23:26-43; Jn. 19:17-27)*

32 Cheni sariireni, bidxaagreni te bejn ni siääd guedx Cirene, laani Simón, basguureni dade'ga xcrujz Jesús.

33 Che bidzujnreni te lajt ni laa Gólgota, nani säloj: dan Calabeer, 34 ro'c badeedreni bin nu'ch cuanlaa te gu' Jesús. Te bocbäztisni gu'ni, dxejc naaddiruni niä'nini.

<sup>35</sup> Cheni abacuaareni Jesús lo cruzj, gudzujt resoldaad yejc xhajn, te si'c gudisreni xhajn Jesús cua'reni, te si'c guzoj b diidx xten te dade' ni gunii xtidx Dios. <sup>36</sup> Gurejtireni ro'c, gusloj canäjreni Jesús. <sup>37</sup> Yejc cruzjga bacuaareni te guijt con letro. Lo guijtza rcaj xhini'c najc xtoj nani cayejt. Lo guijtza caj: “Dee najc Jesús reii xten rexpejn Israel.”

<sup>38</sup> Nájza tio'p gubaan cuaj lo stio'p cruzj con laani. Tejni cuaj lo te cruzj xladbee Jesús, steeni cuaj xladbäjgwni. <sup>39</sup> Luxh renani sadejd nejzga guniyajreni Jesús, cagusniibreni yejcreni, <sup>40</sup> cayäjpreni lojni:

—Ja'á! Luj ni nutiexhlu guidoo, luxh chontis dxej niunchesacluni; palga guli najclu Xi'n Dios, biajt loj cruzjga.

<sup>41</sup> Nájza rebixhojz ni rnibee, naj remastr xten leii, baxhiznäjrenini räjpreni loj sa'reni:

<sup>42</sup> —Baslaani xhidajl bejn, xhoxh di gacdi guslaani lagajc laani. Palga najcni reii xten rexpejn Israel, sujiäjtni lo cruzj nanaj te chalilajznu xtiidxni. <sup>43</sup> Huinälajzni Dios, naj suguslaa Diosni palga sanälajz Diosni; ni najni: “Narä nacä Xi'n Dios.”

<sup>44</sup> Regubaan ni caj lo recruzj sigajcza guniyajreni Jesús.

### *Che gujt Jesús*

*(Mr. 15:33-41; Lc. 23:44-49; Jn. 19:28-30)*

<sup>45</sup> Dxejcti bicäy guideb guedxliuj läidxej hasta rcachon gudxej. <sup>46</sup> Si'cti rcachon gudxej guredxa' Jesús dipduxh, räjpmi:

—Elí, Elí, ¿lama sabacatani? —dee säloj: Xtiozä, Xtiozä, ¿xhicuent gulälazlu narä?

<sup>47</sup> Yu' reni suga' ro'c, che biejn diajgreni räjpmi si'c, räjpmi:

—Cabejdx Dade're Elías.

<sup>48</sup> Baxungajc tejreni, huica'ni te sponj, bahuajdxnini loj binagr, bacuaanini yejc te biquii te badzugni binargra ro' Jesús. <sup>49</sup> Dxejc reni tre' ro'c räjpmi:

—Basaan; guidon la siäd Elías te guslaanini.

<sup>50</sup> Dxejc guredxaduxh Jesús stehuält, baslaatin xpritni. <sup>51</sup> Lagajc orga biräsya' ladro ni zäab neñ guidoro, gujcmi tio'p la' jiaali hasta lo yuj. Gujc te xuro, sas gusuj bej reguiro.

<sup>52</sup> Dxejc gubicaaj reguij ni niäuu ro' rebaa, luxh gubansac xhidajl xpejn Dios ni gujt aguc xchej. <sup>53</sup> Dxejcti, che huäjs Jesús lo rebengut, biriireni neñ baa, baluilojreni lo xhidajl bejn ni rbäjz guedx Jerusalén.

<sup>54</sup> Dxejc capitán xten resoldaad nájza resoldaad ni canäj Jesús, che bahuiireni xuduxh nájza guiraa recos ni gujc ro'c, bidxejbreni, räjpmi:

—Guliipacni najc dade're Xi'n Dios.

<sup>55</sup> Zijtru tre' xhidajl regunaa ni biädnañ Jesús che biriini nez Galilee te bahuiirenini. Cadxelojtisreni guiraa ni cayajc ro'c. <sup>56</sup> Tej regunaaga najc Marii Magdalen, steeni najc Marii xnan Jacob nájza José, steeni najc xnan rexi'n Zebedeo.

### *Huicua'tzreni Jesús*

*(Mr. 15:42-47; Lc. 23:50-56; Jn. 19:38-42)*

<sup>57</sup> Che gojl gudxej, bidzujñ te benrajpmi ni siäd guedx Arimatea; laani José. Nájza dade'ga najc tej reni birinañ Jesús. <sup>58</sup> Huij dade'ga loj Pila't, gunabni tiejxh Jesús. Dxejc gunibee Pila't gudeedrenini lojni. <sup>59</sup> Cua'ti José tiejxh Jesús, batejbnini neñ te bariadya, <sup>60</sup> huitixhnini neñ xpaapacni. Nacoob baaga, gojñni bidääñni cuä' te guilaj. Dxejc basäuni ro' baaga con guiro, dxejcti siini. <sup>61</sup> Sobga'za Marii Magdalen nájza stee Marii nez loj baa, bahuiireni biga'tzni.

### *Xhi räjpmi resoldaad ni cuanäj xpaä Jesús*

<sup>62</sup> Che gudejd dxej xten ni gulec-cheereni lanij, bara yäl bidojpmi rebixhojz ni rnibee nájza rebejn ni laa refarisee, bidzujñreni loj Pila't, <sup>63</sup> räjpmi lojni:

—Dad, banaj laaznu xhi räjpmi bejn ni rusgueere. Räjpmi: “Che ted chon dxej sibansacni loj rebengut.” <sup>64</sup> Ni'c baxhal chu chacanäj ro' baaga dxejli guisa' chon dxej, te di chää

rexpejn<sub>pacni</sub> chaläärenini tiejxhni, dxejc gäbreni loj rebejn: “Agubansacni loj rebengut.” Yälrusgueega sajc cuentroru loj ni gujc ganid.

<sup>65</sup> Räj<sub>p</sub> Pila't lojreni:

—La'tu rajptu te cuaa soldaad; colchäj, basäutzu'tz ro' baaga si'ctis ni sajc guntu.

<sup>66</sup> Dxejcti sääreni, basäutzu'tzreni ro' baaga; con resoldaad bacuaareni te sei lojni te rut fal<sub>dini</sub>. Dxejc basa'nreni resoldaad canäj ro'c.

## 28

### *Sibansac Jesús loj rebengut*

(Mr. 16:1-8; Lc. 24:1-12; Jn. 20:1-10)

<sup>1</sup> Che gudejd sabd, dxej ni ruzilajz rexpejn Israel, che gusloj cayänij lo guedxliuj te jiu' stee xmaan, bidzujn Marii Magdalen näjza stee Mariiga, siädhuiireni lo baa. <sup>2</sup> Luxh alagujc te xuro ni basniib lo yuj, sa'csi biääd te angl xten Dios xhaguibaali te badzucajni guij ni niäuu ro' baaga, dxejc gurejni yejc guijga. <sup>3</sup> Rdimbichaduxhni si'c najc che rdinya', luxh xhajbni najc nolbäj si'c najc yejc ni riajb. <sup>4</sup> Che bahuii resoldaadni, bichebduxhreni, sädiidxreni, gujcreni si'c bengut. <sup>5</sup> Dxejc räj<sub>p</sub> guixhajg xte Diosga loj regunaa:

—Na'c guidxejbtu. Ananä caguiiltu Jesús ni cuaj lo cruzj. <sup>6</sup> Rutini ree sa'csi agubansacni sigajc ni najni. Coltahuii cadro gojtni. <sup>7</sup> Colguxun, colchaye'tz loj rexpejn<sub>pacni</sub> agubansacni loj rebengut. Luxh naj agunijdni lojtu sääni región xten Galilee. Ro'c suhuiitu lojni. Dee najc diidx ni rniä lojtu.

<sup>8</sup> Dxejcti rusquenduxh regunaaga, biriireni ro' baaga. Cadxejbreni, cabalazduxhzareneni sanäreni diidx loj rexpejn<sub>pac</sub> Jesús. <sup>9</sup> Chela bidxaagreni Jesús lo nejz, räj<sub>pni</sub>: “Xchan”, lojreni. Sas gubigreni loj Jesús, bazuxhijbreni, gudääzreni guenni'ni, goj<sub>nreni</sub>ni.

<sup>10</sup> Dxejc räj<sub>pni</sub> lojreni:

—Na'c guidxejbtu. Colchanä diidx loj rexpenä, chääreni región Galilee, sa'csi ro'c suhuiireni löä.

### *Rediidx ni räj<sub>p</sub> resoldaad*

<sup>11</sup> Lalni sää regunaaga, bidzujn gaii soldaad ni huicanäj ro' baa lo guejdxga, huisa'nreni diidx lo rebixhojz ni rnibee xcuent guiraa ni guzajc ro' baaga. <sup>12</sup> Dxejc rebixhojz ni rnibee bachagsa'zareneni con rebengool te bia'nreni diidx gudeedreni xhiroob meel lo resoldaad, <sup>13</sup> räj<sub>preni</sub> lojreni:

—Scree colye'tz lo rebejn: “Lal ni nagayesnu, canäjnu ro' baa, biääd rexpejn<sub>pac</sub> Jesús guläxhiga'tzreni tiejxhni.” <sup>14</sup> Palga jiendaajg gubernadoor dee, siohuiinuni te di yu' xhi gunni la'tu.

<sup>15</sup> Dxejcti cua' resoldaad meel, bejnreni si'cni räj<sub>p</sub> rebixhojz. Luxh si'c bire'ch diidx loj guiraa rexpen Israel. Najli canisijcreni si'c.

### *Baxhal Jesús rexpejn<sub>pacni</sub>*

(Mr. 16:14-18; Lc. 24:36-49; Jn. 20:19-23)

<sup>16</sup> Dxejcti sää retzubiteeb xpejn<sub>pac</sub> Jesús lo región Galilee, lo dajn cadro bia'n Jesús diidx guidxaagnireni. <sup>17</sup> Cheni bahuiireni loj Jesús, bazuxhijbreni, goj<sub>nreni</sub>ni, per yu' reni ractio'p lajzreni. <sup>18</sup> Dxejc gubig Jesús lojreni, guninäjnireni, räj<sub>pni</sub>:

—Arapä guiraa yälrnibee xhaguibaa näjza lo guedxliuj. <sup>19</sup> Ni'cni, colchäj, guideb guedxliuj colchagaj<sub>n</sub> bejn gac xpenä, colgutiobnisreni, con laj Gueb Dios, näj laj Xi'n Dios näjza laj Sprit Dxan xten Dios. <sup>20</sup> Colguluiireni gusoobreni guiraa rediidx ni guinibeä. Luxh lagajc narä suganää la'tu guiraa redxej, dxejli che nitloj guedxliuj. Sugacni si'c.

## Diidx Xcuent Jesucrist Nani Bacuaa San Marcw

### *Baluu Juan ni rutiobnis*

(Mt. 3:1-12; Lc. 3:1-9, 15-17; Jn. 1:19-28)

<sup>1</sup> Scree gusloj diidx xcuent Jesucrist, Xi'n Dios. <sup>2</sup> Si'cni bacuaa toIsaías, ni gunii xtidx Dios, che räjp Dios:

Bahuii gan, guxhalä ni chanä xtidxä,  
ganidni chääni lojlu te guzucheeni xnezyujlu.

<sup>3</sup> Riejn xse' ni rbedxa' nez loj reyubijdz:

“Colyunsac xnezyuj Dad,  
colslui rexnezyulajzni.”

<sup>4</sup> Biricaj Juan ni rutiobnis nez loj reyubijdzga. Rägajcni nanabpac gusiechlajzreni, tiobnisgajczeni, te jia xtojreni. <sup>5</sup> Riädcuadiajg xhidajl reni rbäjz Judea, näjza reni rbäjz guedx Jerusalén. Dxejcti cheni ruhxobdojreni lo Dios, rustiobnis Juanreni nen gueu Jordán.

<sup>6</sup> Xhajb Juan nacchee con guichlajd cameii, xsindoorni nacchee con guijd, niluxh gudajwni guxha't näjza dzunbäserguijxh. <sup>7</sup> Caguluiini rebejn, rägajcni:

—Detzä siääd tej nani sajcro loä, nani nicla di nungäj surloä, cuää xcura'chni. <sup>8</sup> Narä abatiobnisä la'tu con nis, biädla laani guxhalni Sprit Dxan xten Dios te cuääzni nen lastootu. Si'c gustiobnis nani jiääd detzä la'tu.

### *Batiobnis Juan Jesús*

(Mt. 3:13-17; Lc. 3:21-22)

<sup>9</sup> Dxejc, nen redxejga, birii Jesús guedx Nasare't ni yu' Galilee. Dxejcro batiobnis Juan Jesús nen gueu Jordán. <sup>10</sup> Che birii Jesús nen nis, bahuiini bixal guibaa. siädjäjt Sprit Dxan xten Dios yejcni si'c te palom. <sup>11</sup> Dxejcti guibaali biejn xse' te ni räjp:

—Luj najclu xi'nä ni sanälazä; rbanälazduxhälu.

### *Bateed bendxab prueb Jesús*

(Mt. 4:1-11; Lc. 4:1-13)

<sup>12</sup> Sas baxhal Sprit Dxan xten Dios Jesús lo reyubijdz. <sup>13</sup> Dxejc guyu' Jesús ro'c tiuu dxej, guyu'ni cadro yu' reman. Sas gudiil bendxab nani rnibee, nani laa Satanás, xho niujnni te nusoob Jesús xtiidxni. Dxejcro biääd reangl xten Dios, biädhuiireneni.

### *Gusloj Jesús xtzuunni*

(Mt. 4:12-17; Lc. 4:14-15)

<sup>14</sup> Basälreni Juan nen latzguiib. Dxejcti huij Jesús nez Galilee, huiluiini xtidx Dios.

<sup>15</sup> Dxejc räjp Jesús:

—Abidzujn dxej, luxh yälrnibee xten Dios abidzujn gajxh. Colsejch lajztu, colchalilajz xtidx Dios.

### *Gurejdx Jesús tajp bejn ni rniaaz bäjl*

(Mt. 4:18-22; Lc. 5:1-11)

<sup>16</sup> Sasajti Jesús nez ro' nis xten Galilee, che bahuiini lo Simón näjza loj Andrés bejtz Simón. Cazälreni xquijxhreni lo nis, sa'csi rniaazreni bäjl. <sup>17</sup> Dxejc räjp Jesús lojreni:

—Coltanajl narä, te gunä cueddxtu bejn lacuaa ni guiniaaztu bäjl.

<sup>18</sup> Lagajc dxejc basa'nreni rexquijxhreni, sanätirenini.

<sup>19</sup> Dxejc gusaj Jesús sche'n, sas bahuiini loj Jacoob näj Juan, rexi'n Zebedeo. Cayunsa'creni xquijxhreni nen xcanuurenini. <sup>20</sup> Guredxgajcni guiro'preni, dxejcti laareni basa'nreni xtadreni Zebedeo nen canuu, näjza rexmosni, sanätirenini Jesús.



*Te bejn nani guyu' beṇdxab neṇ lastooni*  
(Lc. 4:31-37)

<sup>21</sup> Bidzujntireni guedx Capernaum. Dxejcru sabd, dxej ni rusilajz rexpē Israel, biu' Jesús neṇ guidobāz xten rexpē Israel. Dxejcti baluii Jesús rebejn ni tre' ro'c.

<sup>22</sup> Bidxelojni rebejn xtiidxni, sa'csi caguluiinireni si'cpac te ni rnibee, xhet si'c di remastr xten leiidi. <sup>23</sup> Neṇ xquidobāzreni yu' te bejn yu' te beṇdxab neṇ lastooni. Beṇdxabga guredxa', rājpnī:

<sup>24</sup> —Jesús, ni siād Nazare't, ¿xhicuent riu'lu loonu? ¿La siādgunitlojlu nuunu? Narā numbeālu, luxh nanā luj najclu beṇdxan ni siād lo Dios.

<sup>25</sup> Dxejcti gudidxa' Jesús lo beṇdxabga, rājpnī lojni:

—Basāuu ro'lu, birii neṇ lastoo niguiire.

<sup>26</sup> Sas beṇdxabga batienguij niguiiga, luxh cabedxa'ni biriini neṇ lastoo niguiiga.

<sup>27</sup> Bidxejbti guiraareni, canabdiidx loj sa'reni:

—¿Xhi dee? ¿Xhi dzuun nacoobre ruluiini? Niguiire rnibeeni nāj rebeṇdxab, luxh ruzoobreni xtiidxni.

<sup>28</sup> Di niaclaa gucbee rebejn guideb nez Galilee xhi rujn Jesús.

*Basiajc Jesús xnan suegr Pedr*  
(Mt. 8:14-15; Lc. 4:38-39)

<sup>29</sup> Che biriireni xquiidobāz rexpejn Israel, huinā Jesús Jacob nāj Juan rolijz Simón nājza Andrés. <sup>30</sup> Luxh xnan suegr Simón naga', yu'ni xliaa. Dxejc rājpreni lo Jesús:

—Cayacxhuuni.

<sup>31</sup> Dxejcti gubig Jesús lojni, gunaazni ṇaani, gulāsnini; lagajc dxejc biriini xliaa. Dxejc gusloj cayunireni.

*Xhidajl beṇracxhuu basiajc Jesús che huāz gubijdx*  
(Mt. 8:16-17; Lc. 4:40-41)

<sup>32</sup> Che huāz gubijdx, luxh abiu' guxhijṇ, biādnāreni guiraa rebeṇracxhuu loj Jesús, nājza renani yu' beṇdxab neṇ lastooni. <sup>33</sup> Luxh guideb guejdxga bidojp ro' yu'ga. <sup>34</sup> Basiajc Jesús xhidajl renani rajc garen-garen yālguijdx. Niluxh gulāzani xhidajl beṇdxab, niluxh dini nusaan ninii rebeṇdxabga, sa'csi najnreni chu najcni.

*Baluii Jesús nez Galilee*  
(Lc. 4:42-44)

<sup>35</sup> Che bara yāäl, cājyru bistie Jesús, biriini sāāni te laad cadro ruti bejn. Ro'c cabejdx-canabni loj Dios. <sup>36</sup> Dxejcti Simón nāj resa'ni huitiilreni Jesús. <sup>37</sup> Che bidxälrenini, rājpreni lojni:

—Guiraa rebejn caguiillu.

<sup>38</sup> Dxejc rāj Jesús lojreni:

—Colcho' reguejdx ni yu' gajxh, te gusuleā xtidx Dios ro'c. Par ni'cpac biälä.

<sup>39</sup> Dxejcru cuansaj Jesús guideb nez Galilee, caguluiini xtidx Dios neṇ reguidobāz xten rexpejn Israel. Gunibeezani birii rebeṇdxab neṇ lastoo xhidajl rebejn.

*Basiajc Jesús te bejn ni raḷ tiejxhni*  
(Mt. 8:1-4; Lc. 5:12-16)

<sup>40</sup> Gubig te beṇracxhuu ni raḷ tiejxhni loj Jesús, bazuxhijbni. Dxejcti rājpnī lojni:

—Narā nanā sajc gusajclu narā palga rlajzlu.

<sup>41</sup> Balaslajz Jesús beṇracxhuuga, gunaazni ṇaani, rāpgajcni:

—Rlazä jiajclu. Biajc ṇaj.

<sup>42</sup> Cheni guniini scree, biacgajc beṇracxhuuga. <sup>43</sup> Dxejcti gulunejz Jesús bejṇga. Per rāpxgaani lojni:

<sup>44</sup> —Ahuiire, rutlojdi guiniilu dee. Huiluii tiejxhlu lo bixhojz. Badedgajc lo Dios nani rājpnī to Moisés gudeed bejn lo Dios si'c te seen, te gacbee rebejn abiajclu.

<sup>45</sup> Dxejc sää bejn̄ga. Sas gusloj cayujyni diidx lo rebejn̄ xcuent guiraa nani gujcn̄i. Ni'cni diru niajcdi niu' Jesús nicla tej guejdx. Cansajni te laad cadro ruti bejn̄. Niluxh guiranejz r̄ii rebejn̄, siädhuiireni Jesús.

## 2

### *Basiajc Jesús te bejn̄ ni di guniib* (Mt. 9:1-8; Lc. 5:17-26)

<sup>1</sup> Che agudejd balti dxej, biusac Jesús nen̄ guedx Capernaum. Dxejcti biejn̄ diajg rebejn̄ arbäjzni. <sup>2</sup> Bidopgajc xhidalduxh bejn̄. Gudxaj nen̄ yu'. Nicla rolä' di niaj̄l̄ nisiujreni. Dxejcti caguluii Jesús xtidx Dios lo rebejn̄. <sup>3</sup> Dxejcti bidzuj̄n̄ tajp bejn̄, nuureni te bejn̄ ni digacti guiniib; siädnärenini lo Jesús. <sup>4</sup> Luxh di niajcdi nidzuj̄n̄reni cadro suga' Jesús, sa'csi yu' xhidajl bejn̄ ro'c. Ni'c baxhalreni yejc yu' nejc cadro sujni. Dxejcru cadro baxhalreni basiäjtreni da' ni naga' beñracxhuuga lojni. <sup>5</sup> Che bahuii Jesús rililajzreni, dxejc räjpni loj beñrachxhuuga:

—Xi'nä, agubicaj rextoj̄llu.

<sup>6</sup> Sas gaii bejn̄ ni ruluii leii ni sobga' ro'c bejn̄reni xhigab nen̄ lastooreni, naareni: <sup>7</sup> “¿Xhicuent r̄nii niguiire scree? Caniyajni Dios; rut rajcdi rudzucaj dojl̄. ¿Dioctis rajc rudzucaj dojl̄!” <sup>8</sup> Dxejcti gucbegajc Jesús xhi xhigab cayuj̄n̄reni. Dxejc räjpni lojreni:

—¿Xhicuent rujntu xhigab si'c nen̄ lastootu? <sup>9</sup> ¿La guyasiru gäbni loj beñracxhuure: “Agubicaj rextoj̄llu”, o la gäbni: “Huistie, cua' xta'lu, gusaj”? <sup>10</sup> Baj n̄aj, te gantu rajc rudzucaj Xi'n Dios, nani gujc Niguii, dojl̄ lo guedxliujre, caniä loj beñracxhuure:

<sup>11</sup> —Lojlu r̄niä, ¿Huistie, cua' xta'lu, huij rolijzlu!

<sup>12</sup> Lagajc dxejc huistie beñracxhuuga, guläzni xta'ni, biriini ro'c nez loj guiraareni. Ni'cni bidxelo guiraareni. Dxejc gulä'preni xpala'n Dios, räjpreni:

—Gajdpacnu guihuii sa' dzuunre.

### *Gurejdx Jesús Leví* (Mt. 9:9-13; Lc. 5:27-32)

<sup>13</sup> Dxejcru gubisac Jesús ro' nis xten Galilee, luxh che bidojp guiraa rebejn̄ lojni, baluiini xtidx Dios lojreni. <sup>14</sup> Sasaj Jesús che bidxaagni Leví, xi'n Alfeo. Sobga'ni cadro rusquijxni rebejn̄. Dxejc räjp Jesús lojni:

—Gudanajl narä.

Sas huisuni, sanajltini Jesús.

<sup>15</sup> Dxejc sobga' Jesús cayajwni rolijz Leví. Luxh sobganäj Jesús xhidajl reni rusquijx, näjza rebendojl̄ ni di chasanäj leii, näjza rexpejn̄pacni, lo mex. Xhidajlreni tre', luxh sanajlreni Jesús. <sup>16</sup> Dxejcru rebejn̄ ni ruluii leii näj refarisee, che bahuiireni cayaunäjni renani rusquijx näjza rebendojl̄, räjpreni loj rexpejn̄pac Jesús:

—¿Xhicuent rbenäj xmastrtu reni rusquijx näj rebendojl̄, luxh raunäjn̄ireni, ränäjn̄ireni?

<sup>17</sup> Che biejn̄ diajg Jesús xhi caniireni, räjpni lojreni:

—Renani nadip nadaan di guiquiin doctoor, per reni racxhuu r̄quiin doctoor. Dina niädtedxä rebeñsa'c, biädtedxä rebendojl̄, te gusiech lajzreni.

### *Gunabdiidxreni loj Jesús xcuent yälrucua'n* (Mt. 9:14-17; Lc. 5:33-39)

<sup>18</sup> Cagucua'n rexpejn̄ Juan näj rexpejn̄ refarisee, renani najc rebenguidoo loj guedx Israel. Dxejc biääd gaii bejn̄ loj Jesús, gunabdiidxreni lojni räjpreni:

—¿Xhicuent cagucua'n rexpejn̄ Juan näj rexpejn̄ refarisee luxh rexpejn̄pacu di gucua'n?

<sup>19</sup> Dxejcti räjp Jesús lojreni:

—¿La rucua'n rebejn ni rdon cháa cadre ru' yälruçnaa che meer suga' bi'n? Che meer suga' bi'n lojreni, direni gucua'n. <sup>20</sup> Per sidzujn dxej sibicaj bi'n lojreni, dxejc sii sucua'nreni.

<sup>21</sup> 'Rut rucuaadi tla' ladcoob loj tla' ladyux, sa'csi ladcoob rxu'nni luxh rutiäjzni ladyuxga, dxejc xhiroobruni räjs. <sup>22</sup> Rutza rusäldi bin ni gajd guilaj neñ guidyux ni abigaa. Sa'csi bin ni gajd guilajga sutiäjzni guiçdga che guilajni, luxh siniçt binga näjza guiçdga. Ni'cni nanab gusälni bincoob neñ guidcoobza.

### *Batojp rebejn ni rinajl Jesús triuu sabd*

*(Mt. 12:1-8; Lc. 6:1-5)*

<sup>23</sup> Te sabd, dxej ni rusilajz rexpejn Israel, sasaj Jesús nez loj reyuya'n. Sas gusloj rexpejn pacni caläädx doj lo triuu. <sup>24</sup> Dxejc räjp refarisee, renani najc beñguidoo loj guedx Israel, loj Jesús:

—Arniä, ¿xhicuent rujn rexpejn pacu dzuun ni di guchaag gunni neñ dxej ni rusilajznu, ä?

<sup>25</sup> Dxejcti räjp Jesús lojreni:

—¿La gajdtu goł nani bejn toDavid te huält, laani näj resa'ni, ä? Che biäädx xhi gauureni, gulaanreni. <sup>26</sup> Biu' David neñ xyu' Dios cheni guyu' toAbiatar loj Dios. Abiatar sajru loj rebixhojz ni guyu' neñ xquidoo rexpejn Israel. Dxejc gudajw toDavid reyätxtiil ni dzuub ro'c. Badeedzanini gudajw rebejn ni yunäjni. Luxh rebixhojztis rajc rajw yätxtiilga.

<sup>27</sup> Räjpza Jesús lojreni:

—Dios bejn dxe sabd sa'csi najnni naquii pac gusilajz bejn. Dini niujn sabd te gapda bejn. <sup>28</sup> Ni'cni narä, Xi'n Dios ni gujç Niguii, näjza sabd rnibeä.

## 3

### *Niguii ni nabijdz te ñaani*

*(Mt. 12:9-14; Lc. 6:6-11)*

<sup>1</sup> Biu' Jesús stehuält neñ xquidobäz rexpejn Israel. Ro'c yu' te niguii nani nabijdz te ñaani. <sup>2</sup> Niluxh ro'c cagula'tz rebejn Jesús don la susiajçni niguiiga sabd, dxej ni rusilajz rexpejn Israel, sa'csi rlaçzreni cue'çreni xquejni loj nani rnibee rexpen Israel. <sup>3</sup> Dxejc räjp Jesús lo niguii nani nabijdz ñaani:

—Huistie, guzuj galäiire.

<sup>4</sup> Dxejcti gunabdixgajçni loj gaii rebejn ga, räjpni:

—¿La laaca gunni dzunza'c, o la dzunguiçd, sabd, ä? ¿La suslaani yäl nabajç, o la sugu'tni?

Luxh laareni biacdxireni. <sup>5</sup> Dxejc nadxe'ch bahuii Jesús lojreni, luxh guc-huin laçzni, sa'csi guc najd laçzreni. Dxejc räjp Jesús loj niguiiga:

—Baslii ñaalu.

Dxejcti basliini ñaani. Biajçtini. <sup>6</sup> Dxejçru biunejz refarisee. Guslogajçreni caguchaa-greni diidx con reni nadxaag Herodes, te don xho ju'treni Jesús.

### *Xhidajl bejn bire' ro' nis*

<sup>7</sup> Jesús näjza rexpejn pacni sääreni ro' nis, luxh xhidajl beñ Galilee birinajni. <sup>8</sup> Che gojnreni redzunro ni rujn Jesús, xhidajlreni biääd. Yu'reni birii Judea, yu'reni birii guedx Jerusalén, yu'reni birii Idumea, yu'zaren birii nejz stelaad gueu Jordán, biriizaren nez guedx Tiro, näj nez guedx Sidón, biädhuireni loj Jesús. <sup>9</sup> Ni'cni räjp Jesús loj rexpejn pacni quiilreni te canuu, te na'c gutää rebeñxhidaalgani. <sup>10</sup> Abasiajç Jesús xhidajl beñracxhuu, ni'cni guiraasi beñracxhuu caxa't lojni, te canrenini te jiajçreni. <sup>11</sup> Niluxh che rhuii rebeñdxab lojni, ruzuxhijbreni lojni. Dxejcti rbedxa'reni räjpreni:

—Luj najçlu Xi'n Dios.

<sup>12</sup> Dxejcti Jesús gudidxa' lojreni te na'c niäjbreni chu najcni.

*Gule Jesús tzubitiop bejn loj reni rinajlni*

*(Mt. 10:1-4; Lc. 6:12-16)*

<sup>13</sup> Birii Jesús sääni lo te dajne' cadro gurejdxni renani rlajzni cueni. Gubigtireni lojni.  
<sup>14</sup> Dxejcti guleni tzubitio'preni te sanäjreni laani, te guxhalnireni chaluiireni xtidx Dios;  
<sup>15</sup> te ga'preni yälrnibee te gusiajcreni benracxhuu, te cuääzarenı rebendxab. <sup>16</sup> Retzubitio'p bejn ni gule Jesús najc: Simón, ni gulälajzani Pedr. <sup>17</sup> Dxejcti Jacoob con Juan, rexi'n Zebedeo, gulälaj Jesús Boanerges. Con xtiidxnu sälojni bejn ni nasesya', si'c guzii. <sup>18</sup> Näj Andrés, Felipe, Bartolomé, Mateo, Tomás, Jacoob xi'n Alfeo, Tadeo, Simón, ni di guidxejb rnigajc, <sup>19</sup> näj Judas Iscariot, ni bato' Jesús loj reni rdxechlajz lojni. Sä'tireni rolijz te dade'.

*Yälrniyaj loj Sprit Dxan xte Dios*

*(Mt. 12:22-32; Lc. 11:14-23; 12:10)*

<sup>20</sup> Dxejc bidopsac rebenxhidaalga; nicla nıajc nıaunäj Jesús rexpejnıpacni. <sup>21</sup> Che biejn diajg resa' Jesús dee, biädxhiirenini, sa'csi naareni, yejcnı cayajc.

<sup>22</sup> Rebejn ni ruluii leii ni birii guedx Jerusalén bidzujnıza lo Jesús, dxejc räjpreni:

—Beelzebú, nani rnıbee rebendxab, yu' neñ lastoo niguiire. Niluxh nani rnıbee rebendxab rudeed yälrnıbee lo Jesús te cuääni bendxab.

<sup>23</sup> Dxejc gurejdx Jesús rebejnıga, bijyni te cuent ni ruluii lojreni, räjpni:

—¿Xho gurılaagw bendxab lagajc sabendxabni? <sup>24</sup> Palga rebejn xten te yälrnıbee la'reni, luxh tilnä j te cuaani ste cuaaga, di yälrnıbeega chu xchej. <sup>25</sup> Palga te famil rdilnä j lagajc sa'ni, di familga chu xchej. <sup>26</sup> Palga bendxab nani rnıbee tilnä j lagajc laani, di xcälrnıbeeni chu xchej, sa'csi ni'c gun luuxni.

<sup>27</sup> 'Rut gacdi jıu' rolijz te niguidaan, cuanni xhixhtenni, palga dini gulıbxgaani, si'ctis sajı cuanni xhixhtenni.

<sup>28</sup> 'Rnıliäpac lojtu guıraa dojl näjza yälrniyaj xten rebejn sajı jıa. <sup>29</sup> Nani guıniyaj Sprit Dxan xten Dios, digacdi guıbicaj rextojlnı, anuutisni xtojlnı par tejpas.

<sup>30</sup> Räjpni si'c sa'csi canıireni yu' bendxab neñ lastoonı.

*Xnan con rebetzhuin Jesús*

*(Mt. 12:46-50; Lc. 8:19-21)*

<sup>31</sup> Dxejcru bidzujn xnan Jesús, nä j rebetzhuinni. Direni niu', baxhalıtisrenı chu huıtejdxni. <sup>32</sup> Rebejn ni sobga' gabi Jesús räjprenı lojni:

—Xnanlu nä j rebejtzlu suga' ro lä', caguiılrenı luj.

<sup>33</sup> Dxejcti räjp Jesús lojrenı:

—¿Chu renı'c najc xnanä nä j rebetzä?

<sup>34</sup> Bahuıgajcni loj renanı sobga' gabini, dxejc räjpni lojrenı:

—Redee najc xnanä, rebetzä. <sup>35</sup> Chutis ni rujn ni rlajz Dios, ni'c najc betzä, bisianä, näjza xnanä.

## 4

*Xcuent niguii ni sale'c binij*

*(Mt. 13:1-23; Lc. 8:4-15)*

<sup>1</sup> Suga' Jesús ro' nis guslosac caguluıini xtidx Dios, luxh bidojp xhidajl bejn cadro suga'ni. Xhidalduxh najcreni, ni'cni biu' Jesús neñ te canuu ni suga' ro' nisga. Dxejcti gurejni neñga, biääd guıraa bejn bıa'ntırenı ro' nis. <sup>2</sup> Dxejc baluiınırenı guıraloj, ganax cuent ni ruluii gunıini. Che caguluıini, räjpni lojrenı:

<sup>3</sup> —Gucuaıajgtu dee. Guyu' te niguii. Biriini sale'cni binij. <sup>4</sup> Che guslojni cabe'cni, yu' lajt bıajb bıinijga cuä' nezyuj. Sas biääd reman xhaguıbaa, gudajwrenı bıinijga. <sup>5</sup> Stee lajt bıajb bıinijga neñ guıj cadro xheti xhidajl yuj. Bıinijga gulengajcni, sa'csi xheti xhidajl yuj

ro'c. <sup>6</sup> Dxejc, sa'csi lo jiaa yu' xlobaani, che birii gubijdx, bigolni, gubijdzitini. <sup>7</sup> Stee lajt biajb binijga neṅ yaguejch. Dxejcti biroob reyaguejchga, luxh bejnreni balaa loj binijga, ni'cni gujcní ganax bilii. <sup>8</sup> Per stee lajtga biajb binij lo yusa'c. Gulejn reyäjlgga, guroobreni, gucsa'creni. Yu'reni cuaj galbitzúu xob, yu'reni cuaj gayojṅ xob, yu'zarení cuaj tegayuu xob.

<sup>9</sup> Dxejc räjpni lojreni:

—Chutis ni rlaǰz guisieed, sucuadiaǰni.

<sup>10</sup> Che asii xhidajl bejṅ, rebejṅ nani suga' gajxh cadro suganäj Jesús guitzubitio'p xpejṅpacni gunabdiidx lo Jesús xhi säloj cuentre. <sup>11</sup> Dxejc räjp Jesús:

—Dios abejṅ gacbeetu te gantu xho najc yälxhiga'tz xten xcälrnibee Dios nani najc xhiga'tz ṅajli. Niluxh lo ste'ca bejṅ con cuenttis rniä guiraa recosre, <sup>12</sup> te mase cahuiireni direni gumbee, te mase cayiejṅ diajgreni, direni gacbee. Scree gacni, te na'c gusiejch lajzreni, te na'c guibicaj xtojṅreni.

<sup>13</sup> Räjpzani lojreni:

—¿La dítu gacbee cuentre? ¿Xhocha gacbeetu xhidajlru cuent? <sup>14</sup> Niguiire nani sale'c binij najc si'c te nani rulúii xtidx Dios. <sup>15</sup> Yu' bejṅ ni najc si'c binij ni biajb cuä' nezyuj: riejṅ diajgreni xtidx Dios nani rulúii bejṅ. Dxejc che jiejn diajgreni xtidx Dios, riäd Satanás rbägajcni xtidx Dios ni yu' neṅ lastooreni. <sup>16</sup> Yu'za rebejṅ ni najc si'c binij ni biajb neṅ reguij, renani che jiejn diajgreni xtidx Dios, rbaa lajzreni rca'reni diidxga. <sup>17</sup> Niluxh direni nisiudzu'tz, sa'csi guxii huilii lajzreni. Che rdejdréni trabajw o che rusacsí bejṅreni xcuent xtidx Dios, rusaanreni xtidx Dios. <sup>18</sup> Yu'zarení najc si'c binij ni biajb neṅ yaguejch, riejṅ diajgreni xtidx Dios, <sup>19</sup> dxejc che ru'rurení yärsia' xcuent recos guedxliujre, rsia' lajzreni ga'preni meel, rlaǰzreni ga'prurení guiraloj recos, dxejc riu' redee neṅ lastooreni, rusäuuni lo xtidx Dios, xlia'si biejn diajgreni xtidx Dios. <sup>20</sup> Yu'za bejṅ ni riejṅ diajgreni xtidx Dios, rlii lajzreni diidxga, xhet xlia'ti biejn diajgreni xtidx Dios. Najc'reni si'c binij ni biajb loj yusa'c. Yu' rebejṅ ni najc si'c nani cuaj galbitzúu xob lojni, yu'za rebejṅ ni najc si'c nani cuaj gayojṅ xob lojni, yu'za rebejṅ ni najc si'c nani cuaj tegayuu xob lojni.

*Xhet yuchetzu'tzdi ni di guidzujṅ dxej sisäbdiidx*

*(Lc. 8:16-18)*

<sup>21</sup> Räjpza Jesús lojreni:

—¿La riädñätu te bajl te suuni dejtz te alm, o neṅ te loon, ä? ¿La xhet nanabdi suuni jiaa te guzanijni, ä? <sup>22</sup> Xhet yuchetzu'tzdi ni di guidzujṅ dxej sisäbdiidx. Xhetiza xhicos naga'tztis. Naga'tzni ṅaj, niluxh sidzujṅ dxej sule'ni. <sup>23</sup> Pal yu' chu rlaǰz guisieed, sucuadiaǰni.

<sup>24</sup> Räjpza Jesús lojreni:

—Colyunxgaa xhigab rediidx ni riejṅ diajgtu. Nani rusäl'tu loj xhigabtu, ni'cza guniidx Dios xca'tu, luxh sisiojbru yejc ni xca'tu. <sup>25</sup> Renani rajp che'n yäl'najṅ, lojreni sudeedru Dios yäl'najṅ. Luxh renani xhetru rusäl'di loj xhigabreni, sudzucaj Dios yäl'najṅ nani rajpreni.

*Xcuent binij ni roob*

<sup>26</sup> Guniiza Jesús lojreni:

—Yälrnibee xten Dios najc si'c rsiajc te niguii che rbe'cni binij lo yuj, <sup>27</sup> dxejc yääl riguesni, rdxee ristieni, dxejcti rliejn binijga, luxh di niguiiga gan xho roobni. <sup>28</sup> Acanajṅ yujga rajc binij lojni. Galoo rii cuane'ga, sas rii doj lojni. Dxejcru rdxaj bejdzé' neṅ dojga.

<sup>29</sup> Dxejcti che aguyajl bedze'ga, ruxhalni chu ritiuugni, sa'csi abidzujṅ dxej ni guidojpni.

*Xcuent bedz muxhtas*

*(Mt. 13:31-32; Lc. 13:18-19)*

<sup>30</sup> Räjpza Jesús:



—¿Xhini'c najc si'c najc xcälrnibee Dios? ¿Xhi te cuent guiniinu te guiluiniinu? <sup>31</sup> Si'c te bedz muxhtas ni rbej loyuj, si'c najcni. Bedz muxhtas najcni bedz bāze'ru loj guiralii bedze' ni yu' loj guedxliuj. <sup>32</sup> Dxejc che agurejni, roobni, rajcni yagroru loj recuaan. Dxejcti roob rexajcwni te rajc rujn reman xhaguibaa xpitiääzni neñ xpałaani.

*Si'c baluii Jesús ganax con cuent*

*(Mt. 13:34-35)*

<sup>33</sup> Si'c ruluii Jesús rebejn xtidx Dios guniini xhidal cuent sa' redee, si'ctis ni rajc racbeereni. <sup>34</sup> Con recuent ni ruluiitis gunii Jesús lojreni. Niluxh lo rexpejn pacni basule'ni guiraa recuentre.

*Rusiadxi Jesús bej näj nisdoo*

*(Mt. 8:23-27; Lc. 8:22-25)*

<sup>35</sup> Lagajc gudxejga räjpni loj rexpejn pacni:

—Colcho', chonnu stelaad nis xten Galilee.

<sup>36</sup> Basa'ntireni rebejn, sanätireni Jesús neñ canuu cadre sobgajcni. Dxejcti sgaii canuu sanajlni. <sup>37</sup> Chela gubi' te beduxh, gusloj cayu' nis neñ canuuga. Cadxaj canuuga nis.

<sup>38</sup> Nagayejs Jesús dejtz canuuga, nagayejsni. Bacuäänreni Jesús, räpgajceni lojni:

—Dad mastr, ¿la dilu jiu siääznu neñ nis, ä?

<sup>39</sup> Dxejc huistie Jesús, gudidxa'ni lo bejga, räjpzani lo nis:

—Guredxi.

Gulāzgajc bej, biacdxini. <sup>40</sup> Räjp Jesús loj rexpejn pacni:

—¿Xhicuent cadxebduxhtu? ¿La ditu chalilajz xtidxä, ä?

<sup>41</sup> Luxh laareni bidxelojreni, räjpreni loj sa'reni:

—¿Chucha dee ni rnibee bej con nis, luxh ruzoobreni xtiidxni?

## 5

*Nigui Gadara ni yu' bendxab neñ lastooni*

*(Mt. 8:28-34; Lc. 8:26-39)*

<sup>1</sup> Bidzujntireni stelaad ro' nisga, lo yuj xten Gadara. <sup>2</sup> Si'ctis ni birii Jesús neñ canuu, biädgajc te niguii lojni ni birii neñ rebiliää cadre rga'tz beñgut. Yu' bendxab neñ lastoo niguiiga. <sup>3</sup> Rbājzni neñ rebiliääga luxh rut rajcdi rucuaduuni, nicla con cadenguiib.

<sup>4</sup> Xhidajl huält agacbacuaduureni ni', naa niguiiga con cadenguiib, luxh litis batiuugni recadenguiibga, rut rajcdi rusiadxini. <sup>5</sup> Si'ctis canzajni, dxej, yääl. Rbedxa'ni neñ redajn, neñ rebiliää, luxh cagutiugni tiejxhni con reguij. <sup>6</sup> Che bahuini loj Jesús zijtru, baxunni huichaglojni Jesús, bazuxhijbni lojni. <sup>7</sup> Dxejcti rbedxaduxhni, räjpni:

—¿Xhicuent siäädlu loä, Jesús, Xi'n Dios ni yu' jiaro? Rniabä lojlu nez loj Dios na'c gusacsílu narä.

<sup>8</sup> Sa'csi agac cayäjb Jesús lojni:

—Luj, bendxab, birii neñ lastoo niguiiga.

<sup>9</sup> Dxejcti gunabdiidx Jesús räjpni:

—¿Chu laalu?

Dxejc räjpni:

—Narä laä Legión, nani säloj xhidalro, sa'csi xhidajl najcnu.

<sup>10</sup> Sanuutis canabni lo Jesús na'c guxhalni rebendxabga ste'ca guejdx. <sup>11</sup> Ro'c tre' xhidalduxh cuch cuä' dane'ga, cayajwreni. <sup>12</sup> Dxejc gunab rebendxabga loj Jesús, räjpreni:

—Baxhal nuure loj recuchre te jiu'nu neñ lastooreni.

<sup>13</sup> Dxejcti basaan Jesúsreni. Biriiti rebendxabga neñ niguiiga, dxejc biu'reni neñ lastoo recuchga. Yu' si'cti tiop mił cuch ro'c. Baxun recuchga, dxejc birolreni ro' guilaj, bitejbreni neñ nis, gujtireni neñ nisga.

<sup>14</sup> Renani cayajp recuchga baxunreni, huiyeireni diidxga neñ guejdx, näjza loniaa. Dxejc biääd bejn biädhuii nani gujc ro'c. <sup>15</sup> Che bidzujnreni cadro suga' Jesús, bahuiireni loj niguii nani guyu' rebenxgabga neñ lastooni. Sobga'ni ro'c, najcwni xhajbni luxh nasa'c yejnci. Niguiire najc nani guyu' benxgab ni laa Legión neñ lastooni. Bidxejbti rebejn nani bahuii lojni. <sup>16</sup> Dxejcru rebejn ni bahuii xhi gujc ro', huiyeireni diidx xho guzajc niguiire nani guyu' benxgab neñni galoo, näjza nani guzajc recuch. <sup>17</sup> Dxejc gusloj canabreni loj Jesús jiunejzni.

<sup>18</sup> Che biu' Jesús neñ canuu, niguii nani guyu' benxgab neñ lastooni gunabni loj Jesús, räjpni:

—Huinä narä.

<sup>19</sup> Per di Jesús nusaan nijni. Räjp Jesús lojni:

—Huij rolijzlu, lo resa'lu. Huiyeii diidx lojreni xho bennäj Dadlu, näjza xho balaslajzni luj.

<sup>20</sup> Sä'ti niguiiga, gusloj cayujyni diidx neñ reguejdx xten Decápolis xho bennäj Jesúsni. Guiraa rebejn bidxeloj.

*Xindxa'p Jairo näjza gunaa ni bahual xhajb Jesús  
(Mt. 9:18-26; Lc. 8:40-56)*

<sup>21</sup> Che bidzunsac Jesús stelaad ro' nisga neñ canuu, bidzujn xhidalduxh bejn cadro suga'ni. Bia'nti Jesús ro' nisga. <sup>22</sup> Dxejcru biääd te niguii nani laa Jairo, ni rnibee neñ xquidobáz rexpén Israel. Che bahuiini loj Jesús, bazuxhijbni lojni. <sup>23</sup> Canabpacni lojni, räjpni:

—Xindxapä'ä acayejt. Gudaa, guzujlu naalu yejnci, te jiajnci, te guibajjni.

<sup>24</sup> Sanäti Jesús bejnga. Xhidajl bejn sanajlni, luxh cagutäärenini. <sup>25</sup> Loj rebenxhidaalga yu' te gunaa ni agujc tzubitio'p ijz racxhuuni yälguidxbäii. <sup>26</sup> Agudedduxhni trabajw, abahuii xhidajl doctoorni. Xlia'si abanijtni guiraa nani rajpni, luxh xhet racnäjdini, alga rxuuruni. <sup>27</sup> Sa'csi biejn diajgni xhini'c canii rebejn xcuent Jesús, gubig gunaaga nez dejtz Jesús, guideb neñ rebejn, bahualni xhajb Jesús. <sup>28</sup> Cayujnni xhigab, naani: “Palga narä falä xhajbtisni, siacä.” <sup>29</sup> Lagajc dxejc guläjz caxe' xtiejnni, gucbeeza tiejxhni abirii xcälracxhuuni. <sup>30</sup> Gucbegajc Jesús yu' chu abasiajnci. Gubiregajnci neñ rebenxhidaalga, räjpni:

—¿Chuni'c bahual xhabä?

<sup>31</sup> Dxejcru räjp rexpejnpacni lojni:

—Rhuiilu benxhidaal cagutäälu, luxh naalu: “¿Chuni'c bahual xhabä?”

<sup>32</sup> Sas cahuii Jesús nez ree, nez rec, te fiini loj nani bahualni. <sup>33</sup> Dxejc bidxejb gunaare, racejsni, sa'csi gucbeeni xhini'c gujnci. Dxejc biäädni, bazuxhijbni loj Jesús, räbliini loj Jesús guira'ti ni bejn. <sup>34</sup> Dxejc räjp Jesús lojni:

—Xindxa'pä, abiajclu sa'csi huililajzlu. Gulecdxi lajzlu, huij rolijzlu, abiajc xcälracxhuulu.

<sup>35</sup> Canisijc Jesús si'c che bidzujn renani birii rolijz dade' ni rnibee neñ xquidobáz rexpén Israel. Räjpreni:

—Agujt xinxape'lu. ¿Xhicuent rusieedrulu Dad mastr?

<sup>36</sup> Dxejc che biejn diajg Jesús nani caniireni, räjpni lo dade'ga:

—Na'c guidxejblu. Bililajztis.

<sup>37</sup> Luxh dini nusaanru nij chu ninäni, Pedrtis näj Jacoob näjza Juan bejtzni. <sup>38</sup> Che bidzujnni rolijz dade'ga, bahuii Jesús biejy ni cayujn rebejn ni rbedxa' roon. <sup>39</sup> Biu'tini räjpni:

—¿Xhicuent rujntu si'c? Gajd dxape're guet. Nagayejssini.

<sup>40</sup> Alga baxhiznäjrenini. Dxejc gunibee Jesús birii guiraa rebejnga. Dxejcti huinäni xcuzajn dxape'ga con renani sanäni. Biu'reni cadro naga' dxape're. <sup>41</sup> Gunaazni naa dxape'ga, dxejc räjpni:

—Talita cumi — nani säloj con xtiidxnu: Dxape', lojlu rniä, huistie.

<sup>42</sup> Dxejcti huistiegajc dxape'. Tzubitio'p ijz yu' dxape'ga. Bidxeloduxh rebejn ni bahuii guläs Jesús dxape'ga. <sup>43</sup> Dxejc balijdx Jesús reni te rut lojdi chaye'tzreni xhini'c gujc. Gunibegajcni gudeedreni xhi gauu dxape'ga.

## 6

*Che guyu' Jesús Nazare't*  
(Mt. 13:53-58; Lc. 4:16-30)

<sup>1</sup> Dxejcru birii Jesús ro'c, huijni lajdxni, sanäzani rexpejnpacni. <sup>2</sup> Che bidzujn sabd, dxej nani rusilajz rexpejn Israel, gusloj caguluiini nen xquidobäz rexpejn Israel. Bidxeloj xhidajl bejn nani biejn diajg rextiidxni, räjpreni:

—¿Caro bisieed niguiire guiraa recosre? ¿Xhi yäl'najnre cua'ni ni'c rajc rujnni rextzun-duxh Dios con ñaani? <sup>3</sup> ¿La xhet laadi carpinteer, xi'n Marii, bejtz Jacob, näj José, näj Judas, näjza Simón dee, ä? ¿La xhet reedi rbäjz rebisianhuinni?

Luxh bidxechlajzreni lojni. <sup>4</sup> Dxejc räjp Jesús lojreni:

—Catis rinälajzreni te ni rnii xtidx Dios. Lajdxtisni, lagajc loj resa'ni, rolijztisni, ro'c rut rinälajzdini.

<sup>5</sup> Luxh di niajcdi niujn Jesús xhidajl milaagwr ro'c. Tiopchontis benracxhuu basiajcnii, bazujni ñaani yejcreni. <sup>6</sup> Bidxelo Jesús sa'csi di lajzreni nilii. Caguluiitini nen guiraa reguejdx'e' ni ria'n gajxh nejzga.

*Baxhal Jesús tzubitio'p bejn ni rinajlni chaluiireni xtidx Dios*  
(Mt. 10:5-15; Lc. 9:1-6)

<sup>7</sup> Dxejcru gurejdxni guitzubitio'p xpejnpacni. Gusloj caguxhalni tiopgajreni; badeedzani yäl'nibee lojreni te guinibeereni loj rebendxab. <sup>8</sup> Gunibeeni xhet chanädireni lo nejz, ganaxhtis te yajg te sanäjreni. Di nungäjlni chanäreni nicla bisiuud, nicla yätxtiil, niclaza meel nen dobdäjlni. <sup>9</sup> Nungäjlni xcaj gura'ch ni'reni, nägajc ga'preni tejtis gamangw, xhet tio'pdini. <sup>10</sup> Dxejcti räjpni lojreni:

—Cadrotis jiu'tu nen te guejdx, coljia'n nen tejtis yu' guiraa redxej ni chutu guejdxga.

<sup>11</sup> Palga yu' te guejdx cadro direni gusaan jiu'tu luxh di rlajzreni cuadiajgreni diidx ni sanätu, colrii guejdxga, colcuijb guxhuj ni'tu si'c te seen te gacbeereni xhet laadi bejnreni. Rniliäpac lojtu, guxiiru trabajw ted reben Sodoma näj reben Gomorra quela rebejn ni yu' guejdx cadro direni gusaan jiu'tu.

<sup>12</sup> Dxejc biriireni, sääreni. Cayäbgajcreni nanabpac gusiejch lajz rebejn. <sup>13</sup> Guläazareni xhidajl bendxab dxejcti gudäabreni se't yejc xhidajl benracxhuu, luxh biajcreni.

*Xcälgujt Juan ni rutiobnis*  
(Mt. 14:1-12; Lc. 9:7-9)

<sup>14</sup> Herodes najc nani rnibee dxejc. Biejn diajgni xpala'n Jesús, sa'csi guiralii rebejn calä'p xpala'nni. Dxejc räjp Herodes:

—Juan nani rutiobnis ahuäjs loj rebengut, ni'c rajc rujnni remilagwre.

<sup>15</sup> Sgäii bejn räjp:

—Laa Elías ni gunii xtidx Diosni.

Sgäiiireni räjp:

—Laa te bejn ni rnii xtidx Dios, o sa' te rebejn ni gunii xtidx Dios agujc xchero.

<sup>16</sup> Che biejn diajg Herodes si'c, räjpni:

—Laa Juan dee, nani gunibee biru' yejcnii, luxh naj agubansacni loj rebengut.

<sup>17</sup> Sa'csi lagajc Herodes gunibee biga' Juan, dxejc bacuaduurenini con cadenguiib nen latzguiib, xcäl'nasa'c Herodías. Herodías gujc chääl Lib, bejtz Herodes, dxejc cua' Herodes gunaaga si'c chäälni. <sup>18</sup> Räjp Juan loj Herodes:

—Xhet laadi rbäznäjlu chääl bejtzlu.

<sup>19</sup> Ni'cni rdxechlajz Herodías loj Juan, luxh rlanjzi ju'tnini, luxh di niajcdini <sup>20</sup> sa'csi rdxejb Herodes Juan, sa'csi najnni beṅsa'c, beṅdxan najc Juan, ni'cni dini nusaan niujn Herodías latsiajni. Mase dini gachesa'c ni rnii Juan, rucuaadiagsa'cni xtiidxni. <sup>21</sup> Niluxh guyu' xmood Herodías. Che gojḷ laj Herodes, bayaanni rexpejṅni ni rnibee, nājza rebejṅ nani sajc nez región Galilee. <sup>22</sup> Dxejcti biu' xindxa'p Herodías cadre cayajwreni, baya'ni nez lojreni. Bidxaglaxduxh Herodes nājza rexpioozni baya' gunaaga, xindxa'p Herodías. Dxejc räjp Herodes lo gunaaga:

—Gunab ni rlanjztislu loä, narä sunidxäni.

<sup>23</sup> Dxejcru räplii Herodes lojni:

—Sunidxä xhitis ni guiniablu. Mase gala' yuj ni rnibeä.

<sup>24</sup> Biriitini neṅ yu', huiye'tzni loj xnanni, räjpni:

—¿Xhini'c guiniabä lojni?

Dxejc räjp xnanni lojni:

—Gunab yejc Juan ni rutiobnis lojni.

<sup>25</sup> Huigajcni loj reii, sas gunabni lojni, räjpni:

—Rlazä gunidxgajclu loä yejc Juan ni rutiobnis. Neṅ te pla't baniidx yejci.

<sup>26</sup> Dxejcti guc-huinuxh lajz Herodes, sa'csi abadeedni xtiidxni lojni, luxh sa'csi abiejn diajg renani sobganäjni lo xmexni, ni'c dipac rlanjzi nudxoṅni nani gunab gunaaga lojni. <sup>27</sup> Baxhalgajc reii te soldaad ni rcanäj ro'c, baxhalnini, te chaxiini yejc Juan. <sup>28</sup> Ni'c huij, dxejcti bagu'tni Juan neṅ latzguiib, biädnätini yejc Juan neṅ te pla't. Badeedtinini loj gunaaga. Dxejcti gunaaga badeednini loj xnanni.

<sup>29</sup> Che biejn diajg rexpejṅpac Juan si'c, biädläsreni togoolga. Dxejcti bacua'tzrenini neṅ te baa.

*Bayaan Jesús gaii mil bejn*

*(Mt. 14:13-21; Lc. 9:10-17; Jn. 6:1-14)*

<sup>30</sup> Che gubi' renani baxhal Jesús, bijreni diidx guiraa ni bejnreni nājza ni baluiireni.

<sup>31</sup> Dxejc räjp Jesús lojreni:

—Colṭaa, xtebnu choṅnu cadre rut rbäjzdi, guisilaaznu tudxe'n.

Räjp Jesús si'c sa'csi yu' xhidajl bejn ni sää, ni siääd, nicla gal gauureni. <sup>32</sup> Dxejcti sääreni neṅ te canuu cadre rut rbäjzdi. <sup>33</sup> Bahuii xhidajl bejn sääreni, biembeereni Jesús. Dxejc xhidajlreni huini' ro'c, xhidajl guejdx biriireni, ganidreni bidzujṅreni loj Jesús nājza rexpejṅpacni, dxejcti bidojpreni lojni. <sup>34</sup> Birii Jesús neṅ canuu, bahuiini loj beṅxhidaalga. Dxejc balazlajznireni, sa'csi najcreni si'c rexiil ni ruti baxtoor xtenreni. Dxejc gusloj caguluiinireni guiraloj. <sup>35</sup> Che gojḷ gudxej, gubig rexpejṅpacni lojni, räjpreni:

—Rut rbäjzdi ree, luxh agudxej naj. <sup>36</sup> Baxhal rebejṅ te chääreni lo reguejdx, nājza reṅench, te chasiireni yätxtiil gauureni sa'csi xheti xhi gauureni ree.

<sup>37</sup> Dxejc räjp Jesús lojreni:

—La'tu coldeed xhi gauureni.

Dxejc räjpreni loj Jesús:

—¿Xhixh sajl tiop gayuu meel yätxtiil chosiinu gauu guiraa rebeṅxhidajlre?

<sup>38</sup> Dxejcti räjp Jesús lojreni:

—¿Bal yätxtiil rajptu? Colchahuii.

Che gojnreni balni dxejc räjpreni:

—Gaii yätxtiil, nājza tiop bājḷ.

<sup>39</sup> Dxejcru gunibee Jesús räjpreni loj guiraa rebejṅ:

—Colcuej xcua-xcuaatu loj guixhaya'.

<sup>40</sup> Sas gurej xcua-xcuaareni. Yu' lajt gurej tegayuureni, yu' lajt gurej garol gayuureni.

<sup>41</sup> Dxejcti cua' Jesús guigaii yätxtiilga nājza guiro'p bājḷga, bahuiini xhaguibaa, badeedni xquixhtios loj Dios. Dxejcti gula'ni yätxtiil nājza guiro'p bājḷ, badeednini loj rexpejṅpacni te badeedrenini loj guiraa rebeṅxhidaalga. <sup>42</sup> Dxejc gudajw guiraareni, gudxaj xque'reni.

<sup>43</sup> Dxejcru batojpreni tzubitiop dxijm guidxadoo yätxtiil näjza bäjl ni bia'n. <sup>44</sup> Luxh loj guiraa rebejn ni gudajw yu' si'cti gaii mil niguii.

*Guzaj Jesús loj nis*

*(Mt. 14:22-27; Jn. 6:16-21)*

<sup>45</sup> Gunibee Jesús jiu' rexpejn pacni nen canuu, chägajcreni Betsaida, ni tre' dejtz nis stelaad, lałni cagusadiidxn rebejn. <sup>46</sup> Che gulujx basadiidxnireni, sääni nen redane', sanabni lo Dios. <sup>47</sup> Cheni acayu' guxhijn, yu' rexpejn pacni nen canuu galäi nis lał ni suga' Jesús xtebni ro' nis. <sup>48</sup> Dxejcti bahuii Jesús abadxajgreni cagusajreni xcanuureni, sa'csi säbduxh bej. Bejga rulanaareni nez dejtzreni stehuält. Dxejcru che acara yääl, gusaj Jesús loj nis, huijni cadro sasajreni, rlaizni ninijdni lojreni. <sup>49</sup> Dxejc che bahuiireni sasaj Jesús loj nis, naareni pet te beñmalni, ni'c guredxa'reni. <sup>50</sup> Guiraareni bahuiireni lojni, bidxebduxh'reni. Sas gunigajcni lojreni, räjpni:

—Colsutijp lajztu. Laa naräni. Na'c guidxejbtu.

<sup>51</sup> Dxejcti huä'p Jesús nen canuu cadro yu'reni. Lagajc dxejc biacdxi bej, luxh laareni bidxeloduxh'reni, <sup>52</sup> sa'csi direni niacbee xhini'c bennäj Jesús reyätxtiil. Guc najd lajzreni, ni'c direni niacbee.

*Basiajc Jesús rebenracxhuu nen guedx Genesare't*

*(Mt. 14:34-36)*

<sup>53</sup> Gudejdreni lo nis, bidzujn'reni lo yuj xten Genesare't. Ro'c bacuaduureni canuu ro' nis. <sup>54</sup> Che biriireni nen canuu, biembegajc rebejn Jesús, <sup>55</sup> dxejcti birii rebejn guideb nejzga. Guslojti siädnäreni benracxhuu loj Jesús, naga' rebenracxhuuga lo da'. Cadrotis riejn diajgreni yu' Jesús riädnäreni rebenracxhuu. <sup>56</sup> Niluxh cadrotis rij Jesús, nen reguedxbäz, nen reguedxro, näjza loj rerench, rguixh'reni rebenracxhuu cadro rajc guii. Dxejcti rniabreni loj Jesús te gac caanreni xhajbni, niluxh biajc guiralii renani gudajn xhajb Jesús.

## 7

*Nani runijt lastoo bejn*

*(Mt. 15:1-20)*

<sup>1</sup> Dxejcti refarisee, renani najc beñguidoo loj guedx Israel, näjza gaii rebejn ni ruluii leii, renani birii Jerusalén, bidojpreni loj Jesús. <sup>2</sup> Bahuiireni cayajw gaii rexpejn pac Jesús, luxh canii rebejn nacdXuudx naareni (dee säloj direni quiib naareni si'ctis ni rdiib naa reben lajdx'reni). Ni'cni guniyajreni rexpejn pac Jesús. <sup>3</sup> (Guiraa rebejn xten Israel, näjza refarisee, sasanäj nani baluii rebenool ni yu' guedx Israelreni. Direni gauu palga direni quiib naareni balti huält. <sup>4</sup> Che rbi'reni rijreni lo guii, rguibsa'creni naareni, lojreni, ni'reni, dxejcti rajc rajw'reni. Niluxh guyu' xhidajl costumbr ni sasanäjruren, luxh yu' mood rguibreni rextrastreni näjza rexplooreni, näjza rextrastguiibreni, näjza rexloonreni.) <sup>5</sup> Dxejc gunabdiidx refarisee näjza rebejn ni ruluii leii loj Jesús, räjpreni:

—¿Xhicuent di rexpejn paclu gun si'cni baluii rebenool, niluxh rajw'reni guideb nacdXuudx naareni?

<sup>6</sup> Dxejcti gunii Jesús lojreni räjpni:

—¡Ben guijdx! Laaca gunii Isaías xcuenttu che guniini xtidx Dios. Scree cajni loj guijtzt: Guejdxre sanälajz narä con rextiidxn, niluxh lastooreni zitra suga' loä.

<sup>7</sup> Xlia'si ruzuxhijbreni, sa'csi direni chanälajz narä.

Ruluiireni si'c xtiidx pac Dios nani rnii rebejn.

<sup>8</sup> Rusa'ntu xleii Dios, sasanädu'tztu costumbr nani baluii rebenool. Rdibsa'c rexploortu, rextrasttu, luxh rujnzatu xhidajlru cos sa' redee.

<sup>9</sup> Räjpza Jesús lojreni:



—Rusa'ntu xtidx Dios te risanäjtu recostumbr xtentu. <sup>10</sup> Sa'csi räjp Moisés: “Huinälajz xladu con xnanlu.” Räjpzani: “Suju'tpactu nani gudzubde yejc xtdni o yejc xnanni.” <sup>11</sup> Niluxh la'tu rniitu sajc gäb bejn loj xtdni o loj xnanni: “Dina gapä xhi cojn gacnäälü” (nani säloj, abadedä guira'ti loj Dios). <sup>12</sup> La'tu ditu gusaan gunru bejn por xtdni nicla por xnanni. <sup>13</sup> Si'c rbälaztu xtidx Dios, te sasanäjtu recostumbr nani ruluiitu, luxh xhidajl cos sa' dee rujntu.

<sup>14</sup> Gurejdx Jesús guiraa rebejn, dxejc räjpni loj guiraareni:

—Colcuadiajg, colyacbee xtidxä. <sup>15</sup> Rexhicos yälrajw ni rajw bejn, dini gunijt bejnğa, rediidx ni rii neñ lastoo bejn, näjza recos ni rujn bejn, ni'c runijt bejnğa. <sup>16</sup> Pal yu' chu rlanj guisieed, sucuadiajgni.

<sup>17</sup> Dxejcti gula'reni loj rebenxhidaal, biu'reni neñ yu'. Dxejc gunabdiidx rexpejn pacni loj Jesús xhi säloj cuent ni guniini. <sup>18</sup> Basejc Jesús diidx lojreni, räjpni:

—¿La näjza la'tu xheti xcäriejntu? ¿La di'tu gacbee xhitis yälrajw nani riu' neñ bejn digacdi gunijtni lastoo bejn, ä? <sup>19</sup> Sa'csi dini jiu' neñ lastooni; riu'ni xque'ni, rdejdtini.

Si'c guniini te baluiini guira'ti xhicos najc naya. <sup>20</sup> Dxejc räjpni:

—Rediidx ni rii neñ lastoo bejn, näjza recos ni rujn bejn, ni'c sii runijt lastoo bejn. <sup>21</sup> Sa'csi neñ lastoo rebejn rii rehxigabguijdx, näjza yälresnäjä chääl sa'ni, yälresnäjä ni xhet najc di chääl ni, yälругu't sa'ni, <sup>22</sup> yälгubaan, yälrlajzni ga'pni xhixhten bejn, yälлatsiaj, yälrusgueeni, yäl xheti xtuju lojni, yälrdxechlajz, yälrudzubde sa'ni, yälnayechlajzni, yälгuyalajz. <sup>23</sup> Guiraa reyälлatsiajre neñ lastoo bejn riireni, luxh reni'csi runijt bejn.

### *Tej guna Sirofenicia ni bililajz xtidx Jesús (Mt. 15:21-28)*

<sup>24</sup> Dxejc biriini ro'c, sääni nez guedx Tiro näjza nez Sidón. Ro'c bia'nni neñ te yu' sa'csi di rlanj niacbee rebejn caro yu'ni, niluxh di niajcdi niuxhiga'tztisni. <sup>25</sup> Biengajc diajg te gunaa ro'c yu' Jesús. Xindxape' gunaaga yu' bendxab neñ lastooni. Bidzujn gunaaga, bazuxhijbni lo Jesús. <sup>26</sup> Gunaaga rni griegw, najcni beñ Sirofenicia. Gunabni lojni guinibeeni guirii bendxabga neñ lastoo xi'nni. <sup>27</sup> Dxejc räjp Jesús lojni:

—Basaan gauxgaa rebiuux, sa'csi xhet laati gudzucajni xcuxtiil rebiuux te gudeednini loj rebä'cw.

<sup>28</sup> Dxejc gunii gunaaga, räjpni loj Jesús:

—Yo, Dad. Näjza rebäcue' ni suga' neñ mex rajw nani rtejb ro' rebiuux.

<sup>29</sup> Dxejcti räjp Jesús lojni:

—Laaca rnililü. Huij rolijzlu. Abirii bendxab neñ lastoo xindxape'lu.

<sup>30</sup> Luxh che bidzujn gunaare rolijzni, a dxape' naga' lo da'. Gucbegajc gunaaga abirii bendxab neñ lastoo dxape'ga.

### *Basiajc Jesús te bengop*

<sup>31</sup> Dxejcru birii Jesús stehuält lo rexyuj guedx Tiro, gudejdni nez Sidón näjza rexyuj Decápolis. Bidzujntini ro' nis xten Galilee. <sup>32</sup> Biädnä gaii bejn te niguii ni nacua't diajgni lo Jesús. Digacdiza guinisa'c niguiiga. Biäd nabreni lo Jesús nusujni naani yejc niguiiga. <sup>33</sup> Dxejcti badzucajnini loj rebejn. Baquitzgajcni rebicueñaani neñ diajgni, dxejcru batiobxhejni, gudajntini lujdxni. <sup>34</sup> Bahuiini xhaguibaa, bazaa lajzni, dxejc räjpni:

—¡Efata! —nani säloj bixal.

<sup>35</sup> Dxejcru bixalgajc rediajgni, gubangajc lujdxni, gunisa'cni. <sup>36</sup> Dxejcti gunibee Jesús rutlojdi gäbreni, per che räjpni lojreni si'c, laareni batie'chrueni diidxga.

<sup>37</sup> Rdxeloduxhreni, räjpreni:

—Guira'ti laaca rujnni; ruxhalni diajg rediagcua't, luxh rusniini regop.

## 8

*Bayaan Jesús tajp mil bejn  
(Mt. 15:32-39)*

<sup>1</sup> Nen redxejga bidojp xhidalro bejn, luxh xheti xhigauureni. Dxejc gurejdx Jesús rexpejn<sub>pacni</sub> ni rinajlni, räjpni lojreni:

<sup>2</sup> —Rulazlazä rebejn<sub>re</sub>, sa'csi naj rajc choñ dxej tre'reni loä, luxh xhet yu'di gauureni.

<sup>3</sup> Niluxh palga guxhaläreni rolizreni, xliajzreni, sidxajgreni lo nejz; sa'csi yu' renani zijtru siädreni.

<sup>4</sup> Dxejcru räjp rexpejn<sub>pacni</sub> lojni:

—¿Caro chaca'nu yätxtiil te cha xque' rebejn<sub>re</sub> ree, cadre rut rbäjzdi?

<sup>5</sup> Sas gunabdiidx Jesús lojreni:

—¿Bal yätxtiil rajptu?

Dxejcru räjpreni:

—Gajdztisni.

<sup>6</sup> Gunibee Jesús gurej reben<sub>xhidaalga</sub> loj yuj. Sas cua'ni guigajdx yätxtiilga, badeedni xquixhtios lo Dios, gu<sub>la</sub>'ni reyätxtiilga. Dxejc badeednini loj rexpejn<sub>pacni</sub> te guteedrenini loj reben<sub>xhidaal</sub>. Bateedtireni yätxtiilga lo reben<sub>xhidaalga</sub>. <sup>7</sup> Rajpzareni gaii bälbäz, dxejcti badesac Jesús xquixhtios lo Dios, gunibeeni bateedzareni rebälbäzre loj reben<sub>xhidaalga</sub>.

<sup>8</sup> Dxejc gudajwreni, gudxaj xque'reni. Dxejc batojp rexpejn<sub>pac</sub> Jesús gajdz dxijm reyätxtiil näj rebäjl dxuc ni bia'n. <sup>9</sup> Niluxh renani gudajwga najcreni si'cti tajp mil bejn. Dxejcti basadiidxnireni. <sup>10</sup> Biunägajc Jesús rexpejn<sub>pacni</sub> nen canuu, biädreni nez Dalmanuta.

*Gunab refarisee te senro loj Jesús  
(Mt. 16:1-4; Lc. 12:54-56)*

<sup>11</sup> Biäd refarisee, renani najc reben<sub>guidoo</sub> loj guedx Israel, guslojreni cayeinäjreni Jesús. Canabreni gunni te senro nani Diostis ni yu' guibaa sajc gun. Cagula'tzsireni, don xhi gunni. <sup>12</sup> Dxejcti bazaa lajz Jesús nen lastooni, räjpni:

—¿Xhicuent rlajz rebejn ni nabajn naj fii gac resenro xten Dios? Rniliäpac lojtu, di rebejn ni nabajn naj fii nicla tej sen xhaguibaali.

<sup>13</sup> Dxejcti basa'nnireni ro'c, biusacni nen canuu, sä'tini stelaad nisga.

*Levaduur xten refarisee  
(Mt. 16:5-12)*

<sup>14</sup> Biallajzreni nica'reni yätxtiil, luxh xhetliidi sanädireni. Tejtis yätxtiil nuureni nen canuu. <sup>15</sup> Cagulijdx Jesús rexpejn<sub>pacni</sub>, räjpni lojreni:

—Col<sub>susiñ</sub>, col<sub>nati</sub> levaduur xten refarisee, col<sub>natiza</sub> levaduur xten Herodes. (Nalajznu, xtiidxreni najc si'c levaduur.)

<sup>16</sup> Dxejcti cayeinäj sa'reni diidx xcuent nani gunii Jesús lojreni, dxejc räjpreni:

—Sa'csi dinu jia'p yätxtiil, ni'c rniini scree.

<sup>17</sup> Che guchee Jesús xhini'c caniireni, räjpni:

—¿Xhicuent rniitu: “Sa'csi dinu jia'p yätxtiil”? ¿La gajdtu fii, la gajdtu gacbee? ¿La laltis nacnajd lastootu? <sup>18</sup> ¿La yu' balojtu, luxh ditu fii? ¿La sojb diajgtu luxh di diajgtu jiejn? ¿La dilajztu guizaj? <sup>19</sup> Che gu<sub>la</sub>'a guigaii yätxtiil te gudajw gaii mil niguii, ¿bal dxijm yätxtiil biujy batojptu?

Sas räjpreni lojni:

—Tzubitio'pni.

<sup>20</sup> —Che gu<sub>la</sub>'a guigajdz yätxtiil te gudajw tajp mil bejn, ¿bal dxijm yätxtiil biujy batojptu?

Sas räjpreni:

—Gajdzni.

<sup>21</sup> Dxejc räjpni lojreni:

—¿La gajdtu gacbesa'c xhi benä?

*Basiajc Jesús te lotiä'p Betsaida*

<sup>22</sup> Bidzunñäj Jesús rexpejn̄pacni guedx Betsaida. Dxejc biädnäreni te lotiä'p loj Jesús, gunabreni loj Jesús caanni bejn̄ga. <sup>23</sup> Dxejc gunaazni ñaa lotiä'pga, guläänini neñ guejdx. Che batiobxhejn̄ni neñ rebaloj̄ni, basugajcni ñaani yejc baloj lotiä'pga, gunabdidxgajc Jesús:

—¿La yu' xhi rhuiilu, ä?

<sup>24</sup> Luxh che bahuii bejn̄ga räjpni:

—Rhuiä sasaj rebejn̄, luxh si'c yajg rhuiä lojreni.

<sup>25</sup> Basusac Jesús ñaani yejc rebaloj bejn̄ga. Dxejc bejn̄ Jesús bahuii bejn̄ga. Biajctini, zijtru gujc bahuisa'cni lo guiraa rebejn̄. <sup>26</sup> Dxejcti baxhañ Jesúsni rolijzni, räjpni:

—Basquejn̄, huijga rolijzlu, na'c jiu'lu neñ guejdx, na'c gäblu xhi gujclu lo rebejn̄ ni yu' neñ guejdx.

*Basule' Pedr Jesús najc Crist*

*(Mt. 16:13-20; Lc. 9:18-21)*

<sup>27</sup> Birinäj Jesús rexpejn̄pacni lo reguejdx ni ria'n nez Cesarea xten Filipo. Lañi sasajreni lo nejz räjp Jesús loj rexpejn̄pacni:

—¿Chuni'c rnii rebejn̄ nacä narä?

<sup>28</sup> Sas räjpreni loj̄ni:

—Yu'reni rnii najclu Juan ni batiobnis, yu'zareni rnii najclu Elías, yu'zareni rnii najclu te rebejn̄ ni gunii xtidx Dios.

<sup>29</sup> Dxejc räjpni lojreni:

—¿La'tu a'? ¿Chuni'c rniitu nacä narä?

Dxejc bazejc Pedr diidx, räjpni loj̄ni:

—Luj najclu Crist.

<sup>30</sup> Dxejcti räjp Jesús lojreni:

—Rutlojdi gäbtu chu nacä.

*Gunii Jesús xho guetni*

*(Mt. 16:21-28; Lc. 9:22-27)*

<sup>31</sup> Dxejcti gusloj Jesús caguluiini rexpejn̄pacni, räjpni:

—Narä nacä Xi'n Dios, ni gujc Niguii. Nanabpac tedä trabajwduxh. Sibälaz rebeñgool ni najc guxhtis neñ guedx Israel narä, najza renani rnibee loj rebixhojz, najza rebejn̄ ni ruluii leii: sugu'treni narä, luxh ni riojn̄ dxej guibañsacä lo rebeñgut.

<sup>32</sup> Guyasi guniini rediidxre. Sas huinä Pedr Jesús telaad, dxejc räjpni loj Jesús:

—Na'c guiniilu si'c.

<sup>33</sup> Dxejc batzuré loj Jesús, bahuiini loj rexpejn̄pacni. Dxejc gudilñäjni Pedr räjpni:

—Gubicaj loä, Satanás, luj dilu gun xhigab xten Dios, xhigab ni rujn rebejntis rujnlu.

<sup>34</sup> Dxejc gurejdxni rebeñxhidaal con reni najc xpejn̄pacni, räjpni lojreni:

—Palga yu' chu rlajz gac xpeñäpac, sucuääz gunni ni rsia' lajzni gunni, sutedni trabajw si'c tej ni caj lo cruiz, sujiädñajni narä. <sup>35</sup> Sa'csi nani rlajz guslaa xcälñabajñni, sunijtni xcälñabajñni. Luxh nani runijt xcälñabajñni xcälñasa'c narä, xcälñasa'c xtidxä, siliaapac xcälñabajñni. <sup>36</sup> Xlia' ga'p bejn̄ guiraloj lo guedxliujre palga nitni lo Dios par tejpas.

<sup>37</sup> Xhet gacdi gudeed bejn̄ te guibaññäjni Dios. <sup>38</sup> Nani guituinäj narä con rextidxä naj, cheni najc rebejn̄ beñdojñ, narä, Xi'n Dios nani gujc Niguii, situinäázani che jiädñää reangl xten Dios che jiälää lo xcälrdimbicha' Xtadä.

## 9

<sup>1</sup> Dxejc räjp Jesús lojreni:

—Rniliäpac lojtu, yu'reni suga' ree nani di guet fixgaareni abiääd xcäl̄rnibee Dios.

*Gubixhlo Jesús garenca*  
(Mt. 17:1-13; Lc. 9:28-36)

<sup>2</sup> Che gudejd xho'p dxej, Jesús cua' Pedr, näj Jacoob, näjza Juan, laatisreni huinäni yejc te danro. Ro'c gubixhlojni garenca lojreni. <sup>3</sup> Gusloj rdimbicha' rexbajbni, gujc xhajbni nolbäj. Rut rajcti rusquijtz lajd lo guedxliujre si'c biquijtz xhajbni. <sup>4</sup> Dxejc baluiiloj Elías näjza Moisés lojreni, cayuinäjreni Jesús diidx. <sup>5</sup> Sas räjp Pedr loj Jesús:

—Dad, laaca dxunnu ree. Naj jiennu choṅ yuguixa', tejni xtenlu, steeni xten Moisés, steeni xten Elías.

<sup>6</sup> Si'c guniini sa'csi nicla niacbeeni xhini'c guiniini, sa'csi cadxebduxhreni. <sup>7</sup> Dxejc biääd te za bejn balaa yejcreni. Neṅ zaga biejn xse' te ni räjp:

—Dee najc xi'nä nani sanälazä, colcuadiajg xtiidxni.

<sup>8</sup> Che batzuré lojreni, bahuiireni rutru suganäjti Jesús, xtebtis Jesús suga'.

<sup>9</sup> Che siädjiäjtreni dajnga, gunibee Jesús rut lojdi guiniireni xcuent ni bahuiireni, guibaṅxgaasi Xi'n Dios nani gujc Niguui lo rebeṅgut. <sup>10</sup> Basälcheereni rediidxre neṅ lastooreni. Dxejcru canabdiidx lo sa'reni xhicha säloj guibaṅsacni lo rebeṅgut. <sup>11</sup> Sas gunabdiidxreni lojni, räjpreni:

—¿Xhicuent rni remastr xten leii naquuinpac jiädxgaa Elías?

<sup>12</sup> Dxejcti bazejcnä diidx lojreni, räjpni:

—Guliireni siädxgaapac Elías, luxh sunsa'cni guira'ti xhi cos. Naj a', ¿xhicuent caj lo guijtz xcuent Xi'n Dios ni gujc Niguui, sidejdni trabajwduxh, rutza jüudini? <sup>13</sup> Luxh narä rniä lojtu, abiääd Elías, luxh bennäjrenini si'ctis ni rlajzreni, si'cpac ni caj loj guijtz ni rusule' xcuentni.

*Basiajc Jesús te biuux ni guyu' bendxab neṅ lastooni*  
(Mt. 17:14-21; Lc. 9:37-43)

<sup>14</sup> Che asiäädreni cadro tre' sgaii rexpejṅpac Jesús, bahuiireni loj xhidalro bejn ni tre' lojreni, luxh cayeinäj rebejn ni ruluii leiireni. <sup>15</sup> Che bahuii guiraa rebejn loj Jesús, bidxeloduxhreni, baxunreni, huiye'tzreni xchan lojni. <sup>16</sup> Dxejc gunabdiidx Jesús lojreni:

—¿Xhini'c rusieinäjtu laareni?

<sup>17</sup> Sas gunii tej reni yu' lo beṅxhidaalga, räjpni:

—Dad, ree siädnää xi'nä lojlu, yu' bendxab neṅ lastooni, nani rujn najcni gop. <sup>18</sup> Cheni rniaaznini, rutienta'ni xi'nä, luxh riduxh bitzuṅ ro'ni, näjza rauya'ni ro'ni, luxh cabijdzni. Aräpä loj rexpejṅpacu cuääreni bendxabga, niluxh di niajcdi nibäärenini.

<sup>19</sup> Dxejcti gunii Jesús lojreni, räjpni:

—La'tu, bejn ni di chalilajz, ¿gucli chu'ä lojtu te chalilajztu? ¿Gucli gusieedtu narä? ¡Coltanäni loä!

<sup>20</sup> Dxejc biädnäreni biuuxga lojni. Che bahuii bendxab lo Jesús, basnijni bi'nga, basälta'tinini lo yuj. Sädiidxni, luxh carii bitzuṅ ro'ni. <sup>21</sup> Gunabdiidx Jesús loj xtadni:

—¿Gucli rajcni si'c?

Dxejc räjp dade'ga:

—Che gujclini biuxbäz. <sup>22</sup> Balti huält rusäl̄nini lo guiboo näjza lo nis te ju'tnini. Palga yu' xhi gac gunlu, balazlajz nuunu, gucnäj nuunu.

<sup>23</sup> Sas räjp Jesús lojni:

—¿Xhicuent rniabdiidxlu la sajc gacnäälü? Xhitis sajc gac par nani rililajz.

<sup>24</sup> Guredxa' xtad bi'nga, räjpni:

—¡Rililazä! Gucnäj narä te chaliiru lazä.

<sup>25</sup> Che bahuii Jesús bixa't xhidajl bejn lojni, gudidxa'ni lo bendxabga räjpni lojni:

—Bendxab ni rujn gop, narä canibeä, birii neṅ lastoo bi'nga. Na'cru chulu neṅ lastooni.

<sup>26</sup> Dxejcru guredxa' beṇdxabga, luxh basnibzejsni bi'nga, dxejcru biriini neṇ lastooni. Astoo te beṇgut bia'n bi'nga ro'c. Xhidajl rebejn räjp:

—Agujtni.

<sup>27</sup> Dxejc gunaaz Jesús naa bi'nga guläsnini. Guzuliiti bi'nga. <sup>28</sup> Dxejcti che abiu' Jesús neṇ yu', gunabdiidx rexpejṇpacni lojni:

—¿Xhicuent di niajcdi nibäänu beṇdxabga?

<sup>29</sup> Dxejc räjp Jesús lojreni:

—Di gacdi cuäätu sa' beṇdxabre palga ditu cuedx-guinab lo Dios, palga ditu gucuanxgaa.

### *Gunisac Jesús xho guetni*

*(Mt. 17:22-23; Lc. 9:43-45)*

<sup>30</sup> Dxejc biriireni ro'c, gudejdreni Galilee. Luxh di rlajz Jesús niacbee rebejn sadejdreni nejzga, <sup>31</sup> sa'csi caguluiini rexpejṇpacni. Cayäjpni lojreni: “Xi'n Dios ni gujc Niguii sidejdni ladzṇaa rebejn, niluxh sugu'trenini. Che guiza' choṇ dxej gujtni, sibajṇni stehuält.” <sup>32</sup> Niluxh laareni direni niacbee xhini'c guniini, bidxejzbareni niniabdiidxreni lojni.

### *¿Chuni'c sajcru?*

*(Mt. 18:1-5; Lc. 9:46-48)*

<sup>33</sup> Bidzujṇtirenini Capernaum. Che biu'ni neṇ yu' räjpni lojreni:

—¿Xhini'c cagusiejytu lo nejz?

<sup>34</sup> Dxejc xhet guniitireni, sa'csi laareni cagusieinäj sa'reni lo nejz don chuni'c sajcru lojreni. <sup>35</sup> Sas gurej Jesús, dxejc gurejdxni guitzubitio'p xpejṇpacni, räjpni lojreni:

—Palga yu' chu rlajz gasajcru lojtu, sugacxgaani si'c te nani xhet sajcti, sugunzani xtzuun chutis.

<sup>36</sup> Dxejcti cua'ni tej biuxbäz, huinänini galäiireni. Dxejc gudääzni biuxbäzga, räjpni lojreni:

<sup>37</sup> —Chutis ni gacnäj te rebiuxe're sa'csi rinälajzni narä, sacnäjni narä, luxh nani gacnäj narä, xhet narätis gacnäjtini, näjza xtadä nani baxhaḷ narä racnäjni.

### *Nani di guiniyaj nuunu, xladnu yu'ni*

*(Lc. 9:49-50; Mt. 10:42)*

<sup>38</sup> Dxejcti gunii Juan räjpni lojni:

—Bahuiinu lo te bejn ni rbää beṇdxab con xcälṇnibee lajlu, niluxh dini sanäj nuunu. Sas huiye'tznu lojni na'c gunni si'c sa'csi dini sanäj nuunu.

<sup>39</sup> Dxejc räjp Jesús lojni:

—Na'c gudxojntu gunni si'c sa'csi bejn nani rujn milagwr con xcälṇnibee laä digacdi guiniyagajcni narä. <sup>40</sup> Nani di guidxagdijḷ nuunu, xlaadnu yu'ni. <sup>41</sup> Rniliäpac lojtu, chutis ni guniidx te bas nis lojtu sa'csi najctu xpejṇpac Crist, siguijx Diosni xcuent nani bejnini.

### *Nani rujn jiajb bejn lo dojl*

*(Mt. 18:6-9; Lc. 17:1-2)*

<sup>42</sup> Chutis ni gusiu' tej rebiuxe' ni rililajz narä neṇ dojl, sugaḷ te guimolin yejnni dxejcti gucuaarenini lo nisdoo. <sup>43</sup> Palga tej naalu gun gunlu dojl, batiu'ni: hueenru natiujnglu chaläjzlu cadre yu' Dios quela sojb guiro'p naalu gusälreni luj gabijl, loj bajl ni di jiuui, <sup>44</sup> cadre diza xpisiujgreni guet, diza bajl jiuui. <sup>45</sup> Luxh palga tej ni'lu gun gunlu dojl, batiu'ni: hueenru natiujnglu chaläjzlu cadre yu' Dios quela sojb guiro'p ni'lu luxh chäälu gabijl, lo bajl ni di jiuui, <sup>46</sup> cadre di xpisiujgreni guet, diza bajl jiuui. <sup>47</sup> Luxh palga tej balojlu gun gunlu dojl, gulääni: hueenru chäälu cadre rnibee Dios natiä'p lojlu quela sojb guiro'p balojlu chäälu gabijl, <sup>48</sup> cadre di xpisiujgreni guet, diza bajl jiuui.



<sup>49</sup> 'Si'cni rloj sejd yejc xhi cos yälrajw, si'cza guiloj bajl yejc guiraareni. Guilojza sejd lo guira'ti ni rdeed bejn lo Dios. <sup>50</sup> Hueen najc sejd, luxh palga agudejd yäl<sub>n</sub>adzij yej<sub>n</sub>ci, ¿xho guntu te gacsacni nadzij? Colyajc nadzij la'tu, colguiba<sub>n</sub>näsa'c sa'tu.

## 10

### *Baluu Jesús xcuent rälrur'o'n sa'ni* (Mt. 19:1-12; Lc. 16:18)

<sup>1</sup> Dxejcru birii Jesús ro'c huijni nez Judea näjza nez ro' gueu Jordán stelaad. Ro'c bidojp xhidajl bejn lojni stehuält, sas guslosacni caguluiinireni si'ctis ni ruluiinireni. <sup>2</sup> Sas refarisee, renani najc rebenguidoo loj guedx Israel, gubigreni loj Jesús, cagula'tzreni Jesús. Ni'c gunabdiidxreni, räjpreni:

—¿La laaca gun niguii gusaan chäälni, ä?

<sup>3</sup> Dxejc laani bazej<sub>n</sub>ci diidx, räjpni lojreni:

—¿Xhini'c gunibee Moisés guntu?

<sup>4</sup> Dxejcru räjpreni:

—Moisés basaan gudeedni te guitz gusaan chäälni che guro'nmini.

<sup>5</sup> Dxejc Jesús räjp lojreni:

—Sa'csi guyaa lajztu, ni'cni bacuaa Moisés diidxga lojtu. <sup>6</sup> Niluxh che birixtiej ben guedxliuj, “niguii con gunaa benchee Diosreni.” <sup>7</sup> “Ni'cni te niguii siriini loj x<sub>t</sub>adni, loj xnanni te cuäznäj<sub>n</sub>i chäälni. <sup>8</sup> Niluxh renani gujc tiop bejn sajcreni si'c tejsi bejn”, dirureni gac tiop bejn, si'c tejsi bejn gacreni. <sup>9</sup> Na'c gudzucaj bejn lo sa bejn<sub>n</sub>i nani abachaag Dios lo sa'ni.

<sup>10</sup> Che biu'reni ne<sub>n</sub> yu' gunabdidxsac rexpejn<sub>n</sub>pacni lojni xcuent rediidxre. <sup>11</sup> Dxejc räjpni lojreni:

—Chutis niguii ni gusaan chäälni, sas guch<sub>n</sub>aani ste'cani, ruj<sub>n</sub>ni dojl. <sup>12</sup> Niluxh palga gunaa guro'n chäälni sas guch<sub>n</sub>aani ste'ca niguii, ruj<sub>n</sub>zani dojl.

### *Gunab Jesús gunle' Dios yejc rebiuxbäz* (Mt. 19:13-15; Lc. 18:15-17)

<sup>13</sup> Biäd<sub>n</sub>äza rebejn biuxbäz lojni te gutzuub Jesús <sub>n</sub>aani yejcreni, sas gudidxa' rexpejn<sub>n</sub>pacni lojreni. <sup>14</sup> Che bahuii Jesús xhi cayujn rexpejn<sub>n</sub>pacni, bidxe'chni räjpni lojreni:

—Colsaan jääd rebiuxbäz loä. Na'c gudxo<sub>j</sub>ntureni, sa'csi xcäl<sub>r</sub>nibee Dios najc xten reni najc nadolajz si'c najc biuxbäz. <sup>15</sup> Rniliäpac lojtu, chutis ni rlajz jiu' lo xcäl<sub>r</sub>nibee Dios nanab guzobdiajg<sub>n</sub>reni xtidx Dios si'c ruzobdiajg rebiuxe' xtidx x<sub>t</sub>adreni. Palga dini gun si'c, dini jiu' lo xcäl<sub>r</sub>nibee Dios.

<sup>16</sup> Dxejcti gudääz Jesús rebiuxbäz, bazujzani <sub>n</sub>aani yejcreni, gunab Jesús gunle' Dios yejcreni.

### *Te bi'n ni rapduxh guninäj Jesús* (Mt. 19:16-30; Lc. 18:18-30)

<sup>17</sup> Che birii Jesús loj xnejz<sub>n</sub>i, ruxu<sub>n</sub> te niguii biääd lojni, bazuxhijbni. Dxejcti gunabdiidx niguiiga lojni räjpni:

—Dad, be<sub>n</sub>sa'c, ¿xhini'c gunä te xca'ä yäl<sub>n</sub>abaj<sub>n</sub> par tejpas?

<sup>18</sup> Sas räjp Jesús lojni:

—¿Xhicuent rniilu loä be<sub>n</sub>sa'c? Tejtisni najc be<sub>n</sub>sa'c; Diostis najc be<sub>n</sub>sa'c. <sup>19</sup> Najnlu xhini'c gunibee Dios gunni: “Na'c guesnäjl<sub>u</sub> chäälni sa'lu, na'c ju'tlu, na'c cuanlu, na'c gusgueelu chutis, na'c cuääl<sub>u</sub> yejc xhixten sa'lu, huinä<sub>l</sub>ajz x<sub>t</sub>adlu, xnanlu.”

<sup>20</sup> Dxejc räjp niguiiga lojni:

—Dad, guiraa redee cayunä cheni gucäli bi'n.

<sup>21</sup> Che bahuii Jesús lojni, huinä<sub>l</sub>ajznini, räjpni lojni:

—Tejtis nani cayäädx gunlu. Huij, huito' guiraa xhixtenlu, badeed xcuentni loj rebejn nani diga'p, dxejcti guniidx Dios xhidajl xhi ga'plu xhaguibaa. Gudanajl narä, mase tedlu trabajw.

<sup>22</sup> Dxejc che biejn diajgni diidxre, guc-huin lajzni, xhet laadi yu'ni siini, sa'csi naclenduxh xhixtenni yu'.

<sup>23</sup> Dxejc bahuii Jesús guideb gabi lojreni, räjpni loj rexpejn pacni:

—Naganduxh jiu' rebejn nani yu'duxh xhixtenni lo xcälrnibee Dios.

<sup>24</sup> Dxejc bidxelo rexpejn pacni che biejn diajgreni rextiidxni. Dxejc räjp Jesús lojreni stehuält:

—¡Aiitu xi'näl, lacti naganduxh gusaan renani sanälajz xhixtenni guinibee Diosreni.

<sup>25</sup> Guyasiru ted te cameii ni' te guux quela gusaan te bejn ni yuduxh xhixtenni guinibee Diosni.

<sup>26</sup> Dxejc bidxeloduxh reni, räjpreni lojni:

—¿Chuxhni'c sajc laa lo dojl?

<sup>27</sup> Dxejc bahuii Jesús lojreni, räjpni:

—Bejn digacdi guslaa sabejn ni, Diostis rajc ruslaa bejn lo dojl, sa'csi Dios rac rujn guira'ti.

<sup>28</sup> Sas gusloj Pedr cayäjp lojni:

—Naj nuure ahuilälaznu guira'ti te siopnajl nu luj.

<sup>29</sup> Dxejc räjp Jesús:

—Rniliäpac lojtu, chutis nani cuälaz rolijzni, rebejtzni, rebisiajn ni, xtadni, xnanni, chäälni, rexi'nni, rexyujni, xcäl'nasa'c narä, näjza xcäl'nasa'c xtidx Dios, <sup>30</sup> sica'ni lo guedxliujre te gayuu huält xhidajl ru. Sica'ni rolijzni, rebejtzni, rebisiajn ni, xnanni, rexi'nni, rexyujni. Sisiunajlrenini naj, dxejc xhaguibaa sica'ni yäl'nabajn par tejpas. <sup>31</sup> Xhidajl rebejn nani sajc lo guedxliujre xhet sajc direni xhaguibaa; niluxh rebejn nani xhet sajc di lo guedxliujre, xhaguibaaru gasajc reni.

### *Gunisac Jesús diidx xho guetni*

*(Mt. 20:17-19; Lc. 18:31-34)*

<sup>32</sup> Dxejcru sasaj Jesús, nijdni lo rexpejn pacni sääreni Jerusalén, luxh cadxelojreni. Cadxejbza rebejn nani sanajlreni. Dxejcti guläsac Jesús rexpejn pacni lo rebejn, gusloj cayäjpni lojreni guira'ti nani sacni. <sup>33</sup> Räjp Jesús:

—Sionnu Jerusalén, luxh narä, Xi'n Dios nani gujc Niguii, sidedä ladznaa rebixhojz nani rnibee näjza rebejn ni ruluii leii. Luxh sinibeereni guetä. Suteedreni narä lo rebenzajt nani digac xpejn Israel. <sup>34</sup> Suxhisnäjreni narä, siguijnreni narä, sutiobxhejn-zareni loä, dxejcru sugu'treni narä. Che riojn dxej sibañsacä.

### *Gunab Jacob näjza Juan te yäl'nasa'c*

*(Mt. 20:20-28)*

<sup>35</sup> Dxejcti gubig Jacob näjza Juan, rexi'n Zebedeo, räjpreni lojni:

—Dad, rlaaznu gunlaalu nani guiniabnu lojlu.

<sup>36</sup> Dxejc räjp Jesús lojreni:

—¿Xhini'c rlajztu gunä xcuent la'tu?

<sup>37</sup> Räjpreni:

—Cue tejnu cuä'lu ladbee, xteenu cue cuä'lu ladbäjgw che acanibeelu.

<sup>38</sup> Dxejc räjp Jesús lojreni:

—Ditu gan xhini'c rniabtu. ¿Xhixh sajc yätu nani yä'ä? ¿Xhixh sajcza guirobnistu si'cni guirobnisä? Nalajznu, xhixh sajc tedtu trabajw nani tedä narä.

<sup>39</sup> Sas räjpreni lojni:

—Sajc tednuni.

Dxejc räjp Jesús lojreni:

—Guliini sajc yätu nani yä'ä, luxh guirobnistu si'cni guirobnisä narä. <sup>40</sup> Te cue tejtu ladbee xtenä steetu cue xladbägwä, xhet xtenä dini te gunidxäni. Rebejn nani agule Dios, reni'c cue xladbeä, xladbägwä.

<sup>41</sup> Luxh che biejn diajg stzuureni bidxe'chreni loj Jacob näjza loj Juan. <sup>42</sup> Sas gurejdx Jesúsreni, räjpni lojreni:

—La'tu najntu renani rnibee lo rebejn nani digac xpejn Israel, rdxaglaz gasajcrueni lo rebejn. Luxh rebejn ni sajc rnibeduxhreni lo rebejn. <sup>43</sup> Xhet si'cni guntu la'tu. Chutis nani rlajz gasajcru lojtu, riäjł gacni mos lojtu. <sup>44</sup> Luxh chutis la'tu nani rlajz gasajcru, riäjł gacni xmos guiraatu. <sup>45</sup> Di Xi'n Dios ni gujc Niguii niääd, te ga'ptisni mos, biäädzani te quiixni con xcäl'nabajni te laa xhidajł bejn lo dojl.

### *Basiajc Jesús Bartimeo, ni natiä'p lojni*

*(Mt. 20:29-34; Lc. 18:35-43)*

<sup>46</sup> Dxejcti biäädreni Jericó. Che birii Jesús ro' guedx Jericó con rexpejnpacni näjza rebenxhidaal, cuä' nezyuj sobga' Bartimeo, xi'n Timeo. Natiä'p lojni. Ro'c cabäani gojn.

<sup>47</sup> Che biejn diajgni laa Jesús ni siääd Nasare't ni sadejd ro'c, guslojni rbedxa'ni, räjpni:

—Jesús, xi'n David, balazlaz narä.

<sup>48</sup> Xhidajłreni gudidxa' lojni, te jiäuu ro'ni. Dxejc laani dipru rbedxa'ni räjpni:

—Xi'n David, balazlaz narä.

<sup>49</sup> Dxejc guzudxi Jesús, gunibegajcni gucrejdx niguiiga.

Gurejdxreni lotiä'pga, räjpreni lojni:

—Basutijp lajzlu, gusulii, luj cabejdxni.

<sup>50</sup> Sas ro'ca xhablazni gudixhni, huisuliini, biäädtni lo Jesús. <sup>51</sup> Dxejc räjp Jesús lojni:

—Naja', ¿xhini'c rlajzlu gunä?

Dxejc räjp lotiä'pga loj Jesús:

—Dad, rlazä gunlu fiä.

<sup>52</sup> Dxejcti räjp Jesús lojni:

—Huij, abiajclu sa'csi rililajzlu.

Lagajc dxejc gujc bahuiini. Sanajłtini Jesús lo nejz.

## 11

### *Biu' Jesús Jerusalén*

*(Mt. 21:1-11; Lc. 19:28-40; Jn. 12:12-19)*

<sup>1</sup> Cheni sadzujnreni gajxh Jerusalén, gudejdreni neņ reguedx Betfagé näjza neņ guedx Betania nez cuä' dajne' ni laa dan Oliib. Baxhal Jesús tiop xpejnpacni, <sup>2</sup> räjpni lojreni:

—Colchäj guedxe' ni ria'n nez lojtu. Che guidzujntu ro' guejdxga, sidxälu te bure' ni caduu. Gajd bejn cuibni. Colxhečni, coltanägajcni. <sup>3</sup> Palga yu' chu naa lojtu: “¿Xhicuent rujntu si'c?” Colye'tztis: “Dad caquiinni.” Dxejc suxhalgajcni bure'ga ree.

<sup>4</sup> Säätireni ro'c. Dxejcru ronejz bidxälreni te bure' caduu ro' te lä'. Dxejcti baxhecrenini.

<sup>5</sup> Gaii bejn ni tre' ro'c räjp lojreni:

—¿Xhicuent caguxhectuni?

<sup>6</sup> Dxejc räjpreni loj rebejnga si'cni räjp Jesús lojreni gäbreni. Basangajc rebejnga sanäreni bure'ga. <sup>7</sup> Dxejcru biädnäreni bure'ga loj Jesús. Badzuubreni xhablazreni dejtz bure'ga. Gubijbti Jesús bure'ga. <sup>8</sup> Xhidajłza bejn gudixh xhablazreni lo nezyuj, sgaiireni gudi'ch balajg lo reyajg te gudixhrenini lo nezyuj.

<sup>9</sup> Rebejn ni nijd lojni näj reni sanajł dejtzn guredxa'reni, räjpreni:

—¡Colguiliä'p xpala'nni! Coldeed xquixhtiooz loj Dios sa'csi baxhalni nani siääd xcuentni. <sup>10</sup> Coldeed xquixhtiooz loj Dios sa'csi agubiré xcäl'rnibee toxtadnu David. ¡Colguiliä'p xpala'n Dios ni yu' jiaro!

<sup>11</sup> Dxejcti biu' Jesús nen̄ guedx Jerusalén. Biu'zani nen̄ guidoro. Che bahuii Jesús guira'ti ni cayajc nen̄ga, san̄ani guitzubitio'p xpejn̄pacni, sääreni Betania sa'csi agudxej.

*Batzubde Jesús yejc te yagiigw ni xhet cajdi lojni*  
(Mt. 21:18-19)

<sup>12</sup> Che bara yääl, biunejzreni Betania. Dxejcti gusloj calaan Jesús, <sup>13</sup> bahuiini zijt sojb te yag iigw caj balajg lojni. Sas gubigni, bahuiini don gaxäjsi caj iigw lojni. Xhet bidxäldini lojni; balajgtis caj lojni, sa'csi xhet xtiempdi iigw dxejc. <sup>14</sup> Sas gunii Jesús räjpni loj yag iigwga:

—Rutru gauudi ninejxh ni rcaj lojlu par tejpas.  
Biejnza diajg rexpejn̄pacni.

*Gulää Jesús renani ruto' näj renani rsii nen̄ guidoo*  
(Mt. 21:12-17; Lc. 19:45-48; Jn. 2:13-22)

<sup>15</sup> Dxejcti bidzujn̄reni guedx Jerusalén. Biu' Jesús nen̄ guidoro. Gusloj cabääni renani ruto' näj renani rsii nen̄ guidoo. Niluxh batiejxhni rexmex renani ruchaa meel, näjza reyagxhil xten renani ruto' paloom. <sup>16</sup> Diruni nusaan nidednäjn̄reni xhicos nez nen̄ guidoo. <sup>17</sup> Dxejc caguluiinireni, räpgajcni lojreni:

—¿La et screedi caj loj guijt? “Xyu'ä sirilaj yu' cadro rninab guiraa rebenguedxliuj lo Dios.” La'tu abejntuni si'c xpiliää gubaan.

<sup>18</sup> Rebixhojz ni rnibee näjza remastr xten leii biejn diajgreni nani gunii Jesús. Sas gudiilreni xho ju'trenini, sa'csi rdxejbreni Jesús, sa'csi guiraa rebejn̄ rdxeloy rextidx Jesús. <sup>19</sup> Che biu' guxhijn̄, birii Jesús guejdxga.

*Gubijdz yagiigw ni bidzubde*  
(Mt. 21:20-22)

<sup>20</sup> Che bara yääl gudejdreni, bahuiireni agubijdz guideb yagiigw, näj rexlobaani.  
<sup>21</sup> Dxejc banaj lajz Pedr, räjpni loj Jesús:

—Dad, bahuii yagiigw nani batzubdelu yejcn̄i, agubijdzni.

<sup>22</sup> Dxejcti gunii Jesús räjpni lojni:

—Colchalilajz Dios. <sup>23</sup> Rniliäpac lojtu, chutis nani gäb loj dajnre: “Gubicaj, bitejb loj nisdoo”, luxh dini guntio'p lajzni, chalilajztisni scree gac nani guniini, sajcpac nani guniini. <sup>24</sup> Ni'cni rniä lojtu, xhitis nani guiniabtu lo Dios che rninäjtuni, colchalilajz xca'tuni, dxejc sica'tuni. <sup>25</sup> Luxh che guiniabtu Dios, palga yu' chu loj rdxechlajztu, colsiäjzla lajztu, te näjza Xtadtu nani yu' xhaguibaa gusiäjzla rextojl̄tu. <sup>26</sup> Palga ditu gusiäjl̄ lajztu con resa'tu, diza Xtadtu nani yu' xhaguibaa gusiäjl̄ lajzni rextojl̄tu.

*Yälrnibee xten Jesús*  
(Mt. 21:23-27; Lc. 20:1-8)

<sup>27</sup> Sas bidzun̄sacreni guedx Jerusalén. Lał ni sasaj Jesús nen̄ guidoro, rebixhojz nani rnibee, näjza rebejn̄ ni ruluii leii, näjza reguxhtis gubig lojni. <sup>28</sup> Räjpreni lojni:

—¿Xhi yälrnibee rajplu, ni'c rujnlu redzuunre? ¿Chu baniidx yälrnibee rujnlu redzuunre?

<sup>29</sup> Dxejc räjp Jesús lojreni:

—Guiniabdidxäza lojtu. Coltzu'ni loä, dxejcti guiniäza xhi yälrnibeere rapä ni'c runä redzuunre. <sup>30</sup> ¿Chu baxhal Juan ni batiobnis? ¿La Dios o la rebejn̄? Colnii loä naj.

<sup>31</sup> Dxejcti gunii loj sa'reni, räjpreni:

—Palga jie'tznu “Dios”, naani “¿xhicuent ditu nililajz xtiidxn̄i?” <sup>32</sup> Diza niacti niäjbreni “rebejn̄” sa'csi rdxejbreni reben̄xhidaal, sa'csi guiraa rebejn̄ huililajz Juan gujc te bejn̄ ni guniipac xtidx Dios.

<sup>33</sup> Dxejcti guniireni, räjpreni loj Jesús:

—Dinu guidon.

Sas räjp Jesús lojreni:

—Dizana guiniä xhi yälrnibeere rapä runä redzuunre.

## 12

*Te xcuent reben<sub>g</sub>uijdx ni rbäzlaa*  
(Mt. 21:33-46; Lc. 20:9-19)

<sup>1</sup> Dxejcti gusloj caguseed Jesús rebejn con recuent ni rului, räjpni:

—Yu' te bejn bazuj yaguub loj xyujni, bejnzani bazaani, dxejcru gudäänni te lajt cadro jiä't uubga. Dxejcti bejn ni te yu' jiaa, te ro'c cue nani ga'p lo xyujni.

'Badedlaatinini loj gaii bejn, sä'tini zijt. <sup>2</sup> Che bidzujn xpäii uub, baxhal baxhuaan uubga te xmosni loj rebejn ni rbäzlaa ro'c, te xca'ni uub nani riäj l xca' bejn ga. <sup>3</sup> Dxejc rebejn ni rbäzlaa ro'c gunaazreni mosga, gudijnrenini, luxh bazejcrenini siini ganaxni.

<sup>4</sup> Dxejcru baxhal baxhuaanga stee mos lojreni. Niluxh laareni bacuaareni guijni, gudilguijdxreni yejc mosga, xho rniajni gubi'ni. <sup>5</sup> Dxejc baxhal bejn ga stee mos, dxejc bagu'trenini. Baxhal ni xhidajlrurenini. Gaii gudilguijdxreni, sgaiani bagu'treni.

<sup>6</sup> 'Yu'za tejtis xi'nni, luxh sanälajznini. Por lult näjza xi'nni baxhal ni, naani: "Siucareni xi'nä." <sup>7</sup> Dxejc rebejn nani rbäzlaa ro'c räjp loj sa'reni: "Dee najc laa ni jiannäj ree. Coltaa, guigu'tnuni, te xca'nu yujre." <sup>8</sup> Sas gunaazrenini, bagu'trenini. Guläätirenini lo yujga.

<sup>9</sup> '¿Xhicha gun baxhuaan yaguubga rebejn re? Siädni luxh sugu'tni rebejn re, dxejcti gudeedni yujga loj ste'ca bejn.

<sup>10</sup> '¿La gajdtu gol guijtz ni rnii scree?

Guij nani guläcaj renani runchee yu',  
ni'c agujc mastr ni guzuj galoo.

<sup>11</sup> Dad xtennu bejn scree, cos sacduxhni nezlojnu.

<sup>12</sup> Dxejc rlaiz reguxhtis nani bacuadiajg cuentre niniaaz Jesús, sa'csi gucbeereni laareni cacuaa Jesús diidxre. Sa'csi bidxejbreni rebenxhidaal, ni'c basa'nrenini, sä'tireni.

*Diidx xcuent reimpuest*  
(Mt. 22:15-22; Lc. 20:20-26)

<sup>13</sup> Dxejcti baxhalreni gaii xpejn refarisee näjza gaii xpejn Herodes loj Jesús te gula'tzreni don xho gac guiniaazreni Jesús. <sup>14</sup> Dxejcti biädreni, räjpreni lojni:

—Dad, nadonnu luj najclu te bejn ni rnili. Par luj guiraasi bejn sajc tebloj, sa'csi dilu fii la sajc bejn o la xhet sajc di bejn. Luj rului paclu xhini'c rlaiz Dios gun bejn. ¿La laaca quiix bejn reimpuest lo xcubieer César o la xhet laadi? ¿La guidiixnu o la dinu guidiix?

<sup>15</sup> Dxejcti laani gucbegajcni rujnsireni si'cni rniabdiidxreni. Räjpni lojreni:

—¿Xhicuent runnäjtü narä scree? Coltanä te meelga loä, te fiä lojni.

<sup>16</sup> Badeedtireni te meel lojni, dxejc räjpni lojreni:

—¿Chu yejc caj lojni, chu laj caj lojni?

Dxejc räjpreni:

—Xten César.

<sup>17</sup> Dxejc räjp Jesús lojreni:

—Coldeed nani najc xten César loj César; coldeedza nani najc xten Dios loj Dios.

Baschelojni rebejn ga con xtiidxni.

*Yälrnabiidx xcuent yälrbansacni lo reben<sub>g</sub>ut*  
(Mt. 22:23-33; Lc. 20:27-40)

<sup>18</sup> Sas biädhuui resaducee loj Jesús. Resaducee najc rebejn nani rnii di reben<sub>g</sub>ut guibansac. Dxejc gunabdiidxreni lojni, räjpreni:

<sup>19</sup> —Dad, xleii Moisés rului loonu, palga guet te nigui luxh gusa'nni chäälni ruti xi'nni, nanabpac xca' bejtzni chäälni, te chu xi'nni con laani lacua niu' xi'n tobejtzni.

<sup>20</sup> Guyu' gajdz niguii, bejtz najcreni. Sas cua' niguigalooga chäälni. Che gujtni ruti xi'nni.

<sup>21</sup> Dxejcti cua' ni roj pga gunaaga. Che gujtni, rut gajcdi xi'nni. Si'cza gusajc ni riojnga.



<sup>22</sup> Si'cza guläznäj gunaaga guigajdzreni. Per nicla tej reni di xi'nreni niu'. Dxejcti gujtza gunaaga. <sup>23</sup> Guigajdzreni guläznäjreni gunaare. Cheni guibaṅsacreni lo rebeṅgut, ¿chu cháäl gacni?

<sup>24</sup> Dxejc bazejc Jesús diidx lojreni, räjpni:

—Et laadi rniitu, sa'csi ditu gumbesa'c rextidx Dios nani bacuaa reniguii lo guijtza, dizatu gumbee yälrnibee xten Dios. <sup>25</sup> Che guibaṅsacreni loj rebeṅgut, direni guchṅaa, rutza gudeedtireni te guchṅaareni. Niluxh sajcreni si'c najc rexangl Dios nani yu' xhaguibaa. <sup>26</sup> Palga canabdiidxtu la rbaṅsac rebeṅgut, ¿la di lajztu guisaj biltu guijtza ni bacuaa Moisés? Moisés bacuaa nani gunii Dios lojni neṅ bajl, räjpni: “Narä nacä Xtios Abraham, Xtios Isaac, Xtios Jacob.” <sup>27</sup> Palga Dios najc Xtios rebejṅre, direni gac beṅgut, nabaṅnäjreni Dios. Et laadi najc xhigabtu.

### *Yälrnibee ni sajcrú*

*(Mt. 22:34-40)*

<sup>28</sup> Dxejcrú bidzujṅ tej rebejṅ ni najn leii, biejn diajgni xhi caniireni, biejnza diajgni laaca gunii Jesús lojreni. Dxejcti gunabdiidxni loj Jesús:

—¿Xhi mandamient sajcrú lo guiraareni?

<sup>29</sup> Dxejc räjp Jesús lojni:

—Mandamient nani sajcrú loj guiraareni najc dee: “Bacuadiajg luj, guejdx xten Israel, Dad Xtiosnu, Dad tejtis najcni. <sup>30</sup> Chanälajzlu Dad Xtioslu guideb lastoolu, naj xaimlu, naj guideb xcäriejṅlu, najza guideb xcälṅadiplajzlu.” <sup>31</sup> Sigajcza najc mandamient ni rojpga: “Huinalajz sabejṅlu si'ctis sanälajzlu lagajc luj.” Redee najc remandamient nani sajcrú loj guiraareni.

<sup>32</sup> Dxejcti räjp bejṅga ni najn leii lojni:

—Laaca guniilu Dad. Tejtis najc Dios, luxh ruti chu stee najc si'c laani. <sup>33</sup> Luxh sacduxh chanälajz bejṅ Dios guideb lastooni, naj xcäriejṅni, najza xaimni, naj guideb xcälṅadiplajzni, luxh chanälajzni resabejṅni sigajc laani. Redee sajcrú loj ni rujṅ bejṅ che rudeedreni gojṅ lo Dios.

<sup>34</sup> Che bahuii Jesús laaca guniini, räjpni lojni:

—Guxii cayädx te jiu'lu loj xcälrnibee Dios.

Sas rutru biajxhdi gunabdiidx loj Jesús.

### *Chu xi'n najc Crist*

*(Mt. 22:41-46; Lc. 20:41-44)*

<sup>35</sup> Che caguseed Jesús neṅ guidoro, räjpni:

—¿Xho mood rnii rebejṅ ni najn leii Crist najc xi'n David? <sup>36</sup> Sprit Dxan xten Dios basnii David che bacuaani:

Räjp Dios loj Dad xtenä:

“Gurej ladbee xtenä, che gudzugäli reni rdxe'ch lojlu.”

<sup>37</sup> Palga lagajc David räjp: “Dad, xtenä”, che guniini xcuent Crist, ¿xhoxh najc Crist xi'n David?

Rebeṅxhidaal nani yu' guejdxga bacuadiagsa'creni xtiidxni.

### *Gule'c Jesús xquej remastr xten leii*

*(Mt. 23:1-36; Lc. 11:37-54; 20:45-47)*

<sup>38</sup> Lalni caguseedni rebejṅ, räjpni lojreni:

—Colṅsusin, na'c gu'chtu loj rebejṅ ni ruluii leii. Laareni rlajz sanäj reladsiool xtenreni. Rdxagljazreni rnii bejṅ lojreni nez lo reguii. <sup>39</sup> Rlajzarení cuerení cadro rbej renani sajcrú neṅ reguidoo najza cadro ru' relanj. <sup>40</sup> Rudzucajzarení xhixten rebiuud, rniizarení xhidalduxh diidx che rolrení le', te rusäuureni loj rebejṅ. Castigwroru gac redee.

### *Gojṅ xten te biud prob*

*(Lc. 21:1-4)*

<sup>41</sup> Dxejcti gurej Jesús cuä' caj cadro rusäl bejn gojn. Cahuiini cagusäl rebejn meel nen cajga. Xhidajl reni rajp cagusäl xhidajl meel nenga. <sup>42</sup> Che biääd te biud proob, basälni tiop melbäz ni sajc si'cti tej centaab. <sup>43</sup> Dxejcru gurejdx Jesús rexpejn pacni, räjpni lojreni: —Rniliäpac lojtu, biud proobre basäl xhidajlru lo guiraa renani basäl nen cajre, <sup>44</sup> sa'csi guiraa reni abasäl che'nsi xhixtenreni. Luxh gunaare basäl guiraa nani rajpni. Ni'ctis najc nani gaunäjni.

## 13

### *Gunii Jesús sibijl guidoo*

*(Mt. 24:1-2; Lc. 21:5-6)*

<sup>1</sup> Cheni sariireni nen guidoro, räjp tej rexpejn pacni lojni:

—Dad, bahuii lacti reguij, lacti reyu'.

<sup>2</sup> Dxejcti räjp Jesús lojni:

—¿La rhuiilu loj reyu're? Nicla tej guij dijia'n dzuub yejc sa'ni, guiraliireni sire'ch.

### *Recos ni gac che ameer nitloj guedxliuj*

*(Mt. 24:3-28; Lc. 21:7-24; 17:22-24)*

<sup>3</sup> Dxejc sobga' Jesús yejc dalje' ni laa dan Oliib, cahuiini nez ro' guideoga. Che sugaxhtebreni, gunabdiidx Pedr näj Jacob näjza Juan näjza Andrés lojni, räjpreni:

<sup>4</sup> —Gunii loonu, ¿guc gac dee? ¿Xhi guihuiinu te gacbeenu asiäddzungenajxh soob guiraa rediidxre?

<sup>5</sup> Dxejcti gusloj gunii Jesús lojreni, räjpni:

—Colhuii, te rut gusgueedi la'tu, <sup>6</sup> sa'csi xhidalduxh bejn jääd con laä, gäbreni: “Narä nacä Crist”, luxh rniisireni si'c, susguezareni xhidajl bejn.

<sup>7</sup> Che jiejn diajgtu yu' guer näj yäl nadxeeb xten guer, na'c guidxejbtu. Nanabpac gacni; et dxejcti nitloj guedxliuj. <sup>8</sup> Säjs nación yejc sanacionni, näj yäl rnibee yejc sayäl rnibeeni. Xhidajl lajt sajc xu, siliaanza bejn, luxh säjs rebejn yejc sa'ni. Redee najc ni guisloj guidxejb, gachuinza lajzni.

<sup>9</sup> Dxejc la'tu col susin sa'csi suteedreni la'tu ladz naa reguxhtis, siguijnzareni la'tu nen reguidoo. Sacrejdxtu lo regubieer näjza loj rereii xcäl nasa'c narä, te si'c gac guiniitu xtidxä lojreni. <sup>10</sup> Nanabpac guirechxgaa xtidx Dios loj guiraa reben guedxliuj. <sup>11</sup> Che guiniaazreni la'tu, che chanäreni la'tu loj reguxhtis, na'c gunxgaatu xhigab xhi diidx guiniitu. Colnii nani jäjtis yejcti dxejc, sa'csi xhet la'ditu ni guinii, Sprit Dxaan xten Dios ni guinii. <sup>12</sup> Luxh suto' bejn lagajc bejtzni te guet bejtzni. Suto'za dad lagajc xi'nni. Säjs rebiuux yejc rexcusajnni te guet reguzajnga. <sup>13</sup> Sidxechlajz guiraa rebejn lojtu sa'csi najctu xpenä; nani ted guiraa retrabajwre, ni'c gudeed Dios xcäl nabajnni.

<sup>14</sup> Che fiitu loj nani najc yäl rdxechlajz, nani najc yäl runitloj, nani gunii Daniel ni gunii xtidx Dios. Che fiitu nani suga' cadro di nunyäl suuni, dxejcti suguxun renani yu' nez Judea chääreni nez nen redajn. (Nani gol guijtzre sugacbeenini.) <sup>15</sup> Bejn nani suga' yejc yu' na'c jäjtne jiu'ni nen te yu' xca'ni gaii xhixtenni. <sup>16</sup> Nani yu' loj niaa, di gal jäjt te xca'ni xhablajzni. <sup>17</sup> ¡Aii! Xhiza nalas chu regunaa ni nuu bäz, luxh renani rusiä' xi'nni, nen redxejga. <sup>18</sup> Colnab loj Dios na'c sactu scree nen rebäinajl. <sup>19</sup> Nen redxejga su' trabajwduxh, nani gajd chu che bencheeli Dios guedxliuj, luxh diruni chu, dxejctis chuni. <sup>20</sup> Paru di Dad gusia'tz redxejga, nicla tej bejn di laa. Susia'tzni redxejga sa'csi sanälajzni rexpejnni nani aguleni.

<sup>21</sup> Dxejc palga yu' chu naa lojtu: “Colhuii, aree Crist”, o “Colhuiire, ani suga' rec”, na'c chalilajztuni. <sup>22</sup> Sa'csi su' bejn nani rniisi najcni Crist. Su'za reniguii nani rniisi rniireni xcuent Dios. Sujnzareni milaagwr, te gusgueereni, te palga sajcn, rlaizreni gusguelireni renani agule Dios. <sup>23</sup> Ni'cni la'tu col susin; agunixgaä lojtu guira'ti ni gac.

*Xho gac che jiääd Xi'n Dios ni gujc Niguii*  
(Mt. 24:29-35, 42-44; Lc. 21:25-36)

<sup>24</sup> 'Neñ redxejga, cheni luux retrabajwduxhga, sicäy lo gubijdx, luxh diru bäii gusanij. <sup>25</sup> Sitejb rebalxhaguibaa, sinibsejs recos nani nasnäy rebalxhaguibaa. <sup>26</sup> Dxejcti suhüii rebejn loä, Xi'n Dios nani gujc Niguii, siälä neñ reza guideb yälrnibeduxh xtenä, näjza xcäldimbicha'ä. <sup>27</sup> Dxejcti guxhalgacä rexanglä jiädtojpreni renani guleä guideb lo guedxliuj, cat nalooli guedxliuj näjza cadre nalooli guibaa.

<sup>28</sup> 'Colguiseed nani rulüii yagiigw. Cheni rii rebäte' lojni luxh che rcaj balajg lojni, acaxhnajntu bäii gusguij asadzungajxh. <sup>29</sup> Sigajcza, che fiitu acayajc recosre, sacbeetu asiädgaxhä, ameer guidzunä. <sup>30</sup> Rniliäpac lojtu, rebejn ni nabajn dxejc, direni nitloj, fixgaareni gac recosga. <sup>31</sup> Sinitloj guibaa näjza guedxliuj, rextidxä di nitloj.

<sup>32</sup> 'Naj, rut najndi gac gac recosga, nicla rexangl Dios ni yu' xhaguibaa, niclaza narä Xi'n Dios, Xtaädätis najn.

<sup>33</sup> 'Colhüii, colsusin, colnab loj Dios, sa'csi ditu gan guc guidzujñ redxejga. <sup>34</sup> Dee najc si'c najc te bejn ni birii sää zijt. Che gajdlini guirii, badeedni xtzun rexmosni, luxh gunibeezani susin nani canäj rolä'. <sup>35</sup> Si'cza colsusin, sa'csi ditu gan guc jiääd baxhuaan yu'ga, la jiäädni gudxej, o la jiäädni garol yääl, o la cäy, o la jiäädni rsil. <sup>36</sup> Colsusin, te di guiga'tu nagayejstu che guidzujñni. <sup>37</sup> Rediidx nani rniä lojtu, loj guiraa rebejn rniäni: colsusin.

## 14

*Ruchaagreni diidx te guiniaazreni Jesús*  
(Mt. 26:1-5; Lc. 22:1-2; Jn. 11:45-53)

<sup>1</sup> Riäädx tiop dxej guidzujñ lanij, dxej ni ruzaa lajzreni gulaareni ladznaa reEgipto. Neñ redxejga rajwreni yätxtiil nani di saguij. Rebixhojz nani rnibee neñ guidoo xten rexpejn Israel näj rebejn ni rulüii leii rlaizreni niniaazreni Jesús con yälrusguee, te nugu'trenini.

<sup>2</sup> Dxejcti räjpreni lo sa'reni:

—Na'c jiennu scree neñ redxelani, te na'c gun benguejdx biejj.

*Te gunaa ni basäl se't yejc Jesús Betania*  
(Mt. 26:6-13; Jn. 12:1-8)

<sup>3</sup> Yu' Jesús Betania, rolijz Simón, nani guyu' guejch ni ral tiejxhni. Che sobga'ni lo mex, biääd te gunaa ca' te bo'tguij yu' setnard neñni. Rlianexhduxhni, sacduxhni. Dxejc gudi'chni yejn bo'tguijga, te basälni se'tga yejc Jesús. <sup>4</sup> Yu'za gaiireni ro'c ni bidxe'ch, räjp loj sa'reni:

—¿Xhicuent banijtni setnejxhga? <sup>5</sup> Paru nido' se'tga, nijni si'cti choñ gayuu denar, te nica' meelga rebejn ni xhet rajpdi meel.

Luxh caguidxa'reni loj gunaaga.

<sup>6</sup> Dxejc räjp Jesús lojreni:

—Colsaanni, ¿xhicuent rudxoijntu nani cayujñ gunaare? Cos sacduxh dee bennäjni narä.

<sup>7</sup> Guideb ni guibajntu, su' rebejn nani xhet rajpdi lojtu, luxh che rlaiztu sajg gacnäjtüreni. Narä et xchejdi chu'ä lojtu. <sup>8</sup> Gunaare abejñni nani gujctis bejñni. Abaslanexhxaani tiexhä, te chää tiexhä neñ baa. <sup>9</sup> Rniliäpac lojtu, cadrotis guidzujñ xtidx Dios, guideb lo guedxliuj, siniizareni xcuent nani bejn gunaare, te guinaj lajzreni gunaare.

*Rlaiz Judas guto' Jesús*  
(Mt. 26:14-16; Lc. 22:3-6)

<sup>10</sup> Dxejcti huij Judas Iscariot, nani najc tej retzubitio'p xpejñpac Jesús, loj rebixhojz nani rnibee te guto'ni Jesús lojreni. <sup>11</sup> Che biejn diajg rebixhojz xtiidxni, bibalajzreni. Räjpreni sudeedreni meel lojni. Dxejcti caguuil Judas xho guto'ni Jesús.

*Gudauxchej Dad con rexpejn̄pacni**(Mt. 26:17-29; Lc. 22:7-23; Jn. 13:21-30; 1Co. 11:23-26)*

<sup>12</sup> Biu'ti xmaan che rajwreni yätxtiil ni di saguij. Dxej lanijga, rugu'treni xiil, te ruzaa lajzreni dxej ni gulaareni ladzṇaa reEgipto. Räj̄p rexpejn̄pacni loj Jesús:

—¿Caro rlajzlu chosucheenu te gauulu nadxej, dxelani?

<sup>13</sup> Dxejc baxhaṇni tiop rexpejn̄pacni, räj̄pni lojreni:

—Colchäj neṇ guejdx, ro'c guidxaagtu te niguii ni nuu te re' nis. Colchanajl niguiiga.

<sup>14</sup> Cadro jiu'ni colye'tz loj bejn̄ ni najc rolizni ro'c: “Naj Dad mastr, ¿con yu' cadro ria'n rebiooz, cadro gaunäj̄ni rexpejn̄pacni nadxej, dxelani?” <sup>15</sup> Dxejcti guluiini lojtu te yu' ni sojb jiaaliga yejc sa'ni, ni asuchexгаа nenni. Colyujn xhi guidaunu ro'c.

<sup>16</sup> Sas huij rexpejn̄pacni, bidzuj̄nreni neṇ guejdxga. Bidxälreni te yu' si'cni räj̄p Jesús lojreni. Ro'c bejn̄reni xhi gudajwreni dxelani.

<sup>17</sup> Che huääz gubijdx, bidzunnäj̄ Jesús guitzubitio'p xpejn̄pacni. <sup>18</sup> Laṇni sobga'reni lo mex cayajwreni, räj̄p Jesús lojreni:

—Rniliäpac lojtu, tej la'tu ni cayaunää, suto'ni narä.

<sup>19</sup> Dxejcti gusloj cayac-huin lajzreni, räj̄p tebgajreni lo Jesús:

—¿La naräni?

Räpgajc steeni:

—¿La naräni?

<sup>20</sup> Dxejcti guniini, räj̄pni lojreni:

—La tej retzubitio'p, tej ni cayajw loj xpla'tä. <sup>21</sup> Sa'csi narä Xi'n Dios nani gujc Niguii, sia'ä, si'cpacni caj loj xtiidx Dios, per xhiza nalajz niguii ni guto' narä. Huentejti na'c niajl niguiire.

<sup>22</sup> Laṇni cayajwreni, cua' Jesús yätxtiil, badeedzani xquixhtiooz loj Dios dxejc gula'nini, badeednini lojreni. Dxejcti räj̄pni:

—Colca' yätxtiilre. Dee najc si'c tiexhä.

<sup>23</sup> Cuagajcni te bas. Che abadeedni xquixhtiooz loj Dios, badeednini lojreni, gu' guiraareni neṇ basga. <sup>24</sup> Dxejcti räj̄p Jesús lojreni:

—Dee najc si'c xtienä ni ruluii diidx ni biä'nnu, nani guixe' xcuent xhidajl rebejn̄.

<sup>25</sup> Rniliäpac lojtu, diruna yä'ä bin nani rīi yejc uub, dxejli yä'äni stehuält loj xcäl̄rnibee Dios.

*Gunii Jesús sinii Pedr dini gumbeeni**(Mt. 26:30-35; Lc. 22:31-34; Jn. 13:36-38)*

<sup>26</sup> Che gulujx biṇreni te dij xten Dios, biriireni, sääreni nez dajne' ni laa dan Oliib.

<sup>27</sup> Dxejcru räj̄p Jesús lojreni:

—Guiraatu sibälaztu narä naguxhij̄n, sa'csi si'c cajni lo guijtz: “Sugu'tä baxhtoor luxh suxuṇ rexiil.” <sup>28</sup> Che guibaṇsacä loj rebeṇgut, ganidä cha'a Galilee, dxejcti jiääd̄tu.

<sup>29</sup> Dxejc räj̄p Pedr loj Jesús:

—Palga guiraareni cuälazlu, narä dina cuälazälu.

<sup>30</sup> Dxejc räj̄p Jesús lojni:

—Rniliäpac lojlu, lagajc guxhij̄nre, nicla gajd guidgäi cuedxa' tiop huält, luj aguiniilu choṇ huält dilu gumbee narä.

<sup>31</sup> Luxh laani sanuutis xtiidxni, räj̄pni:

—Cadro guetlu setäza, dina guiniä dina gumbeälu.

Luxh guiraa rexpejn̄pacni gunii si'c.

*Gunab Jesús loj Dios che yu'ni Getsemaní**(Mt. 26:36-46; Lc. 22:39-46)*

<sup>32</sup> Dxejcti bidzuj̄nreni te lajt cadro laa Getsemaní. Dxejc räj̄pni loj rexpejn̄pacni:

—Colc̄uej ree laṇni chanabä lo Dios.

<sup>33</sup> Dxejcru sanäni Pedr näj Jacoob näjza Juan. Dxejc gusloj cayac-huinuxh lajzni, luxh cayu'ni yälrsiaduxh. <sup>34</sup> Dxejc räjpni lojreni:

—Cayac-huinuxh lazä, an sugu'tni narä. Coljia'n ree, coltie'ch bacal.

<sup>35</sup> Sas gusajni tla', bazuxhijbni lo yuj, dxejcti gunabni lo Dios don la niajc nidedcaj nani sacni dxejc. <sup>36</sup> Räjpni:

—Abba, xtadä, luj rajc rujnlu guira'ti: badzucay retrabajwre loä. Xhet si'cni rlazädi narä, bejn si'cni rlanjzlu luj.

<sup>37</sup> Dxejc biädni gunaaznireni nagayejsreni. Dxejc räjpni lo Pedr:

—Simón, ¿la nagayejslu? ¿La nicla te rate' diniajcdi nutie'chlu bacal? <sup>38</sup> Coltie'ch bacal, colnab lo Dios, te na'c guntu dojl. Lastootu rlanj gutie'chtu bacal, luxh tiejxhtu abadxajg.

<sup>39</sup> Huij Jesús stehuält, binabni loj Dios, guniini lagajc rediidx ni guniini galoo. <sup>40</sup> Dxejcti biädsacni cadro tre'reni, gunazsacnireni nagayejsreni, sa'csi yuduxh bacal lojreni. Luxh direni nidxäl xhi niniireni lojni. <sup>41</sup> Ni riojn huält biädni, dxejc räjpni lojreni:

—Agojl colguejs, colsilajz, agujc, abidzujn or ni ted Xi'n Dios ni gujc Niguii ladznaa rebendojl. <sup>42</sup> Colchastie, colcho'. Asiäddzungajxh ni guto' narä.

### *Gunaazreni Jesús*

*(Mt. 26:47-56; Lc. 22:47-53; Jn. 18:2-11)*

<sup>43</sup> Canisijcni scree, che bidzujn Judas, ni najc te retzubitio'p xpejnpacni, siädnäni xhidajl bejn. Ca'reni spaad, ca'reni yajg biriireni lo rebixhojz nani rnibee, näjza rebejn ni ruluii leii, näjza rebengool nani najc guxhtis. <sup>44</sup> Niluxh nani ruto' Jesús abadeedni te seen lojreni, räjpni:

—Nani guchagro'ä, ni'c najc laani. Colnaazni, colyaptzu'tzni te si'c chanätuni.

<sup>45</sup> Che bidzujn Judas, gubigni loj Jesús, räjpni lojni:

—Dad, Dad.

Sas bachagro'nini. <sup>46</sup> Dxejcru gunaazreni Jesús ro'c.

<sup>47</sup> Dxejc tej reni suga' ro'c, gulää xspaadni, gudilguijdxni xmos bixhojz nani sajcru, batiu'ni diajgni. <sup>48</sup> Dxejc räjp Jesús loj rebejn:

—¿La siädxhiitu narä con spaad näjza garo't si'c rixiitu te gubaan? <sup>49</sup> Guiraa dxej guyu'ä lojtu neñ guidoo, caguluiätu xtidx Dios luxh ditu niniaaztu narä. Scree cayajcni, te soob diidx ni caj lo reguijtz.

<sup>50</sup> Dxejcru rexpejnpacni gulälazrenini, baxuntireni.

### *Bi'n nani baxun*

<sup>51</sup> Sanajlza te bi'n Jesús, nadejbni ganaxhtis te bariaad. Si'c gunaazrenini. <sup>52</sup> Dxejcti baxunni, libasa'nni bariaadga, sä'tini xhabääläni.

### *Suga' Jesús loj reguxhtis*

*(Mt. 26:57-68; Lc. 22:54-55, 63-71; Jn. 18:12-14, 19-24)*

<sup>53</sup> Dxejc biädnäreni Jesús loj bixhojz ni sajcru. Bidojp rebixhojz nani rnibee, näj rebengool ni najc guxhtis, näjza rebejn ni ruluii leii. <sup>54</sup> Luxh Pedr zijt zijt sanajlni Jesús. Che bidzujntini lo xle' bixhojz ni sajcru, gurenäjni rebejn nani rajp ro'c, cagucha' lajzni lo bajl.

<sup>55</sup> Rebixhojz nani rnibee, näjza guiraa rebengool ni najc guxhtis, caguiilreni xhi tej xquej Jesús nidxälreni, te nugu'treni Jesús, xhet bidxäldireni. <sup>56</sup> Xhidajl bejn gunii didxxhii, räjpreni et laadi rujn Jesús, niluxh di xtiidxreni nile', sa'csi garen garen guniireni. <sup>57</sup> Dxejc huisulii gaii bejn ni guniireni stee didxxhii xcuent Jesús, räjpreni:

<sup>58</sup> —Nuunu biejn diaagnu guniini: “Sutiexhä xyu' Dios ni guc-chee con ñaa rebejn, luxh choñtis dxej guncheä steeni, ni nac-chee et con ñaadi rebejn.”

<sup>59</sup> Nicla si'c di xtiidxreni nile', sa'csi garen garenza guniireni.

<sup>60</sup> Dxejcti huisulii bixhojz ni sajcru galäii guiraa rebejn, gunabdiidxni loj Jesús räjpni:

—¿La digacdi guiniilu xhi guiniilu xcuent requej ni cabe'c reniguiire, ä?



<sup>61</sup> Laani niäuuutis ro'ni, xhet guniidini. Dxejcti gunabdidxsac bixhojz ni sajcru lojni, räjpni:

—¿La luj ni najc Crist, xi'n Dios nani rliä'p bejn xpala'nni, ä?

<sup>62</sup> Dxejcti räjp Jesús lojni:

—Naräni. Suhuiitu loä, Xi'n Dios nani gujc Niguui, sobga'ä xladbee Dios ni rnibee, siäläza nen reza ni tre' xhaguibaa.

<sup>63</sup> Dxejcru bixhojz ni sajcruga, batiäjsni tla' xhajbni, räjpni:

—¿Xhi jienrunu guidiilnu diidx xcuentni? <sup>64</sup> Abiejn diajgtu xho guniyajni Dios. Naja', ¿xhi najtu?

Dxejcti guiraareni räjp nungäjlpac guetni.

<sup>65</sup> Dxejc yu' reni gusloj cagutiobxhejn lojni, luxh basäuureni lojni, dxejc huääzrenini, räjpreni lojni:

—Gunii, ¿chuni'c huääzlu?

Luxh renani canäjni gudajp lojni.

### *Gunii Pedr dini gumbee Jesús*

*(Mt. 26:69-75; Lc. 22:56-62; Jn. 18:15-18, 25-29)*

<sup>66</sup> Dxejc suga' Pedr lo yuj, nez lo le'ga, che biääd te xcriaad bixhojz ni sajcru. <sup>67</sup> Luxh bahuini cagucha' lajz Pedr, cadxelojni lojni. Dxejcti räjpni:

—Näj luj nadxaaglu Jesús ni siääd Nazare't.

<sup>68</sup> Dxejc Pedr basgueeni, räjpni:

—Dina gumbeäni. Dizana ganä xhini'c caniilu.

Dxejcti biriini sääni ro' suaan. Dxejcti guredxa' guidgäi. <sup>69</sup> Dxejc bahuisac criaadga lojni, räjpni loj renani suga' ro'c:

—Niguiire najc laa tejreni.

<sup>70</sup> Luxh laani basgueeni stehuält. Che gojl stera't, räpsac renani suga' ro'c loj Pedr:

—Guliipacni näj luj najclu tejreni, sa'csi bejn Galileelu, luxh guyasi riejn rniilu si'c rni reben Galilee.

<sup>71</sup> Dxejc gusloj canii Pedr:

—Dios gun castiigw narä palga xhet guliidi ni caniä. Dios najc testiigw, dina gumbeä niguii nani caniiu.

<sup>72</sup> Dxejcti barojp huält guredxa' guidgäi. Dxejc banalajz Pedr nani räjp Jesús lojni: "Che gajdli guidgäi cuedxa' tiop huält, luj gacla chon huält aräjplu dilu gumbee narä."

Dxejc guslojni cayoondi.

## 15

### *Suga' Jesús loj Pila't*

*(Mt. 27:1-2, 11-14; Lc. 23:1-5; Jn. 18:28-38)*

<sup>1</sup> Che bara yääl bidxaag sa' rebixhojz ni rnibee, näj rebengool ni najc guxhtis, näjza rebejn ni ruluii leii, näjza guiralii reguxhtis. Dxejcti gusloj cachaagreni diidx xho gunreni. Baliibreni Jesús, sanätirenini, niluxh badeedrenini loj Pila't. <sup>2</sup> Dxejc gunabdiidx Pila't loj Jesús räjpni:

—¿La luj ni najc reii xten rexpejn Israel, ä?

Räjp Jesús lojni:

—Si'cni guniilu, si'c najcni.

<sup>3</sup> Dxejc gusloj rebixhojz nani rnibee cabe'c rexquej Jesús. <sup>4</sup> Gunabdidxsac Pila't lojni:

—¿Xhet rniidilu ä? Ahuii lacti xquejlu cabe'creni.

<sup>5</sup> Bidxeloj Pila't sa'csi nicla si'c xhetru guniidi Jesús.

### *Gunibeereni guet Jesús*

*(Mt. 27:15-31; Lc. 23:13-25; Jn. 18:38-19:16)*

<sup>6</sup> Dxelanijjac ruslaa Pila't tej rebejn ni yu' latzguiib. Ruslaani chutis te ni rniab rebejn. <sup>7</sup> Lo rebejn ni yu' latzguiib nadxaag te niguii ni laa Barrabás. Bagu'tni te bejn che nu'chni lo te cuaa bejn ni gudilnäj gubieer. <sup>8</sup> Dxejc bidojp xhidajl bejn loj Pila't, gunabreni lojni gunni si'ctis rujnni casob lanij. <sup>9</sup> Dxejc gunabdiidx Pila't lojreni, räjpni:

—¿La rlanjtu guslaa reii xten rexpejn Israel, ä?

<sup>10</sup> Sa'csi gucbegajcni rdxechlajz rebixhojz loj Jesús, ni'c bateedrenini lojni. <sup>11</sup> Ni'cni baquuilza rebixhojz ni rnibee rebenxhidaal te gäbreni lo Pila't:

—Baslaa Barrabás loonu lacuaa ni guslaalu Jesús.

<sup>12</sup> Dxejc räjp Pila't lojreni stehuält:

—¿Xhini'c rlanjtu gunnäa nani rniitu reii xten rexpejn Israel?

<sup>13</sup> Dxejcru guredxa'reni:

—¡Bacuaani lo cruzj!

<sup>14</sup> Dxejc räjp Pila't lojreni:

—¿Xhini'c xhet laati bejnni?

Dxejcti laareni rbedxa'rureni:

—¡Bacuaani lo cruzj!

<sup>15</sup> Baslaati Pila't Barrabás, sa'csi rlanjzni nuspaani lajz rebenxhidaal. Che gulujx gunibee Pila't, bia Jesús. Bateedti Pila't Jesús loj rexsoldaadni, te xcajni loj cruzj.

<sup>16</sup> Dxejc huinä rexsoldaadni Jesús nen Pretoor, yu' cadro rujnreni yälguxhtis, ro'c batojpreni guiraa resa'reni. <sup>17</sup> Dxejcti bashuajcwreni Jesús te lad moraad, bencheereni te coron guejch basäl'reni yejcn. <sup>18</sup> Guslogajc caguxhi näjrenini, caniireni lojni:

—¡Colguiliä'p xpala'n reii xten rexpejn Israel!

<sup>19</sup> Batiäj'reni te yabixhijl yejcn, batiobxhejnreni lojni, luxh guzuxhijbreni te rajnrenini. <sup>20</sup> Che gulujx basacsíreni Jesús, gulääreni lad moraad ni najcwni, sas bashuajcwrenini xhajbpacni. Gulägajc'reni Jesús te cuaarenini lo cruzj.

### *Bacuaareni Jesús loj cruzj*

*(Mt. 27:32-44; Lc. 23:26-43; Jn. 19:17-27)*

<sup>21</sup> Te niguii ni laa Simón, ni siääd Cirene, sadejd ro'c, bazajni lo nejz. Niguiire najc xtad Alejandro näjza Rufo. Che sadejdni nejzga, la fuerz basguurenini xcruzj Jesús.

<sup>22</sup> Dxejcti huinäreni Jesús cadro laa Gólgota, nani säloj: dan Calabeer. <sup>23</sup> Ro'c badeedreni lo Jesús bin nani nu'ch mir lojni, dxejc laani naaddini niä'ni binga. <sup>24</sup> Che gulujxti bacuaareni Jesús loj cruzj, gudzujtreni yejc rexhajbni, te don xhini'c xca' tejjaren. <sup>25</sup> Agujc choñ or gulejn gubijdx che bacuaareni Jesús lo cruzj. <sup>26</sup> Letreer cadro bacuaareni xtojlni scree bejnrenini: “Reii xten rexpejn Israel.” <sup>27</sup> Bacuaazareni lo stiop cruzj tiop gubaan, tejni xladbee Jesús, xtee xladbäjgwni. <sup>28</sup> Dxejc guzojb diidx ni caj loj guijtzt nani rni: “Loj rebenxhijdx bigabni.”

<sup>29</sup> Luxh renani sadejd nejzga guniyajreni Jesús, cagusniibreni yejcreni, räjpreni lojni: —¡Jaa! Luj nutiejxhlu guidoo luxh chontis dxej niunchesacluni. <sup>30</sup> Naj baslaa lagajc luj, biäjt loj cruzjga.

<sup>31</sup> Näjza rebixhojz ni rnibee, näj rebejn ni ruluii leii, baxhiznärenini, räjp loj sa'reni: —Ste'ca bejn ruslaani, xhoxh digacdi guslaani lagajc laani. <sup>32</sup> Naj sujiäjt Cristre, reii xten rexpejn Israel, lo cruzj te guihuiinu, te chalilaaznu.

Näj regubaan ni caj lo cruzj guniyajzaren. Jesús.

### *Xcälgujt Jesús*

*(Mt. 27:45-56; Lc. 23:44-49; Jn. 19:28-30)*

<sup>33</sup> Che gojl läidxej, bicäy si'cti choñ or. <sup>34</sup> Che gudejd choñ orga, guredxa' Jesús dipro, räjpni con xtiidxni:

—Eloi, Eloi, ¿lama sabactani? —dee säloj: Xtiozä, Xtiozä, ¿xhicuent gulälazlu narä?

<sup>35</sup> Biejn diajg gaii bejn ni suga' ro'c räjpni si'c, dxejc räjpreni:

—Colcuadiajg, Elías cabejdxni.

<sup>36</sup> Sas baxun tejni, bahuajdxni te sponj loj binagr. Dxejcru basälñini yejc te yabixhijl, badeednini loj Jesús te yänini, räbgajcni:

—Colgusaan guihuiinu don la siädläjd Elíasni loj cruzj.

<sup>37</sup> Dxejcru guredxaduxh Jesús, gujttini. <sup>38</sup> Dxejc lajd ni najl neñ guidoro biräjsni, gujcnii tiop la', jiaali lo yujli. <sup>39</sup> Suga' capitán nani rnibee te gayuu soldaad nez loj Jesús, luxh che bahuiini xho guredxa' Jesús scree näj xho gujtni, räjpni:

—Guli'pacni, niguiire najc Xi'n Dios.

<sup>40</sup> Suga'za gaii gunaa, zijt cadxelojreni. Lojreni yu' Marii Magdalen, näj Marii, xnan Jacob ni najc huinru, näjza José, näjza Salomee. <sup>41</sup> Che guyu' Jesús Galilee birinajl regunaare Jesús, luxh bahuiirenini. Yu'za xhidajlru regunaa ni biädñajl Jesús che biädñi Jerusalén.

### *Biga'tz Jesús*

*(Mt. 27:57-61; Lc. 23:50-56; Jn. 19:38-42)*

<sup>42</sup> Biu' gudxhijñ, luxh najcni dxe bispr che rusucheereni par sabd, dxej ni rusilajz rexpejñ Israel. <sup>43</sup> Biäd José ni siäd Arimatea, najcni te rebejñ ni sajc loj reguxhtis. Näjza laani cabäjzni xcälñibee Dios. Guideb yälñabajñ gunabni tiexh Jesús lo Pila't. <sup>44</sup> Bidxelo Pila't alagujt Jesús, sas gurejdxni capitán ni rnibee tej gayuu soldaad, gunabdiidxni lojni la balagujt Jesús. <sup>45</sup> Che räjp capitánga lojni agujt Jesús, dxejc badeed Pila't tiexh Jesús loj José. <sup>46</sup> Agusii José te bariaad, luxh che gulätñi Jesús lo cruzj, batejbnini neñ bariaadga. Dxejc gudixhni Jesús neñ te biliää ni caj cuä' te guilaj, dxejcru batzugni te guiro ro' biliääga. <sup>47</sup> Bahuii Marii Magdalen näj Marii xnan José cadre biga'tz Jesús.

## 16

### *Huäjz Jesús loj rebengut*

*(Mt. 28:1-10; Lc. 24:1-12; Jn. 20:1-10)*

<sup>1</sup> Che gudejd sabd, dxej ni rusilajz rexpejñ Israel, Marii Magdalen näj Marii xnan Jacob näjza Salomee gusii setnejxh te chatääbreni se'tga tiexh Jesús. <sup>2</sup> Che biu' xmaan, rsildooru, che calejn gubijdx, biädreni ro' xpaani. <sup>3</sup> Cayäjp loj sa'reni:

—¿Chu gudzucaj guiroga ro' xpaani te jiu'nu?

<sup>4</sup> Che gudixhlojreni, bahuiireni alagubicaj guijga, luxh najcni te guiroduxh. <sup>5</sup> Che biu'reni neñ biliääga, bahuiireni lo te bi'n sobga' ladbee neñ biliääga. Najcw bi'nga te ladnol ni najc siool. Dxejc bidxejb regunaaga. <sup>6</sup> Dxejcti räjp bi'nga lojreni:

—Na'c guidxejbtu. Caguuiltu Jesús ni siäd Nazare't, nani cuaj lo cruzj. Rutiruni ree. Agubajñni lo rebengut, coltahuii cadre gudixhreni tiejxhni. <sup>7</sup> Colchäj, colchaye'tz lo rexpejñpacni, loj Pedr, ganidla Jesús guidzujñ Galilee, dxejcti guidzujñtu. Ro'c fiitu lojni, si'cni guniini lojtu.

<sup>8</sup> Biriitireni ro' biliääga, racejslireni sa'csi cadxejbreni. Rut lojdi guniidireni sa'csi cadebduxhreni.

### *Baluiloj Jesús loj Marii Magdalen*

*(Jn. 20:11-18)*

<sup>9</sup> Gubajñ Jesús loj rebengut rsildooru che biu' xmaan. Baluilojni galoo loj Marii Magdalen, nani agacgulääni gajdz bendxab neñ lastooni. <sup>10</sup> Dxejcti huij Marii Magdalen, huiye'tzni loj renani cuansanäj Jesús, renani cayac-huin lajzni, cayoonreni. <sup>11</sup> Che biejn diajgreni ahuäzsac Jesús lo rebengut, luxh Marii abahuii lojni, di lajzreni nilii.

### *Baluiloj Jesús loj tiop xpejñpacni*

*(Lc. 24:13-35)*

<sup>12</sup> Ste'ca najc Jesús baluilojni loj tio'p renani sasaj sääreni lo nejz. <sup>13</sup> Dxejcti gubi'reni, huiye'tzreni loj sgaiiga, luxh nicla xtidx reni'c di lajzreni nilii.

*Baxhal Jesús repost**(Mt. 28:16-20; Lc. 24:36-49; Jn. 20:19-23)*

<sup>14</sup> Lult baluilojni loj guitzubiteebreni che sobga'reni lo mex. Gudidxa' Jesús lojreni, sa'csi di lajzreni nilii luxh guyaa lajzreni. Di lajzreni nilii xtidx renani bahuii loj Jesús che gubangajcni loj rebengut. <sup>15</sup> Räj̄p Jesús lojreni:

—Colchäj guideb lo guedxliuj, colnii xtidx Dios lo guiraa rebejn. <sup>16</sup> Nani chalilajz luxh tiobnisni, siliaani loj dojl; biäda nani di lajzni chalii sinijt̄ni lo dojl. <sup>17</sup> Niluxh remilagwre jiannäj renani chalilajz: sibääreni beñdxab xcuentä; siniireni ste'ca diidx; <sup>18</sup> guiniaazreni bäl̄ con ñaareni; masque yäreni xhicos ni rugu't bejn, xhet gacdireni; susujreni ñaareni yejc rebenracxhuu luxh siajc rebenracxhuu.

*Huä'p Jesús xhaguibaa**(Lc. 24:50-53)*

<sup>19</sup> Gulujxti gunii Dad Jesús si'c lojreni. Dxejc huäjsni sääni xhaguibaa. Ro'c huicueni cuä' Dios ladbee. <sup>20</sup> Dxejcti laareni bire'chreni, guniireni xtidx Dios guiranejz. Lagajc Dadga gucnäjreni, bejn̄ni milagwr te gucbee bejn̄ laapac xtidx Dios ni caniireni. Sugacni si'c.

## Rediidx Nani Bacuaa Lucas Xcuent Jesucrist

### *Xhicuent bacuaa Lucas rediidxre*

<sup>1</sup> Xhidajl bejn abacuaa lo guijtz xcuent guiraa redzuun ni gujc nez loonu te cuäxnejzreni redzuunga <sup>2</sup> si'cpac ni biääd rediidxga loonu. Rebejn nani bahuiloj guiraa recosre cheni guslojlireni, näjza reni gucnäj basule' xtidx Dios najc renani basule' rediidxga loonu. <sup>3</sup> Luxh sa'csi abilä, abahuiloä, abenduxhä xhigab xcuent guiragajc ni gusajc che gusoblojlini, ni'c runä xhigab laaca gucuaä rediidxre, xnejz-xnejzni lo guejblu, Dad Teófilo, <sup>4</sup> te gachesa'c guejblu ni najc didxlii xcuent guiraa rediidx ni abisieed guejblu.

### *Te xangl Dios gunii xho gaal Juan ni rutiobnis*

<sup>5</sup> Cheni gujc Herodes reii xten región Judea, guyu' te bixhojz ni laa Zacarías, ni nadxaag lo rexpejn Abías. Chäälni laa Elisabe't, ni najcza te xagdoo bixhoz Aarón. <sup>6</sup> Guiro'preni najcreni nadolajz nez loj Dios, rusoobreni xtidx Dios näjza xleii Dios, ni'c digacdi gucuaquij bejnreni xcuent nicla tej dojl. <sup>7</sup> Luxh ruti xi'nreni, sa'csi chäälni digacdi chu xi'nni. Luxh guiro'preni anajcreni beṅgool.

<sup>8</sup> Te dxej, laḷ ni cayujn Zacarías dzuun neṅ guidoro si'c bixhojz nez loj Dios, <sup>9</sup> dxejc con daad bibee chuni'c jiu' neṅ yudxan xten guidoro te guze'creni yaal si'cni najc costumbr xten rebixhojzga. Dxejc si'c gulereni Zacarías gunni. <sup>10</sup> Laḷ ni caguze'cni guxhyaal, suga' guiraa rebejn lo xle' guidoro, cabedx-canabreni lo Dios. <sup>11</sup> Dxejcti baluiloj te xangl Dios lo Zacarías, suliiini ladbee lo dxan cadro cayejc guxhyaal. <sup>12</sup> Che bahuii Zacarías lo xangl Dios, di jien xhi gunni, lacti bidxebduxhni. <sup>13</sup> Sas xangl Dios räjp lojni:

—Na'c guidxejblu, Zacaríi, sa'csi Dios abiejn diajgni xtiidxlu, luxh su' te xi'n chäálu, Elisabe't; cuälajluni Juan. <sup>14</sup> Sibalazduxhlu, siroob lastoolu; xhidajl bejn sibalajz sa'csi gaalni, <sup>15</sup> sa'csi beṅro gac xi'nlu nez loj Dios. Dini yä bin, nicla maxcaal. Sibäjz Sprit Dxaan xten Dios neṅ lastooni cheni gaallini. <sup>16</sup> Sujnni gusiechlajz xhidajl rexpejn Israel, guibi'reni lo Gueb Dios. <sup>17</sup> Juanre sinijdni loj Dad, sujni lagajc xhigab, sajpni lagajc yälrnibee ni gojp profe't Elías, te che jiejn diajgreni xtiidxni susiechlajz redad, susiäjlzareneni diidx con rexi'nreni. Sigajcza rebejn ni di gusoob xtidx Dios sisieedreni gusoobreni xtidx Dios, te si'c jiädsucheeni lastoo rebejn te chalilajzreni xtidx Dad ni jiääd.

<sup>18</sup> Gunabdiidx Zacaríi loj anglga, räjpni:

—¿Xho mood gacheä guliilu? Sa'csi anacä beṅgol, sigajcza chälä.

<sup>19</sup> Dxejcti räjp anglga lojni:

—Narä nacä Gabriel, runä dzuun lo Dios. Laani baxhaḷni narä te guininää luj, jiädnaä didxhuenre lojlu. <sup>20</sup> Luxh naj, sa'csi dilajzlu nilii xtidxä, sia'nlu gop, digacdiru guiniilu, cheni gaalli xi'nlu sinisaclu. Rextidxä sisiojb che guidzujn dxej che riäjḷ gacni.

<sup>21</sup> Laḷni cayajc dee, cadxeloj rebejn ni suga' nez ro' yudxan cabäjzreni guirii Zacaríi sa'csi cayaclaani neṅ yudxan. <sup>22</sup> Che birii Zacaríi, di niajcdiru niniini loj rebejn; dxejc gucheereni yu' xhi cosro bahuiini neṅ yudxan xten guidoo. Dxejc con seen guninäjni rebejnḡa, sa'csi xheti xse'ni te niniini.

<sup>23</sup> Che gulujx bejnne dzuun neṅ guidoro, gubi'ni rolijzni. <sup>24</sup> Che gudejd redxej dxejcti bazeṅ nuu Elisabe't, chäälni, báz, gaii bäii diruni niri rolijzni. Bejnne xhigab, räjpni: <sup>25</sup> “Si'c bejn Dad Dios narä naj, gucnäjni narä te diru bejn cuälaz narä sa'csi ruti xi'nä.”

### *Biäddeed te xangl Dios diidx lo Marii gaal Jesús*

<sup>26</sup> Che gudejd xho'p bäii, baxhaḷ Dios xanglne Gabriel lo te guedx Galilee ni laa Nazare't, <sup>27</sup> te chahuiini te dxapxteeb ni laa Marii. Agojt xtiidxni te guchṅaani te dade' ni laa José. Dade're najc xagdoo toreii David. <sup>28</sup> Biu' anglre cadro sobga' dxape'ga, räjpni lojni:



—Xchan, dxa'p ni sanälajz Dios, ni agule Dios loj guiraa regunaa. Dios gacnäjlü. Abenle' Dioslu loj guiraa regunaa.

<sup>29</sup> Luxh che bahuiini lo xangl Dios bidxelojni lo rextiidxni, rujnni xhigab: “¿Xhicuent caniini si'c loä?” <sup>30</sup> Dxejc räjp xangl Dios lojni:

—Na'c guidxejblu, Marii; agule Dios luj. <sup>31</sup> Bacuadiajg diidx. Suulu báz, su' te xi'nlu. Che gaalni guirilajni Jesús. <sup>32</sup> Laani sajcní te bejn ni sacduxh. Sirilajzani Xi'n Gueb Dios ni yu' xhaguibaro. Gueb Dios sujn gacni reii sigajc ni gujc toxtadgoldooni David, <sup>33</sup> te tejpas guinibeeni loj rexi'n Israel, luxh dipac xcälrnibeeni nitloj.

<sup>34</sup> Dxejc gunabdiidx Marii lo xangl Dios, räjpni:

—¿Xho mood gac dee? Ni dxapxteeb narä, gajd narä gumbeä niguii.

<sup>35</sup> Badzu' xangl Dios diidxre lojni, räjpni:

—Sprit Dxañ xten Dios siääd lojlu, xcälrnibee Gueb Dios ni yu' xhaguibaa suhuajcwni luj si'c te za. Ni'cni báz ni gaal sajcní te beñdxan, sibälaj bejnñi Xi'n Dios. <sup>36</sup> Näjza sa'lu Elisabe't su' te xi'nni luxh anajcni te beñgool; ni'cni gunaa nani najreni digacdi chu xi'nni agujc xho'p bäii nuuni báz. <sup>37</sup> Xheti te cos ni naganduxhtej nez loj Dios —räjp Xangl Dios.

<sup>38</sup> Dxejcti räjp Marii:

—Narä nacä xmos Xtadnu Dios; mbaj, sugunnäj Dios narä si'ctisni gunii gueblu loä. Dxejcti biunejz angl xten Dios lojni, sä'tini.

### *Bihuii Marii lo Elisabe't*

<sup>39</sup> Neñ redxejga, basquejn Marii sääni lo te guejdx ni tre' neñ redajn xten Judea. <sup>40</sup> Biu'ni roliz Zacarí, guniini xtidxbee loj Elisabe't.

<sup>41</sup> Che biejn diajg Elisabe't guniini, biniib xi'nni xque'ni, gudxaj Sprit Dxañ xten Dios lastoo Elisabe't. <sup>42</sup> Dxejc dipduxh guniini räjpni:

—Abenle'ru Gueb Dios luj loj guiraa regunaa. Abenle'zani xi'nlu. <sup>43</sup> ¿Chu narä te siädhuii xnan Xtioozä narä? <sup>44</sup> Biejntis diagä xtiidxlu, bibalazgajc xi'nä, biniibni xque'ä.

<sup>45</sup> Sibaa lajzlu, luj ni huililajz sisiojbpac nani gunii Xtadnu Dios.

<sup>46</sup> Dxejc räjp Marii:

Xaimä rliä'p xpala'n Xtadnu Dios.

<sup>47</sup> Rbalazduxhza lastoä xcuent Dios ni ruslaa narä lo dojl.

<sup>48</sup> Sa'csi agule Dios narä,

nacä te mos gunaa ni xhet sajcdi,  
luxh najli sinii rebejn näjza reni churu chu lo guedxliuj,  
chicbaani loj guiraa regunaa.

<sup>49</sup> Sa'csi Gueb Dios ni rajp guiraa yälrnibee abejn xhidajl cosro loä,  
dxanduxh najc lajni.

<sup>50</sup> Dini cuääz gulaslajzni guiraa rebejn ni riu xtiidxni, reni rajñni.

<sup>51</sup> Xhidajl cosnagajn abejnni con lagajc ñaani,  
abatie'chni renani rustioob lastooreni rliä'p lagajc xpala'nreni.

<sup>52</sup> Abasajbni reni rnibee,  
per rebeñnadolajz bejnñi gacreni beñro.

<sup>53</sup> Bachajni xque' reni calaan,

badeedni ganax cossa'c,  
niluxh badzu'ni rebejn ni yu' xhixtenreni xhet badeed dini lojreni.

<sup>54</sup> Gucnäjni nación xten xpejn Israel, ni najc xmos Dios.

Di lajzni niäl nulaslajznireni

<sup>55</sup> sa'csi si'c bia'nni diidx con rextadgoldoonu,  
sinuu gulazlajzni toAbram näjza rexagdooni par tejpas.

<sup>56</sup> Dxejc bia'n Marii roliz Elisabe't si'cti choñ bäii, dxejc gubisacni rolizjni.

### *Che gojl Juan ni rutiobnis*

<sup>57</sup> Che baza' xpäi Elisabe't, dxejc gojl xpäzni te báz niguini. <sup>58</sup> Dxejc bidzujñ rexpisinni näjza resa'ni biädhuiireni guiro'preni che gacbeereni lacti hueen gujc Dios con laani. Bibalaznäjrenini. <sup>59</sup> Che gudejd xhujñ dxej, huinäreni bāze'ga chuni bee. Rlajz rebejn nirilaj bāze'ga si'c laa xtadni, Zacaríi. <sup>60</sup> Niluxh xnanni räjp:

—Na'c, guirilajpacni Juan.

<sup>61</sup> —¿Xhicuent? —räjpreni—. Ruti xfamillu ni laa si'c.

<sup>62</sup> Dxejcti gunabdiidxreni con seen lo xtad bāze'ga te gacbeereni xho rlajzni guirilaj bāze'ga. <sup>63</sup> Xtadni gunab te la' guijtzt, dxejc bacuaani: “Lajni najc Juan.” Dxejc guiraareni bidxelojreni. <sup>64</sup> Luxh lagajc dxejc gujc gunii Zacaríi stehuält, dxejc guslojni calä'pni xpala'n Dios. <sup>65</sup> Bidxeloduxh rexpisinni xhini'c gujc ro'c. Luxh bire'ch diidx xcuent recosre guideb neñ redajn xten Judea. <sup>66</sup> Guiraa reni biejn diajg rediidxga gusloj cayujñreni xhigab, dxejc gunabdiidxreni loj sa'reni:

—¿Chuchani'c gac biuxe'ga?

Si'c guniireni sa'csi huenliisi abenle' Diosni.

### *Dij ni bil Zacarí*

<sup>67</sup> Dxejcti biäd Sprit Dxañ xten Dios neñ lastoo xtadni Zacaríi, gusloj caniini rediidx ni badeed Dios lojni, räjpni:

<sup>68</sup> Guiliä'pnu xpala'n Dios, Xtios rexpejn Israel, sa'csi abiädhuiini loonu, ni najcnu rexpejni, te siädguslaani nuurnu neñ dojl.

<sup>69</sup> Abaxhalni loonu te bejn ni rajp yälrusladuxh bejn neñ dojl. Najcni te rexagdo toxmosni David.

<sup>70</sup> Lagajc si'cni badeed Dios gunii redade' ni bacuaa xtiidxni lo guijtzt galoo:

<sup>71</sup> Suslaani nuurnu loj reni rdxe'ch loonu, näjza ladzñaa rebejn ni gulälaz nurnu.

<sup>72</sup> Te gulaslajzni retoxtadgoldoonu, te soob diidx ni bia'nni con rebejnga.

<sup>73</sup> Scree bia'nni diidx con toxtadgoldoonu, Abram:

<sup>74</sup> Suslaani nuurnu ladzñaa rebejn ni rdxe'ch loonu, te na'c guidxeebnu chunu lojni gusoobnu xtiidxni,

<sup>75</sup> con yälñabansa'c näjza yälguxhtis guiraa redxej ni guibajñnu.

<sup>76</sup> Luxh luj, bāze', sirilajlu dade' nani rnii xtidx Gueb Dios ni yu' xhaguibaa, sa'csi sinijdlu lo Dad te gusucheelu rexnezyulajzni,

<sup>77</sup> te gunlu gacbee rexpejni xho gac laani lo dojl, te gac guibicaj xtojñreni.

<sup>78</sup> Sa'csi Dios sanälajz bejn,

näjza rulaslajzni bejn ni'cni xhaguibaali suxhalni xi'nni te jiädñani te dxecoob,

<sup>79</sup> te gusanijni lo rebejn ni nabajn lo yälxcäy xten dojl,

näjza rebejn ni nabajn lo xpala yälgujt,

te guluiini xho sánu lo xnez yälrbecdxilajz.

<sup>80</sup> Dxejc gunís biuxe'ga, guyuduxh xcäriejnni xcuent recos xten Dios. Gubajñni nez loj reyubidz cheni bidzujñli dxej che baluilojni loj rexpejn Israel, che gusloj cagusule'ni xtidx Dios.

## 2

### *Che gojl Jesús*

*(Mt. 1:18-25)*

<sup>1</sup> Neñ redxejga, gunibee Augusto César xcaj laj rebejn guideb guedxliuj lo xquijtzn.

<sup>2</sup> Ni'c nacogujc yälbigabre cheni najc Cirenio gobernador xten Siria. <sup>3</sup> Guiraa rebejn

nanab chääreni lagajc lajdxreni te ro'c guigabreni. <sup>4</sup> Ni'cni birii José guedx Nazare't Galilee, te huijni Judea, lo guedx Belén, cadre gojl toDavid, sa'csi najc José xagdo toDavid. <sup>5</sup> Huinäni Marii, nani guchnaani, huijreni guedx Belén te ro'c guigabreni. Luxh nuu Marii báz. <sup>6</sup> Lalsi yu'reni guedx Belén, bidzujñ dxej ni gaal xi'n Marii. <sup>7</sup> Ro'c gojl xi'n galooni, dxejc batejbnini te xzuudni. Dxejc gudixhnini cadre rusälreni guijxh rajw reguidxaa sa'csi xhetiru yu' xcalaareni jia'nreni.

### *Rexangl Dios näjza rebaxtoor*

<sup>8</sup> Gajxh guejdxga guyu' gaii baxtoor cayajpreni xhiilreni lo niaa guxhijn. <sup>9</sup> Chela baluiloj te xangl Dios, luxh bianij guideb gabireni con yälrdimbicha' xten Dios, dxejc bidxebduxhreni. <sup>10</sup> Sas anglga räjp lojreni:

—Na'c guidxeybtu, narä siädnaä lojtu te didxsa'c ni suspalajz guiraa beñ guedxliuj. <sup>11</sup> Nadxej gojl neñ guejdx xten toDavid, tej ni gusläa beñ neñ dojl, laani najc Crist ni najc Dad. <sup>12</sup> Dee najc te seen lojtu, sidxäلتu baze'ga nadejbni neñ te xzuudni, naga'ni cadre rusälreni guijxh rajw reguidxaa.

<sup>13</sup> Lagajc dxejc guideb gabi anglga baluiloj naclejn xangl Dios, gulä'preni xpala'n Dios, räjpreni:

<sup>14</sup> Collä'p xpala'n Dios ni yu' xhaguibaali.

Suchu yälrbecdxilajz lo reben guedxliuj ni balazlajzni.

<sup>15</sup> Che gubi' rexangl Dios xhaguibaa, gusloj rebaxtoor canii loj sa'reni:

—Colcho' guedx Belén colchohüi ni guzajc ro'c ni gunii Xtadnu Dios loonu.

<sup>16</sup> Rusquenduxhreni sääreni, dxejc bidxälreni Marii näjza José näjza baze' ni naga' neñ cadre rusälreni guijxh rajw reguidxaa. <sup>17</sup> Cheni bahuiireni loj rebejnğa, bijreni diidx xhi räjp rexangl Dios lojreni xcuent baze'ga. <sup>18</sup> Niluxh guiraa reni biejn diajg rediidxre bidxeloduxhreni xtidx rebaxtoorga. <sup>19</sup> Niluxh Marii gulucheeni guiraa rediidx ni biejn diajgni neñ lastooni, rujntisni xhigab xcuent rediidxga. <sup>20</sup> Dxejcti rebaxtoorga gubisacreni cayolreni, calä'pzareni xpala'n Dios xcuent guiraa rediidx ni biejn diajgreni näjza ni bahuiireni sa'csi guiraani gujc si'cni räjpreni lojreni.

### *Cheni huinäreni Jesús chuni bee*

<sup>21</sup> Che gudejd xhujñ dxej, huinäreni baze'ga chuni bee, dxejc gulälajrenini Jesús, lagajc laj ni räjp xangl Dios loj Marii guirilajni galooli guuni bázga.

<sup>22</sup> Che basa' redxej ni gac naya te nan si'cni gunibee toMoisés loj xquijtzni, huinäjreni baze'ga guedx Jerusalén, neñ guidoro gunabreni gacnäj Diosni par tejpas. <sup>23</sup> Bejnreni scree sa'csi caj lo guijtz xten Dios: “Guiraa rexingangaloo xten beñ guilia'tu lo sa'reni te gunreni xtzunä”, räjp Dios. <sup>24</sup> Bidzujñreni ro'c ca'reni te gojn si'cni rnibee rexquijtz Dios: “Tio'p gugue' o tio'p palombáz.”

<sup>25</sup> Neñ redxejga, neñ guedx Jerusalén rbäjz te dade' ni laa Simeón. Najcni te bensacduxh, randuxhni Dios, cabäjzni jiaäd te bejn ni gusläa rexpejn Israel. Rbäjz Sprit Dxañ xten Dios neñ lastoo Simeón. <sup>26</sup> Sprit Dxañ abejn gacbeeni dini guet ansde fiini loj Crist ni guxhal Dios. <sup>27</sup> Dxejcti räjp Sprit Dxañ xten Dios lojni chääni guidoro. Lañni yu'ni neñ guidoo, bidzujñ José con Marii, biädnäreni báz Jesús, te gunnäjreni Jesús nani rnibee xtidx Dios gunreni. <sup>28</sup> Dxejc gudääz Simeón baze'ga, gusloj calä'pni xpala'n Dios, räjpni:

<sup>29</sup> Dad, asajc gusaanlu guetä con yälrbecdxilajz, sa'csi abasooblu nani bia'n diidx gunnäjlu xmoslu.

<sup>30</sup> Sa'csi abahuiloä nani siädgusläa nuurnu neñ dojl,

<sup>31</sup> ni abasujlu nez loj guiraa reben guedxliuj.

<sup>32</sup> Laani najc bianij ni susanij loj rebejn ni di gac xpejn Israel, näjza nani gac xpala'n rexpejnlu guedx Israel, lajdxlu.

<sup>33</sup> Bidxeloj José näjza xnan Jesús rediidx ni canii Simeón xcuent baze'ga. <sup>34</sup> Dxejc benle' Simeón yejcreni, dxejc räjpni lo Marii xnan Jesús:

—Bahuii gan; bāze're biāād te loj rexpejn Israel chu reni sibälaz xtiidxni, te chuza reni sililajz xtiidxni. Laani gacni te seen nani sibälaz bejn,<sup>35</sup> te si'c jienloj xhi xhigab rujn cade tej rexpejn Israel neñ lastooreni. Dxejcti par luj sajnci asdoo chääz te spaad lastoolu, sa'csi gac-huinduxh lastoolu.

<sup>36</sup> Suga'za te nane' ni laa Ana ro'c, rniini xtidx Dios xcuent recos ni churu gac. Najcni xindxa'p Fanuel, ni najc famil xten Aser. Anajcni bengolduxh. Bachñaani che najcni dxaphuin, luxh gajdztis ijz guläznäjni chäälni che bia'nni biuud.<sup>37</sup> Najcni te gunabiuud ni yu' tajbitajp ijz. Diruni guirii guidoro, ro'ctis yu'ni dxej, yääl te yu'tisni lo Dios con yälrucua'n näjza yälrbedx-rniab lo Dios.<sup>38</sup> Che gubigni lojreni lagajc dxejc, badeedni xquixtios lo Dios sa'csi abidzujn tej ni gusläa rebejn lo dojl. Dxejc gusloj caniini diidx xcuent bāz Jesús loj guiraa renani cabājz yälrusläa xten Jerusalén.

### *Che gubi'reni guedx Nazare't*

<sup>39</sup> Che gulujx bejn xcuzajnni guiraa recos ni caj lo xquijtz Dios gunreni, gubisacreni Galilee, lo guedx Nazare't, lajdxreni.<sup>40</sup> Gunís biuxe'ga, guc nadaanni, guc nasiñruzani sa'csi cayacnāj Diosni.

### *Che biu' Jesús guidoro*

<sup>41</sup> Casob ijz rij rexuczajn Jesús guedx Jerusalén te rinäreni te gojn xten lanij pascw.<sup>42</sup> Che basa' Jesús tzubitio'p ijz, huij guiraareni guedx Jerusalén si'c najc costumbr gac lanijga.<sup>43</sup> Che gulujx lanijga, gubisacreni. Bia'n Jesús guedx Jerusalén, luxh nicla xnanni niclaza José direni niacbee bia'nni.<sup>44</sup> Bejnreni xhigab pet siädsanājni rebensa'ni. Si'c guzajreni tebdxej, dxejc gudiilrenini loj resa'reni, näjza loj reni rumbeereni,<sup>45</sup> direni nidxälni. Dxejc gubisacreni guedx Jerusalén te huitiilrenini ro'c.

<sup>46</sup> Choñ dxej gudiilrenini dxejc bidxälrenini neñ guidoro, sobga'ni nez galäii rebejn ni najn leii, cacuadiajgni xtiidxreni, cayujnzani yälgunabdiidx lojreni.<sup>47</sup> Luxh guiraareni cacuadiajg xtiidxni, cadxeloduxhreni yäl'najn xtenni, näjza rediidx ni cagudzu'ni lojreni.<sup>48</sup> Che bahuii rexuczajnni lojni, bidxeløjreni. Dxejc räjp xnanni lojni:

—Xi'nä, ¿xhicuent bennäjlu nuurnu scree? Narä näjza xtadlu cayunduxhnu xhigab caguiilnu luj nezree, nezre'c.

<sup>49</sup> Dxejcti räjp Jesús lojreni:

—¿Xhicuent caguiiltu narä? ¿La ditu gan riäjł gunä xtzun Xtadä, ä?

<sup>50</sup> Luxh laareni direni niacbee rediidx ni guniini lojreni.

<sup>51</sup> Dxejcti gubinājnirenini guedx Nazare't, sanuuni rusoobni xtiidxreni. Luxh Marii gulucheetisni guiraa recosre neñ lastooni.<sup>52</sup> Duurtis gunís Jesús, caroobruza xcäl'najnni. Sanälajz Diosni, sanälajzza guiraa rebejnni.

## 3

### *Yälrusule' Juan ni rutiobnis*

*(Mt. 3:1-12; Mr. 1:1-8; Jn. 1:19-28)*

<sup>1</sup> Neñ redxej cheni agujc tzuun ijz najc Tiberio César reii, Poncio Pila't najc gobernador xten Judea; Herodes najc gobernador xten Galilee; Felipe, bejtz Herodes najc gobernador xten Iturea näjza Traconite; Lisantias najc gobernador xten Abilinia.

<sup>2</sup> Lagajc neñ redxejga Anás näjza Caifás najc rebixhojzro xten guidoro guedx Jerusalén. Neñ redxejga biāād xtidx Dios lo Juan, xi'n Zacari'i cheni rbājzni nez lo reyubijdz.<sup>3</sup> Ni'c cuanzaj Juan guideb nez reyuj xten gueu Jordán, ro'c basule'ni xcuent yälrusiechljajz, yälrobnis ni nanab gunreni te gudzucaj Dios xtojłreni.<sup>4</sup> Si'cni caj lo xquijtz Isaías, dade' ni gunii xtidx Dios, cadre räjpni:

Riejn xse' te ni rbedxa' nez loj reyubijdz:

“Colyunsac xnezyuj Dad, colslii rexnezyulajzni.”

<sup>5</sup> Guiraa cadre sojb gueed sidxe'ni,

guiraa relom sibicajreni,  
guiraa renezyuj ni xhet naliidi, siliireni,  
guiraa renezyudxuudx, sacsacreni.

<sup>6</sup> Dxejcti guiralii bejn suhiii loj nani guxhal Dios.

<sup>7</sup> Che bahuii Juan siääd xhidalduxh bejn te guirobnisreni, räjpni lojreni:

—¡La'tu beñguijdx ni najc si'c bälñialajz! ¿Chuni'c balijdxtu guxuntu loj xcälrdxe'ch Dios ni siädgajxh, ä? <sup>8</sup> Colguchaa xmoodtu te si'c fii bejn guliini abasiechljaztu. Na'c cuentis rniitu lagajc neñ lastootu “Abram najc xtadnu”, sa'csi narä rniä lojtu, sajc xca' Dios reguijre te con laareni guncheeni bejn gac rexagdoo toAbram. <sup>9</sup> Aguibyajg naga' cuä' xlobaa reyajg; ni'cni guiraa reyajg nani di ninexhsa'c xcaj lojni, sidinreni te checreni.

<sup>10</sup> Dxejcti gunabdiidx rebejn lojni, räjpreni:

—¿Xhini'c nanab jiennu?

<sup>11</sup> Dxejc badzu' Juan diidxre räjpni:

—Ni rajp tio'p xhajbni, sugudeedni tejni lo bejn ni xhet rajpdi. Sigajcza gun reni rajp xhi gaureni, quisrenini loj ni xheti xhi gauni.

<sup>12</sup> Näjza gaii bejn nani rusquijx xcuent reimpuet bidzujñ lojni te guirobnisreni, dxejc gunabdiidxreni lo Juan räjpreni:

—Dad, mastr, ¿xhini'c nanab jiennu?

<sup>13</sup> Räjp Juan lojreni:

—Na'c gusquijxtu bejn maazdi ni nungäjñ quiixreni.

<sup>14</sup> Näjza gaii resoldaad gunabdiidx lojni räjpreni:

—¿Nurnu a'? ¿Xhini'c nanab jiennu?

Dxejc räjpni lojreni:

—Na'c guchejbtu bejn; na'c gäbtu chale'ctu xcälquij bejn ni xhet bejndi parsi guni-idxreni meel lojtu; colbalaznäj nani rujntu gaan.

<sup>15</sup> Cadxeloj rebejn, cayujñreni xhigabduxh, naareni, “pet Juan najc Crist ni jiääd.”

<sup>16</sup> Dxejc badzu' Juan diidxre, räjpni loj guiraa rebejn:

—Guliipac rutiobnisä la'tu con nis, luxh siääd tej ni sajcro loä, nani nicla gac surloä, cuää xcura'chni. Laani sutiobnisni con Sprit Dxan xten Dios te cuääzni neñ lastootu näjza con guiboo, sa'csi rajpruni yälñibee loä. <sup>17</sup> Aca'ni pal te gusiani triuu te cuääni triusa'c lo guijxh te cucheeni triuu neñ ngodx xtenni, dxejcti reguixhtriuuga suze'cnini lo bajñ ni rejç par tejpas.

<sup>18</sup> Rediidxre näjza xhidajñ yälñulijdx gunii Juan te basule'ni redidxcoob loj rebejn.

<sup>19</sup> Näjza lo Herodes ni najc gobernador basule' Juan diidx, gudilñajnini sa'csi xhet laadi cayujñni, sa'csi rbäznäjni Herodías, chääl bejtzni Felipe, näjza xcuent sgaii dojñ ni bejñni.

<sup>20</sup> Di Herodes niu xtidx Juan, alga bejñni stee dojñ, basälñi Juan neñ latzguib.

### *Che gurobnis Jesús*

*(Mt. 3:13-17; Mr. 1:9-11)*

<sup>21</sup> Che batiobnis Juan rebejn, näjza Jesús birobnis. Cheni cabedx-canabni lo Dios, bixal xhaguibaa, <sup>22</sup> dxejc biäjñ Sprit Dxan xten Dios si'c te palom, bidzujñni cadre suga' Jesús. Dxejc xhaguibaali biejn xse' te ni räjp:

—Luj, najclu xi'nä ni sanälazä. Rbanälazduxhä luj.

### *Resa' Jesús*

*(Mt. 1:1-17)*

<sup>23</sup> Yu' Jesús galbitzuu ijz che gusloj cayujñni dzuun ni badeed Dios gunni. Rchalo rebejn najcni xi'n José, xi'n Elí. <sup>24</sup> Elí gujc xi'n Matat. Matat gujc xi'n Leví. Leví gujc xi'n Melqui. Melqui gujc xi'n Jana. Jana gujc xi'n José. <sup>25</sup> José gujc xi'n Matatías. Matatías gujc xi'n Amós. Amós gujc xi'n Nahum. Nahum gujc xi'n Esli. Esli gujc xi'n Nagai. <sup>26</sup> Nagai gujc xi'n Maat. Maat gujc xi'n Matatías. Matatías gujc xi'n Semei. Semei gujc xi'n José. José



gujc xi'n Judá. <sup>27</sup> Judá gujc xi'n Joana. Joana gujc xi'n Resa. Resa gujc xi'n Zorobabel. Zorobabel gujc xi'n Salatiel. Salatiel gujc xi'n Neri. <sup>28</sup> Neri gujc xi'n Melqui. Melqui gujc xi'n Adi. Adi gujc xi'n Cosam. Cosam gujc xi'n Elmodam. Elmodam gujc xi'n Er. <sup>29</sup> Er gujc xi'n Josué. Josué gujc xi'n Eliezer. Eliezer gujc xi'n Jorim. Jorim gujc xi'n Matat. <sup>30</sup> Matat gujc xi'n Leví. Leví gujc xi'n Simeón. Simeón gujc xi'n Judá. Judá gujc xi'n José. José gujc xi'n Jonán. Jonán gujc xi'n Eliaquim. <sup>31</sup> Eliaquim gujc xi'n Melea. Melea gujc xi'n Mainán. Mainán gujc xi'n Matata. Matata gujc xi'n Natán. <sup>32</sup> Natán gujc xi'n David. David gujc xi'n Isaí. Isaí gujc xi'n Obed. Obed gujc xi'n Booz. Booz gujc xi'n Salmón. Salmón gujc xi'n Naasón. <sup>33</sup> Naasón gujc xi'n Aminadab. Aminadab gujc xi'n Aram. Aram gujc xi'n Esrom. Esrom gujc xi'n Fares. Fares gujc xi'n Judá. <sup>34</sup> Judá gujc xi'n Jacob. Jacob gujc xi'n Isaac. Isaac gujc xi'n Abraham. Abraham gujc xi'n Taré. Taré gujc xi'n Nacor. <sup>35</sup> Nacor gujc xi'n Serug. Serug gujc xi'n Ragau. Ragau gujc xi'n Peleg. Peleg gujc xi'n Heber. Heber gujc xi'n Sala. <sup>36</sup> Sala gujc xi'n Cainán. Cainán gujc xi'n Arfaxad. Arfaxad gujc xi'n Sem. Sem gujc xi'n Noé. Noé gujc xi'n Lamec. <sup>37</sup> Lamec gujc xi'n Matusalén. Matusalén gujc xi'n Enoc. Enoc gujc xi'n Jared. Jared gujc xi'n Mahalaleel. Mahalaleel gujc xi'n Cainán. <sup>38</sup> Cainán gujc xi'n Enós. Enós gujc xi'n Set. Set gujc xi'n Adán. Adán gujc xi'n Dios.

## 4

### *Che biricaj bendxab loj Jesús* (Mt. 4:1-11; Mr. 1:12-13)

<sup>1</sup> Jesús, sa'csi rbäjz Sprit Dxi'an xten Dios lastooni, biunejni gueu Jordán, dxejc huinã Sprit Dxi'an xten Diosni lo reyubijdz. <sup>2</sup> Ro'c bia'nni tiuu gubijdx, tiuu guxhijñ. Ro'c bidzujñ bendxab ni rnibee te rlanjñ gunni gusoob Jesús xtiidxiñ. Luxh calaan Jesús, sa'csi gajdñi gau guiraa neñ redxejga. <sup>3</sup> Dxejc räjp bendxab lojni:

—Palga guliilu Xi'n Dioslu, gunibee gac reguijre yätxtiil.

<sup>4</sup> Badzu' Jesús diidxi lojni räjpni:

—Acaj loj reguijtz xcuent Dios: “Xhet ganaxdi yätxtiil gun sajc guibajñ bejñ, näjza guiraa diidxi nani rnii Dios sujñ guibajñ bejñ.”

<sup>5</sup> Dxejcti huinã bendxab Jesús jiaa yejc te dajñ. Teratbäztis baluilojni guiraa reguedxro ni tre' lo guedxliuj. <sup>6</sup> Dxejc räjp bendxab lojni:

—Narã sunidxiã guiraa yälrnibee näjza reyälñasa'c ni yu' loj reguejdxga sa'csi xtenã guiraareni, luxh sajc gudedäni lo chutis ni rlazã. <sup>7</sup> Palga luj suzuxhijblu loã, guiliã'plu xpala'nã, guiraani sajc xtenlu.

<sup>8</sup> Dxejc Jesús badzu' diidxi, räjpni lojni:

—Acaj loj xquijtz Dios: “Dad Xtiostislu ganlu, luxh lojtisni chulu gunlu dzuun.”

<sup>9</sup> Dxejcti huinã bendxabni lo guedxi Jerusalén, huinänini jiaa yejc xques guidoro. Dxejc räjp bendxab lojni:

—Palga guliilu najclu Xi'n Dios, gutiäjs lo yuj <sup>10</sup> sa'csi si'c caj loj rexquijtz Dios: Suxhañ Dios rexanglñi te ga'preni luj,

<sup>11</sup> guiniaazreni luj didi jiajblu lo guij.

<sup>12</sup> Badzu' Jesús diidxi lojni, räjpni:

—Cajza lo rexquijtz Dios: “Na'c fallu Dad ni najc Xtioozlu.”

<sup>13</sup> Che baluux bendxab rextiidxiñ, gubicajni lo Jesús sa'csi dini niujñ gaan nusoob Jesús xtiidxiñ. Guläjzñi guidzujñ stee dxej te gusacsírñi Jesús.

### *Gusloj Jesús cayujñ xtzuunni* (Mt. 4:12-17; Mr. 1:14-15)

<sup>14</sup> Dxejc gubi' Jesús lo rexyuj Galilee räjpni yälrnibee xten Sprit Dxi'an. Bire'ch diidxi xcuentni guiraa neñ reguejdx ni tre' nejzga. <sup>15</sup> Ruluiini neñ reguidobãz luxh guiraa rebejñ rliã'p xpala'nni.

*Jesús guyu' guedx Nazare't*  
(Mt. 13:53-58; Mr. 6:1-6)

<sup>16</sup> Dxejcti huij Jesús guedx Nazare't cadro gulaani. Che gojl dxej ni rusilajz rexpejn Israel, biu'ni neñ guidobáz sigajc ni rujnpacni, dxejc huisuliini te bilni <sup>17</sup> reguijtz xten Dios. Badeedreni lojni guijtz ni bacuaa Isaías; cheni baxhalni guijtzga, bidxälni cadro rnii scree:

<sup>18</sup> Sprit Dxan xten Dios suganäj narä, sa'csi agule Dios narä te gusule'ä xtidxcoobni lo rebenproob. Baxhalni narä te gusiaca lastoo renani di lastooreni cuedxi, te gusule'ä yälruslaa lo rebejn ni yu' lo dojl, te gusiaca baloj reben lotiä'p, te guslää reben ni cadejd trabajw,

<sup>19</sup> te gusule'ä abiu' ijzsa'c che rulaslajz Dios rebejn.

<sup>20</sup> Dxejc basäu Jesús reguijtzga, badeednini loj bejn ni cayacnäy neñ guidooga, dxejc gurejni. Sa'csi guiraa rebejn ni sobga' neñ guidooga cahuidzu'tzreni lojni, <sup>21</sup> gusloj guniini, räjpni lojreni:

—Lagajc nadxej guzobj rediidx ni caj lo reguijtzre nez loj guiraatu.

<sup>22</sup> Guiraareni sarú guniireni xcuent Jesús, bedxeloduxhzareni redidxsaruduxh ni guniini lojreni. Gunabdiidxreni loj sa'reni, räjpreni:

—¿La et xi'ndi José dade're, ä?

<sup>23</sup> Dxejc räjp Jesús lojreni:

—Siniipactu rediidxre loä: “Doctoor, basiajc lagajc luj”; siniizatu loä: “Recos ni biejn diajgnu bejnlu nez guedx Capernaum, lagajc recosga bejn nez ree cadro najc lajdxlu.”

<sup>24</sup> Dxejc huinuu xtiidxni, räjpni lojreni:

—Rniliäpac lojtu, nicla tej redade' ni rnii xtidx Dios, di reben lajdxreni jiu xtiidxni.

<sup>25</sup> Luxh rniliä lojtu, che gubajn Elías lo guedxliuj, guyu' xhidajl gunabiuud guedx Israel che di nisguij niajb choñ ijz garol, dxejc guyu' yälrianduxh guideb guejdxga. <sup>26</sup> Luxh di Dios nuxhal Elías rolijz nicla tej regunabiuud ni guläjz guedx Israel, alga baxhalnini lo benzijt, rolijz te gunabiuud ni rbäjz Sarepta, gajxh guedx Sidón. <sup>27</sup> Sigajcza che gubajn Eliseo lo guedxliuj, guyu' xhidajl ben racxhuyu ni ral tiejxhrene guedx Israel, luxh dini nusiajc nicla tejreni, alga basiajcnini dade' ni laa Naamán, ni siääd te guedxzijt ni laa Siria.

<sup>28</sup> Che biejn diajg reni sobga' neñ guidoo rextidx Jesús, bidxecheduxhrene, <sup>29</sup> huisuliireni, guläärenini neñ guejdxga. Dxejc huinärenini yejc dajn cadro tre' guejdxga cadro yu' te balaro, te ro'c rlanjreni nustejbrenini. <sup>30</sup> Dxejc Jesús sigaj gudejdni galäiireni, sä'tini ste'ca lajt.

*Gulää Jesús bendxab lastoo te dade'*  
(Mr. 1:21-28)

<sup>31</sup> Dxejc huij Jesús guedx Capernaum, te guejdx xten Galilee. Ro'c gusloj cagusule'ni diidx loj rebejn che gojl dxej ni rusilajz rexpejn Israel. <sup>32</sup> Bidxeloduxhrene xtiidxni sa'csi rusule'ni si'c te benñajn, si'c te ni rnibee.

<sup>33</sup> Neñ guidooga suga' te dade' ni rbäjz te bendxab neñ lastooni. Guredxa'ni <sup>34</sup> räjpni:

—¡Aii! ¡Basaan nurru! ¿Xhicuent riädchu'lu loonu Jesús ni siääd Nasare't? ¿La siäädlu te gunitlojlu nuurnu, ä? Narä numbeälu, nanä najclu Xin Dxan Dios.

<sup>35</sup> Gudidxa' Jesús lo bendxabga, räjpni lojni:

—Basäu ro'lu, birii lastoo niguiire.

Dxejcti bendxabre basäl niguiiga lo yuj nez loj guiraareni, dxejc biriini neñ lastoo dade'ga, per xhet bejndini dade'ga. <sup>36</sup> Bidxeloduxh rebejnnga, dxejc gusloj caniireni lo sa'reni, räjpreni:

—¿Xhi diidx najc redee? Bahuii xho rnibee dade're rebendxab con yälrnibee, luxh rusoo rebendxab xtiidxni, riireni lastoo bejn.

<sup>37</sup> Dxejc gusäab xtidx Jesús lo guiraa reguejdx ni tre' guideb gabi guejdxga.

*Rusiajc Jesús xnan xueerg Pedr*  
(Mt. 8:14-15; Mr. 1:29-31)

<sup>38</sup> Birii Jesús guidobáz, huijni rolijz Simón. Dxejc naga' xnan sueerg Simón, cayacx-huuni, yu'ni xliaduxh. Sas gunabduxhreni lojni te gusiajcnini. <sup>39</sup> Gubig Jesús loj nane'ga, gudidxa'ni xliaaga, luxh lagajc orga biriini xliaa. Dxejc huistiegajcni, gusloj cayujnni mandaad, cahuiinireni.

*Rusiajc Jesús xhidajl yälracxhuu*  
(Mt. 8:16-17; Mr. 1:32-34)

<sup>40</sup> La<sub>l</sub> ni cayääz gubijdx, guiraa reni rajp be<sub>n</sub>racxhuu ni rajc garen garen yälracxhuu biäd<sub>n</sub>äreni rebejn<sub>g</sub>a lo Jesús. Dxejc laani batzuubni <sub>n</sub>aani yejc te<sub>j</sub>gareni, dxejc biajc re-be<sub>n</sub>racxhuuga. <sup>41</sup> Loj rebe<sub>n</sub>racxhuuga, yu'reni birii rebe<sub>n</sub>dxab ne<sub>n</sub> lastooreni, rbedxa'reni räjpreni:

—Luj najclu Xi'n Dios.

Luxh Jesús gudil<sub>n</sub>äj<sub>n</sub>i rebe<sub>n</sub>dxab, dini nusaa niniireni sa'csi laareni najnreni najcni Crist ni cabäjzreni.

*Rusule' Jesús xtidx Dios*  
(Mr. 1:35-39)

<sup>42</sup> Che bianij, biriini lo guejdx, huijni te lajt cadro rut rbäjzdi. Niluxh gudiil rebejn<sub>n</sub>i, dxejc bidzuj<sub>n</sub>reni cadro suga'ni. Rlajzreni nuscuääzrenini te di nuiini. <sup>43</sup> Dxejc Jesús räjp lojreni:

—Nanab cha'a chasule'ä rextidx xcuent xcäl<sub>r</sub>nibee Dios xhidajlr<sub>u</sub>za guejdx, ni'cni baxhalpac Dios narä.

<sup>44</sup> Dxejc si'ctis cuanzaj Jesús basule'ni xtidx Dios ne<sub>n</sub> guiraa reguidobáz ne<sub>n</sub> reguejdx xten Galilee.

## 5

*Che gunaazreni xhidajl bäjl*  
(Mt. 4:18-22; Mr. 1:16-20)

<sup>1</sup> Cheni suga' Jesús ro' nis ni laa Genesare't, gubig xhidajl bejn<sub>n</sub> lojni te jiejn diajgreni xtidx Dios. <sup>2</sup> Dxejc bahuii Jesús tio'p barcw ni suga' ro' nisga, rud yu'di ne<sub>n</sub>reni sa'csi rebejn<sub>n</sub> ni rniaaz bäjl abiriireni ne<sub>n</sub> rebarcw te caguibreni xquijxh<sub>n</sub>eni ro' nisga. <sup>3</sup> Dxejc biu' Jesús ne<sub>n</sub> te barcw ni najc xten Simón, dxejc gunab Jesús chää barcwga lo nis te la', te guibicajni ro' yuj. Dxejc gurej Jesús ne<sub>n</sub> barcwga, ro'cli guslojni caguluiini rebejn<sub>n</sub>. <sup>4</sup> Che gulujx xtiidxni, räjpni loj Simón:

—Huinä barcw cadro jä<sub>t</sub>ru, col<sub>c</sub>uaa xquijxhtu lo nis te guiniaaztu bäjl.

<sup>5</sup> Räjp Simón lojni:

—Mastr, guideb yääl biennu dzuun, luxh dinu niniaaz nicla tej bäjl, niluxh <sub>n</sub>aj agunibeelu gusäl<sub>s</sub>acnu guijxh lo nis.

<sup>6</sup> Cheni basäl<sub>r</sub>eni xquijxh<sub>n</sub>eni lo nis, gunaazreni xhidalduxh bäjl, dxejc guslojli caräjs xquijxh<sub>n</sub>eni. <sup>7</sup> Dxejc bejnreni seen loj resa'reni ni yu' ne<sub>n</sub> stee barcwga te jä<sub>d</sub>ya<sub>c</sub>näjreni. Bidzuj<sub>n</sub>tireni, bachajreni guiro'p barcw. Gudxaduxh rebarcw, ameer niääzreni ne<sub>n</sub> nis.

<sup>8</sup> Che bahuii Simón Pedr recosre, bazuxhijbni nez loj Jesús, dxejc räjpni:

—Gubicaj loä Dad, sa'csi narä nacä te be<sub>n</sub>doj<sub>l</sub>.

<sup>9</sup> Si'c gunii Simón sa'csi bidxejb laani näjza guiraa rebejn<sub>n</sub> ni yunäj<sub>n</sub>i sa'csi gunaazreni xhidalduxh bäjl. <sup>10</sup> Näjza Jacoob näjza Juan, rexi'n Zebedeo, ni runnä<sub>j</sub> Simón dzuun, näjzaren<sub>n</sub>i bidxejbreni. Per Jesús räjp lo Simón:

—Na'c guidxejblu, <sub>n</sub>ajli guisloj cuedxlu bejn lacuaa ni guiniaazlu bäjl.

<sup>11</sup> Dxejc, che bidzunnäjreni rebarcw ro' nis, basa'nreni guiraa xhixtenreni, te sanajlreni Jesús.

*Basiajc Jesús te bejn ni ral tiejxhni**(Mt. 8:1-4; Mr. 1:40-45)*

<sup>12</sup> Cheni guyu' Jesús tej reguejdx, bidzujn te bejn lojni ni rajc lepra te yälguidxduxh ni ral tiejxhni. Che bahuiini loj Jesús, bazuxhijbni, basajbni lojni lo yuj, räjpni lojni:

—Dad, palga rlajzlu, sajc gusiajclu narä.

<sup>13</sup> Dxejc batzuub Jesús naani yejcnä räjpni lojni:

—Rlazä jiajclu. Susiacälu.

Che guniini rediidxre, biacgajc bejn racxhuuga. <sup>14</sup> Dxejcti gunibee Jesús lojni rut lojdi gabni xhi guzajcni. Räjpni lojni:

—Huijtis lo bixhojz te fini lojlu, huisa'nza gojn xcuent ni biajclu si'cni rnibee xleii Moisés, te filoj rebejn abiajclu.

<sup>15</sup> Luxh xpala'n Jesús sanuutis cayä'pruni, guixe-guixee care'ch diidx xcuentni. Rdojpa xhidalduxh bejn te gucuadiajgreni xtidx Jesús näjza te gusiajcnä yälracxhuu xtenreni. <sup>16</sup> Yu'za huält riunejz Jesús rijni relajt cadro ruti rebejn, te ro'c rbedx-rniabni lo Xtadni Dios.

*Basiajc Jesús te bejn ni digacdi guiniib**(Mt. 9:1-8; Mr. 2:1-12)*

<sup>17</sup> Te dxej lalni caguluiini rebejn, nejzga sobga' gaii farisee näjza gaii bejn ni ruluii leii garen-garen reguejdx, siädreni guideb nez reguejdx xten Galilee, näjza región Judea, näjza guedx Jerusalén. Dxejc huenliisi rluloj suganäj xcälrnibee Dios Jesús te rajc russiajcnä rebenracxhuu. <sup>18</sup> Dxejc bidzujn gaii dade' nuureni lo te lonbäz te bejn ni digacdi guiniib, rlajzreni gusiu'renini nen yu' te quixhrenini nez loj Jesús. <sup>19</sup> Niluxh direni nidxäl canejz niu'reni sa'csi nadäduhx ro'c sa'csi tre' xhidajl rebejn. Dxejc huäpnäjrenini yejc yu'ga, badzucajreni gaii tej, dxejc basajbreni xloon bejn racxhuuga yejcli yu'ga te gujc bidzujn ni nez loj Jesús. <sup>20</sup> Che bahuii Jesús yälirililajz xtenreni, räjpni loj bejn racxhuuga:

—Dade', agubicaj xtojllu.

<sup>21</sup> Dxejc rebejn ni ruluii leii näjza refarisee gusloj cayujnreni xhigab, naareni: “¿Chucha niguiire ni caniyajni Dios con rextiidxni? Ruti te bejn ni sajc gudzucaj xtoj l rebejn, Diostis rudzucaj dojl.”

<sup>22</sup> Dxejc gucbee Jesús xhi xhigab cayujnreni, ni'c räjpni lojreni:

—¿Xhicuent rujntu xhigab si'c nen lastootu? <sup>23</sup> ¿Xhini'c najc guyasiru guiniini: “Agubicaj rextojllu”, o guiniini: “Huistie, guzaj”, ä? <sup>24</sup> Mbaj naj, suluiä nez lojtu Xi'n Dios ni gujc Xi'n Niguii rajp yälrnibee, yäl nadip lo guedxliujre te gudzucajni xtoj l rebejn.

Dxejc räjpni lo bejn ga ni digacdi guiniib:

—Lojlu rniä, jhuistie, guläs xloonlu, huij rolijzlu!

<sup>25</sup> Lagajc dxejc nez lojreni huistiegajc bejn ni digacdi guiniib, guläsni xlooni cadro naga'ni, dxejc siini rolijzni, calä'pni xpala'n Dios.

<sup>26</sup> Guiraareni rdxeloduxhreni recosga, dxejc guslojreni calä'preni xpala'n Dios, rdxejblireni räjpreni:

—Abihuiinu cosro, cos ni guidxeloj bejn nadxej.

*Rbejdx Jesús Leví**(Mt. 9:9-13; Mr. 2:13-17)*

<sup>27</sup> Che gudejd gulujx recosre, birii Jesús ro'c. Dxejc bahuiini lo te bejn ni rusquijx xcuent impuest, nani laa Leví. Sobga'ni lo te mex cadro rusquijxni impuest; ro'c bahuii Jesús lojni. Räjp Jesús lojni:

—Gudanajl narä.

<sup>28</sup> Dxejc huisu Leví, basa'nni guiraa recosga, dxejc sanajlni Jesús.

<sup>29</sup> Dxejc bejn Leví te lanij rolijzni par Jesús. Biääd xhidajl bejn ni rusquijx xcuent impuest näjza sgaii bejn; sobganäjnireni lo mex. <sup>30</sup> Dxejcti refarisee näjza rebejn ni ruluii leii guslojreni cayeinäjreni rexpejn pac Jesús, räjpreni:

—¿Xhicuent raunäjtu, ränäjtu rebejn ni rusquijx impuest näjza rebejdojl, ä?

<sup>31</sup> Dxejc badzu' Jesús diidxre, räjpni lojreni:

—Rebejn ni nadaan di guiquiin te doctoor, ganaxtis rebejn nani racxhuu rquiinreni te doctoor. <sup>32</sup> Dina niädtedxä rebeñsa'c, narä biädtedxä rebejdojl te gusiechlazreni.

*Gunabdiidxreni loj Jesús xcuent yälrucua'n*

*(Mt. 9:14-17; Mr. 2:18-22)*

<sup>33</sup> Dxejc gunabdiidx rebejn ga loj Jesús, räjpreni:

—¿Xhicuent lacti rucua'n rexpejn Juan näjza rexpen refarisee, lacti rbedx-rniabreni loj Dios; niluxh rexpejn paclu alga rajwreni, rä'reni?

<sup>34</sup> Badzu' Jesús diidxre lojreni, räjpni:

—¿La sajc gucua'n rebejn ni yu' lo te sa' lañi yunäjreni bi'n, ä? <sup>35</sup> Niluxh sidzujn dxej cheni sibicaj bi'n lojreni, dxejc sii sucua'nreni.

<sup>36</sup> Guniiza Jesús cuentre lojreni, räjpni:

—Rut rucuaadi te remiend ladcoob loj te ladyujxh, sa'csi che rxu'n ladcoob rutiäjzni ladyujxhga, dxejc xhiroobruni guiräjs, luxh diza ladcoob guchaag lo ladyujxh. <sup>37</sup> Di gacdi gusälñi bincoob neñ te guidbiejw sa'csi bincoobga sutiäsyä'ni guidbiejwga dxejc sixe' binga, sixijnza guidbiejwga. <sup>38</sup> Ni'cni nanab gusälñi bincoob neñ guidcoob si'c sigucheeza guiro'preni. <sup>39</sup> Luxh nicla tej bejn ni agu' bin ni yu' agujc xchej rlazj yä bincoob, sa'csi säjbni: “Bin ni yu' agujc xchej najc huenru.”

## 6

*Rutie' rexpejn Jesús triuu dxej nani rusilajzreni*

*(Mt. 12:1-8; Mr. 2:23-28)*

<sup>1</sup> Te dxej ni rusilajz rexpejn Israel sasaj Jesús näjza rexpejn pacni nez loj reyuj cadro naga' triuu. Dxejc, sa'csi calaanreni gusloj caläädxreni doj lo triuu te cayajwrenini.

<sup>2</sup> Dxejc gunabdiidx gaii refarisee ni najc beñguidoo, räjpreni lojreni:

—¿Xhicuent rujntu dzuun ni di nungäjñ guntu che rajl dxej ni rusilajznu?

<sup>3</sup> Dxejc räjp Jesús lojreni:

—¿La gajdtu goñ loj reguijtz xhi bejn toDavid cheni calannäjni rebejn nani sanäni, ä? <sup>4</sup> Biu'ni neñ xquidoo Dios, gudajwni yätxtiil nani di nungäjñ gau bejn sa'csi xtebtis rebixhojz rajc rajwni, luxh badeedni yätxtiilga gudajw resa'ni.

<sup>5</sup> Räjpza Jesús lojreni:

—Sigajcza narä, Xi'n Dios ni gujc Niguui, rnibeä dxej ni rusilajznu.

*Niguui ni nabijdz ñaani*

*(Mt. 12:9-14; Mr. 3:1-6)*

<sup>6</sup> Che gojñ stee dxej ni rusilajz rexpejn Israel, biu'ni neñ te guidobäz, dxejc guslojni caguluiini rebejn. Lagajc ro'c sobga' te dade' ni nabijdz ñaani ladbee. <sup>7</sup> Dxejc remastr xten leii näjza refarisee cagula'tzreni te don la susiajnci bejn ga dxej ni rusilajzreni, sa'csi caguuilreni xho gucuaquijreni Jesús. <sup>8</sup> Niluxh laani najnni xhi xhigab cayujnreni, dxejc guniini lo dade' ni nabijdz ñaani, räjpni:

—¡Huisulii! ¡Gudaa nez galäiire!

Dxejc huisulii bejn ga, gubigni lojni. <sup>9</sup> Dxejc räjp Jesús lojreni:

—Rlazä guiniabdidxä lojtu dee: ¿Xhini'c najc huen gunni che rajl dxej ni rusilajznu? ¿La te dzunsa'c o la te dzunguijdx? ¿La gacnäjn bejn laa xcälñabajñni o la gudzucajnu yälñabajñni, ä?



<sup>10</sup> Che gulujx bahuii Jesús loj guiraa rebejn ni tre' guideb gabini, räjpni loj bejn ni nabijdz naani:

—¡Baslii naalu!

Dxejc bejn si'c, luxh biacgajc naani. <sup>11</sup> Dxejc bidxechduxh rebejn ni tre' ro'c, gusloj canabdiidxreni lo sa'reni xhi gunnäjreni Jesús.

*Gule Jesús guitzubitio'p rexpejn pacni*

(Mt. 10:1-4; Mr. 3:13-19)

<sup>12</sup> Nen redxejga, huij Jesús loj te dajn te huininäjni Xtadni Dios. Ro'c gudejdni yääl cabedx-canabni lo Dios. <sup>13</sup> Che bianij lo yuj, gurejdxni rexpejn. Ro'c guleni tzubitio'preni te gacreni xpejn pacni. Gulälajni reapost. <sup>14</sup> Renani guleni najc Simón ni gulälajni Pedr; Andrés, bejtz Simón; Jacob; Juan; Felipe; Bartolomé; <sup>15</sup> Mateo; Tomás; Jacob xi'n Alfeo; Simón ni nagab loj rexpen cananista; <sup>16</sup> Judas, bejtz Jacob; näjza Judas Iscariote ni guto' Jesús loj rebixhojz.

*Rului Jesús xhidajl bejn*

(Mt. 4:23-25)

<sup>17</sup> Che biätinäj Jesúsreni yejc dajnga, guzudxireni yejc te danbäz sa'csi suga' xhidajl bejn ro'c. Siädreni guiraa nez reguedx Judea, näjza guedx Jerusalén näjza reguejdx ni tre' gajxh nisdoo Tiro con Sidón. Rebejnga bidzujnreni te gucuadiajgreni xtidx Jesús, te gusiajczanireni xcälracxhuureni. <sup>18</sup> Guiraa ni rdejdza trabajw yu' bendxab nen lastooreni näjza reni'c biajc. <sup>19</sup> Guiraa rebejn rlanj caan Jesús, sa'csi rusiajcní guiraareni con xcälrnibeeni.

*Balijdx Jesús rebejn*

(Mt. 5:1-12)

<sup>20</sup> Dxejc bahuii Jesús loj rexpejn pacni räjpni lojreni:

—Chicbaatu, bejn nani xheti xhixtentu, sa'csi xtentu najc cadre rnibee Dios xh-aguibaa.

<sup>21</sup> 'Chicbaatu, bejn nani calaan naj, sa'csi suniidx Dios lojtu nani rniabtu.

'Chicbaatu, bejn nani roon naj sa'csi susiäjl Dios lajztu dxejcru suxhijztu.

<sup>22</sup> 'Chicbaatu, bejn nani rdxechlajz bejn lojtu, rbääreni la'tu te laad, rniyajreni la'tu, luxh rbälazreni lajtu si'c te cos guijdx sa'csi rililajztu xtidx Xi'n Dios ni gujc Niguii.

<sup>23</sup> Colguibalajz nen redxejga, na'c gac-huin lastootu sa'csi sunidxduxh Dios xhi xtentu xhaguibaa. Sigajcza basacsí retoxtadgoldooreni rebejn nani gunii xtidx Dios galoo.

<sup>24</sup> 'Probe'zatu, la'tu benrajp, sa'csi agojptu xcäl'nasa'ctu, xcäl'rbalajztu lo guedxliujre.

<sup>25</sup> 'Probe'tu nani rajp guiraloj xhixtentu naj, sa'csi sidejdtu yälrliaan.

'Proobzatu ni ruxhijztu naj, sa'csi sonduxhtu sidejdtu yälhuinduxh, yäl'nalas.

<sup>26</sup> 'Probe'tu palga rliä'p rebejn xpala'ntu naj, sa'csi si'c bejn retoxtadgoldooreni rebejn ni gunii didx-xhii lacuaa niniireni xtiidxpac Dios.

*Chanälajzni rebejn nani rdxe'ch lojni*

(Mt. 5:38-48; 7:12)

<sup>27</sup> Räjpzani:

—La'tu ni cacuadiajgtu rextidxä rniä diidxre lojtu: colchanälajz rebejn ni rdxe'ch lojtu, colyujn dzunsa'c loj rebejn ni rdxechlajz lojtu. <sup>28</sup> Benle' yejc rebejn ni rgube la'tu. Gunab lo Dios xcuent rebejn ni rcuaquij la'tu. <sup>29</sup> Palga yu' chu rlanj quiin te laad lojlu, badeedza stelaad quiinni. Palga yu' chu gudzucaj xhablojiaalu, badeedza näj xcamangwlu xca'ni. <sup>30</sup> Xhitis ni guiniabreni lojlu, badeedni; ni gudzucaj te xhi xtenlu lojlu, na'c guiniabsacluni lojni. <sup>31</sup> Sigajc ni rlanjzlu gunnäj bejn la'tu, si'cza la'tu colyennäj bejn.

<sup>32</sup> 'Palga la'tu sanälajztistu rebejn nani sanälajz la'tu, xlia'sini, sa'csi sigajcza rujn rebendojl. <sup>33</sup> Palga guntu hueen lojtis rebejn ni rujn hueen lojtu, xhet laadi cayujntu,

sa'csi sigajcza rujn rebejn ni nabajn nen dojl. <sup>34</sup> Palga gudedlaatu lojtis reni rujntu xhigab gunidxsacni lojtu, ¿xhi cos hueen rchalotu rujntu? Ni rebendojl rudedlaazareni loj rebejn ni najnreni siguixsac ni nasääbreni. <sup>35</sup> La'tu, nanab chanälajztu rebejn ni rdxe'ch lojtu, guntu hueen lojreni, gudedlaatu loj rebejn, na'c gunlojtu xcasactu recos ni rudedlaatu, te si'c guroob gac nani guzalajz Dios lojtu; te si'c gactu xi'n Gueb Dios ni nabajn xhaguibaa. Sa'csi si'cza najc Dios huenduxh loj reni di gudeed xquixtios lojni, näjza loj rebendojl. <sup>36</sup> Colgulaslajz resa'tu si'c rulaslajz Xtadnu Dios guiraa rebejn.

### *Colgulaslajz sa'tu*

*(Mt. 7:1-5)*

<sup>37</sup> Räjpzani:

—Na'c guntu yälguxhtis nani rujn bejn, naatu xhet laadi rujnni; te na'cza gun Dios yälguxhtis rextojltu. Na'c gucuaquijtu bejn te sigajcza di Dios gucuaquij la'tu. Colgusiäjl-lajz dojl ni rujn sa'tu, te si'cza gusiäjl-lajz Dios rextojltu. <sup>38</sup> Colgudeed loj bejn ni rquiinreni te si'cza guzalajz Dios ni rquiintu. Suniidxreni xca'tu te mediid guidxadoo, sibetijp ni yu' nen, cupe'tlini gusalreni nen xpolstu. Dios suniidx lojtu lagajc con mediid ni rudeedtu loj rebejn.

<sup>39</sup> Guniiza Jesús stee cuent räjzni:

—¿La sajc guluii te bejn lotiä'p nez yuj lo stee bejn lotiä'p, ä? ¿La di guiro'preni guitejb nen te gueed, ä? <sup>40</sup> Te bejn ni casieed di gacdi guisieedruni loj ni najn xmastrni. Te bejn, che agulujx bisieedni, sajcn si'cni najc mastr xtenni.

<sup>41</sup> ¿Xhicuent cahuiilu guixhe' ni yu' baloj bejtzlu, luxh dilu fii yagro ni yu' balojlu? <sup>42</sup> O, ¿xho mood gäblu lo bejtzlu: “Guidon cuää guixhe' ni yu' balojlu”; luxh dilu gachee yu' te yagro balojlu, ä? ¡Benguijdx! Guläxgaa yagro ni yu' balojlu, dxejc sajc fisa'clu te cuäalu guixhbäz ni yu' baloj bejtzlu.

### *Ninexhsa'c ni rcaj loj te yajg sujn gumbeeni yajg*

*(Mt. 7:17-20; 12:34-35)*

<sup>43</sup> Räjpzani:

—Xheti te yagsa'c ni rudeed ninejxh ni xhet sajcdi, xhetiza te yajg ni xhet sajcdi ni rudeed ninexhsa'c. <sup>44</sup> Sa'csi tebgaj reyajg rusenlojni xhi yajgni xcuent ninejxh ni rcaj lojni. Di bejn gutie' iigw lo reyaguejch, diza bejn gutiu' uub lo te yag balagrej. <sup>45</sup> Rebeñsa'c rnii didxsa'c, sa'csi xhigabsa'c yu' nen lastooni. Niluxh rebenguijdx rnii ganax didxguijdx sa'csi xhigabguijdx yu' nen lastooni, sa'csi ro'ni rnii nani yu' nen lastooni.

### *Tio'p bejn ni benchee tio'p yu'*

*(Mt. 7:24-27)*

<sup>46</sup> Räjpzani:

—¿Xhicuent rniitu loä: “Dad, Dad,” luxh ditu gun nani rniä guntu? <sup>47</sup> Guiniä lojtu chuni'c najc si'c bejn ni riääd loä, rucua diajgni xtidxä luxh rusoobni xtidxä. <sup>48</sup> Najcni si'c te bejn ni benchee rolizni, ganid gudäänni jiät, dxejcti bejnii cimient yejc te guilaj. Cheni biäjt nisro ro' gueuu, bidijn nisro cuä' yu'ga, luxh nicla nusniibnini, sa'csi yu'ga sobgadzu'tz yejc te guilaj. <sup>49</sup> Niluxh reni rcua diajg xtidxä, dxejc direni guzoob xtidxä, najcreni si'c te bejn ni bejn xyu'ni loj yujxh, dini niujn cimient xten yu'ga. Dxejcti biäjt nisro, bidijnni cuä' yu'ga, dxejc li gurebä'n yu'ga, gunitlojtini.

## 7

### *Basiajc Jesús xmos te beñ roman ni rnibee*

*(Mt. 8:5-13)*

<sup>1</sup> Che gulujx gunii Jesús loj rebejn, huijni te guejdx ni laa Capernaum. <sup>2</sup> Ro'c yu' te beñ roman ni rnibee, yu' te mos lojni, luxh sanälazduxhni mosga. Cayacxhuduxh mosga,

ameerli guetni. <sup>3</sup> Che biejn diajg capitán cagusá'treni Jesús, baxhalgajcni gaii bengool lo rexpejn Israel te chagajreni Jesús jiädni te gusajcni xmos dade'ga. <sup>4</sup> Che gubigreni loj Jesús, gusloj gunabduxhreni lojni, räjpreni lojni:

—Dade're najc beñsa'c, nungäjl gacnäjluni <sup>5</sup> sa'csi sanälajzni lajdx rexpejn Israel, luxh lagajc laani gunibee guc-chee xquidobäznu.

<sup>6</sup> Dxejcti huinä Jesúsreni. Cheni siäddzungenajxhreni royu', baxhal capitánga gaii xamiigwni, gäbreni loj Jesús:

—Si'c naj capitán: “Di rlazä gotalä xtzuunlu. ¿Chu narä te jiu'lu rolizä? Xhet sacädi.

<sup>7</sup> Ni'c dina niapä baloor te lagajc narä niädganä guejblu, sa'csi rajplu yälrnibeduxh niluxh narä rut nacädi. Ni'cni gunibeetis jiajc xmosä, luxh laani siacgajcni. <sup>8</sup> Sa'csi narä nacä xmos rebejn ni rnibee, luxh rnibeäza loj resoldaad. Che gäpä lo tejni: Huij rec, rijni; che gäpä loj steeni: Gudaa ree, riädni; che gäpä loj xmosä: Bejn dee, rungajcni.”

<sup>9</sup> Che biejn diajg Jesús rediidxre, bidxeloduxhni, gubiréni loj rebejn ni siädnejni, räjpni lojreni:

—Rniliäpac lojtu, nicla lo rexpejn Israel gajdna guidxälä te bejn ni rililajzduxh si'c ni rililajz capitánre.

<sup>10</sup> Che gubi' rebejn ni huij loj Jesús rolijz capitán, bahuiireni abiajc xmosni.

### *Baspañsac Jesús xi'n te gunabiuud*

<sup>11</sup> Nen redxejga, huij Jesús te guejdx ni laa Naín. Huinäni rexpejnpacni näjza xhidajl bejn ni sanajlni. <sup>12</sup> Che bidzujñni gajxh ro' guejdxga, bahuiini sacua'tzreni te bengut, te bi'n ni najc xtebtis xi'n te gunabiuud. Xhidalduxh bejn sacua'tzni. <sup>13</sup> Che bahuii Jesús loj gunabiuudga, biani nane'ga, räjpni lojni:

—jNa'c roonlu!

<sup>14</sup> Dxejc gubig Jesús lo rebejn ni sanä bengutga, dxejc guzudxi reni nuu bengutga. Dxejc räjp Jesús loj bengutga:

—jBi'n!, narä rniä lojlu; jHuistie!

<sup>15</sup> Dxejc huistie bengutga, sobga'ni guslojni caniini. Dxejc badeed Jesúsni lo xnanni.

<sup>16</sup> Che bahuiireni xhini'c gujc, bidxejbreni, bidxeloduxhreni, guslojreni calä'preni xpala'n Dios, räjpreni:

—Te niguisacduxh ni rnii xtidx Dios abidzujñ nez loonu.

Caniizareni:

—Lagajc Guejb Dios abiädhuui rexpejñni.

<sup>17</sup> Dxejc bire'ch diidx xcuent Jesús guideb nez reguedx Judea näjza guiraa reguejdx ni tre' nejzga.

### *Xpejn Juan ni rutiobnis huinabdiidx loj Jesús*

*(Mt. 11:2-19)*

<sup>18</sup> Rexpejnpac Juan ni rutiobnis bij rediidxga lojni che yu'ni latzguiib. <sup>19</sup> Dxejc baxhalni gaiireni lo Jesús te sanabdiidxreni: “¿La guliipac najclu Crist ni jiäd o sibäjznu chu stee bejn, ä?” <sup>20</sup> Dxejcti gubig rexpejn Juan loj Jesús, räjpreni:

—Juan ni rutiobnis baxhal nuurnu te guiniabdiidxnu lojlu: “¿La luj najc Crist ni jiäd o la sibäjznu chu stee bejn?”

<sup>21</sup> Lagajc dxejc che bidzujñreni, basiajc Jesús xhidajl bejn ni rajc garen-garen yälguijdx, ni yu'za rebenxab lastooreni, basiajczani baloj ni di fii. <sup>22</sup> Dxejcti badzu' Jesús diidxre, räjpni:

—Colchaye'tz lo Juan guiraa ni abahuiitu näjza ni abiejn diajgtu. Colye'tz lojni: “Relotiä'p ruhuisac; rebeñcoj rsiasa'c; reben ni ral guejdx tiejxhni, abiajc tiejxhni; rediagcua't riensac diajgreni; reben gut, agubañsacreni; luxh loj rebenproob nani cabäjz xcälracnäj Dios riejn diajgreni rsiule' xtidx Dios xcuent xho laa bejn lo dojl. <sup>23</sup> Chicbaa nani rumbee narä, nani di cuälaz narä.”

<sup>24</sup> Cheni sii rexpejn Juan, gusloj Jesús caniini xcuent Juan loj rebejn, räjpni:

—¿Chuni'c huihuiitu nez lo reyubijdz? ¿La te nijt ni rusniib bej, ä? <sup>25</sup> ¿Xhini'c huihuiitu? ¿Te bejn ni sucheduxh, ä? La'tu najntu rebejn ni sucheduxh näjza reni nabañsa'c, rolijz rereii yu'reni. <sup>26</sup> ¿Chuxhni'c biriitu huihuiitu? ¿Te niguii ni rnii xtidx Dios, ä? O'n, rniliä lojtu, luxh te ni sacduxhru loj guiraa reniguii ni rnii xtidx Dios. <sup>27</sup> Juan najc niguii ni ruzä't rexquijtz Dios cadre caj scree:

Narä guxhalä te niguii nani guinii xtidxä,  
te nidni lojlu, te laani guzucheeni xnezyujlu nez lojlu.

<sup>28</sup> Rniliäpac, loj guiraa rexingaan regunaa, nicla tejni gajd guiricaj ni najc te beñsacduxhru nez loj Dios si'c najc Juan ni rutiobnis. Niluxh nani guxiiru sajc lo xcälrnibee Dios ni jiääd, sajcruni loj Juan.

<sup>29</sup> Che biejn diajg rebejn näjza reni rusquijx impuest rextiidxni xcuent Juan, gucbeereni rujn Dios yälguxhtissa'c, sa'csi abatiobnis Juanreni. <sup>30</sup> Niluxh refarisee näjza rebejn ni ruluui leii gulälazreni nani niujn Dios par laareni, sa'csi direni nicäjb nutiobnis Juanreni. <sup>31</sup> Räjpza Jesús lojreni:

—¿Xhocha guiniä najc rebejn nani tre' naj? <sup>32</sup> Najcreni si'c rebiuxbäz nani rguijt nez lo guii cadre rdo', rbedxa'reni loj sa'reni, rniireni: “Bielnu te bizej te guya'tu, niluxh ditu nuya'. Bielzanu te dij ni nabaduxh dxejcti dizatu nioon.” <sup>33</sup> Sa'csi che biääd Juan, dini niauxha't, dizani niä' bin, luxh räjpju: “Yu' beñdxab lastooni.” <sup>34</sup> Dxejcti biälä narä, Xi'n Dios ni gujc Niguii, rauä, rä'ä. Dxejc räjpju: “Bahuilaare, dade're rauxha't, rä'zani, najcni xamiigw rebeñdojl näjza rebejn ni rusquijx reimpuet xten gubier.” <sup>35</sup> Ni'cni xcälhajn Dios huenliisi rienloj loj dzuun ni rujn rebejn ni najn.

### *Jesús huij rolijz Simón ni najc farisee*

<sup>36</sup> Dxejc tej refarisee gunii loj Jesús, räjpni:

—Jiäädllu rolizä te guidaunu.

Dxejc huij Jesús rolijzni, ro'c gurejni lo mex. <sup>37</sup> Rbäjz te gunagubejxh lo guejdxga. Che biejn diajgni satajw Jesús rolijz fariseega, bidzunnäjni te bo't guidxa se't nejxh, luxh bo'tga najc si'c onix, botsa'cni. <sup>38</sup> Che biu' gunaaga, bidzujjni lo ni' Jesús, guslojni cayoonni. Con nisbee caguiibni ni' Jesús, dxejc caguspjdzni ni'ni con xquidxejcti. Dxejc bachagro'ni ni'ni bazaazani setnejxhga ni' Jesús. <sup>39</sup> Che bahuii farisee ni gurejdx Jesús rolijzni, recosre, bejnna xhigab: “Palga gulii najc niguiire Xi'n Dios, sacbeeni chu najc näjza xho najc gunaare ni cagajn ni'ni, sacbeezani najcni te gunadołduxh.” <sup>40</sup> Dxejc gunii Jesús loj fariseega, räjpni:

—Simón, yu' xhi rlazä guiniä lojlu.

Dxejc räjp fariseega lojni:

—Guniini, Dad mastr.

<sup>41</sup> Dxejc räjp Jesús lojni:

—Tio'p bejn nazäab meel lo te bejn ni rudedlaa meel. Tej reni nazäab si'cti gaiigayuu meel. Steeni nazäab si'cti tiubitzuu meel. <sup>42</sup> Cheni di najcdi niguijxreni xti'nreni, basiäl lajzni xti'n guiro'preni. Naj gunii loä, ¿chu tejreni sianälajzru dade'ga, ä?

<sup>43</sup> Badzu' Simón diidre lojni, räjpni:

—Rchaloä bejn ni nazääbru lojni.

Dxejc räjp Jesús:

—Laaca rniilu.

<sup>44</sup> Dxejc gubiré Jesús, bahuiini loj gunaaga. Dxejc räjpni loj Simón:

—¡Bahuii loj gunaare! Che biu'ä rolijzlu, dilu nuniidx nis te nidiib ni'ä. Per gunaare gudibnäjni ni'ä nisbee ni birii balojni, dxejc baspijdzni ni'ä con xquidxejcti. <sup>45</sup> Dilu nuchagro' narä, luxh laani cheli biu'ä ree, gajdni cuäaz guchagro'ni ni'ä. <sup>46</sup> Dilu nusäl se't yecä, niluxh laani basälhni se't ni rlianexhduxh ni'ä. <sup>47</sup> Ni'cni rniä lojlu, dojl xten

gunaare, luxh xhidalduxh najcreni, abadzucaj Dios redojlga sa'csi huenliisi sanälajzni Dios. Luxh rebejn ni rudzucaj Dios guxii xtojreni, guxiiza sanälajzreni Dios.

<sup>48</sup> Dxejcti räjpni loj gunaaga:

—Agubicaj rextojllu.

<sup>49</sup> Dxejc rebejn ni sobga' lo mex con laani, che biejn diajgreni rediidxre, gusloj canii lo sa'reni, räjpreni:

—¿Chuchani'c najc niguiire, ni'cni rudzucajlini xtoj bejn, ä?

<sup>50</sup> Räjp Jesús loj gunaaga:

—Agulaalu lo xtojllu sa'csi ahuililajzlu; huij naj, bascuexi lajzlu.

## 8

### *Regunaa ni gucnäj Jesús*

<sup>1</sup> Dxejcti gusloj huij Jesús guiraa reguejdx näjza rerench, cagusule'ni xtidx Dios, caguluiini xcuent xcälrnibee Dios loj rebejn. Sanäni rexpejnpacni <sup>2</sup> näjza gaii gunaa ni abasiajzni, agulääni rebendxab lastooreni, näjza basiajzni xcälguijdxreni. Tejñi laa Marii ni laaza Magdalen, ni gulää Jesús gajdz bendxab neñ lastooni. <sup>3</sup> Stee gunaa laa Xuan, ni najc chää Chuza, ni ruhuii xhixten Herodes. Stee gunaa laa Susan. Guyu'za sgaii gunaa. Guiraa reni'c rudeed lagajc xhixtenreni te rio' recos ni rquiinreni.

### *Xcuent bejn ni rbe'c binij*

*(Mt. 13:1-9; Mr. 4:1-9)*

<sup>4</sup> Dxejcti bire' xhidajl bejn lojni ni birii xhidajl reguejdx. Lojreni gunii Jesús con te cuent ni ruluii, räjpni:

<sup>5</sup> —Birii te bejn sale'c binij. Cheni cabe'cni binij, yu' binij ni bitejb cuä' nezyuj. Che sadejd rebejn baläjreni yejc binijga, biäädza remane' ni rutajt xhaguibaa, gudajwrenini.

<sup>6</sup> Yu'za lajt bitejb binijga neñ reguij cadre xheti xhidajl yuj. Che gulejn binijga, gubidzgajcni sa'csi xheti xcojp ro'c. <sup>7</sup> Yu'za lajt bitejbni nez neñ reyaguejch. Che gulejni, di reyaguejch nusaan niroob gäjga. <sup>8</sup> Yu'za lajt bitejb binijga lo yusa'c, ro'c gucduxhni. Cheni guroobni, yu' binijga gujc te gayuu xob loj tejga binij ni gule'c dade'ga.

Che gulujx guniini scree, dxejc guniini dip räjpni:

—Palga sajcuadiagtu rediidxga, colcuadiagsa'cni.

### *Xhicuent gunii Jesús recuent*

*(Mt. 13:10-17; Mr. 4:10-12)*

<sup>9</sup> Dxejcti gunabdiidx rexpejnpacni lojni räjpreni:

—¿Xhi säloj cuentre?

<sup>10</sup> Dxejc räjpni lojreni:

—Lojtu ni najc rexpejnä suniidx Dios yälñajn te gacheetu reyälxhiga'tz xten xcälrnibeeni. Loj chutis stee bejn, siniä recuent lojreni te mase cadxelojreni, direni fisa'c, luxh mase cacuadiagreni, direni gachesa'c.

### *Rusule' Jesús xcuent ni rbe'c binij*

*(Mt. 13:18-23; Mr. 4:13-20)*

<sup>11</sup> Räjpzani:

—Scree säloj cuentre, rebini najc si'c xtidx Dios. <sup>12</sup> Binij ni biajb lo nezyuj najc si'c rebejn ni rucuardiajg xtidx Dios. Dxejc riääd bendxab, riäddzucajni rediidxga lastooreni te na'c chalilajzreni xtidx Dios, te na'cza laareni lo dojl. <sup>13</sup> Binij ni biajb neñ reguij najc si'c rebejn ni rucuardiajg xtidx Dios, rbaalajzreni; per sa'csi xheti xlobaareni, nälajznu, direni gandzu'tz xtidx Dios, rililajzreni te bo'c, per che rsacsí rebejnreni, rbälazreni xtidx Dios. <sup>14</sup> Binij ni biajb neñ reyaguejch najc si'c rebejn ni rucuardiajg xtidx Dios, per lañ ni sanuureni xnejzreni, rijia'nreni lo recos guedxliuj, lo yälñasa'c ni ruhuiireni, näjza rujnreni si'ctis ni rñajz tiejxhäreni. Reni'c rujn runijtreni xtidx Dios, ni'cni direni guzoob



xtidx Dios, direni chanuu te gunreni xtzunsa'c Dios. <sup>15</sup> Binij ni riajb lo reyusa'c najc si'c rebejn nani rucuadiajg xtidx Dios, ni rililajz diidxga guideb te lastoya ni najc hueen. Randzu'tzreni xtidx Dios, dxejc rudeedreni te yálnasa'c, nalajznu ruzoobreni xtidx Dios, rujnreni xtzunsa'c Dios.

*Xhet yu'di ni naga'tz par tejpas*

(Mr. 4:21-25)

<sup>16</sup> Räjpzani:

—Ruti te bejn ni rucuaguuj te bajl dxejc rusäuni te caj yejc bajlga, dizani gusuynini dejtz te loon. Alga rusoobnini neñ candilieer loj te mex te guzanijni guideb neñ yu'ga te reni jiu' fiireni lo bajlga. <sup>17</sup> Xhet yu'di ni yuchetzu'tzdi ni di guidzujñ dxej guiluini; xhet yu'diza ni naga'tz naj ni di guidzujñ dxej gacbee bejnñi.

<sup>18</sup> 'Ni'cni colcuadiagsa'c diidx; sa'csi guiraa rebejn ni rajp yälracbee, sajprureni yälñajn. Luxh reni di ninuu nucuadiajg xtidx Dios, lojni sibicaj naj ni abacuadiajgni, ni rchaloni najñni.

*Xnan Jesús con rebejzni*

(Mt. 12:46-50; Mr. 3:31-35)

<sup>19</sup> Dxejc bidzujñ xnan Jesús najza rebejzni cadre suga'ni, niluxh di niajcdi nibigreni lojni sa'csi tre' xhidalduxh bejn ro'c. <sup>20</sup> Dxejcti huisa'n te bejn diidx loj Jesús, räjpni:

—Xnan guejblu najza rebejz guejblu suga' rolä', luxh rlajzreni fiireni lo guejblu.

<sup>21</sup> Badzu' Jesús diidxre lojreni, räjpni:

—Xnanä najza rebetzä najc rebejn ni rucuadiajg, ni ruzoobza xtidx Dios.

*Basiacdx Jesús te beduxh*

(Mt. 8:23-27; Mr. 4:35-41)

<sup>22</sup> Te dxej biu' Jesús najza rexpejn pacni neñ te barcw. Dxejc räjpni lojreni:

—Colcho' stelaad ro' nisre.

Basyu'reni barcw lo nis, sä'tireni. <sup>23</sup> Cheni sadejdreni galäii nisga, gudiejs Jesús neñ barcw. Dxejc gubi' te beduxh lo nisga, luxh sa'csi lacti nadip ro' bejga, gusloj cayu' nis neñ barcw, ameerli jääz barcwga lo nis. <sup>24</sup> Dxejcti huicuäänreni Jesús, räjpreni lojni:

—¡Mastr! ¡Mastr! ¡Cayääznu lo nis!

Che gubajñni, huistieni, dxejc gudidxa'ni lo bejga najza lo nis ni cayäsjaia. Dxejc guläjz bejga, guredxiza nisga. <sup>25</sup> Dxejc räjpni lojreni:

—¿Con xcälirilajztu, ä?

Per laareni bidxejbreni, bidxeloduxhreni, canabdiidxreni lo sa'reni:

—¿Chuni'c najc niguiire te rnibeeni bej najza nis, luxh rusobdiajg bej najza nis xtiidxni?

*Te beñ Gadara ni guyu' rexsprit bendxab lastooni*

(Mt. 8:28-34; Mr. 5:1-20)

<sup>26</sup> Bidzujñtireni lo yuj xten Gadara ni tre' stelaad ro' nis nez loj reyuj xten Galilee.

<sup>27</sup> Cheni biäjt Jesús neñ barcw baläjni lo yuj, gubig te bejn ni siääd guejdxga lojni. Agujc xchej yu' rebendxab neñ lastooni. Dini gacw xhajbni, dizani cuääz neñ yu', alga rbäjzni cadre yu' rebaa. <sup>28</sup> Che bahuiini loj Jesús bazuxhijbni nez lojni, guredxa'ni räjpni:

—¿Xhicuent riädchu'lu loonu, luj, Jesús Xi'n Gueb Dios ni rbäjz xhaguibaa? Rniabduxhä lojlu, na'cru gusacsilu nuurnu.

<sup>29</sup> Guniini rediidxre sa'csi canibee Jesús guirii rebendxabga neñ lastoo bejnre. Agujc xchero cazob rniaaz rebendxabga bejnnga ruliib rebejn ni'ni, ñaani con cadenguuib te guilibdzu'tzni, te xhet gundini bejn. Niluxh laani rutiugya'ni recaden, dxejc rebendxabga rinärenini nez lo reyubijdz. <sup>30</sup> Jesús gunabdiidx lojni, räjpni:

—¿Chu laalu?

Dxejc badzu'ni diidxre loj Jesús räjpni:

—Legión najc laä.

Si'c guniini sa'csi xhidalduxh najc rebeñdxab ni yu' neñ lastooni. <sup>31</sup> Dxejc gunabduxhrenei loj Jesús na'c guxhalsacnireni cadre biriireni. <sup>32</sup> Lagajc dxejc suga' xhidajl cuch cayajwrenei guixa' lagajc nejzga lo te bala'. Dxejc gunab rebeñdxabga loj Jesús te gusaanni jiu'reni neñ recuchga. Che cuäjb Jesús, <sup>33</sup> birii rebeñdxabga neñ lastoo dade'ga, biugajcreni neñ recuchga. Che biu'reni neñ recuch, baxun recuchga bitejbreni ro' te bala', dxejc biajbreni lo nis, ro'cti gujtreni.

<sup>34</sup> Baxun reni cayajp recuchga che bahuiireni xhini'c gujc ro'c, huisa'nreni diidx lo rebeñguejdxga näjza lo rebeñ rench. <sup>35</sup> Dxejc biädhuii rebejn xhini'c gujc ro'c. Che bidzujnreni cadre suga' Jesús, bahuiireni loj bejn ni birii beñdxab lastooni. Sobga'ni cuä' ni' Jesús, najcwni xhajbni, luxh xhetru rajcdi yejcn; dxejc bidxebduxh rebejnga. <sup>36</sup> Sas reni bahuiloj xho gujcn, bijreni diidx xho basiajc Jesús bejn ni guyu' rebeñdxabre lastooni. <sup>37</sup> Dxejc guiraa rebeñ Gadara näjza reguejdx ni tre' nejzga, gunabreni jiunejz Jesús ro'c sa'csi cadxebduxhrenei. Ni'cni biu' Jesús neñ barcw te gubisacni nejz cadre siädni. <sup>38</sup> Dade' ni birii rebeñdxab lastooni gunabni lo Jesús gusaanni chanajlnini, niluxh Jesús gunibee jia'nni, räjpni lojni:

<sup>39</sup> —Gubi' rolijzlu te güilu diidx recosro ni bejn Dios xcuent luj.

Dxejc sääni, batie'chni diidx guideb lo guejdxga xhi bennäj Jesúsni.

*Xindxa'p Jairo näjza te gunaa ni gudajn xhajb Jesús*  
(Mt. 9:18-26; Mr. 5:21-43)

<sup>40</sup> Che gubi' Jesús stelaad nis, bibalajz rebejn gubi'ni, sa'csi cabäjzpacreni guibisacni. <sup>41</sup> Dxejc bidzujn te bejn ni laa Jairo, ni rnibee te guidobäz, bazuxhijbni nez loj Jesús, gunabni chanänini rolijzni <sup>42</sup> sa'csi yu' tejtis xindxa'pni. Yu'ni tzubitio'p ijz, luxh cayacxhuuni, ameerli guetni. Lalsi sää Jesús rolijzni, birinajl xhidalduxh bejn, catäälirenini.

<sup>43</sup> Loj rebejnga nadxaag te gunaa ni agujc tzubito'p ijz cayacxhuuni, cayajcni yälguidxbäii. Xlia'si abanijtni guiraa xhixtenni cua' renani rujn remeed. <sup>44</sup> Gubig gunaaga dejtz Jesús te gudajnni ro' xhajbni. Lagajc dxejc biacgajcni.

<sup>45</sup> Dxejcti gunabdiidx Jesús räjpni:

—¿Chuni'c najc ni gudajn narä, ä?

Guiraa rebejn räjp:

—Dinu gan.

Räjpza Pedr:

—Mastr, ni yu'lu galäii rebeñ xhidajl, luxh cagutäälireni luj. ¿Xhicuent rniabdiidxlu: “¿Chu gudajn narä?”

<sup>46</sup> Räjppac Jesús lojni:

—Yu' chu gudajn narä, sa'csi gucbeä yu' chu basiajc xcälrnibeä.

<sup>47</sup> Che gucbee gunaaga anajn Jesús gudajnni xhajbni, bidxejbni, racsejslini gubigni loj Jesús, bazuxhijbni lojni. nez loj guiraa rebejn räjpni xhicuent gudajnni xhajbni näjza xho biacgajcni.

<sup>48</sup> Dxejc räjp Jesús lojni:

—Huij. Gulecdxilajzlu, xinda'pä. Abiajclu sa'csi huililajzlu.

<sup>49</sup> Lalni canii Jesús si'c bidzujn te bejn ni siäd rolijz Jairo, ni rnibee te guidobäz. Räjpni loj Jairo:

—Agujt xindxa'plu. Na'cru gutajllu xtzuun Dad Mastr.

<sup>50</sup> Che biejn diajg Jesús rediidxga, räjpni loj Jairo:

—Na'c guidxejblu. Huililajztis te jiac xindxa'plu.

<sup>51</sup> Che bidzujnreni rolijzni, xtebtis Pedr, Jacob, Juan näjza xcuzajn dxape'ga biunäjni neñ yu'ga. Peta rebejn ni siädnajlni bia'nreni rolä'. <sup>52</sup> Cayonduxh guiraa rebejn ni sobga' neñ yu'. Dxejc Jesús räjp lojreni:

—Na'c roontu, gajd dxape're guet, nagajejstisni.

<sup>53</sup> Alga baxhiznäjrenini, sa'csi anajnreni agujt dxape'ga. <sup>54</sup> Dxejcti gunaaz Jesús naa dxape'ga, dip guniini, räjpni lojni:

—¡Dxape', huistie!

<sup>55</sup> Dxejc gubañsac dxape'ga, huistiegajcni. Dxejc gunibee Jesús gudeedreni xhi gauni.

<sup>56</sup> Bidxeloduxh rexcuzajnni. Per gunibee Jesús na'c güireni diidx xhini'c gujc ro'c.

## 9

### *Ruxhal Jesús guitzubitio'p rexpejnpacni*

*(Mt. 10:5-15; Mr. 6:7-13)*

<sup>1</sup> Batie' Jesús guitzubitio'p rexpejnpacni te badeedni yälrnibee lojreni te cuääreni rebenxab lastoo rebejn, näjza te gusiajcreni rebenracxhuu. <sup>2</sup> Baxhalnireni te gusule'reni diidx xcuent xcälrnibee Dios näjza te gusiajcreni rebenracxhuu. <sup>3</sup> Dxejc räjpni lojreni:

—Xhet chanäditu lo nejz, nicla baston, nicla bols, nicla yätxtiil, nicla meel; na'cza chanätu tio'p xhajbtu; tejtisni chanätu. <sup>4</sup> Chutis rolijz bejn cadre guidzujntu, ro'c coljia'n cheni guiriilitu lo guejdxga. <sup>5</sup> Palga direni gusaan jiu'tu rolijzreni, che jiunejztu lo guejdxga, colcuijb guxhuj ni'tu si'c te seen direni nililajz xtiidxtu.

<sup>6</sup> Dxejc biriireni sääreni garen-garen reguejdx, cagusule'reni xtidx Dios, cagusiajczareni rebenracxhuu cadrotis rdzujnreni.

### *Xho gujt Juan ni rutiobnis*

*(Mt. 14:1-12; Mr. 6:14-29)*

<sup>7</sup> Che biejn diajg Herodes ni rnibee guiraa ni cayujn Jesús, guyu'ni yärsia', dini gan xho gunni xhigab, sa'csi yu' reni canii laa Juan ni agubañsac lo rebenqut. <sup>8</sup> Sgaiireni canii abaluiloj Elías. Yu'zareni canii pet laa stee niguii ni gunii xtidx Dios galoo ni agubañsac.

<sup>9</sup> Per räjp Herodes:

—Lagajc narä gunibeä biru' yejc Juan ni rutiobnis, ¿chuchani'c najc niguiire ni riejn diagä xhidajl didxro xcuentni?

Dxejc rlajzpac Herodes fii lojni.

### *Bayaan Jesús gaii mil bejn*

*(Mt. 14:13-21; Mr. 6:30-44; Jn. 6:1-14)*

<sup>10</sup> Che gubi' rexpejnpacni, bijreni diidx loj Jesús xhini'c bejnreni. Sas huinä Jesúsreni te lajt cadre ruti bejn, gajxh te guejdx ni laa Betsaida. <sup>11</sup> Che gucbee rebejn caro sääreni, huinajlrenini bidxälrenini. Che siädreni lojni huichaglojnireni, sas gusloj cagusule'ni lojreni xcuent xcälrnibee Dios. Basiajczani rebejn ni cayacxhuu.

<sup>12</sup> Che gusloj cayääz gubijdx, gubig rexpejnpacni loj Jesús, räjpreni lojni:

—Gojs loj rebejnre, agojl jüireni te chatiilreni xhi gauren, näjza cadre tedreni guxhijn lo rerench, neñ reguedxbáz, sa'csi ree xhet yu'di.

<sup>13</sup> Dxejcti räjp Jesús loj rexpejnpacni:

—¡La'tu colgudeed xhi gauren!

Dxejc räjpreni lojni:

—Xhet rajpdinu, gaiitis yätxtiil näjza tio'p bäj. Ni'ctis yu' palga dinu chasiiru xhi gau reben xhidajlre.

<sup>14</sup> Luxh najc rebejnnga si'cti gaii mil niguii. Dxejc räjp Jesús loj rexpejnpacni:

—Colyejtz lojreni cuereni xcua-xcuaareni, si'cti tiubitzugajreni te cuaa.

<sup>15</sup> Si'c bejnrenini, sas gurej guiraa rebejnnga si'c. <sup>16</sup> Dxejc cua' Jesús gaii yätxtiilga näjza tio'p bäjga, guläsni lojni xhaguibaa, badeedni xquixtios lo Dios xcuent yälrajwga. Che gulujx badeedni xquixtios gula'ni reyätxtiilga näjza rebäjga, dxejc sanuutis badeednini loj rexpejnpacni te gudisrenini loj rebejnnga. <sup>17</sup> Guiraa reben xhidaalga gudajw, gudxaj xque'reni. Dxejcti batojpreni ni bia'n bachajreni tzubitio'p dxijm yätxtilbiujy näjza bälbiujy ni bia'n.

*Gunii Pedr Jesús najc Crist  
(Mt. 16:13-19; Mr. 8:27-29)*

<sup>18</sup> Te dxej la<sub>l</sub>ni cabedx-canab Jesús lo Dios, xtebni nájza rexpejn<sub>pacni</sub>, gunabdiidxni lojreni, ráj<sub>pni</sub>:

—¿Chuni'c rnii rebejn nacä?

<sup>19</sup> Dxejc ráj<sub>preni</sub> lojni:

—Yu'reni rnii najclu Juan ni rutiobnis; yu'zareni rnii najclu Elías; sgaiireni rnii najclu stee niguii ni gunii xtidx Dios galoo ni aguba<sub>nsac</sub>.

<sup>20</sup> Dxejc gunabdiidxni lojreni, ráj<sub>pni</sub>:

—¿La'tu a? ¿Chuni'c rniitu nacä?

Dxejc ráj<sub>p</sub> Pedr lojni:

—Luj najclu Crist Xi'n Dios ni cabäáznu.

*Jesús rnixgaa xho guetni  
(Mt. 16:20-28; Mr. 8:30-9:1)*

<sup>21</sup> Dxejc gunibee Jesús lojreni, ráj<sub>pni</sub>:

—Na'c gäbtu si'c lo rebejn.

<sup>22</sup> Ráj<sub>pzani</sub> lojreni:

—Nanab ted Xi'n Niguii trabajwduxh; rebe<sub>ngool</sub> xten guidoo, nájza rebixhojz, nájza rebejn ni ruluii xleii Moisés sibälazreni narä, naareni dina gacä Crist ni cabäáznu. Sugu'treni narä Xi'n Dios ni gujc Niguii, niluxh siba<sub>nsacä</sub> ni riojn dxej.

<sup>23</sup> Dxejc ráj<sub>pni</sub> loj guiraareni:

—Palga chu tejt<sub>u</sub> r<sub>lajz</sub> guirinajl narä, nanab jiäl<sub>lajz</sub>ni xhixt<sub>enni</sub>, te guixe-guixee guntisni nani gudedä gunni. <sup>24</sup> Sa'csi nani r<sub>lajz</sub> guiniazdzu'tzni xcäl<sub>nabaj</sub>ni, sunijtni yäl<sub>nabaj</sub> lo Dios; luxh nani runij<sub>t</sub> xcäl<sub>nabaj</sub>ni xcuent xtidxä, sica'ni yäl<sub>nabaj</sub> par tejpas.

<sup>25</sup> Sa'csi ¿xhi gaan gun te bejn palga xca'ni guideb guedxliuj, luxh gunijtni xcäl<sub>nabaj</sub>ni lo Dios? <sup>26</sup> Niluxh nani g<sub>uituinä</sub>j narä nájza xtidxä, sigajcza narä, Xi'n Dios ni gujc Niguii, situinäázani cheni jiälä si'c reii guideb yäl<sub>rdimbicha'</sub> xten X<sub>tadä</sub> nájza rexang<sub>lni</sub>.

<sup>27</sup> Guliipac rniä lojtu, yu' gaii reni suga' ree, ni di guet, suhuixgaareni xcäl<sub>rnibee</sub> Dios.

*Bachaa xho rluiloj Jesús  
(Mt. 17:1-8; Mr. 9:2-8)*

<sup>28</sup> Gudejdti xhuj<sub>n</sub> dxej gunii Jesús diidxre, dxejcru hui<sub>nä</sub> Jesús Pedr nájza Jacoboob nájza Juan, huijreni jiaa yejc te daj<sub>n</sub> te guredx-gunabni loj Dios. <sup>29</sup> La<sub>l</sub>ni cabedx-canab Jesús lo Dios, bidxaa xho ruluii lojni; dxejc xhajbni gujc nolbäj, rdimbicha'lini.

<sup>30</sup> Biricajza tio'p dade' caninäjreni. Redade'ga najc to Moisés nájza Elías. <sup>31</sup> Rdimbicha'za redade'ga. Caninäjreni Jesús xcuent xho guetni guedx Jerusalén. <sup>32</sup> Luxh Pedr nájza resa'ni guyuduxh bacal<sub>l</sub> lojreni; che bire'ch bacal<sub>l</sub> lojreni bahuiireni lo yäl<sub>rdimbicha'</sub> xten Jesús nájza loj guiro'p redade' ni caninäjni. <sup>33</sup> Cheni agojl jiunejz redade'ga loj Jesús, ráj<sub>p</sub> Pedr loj Jesús:

—Dad, Mastr, huenduxh suga'nu ree. Basaan jiencheenu cho<sub>n</sub> yue', tejni par luj, tejni par Moisés, steeni par Elías.

Luxh di Pedr gaan xhini'c caniini. <sup>34</sup> La<sub>l</sub>ni caniini si'c, bire' te za gusloj cayäjt yejcreni, dxejc bidxejbreni che biu'reni ne<sub>n</sub> zaga. <sup>35</sup> Dxejcti biejn diajgreni ne<sub>n</sub> zaga te xse' te ni gunii, ráj<sub>pni</sub>:

—Dee najc Xi'nä ni sanälazä, col<sub>cuadiajz</sub> xtiidxni.

<sup>36</sup> Che gulujx guniini rediidxga, bahuiireni sugaxteb Jesús. Dxejc niäutis ro'reni ne<sub>n</sub> redxejga, rut lojdi bijreni diidx xcuent ni bahuiireni ro'c.

*Basiajc Jesús te biuux ni guyu' bendxab lastooni  
(Mt. 17:14-21; Mr. 9:14-29)*

<sup>37</sup> Barayääl cheni biäjtreni yejc dajnga, xhidalduxh bejn cabäz Jesús. <sup>38</sup> Dxejcti te dade' ni nadxaag rebejn̄ga guredxa'ni, räjpni loj Jesús:

—Mastr, balaslajz narä, gudahuii xi'nä, sa'csi xtebtisni najcni xinganä. <sup>39</sup> Luxh beñdxab rniaazni, sas ruscuedxa'nini, rajcni si'c yälguidxbej, rbääni bitzuñ ro'ni, rusacsíduxhnini, luxh dini gusaanni. <sup>40</sup> Agunabä loj rexpejn̄paclu nibääreni beñdxabga, luxh di niajcdini.

<sup>41</sup> Dxejc badzu' Jesús diidxre, räjpni:

—¡Bejn̄ ni di chalilajz, beñguijdx! ¿Gucli chunäätu, gucli gunä huant la'tu? ¡Gudanä xi'nlu ree!

<sup>42</sup> Dxejc che cabig biuuxga lojni, basälta' beñdxabga biuuxga lo yuj, sas gusloj cayajcni si'c yälguidxbeduxh. Dxejc gudidxa' Jesús loj beñdxabga, basiacgajcni biuuxga, dxejc badeednini lo xtadni. <sup>43</sup> Guiraa rebejn̄ bidxeloduxh yälrnibeduxh xten Dios.

*Rni Jesús stehuält xho guetni*  
(Mt. 17:22-23; Mr. 9:30-32)

Lałni cadxeloj rebejn̄ lo recos ni bejn̄ Jesús, räjpni loj rexpejn̄pacni:

<sup>44</sup> —Cołcuadiajgsa'c rediidxre, na'cza jiälajztureni, sa'csi sutedreni narä Xi'n Dios ni gujc Niguii ladznaa rebejn̄.

<sup>45</sup> Niluxh di rexpejn̄pacni niacbee xhi säloj rextiidxni, sa'csi Dios bacua'tznini lojreni te di niacbeerenini. Bidxejbzareni niniabdiidxreni loj Jesús xhi säloj rediidxga.

*Chuni'c sajcru*

(Mt. 18:1-5; Mr. 9:33-37)

<sup>46</sup> Guslojza rexpejn̄ Jesús canabdiidx lo sa'reni:

—¿Chuchani'c sajcru loonu?

<sup>47</sup> Per gucbee Jesús xhi xhigab cayujnreni. Dxejc cua'ni te biuxbäz, bazujnini cuä'ni, <sup>48</sup> räjpni lojreni:

—Chutis ni xca' te biuxe' sa'csi sanälajzni narä, naräni rca'ni luxh ni rca' narä, rca'ni xtadä ni baxhał narä. Ni najc maazru nadolajz lojtu, ni'c najc ni sajcru.

*Nani di guiniyaj nuurnu, xladnu yu'ni*

(Mr. 9:38-40)

<sup>49</sup> Dxejc räjp Juan loj Jesús:

—Mastr, bihuiinu loj te bejn̄ ni rbää rexpēdxab neñ lastoo bejn̄ con xcälrnibee lajlu. Dxejc rie'tznu lojni na'cru gunni si'c, sa'csi dini sanäj nuurnu.

<sup>50</sup> Dxejc räjp Jesús lojreni:

—Na'c gudxojtuni, sa'csi nani di guiniyaj nuurnu, xlaadnu yu'ni.

*Jesús gudidxa' loj Jacoob näjza Juan*

<sup>51</sup> Che siäddzujñ redxej ni chää Jesús xhaguibaa, bejn̄ni xhigab chääpacni guedx Jerusalén. <sup>52</sup> Baxhałni gaii bejn̄ gunijd lojni chääreni te guejdx xten Samaria te satiilreni cadre jia'nreni ro'c. <sup>53</sup> Luxh rebejn̄ samaritan̄ di rlajzreni gudedlaareni te lajt cadre jia'nreni, sa'csi najnreni chääreni guedx Jerusalén. <sup>54</sup> Che biejn̄ diajg Jacoob näj Juan, tio'p xpejn̄pacni, si'c, sas räjpreni loj Jesús:

—Dad, ¿La rlajzlu guinibeenu jiäjt guiboo xhaguibaali te guze'cni guiraa rebēguejdxga si'cni bejn̄ Elías?

<sup>55</sup> Dxejc bahuii Jesús lojreni, gudidxa'ni lojreni, räjpni:

—Ditu gaan chuni'c rnibee lastootu. <sup>56</sup> Sa'csi narä Xi'n Dios ni gujc Niguii dina niälä te gudzucaä xcälñabajñ rebejn̄. Narä biälä te guslaäreni lo dojl.

Dxejcti huijreni garenca guejdx.

*Reni rlajz nirinajl Jesús*  
(Mt. 8:19-22)



<sup>57</sup> La<sub>l</sub>ni sääreni lo nezyuj, biääd te bejn gunii loj Jesús, räjpni:

—Dad, narä rlazä jiädnalä guejblu cadrotis chää guejblu.

<sup>58</sup> Dxejc badzu' Jesús diidxre lojni, räjpni:

—Rebäjz rajp xpiliääreni, remane' ni rutajt rajp xpitiääzreni, niluxh narä Xi'n Dios ni gujc Niguii, dina gapä nicla te lajt cadre guscugä yecä.

<sup>59</sup> Dxejcti räjp Jesús lo stee bejn:

—Gudanajl narä.

Luxh laani räjpni:

—Dad, basaan suchacua'tzxaä xtadä, dxejcru jiädnalä guejblu.

<sup>60</sup> Dxejc räjp Jesús lojni:

—Basaan suchacua'tz rebejn ni najc si'c be<sub>ng</sub>ut, resabe<sub>ng</sub>utreni. Per luj, huij, huisule' diidx xcuent xcä<sub>l</sub>rnibee Dios.

<sup>61</sup> Dxejc räjp steeni lojni:

—Dad, rlazä jiädnalä<sub>l</sub>lu, niluxh basanxgaa chasadidxä resa'ä ni tre' rolizä.

<sup>62</sup> Dxejc räjp Jesús lojni:

—Nani ruzuj <sub>na</sub>ani yejc garaad, dxejc rudzuré lojni ruhuiini nez dejtzni di gacdi gunni dzuun lo xcä<sub>l</sub>rnibee Dios.

## 10

### *Ruxhal Jesús regayonbitzoo*

<sup>1</sup> Che gulujx reni'c, gule Jesús gayonbitzoo bejn, baxhal<sub>n</sub>ireni tio'pgajreni te basnijd-nireni lojni loj reguejdx cadre nanab tedni. <sup>2</sup> Räjpni lojreni:

—Guliipacni, cayacduxh cose'ch, niluxh guxii najc rebejn ni gun dzuun gutie'nini. Ni'cni col<sub>g</sub>uiniab lo baxhuaan xten cose'ch te guxhal<sub>n</sub>i xhidajlru bejn ni gun dzuun gutie'xcose'chni. <sup>3</sup> Colchäj la'tu; col<sub>h</sub>uii xho ruxhalä la'tu si'c xiil galäii recuyo't sa'csi sunnäjreni la'tu si'ctisni rlanjreni. <sup>4</sup> Na'c chanätu ngodx, niclaza guijxh, niclaza xcura'chtu, luxh na'c sudxitu guininäjtu bejn lo nejz. <sup>5</sup> Cheni jiu'tu roliz te bejn, ganiddoo colye'tz: “Sucuedxilajz reni rbäjz ree.” <sup>6</sup> Palga najcni te bejn ni rdxag<sub>l</sub>ajz yä<sub>l</sub>rbecdxilajz sia'n xcä<sub>l</sub>rbecdxilajz<sub>t</sub>u ro'c, luxh palga dini gac, sibi' xcä<sub>l</sub>rbecdxilajz<sub>t</sub>u lojtu. <sup>7</sup> Coljia'n lagajc roliz bejn cadre guidzuj<sub>n</sub>tu. Ro'c col<sub>t</sub>ajw, colyä'za xhitis ni guniidxreni, sa'csi nani rujn dzuun, riäj<sub>l</sub> xca'ni xcuent dzuunga. Coljia'n tejtis lajt dxejtis ni chutu lo guejdxga. <sup>8</sup> Xhitis te guejdx ni jiu'tu, palga jiureni la'tu, colgajw xhitis ni guniidxreni lojtu. <sup>9</sup> Colgusajc reben<sub>r</sub>acxhuu ni yu' ro'c, colye'tz lojreni: “Abidzuj<sub>n</sub>gajxh xcä<sub>l</sub>rnibee Dios.” <sup>10</sup> Palga jiu'tu te guejdx cadre di rlanjreni gucuadiajg<sub>r</sub>eni xtiidxtu, col<sub>r</sub>ii lo nezyuj, ro'c colye'tz lojreni: <sup>11</sup> “Guxhuj xten lajdx<sub>t</sub>u ni rcaj ni'nu, rudzu'nuni nez lojtu si'c te seen sa'csi ditu nililajz xtiidxnu. Colgacbee dee, abidzuj<sub>n</sub>gajxh xcä<sub>l</sub>rnibee Dios lojtu.” <sup>12</sup> Ni'cni rniliäpac lojtu, che gac fis xten Dios, nalasru gac fis xten Dios lo guejdxga loj ni gujc guedx Sodoma ni guyu' galoo.

### *Reguejdx ni di niu xtidx Jesucrist*

*(Mt. 11:20-24)*

<sup>13</sup> Räjpzani:

—¡Probe'tu be<sub>n</sub> guedx Corazín! ¡Probe'zatu be<sub>n</sub> guedx Betsaida! Paru nuhuii reben<sub>z</sub>ijt ni gubaj<sub>n</sub> guedx Tiro näjza Sidón remilaagwr ni benä nez lojtu, pet gucli nusiechlajzreni, niajcwreni ladnagas, nibejzaren<sub>i</sub> lo cobdäj si'c te seen abasiechlajzreni. <sup>14</sup> Che gun Dios fis rextoj<sub>l</sub> rebejn guedxliuj, guxiiru gac xfis Dios lo reben<sub>z</sub>ijt ni gubaj<sub>n</sub> guedx Tiro näjza Sidón. Fisroru gun Dios reguedx Corazín näjza Betsaida. <sup>15</sup> Luxh luj guedx Capernaum, rchalolu siäjslu xhaguibaa, alga siajblu gabijlli, cadre gaclu fisro xten Dios.

<sup>16</sup> Rajpzani lo rexej<sub>n</sub>pacni:

—Ni riu xtiidxtu, laa xtidxä ni riuni. Nani di jiu xtiidxtu, laa xtidxä ni dini jiu. Luxh ni di jiu xtidxä, laa xtiidx ni baxhal narä ni dini jiu.

### *Rbi' regayonbitzuu*

<sup>17</sup> Che gubi' regayonbitzuu bejn nani baxhal Jesús, rbaduxh lajzreni, räjpreni:

—Dad, näjza rebenxab rusobdiajg xtiidxnu che rusä'tnu lajlu.

<sup>18</sup> Räjp Jesús lojreni:

—O'n. Ni'cni narä bahuiä che gunijt xcälrnibee benxab, bitejbni xhaguibaa si'c bianij xten guzii. <sup>19</sup> Colgabee. Narä runidxä yälrnibee lojtu te guläjtü yejc bäl näjza yejc naxejb; runidxäza yälrnibee te guntu gaan lo xcälrnibee benxab. Xhetliidi gun daan la'tu. <sup>20</sup> Na'c guibalajztistu sa'csi rusobdiajg rebenxab xtiidxtu; colguibalajzru sa'csi acuaj lajtu lo xquijtz Dios xhaguibaa.

### *Bibalajz Jesús*

*(Mt. 11:25-27; 13:16-17)*

<sup>21</sup> Lagajc dxejc bibalaznäj Jesús Sprit Dxan xten Dios, dxejc räjpni lo Dios:

—Rliä'pä xpala'nlu Xtaä ni rnibee xhaguibaa näjza guedxliuj, sa'csi bacua'tzlu xnezyujlu lo reben nanduxh, per baluiilu xnezyujlu loj rebejn ni najc nadolajz si'c te biuxbäz. O'n, Xtaä, sa'csi si'c rlanjzlu gunlu.

<sup>22</sup> 'Guiraa recosre abaniidxlu loä Xtaä. Dadtis najn chuni'c najc Xi'nni, rutru najndi chu najcni. Rutza najndi chuni'c najc Guejblu Xtaä, xtebtis narä ni najc Xi'nlu, con rebejn ni rlazä gumbee luj.

<sup>23</sup> Dxejc bahuii Jesús loj rexpejn pacni, räjpni lojtisreni:

—Chicbaa la'tu näjza renani ruhuii guiraa nani cahuilojtu. <sup>24</sup> Sa'csi rniliä lojtu, balti redade' ni gunii xtidx Dios galoo, baltiza rerei rlanjz nuhuiireni guiraa ni cahuilojtu, niluxh direni nuhuiini. Rlajzreni niejn diajgreni rediidxre ni cayejn diajgtu, luxh di diajgreni niejn.

### *Xcuent te behuen ni siääd Samaria*

<sup>25</sup> Dxejc huisulii te maestr xten leii, huininäjni Jesús, rlanjzni nuxhiidni Jesús lo xtiidxni, gunabdiidxni lojni:

—Dad, Mastr, ¿xhini'c nanab gunä te guibanää Dios par tejpas?

<sup>26</sup> Sas räjp Jesús lojni:

—¿Xhini'c caj lo guijtz xten leii? ¿Xho rolluni?

<sup>27</sup> Dxejc badzu'ni diidxre, räjpni:

—Chanälajzlu Dad, Xtioslu guideb lastoolu, guideb xaimlu, guideb xtijplu, näjza guideb xcäriejnlu. Huinälaazza resa'lu si'ctis ni sanälajzlu lagajc luj.

<sup>28</sup> Dxejc räjp Jesús lojni:

—O'n, laaca rudzu'lu diidx. Palga gunlu si'c, sajplu yäl nabajnre.

<sup>29</sup> Per maestr xten leii, rlanjzni nidedbiani ni'cni gunabdiidxni loj Jesús räjpni:

—¿Chuni'c najc resa'ä?

<sup>30</sup> Dxejc räjp Jesús lojni:

—Te ben laadxnu birii guedx Jerusalén, sääni guedx Jericó. Dxejc lo nezyuj biricaj gaii gubaan, gulajnreni guiraa xhixtenni, näjli xhajbni ni najcwni. Sas gudijnrenini, basa'nrenini ro'c, guxii cayäädx nugu'trenini. <sup>31</sup> Gudejd te bixhojz ni siääd laadxnu, sazaj lagajc nezyujga, cheni bahuiini lojni, alga gudejdni stee laad, sä'tini. <sup>32</sup> Gudejdza te levita, bejn ni rujnza dzuun nejn guidoo. Che bidzujjni cadre naga' bejnga, gudejdni stelaad, sä'tini. <sup>33</sup> Dxejcti te ben Samaria, laäni sääni biaj, gudejdni nezyujga, bidzujjni cadre naga' bejnga. Che bahuiini lojni, balaslajznini. <sup>34</sup> Gubigni loj bejnga, basälni se't näjza bin loj bejn ni nadxälgujdx, dxejc batejbni te la' lajd. Dxejc bascuibnini dejtz lagajc xmanni, huinänini cadre rudedlaareni yu', ro'c cuanäjnini. <sup>35</sup> Che bara yääl,

gulääni tio'p meel badeedni lo baxhuaan yu'ga. Dxejc räjpni: “Cuanälaa bejnre; palga gunijtrulu, siguixätini lojlu che guibi'ä.”

Sä'tini.

<sup>36</sup> Dxejc räjp Jesús lo mastr xten leii:

—¿Chu tej lo guidxon rebejnnga najc si'c sa' xten dade' ni biajb ladzḡaa gubaan?

<sup>37</sup> Dxejc räjpni loj Jesús:

—Ni balaslajz bejnnga.

Dxejc räjp Jesús lojni:

—Huij te sigajcza chayejnlu.

### *Bidzujḡ Jesús rolijz Mart näjza Marii*

<sup>38</sup> Laḡni huinuu xnezyujni, bidzujḡni te guejdx. Ro'c bidxaagni te gunaa ni laa Mart ni huinänini rolijzni. <sup>39</sup> Yu' te bäjl Mart ni laa Marii, luxh laani gurejni cuä' ni' Jesús te cacuadiajgni xtiidxni. <sup>40</sup> Mart cagusquejḡni cayujḡni xhi gaureni. Sas gubigni loj Jesús, räjpni lojni:

—¿La dilu jiu rusanxteb bälä narä te xtebä cayunä remandaad? ¡Gojs lojni gacnäjni narä!

<sup>41</sup> Dxejc räjp Jesús lojni:

—Mart, Mart, cayuduxhlu yärsia', riulu xhidajl cos, <sup>42</sup> luxh yu' tejtis ni nanabpac. Agule Marii ni najc huenru, rut sajcdi gudzucajnini lojni.

## 11

### *Rului Jesús xho guiniabni lo Dios*

*(Mt. 6:9-15; 7:7-11)*

<sup>1</sup> Te huält cabedx-canab Jesús loj Xtadni Dios, suga'ni te lajt. Che guluix cabedx-canabni, gunii te xpejnḡpacni lojni, räjpni:

—Dad, baluii nurnu xho cuedx-guiniabnu lo Dios, si'c baluii Juan ni batiobnis rexpejnḡpacni.

<sup>2</sup> Dxejc räjp Jesús lojreni:

—Che cuedx-guiniabtu lo Dios, scree colḡni:

Xtadnu ni yu' xhaguibaa,

suchä'p xpala'nlu, sujiääd xcälḡnibeelu.

Sugac si'ctisni rlaizlu gac lo guedxliuj si'cpac rajcni xhaguibaa.

<sup>3</sup> Guira dxej baniidx xcu'nnu si'ctis ni rquiinnuni.

<sup>4</sup> Basiäjḡ laizlu redojl xtennu si'cni riäjḡ laiznu redojl ni rujn rebejn loonu.

Na'c gusaanlu jiajbnu lo xcälḡnibee beḡdxab.

Basḡaa nuurnu lo dojl.

<sup>5</sup> Dxejc räjpza Jesús lojreni:

—Paru tejtü yu' te xamiigwni, luxh guidzujḡni rolijzni garol yääl, gäbni: “Xamigwä, banidxlaa choḡ yätxtiil, <sup>6</sup> sa'csi bidzujḡ te xamigwä rolizä ni bazaj biaj, luxh xhet ra'pädi te gudedä xhi gauni.” <sup>7</sup> Xhixh sinii ni naga' neḡ xyu'ni, gäbni: “Na'c riädte'chlu bacal loä. Niäu rolä' luxh rexi'nä naga' cuä'ä, digacdi chästieä te gunidxä xhi gunidxä lojlu.”

<sup>8</sup> Rniliä lojtu, mase dini chastie te gudeednini sa'csi najcni xamiigwni, sistieni, sudeedni nani rquiintisni te na'cru gutie'chni bacalḡni. <sup>9</sup> Sigajcza rniä lojtu, palga guiniabtu xhi guiniabtu, sica'tuni. Palga chatiiltu xhi chatiiltu, sidxältuni. Palga chasejztu rolä', suxhalreni rolä' lojtu. <sup>10</sup> Sa'csi chutis ni rniab, rca'ni nani rniabni; chutis ni rguuil xhi cos, rdxälḡnini; nani rusejz rolä', suxhalzarenini lojni.

<sup>11</sup> Paru tejtü ni najc dad, jiääd te xi'ntu guiniabni te yätxtiil lojtu, ¿la sudeedtu te guij, ä? O palga guiniabni te bäjl, ¿la sudeedtu te bäl, ä? <sup>12</sup> O palga guiniabni te tzutbejt, ¿la sudeedtu te naxejb, ä? <sup>13</sup> Palga la'tu, ni najc beḡdojl, rajc rudeedtu cossa'c loj rexi'ntu, aticaxh Dios ni yu' xhaguibaa sudeedni Sprit Dxan xtenni loj renani rniabni lojni.

*Rucuaquijreni Jesús, rniireni rajpni yälrnibee xten bendxab  
(Mt. 12:22-30; Mr. 3:19-27)*

<sup>14</sup> Gulää Jesús te bendxabgop lastoo te bejn. Che birii bendxabga lastoo bejnga, guslogajc canii bejnga, dxejc bidxeloduxh reben xhidaalga. <sup>15</sup> Dxejc yu' reni räjp:

—Niguiire rbää rebendxab con yälrnibee xten Beelzebú ni rnibee loj rebendxab.

<sup>16</sup> Sgaiireni rlajz guquiilrenini, ni'c canabreni gunni te seen ni siääd xhaguibaali.

<sup>17</sup> Niluxh laani gucbeeni xhi xhigab cayujnreni dxejc räjpni lojreni:

—Xhitis gubieer ni rlia' sa'ni lo sa'ni, luxh tilnä j te cuaani stee cuaaga, di gaclaa sinijt gubierga lo guedxliuj. Palga te famil rdilnä j lagajc sa'ni, di gaclaa sinitloj familga. <sup>18</sup> Palga guiliä' sa' rebendxab, ¿xho mood chanuu xcälrnibeereni? Dee rniä sa'csi la'tu rniitu narä rbää rebendxab con lagajc yälrnibee xten Beelzebú. <sup>19</sup> Palga si'c najcni, ¿chuni'c rudeed yälrnibee loj rexpejntu te rbääreni bendxab? Lagajc laareni ruluii xhet laadi rujntu xhigab. <sup>20</sup> Palga narä rbää rebendxab con xcälrnibee Dios, ni'cni rului loj abidzujn xcälrnibee Dios lojtu.

<sup>21</sup> 'Cheni suga' te bendaan, ca'ni guuib, canäjni rolizni, rutliidi ruhualdi rehxixtenni.

<sup>22</sup> Niluxh che jiääd stee ni nadipru lo bendaanga, rudxagdi jlnini, rujnni gaanni, dxejc rudzucajni xquibni ni badeed yäl bendaan lojni, dxejc saj cchanäni guiraa rehxixtenni.

<sup>23</sup> Reni xhet yu'di xladä, rdxe'chreni loä. Ni di gutopnä j narä, rutie'chni.

<sup>24</sup> Räjpzani:

—Cheni rii te bendxab ne j lastoo te bejn, ricansajni nez lo reyubijdz, caguiilni cadro gusilajzni. Che cad rdxäldini, rujnni xhigab, naani: “Guibisacä rolizä cadro biriä.”

<sup>25</sup> Cheni guibi'ni, rdxälmi lastoo bejnga si'c te yu' ni entis gulujx bilioobni, suchesa'cni.

<sup>26</sup> Dxejcti rixiini sgajdz bendxab ni rujnru latsiaj lojni. Dxejc riu'reni ne j lastoo bejnga, dxejc nalasru ria'n bejnga loj ni gujcn galoo.

*Chicbaa renani riu xtidx Dios*

<sup>27</sup> La j ni canii Jesús rediidxre, te nane' ni yu' lo reben xhidaalga dipli guniini, räjpni:

—jChicbaa nan ni biädnälu guedxliuj! Chicbaaza nani baslaa luj.

<sup>28</sup> Luxh laani räjpni:

—Xhet si'cni najcni; chicbaaru rebejn ni rucua diajg xtidx Dios, ni ruzoobza xtiidxni.

*Rebenguijdx rniab te milagwr si'c te seen*

*(Mt. 12:38-42; Mr. 8:12)*

<sup>29</sup> Sanuutis cadojp rebejn gabi Jesús, dxejc guslojni caniini, räjpni:

—Rebejn ni yu' naj benguidxduxhrene, rniabzareni te milaagwr si'c te seen; niluxh xhetru seendi fiireni, seentis xten Jonás, dade' ni gunii xtidx Dios galoo fiireni. <sup>30</sup> Lagajc si'c ni guj Jonás te seen loj rebejn guedx Nínive, si'cza narä, Xi'n Dios ni guj Niguii, gacä te seen lo rebejn ni nabaj n j. <sup>31</sup> Cheni guidzujn dxej ni gac fis sistie te nane' ni guj rein lo reyuj ni tre' ladbä jgw, sucuaquijni rebejn ni tre' guedxliuj n j sa'csi laani biriini zitduxh te bacua diajgpacni yäl najn xten Salomón. Ree suga' galäiitu tej ni sacduxhru lo Salomón, <sup>32</sup> luxh ditu chalilajz xtiidxni. Rebejn ni gulä jz guedx Nínive sisiunä j rebejn ni nabaj n j ne j redxej ni gac fis. Dxejc sucuaquijreni rebejn ni nabaj n j sa'csi laareni, che huinäli Jonás xtidx Dios lojreni, basiechlajzreni, basa'nreni xtojreni. Ni suga' lojtu n j sajcruni lo Jonás, niluxh ditu jiu xtiidxni.

*Ni rusanij xcäriejn bejn*

*(Mt. 5:15; 6:22-23)*

<sup>33</sup> Räjpzani:

—Rut rucuaquijdi te bajl, te gusujnini te lat xhiga'tz, niclaza ne j te caj. Susujni bajlga jiaa te rajc ruhuisa'c chutis ni riu' ne j yu'. <sup>34</sup> Balojlu najc si'c bajl xten xcäriejnlu. Palga ruhuisa'c balojlu, guideb xcäriejnlu yu' si'c bianij. Palga rajc balojlu dilu fisa'c, guideb xcäriejnlu yu' si'c lo nacä j. <sup>35</sup> Gunatiro te di gac xpianijlu yäl nacä j. <sup>36</sup> Palga guideb

xcäriejnlu yu' bianijtis, xheti te lajt nacäy, sajc fisa'clu guira'ti, si'c najc che rusanij te bajl nen yu'.

*Rucuaquij Jesús refarisee näjza rebejn ni najn leii*

(Mt. 23:1-36; Mr. 12:38-40; Lc. 20:45-47)

<sup>37</sup> Che gulujx gunii Jesús, biädgajñ te farisee Jesús chääni rolizni te chatajwni. Sä'tireni. Che biu' Jesús, gurejni lo mex. <sup>38</sup> Bidxeloj fariseega sa'csi dini niguiib ñaani si'cpac caj lo xleii Moisés gunreni te gaureni, sa'csi rujnreni xhigab si'c racnayareni lo Dios. <sup>39</sup> Dxejcti räjp Jesús lojni:

—La'tu ni najc refarisee, rguibtu nez dejtz te bas näjza te pla't, niluxh la'tu guidxa lastootu yälgubaan näjza yällatsiaj. <sup>40</sup> ¡Ben nadduxh! ¿La ditu gacbee? Nani benchee dejtzni, bencheeza nenñi. <sup>41</sup> Colyajc nadolajz, colyacnäj rebejn con ni rniitu, dxejc guiraa recos sajc naya par la'tu.

<sup>42</sup> 'iProbe'zatu, ben farisee! Rudeedtu lo Dios tej lo tejga tzuu ni rajptu: rudeedtu bedzxtiil näjza ruud, näj guiraa recuane' ni rajptu lo le', niluxh ditu jiu xcälguhtis Dios näjza xcälrinälajz Dios. Dee nanab guntu ganid, luxh na'cza gusaantu guntu ni alacayujntu par Dios.

<sup>43</sup> 'iProobza la'tu reben farisee! Rchagljaztu rbejtu lo reyagxhil xten rebejn ni sajc nen reguidobäz; rchagljaztu saru rnii rebejn “xchan Dad” lojtu che rijtu lo guii.

<sup>44</sup> 'iProbe'zatu! La'tu najctu si'c rebaa ni di guzeñ, rsiaj rebejn yejc cadre naga'reni luxh direni gan.

<sup>45</sup> Dxejcti badzu' tej rebejn ni ruluii leii diidxre lojni, räjpni:

—Dad mastr, che rniilu rediidxre, rniyajlu nuurnu.

<sup>46</sup> Dxejc räjp Jesús lojreni:

—iProbe'za la'tu rebejn ni ruluii leii! Sa'csi rnibeetu gun rebejn recos naganduxh ni najc si'c te cargw naduxh ni di gacdi guu bejn. Luxh la'tu di rlajztu faltuni nicla con te bicueñabäztu.

<sup>47</sup> 'iProobzatu! Sa'csi runcheetu xpaä redade' ni gunii xtidx Dios galoo, luxh najctu rexajg renani bagu't redade'ga. <sup>48</sup> Ni'cni najnpactu xhi gusajcreni, rchagljazzatu redzuun ni bejn retoxtadgoldootu; si'cza gunnäjtu narä sa'csi laareni bagu'treni redade'ga, dxejc la'tu runcheetu xpaareni.

<sup>49</sup> Ni'cni gunii Dios, sa'csi yuduxh xcälñajñni, räjpni: “Suxhalä reniguii ni guinii xtidxä näjza reapost, luxh sugu'treni gaiireni, susacsízareni sgaiireni.” <sup>50</sup> Loj rebejn ni nabajn ñaj siniab Dios gudeedreni cuent xcuent xtiejn guiraa redade' ni gunii xtidx Dios ni bagu'treni cheni guc-cheeli guedxliuj. <sup>51</sup> Guislojni xtiejn toAbel, näjza xtiejnli Zacarías ni bagu'treni galäii nez lodxan nen guidoro. Ni'cni rniä lojtu, siniab Dios cuent xten xcälgujt guiraareni loj rebejn ni nabajn ñaj.

<sup>52</sup> 'iProbe'za la'tu, rebejn ni ruluii leii! Sa'csi rniitu la'tistu rajptu yälñajn, luxh di rlajztu chalilajztu xtidx Dios, dizatu gusaan chalilajz rebejn ni rlajz chalilajz xtidx Dios.

<sup>53</sup> Cheni räjp Jesús rediidxre, bidxe'ch rebejn ni ruluii leii näjza refarisee lojni. Dxejc guslojreni canabdiidxreni xhidalduxh diidx, <sup>54</sup> te cagula'tzreni don la sajc guiga'ni lo xhitis te diidx ni guiniini.

## 12

*Jesús ruluii xcuent levaduur*

<sup>1</sup> Lañ ni caniini, bidojp xhidajl miñ bejn ro'c, calaro'li sa'reni. Dxejc gusloj canixgaa Jesús loj rexpejnñacni, räjpni lojreni:

—Colñati levaduur xten refarisee, rusgueereni rniitisreni xhidajl diidx luxh direni gunni. <sup>2</sup> Sa'csi xheti xhi niäu lojni ni di guxal lojni luxh xheti xhi naga'tz ni di jienloj.



<sup>3</sup> Ni'cni guiraa ni guniitu lo nacäy, sienni lo bianij xten dxej. Luxh ni gunii xhiga'tztu nen reyu' ni niäudzu'tz, sixedxa'renini rediidxga yejcli reyu'.

*Chuni'c nanab guidxejbtu*  
(Mt. 10:28-31)

<sup>4</sup> Räjzani:

—Rniä lojtu, xamigwä, na'c guidxejbtu rebejn ni sajc ju't tiejxhtu, dxejc xhetru sajcdi gunreni. <sup>5</sup> Guiniä lojtu chuni'c nanab guidxejbtu. Colguidxejb nani che abadzucajni yälñabajn rajpni yälñabee gusañni la'tu gabijl lo bajl ni cayejc par tejpas. Ni'csii colguidxejb.

<sup>6</sup> 'Anajntu sajc jio' gatii mane' tio'p melbäz, luxh di Dios jiällajz nicla tej remane'ga.

<sup>7</sup> Rexquidxejcti abigab tebgajni. Na'c guidxejbtu; la'tu sajcrutu loj xhidajl remane'ga.

*Reni riembee Jesús nez loj rebejn*  
(Mt. 10:32-33; 12:32; 10:19-20)

<sup>8</sup> Räjzani:

—Rniä lojtu, guiraa rebejn nani rcäjp rililajzni xtidxä nez loj rebejn, narä Xi'n Dios ni gujc Niguui sicäpä najcni xpenä nez loj rexangl Dios. <sup>9</sup> Luxh reni di guicäjp rililajzni xtidxä nez loj rebejn, sigajcza sunnäni nez loj rexangl Dios xhaguibaa.

<sup>10</sup> 'Chutis ni guinii te didxnaj xcuentä, susiäjllajz Dios laani. Niluxh chutis ni guiniyaj Sprit Dxan xten Dios, di Dios gusiäjllajz xtojlni.

<sup>11</sup> 'Cheni chanäreni la'tu nez loj rebejn guidobäz o nez loj reguxhtis, na'c guntu xhigab xhi gudzu'tu diidx o xhini'c guiniitu, <sup>12</sup> sa'csi che guidzujn or ni guiniitu, Sprit Dxan xten Dios suluiini xhini'c guiniitu.

*Reyälñasa'c rusajb bejn nen dojl*

<sup>13</sup> Te niguii ni nadxaag rebejn xhidaalga räjpni loj Jesús:

—Dad, Mastr, gojs lo betzä guniidxni gala' xhixtenä ni basa'n toxtadnu loonu.

<sup>14</sup> Dxejc räjp Jesús lojni:

—Dade', ¿chuni'c gule narä gunä yälğuxhtis o gacä abogaad lojlu, ä?

<sup>15</sup> Dxejc räjp sac Jesús lojreni:

—Colñatiro, colgantzu' te di rlanjztistu ga'ptu yälñasa'ctis sa'csi xcälñabajn bejn dini gac yälrajptis xhidajl xhi cos.

<sup>16</sup> Dxejcti bij Jesús te cuent, räjpni lojreni:

—Guyu' te bejn rapduxh. Racduxh cose'ch lo rexcäjlni. <sup>17</sup> Dxejcti gusloj bejn ni xhigab: “¿Xhocha gunä? Dina gapä cadre cucheä recose'ch.” <sup>18</sup> Sas bejn ni xhigab: “Ananä xhini'c gunä. Gudzulä reyu' cadre rgucheä recose'ch, te gustiobä reyu'ga, te ro'c cucheä guiraa recose'ch näjza rehxixtenä.” <sup>19</sup> Dxejcti siniä lo lastoä: “Lastoä, agulucheelu xhidajl xhi cos, sajlni xhidajl ijz. Basilajz naj, gudajw, gu', bibalajz.” <sup>20</sup> Dxejc räjp Dios lojni: “¡Bejn najd! Lagajc guxhijnre siniabä xaimlu. ¿Dxejca'? ¿Chu xca' guiraa recos ni gulucheelu?” <sup>21</sup> Si'c sisiajc guiraa rebejn ni rguiltis xcälñasa'creni lo guedxliujre, niluxh xhet rajpdireni loj Dios.

*Rcanäj Dios rexi'nni*  
(Mt. 6:25-34)

<sup>22</sup> Che gojl stera't, räjp Jesús loj rexpejn pacni:

—Ni'cni rniä lojtu, na'c rujntu xhigab xcuent xho guibajntu o xhini'c gautu te guibajntu, niclaza xcuent lajd ni gacwtu. <sup>23</sup> Yälñabajn sajcruni lo yälrajw; tiejxhni sajcruni lo lajd ni rajcw bejn. <sup>24</sup> ¡Colñuii rebaloo! Direni cue'c binij, dizareni gutojp cose'ch, dizareni ga'p nicla yu' nicla te cadre chuchee cose'ch, per rudeed Dios xhi rajwreni. ¿La xhet sajcdirutu loj rebalooga, ä? <sup>25</sup> Luxh ¿Chu tejtü palga runduxhni xhigab sajc tiobrui sgarol metr? <sup>26</sup> Palga di gacdi guntu nicla te cosbäz, ¿xhicuent ru'tu yärsia' xcuent xhi stee cos?

<sup>27</sup> ¡Colhunii xho rga' reguino'ch! Direni gun dzuun, dizareni gun lajd lo dzujb, luxh rniä lojtu, nicla reii Salomón con guiraa xcäl'nasa'cni, dini nisiuchee si'c rsiuchee reguiiga. <sup>28</sup> Palga rusuchee Dios recuaan ni rga' lo niaa, ni rial nadxej, luxh guixee-huijdx, che agubijdzni, rejcní lo däj, aticaxh Dios suniidx xhi gacw la'tu, ¡bejn nani guxii rililajz! <sup>29</sup> Ni'cni rniä na'c runtejtú xhigab xho quiiltu xhini'c gautu, xhini'cza yätu, na'c chutistu yärsia'. <sup>30</sup> Si'ctis rujn rebenguedxliuj guideb xtijpreni rguilreni rexhicosre. Niluxh xtadtu ni yu' xhaguibaa anajnni xhini'c rquiintu. <sup>31</sup> La'tu colquiiltis xcäl'nibee Dios, dxejcti laani suniidxzani guiraa recos ni rquiintu.

*Yäl'nasa'c ni yu' xhaguibaa*  
(Mt. 6:19-21)

<sup>32</sup> Räjpzani:

—La'tu ni najc rexilä'ä, na'c guidxejbtu, sa'csi rbaali lajz Dios, aguleni la'tu te la'tu guntu yäl'guxhtis lo xcäl'nibeeni. <sup>33</sup> Colguto' xhixtentu, colgudeedni loj rebejn ni caquin-duxhni, te si'c guntu te bols ni di jiuixh, te chu yäl'nasa'c neñni xhaguibaa cadre di gubaan jiu' niclaza xcabäj rexhicos. <sup>34</sup> Sa'csi cadre rajptu xcäl'nasa'ctu, ro'cza yu' lastootu.

*Nanab susintu*

<sup>35</sup> Räjpzani:

—¡Colsusin! ¡Colhualguij rebajl! <sup>36</sup> Colyujn si'c remos ni cabäjz guibi' xlamreni ni säa te sa', te cheni guibi'ni guxhalgajcreni rolä'. <sup>37</sup> Chicbaa remos ni susin che guibi' xlamreni. Rniliäpac lojtu, lagajc xlamreni sajcwni xhajbni sibe'cni rexmosni lo mex, dxejc lagajc laani sudeedni xhi gaureni. <sup>38</sup> Mase guidzujñni garol yääl, mase guidzujñni cäyru, palga guidxäl'ni arexmosni susin, ¡chicbaa remosga! <sup>39</sup> Colyacbeepac, paru gacbee baxhuaan xten yu' xhi or guidzujñ gubaan rolijzni, dini gusaan guxhalreni rolijzni te cuanreni xhixtenni. <sup>40</sup> Näjza la'tu colsusin, sa'csi or ni ditu gun xhigab jiaädni, sidzujñ Xi'n Dios ni gujc Niguii.

*Te mos guijdx*  
(Mt. 24:45-51)

<sup>41</sup> Dxejc gunabdiidx Pedr lojni, räjpní:

—Dad, ¿la lootisnu rujylu cuentre o la najcni par guiraa rebejn?

<sup>42</sup> Dxejc räjz Jesús lojreni:

—¿Chuni'c najc mos hueen, mos nasin, ni rusannäj xlamni guiraa rexmosni te gudeedni xhi gaureni che gal oor, ä? <sup>43</sup> Chicbaa mosga palga laaca cayujñni che guibi' xlamni. <sup>44</sup> Rniliäpac lojtu, lamga sudeed guiraa rexhixtenni te xcanäj mosgani. <sup>45</sup> Per palga gun mosga xhigab neñ lastooni: “Saclaa guibi' xlamä”, sas guislojni gusacsini resamosni, gunaa sigajc niguii, dxejc guisloj gauni, yäni, soozni; <sup>46</sup> sibi' xlamni te dxej ni xhet cabäjzdinini, or ni dini gun xhigab guidzujñni. Dxejc sii sudeedni te castigwro lojni, sutiäjlni te duu dejtzní dxejc sinibeeni jiini, guidxaagni rebejn ni di gusobdiajg diidx.

<sup>47</sup> Mosga ni najn xhini'c rlajz xlamni gac, luxh dini susin, dizani guzoob xtiidxni, sutiälduxhreni duu dejtzní. <sup>48</sup> Niluxh mos ni di gan xhi rlajz xlamni gac, ni'c rujñni redzuun ni di xlamni guidxaglajz gac, guxiiru castiigw gacni. Reni rca' xhidajl, xhidajlza riäjł gudeedreni; loj reni rca' yäl'nibeduxh, xhiroobza siniabni lojni.

*Rlia' Jesús bejn lo sa'ni*  
(Mt. 10:34-36)

<sup>49</sup> Räjz Jesús:

—Narä biälä te gucuaguiä guedxliujre; ¡malaii alagusloj cayejcni! <sup>50</sup> Niluxh nanab tedä te yäl'robnis ni säloj te trabajwduxh, ni'c cayuduxhä yärsia' cheni chale'lini. <sup>51</sup> ¿La rujntu xhigab biälä te jiaädnaä yäl'rbedxi loj guedxliuj, ä? Rniä lojtu, dini gac si'c. Alga biälä te gulia'ä bejn lo sa'reni. <sup>52</sup> Silia' sa' te famil; loj gaiireni, sidxe'ch choñreni loj

tio'preni, luxh tio'preni sidxe'chza lo choṇreni. <sup>53</sup> Silia' sa'reni; sidxe'ch dad lo xingaanni, luxh xingaanga sidxe'chza lo xtadni; nane' sidxe'ch lo xindxa'pni, luxh xindxa'pga sidxe'chzani lo xnanni; nansuegr sidxe'chni lo xculijzni, luxh gulijzga sidxe'ch lo xnansuegrni.

*Reseen xten retiem̄p*

(Mt. 16:1-4; Mr. 8:11-13)

<sup>54</sup> Caniiza Jesús lo rebeṇ xhidajlga, räjpni:

—Cheni rhuiitu räjs reza nez lad jiät, rniitu: “Siajb nisguij.” Luxh riabni. <sup>55</sup> Che rbi' bej nez lad danbägw, rniitu: “Sacnalaa nadxej”, luxh si'c rajcni. <sup>56</sup> ¡Bejṇ ni rusguee! La'tu racbeetu xhi säloj reseem ni rien lo guedxliuj näjza xhaguibaa, ¿xhicuent ditu gan xhi säloj retiem̄p ni dxunnu ṇaj, ä?

*Basiäj̄l diidx con rebejṇ ni rdxe'ch lojlu*

(Mt. 5:25-26)

<sup>57</sup> Räjpzani:

—¿Xhicuent ditu quuil lagajc la'tu xhini'c najc hueen, xhini'c najc laaca te guntuni? <sup>58</sup> Sa'csi palga yu' chuni'c chale'c xquejlu lo guxhtis, laṇni sanäni luj ro jusgaad, basiäj̄l diidx con laani lo nejz, te na'c chanäni luj lo reguxhtis, sa'csi dxejc reguxhtis suteedreni luj lo reguixhajg te gusaureni luj neṇ latzguiib. <sup>59</sup> Luxh rniä lojlu, dilu guirii ro'c hasta gusa'lu quixlu guiraa lojreni.

## 13

*Colgusiejch lajztu te di guettu*

<sup>1</sup> Lagajc dxejc, gubig gaii reni huisa'nreni diidx loj Jesús xcuent gaii beṇ Galilee ni bagu't Pila't neṇ guidoo, bagu'chni xtiejnreni con xtiejn reman ni siädnäreni si'c gojn lo Dios. <sup>2</sup> Sas räjp Jesús lojreni:

—¿La rujntu xhigab si'c gusajc rebeṇ Galileega sa'csi najcrureni beṇdojṇ lo rebejṇ lajdxreni? <sup>3</sup> Narä rniä, dini gac si'c. Palga di'tu gusiechlajz sigajcza sejt guiragajctu. <sup>4</sup> O xcuent guitzunchon rebejṇ nani gujt che gubixh te or ni laa Siloé yejreni, ¿La rujntu xhigab najcrureni beṇ dojṇ lo rebejṇ ni rbäjz guedx Jerusalén, ä? <sup>5</sup> Narä rniä, dini gac si'c. Palga di'tu gusiechlajz, sigajcza sejt guiragajctu.

*Xcuent te yag iigw*

<sup>6</sup> Dxejcti gusloj bij Jesús te cuent ni ruluiini lojreni, räjpni:

—Te dade' gojp te yagiigw ni basujni lo xyujni. Sas huihuini don la caj ninejxh lojni. Luxh xhet ninejxhdi bidxäläni. <sup>7</sup> Dxejc räjpni loj bejṇ ni canäj xyujni, agujc choṇ iiz siädtilä ninejxh lo yajgre, luxh xhetini. Batin yajgre. ¡Xlia'si sujni lo yuj! <sup>8</sup> Luxh xmosni räjp lojni: “Dad, basaanni steb iiz, guslää yuj ni'ni, gusälä abonni. <sup>9</sup> Palga xcaj ninejxh lojni steb iiz, laaca, palga dini xcaj, dxejc guitinnuni.”

*Rusiajc Jesús te gunaa*

<sup>10</sup> Te dxej ni rusilajz rexpejṇ Israel caguluii Jesús neṇ te guidobäz. <sup>11</sup> Ro'c suga' te nane' ni agujc tzunchon iiz racxhuuni. Beṇdxab caguscoodni, niluxh di gacdi suliiini. <sup>12</sup> Che bahuii Jesús lojni, gurejdxnini, dxejc räjp Jesús lojni:

—Gunaa, abasaan yälgujdxga luj.

<sup>13</sup> Che basujni ṇaani yejcn, lagajc dxejc gujc gusulii nane'ga. Dxejc guslojni calä'pni xpala'n Dios. <sup>14</sup> Luxh dade' ni rnibee guidobäz bidxe'chni sa'csi basiajc Jesús nane'ga che najcni dxej ni rusilajzreni, ni'c gusloj cayäjpni loj rebejṇ:

—Xho'p dxej sajg gun bejṇ dzuun; neṇ redxejga sajg jiäädte te jiajctu, per na'c jiäädte dxej ni rusilajz rexpejṇ Israel.

<sup>15</sup> Dxejc badzu' Jesús diidxre, räjpni lojni:

—¡Ben rusguee! ¿La di chutis tejtu guxhec xconni o xpurni te chanänini yäni nis, mase najcni dxej ni rusilajz bejn, ä? <sup>16</sup> Luxh nane're najc te xagdo toAbram, nani numbee Dios, ni agujc tzunbichon ijz baliib benḏxabni, ¿la digacdi guixecni lo xcälgujdxni mase najcni dxej ni rusilajz bejn, ä?

<sup>17</sup> Che gunii Jesús rediidxre, bianxtujy rebejn ni rdxe'ch loj Jesús, luxh reben xhidaalga cabalazduxhrene sa'csi cayujn Dios redzunro nez lojreni.

*Xcuent bedz muxhtas*  
(Mt. 13:31-32; Mr. 4:30-32)

<sup>18</sup> Ni'cni räjp Jesús lojreni:

—¿Xhocha najc xcälrnibee Dios? ¿Xhicha cojn guiniä najcni tebloj? <sup>19</sup> Najcni si'c te bedz muxhtas ni rbe'c te bejn lo xyujni. Luxh che guiroobni, rajcni te yagro. Dxejc riääd remane' ni rutajt siädynchee xpitiääzni loj rexhajcwni.

*Xcuent cojb ni rusaguij*  
(Mt. 13:33)

<sup>20</sup> Guniiza Jesús stehuält te gacbeerene xho guire'ch rextidx Dios. Räjpni lojreni:

—¿Xhicha cojn guntebloä xcälrnibee Dios? <sup>21</sup> Najcni si'c levaduur ni rugu'ch te gunaa lo chon mediid arin, luxh rusaguijni guiraa cojbga.

*Dää rolä' cadre jiu'ni xhaguibaa*  
(Mt. 7:13-14, 21-23)

<sup>22</sup> Huinuu Jesús xnejzni sääni guedx Jerusalén. Laḏni sadejdni reguejdx näjza rerench caguluiini rebejn. <sup>23</sup> Dxejc gunabdiidx te bejn lojni, räjpni:

—Dad, ¿la guxii najc rebejn ni caḏaa loj rextojḏreni, ä?

Dxejc räjpni lojreni:

<sup>24</sup> —Dää rolä' cadre jiu' bejn xhaguibaa. Ni'cni coltip lajztu te jiu'tu ro'c, sa'csi xhidajl bejn rḏajz jiu'reni ro'c, niluxh direni gun gaan. <sup>25</sup> Cheni abasäu baxhuaan xten yu' rolä', dxejc la'tu ni suga' detz yu' guisloj gusejstu rolä', guiniitu: “Dad, baxhal-laa rolä’”, dxejc laani sudzu'ni diidx, siniini: “Dina ganä caro siäädte.” <sup>26</sup> Dxejc guislojtu guiniitu: “Bidxunnäänu, bidaunäänu, bidunnäänu luj, basedlu nuurnu lo xnezyuunu.” <sup>27</sup> Dxejc siniini lojtu: “Rniliä lojtu, dipacnä gumbeä la'tu. Coljij guiraatu, benḏlatsiaj.” <sup>28</sup> Dxejcti sonduxhtu, chubejli läjyту che fiitu abiu' toAbram, con toIsaac, con toJacoob, näjza guiraa redade' ni gunii xtidx Dios, suga'reni lo xcälrnibee Dios xhaguibaa, luxh la'tu di gacdi jiu'tu. <sup>29</sup> Dxejga sidzujn xhidajl benḏzjnt ni siääd ladjiaa, ladjiaät, ladbäjgw, näjza ladbee, te jiu'reni lo xcälrnibee Dios xhaguibaa, ro'c sibejzareni lo mex. <sup>30</sup> Luxh yu' reni rujntu xhigab guxii sajcreni naj, sacduxhrene dxejc. Yu'za reni rchalotu sacduxh naj, xhet sajcdireni dxejc.

*Jesús biin xcuent guedx Jerusalén*  
(Mt. 23:37-39)

<sup>31</sup> Lagajc dxejga, bidzujn gaii refarisee, räjpreni lojni:

—Huij, biunejz ree, sa'csi Herodes rḏajz ju'tlu.

<sup>32</sup> Dxejc laani badzu'ni diidxre lojreni, räjpni:

—Gojz lo bäjzga, ben rusguee: “¡Bahuii! cabää rebenḏxab lastoo rebejn, cagusiäcä rebejn ni racxhuu nadxej näjza guixee, luxh huijdxli guluxä xtzunä.” <sup>33</sup> Niluxh mase si'c gacni nanab chanuä xnezyuä nadxej näjza guixee, huijdx, sa'csi di gacdi guet te dade' ni rnii xtidx Dios ste'ca guejdx, guejdxḏtis Jerusalén sajz guetni.

<sup>34</sup> ¡Probe'tu, la'tu ben Jerusalén! Rugu'ttu redade' ni riädni xtidx Dios lojtu, rucuaazatu guij yejc rebejn ni ruxhal Dios lojtu. Balti huält rḏazä nuchagä sa'tu si'c ruchagsa' te guidco'c rexquidbäzni lajd xhigani, niluxh ditu nicäjp. <sup>35</sup> Bahuii xho bianxteb xquidootu. Ni'cni arnixgä lojtu, dirutu fii loä cheni guidzujnḏi dxej ni guiniitu loä: “Chicbaa ni siääd xcuent Dios.”

## 14

### *Rusiajc Jesús te bejn ni guidxa guij*

<sup>1</sup> Che gojl te dxej ni rusilajz rexpejn Israel, huitajw Jesús rolijz tej ni rnibee loj refarisee. Cagula'tz gaii refarisee, guidon xhini'c gun Jesús, <sup>2</sup> sa'csi nez loj Jesús suga' te dade' ni guidxa guij tiejxhni. <sup>3</sup> Dxejc gunabdiidx Jesús lo rebejn ni ruluii leii näjza lo refarisee, räjpni lojreni:

—¿La sajc gusiajzni te bejn racxhuu dxej ni rusilajz bejn o la di gacdini?

<sup>4</sup> Per laareni dxitis suga'reni, niäutis ro'reni. Dxejc cua' Jesús bejn racxhuuga, basiajcnini, gunibeezani biunejzni. <sup>5</sup> Dxejc räjpni loj refarisee:

—Chu la'tu ni rajp te bur o te gon, palga jiajbni nen te bisie, ¿la ditu chalägajzni mase najcni dxej ni rusilajz bejn, ä?

<sup>6</sup> Dxejc di niajzni nudzu'reni diidx lojni.

### *Reni bidon chää sa'*

<sup>7</sup> Cheni bahuii Jesús xho rchagljaz rebejn rbereni latsa'c te cuereni cuä' rebejnro, bijni te cuent ni ruluii lojreni, räjpni:

<sup>8</sup> —Cheni guidontu chäätu te sa', na'c guntu te cuetu cuä' rebejnro, te di guidzujn te bejnroru lojlu, <sup>9</sup> dxejc jiäd bejn ni cayujn lanij, naani lojlu: “Badeed cue dade're ro'c.” Dxejc situjylilu chacuelu ste'ca lajt lo le'li. <sup>10</sup> Maazru hueen, cheni guidonlu chäälu te sa', huicue lo mex ni zuj lo le' te che guidzujn bejn ni cayujn lanij, naani lojlu: “Xamigwä, gudaa cuelu nen yu' cadro rbej rebejnro.” Si'c sä'p xpala'nlu nez loj guiraa rebejn ni sobganäjlu lo mex. <sup>11</sup> Sa'csi ni rlajz chä'p xpala'nni nez loj rebejn, sianxtujyni nez lojreni. Luxh bejn ni najc nadolajz, sä'p xpala'nni nez loj guiraa rebejn.

<sup>12</sup> Räjzani loj bejn ni cagudeed xhi gaureni:

—Cheni gunlu te lanij o guteedlu bejn lo xmexlu, na'c cuedxtislu reexamigwlu con rebejtzu, con resa'lu, niclaza rexpisnlu ni najc ri'cw, sa'csi laareni sigajcza sibejdxreni luj che gunreni te lanij, luxh si'c agudijxreni ni badeedlu lojreni. <sup>13</sup> Che gunlu te lanij, alga gurejdx rebejnproob, rebejncoj, näjza rebejnlotiä'p, <sup>14</sup> dxejcti sibaa lajzlu sa'csi laareni di gacdi gunidxsacreni ni badeedlu lojreni; luxh si'c siguixsac Dios ni bejnlu che gal dxej ni guibansac rebejn loj rebejn gut.

### *Xcuent te laniro*

<sup>15</sup> Che biejn diajg tej reni sobga' lo mex, räjpni loj Jesús:

—Chicbaa rebejn ni gau yätxtiil cadro rnibee Dios.

<sup>16</sup> Dxejc räjp Jesús lojni:

—Guyu' te dade' ni bejn te laniro rolijzni. Gunibeeni bidon xhidajl bejn te jädtaunäjrenini. <sup>17</sup> Che bidzujn or ni gaureni, baxhal dade'ga te xmosni chatejdxni rebejn ni abidon, räjpni lojreni: “Colchäj, asuchee lo mex.” <sup>18</sup> Dxejc guiragajczeni gusloj cayäjb di gacdi chääreni. Tejni räjp: “Entis gusiä te la' yuj, luxh naj nanab chahuiä xho najcni. Goslaa di gacdi jiälä.” <sup>19</sup> Steeni räjp: “Gusiä gaii nejs gon, luxh nanab chahuiä xho rujnreni dzuun. Goslaa di gacdi jiälä.” <sup>20</sup> Steeni räjp: “Entis bachnää ni'cni di gacdi jiälä.” <sup>21</sup> Che gubi' mosga, badeedni diidx lo xlamni xhi räjp rebejnnga lojni. Dxejc bidxechduxh lamga, räjpni lo xmosni: “Basquejn huij ladnezyuj näjza ladnezyuj dää, gudanä rebejnproob, rebejncoj, rebejnlotiä'p, rebejnatiujnc.” <sup>22</sup> Si'c bejn mosga. Che gubi'ni räjpni lo xlamni: “Dad, abenä si'c ni gunibeelu, luxh lajtru yagxhiil.” <sup>23</sup> Dxejc räjp lamga lo xmosni: “Huij lo renezyuj ni sii loj reguedxzijz, gudanäj rebejn ni guidxaaglu nejzga, te cha bejn rolizä. <sup>24</sup> Rniliä lojtu, nicla tej reni bidon ganid di gau xhuej nani benä.”

### *Ni nanab gunni te chanajlni Crist*

<sup>25</sup> La laj sasaj Jesús lo nejz, xhidalduxh bejn sanajlni. Dxejc gubiréni, gusloj cayäjpni lojreni:



<sup>26</sup> —Palga yu' chu tej ni jiaäd loä, ni di cuälaz xtadni, xnanni, chäälni, rexi'nni, rebejtzni, näjza rebisiajnini, nägajcza xcäl'nabajjni, di gacdi gacni te rexpənä. <sup>27</sup> Palga yu' chutis tej ni di rlanj tedni trabajw te jiaädnajlni narä, di gacdi gacni te rexpənäpac. <sup>28</sup> Chu tejtü ni rlanj gun te yuro, ni di gunxgaa xhigab lacti meel chanä yu'ga, te guidon la sajc guluuxnini. <sup>29</sup> Didi cheni abejjni recimient, di gacdi guluuxnini, dxejc guiraa reni fii lojni suxhiznäjrenini, <sup>30</sup> säjpreni: “¡Bahuilaa! Bejnre gusloj bencheeni te yu' per di niajcdi nuluuxnini.” <sup>31</sup> ¿Chu te reii ni gun xhigab chachagdijlni stee reii, ni di gunxgaa xhigab don laa sajc gunni gaan con tzuu mił soldaad loj stee reii ni siääd con gajl mił soldaad, ä? <sup>32</sup> Palga di gacdi gucuanäjnini, che gacbeeni zijtli siääd stee reiiga, suxhalni te xpejnini chanab yäl'rbedxi lojni. <sup>33</sup> Ni'cni palga chutis tejtü di gusaan rehxixtenni te jiaädnajlni narä, di gacdi gacni te rexpənäpac.

*Che diru sejd gac nadzujy*  
(Mt. 5:13; Mr. 9:50)

<sup>34</sup> Räjzani:

—Huen najc sejd. Per cheni diruni gac nadzujy, ¿xho gacru gac nadzujyni? <sup>35</sup> Xhetru sajdini, nicla te chääni loj yuj, niclaza te chääni lo abon. Gusältis bejn sejdga. Reni rlanj gucua diajg xtidxä, sucua diajga'creni.

## 15

*Xcuent xiil ni gunij*  
(Mt. 18:10-14)

<sup>1</sup> Guiraa reni rusquijx impuest näjza rebendojl cabigreni loj Jesús, te cuadiajgreni rextiidxni. <sup>2</sup> Refarisee näjza rebejn ni ruluii lei gusloj camojmreni, räjpreni:

—Bejnre rusaan rbig rebendojl lojni, luxh raunäjzanireni.

<sup>3</sup> Dxejcti bij Jesús cuent ni ruluiire lojreni, räjpni:

<sup>4</sup> —Chutejtü ni rajp tegayuu xiil, palga chanijtü tejni, ¿la dini gusaan stapbitzuubigaa rexiilni lo niaa te chatiilni xile' ni gunij, hasta guidxällinini, ä? <sup>5</sup> Luxh che guidxällinini sibaduxh lajzni, dxejc sutzuubnini ro xhajcwni. <sup>6</sup> Che guidzujjni rolijzni sutojpnini rexiimigwni näjza rexpisiñni te gäbni lojreni: “Colguibalaznäj narä sa'csi abidxälä xile' ni gunij.” <sup>7</sup> Rniä lojtu, sigajcza su'ru yäl'rbalajz xhaguibaa xcuent tejtis bejn ni guibig lo Dios ni gusiechlajz xtojlni quela xcuent tapbitzubaigaa bejn ni di guiquiin gusiechlazreni xtojlni.

*Xcuent meel ni gunij*

<sup>8</sup> Räjzani:

—Sigajcza te gunaa ni rajp tzuu meel, palga chasäl'ni tejni, ¿la dini gusanij te bajl te guloobni neñ yu' hasta guidxällinini, ä? <sup>9</sup> Luxh che guidxällinini, sutojpnini rexiimigwni näjza rexpisiñni, säjpnini lojreni: “Colguibalaznäj narä sa'csi abidxälä meel ni gunij.” <sup>10</sup> Rniäza lojtu, sigajcza sibalajz rexangl Dios xhaguibaa xcuent te bendojl ni rusiechlajzni.

*Te bejn ni baxun te xi'nni*

<sup>11</sup> Dxejc bijza Jesús cuentre lojreni:

—Guyu' te dade' ni yu' tio'p xingaanni. <sup>12</sup> Dxejc xi'nni ni najc huinruga, räjpni lo xtadni: “Dad, baniidx yäl'nasa'c nani nungäj' xca'a.” Sas badeed xtadni xerensni. <sup>13</sup> Di niaclaa, balsi dxej gudejd, chela bato' xihuinni guiraa xhixtenni, dxejc sääni, bidzujjni te guedxzij. Ro'c banijtni guiraa xmeelni lo recoguidx. <sup>14</sup> Che abanijtni guiraa xhixtenni, biääd te gubinduxh guedxzijtgä cadro yu'ni. Sas guslojzani calaanni. <sup>15</sup> Dxejc huitiilni dzuun lo te beñguejdxga. Baxhal bejngani te huigajpnini cuch lo xyuj dade'ga. <sup>16</sup> Luxh calanduxhni bejnini xhigab malaii sajc gauni recuaan ni najc si'c lia ni cayajw recuch, niluxh rut badeedi xhi niajwni. <sup>17</sup> Lal ni cadejdni trabajwga, bianij xcäriejnini

bejnne xhigab, naani: “Balti rexmos xtadä rausa'c, ria'nru xhi gaureni. Luxh narä ree calanduxhä, ameerli guetä. <sup>18</sup> Guibi'älis ladxä, rolijz xtadä, gäpä lojni, Dad, banitä lo Dios näjza lojlu. <sup>19</sup> Diru nungäj̄l guirilaä xi'nlu. Cua' narä si'c te xmoslu.” <sup>20</sup> Dxejc gunazgajcni nejz te gubi'ni rolijz xtadni.

'Cheni zijtru siäädni, bahuui xtadni lojni. Dxejc balaslajznini, ruxunlini, huichaglojnini, sas gudääänini, bachagro'ni lojni. <sup>21</sup> Dxejc räjp xi'nni lojni: “Dad, abanitä lo Dios näjza lojlu. Diru nungäj̄l guirilaä xi'nlu.” <sup>22</sup> Per räjp xtadni loj rexmosni: “Coltanä te ladsa'c, colshuajcwnini xi'nä, colgsäl̄ te niil bicuenaani, xcajza te gura'ch ni'ni. <sup>23</sup> Coltanä te biser̄ ni guro' colgu'tni. ¡Colsquejn te guidaunu, jiennu te lanij! <sup>24</sup> Sa'csi xi'näre abenä xhigab gujtni, luxh naj si'cni agubansacni, gunijtni niluxh naj abidxäjlni.” Dxejc guslojreni bejnreni te lanij.

<sup>25</sup> 'Laļ ni cayajc dee, xingangalooni cayujn dzuun lo niaa. Che gubi'ni, siäddzūngajxhni rolijzni, che biejn diajgni cayel̄ rolijzni, caguya'zareni. <sup>26</sup> Dxejcti gurejdxni te mos, gunabdiidxni lojni xhi cayajc royu'. <sup>27</sup> Dxejc räjp mosga lojni: “Gubisac bejtzlu, luxh xtadlu gunibee gujt te biser̄ guro' te gac lanij sa'csi nadaanni gubi'ni.” <sup>28</sup> Dxejc bidxe'ch xingangalooni. Naadtini jiu'ni rolijzni. Che gucbee xtadni naadtini jiu'ni, bihuui xtadnini te gunabni jiu'gani. <sup>29</sup> Dxejc räjpni lo xtadni: “¡Bahuilare! Agujc xchej cayunä dzuun lojlu, luxh rusobdiagä guiraa xtiidxlu, per nicla tej huält gajdlu guniidx nicla te dxibe' loä te gunä te lanij con reexamigwä. <sup>30</sup> Luxh naj ni abidzujn xi'nlure, ni banijt xmeellu con regunadxab, xhoxh bagu'tlu te biser̄ guro' te cayujnlu xlanijni.” <sup>31</sup> Dxejc räjp xtadni lojni: “Xi'nä, sugagajclu loä, luxh guiraa ni rapä najc xtenlu. <sup>32</sup> Niluxh naj riäj̄lpac jiennu lanij, guibalaaznu, sa'csi bejtzlu ni benä xhigab agujt, agubi'ni naj, najcni si'cni gubansacni; gunijtni, naj abidxäjlni.”

## 16

### *Xcuent te ni rnibee loj remos*

<sup>1</sup> Dxejc cayujyza Jesús stee cuent loj rexpejn̄pacni, räjpni:

—Guyu' te benraj̄p ni guyu' lojni te ni rnibee loj rexmosni. Dxejc biääd reni badeedreni diidx lojni, räjpreni: “Bejn̄ ni rnibee loj rexmoslu xhetlaadi cayujn̄ni cagunijtni rehxixtenlu.” <sup>2</sup> Dxejcti gurejdx xlam̄nini, räjpni lojni: “¿Xhi dee ni riejn̄ diagä caniireni xcuentlu, ä? Naj guniidxlu loä cuent xte xtzuunlu, sa'csi dirulu chanuu guinibeelu lo rexmosä.” <sup>3</sup> Dxejc bejn̄ga bejn̄ xhigab: “¿Xhichani'c gunä naj ni gudzucaj xlam̄ä dzuun loä? Dina ga'pä yäl̄rstij̄p te gunä dzuun lo niaa, luxh situjyā chanabä gojn. <sup>4</sup> Ananä xhini'c gunä te che dirunä ga'pä dzuun, sibejdx reexamigwä narä rolijzreni.” <sup>5</sup> Dxejcti gurejdxni tebgajreni rebejn̄ ni nazäab lo xlam̄ni, dxejc räjpni loj ni bidzūngxaa: “¿Lac nazääblu lo xlam̄ä?” <sup>6</sup> Dxejc räjpni: “Nazäbä si'c te gayuu baril̄ se't.” Dxejc räjpni lojni: “Basquejn, cua' guijtzre, bacuaa tiubitzuutis baril̄ nazääblu lojni.” <sup>7</sup> Dxejc gunabdiidxni loj steeni, räjpni: “¿Luj a'? ¿Lac nazääblu lo xlam̄ä?” Dxejc räjpni lojni: “Te gayuu dxim̄ro triuu.” Dxejc räjpzani: “Aree xquijtzlu; bacuaa tajtis dxim̄ro.” <sup>8</sup> Bidxeloj xlam̄ni, gulä'pni xpala'n benguijdxga ni gunibee sa'csi bisin̄ni bejn̄ni recosga. Dxejc räjpza Jesús, rebejn̄ ni di gumbee xtidx Dios nadxällajzreni lo rextzuunreni con sa'reni loj rebejn̄ ni arumbee xtidx Dios.

<sup>9</sup> Rniä lojtu, colquuil rexamiigwtu con reyäl̄nasa'c ni räjp̄tu loj guedxliujre, te che abaraj xhixtentu, sica' Diostu xhaguibaa cadre yu' rolijz̄tu par tejp̄as.

<sup>10</sup> Renani runsa'c dzuun lo te dzunbäz, sajca gunsa'cni dzuun lo te dzunro, luxh reni di gacdi gunsa'c dzuun lo te dzunbäz, di gacdiza gunsa'creni dzuun lo te dzunro. <sup>11</sup> Ni'cni palga xhetlaadi cuaräl̄näj̄tu reyäl̄nasa'c xten guedxliuj, ¡xho guniidx Dios reyäl̄nasa'c xtenni lojtu! <sup>12</sup> Palga xhetlaadi cuaräl̄näj̄tu xhixten bejn̄, ¿chu guniidx lojtu ni gac xtenpactu, ä?

<sup>13</sup> 'Nicla tej mos di gacdi gunni dzuun lo tio'p lam, sa'csi sidxe'chni lo tejni, steeni sinälajzni o susobdiajgpacni xtidx tejni, sibälazni steeni. Di gacdi gun bejn xtzun Dios laj ni sanälajztisni xcäl'nasa'cni.

<sup>14</sup> Mbaj naj, refarisee, sa'csi rchaglazduxhrenei meel, cacuadiagdzu'tzrenei xtiidxni, dxejc caguxhisnäjrenei Jesús. <sup>15</sup> Dxejcti räjp Jesús lojrenei:

—La'tu najctu bejn ni ruhuii rebejn lojtu, naareni beñsacduxhtu, niluxh acanajn Dios xhi xhigab rujntu neñ lastootu. Sa'csi guiraa ni rchalojtu najc yäl'nasacduxh, guiraa ni'c rbixhlajz Diosni.

*Xleii Moisés con xcäl'nibee Dios*

<sup>16</sup> Räjpszani:

—Dxejli ni biäd Juan ni rutiobnis, guyu' xleii Moisés, näjza xtidx redade' ni gunii xtidx Dios. Cheni biäd Juan gusloj rsule' didxsa'c xcuent xcäl'nibee Dios, ni'cni xhidajl bejn cagusutijp lajzni te jiu'reni loj yäl'nibeega.

<sup>17</sup> 'Per guyasiru nitloj xhaguibaa näjza guedxliuj quela di jialoj guiralii rediidx ni bacuaa Moisés; nicla tej diidxga di nitloj.

*Rului Jesús xcuent ru'ro'n sa' bejn*

*(Mt. 19:1-12; Mr. 10:1-12)*

<sup>18</sup> Räjpszani:

—Palga gu'ro'n te bejn chääl'ni, dxejc guchñaani stee gunaa, rujnni dojl, luxh nani ruchña te gunaa ni abar'o'n chääl'nini, niguiiga rujnzani dojl.

*Te beñrajp näjza Lázaro*

<sup>19</sup> Räjpszani:

—Guyu' te beñrajp ni rchaglajz rajcwni ganax reladsacduxh, luxh guixe-guixee rujnni laniro. <sup>20</sup> Guyu'za te beñproob ni laa Lázaro ni rniab gojn, ricueni ro xlä' beñrajpga, yu' guejdx ni rgaadz tiejxhni. <sup>21</sup> Rlajzni maläi xho gunni gauni nani rtejb loj xmex beñrajpga, luxh direni gusaan. Dxejc rebä'cw siäd rilejp loj reguejdx ni rgaadz ni guidxa tiejxhni. <sup>22</sup> Guyu'ti te dxej gujt beñproobga, biädläs rexangl Dios xaimni, huinärenini cadro yu' Abram xhaguibaa. Dxejcti näjza beñrajpga gujt, huicua'tztirenini. <sup>23</sup> Che yu'ni gabijl cadro rij guiraa rebendojl, ro'c cadejdni trabajwduxh. Dxejcti guläsni lojni, bahuini zitduxh cadro suganäj Abram Lázaro. <sup>24</sup> Dxejcti guredxaduxh beñrajpga, räjpni lo Abram: “iXtadä Abram! Balazlajz narä, baxhal Lázaro guhuajdxni yejc bicueñaani nis te gusiäl'yujni ludxä, sa'csi ree cadedä trabajwduxh lo guiboo.” <sup>25</sup> Luxh räjp Abram lojni: “Xi'nä, basaa lajzlu che gubajñlu lo guedxliuj gojplu guira'ti xhixtenlu, luxh sigajcza Lázaro gudejdni trabajwduxh. Per naj ree casilajzni, naj luj cadejdllu trabajwduxh.

<sup>26</sup> Luxh di gacdi jääd Lázaro ro'c, sa'csi yu' te baladuxh ni rlia' sa'nu, te mase rlajz bejn guirii ree te tedreni lojlu ro'c, di gacdini. Di gacdiza ted reni yu' ro'c te jäädreni loonu.” <sup>27</sup> Dxejcti räjp beñrajpga lojni: “Rniabduxhä lojlu, xtadä, baxhallaa Lázaro chääni roliz xtadä, <sup>28</sup> sa'csi ro'c yu' gaii betzä, te chaliidxni laareni, te gusiechlajzreni, te di näjza laareni jäädreni ree cadro rdejd bejn trabajwduxh.” <sup>29</sup> Dxejc räjp Abram lojni: “Arajpreni guijt cadro caj xleii Moisés näjza xtidx redade' ni gunii xtidx Dios, sugusobdiajgreni rediidxga.” <sup>30</sup> Luxh beñrajpga badzu' diidxre, räjpni lojni: “Gulii dad Abram, per palga chäs te bejn loj rebengut, chani lojrenei, dxejc sii pet susiechlajzreni.”

<sup>31</sup> Dxejc räjp Abram lojni: “Palga direni gusobdiajg xtidx to Moisés näjza xtidx redade' ni gunii xtidx Dios, dizareni chalilajz xtidx te bejn ni guibañsac loj rebengut.”

## 17

*Riesgw jiajbni lo dojl*

*(Mt. 18:6-7, 21-22; Mr. 9:42)*

<sup>1</sup> Räjp Jesús loj rexejñpacni:

—Siäädpac recos ni gun jiajb bejn lo dojl. Proobza bejn ni rujn riajb bejn lo dojl. <sup>2</sup>Maaz guliibni te guij xten molin guejnni, gusäl bejn ni lo nisdoo cadro jätro quela gunni jiajb rexi'nä ni ahuililajz xtidxä. <sup>3</sup>¡Col̄susin!

'Palga gun bejtzlu dojl lojlu, balijdxni. Palga gusiechlajzni, basiäjl diidx con laani. <sup>4</sup>Masque gajdz huält nen teb dxej gunni dojl lojlu, palga jädniini lojlu gajdz huält, naani: "Xhet laadi benä, basiäjl lajzlu", basiäjl lajz con laani.

### *Bastioob xcäl̄rililaaazu*

<sup>5</sup>Gunii rexpejn̄pacni lo Jesús, räjpreni:

—Dad, baniidxru yäl̄rililajz loonu.

<sup>6</sup>Dxejc räjp Jesús lojreni:

—Palga rajptu yäl̄rililajz, mase najcni si'cti te bedzbäz xten muxhtas, sajc gäbtu lo yagro rec: "Biliädxä' ro'c, guzuj galäii nisdoo", susobdiajg yajgga xtiidxtu.

### *Ni riäj̄l gun te mos*

<sup>7</sup>Räjpzani:

—¿Chu tejtü ni rajp te mos ni riga'n o ni rigajp rexquidxaani ni gäbni lojni che guibi'ni lo niaa: "Biu'ga, gurej lo mex te gauu"? <sup>8</sup>Dini gäb si'c. Niluxh säjpni lojni: "Bachaa xhajblu. Bejn xhi gauä, gudanäni loä. Che luux gauä, yä'ä, dxejc sajc gauzalu, yäzalu."

<sup>9</sup>Dini gudeed xquixtios lo mosga sa'csi rujni recos ni gunibeeni sa'csi si'c riäj̄l gunni.

<sup>10</sup>Sigajcza la'tu, che luux guntu guiraa redzuun ni guniä guntu, riäj̄l guiniitu lo Dios: "Najcnu mos ni xhet sajcđi, nani riäj̄l jiennu, ni'ctis biennu."

### *Basiajc Jesús tzuu bejn ni ral̄ tiejxhrene*

<sup>11</sup>Lal̄ ni sasaj Jesús nez guedx Jerusalén, gudejdni loj región Samaria näjza región Galilee. <sup>12</sup>Che biu'ni tej reguejdxga, huichagloj Jesús tzuu bejn ni rajc te yäl̄guijdx ni ral̄ tiejxhrene, niluxh zijtru guzujreni. <sup>13</sup>Dxejc rbedxa'reni räjpreni:

—Jesús, Dad, Mastr, balaslajz nuurnu.

<sup>14</sup>Che bahuii Jesús lojreni, räjpni lojreni:

—Col̄chäj, te fii rebixhojz abiajctü.

Lal̄ ni sääreni, bia tiejxhrene. <sup>15</sup>Dxejc tejreni, che bahuiini abiajctü, gubiguxunni, cabedxa'ni calä'pni xpala'n Dios. <sup>16</sup>Bazuxhijbni nez loj Jesús, basajbni lojni lo yuj cagudeedni xquixtios loj Jesús. Luxh bejnre najc te benzijt, te bejn Samaria. <sup>17</sup>Dxejcti räjp Jesús lojni:

—¿La et tzuudi najc reni biajc, ä? ¿Con sgaareni? <sup>18</sup>¿La rutru gubi'di loä te guiliä'preni xpala'n Dios, xtebtis benzijtre, ä?

<sup>19</sup>Dxejc räjp Jesús loj bejnre:

—¡Huisulii, huij! Abiajclü sa'csi huililajzlu.

### *Xho guidzuj̄n xcäl̄rnibee Dios*

(Mt. 24:23-28, 36-41)

<sup>20</sup>Dxejc, sa'csi agunabdiidx refarisee loj Jesús guc guidzuj̄n xcäl̄rnibee Dios, badzu'ni diidxre, räjpni lojreni:

—Di xcäl̄rnibee Dios guidzuj̄n con seen ni sajc fiitu. <sup>21</sup>Diza bejn naa: "Bahuii, aniree", o "Anirec", sa'csi abidzuj̄n xcäl̄rnibee Dios lojtu.

<sup>22</sup>Dxejc räjp Jesús lo rexpejn̄pacni:

—Sidzuj̄n dxej rlanjgatu fiitu te dxej sa' ni chu che jädsac Xi'n Dios ni gujc Niguui, luxh ditu fiini. <sup>23</sup>Luxh siniireni lojtu: "Aniree", o "Anirec", per na'c chäätü, na'cza chanajltu reni rihuii. <sup>24</sup>Sa'csi sigajc ni rien che rdinya' te laad xhaguibaa hasta stelaad xhaguibaa, si'cza gac che jäälä narä, Xi'n Dios ni gujc Niguui, che gal̄ dxej guibi'ä. <sup>25</sup>Luxh ganiddoo sidedä trabajwduxh, sa'csi sibälaz reben guedxliuj̄ ni tre' naj narä. <sup>26</sup>Si'cni gujc nen redxej cheni gubaj̄n toNoé, si'cza gac nen redxej che jäälä narä, Xi'n Dios ni gujc

Niguii. <sup>27</sup> Nen redxej ni gubajñ toNoé gudajwreni, gu'reni, bachñaareni, badeedzareni xindxa'preni guchña bejn, bídzujñli dxej cheni biu' toNoé neñ barcwro ni bencheeni. Dxejc biääd nisguiduxh, gujt guiraa rebeñ dojl, guzääbreni lo nis. <sup>28</sup> Sigajcza gujc neñ redxej ni gubajñ toLo't: gudajwreni, gu'reni, gusiireni, bato'reni, gule'creni binij, bencheezareni rolijzreni. <sup>29</sup> Niluxh cheni birii Lo't lo guedx Sodoma, biajb guiboo xhaguibaali, näjza te däj ni rudxuii, gunitlojti guiraa rebeñ dojl, huejcreni. <sup>30</sup> Sigajcza gac neñ redxej cheni jiälä narä, Xi'n Dios ni gujc Niguii.

<sup>31</sup> 'Dxejga, palga yu' chu niä'p yejc yu', diru galđi jiäjtñi te chalääni rehxixtenni ni yuchee neñ yu'; palga yu' chu suga' nezjiät, di galdiruni guibi'ni rolijzñi. <sup>32</sup> Colgusnaj lajztu xhi gujc chääł toLo't. <sup>33</sup> Ni rłajz ga'p xcälñabajñni lo guedxliujre, sunijtnini, nani gunijñ xcälñabajñni lo guedxliujre xcuent rextidä, xcälñabajñni rajpni xhaguibaa.

<sup>34</sup> 'Rniä lojtu, guxhijñga ni jiälä lo tio'p reni naga' lo te da', chää tejni, steeni jia'n. <sup>35</sup> Lo tio'p gunaa ni cayo't, chää tejni, steeni jia'n. <sup>36</sup> Lo tio'p bejn ni yu' lo niaa, chää tejni, steeni jia'n.

<sup>37</sup> Che biejn diajgreni rediidxre, gunabdiidxreni lojni, räjpreni:

—Dad, ¿caro gac recosre?

Badzu' Jesús diidxre, räjpni:

—Cadro naga' te mangut, ro'c rdojp regolbetz.

## 18

### *Xcuent te gunabiuud con te juejz*

<sup>1</sup> Bijza Jesús te cuent ni ruluii lojreni, te guisieedreni xho riajl cuedx-guiniabreni lo Dios lacuaa gac-huin lajzreni, <sup>2</sup> räjpni lojreni:

—Te guejdx guyu' te juejz ni di chalilajz xtidx Dios, dizani jiu rebeñ. <sup>3</sup> Lagajc guejdxga guyu' te gunabiuud. Guixe-guixee rijni lo juejz, rniabni lojni gunni yälguxhtis lo beñ ni rdxe'ch lojni. <sup>4</sup> Balti dxej naadti juejzga gun yälguxhtisga. Dxejcti bejnñi xhigab, naani: “Mase dina guidxebä Dios, dizana jiuä rebeñ, <sup>5</sup> sa'csi gunabiuudre sanuutisni siäädni loä, abasiedliini narä, gunälis yälguxhtis xten gunaaga, te di chanuutis riädgusieedni narä.”

<sup>6</sup> Dxejc räjp Jesús lojreni:

—Riejñ diajgtu xtidx juezguijdxga, <sup>7</sup> Naj ¿xho di Dios, ni najc hueen, gucuadiajg xtidx rexi'nni ni rbedx-rniab lojni dxej-yääl? Di gaclaa gunni yälguxhtis xcuent reni aguleni.

<sup>8</sup> Ni'cni rniä lojtu, sungajcni yälguxhtis par laareni. Luxh che guibi' Xi'n Dios ni gujc Niguii, ¿la sidxälñi beñ ni rililajz xtiidxni lo guedxliuj?

### *Xcuent te farisee con te ni rusquijx impuest*

<sup>9</sup> Bij Jesús stee cuent ni ruluii loj rebeñ ni rluiisi najc beñsa'c, ni rchalo xhet sajcdi resabeñreni. Räjpni:

<sup>10</sup> —Tio'p dade' huij guidoo te huinabreni lo Dios. Tej ni najc farisee, steega najc te dade' ni rusquijx impuest. <sup>11</sup> Sulii fariseega lał ni canabni lo Dios, räjpni: “Dad, Dios, runidxä xquixtios lojlu sa'csi dina gacä si'c najc rebeñ ni najc gubaan, ni najc beñ nadiplajz, ni najc beñdojl, dizana gacä si'c najc beñre ni rusquijx impuest.

<sup>12</sup> Rucua'nä tio'p huält neñ te xmaan, luxh rudedä te tzuu lo te beex loj guiraa ni runä gaan.” <sup>13</sup> Niluxh beñ ni rusquijx impuest, zijtru suga'ni, dini guiliäs lojni xhaguibaa. Catiälñaatisni lastooni, caniini lo Dios, räjpni: “Dad, Dios, ¡balaslajz narä, nacä te beñdojl!”

<sup>14</sup> Rniliäpac lojtu, ni rusquijx impuest rbaali lajzñi gubi'ni rolijzñi sa'csi badzucaj Dios rextojñi, niluxh di Dios nudzucaj rextojñi beñ farisee. Sa'csi guiraa rebeñ ni rłajz guiliä'p lagajc xpala'nni, susanxtiujy Diosreni, dxejc reni di rłajz guiliä'p lagajc xpala'nreni, siliä'p Dios xpala'nreni.



*Benle' Jesús yejc rebiuxbáz*  
(Mt. 19:13-15; Mr. 10:13-16)

<sup>15</sup> Yu'reni siädnä rexpiuxbäzreni loj Jesús te guzujni naani yejcreni. Che bahuii rexpejn̄pacni si'c, gusloj cadil̄diid̄xreni con rebejn̄ te na'c jiädnäreni rebiuxe'. <sup>16</sup> Dxejc gurejdx Jesúsreni, räjpni lojreni:

—Colgusaan jiäd rebiuxe' loä, na'c gudxojntureni, sa'csi xcäl̄rnibee Dios najc xten reni najc nadolajz si'c rebiuxbäze're. <sup>17</sup> Rniliäpac lojtu, chutis ni rlajz jiu' lo xcäl̄rnibee Dios nanab gusobdiajgreni xtid̄x Dios si'c rusobdiajg rebiuxe' xtid̄x xtdadreni. Palga dini gun si'c, dini jiu' lo xcäl̄rnibee Dios.

*Te bi'n ni rajp xhidajl xhixtenni*  
(Mt. 19:16-30; Mr. 10:17-31)

<sup>18</sup> Te bi'n ni rnibee gunabdiid̄x loj Jesús, räjpni:

—Dad, mastrsa'c, ¿xhini'c nanab gunä te xca'ä yäl̄nabajn̄ par tejpas?

<sup>19</sup> Dxejc räjp Jesús lojni:

—¿Xhicuent rniilu narä: “Mastrsa'c”? Rutru najcdi bensa'c, xtebtis Dios. <sup>20</sup> Anajnlu xho najc remandamient ni caj lo xleii Moisés: “Na'c guesnäjl̄u gunaa ni di gac chäällu; na'c ju'tlu bejn̄; na'c cuanlu, na'c guiniilu did̄x-xhii xcuent bejn̄; bazoob xtid̄x xtdadlu, xnanlu, bahuiizareni.”

<sup>21</sup> Dxejc räjp bi'nga lojni:

—Guiraa remandamientre rusobä cheni gucäli biuux.

<sup>22</sup> Che biejn̄ diajg Jesús xtiid̄xni, räjpni lojni:

—Tejtis cayääd̄x gunlu. Bato' guiraa rexhixtenlu, gudisni loj rebejn̄ ni xhet rajpdi dxejc sajplu xcäl̄nasa'clu xhaguibaa. Dxejc gudanajl narä.

<sup>23</sup> Che biejn̄ diajg bi'nga rediidxre, guc-huinduxh lajzni, sa'csi najcni te bejn̄ ni rapduxh. <sup>24</sup> Dxejc rdxelajtis Jesús lojni, guc-huinza lajzni räjpni:

—Naganduxh jiu' reben̄rajp lo xcäl̄rnibee Dios. <sup>25</sup> Guyasiru ted te cameii ni' te guux lo ni jiu' reben̄rajp lo xcäl̄rnibee Dios.

<sup>26</sup> Reni biejn̄ diajgni rediidxre, räjpreni:

—¿Chuxhni'c sajc laa lo dojl̄, palga si'c najcni?

<sup>27</sup> Dxejc räjp Jesús lojreni:

—Guira'ti ni di gacdi gun rebejn̄, guyasi rajc rujn̄ Diosni.

<sup>28</sup> Dxejc räjp Pedr lojni:

—Dad, nuurnu abasa'nnu guiraa rexhixtenu te siopnalnu luj.

<sup>29</sup> Dxejc badzu' Jesús diid̄xre lojni, räjpni:

—Rniliäpac lojtu, chutis ni gusaan rolijzni näjza rexuczajnni, rebejtzni, chäälni, xi'nni xcuent xcäl̄rnibee Dios, <sup>30</sup> sica'ni xhiroobru lo gued̄xliujre, luxh sica'ni yäl̄nabajn̄ par tejpas.

*Rusule' Jesús stehuält xho guetni*  
(Mt. 20:17-19; Mr. 10:32-34)

<sup>31</sup> Gurejdx Jesús rexpejn̄pacni te laad, te räjpni lojreni:

—Naj chonnu gued̄x Jerusalén cadro nanab soob rediidx nani bacuaa dade' ni gunii xtid̄x Dios galooli xcuent Xi'n Dios ni gujc Niguii. <sup>32</sup> Sutedrenini ladz̄naa reben̄zajt, suxhiznäjrenini, susacsírenini, sutiobxhejn̄lireni lojni, <sup>33</sup> luxh che luux quiinrenini, dxejc sugu'trenini, luxh ni riojn̄ dxej sibansacni loj reben̄gut.

<sup>34</sup> Dxejc laareni direni niacbee rediidxre, dizareni gan xhini'c caniini, sa'csi najcreni diid̄x ni di gacdi gachebereni.

*Rusiajc Jesús te ben̄ lotiä'p*  
(Mt. 20:29-34; Mr. 10:46-52)

<sup>35</sup> Cheni sadzujñ Jesús te guejdx ni laa Jericó, sobga' te beñ lotiä'p ro' nezyuj, canabni gojn. <sup>36</sup> Che bieñ diajni cadejd xhidajl beñ lo nezyujga, gunabdiidx beñ lotiä'pga xhini'c cayajc. <sup>37</sup> Dxejc räjpni:

—Jesús ni siäd Nazare't cadejdni nezga.

<sup>38</sup> Dxejc guredxa'ni räjpni:

—¡Jesús, xi'n toDavid, balaslajz narä!

<sup>39</sup> Rebeñ ni nijd lojreni gudilñajreni beñ lotiä'pga te jiäu ro'ni, niluxh laani dipru guredxa'ni, räjpni:

—¡Xi'n toDavid, balaslajz narä!

<sup>40</sup> Dxejc guzudxi Jesús ro'c, gunibeeni jiädnäreni beñga lojni. Che bidzujñni lojni, gunabdiidx Jesús lojni, räjpni:

<sup>41</sup> —¿Xhini'c rlajzlu gunnäá luj?

Badzu' beñ lotiä'pga diidxre, räjpni:

—Dad, rlazä jien loä.

<sup>42</sup> Dxejc räjp Jesús lojni:

—¡Sujieñ balojlu! Abiajclu sa'csi huililajzlu.

<sup>43</sup> Lagajc dxej, biengajc lojni, calä'pni xpala'n Dios, huinajlni Jesús. Luxh guiraa rebeñ ni bahuü xhi guzajcni, gulä'pzareni xpala'n Dios.

## 19

### *Huij Jesús roliz te beñ ni laa Zaqueo*

<sup>1</sup> Dxejc biu' Jesús guedx Jericó, sadejdzani guejdxga. <sup>2</sup> Ro'c rbäjz te beñrapduxh, ni laa Zaqueo, ni rnibee lo reni rusquijx xcuent impuest. <sup>3</sup> Rlajz Zaqueo fiini loj Jesús te gumbeenini, per digacdi fiini lojni sa'csi najcni te beñxhate', luxh xhidajl beñ siädsaj guideb gabi Jesús. <sup>4</sup> Ni'c baxuñni gunijdni lojreni, huä'pni lo te yajgro ni suga' gajxh nez cadro ted Jesús te si'c sajc fiini loj Jesús. <sup>5</sup> Che gudejd Jesús nejzga, gulä'sni lojni jiaa, bahuüni cadro sobga' beñre. Dxejc räjpni lojni:

—Zaqueo, basquejñ biäjt ro'c, lagajc nadxej rlazä chajia'nä rolizlu.

<sup>6</sup> Dxejcti biätguxuñ Zaqueo lo yajgga, rbalazduxhni huinäni Jesús rolizni. <sup>7</sup> Che bahuü guiraa rebeñ xhi gujc, gusloj camojmreni, direni jiulajz, räjpni:

—Jesús saja'n roliz te beñdojl.

<sup>8</sup> Dxejcti huisulii Zaqueo, räjpni loj Jesús:

—Bahuilare, Dad, gala' xhixtenä gudedä loj rebenproob; luxh palga yu' chu loj cua'ä xhixtenni con yälrusguee, sudzu'ä lojni tajp huält si'cti ni cua'ä.

<sup>9</sup> Räjp Jesús lojni:

—Lagajc nadxej gubicaj xtojllu näjza xtojñ reni rbäjz rolizlu, sa'csi guliipac najclu te xagdo toAbram. <sup>10</sup> Pues Xi'n Dios ni gujc Niguüi biädtiil rebenojl te gusläani rebeñga ni gunijt neñ dojl.

### *Xcuent tzuu meel*

<sup>11</sup> Lañ ni cagucuadiajgreni xtidx Jesús, bijzani te cuent ni rulüi, sa'csi asiäddzujñgajxhreni guedx Jerusalén, luxh laareni rujnreni xhigab sisloj guinibee Jesús si'ctisni guidzujñni guejdxga. <sup>12</sup> Dxejc räjpni lojreni:

—Guyu' te beñ, benrajpni, huijni te guejdx zijtro te gacni reii, dxejc guibisacni. <sup>13</sup> Che gajdni guirii, gurejdxni tzuu xmosni, te badeedni lo tebgajreni te melpla't ni sacduxh, räjpni lojreni: “Colyujñ dzuun con meelre che guibisacäli.” Sä'tini. <sup>14</sup> Per reben lajdxni dipacreni guichagljajz beñga, ni'c baxhalreni gaii beñ te saye'tzreni: “Di rlajzdinu gacni xreiiinu.” <sup>15</sup> Luxh empac gujcni reii, dxejc gubisacni lajdxni. Che bidzujñni gurejdxni rexmosni ni badeedni meel cua'reni, te gacbeen lac beñ teygareni gaan. <sup>16</sup> Ni bidzujñ ganid räjpni lojni: “Dad, xmeellu beñ gaan stzuu meel.” <sup>17</sup> Dxejc räjp reii lojni: “Hueenca,

luj najclu te mossa'c, sa'csi laaca bejnlu dzuun lo te dzunbáz, naj sunidxä guinibeelu loj tzuu guejdx.”<sup>18</sup> Bidzujñ stee mos lojni, räjpni: “Dad, xmeellu bejn gaan gaii meel.”<sup>19</sup> Dxejcti räjpni lojni: “Luj guinibeelu loj gaii guejdx.”<sup>20</sup> Bidzujñti stee mos lojni, räjpni: “Dad, aree xmeellu, guluchedzu'tzäni neñ te baii<sup>21</sup> sa'csi bidxebä guejblu, sa'csi najc guejblu te beñ nadiplajz, rutojp guejblu cadre di guejblu nuzuj, luxh rliäs guejblu cose'ch cadre di guejblu nibe'c.”<sup>22</sup> Dxejcti räjp ñeii lojni: “¡Mosguijdx! lagajc ro'lu birii diidx ni gunälu yälguxhtis. Palga najnlu nacä te beñ nadiplajz, najnlu rutopä cadre dina nusuä, najnlu rliäsä cose'ch cadre dina nibe'cä,<sup>23</sup> ¿Xhicuent dilu nisa'n xmelä neñ te bancw te che nibi'ä nica'a xmelä nägajc xi'n meelga?”<sup>24</sup> Dxejc räjpni loj reni suga' ro'c: “Colgudzucaj meelga lojni, colgudeedni loj ni rajp tzuu meel.”<sup>25</sup> Laareni räjpreni: “Dad, per laani arajpni tzuu meel.”<sup>26</sup> Dxejc badzu' ñeii diidxre lojreni, räjpni: “Ni'cni rniä, reni rajp, sica'rureni, niluxh reni di ga'p lojreni sibicaj guiraa recosbáz ni rajpreni.<sup>27</sup> Luxh xcuent reni rdxe'ch loä, ni di rlajz niacä ñeii lojreni, coltanäreni ree, colgugu'treni nez loä.”

### *Che biu' Jesús guedx Jerusalén*

*(Mt. 21:1-11; Mr. 11:1-11; Jn. 12:12-19)*

<sup>28</sup> Che gulujx guniini guiraa rediidxre, huinuuni xnejzni, sääni nez lo guejdx Jerusalén.  
<sup>29</sup> Che asadzunğajxhni reguejdx ni laa Betfagé näjza Betania, gajxh lo dajn ni laa Oliib, baxhalni tio'p rexpejnñpacni,<sup>30</sup> räjpni lojreni:

—Colchäj lo guejdx' ni suga' lad rec. Che guidzujñtu, guidxältu caduu te bur huin ni gajd bejn cuib. Colguxhecni, coltanäni ree.<sup>31</sup> Palga yu' chu guiniabdiidx lojtu: “¿Xhicuent caguxhectuni?” colye'tz lojni: “Dad caquiinnini.”

<sup>32</sup> Sä'ti rexpejnñpacni nani baxhalni, bidxälreni manga sigajctisni räjp Jesús.<sup>33</sup> Cheni caguxhecreni bure'ga, rexpaxhuaan bure'ga räjp lojreni:

—¿Xhicuent caguxhectu bure'ga, ä?

<sup>34</sup> Dxejc badzu'reni diidxre, räjpreni:

—Sa'csi caquiin Dadni.

<sup>35</sup> Sas huinäreni bure'ga loj Jesús, gudixhrenei xhajbreni dejtzni, te gubijb Jesúsni.

<sup>36</sup> Guideb cadre gudejd Jesús gudixhrenei xhajbreni lo nezyuj cadre tedni.<sup>37</sup> Cheni ameer guidzujñni bajaad xten dan Oliib, gusloj cabaa lajz guiraa rebejn, rbedxa'lireni calä'preni xpala'n Dios sa'csi bahuiireni guiraa remilagwr ni bejnni.<sup>38</sup> Räjpreni: Chicbaa ñeii ni siädä xcuent Xtadnu Dios te guinibeeni loonu.

Sucuedxilajz guiraa reni yu' guibaa, chä'p xpala'n Dios xhaguibaali.

<sup>39</sup> Dxejc gaii refarisee ni suga' galäii rebejn, räjpreni loj Jesús:

—Mastr, gudidxa' lo rebejn ni siädñajllu te na'cru guiniireni si'c.

<sup>40</sup> Dxejc Jesús räjp lojreni:

—Rniliä lojtu, palga redee gusäu ro'reni, sixedxa' reguijre.

<sup>41</sup> Che bidzujñni gajxh, che bahuiini guedx Jerusalén, biin Jesús xcuent guejdxga,  
<sup>42</sup> räjpni:

—¡Maläii gacbeelu, masque neñ redxejre, xhini'c sajc guniidx yälrbedxilajz lojlu! Per naj naga'tzni, luxh digacdi filu lojni.<sup>43</sup> Sidzujñ dxejga lojlu, cheni jiädä reni rdxe'ch lojlu sujnreni si'c te guřalyuj guideb gabilu, nez lojlu sigajc nez dejtzu sisiujreni.

<sup>44</sup> Susälta'reni luj lo yujli. Sugu'treni rebejn ni rbäjz ro'c, luxh nicla gusaanreni cuib te guij yejc sa'ni sa'csi dilu niembee dxej ni biädä Dios biädhuilu.

### *Rusia Jesús neñ guidoro*

*(Mt. 21:12-17; Mr. 11:15-19; Jn. 2:13-22)*

<sup>45</sup> Dxejcti biu' Jesús neñ guidoro, guslojni cabääni rebejn ni caguto' näjza reni casii.

<sup>46</sup> Dxejc räjpni lojreni:

—Loj rexquijtz Dios caj rediidxre: “Rolizä sajc te yu' cadre jiädñabtu lo Dios”, niluxh la'tu abejntuni si'c te biliää xte gubaan.

<sup>47</sup> Guixe-guixee caguluii Jesús neñ guidoro, luxh reni rnibee loj rebixhojz nájza rebejn ni ruluii leii, nájza rebeñgool xte guejdxga caguiilreni mood te ju'trenini, <sup>48</sup> luxh direni nidxäjl xho niujnrenini sa'csi guiraa rebejn cacuadiagdzu'tzreni xtiidxni.

## 20

### *Xcälrnibee Jesús*

(Mt. 21:23-27; Mr. 11:27-33)

<sup>1</sup> Te dxej suga' Jesús neñ guidoro, caguluiini rebejn, cagusule'zani diidx xcuent xho guibicaj xtojreni, che bidzujñ reni rnibee loj rebixhojz nájza rebejn ni ruluii leii nájza rebeñgool, <sup>2</sup> räjpreni lojni:

—¿Xhi yälrnibee rujnlu recosre? ¿Chu baniidx yälrnibeega lojlu?

<sup>3</sup> Dxejcti räjp Jesús lojreni:

—Narä sigajcza gunä te yälgunabdiidx lojtu, colgudzu' diidxre loä, <sup>4</sup> ¿chuni'c baxhal Juan te gutiobnisni rebejn? ¿La Dios o la rebejn, ä?

<sup>5</sup> Niluxh laareni guslojreni canabdiidx lo sa'reni, räjpreni:

—¿Xhichani'c jie'tznu? Palga jie'tznu Dios baxhalni, dxejc naani loonu: “¿Xhixhcuent ditu ninilajz xtiidxni?” <sup>6</sup> Palga jie'tznu: “Rebejn baxhalni”, guiraa rebejn sucuaa guij yejcnu, ju'tlireni nuurnu sa'csi laareni rujnpacreni xhigab gunii Juan xtidx Dios.

<sup>7</sup> Dxejc badzu'reni diidxre, räjpreni:

—Dinu guidon chuni'c baxhal Juan te biädtiobnisni.

<sup>8</sup> Dxejc räjp Jesús lojreni:

—Dizana guiniä xhi yälrnibee rapä te runä recosre.

### *Xcuent remosguijdx*

(Mt. 21:33-44; Mr. 12:1-11)

<sup>9</sup> Dxejc gusloj canii Jesús loj rebejn, bijni cuentre lojreni, räjpni:

—Guyu' te bejn bazuj yaguub lo xyujni. Dxejc badedlaanini lo gaii bejn chääreni meed, sä'tnini zijt, gucladuxhni ro'c. <sup>10</sup> Che bidzujñ dxej ni guidojp cose'ch, baxhalni te xmosni sanab cose'ch ni riäjl xca'ni. Per laareni gudijnreni mosga, xhetliidi badeedreni chanäni lo xpaxhuaan yujga. <sup>11</sup> Dxejcti baxhalni stee mos lojreni. Dxejc sigajcza gudilñäjrenini, gudijnrenini, luxh xhetza badeeddireni lojni, ganaxni gubi'ni lo xlamni. <sup>12</sup> Dxejcti baxhalni ni riojñ mos lojreni, per sigajcza gudinduxhrenini, barilaagwrenini.

<sup>13</sup> Dxejc bejn baxhuaanga xhigab, naani: “¿Xhichani'c gunä? Suxhalä xi'nä ni sanälazä; che fiireni lojni, pet siureni xtiidxni.” <sup>14</sup> Dxejc che bahuii reni go'n-meed lo xi'nni, dxejc räjpreni lo sa'reni: “Laa deeni gac xteni reyujre. Do'o guigu'tnuni te nuurnu xca'nu yujre gacni xtenu.” <sup>15</sup> Dxejcti barilaagwrenini lo yujga, sas bagu'trenini.

Dxejc gunabdiidx Jesús lojreni, räjpni:

—¿Xhichani'c gunnä xpaxhuaan yujga reben guijdxre, ä? <sup>16</sup> Sidzujñni, sugu'tni guiraa reni cayujñ dzun-meed lo yujga, dxejc sudeedni yujga lo garenca bejn.

Che biejn diajgreni rediidxre, räjpreni:

—¡Na'c gusaan Dios gacni si'c!

<sup>17</sup> Bahuii Jesús lojreni, dxejc räjpni:

—¿Xhixhni'c caj lo guijtz ni bacuaa redade' ni gunii xtidx Dios galoo? Ro'c cajni:

Guij nani guläcaj renani runchee yu',

ni'c agujc guisa'c ni guzuj galoo.

<sup>18</sup> Chutis ni jiajb yejc guijga, sianduxhni, per nani jiajb guijga yejcnu siujypacni, li däjä gacni.

### *Xcuent reimpuet*

(Mt. 21:45-46; 22:15-22; Mr. 12:12-17)

<sup>19</sup> Reni rnibee loj rebixhojz, näjza reni ruluu leii rlazjreni guiniaazreni Jesús lagajc orga, sa'csi gucbeereni lojreni gunii Jesús cuentre, luxh xhet bejndireni sa'csi rdxejbreni rebejn. <sup>20</sup> Dxejc cagula'tztisrenini, baxhalreni gatii bejn te gunsireni si'c ni najcreni bendxan, te gucadiajgreni xtiidxni don gaxäjssi guiga'ni lo te diidx te guteedrenini lo yäl̄guxhtis, yäl̄rnibee xte gubernadoor. <sup>21</sup> Dxejc gunabdiidxreni lojni, räjpreni:

—Dad, Mastr, nadonnu laaca rnii guejblu, laaca ruluu guejblu, luxh di guejblu fixгаа la yu' chu najc bejn, ruluusa'c guejblu xnez lo Dios. <sup>22</sup> Gunilaa loonu, ¿la laaca guidiixnu reimpuest loj xcubieer César o la xhet laadini, ä?

<sup>23</sup> Sas gucbegajc Jesús cayujnsireni yäl̄gunabdiidxga, dxejc räjpni lojreni:

—¿Xhicuent runnäjtü narä scree? <sup>24</sup> Baluui loä te xmeeltu. ¿Chucha yejc caj lojni, chucha laj caj lojni?

Dxejc räjpreni:

—Xten César.

<sup>25</sup> Dxejc räjpni lojreni:

—Col̄deed lo César nani najc xten César; col̄deedza lo Dios nani najc xten Dios.

<sup>26</sup> Luxh direni niujn gaan niga'ni loj nicla te diidx ni guniini nez loj rebejn. Rdxelajtisreni lo rextiidxni, biäuti ro'reni, guzudxireni.

*Rniabdiidxreni xcuent yäl̄rbansac lo rebengut  
(Mt. 22:23-33; Mr. 12:18-27)*

<sup>27</sup> Dxejc huij gatii resaduceos huihuiireni loj Jesús. Di resaduceos chalilajz rbansac bejn lo rebengut. Ni'cni gunabdiidxreni loj Jesús, <sup>28</sup> räjpreni:

—Dad, Mastr, basa'n Moisés guijtz loonu, lojga caj: “Palga guet te bejn, gusaanni chäälni ruti xi'nni, nanabpac xca' bejtzni gunaaga te chu xi'nni con laani xcuent tobejtzni.” <sup>29</sup> Guyu' gajdz niguii, bejtz najcreni. Sas cua' niguigalooga chäälni. Che gujtni ruti xi'nni. <sup>30</sup> Dxejcti cua' ni rojpga gunaaga. Che gujtni, rutiza xi'nni. <sup>31</sup> Sigajcza guzajc ni riojnga. Si'cza guläsnäj gunaaga guigajdzreni. Guiraareni gujt, nicla tejreni di xi'nreni niu'. <sup>32</sup> Dxejcti näj gunaaga gujt. <sup>33</sup> Guigajdzreni guläsnäjreni gunaare, ni'cni, che guibansacreni lo rebengut, ¿chu chäälni gacni, ä?

<sup>34</sup> Dxejc räjp Jesús lojreni:

—Lo guedxliujre ruchnaa rebejn, rudeedzaren i xindxa'preni ruchnaa. <sup>35</sup> Niluxh rebejn ni agule Dios te chääreni xhaguibaa, näjza te guibansacreni loj rebengut, di reni'c guchnaa, dizaren i gudeed xindxa'preni guchnaa, <sup>36</sup> sa'csi diru gac guetreni, anajcreni si'c najc rexangl Dios. Laareni najc xi'n Dios sa'csi abaspansac Diosreni. <sup>37</sup> Moisésli basule' xcuent ni rbansac reben loj rebengut che bacuaani diidx xcuent yajg ni gurebajl. Ro'c gurejdxni Dios räjpni: “Xtios Abram, Xtios Isaac, näjza Xtios Jacob”, ni'cni nabajnpacreni lo Dios. <sup>38</sup> Sa'csi di Dios gac Xtios rebengut; najcni Xtios rebejn ni nabajnp par tejpas, sa'csi par laani guiraa rebejn nabajnp.

<sup>39</sup> Dxejc gatii reni ruluu leii badzu'reni diidxre, räjpreni lojni:

—Mastr, laaca guniilu.

<sup>40</sup> Sa'csi diruren i niajx niniabdiidxruren i lojni.

*Chu xi'n najc Crist  
(Mt. 22:41-46; Mr. 12:35-37)*

<sup>41</sup> Dxejcti räjp Jesús lojreni:

—¿Xho mood rniireni Crist najc xi'n toDavid, ä? <sup>42</sup> Ni lagajc toDavid bacuaa lo reguijtz ni laa reSalmo:

Dad Dios räjp lo Xtadä:

<sup>43</sup> “Gurej xladbeä cheni guidzujnli dxej ni gudzugä guiraa ni rdxe'ch lojlu te gacbeereni luj rnibeelu guira'ti.”

<sup>44</sup> ¿Xho mood gacni xi'nni palga rnii toDavid lojni “Dad”?



*Rucuaquij Jesús reni ruluu leii**(Mt. 23:1-36; Mr. 12:38-40; Lc. 11:37-54)*<sup>45</sup> Guiraa rebejn cagucua diajg che räjp Jesús loj rexpejn pacni:

<sup>46</sup> —Colyajp cuidaad reni ruluu leii, sa'csi rdxaglazreni rajcwreni lajd siool, rlajzreni saru guinii guiraa rebejn “xchan” lojreni, rlajzreni jiu bejnreni nez loguii, rlajzreni cuereni lo reyagxhilsa'c nen reguidobáz, näjza cadre rajc lanij. <sup>47</sup> Rudzucajzaren i rexhixten regunabiuud, dxejc rolreni rele' siolduxh che rniabreni lo Dios te fii rebejn, te naa bejn najcneni bejdxan, luxh lojreni suxhal Dios te castigwroru.

**21***Gojn xten te gunabiuud**(Mr. 12:41-44)*

<sup>1</sup> Nen guidoro bahuii Jesús cagusäl rebenrajp gojn nen te guiñ cadre rdojp gojn. <sup>2</sup> Bahuiizani lo te gunabiuud, lacti proobni. Basälñi xcojnñi nen guijnga, tio'ptis melbáz basälñi. <sup>3</sup> Dxejc räjp Jesús:

—Rniliäpac lojtu, gunabiuud proobga basälruni loj guiraa reni casäl gojn, <sup>4</sup> sa'csi guiraa reddec ni cagusäl xcojnñi casälreni tudxe'nsi xmeelreni, niluxh gunaare loj xcälproobni, basälñi guiragajc ni rajpni te jio' xhi gauni.

*Räjp Jesús sibijl guidoro**(Mt. 24:1-2; Mr. 13:1-2)*<sup>5</sup> Yu' reni cayujy diidx xcuent guidoro, räjpreni:

—Lacti sacruduxh rienni sa'csi guisa'c naccheeni, suchenäjzani xhidajl recossa'c ni badeed bejn si'c gojn.

Dxejc gunii Jesús lojreni, räjpni:

<sup>6</sup> —Sidzujñ dxej sibijl guiralii ni cahuiitu, nicla tej guij di jia'n yejc sa'ni, guiragajcni sibijl.

*Reseen ni chu che nitloj guedxliuj**(Mt. 24:3-28; Mr. 13:3-23)*<sup>7</sup> Dxejc gunabdiidx rexpejn pacni lojni, räjpreni:

—Dad, Mastr, ¿guc gacni? ¿Xhi seen chu che gac recosga?

<sup>8</sup> Räjp Jesús lojreni:

—¿Colsusin te na'c gusgueereni la'tu! Sa'csi xhidajl reni jääd sinii: “Narä nacä Crist”, o “Asiädgajxh redxej che jäädni”, per na'c chalilajztu xtiidxreni, na'cza chanajlturen i.

<sup>9</sup> Luxh che jiejn diajgtu cayajc guer cadilñaj sa' bejn, na'c guidxejbtu, sa'csi ganid recosga gac, luxh gad galđi nitloj guedxliuj.

<sup>10</sup> Dxejc sanuu cayäjpni lojreni:

—Säjs te nación, sucuanäj stee nación, näjza te ladx bejn sucuanäj stee lajdx bejn.

<sup>11</sup> Sajcza xuro, su' gubijn, su'za yälguijdx nez ree nez rec. Luxh xhaguibaali sien guiraloj ni ruchejb näjza seenro.

<sup>12</sup> 'Luxh ganid gac recosre, siniaazreni la'tu, sirinajlreni la'tu, sutedreni la'tu trabajw. Sutedreni la'tu lo reben guidobáz, susälzaren i la'tu nen latzguiib, sinäzaren i la'tu nez loj reii näjza gubernador sa'csi rinälajztu xtidxä. <sup>13</sup> Luxh guiraa dee sajctu te gac gusule'tu xtidxä lojreni. <sup>14</sup> Na'c gunxgaatu xhigab nen lastootu xhini'c guiniitu lojreni,

<sup>15</sup> sa'csi narä sunidxä diidx guiniitu, sunidxäza yälñajn lojtu te digac gudzu'reni diidx lojtu niclaza gacdi guiniyajreni xtiidxtu. <sup>16</sup> Näjza rex cuzajntu sibire lojtu, suto'reni la'tu, sigajcza rebejztu, resa'tu, rexamiigwtu, luxh yu'tu sugu'treni. <sup>17</sup> Guiraa rebejn guedxliuj sibälaz la'tu sa'csi rinälajztu xtidxä. <sup>18</sup> Niluxh ni'cla tej xquidxejctu di nitloj.

<sup>19</sup> Luxh palga sutijptis lajztu, sajptu yälñabajñ par tejpas.

<sup>20</sup> 'Che fiitu tre' xhidajl soldaad guideb gabi guedx Jerusalén colyacbee abidzujñ dxej ni guibijñni. <sup>21</sup> Dxejc reni yu' guedx Judea, nanab guxuñreni chacuatzlojreni neñ redajn; reni yu' guedx Jerusalén, nanab jiunejzreni ro'c; reni suga' lo niaa, na'c guibi'reni lo guejdxga, <sup>22</sup> sa'csi neñ redxejga sujn Dios fis lo guejdxga te soob rediidx ni caj lo reguijtz xten Dios. <sup>23</sup> Probe'za regunaa ni nuu báz neñ redxejga, nájza regunaa ni ca' báz, sa'csi su' yälhuinduxh lo guedxliuj, nájza fis ni gun Dios loj rebejnğa. <sup>24</sup> Yu'reni guet lo guer, yu'zarenı chää pres, sijrenı balti guedxzıjt. Dxejc rebenzıjt sinıbee guedx Jerusalén che guıza'lı redxej ni gusaan Dios guınee rebejn ni di gac xpejn Israel.

### *Cheni jiääd Xi'n Niguii*

(Mt. 24:29-35, 42-44; Mr. 13:24-37)

<sup>25</sup> Räjpzani:

—Dxejc su' seen lo gubijdx nájza lo bäii, nájza loj rebajle' ni yu' xhaguıbaa. Luxh lo renacıon guedxliuj su' rebejn yärsia', di jien xhi gunrenı, sıdxeıduxhrenı sa'csi sıejn diajgrenı chubeduxh lo nısdoo, säsduxh nı nı räjs lo nısdoo. <sup>26</sup> Sıtıol rebejn xcuent yälrdxeıduxh che gunrenı xhıgab xhıcharunı'c gac lo guedxliuj, sa'csi náj guıdeb guıbaa sıııbejs. <sup>27</sup> Dxejctı suhıırenı lo Xi'n Dios ni gujc Nıguıı, sıäädni lo te za guıdeb xcälrnıbeeni, nájza yälrdımbıchadıxh. <sup>28</sup> Che guıslıj gac recıse, colsutıjıj lajztu, colguılıäs yejctı, colguıbalajz sa'csi asadıujñ dxej gusılaıjztu.

<sup>29</sup> Guniızanı stee cuent lojrenı, räjpni:

—ıColhııı lo yagııgw nájza lo guıraa reyajg! <sup>30</sup> Che fiitu acabääni be'n, colyacbee lagajc la'tu, abıdzunğajxh bäii nısguij. <sup>31</sup> Sıgajczı che fiitu agusloj cayajc recıse, colyacbee asıäddzujñ xcälrnıbee Dios.

<sup>32</sup> 'Rnılıäpac loıtu, guıraa recıse saıc ansde guet rebejn ni yu' naj. <sup>33</sup> Guıbaa nájza guedxliuj sııtıloj, rextıdxä dıni nıtıloj.

<sup>34</sup> 'ıColısusın lagajc la'tu! Na'c gusaantu cha lajztu yälrausa'c, yälrä', yälga'ptu xhıxtentı, dxejc dıtu gacbee che bıdzujñ dxejga. <sup>35</sup> Sa'csi sı'c sıdzujñ dxejga loj guıraa rebenı guedxliuj. <sup>36</sup> Colısusın, colıbeıdx, colıguıııabtıs lo Dios, te gac laatu lo guıra'tı nı gac, gacza suutu nez loj Xi'n Dios nı gujc Nıguıı.

<sup>37</sup> Rdxee rulııı Jesús neñ guıdoro dxejc guxhıjñ saııa'nııı yeıc dan Olııb. <sup>38</sup> Rıslıru rıstıe rebejn te rdzujñrenı lo Jesús neñ guıdoro casob rısl, te gucıadıajgrenı rextııdxnı.

## 22

### *Rıa'nrenı dııdx xho guıııaazrenı Jesús*

(Mt. 26:1-5, 14-16; Mr. 14:1-2, 10-11; Jn. 11:45-53)

<sup>1</sup> Sıäddzunğajxh dxe lanıj che rajwrenı yätxtııl nı dı säguıj, laaza lanıjga pascw. <sup>2</sup> Dxejc renı rnıbee loj rebıxhojz nájza rebejn ni rulııı leıı cıguıılrenı xho gunrenı te ju'trenı Jesús, sa'csi rdxeıbrenı rebenıguejdx.

<sup>3</sup> Dxejc bıu' benıdxab lastoo Judas nı laaza Iscıarıote, nı najc tej retzubıtıo'p xpejnıpacnı.

<sup>4</sup> Dee huıınınäjni dıde' nı rnıbee loj rebıxhojz nájza loj renı rnıbee rexcuxhtıs guıdoo. Gunınäj Judasrenı xho gunnı te gıteednı Jesús ladznıaarenı. <sup>5</sup> Dxejc bıbalajzrenı, bıa'nrenı dııdx gıdeedrenı meel lojıı. <sup>6</sup> Cuäjbtı Judas, dxejcıııı guslojııı cıguıılııı xho gunnı gıteednı Jesús ladznıaarenı che rut bejnıdı suga'.

### *Xchej xten Dad Jesús*

(Mt. 26:17-29; Mr. 14:12-25; Jn. 13:21-30; 1Co. 11:23-26)

<sup>7</sup> Bıdzujñ dxe lanıj che rajwrenı yätxtııl nı dı säguıj, che rugu'tzarenı te xııl sı'c nı caj lo kleıı to Moısés. <sup>8</sup> Dxejc bıaxhalı Jesús Pedr nájza Juan, räjpni lojrenı:

—Colıchayejn xchej xten pascw te guıdaunııı.

<sup>9</sup> Dxejc laarenı gunıbdııdxrenı lojııı, räjprenı:

—ıCaro rılajzlu choyennıııı?

<sup>10</sup> Räj̄p Jesús lojreni:

—Cheni jiu'tu lo guejdx, sidxaagtu te dade' ni nuu te re' nis. Colchanajlni, coljiu' rolijz bejn̄ cadre jiu'ni laani. <sup>11</sup> Dxejc colye'tz lo bejn̄ ni najc rolijzni ro'c: “Si'c naj Dad Mastr: ¿Con yu' cadre saj̄c gauxchenää rexpenä naj pascw?” <sup>12</sup> Dxejc guluini lojtu te yu' ni sojb jiaa yejc stee yu'. Asuchexгаа yu'ga. Ro'c colyejn̄ xhi guidaunu.

<sup>13</sup> Sä'tireni. Si'ctis ni räj̄p Jesús lojreni, si'cpac bidxälreni. Dxejc bejn̄reni xchej xte lanij pascw gaureni.

<sup>14</sup> Che bidzuj̄n or, gurenäj Jesús rexpejn̄pacni lo mex. <sup>15</sup> Dxejc räj̄pni lojreni:

—Guyuduxhä gaan gaunääpactu xchej xten pascw ansde tedä trabajwduxh. <sup>16</sup> Sa'csi rniä lojtu, diruna gaunää la'tu pascw cheni guidzuj̄nli dxej ni gacni lo xcäl̄rnibee Dios.

<sup>17</sup> Dxejc cua'ni te co'p, badeedni xquixtios lo Dios, räj̄pni:

—Colyā' dee, colgudeedni lo sa'tu. <sup>18</sup> Sa'csi rniä lojtu, diruna yā'ä nis ni rii yejc uub stehuält cheni guidzuj̄nli xcäl̄rnibee Dios.

<sup>19</sup> Dxejcti cua'ni yätxtiil, badeedni xquixtios loj Dios, gula'nini, gudisnini lojreni, räj̄pni:

—Dee najc si'c tiexhä ni gudedä ju'treni xcuenttu. Colyejn̄ screeza te guinalajztu narä.

<sup>20</sup> Si'cza bennäj̄ni co'p che guluj̄x gudajwreni, räj̄pni lojreni:

—Ni yu' nen̄ co'p najc si'c xtienä ni guixe' che ju'treni narä xcuenttu te si'c jiu' didxcoob ni jia'n Dios con rebejn̄ ni aguleni.

<sup>21</sup> 'Per bahuilaare, bejn̄ ni guto' narä sobganäj narä lo mexre. <sup>22</sup> Guliipacni, Xi'n Dios ni gujc Niguii sinuu tedni loj nezyuj̄ ni abaluii Dios lojni. Luxh proobza bejn̄ ni guto' narä.

<sup>23</sup> Dxejc gusloj canabdiidxreni lo sa'reni, ¿chuchani'c gunni?

### *Cayejyreni chuni'c najc beñroru*

<sup>24</sup> Sas gusloj cayejyreni, don chuni'c guibee gac beñro lojreni.

<sup>25</sup> Dxejcti räj̄p Jesús lojreni:

—Rereii ni rnibee lajdx bejn̄ ni digac xpejn̄ Israel, rnibeereni lojreni astoo xtenpacreni najc reguejdxga. Luxh rebenguejdxga rniilacti hueen najc rereiiiga. <sup>26</sup> Per la'tu na'c gactu si'c. Nani najc bengoolru lojtu, ni'c riäj̄l gacni si'c najc ni huinru lojtu. Luxh nani rnibee riäj̄l gacni si'c mos. <sup>27</sup> ¿Chuni'c saj̄cru lo bejn̄? ¿La bejn̄ ni rbej lo mex te gauni o la ni ruteed xhi gaureni lo mex? ¿La xhet saj̄cdiru bejn̄ ni sojb lo mex, ä? Niluxh narä yu'ä lojtu si'c ni ruteed xhi gauni.

<sup>28</sup> 'La'tu najctu ni gusunäj narä guideb ni gudedä retrabajw ni gudedä. <sup>29</sup> Ni'cni narä runidxä yäl̄rnibee lojtu sigajc ni baniidx xtad yäl̄rnibee loä, <sup>30</sup> te gautu, yātu lo xmexä xhaguibaa, te cuezatu lo yagxhil cadre guntu yäl̄guxhtis loj rexpejn̄ guitzubitio'p rexagdoos Israel.

### *Räpxгаа Jesús di Pedr guicäj̄p numbeeni* (Mt. 26:31-35; Mr. 14:27-31; Jn. 13:36-38)

<sup>31</sup> Räj̄p Jesús loj Simón:

—Simón, Simón, agunab bendxab ni laa Satanás luj te gusniibni luj si'c rusniib bejn̄ xob te jiani. <sup>32</sup> Narä agunabä lo Dios xcuentlu te na'c jiääd̄x xcäl̄rililajzlu. Luxh luj che gusiejch lajzlu, guibi'lu, bastioob lastoo resa'lu.

<sup>33</sup> Räj̄p Simón lojni:

—Dad, narä sirinalälu; mase gusäureni luj latzguiib, näjza narä siäunäälu; mase ju'treni luj, näjza narä setnääl̄lu.

<sup>34</sup> Dxejcti räj̄p Jesús loj Simón:

—Pedr, rniä lojlu, nicla gajd guidgaii cuedxa' nadxej niluxh luj alaräj̄plu chonli huält, dipaclu gumbee narä.

### *Nanab soob rediidx ni bacuaareni xcuent Jesús*

<sup>35</sup> Dxejc gunabdiidx Jesús lojreni räj̄pni:

—Che ganaxtu baxhalä la'tu, xhet bolsdi sanätu, nicla carteerdi, niclaza stee gura'chdi, ¿la yu' xhi biquiintu, xhi biäädx lojtu, ä?

Dxejc räjpreni:

—Xheti.

<sup>36</sup> Dxejc räjpni lojreni:

—Luxh naj rniä lojtu, ni rajp bols, suchanänini; sigajcza carteer. Luxh ni di ga'p espaad, guto'ni xchamarni te siini tejni. <sup>37</sup> Sa'csi rniä lojtu, sisiojb rediidx ni caj lo requijtz Dios xcuentä, cadre caj: “Bigabnäjni reben latsiaj.” Guiraa ni caj lo reguijtz xten Dios xcuentä nanab soobpacni.

<sup>38</sup> Dxejc räjpreni lojni:

—Dad, aree tio'p espaad.

Dxejc räjpni lojreni:

—Sajl reni'c.

### *Rbedx-rniab Jesús loj Dios*

(Mt. 26:36-46; Mr. 14:32-42)

<sup>39</sup> Dxejcti birii Jesús, si'cni rujnpacni, sääni nez dajn ni laa Oliib. Dxejc sanajl rexpejnpacni. <sup>40</sup> Che bidzujnreni ro'c, räjpni lojreni:

—Colcuedx, colnab lo Dios te na'c jiajbtu lo dojl.

<sup>41</sup> Dxejc gubicaj Jesús lojreni, huijni te lajt zite' cadre suga'reni, si'cti cadre rdzujn te guij che rucuaanini. Ro'c bazuxhijbni, gurejdx-gunabni lo Dios, <sup>42</sup> räjpni:

—Xtadä, palga rlajzlu, baslaa narä loj trabajwduxhre. Niluxh na'c gacni si'c ni rlazä narä. Bejn si'cni rlajzlu gunlu.

<sup>43</sup> Dxejc biricaj te xangl Dios lojni te badeedni yälrutiplajzni. <sup>44</sup> Lalni cadejdni trabajwduxh, cayac-huinuxh lajzni, cabedx-canabruni lo Dios. Guzunislini gusloj catejb lo yuj biniduxh si'c rejn lojni.

<sup>45</sup> Cheni huisuni, gulujx gurejdx-gunabni lo Dios, huijni cadre suga' rexpejnpacni. Ro'c bidxälnireni nagayejs guiraareni sa'csi cayac-huin lajzreni. <sup>46</sup> Dxejc räjpni lojreni:

—¿Xhicuent nagayejstu? ¡Colchastie! ¡Colnab lo Dios te na'c jiajbtu lo dojl!

### *Che gunaazreni Jesús*

(Mt. 26:47-56; Mr. 14:43-50; Jn. 18:2-11)

<sup>47</sup> Lal ni canii Jesús lojreni, bidzujn xhidajl bejn. Tej rexpejnpacni ni laa Judas, nijdni nez loj rebejnnga. Dxejcti gubigni loj Jesús, te bachagro'ni loj Jesús. <sup>48</sup> Dxejc räjp Jesús lojni:

—Judas, ¿la con te yälruchagro' rutedlu Xi'n Dios ni gujc Niguui ladznaa rebejnre, ä?

<sup>49</sup> Che bahuii reni suganäj Jesús xhini'c cayajc ro'c, gunabdiidxreni loj Jesús, räjpreni:

—Dad, ¿la sixa'tnu yejcreni con spaad, ä?

<sup>50</sup> Sas tej rexpejn Jesús gudilnäj te mos xten ni rnibee loj rebixhojz, batiu'ni diajgni ladbee. <sup>51</sup> Dxejc räjp Jesús lojreni:

—¡Agujc! ¡Colgusaanreni!

Dxejc gudajn Jesús diajg mosga, basiajcnini. <sup>52</sup> Gunigajc Jesús loj reni rnibee loj rebixhojz näjza reni najc guixhajg xten guidoo näjza rebenool, guiraa reni siädxiinini, räjpni:

—¿La siädnätu spaad näjza garo't, astoocanu siädxiitu te gubaan, ä? <sup>53</sup> Cheni suga'a lojtu guixe-guixee nen guidoo, ditu nuhuał narä. Per dee najc xortu, luxh arnibee yälncäy la'tu.

### *Di Pedr guicäjp numbeeni Jesús*

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

<sup>54</sup> Dxejcti gunaazreni Jesús huinärenini roliz bixhojz ni rnibee lo guiraa rebixhojz. Siädnäjl Pedrni zit-zijt. <sup>55</sup> Che bidzujnreni gule'creni guiboo galäii lole' xten bixhojzga,

gurejreni guideb gabi, te bidxa' lajzreni. Nāj Pedr nadxaag lojreni gurej ro'c. <sup>56</sup> Dxejc te gunaa ni rujn dzuun ro'c, che bahuiini sobga' Pedr ro'c, rdxelajtisni lojni, rājpnī:

—Nāj niguiire guyunāj Jesús.

<sup>57</sup> Dxejc basuni' Pedr rājpnī:

—Nan, dina gumbeāni.

<sup>58</sup> Che gojl stera't, che bahuii stee bejn lojni, rājpnī lojni:

—Nāj luj najclu te rexpejnī.

Per Pedr rājpnī lojni:

—Gurniālojlu, Dad, dina gacā xpejnī.

<sup>59</sup> Che gudejd si'cti teb or, rājpnī stee bejn lojni:

—Guliipacni, nāj bejnre guyunājni, sa'csi laani najczani te bejn Galilee.

<sup>60</sup> Dxejc rājpnī Pedr lojni:

—Gurniālojlu Dad, dipacna ganā xhini'c caniilu loā.

Lałni canii Pedr rediidxre, guredxa' te guidgaii, <sup>61</sup> luxh gubiréza Jesús, bahuidzu'tzni lo Pedr, dxejc banalajz Pedr nani gunii Jesús lojni, rājpnī: “Che gajd guidgaii cuedxa', abazuni'lu choñ huält, rājplu dilu gumbee najrā.” <sup>62</sup> Dxejcti guc-huin lajz Pedr, biriini ro'c, ronduxhni.

### *Rniyajreni Jesús*

(Mt. 26:67-68; Mr. 14:65)

<sup>63</sup> Rebejn ni canāj Jesús, gusloj caguxhisnājrenini, caguijnzarenini. <sup>64</sup> Dxejc basāureni lojni, gudajpreni lojni, rājpnī lojni:

—ǰGunii chuni'c gudijnlu!

<sup>65</sup> Luxh guiraloj cayājbrei lojni, caniyaduxhrenini.

### *Bidzunājreni Jesús nez loj rebixhojz*

(Mt. 26:59-66; Mr. 14:55-64; Jn. 18:19-24)

<sup>66</sup> Che bara yāäl, bidojp rebengool ni rnibee, nājza reni rnibee loj rebixhojz, nājza rebejn ni ruluii leii, huinäreni Jesús te suuni nez lojreni neñ yu' cadre rujnreni yālguxhtis. Dxejcti rājpnī lojni:

<sup>67</sup> —Palga luj najclu Crist, bicājpnī loonu.

Dxejc badzu' Jesús diidxre lojreni, rājpnī:

—Palga guicāpāni, ditu chalilajz. <sup>68</sup> Luxh palga gunā te yālgunabdiidx lojtu xcuent Crist, ditu gudzu' diidxga loā. <sup>69</sup> Per nājli sibej Xi'n Dios ni gujc Niguii xladbee Gueb Dios ni yu' xhaguibaa.

<sup>70</sup> Dxejc gunabdiidx guiraareni lojni, rājpnī:

—Mbaj pues, ǰla luj najclu Xi'n Dios, ä?

Dxejc badzu' Jesús diidxre lojreni rājpnī:

—Nacāni, si'cni najtu la'tu.

<sup>71</sup> Dxejc rājpnī lo sa'reni:

—ǰXhirucxhamaaz rājztu? Dirunu guiquiin diidx guinii bejn, sa'csi lagajc nuurnu abiejn diajgnu diidx ni guniini lagajc laani.

## 23

### *Jesús nez loj Pila't*

(Mt. 27:1-2, 11-14; Mr. 15:1-5; Jn. 18:28-38)

<sup>1</sup> Dxejc huisu guiraareni, huinäreni Jesús nez loj Pila't. <sup>2</sup> Ro'c guslojreni cabe'creni xquejni, rājpnī:

—Bidxälnu bejnre cayujnni biey lo rexpejnū. Rājpnī xhet nanabdi quiixnu impuest lo reii César. Caniizani laani najcni Crist, nalajznu najczani reii.

<sup>3</sup> Dxejc gunabdiidx Pila't lojni, rājpnī:



—¿La luj ni najc reii xten rexpejn Israel, ä?

Sas badzu' Jesús diidxre räjpni:

—Najcni lagajc si'c ni guniilu.

<sup>4</sup> Dxejc räjp Pila't loj reni rnibee loj rebixhojz näjza loj guiraa rebejn:

—Dina guidxälä nicla tej dojl xten bejnre.

<sup>5</sup> Niluxh laareni sanuutis caniireni, dipru caniireni, räjpreni:

—Guiraa reben Judea cayu' yärsia' xcuent xcälrluluiini. Guslojni guedx Galilee, luxh reeli sanuu caguluiinini.

### *Jesús nez loj Herodes*

<sup>6</sup> Che biejn diajg Pila't rediidxre, gunabdiidxni: “¿La Galilee siäd bejnnga?” <sup>7</sup> Cheni räjpreni ro'c siädni, baxhalnini loj Herodes ni najc gubernadoor xten Galilee, sa'csi nen redxejga yu' Herodes guedx Jerusalén. <sup>8</sup> Che bahuii Herodes loj Jesús, bibalajzni sa'csi agujc xchej rlajzni fiini lojni, sa'csi abiejn diagni diidx xcuent ni cayujnni. Luxh rlajzni fiini gunni te milaagwr. <sup>9</sup> Xhidajl yälgunabdiidx bejn Herodes, luxh xhet guniidi Jesús. <sup>10</sup> Ro'c suga'za reni rnibee loj rebixhojz näjza rebejn ni ruluii leii, cabecduxhrueni xquejni. <sup>11</sup> Dxejc gulälaz Herodes näj rexsoldaadni Jesús, baxhiznäjrenini, ni'c bashuajcwrenini te ladsa'c sa' ni rajcw reii, dxejcti baxhalsacrenini loj Pila't. <sup>12</sup> Lagajc dxejga, Pila't näjza Herodes gujcreni amiigw, luxh galoo bidxe'ch lo sa'reni.

### *Gunibeereni guet Jesús*

*(Mt. 27:15-26; Mr. 15:6-15; Jn. 18:39-19:16)*

<sup>13</sup> Dxejc gurejdx Pila't reni rnibee loj bixhojz, näjza rebengool ni najc guxhtis, näjza rebenguejdx. <sup>14</sup> Dxejc räjpni lojreni:

—La'tu biädna'tu bejnre loä, najtu caguquilni rebejn gunreni biejy, luxh narä agunabdiidxä guraloj lojni nez lojtu, luxh abahuiitu dina nidxälä nicla tej dojl ni cagucuaquij-tuni. <sup>15</sup> Niclaza Herodes di nidxäl nicla tej dojl, ni'cni baxhalsacnini loonu, luxh abahuiitu xhet dojldi bejnne te guetni. <sup>16</sup> Ni'cni quinäni, dxjecti guslääni.

<sup>17</sup> Najc costumbr rusläa Pila't te bejn ni yu' nen latzguiib casob rajc lanijre. <sup>18</sup> Per guiraareni guredxa'reni si'c tejsi bejn, räjpreni:

—iBagu't bejnre, basläa Barrabás!

<sup>19</sup> Barrabás najc ni basälreni latzguiib sa'csi batojpni te cuaa bejn ni bacuanäj resoldaad xten Rom, näjza sa'csi yu' chu bagu'tni. <sup>20</sup> Rlajzpac Pila't gusläani Jesús, ni'c gunisacni lojreni, <sup>21</sup> niluxh rebejn dipru guredxa'reni, räjpreni:

—iBacuaani lo crujz, bacuaani lo crujz!

<sup>22</sup> Riojn gunisac Pila't lojreni, räjpni:

—¿Xhi dolduxh bejnne? Xhetlidi dojl rdxälä bejnne te guetni. Ni'cni siguinäni dxejc suslääni.

<sup>23</sup> Luxh laareni sanuutis guredxa'reni, gunabreni xcajni lo crujz. Luxh sa'csi guredxa'tisreni, bejntireni gaan gujc si'c ni rlajzreni. <sup>24</sup> Dxejc cuäjb Pila't gunibeeni gac si'c ni gunabreni. <sup>25</sup> Dxejc basläani bejn ni yu' latzguiib sa'csi bejnne biejy, bagu'tzani bejn, dxejc badeedni Jesús lojreni te gunnäjrenini si'ctis ni rlajzreni.

### *Che cuaj Jesús lo crujz*

*(Mt. 27:32-44; Mr. 15:21-32; Jn. 19:17-27)*

<sup>26</sup> Cheni sanäreni Jesús xcaj lo crujz, gunaazreni te bejn ni laa Simón ni siäd guedx Cirene; basaj bejnnga lo niaa. Dxejc basguurenini crujz, siädnajltini dejtz Jesús.

<sup>27</sup> Siädnajlza xhidalduxh bejn, näjza xhidajl gunaa ni cayonduxh, cabedxa'reni sa'csi cayac-huinduxh lajzreni xcuent Jesús. <sup>28</sup> Dxejc gubiré Jesús, räjpni lojreni:

—Gunaa Jerusalén, na'c roontu xcuentä, colyoon lagajc xcuenttu näjza xcuent rexi'ntu.

<sup>29</sup> Sa'csi sidzujn dxej gäbreni: “Chicbaa regunaa ni di gacdi chu xi'nni, chicbaaza reni

di nuxi'n, renani di nusiä' báz." <sup>30</sup> Dxejc guisloj rebejn gäb loj redajn: "Coljiajb yejcnu", säjzareni loj relom: "Colgucua'tz nuurnu." <sup>31</sup> Palga scree runnäjreni narä ni nacä si'c te yagnaga, aticaxh gunnäjreni la'tu ni najc si'c te yagbijdz.

<sup>32</sup> Sanäzareni tio'p benguijdx xcajzareni loj recrujz, guetnäjreni Jesús. <sup>33</sup> Che bidzujnreni te lajt ni laa Calabeer, ro'c bacuaareni Jesús lo te crujujz, bacuaazareni guiro'p re-benguijdxga lo stio'p crujujz, tejni xladbee, steeni xladbäjägwini. <sup>34</sup> Cheni cagucuaa rebejn reni lo crujujz, gunii Jesús, räjpni:

—Xtadä, badzucaj xtojł rebejnre, sa'csi direni gan xhini'c cayujnreni.

Dxejc gudzujt resoldaad daad yejc xhajbni, te gudisreni xhajbni cua'renini. <sup>35</sup> Suga' rebejn ro'c cadxelojtisreni. Näjza reguxhtis caguxhisnäjreni laani, cayäjpreni:

—Balti bejn baslaani, naj suguslaani lagajc laani palga guliini laani najcni Crist ni gule Dios.

<sup>36</sup> Näjza resoldaad caguxhisnäjni, gubigreni lojni te badeedreni bin-nii yäni. <sup>37</sup> Dxejc räjpreni lojni:

—Palga guli najclu reii xten rexpejn Israel, baslaa lagajc luj.

<sup>38</sup> Luxh bacuaareni gaii diidx loj te baräjd ni cuaj yejc crujujz. Con didx griegw, con didx latín, näjza didx hebreo, bacuaareni scree: "Dee najc Reii xten rexpen Israel."

<sup>39</sup> Te reben guijdx ni najl lo te crujujz ni caj cuä'ni caniyajni Jesús, räjpni lojni:

—Palga luj najclu Crist, baslaa lagajc luj nägajcza nuurnu.

<sup>40</sup> Per benguijdx ni najl lo crujujz stelaadga gudidxa'ni loj stee benguijdx ni caniyaj Crist, räjpni:

—¿La dilu guidxejb Dios? ¡Ni cayajczalu tejsi castiigw! <sup>41</sup> Per nuurnu cayajcnu castiigw ni riäjł gacnu te guidiixnu redołł ni biennu. Luxh laani xhet dojłdi bejnini.

<sup>42</sup> Dxejc räjpni loj Jesús:

—Bazalajzlu narä che guidzujnlu lo xcälrnibeelu.

<sup>43</sup> Dxejc badzu' Jesús diidxre, räjpni lojni:

—Rniliäpac lojlu, lagajc nadxej chunäjlu narä xhaguibaa.

### *Che gujt Jesús*

(Mt. 27:45-56; Mr. 15:33-41; Jn. 19:28-30)

<sup>44</sup> Agojł si'cti läidxej. Dxejc bicäy guideb guedxliuj, si'c bianxcäy si'cti rcachontı. <sup>45</sup> Bicäy lo gubijdx, luxh ladró ni najl neñ yudxanro xten guidoro, biräjsni gucni tio'p la'. <sup>46</sup> Dxejcti guredxa' Jesús, räjpni:

—Xtadä, ladzñaalu rutedä xaimä.

Che guniini si'c, gujttini.

<sup>47</sup> Che bahuii capitán ni rnibee loj resoldaad guiraa ni guzajc, gulä'pni xpala'n Dios, räjpni:

—Guliipacni, xhet dojłdi bejn bejnre.

<sup>48</sup> Guiraa rebejn ni suga' ro'c ni bahuii guiraa ni guzajc ro'c, gubi'reni rolizreni, cayäazreni lagajc lastooreni. <sup>49</sup> Luxh guiraa reni rumbee Jesús, näjza regunaa ni biädnajlni che biriilini Galilee, zijtru bia'nreni cahuiireni guiraa recos ni cayajcre.

### *Che biga'tz Jesús*

(Mt. 27:57-61; Mr. 15:42-47; Jn. 19:38-42)

<sup>50</sup> Guyu' te bejn ni laa José, lacti huen najcni, luxh laaca rujnni guira'ti. Siäädni guedx Arimatea, región Judea. Nadxaagzani loj reni rnibee neñ guidoro xten rexpejn Israel. <sup>51</sup> Cabäjzza José jiäd yälrnibee xten Dios, ni'cni dini nidxaglaz nani bejn resa'ni.

<sup>52</sup> Dxejcti huijni lo Pila't, gunabni tiejxh Jesús. <sup>53</sup> Che gulättni lo crujujz, batejbnini neñ te bariaad, dxejcti bacua'tznini neñ te baa ni guc-chee cuä' te guilaj. Nacoob baaga, nicla tej bejn gajd guiga'tz ro'c. <sup>54</sup> Dxejga najc dxej ni rusucbeerreni guira'ti, luxh agojł jiu' dxej ni rusilajzreni.

<sup>55</sup> Regunaa ni guzanäj Jesús che biriilini Galilee huihuiireni robaaga te bahuiireni xho gudixhreni togoolga neñ baa. <sup>56</sup> Che gubi'reni rolizreni bencheereni recuaan ni rlianexhduxh näj te ni najc si'c te saj ni rlianexhduxh ni ruzaareni retogool. Dxejcti basilajzreni dxej ni rusilajz bejn, si'cni caj lo xleii Moisés gunreni.

## 24

### *Che gubansac Jesús lo rebengut* (Mt. 28:1-10; Mr. 16:1-8; Jn. 20:1-10)

<sup>1</sup> Dxej ni gusloj xmaanga, rsildooru huinä regunaaga robaa recuaan ni rlianejxh ni bencheereni. <sup>2</sup> Che bidzujnreni, bahuiireni agubicaj guij ni rusäu ro' baa. <sup>3</sup> Dxejc che biu'reni neñ baaga, direni nidxäl tiejxh Jesús. <sup>4</sup> Laļ ni cadxelojreni, di jien xhi gunreni, biricaj tio'p dade' gusuj cuä'reni. Rdimbichaduxh xhajbreni. <sup>5</sup> Bidxebduxh regunaaga, basajbreni lojreni lo yuj. Dxejc räjp redade'ga lojreni:

—¿Xhicuent siädtiltu te bejn ni nabajn lo rebengut, ä? <sup>6</sup> Rutini ree. Agubansacni. Colgusnaj lajztu rediidx ni guniini cheni gususijcni Galilee, <sup>7</sup> che najni lojtu: “Riäjļ jiajb Xi'n Dios ni gujc Niguui ladzṅaa rebeñdojļ, xcajzani lo crujz, dxejc ni riojn dxejga sibansacni loj rebengut.”

<sup>8</sup> Dxejc banaj lajz regunaa xtidx Jesús, <sup>9</sup> biriireni robaa, gubi'tireni te bijreni diidx lo retzubiteeb rexpejnṅpacni näjza loj rebejn ni yunäjreni. <sup>10</sup> Reni huisa'n diidx loj rexpejnṅpac Jesús najc redee: Marii Magdalen, näjza Xuan, näjza Marii xnan Jacob, näjza sgaii gunaa. <sup>11</sup> Niluxh rexpejnṅpacni bejn xhigab didxnayäälni, direni nililajz xtidx regunaaga.

<sup>12</sup> Dxejc huisu Pedr, ruxunlini huijni ro' baa. Che gudixhlojni, bahuiini neñ baaga, ganaxtis bariaad dzuub te laad. Dxejc gubi'ni rolizni, rdxelojtisni xcuent ni gujc.

### *Ni guzajc lo nezyuj ni sii guedx Emaús* (Mr. 16:12-13)

<sup>13</sup> Lagajc dxejga, tio'p rexpejnṅpacni sääreni te guejdx ni laa Emaús, ni ria'n si'cti tzubiteeb kilómetro loj guedx Jerusalén. <sup>14</sup> Laļ ni sasajreni lo nezyujga, cayujyreni diidx xcuent reni gujc ro'c. <sup>15</sup> Laļ ni caniireni gubig Jesús lojreni, gusloj sasanäjnireni. <sup>16</sup> Luxh mase cahuiireni lojni, yu' xhi badxojn niembeereni. <sup>17</sup> Dxejc gunabdiidx Jesús lojreni, räjpni:

—¿Xhini'c rujytu laļ ni sasajtu, ä? ¿Xhicuent cayac-huin lajztu?

<sup>18</sup> Tejreni ni laa Cleofas badzu' diidxre, räjpni:

—Guiraasi bejn najn xhi gujc neñ guedx Jerusalén. ¿La lujtis bia'nlu neñ guejdxga ni di gan xhi gujc ro'c, ä?

<sup>19</sup> Dxejcti räjp Jesús lojreni:

—¿Xhini'c gujc ro'c?

Dxejc räjpreni lojni:

—Recos xcuent Jesús ni siädäd guedx Nazare't, ni gujc te niguui ni gunii xtidx Dios, rajpni yälrnibeduxh xten Dios loj redzuun ni rujnni näjza loj rediidx ni rniini, nez loj Dios näjza nez loj rebejn. <sup>20</sup> Näjza xho bejn reni rnibee loj rebixhojz näjza rexcuxhtisnu, bateedrenini ladzṅaa reni gunibee guetni, dxejc bacuaarenini lo crujz. <sup>21</sup> Niluxh nuurnu cabäaznu laani gacni nani nusṅaa rexpejn Israel ladzṅaa rebeñzajt. Naj agujc choñ dxej ni gujc recosre. <sup>22</sup> Luxh yu' gaii gunaa ni nadxaag loonu ni baschelojreni nuurnu. Barsil, che huijreni robaa xtenni, <sup>23</sup> direni nidxäl tiejxhni. Biädsa'nreni diidx loonu najreni bahuiireni lo tio'p xangl Dios ni räjp lojreni, agubansac Jesús lo rebengut. <sup>24</sup> Dxejcti huihuii gaii sa'nu robaa, bahuiizarenı najcni si'ctis ni naj regunaaga loonu, niluxh direni nuhuii loj Jesús.

<sup>25</sup> Dxejc räjp Jesús lojreni:

—¡Lacti nayääl tre' xcäriejntu! Lacti neñ rililajztu xtidx redade' ni gunii xtidx Dios xcuent Crist. <sup>26</sup> ¿La di nungäj̄l tedxgaa Crist retrabajwduxhre dxejcti jiu'ni lo xcälrdimbicha' Dios, ä?

<sup>27</sup> Dxejc gusloj cagusule'ni guiraa rediidx ni caj lo xquijtz Dios xcuent Crist. Guslonäj̄ni xtidx Moisés, dxejc huinuuni basule'ni guiraa reguijtz ni bacuaa redade' ni gunii xtidx Dios.

<sup>28</sup> Che bidzujñreni guejdx cadre sääreni, bejn Jesús si'cni chanuuni chääni lo nezyuj.

<sup>29</sup> Dxejc laareni bascuääzrenini te jiannäj̄nirenini, räjpreni lojni:

—Biannäj̄ nuurnu, sa'csi acayajc gudxej, agojl̄ jiu' guxhijñ.

Dxejcti biu' Jesús te jiannäj̄nirenini. <sup>30</sup> Cheni sobganäj̄nirenini lo mex, cua'ni yätxtiil, benle'nini, dxejc gula'nini, gudisnini lojreni. <sup>31</sup> Lagajc dxejc, baxhal Dios balojreni, biembeereni Jesús, dxejc laani gunitlojni lojreni. <sup>32</sup> Dxejcti räjpreni lo sa'reni:

—¿La di lastoonu nibeguiboo cheni siädniini loonu lo nezyuj, che cagusule'ni xtidx Dios?

<sup>33</sup> Dxejc dirureni nibäjz ro'c, alga gunasgajczeni nez, gubi'reni guedx Jerusalén. Ro'c bidxälreni abidojp xpejñpac Jesús näjza sgañ bejn. <sup>34</sup> Dxejcti bijreni diidx loj guiro'preni bidzujñ, räjpreni:

—Guliipac gubansac Jesucrist, luxh baluilojni loj Simón.

<sup>35</sup> Dxejc guiro'p reni bidzujñ bijzarenini diidx ni gusajczeni lo nezyuj, näj xho biembeereni Jesús che gula'ni yätxtiil.

### *Baluiloj Jesús loj rexpejñpacni*

*(Mt. 28:16-20; Mr. 16:14-18; Jn. 20:19-23)*

<sup>36</sup> Canisi'creni rediidxre chela baluiloj lagajc Jesús galäiireni, guniini xchan lojreni, räjpni:

—¡Colcuedx̄i lajztu!

<sup>37</sup> Per laareni rdxeløjreni bidxejbreni, naareni cahuiireni lo te sprit. <sup>38</sup> Dxejc räjp Jesús lojreni:

—¿Xhicuent cadxejbtu? ¿Xhicuent rac tio'p lastootu? <sup>39</sup> ¡Colhuii reñaä, näjza reni'ä! Lagajc naräni. Colcajn narä te fiipactu laa naräni, sa'csi anajntu di te sprit ga'p bääñ niclaza tzujt si'c rapä narä.

<sup>40</sup> Che guniini rediidxga, baluigajcni reñaani näjza reni'ni. <sup>41</sup> Lañ ni cadxelojreni, di gacdi chalilajzreni, sa'csi cabaduxh lajzreni, räjpni lojreni:

—¿La yu' xhi rajptu gauä ree, ä?

<sup>42</sup> Dxejc badeedreni te la' bälbigue', näjza te la' seer ni yu' tzujñ. <sup>43</sup> Ni'c cua'ni gudajwnini nez lojreni. <sup>44</sup> Dxejc räjpni lojreni:

—Dee najc xtidxä ni rniä lojtu cheni yusicä lojtu, rniä riäj̄l soob guiraa rediidx xcuentä ni caj lo xleii Moisés, näjza lo rexquijtz redade' ni gunii xtidx Dios näjza ni caj lo rexquitz Salmos.

<sup>45</sup> Dxejcti basanijni xcäriejnreni te gucbeereni xhi säloj rediidx ni caj lo rexquijtz Dios xcuentni. <sup>46</sup> Dxejc räjpni lojreni:

—Scree caj lo reguijtz: Nanab guet Crist, dxejc ni riojñ dxej, guibansacni loj rebengut.

<sup>47</sup> Sire'chza diidx xcuent xho ruslaa Crist rebejn neñ dojl̄ che rusiejchreni lajzreni, che rililajzreni xtiidxni. Guedx Jerusalén guislojni, dxejc sire'ch diidx guideb guedxliuj.

<sup>48</sup> La'tu najctu testiigw guiraa recosre. <sup>49</sup> Narä suxhalä Sprit Dxan xten Dios lojtu, ni'c coljia'n guedx Jerusalén cheni jiädläjzlini neñ lastootu, guniidxni yälñnibee ni siäd xhaguibaali.

### *Huäjs Jesús xhaguibaa*

*(Mr. 16:19-20)*

<sup>50</sup> Dxejc huinä Jesúsreni stelaad guedx Jerusalén gajxh lo te guejdx ni laa Betania. Ro'c guläsni ñaani, benle'ni yejcreni. <sup>51</sup> Lañ ni cayujñni si'c, gubicajni lojreni, huäjñni

xhaguibaa. <sup>52</sup> Peta laareni gulujx gojnrenini, dxejc cabalazduhrene gubi'reni guedx Jerusalén. <sup>53</sup> Ro'c guixe-guixee guyu'reni neñ guidoro, calä'preni xpala'n Dios. Sugacni si'c.



## Redidxhuen Xten Jesucrist Ni Bacuaa San Juan

### *Xtidx Dios najc te Niguui*

<sup>1</sup> Galodoo che gusloj guira'ti, ala yu' Diidx. Luxh nani najc Diidxga yunäj Dios, luxh Diidxga najc Dios. <sup>2</sup> Che gajd gac-cheeli guedxliuj, yunäjni Dios. <sup>3</sup> Xcuent laani benchee Dios guedxliuj nájza guira'ti ni yu' lojni. Guiraa recos ni yu' di gacdi niu'reni paru rutini. <sup>4</sup> Laani gojp yälñabajñ. Yälñabajñga najc bianij xten rebejñ. <sup>5</sup> Luxh bianijga rdimbicha' nez lo yälçäy, niluxh yälçäyga di niajcdi nusuiinini.

<sup>6</sup> Guyu' te niguui birilaj Juan, ni baxhaļ Dios. <sup>7</sup> Laani biädni te basule'ni diidx. Biädsule'ni diidx xcuent bianij te nililajz guiraa rebejñ diidx xcuent bianij. <sup>8</sup> Laani dini gac bianij, laani biädsule'ni diidx xcuent bianij. <sup>9</sup> Laa bianijpacga ni rusani lastoo guiraa rebejñ, luxh ñaj abiädni lo guedxliujre.

<sup>10</sup> Nani najc Diidxga guyu' lo guedxliujre, xcuent laazani gac-chee guedxliujre, luxh di rebejñ guedxliujre nililajz chu najni najcni. <sup>11</sup> Biädni loj rexpen Israel, niluxh rexpejñni direni nicäjb niu'ni lojreni. <sup>12</sup> Dxejc loj guiraa reni cuäjb guyu'ni lojreni, loj renani huililajz xtiidxni, loj reni'c badeedni yälñnibee gacreni xi'n Dios. <sup>13</sup> Laa reni'c ni di gac si'c xi'n bejñ guedxliuj, ni gojl sa'csi rlazj te biniet chu xi'nni, dee najcpacreni Xi'n Dios sa'csi sudeedni yälñabajñ par tejpas lojreni.

<sup>14</sup> Diidxga gujc te bejñ guedxliuj. Guläjzni lo guedxliujre, bahuilojzanu xcälrdimbicha'ni, si'c yälrdimbicha' xten xingan xteb xtadni, laani najcpacni nani sanälajz nuurnu, nani rñii didxlii loonu. <sup>15</sup> Juan gunii xcuent Jesús. Guredxa'ni, räjpni:

—Laa dee ni rniä, nani siäd detzä sajcruni loä, sa'csi laani ganidni nabajñni loä.

<sup>16</sup> Sa'csi guiraanu cua'nu xcälñasacduxhni, yälracnäj detz yälracnäj. <sup>17</sup> Leii xten Dios biädnä to Moisés, niluxh yälracnäj nájza redidxlii biädnä Jesucrist. <sup>18</sup> Rut chu tejdi abahuii lo Dios, xinxtebni ni yunäjpac Dios, laani basule'ni diidx xcuent Dios loonu.

### *Juan ni rutiobnis gunii chuni'c najc Jesucrist*

*(Mt. 3:11-12; Mr. 1:7-8; Lc. 3:15-17)*

<sup>19</sup> Dee najc diidx nani gunii Juan ni rutiobnis che baxhaļ rexpejñ Israel rebixhojz nájza rexpejñ guidoo ni laa levitas, biriireni guedx Jerusalén te sanabdiidxreni lo Juan, räjpreni lojni:

—¿Luj chu najclu?

<sup>20</sup> Dxejcti bicäjpni lojreni, xhet bacua'tzdini lojreni, räjpni:

—Et narädi nacä Crist ni jiäd.

<sup>21</sup> Dxejcti gunabdiidxreni lojni, räjpreni:

—¿Chuxhni'c najclu? ¿La lujni najc Elías?

Räjpni:

—Dina gacäni.

Räjpreni:

—¿La najclu te dade' ni gunii xtidx Dios ni cabäaznu jiäd?

Dxejc räjpni:

—Dina gacäni.

<sup>22</sup> Räjpreni:

—¿Chuxhni'c najclu? Te chonänu diidx loj reni baxhaļ nuure. ¿Xhi rñiilu, chuxhni'c najclu?

<sup>23</sup> Räjp Juan:

—Narä nacä nani rbedxa' nez lo reyubijdz si'c ni gunii Isaías, ni gunii xtidx Dios scree: “Colyensa'c xneyuj Dad.”

<sup>24</sup> Rebejn ni baxhal redée najc reni rniireni “farisee”. <sup>25</sup> Dxejc gunabdiidxreni stee, räjpreni lo Juan:

—¿Xhicuent rutiobnislu palga dilu gac Crist ni jiääd niclaza Elías niclaza stee niguii ni rnii xtidx Dios ni cabääznu jiääd, ä?

<sup>26</sup> Dxejcti räjp Juan lojreni:

—Narä rutiobnisä con nis, niluxh galäiitu yu' tej nani ditu gumbee. <sup>27</sup> Laa dee ni siääd detzä niluxh di nungäj̄l nicla surloä cuää xcura'chni, sa'csi sajcruni loä.

<sup>28</sup> Guiraa recosre gujc stelaad cadro laa Betábara, ni ria'n stelaad ro' gueu Jordán cadro cagutiobnis Juan.

### *Jesús najc Xile' xten Dios*

<sup>29</sup> Che bara yääl, bahuii Juan siääd Jesús lojni. Dxejc räjpni:

—¡Colhuii! Aree Xile' xten Dios nani rudzucaj xtoj̄l reben guedxliuj. <sup>30</sup> Lagajc xcuent dee ni rniä cheni guniä lojtu: “Detzä siääd te niguii ni sajcruni loä, sa'csi ganidli narä agac nabaj̄ni.” <sup>31</sup> Luxh dina niembeäni, per biädtiobnisä con nis te guluiä lo rexpejn̄ Israel chu najcni.

<sup>32</sup> Guniiza Juan stee diidx xcuentni, räjpni:

—Narä bahuiä biäjt Sprit Dxiän xten Dios xhaguibaa si'c te palom guzudxini yejcn̄i. <sup>33</sup> Dina niembeäni, per nani baxhal narä gutiobnisä con nis, laani najni loä: “Cheni fiilu jäjt Sprit Dxiän xten Dios xhaguibaa si'c te palom, sudxini yejc te bejn̄, laanini najc ni gutiobnis con Sprit Dxiän xten Dios.” <sup>34</sup> Narä abahuiä lojni, ni'cni rniliä: “Dee ni najc Xi'n Dios.”

### *Reni gujc xpejn̄ Jesús ganiddoo*

<sup>35</sup> Che bara stee yääl, sugasac Juan ro'c, suganäj̄ni tio'p rexpejn̄ni. <sup>36</sup> Bahuiini lo Jesús che sasajni, dxejc gunii Juan, räjpni:

—¡Colhuii! ¡Laa dee ni najc Xiil xten Dios!

<sup>37</sup> Biejn diajg guiro'p rexpejn̄pac Juan diidxga, dxejc sanajlreni Jesús. <sup>38</sup> Che gubiré Jesús bahuiini siädnajlreni, dxejc räjpni:

—¿Xhi caguil̄tu?

Räjp rebejn̄ga:

—Mastr, ¿caro rbäjzlu?

<sup>39</sup> Badzu' Jesús diidxre, räjpni:

—Col̄taa, te fiitu.

Dxejcti huijreni te bahuiireni caro rbäjzni ro'c. Biannäjrenini ro'c sa'csi agojl̄ si'cti rcatajp gudxej.

<sup>40</sup> Tej reni biejn diajgni xtidx Juan laa Andrés, bejtz Simón Pedr dxejc huinäj̄lni Jesús.

<sup>41</sup> Ganiddoo huitiilni bejtzni, dxejc räjpni lojni:

—Abidxäl̄nu Mesías nani sälojza Crist ni cabääznu jiääd.

<sup>42</sup> Sas huinänini loj Jesús. Che bahuii Jesús lojni, räjpni:

—Luj najclu Simón xi'n Jonás; sirilajlu Cefas nani sälojza Pedr.

### *Gurejdx Jesús Felipe näjza Natanael*

<sup>43</sup> Bara yäälga rlajz Jesús chää nez Galilee. Dxejc bidxaagni Felipe, räjpni lojni:

—Gudanajl narä.

<sup>44</sup> Felipe siääd guedx Betsaida, guedxro ni najcza lajdx Andrés näjza Pedr. <sup>45</sup> Felipe bidxaag Natanael räjpni lojni:

—Abidxäl̄nu bejn̄ nani bacuaa toMoisés xcuentni lo reguijtz xten leii agujc xchej, nani bazä'tza reniguii ni gunii xtidx Dios, Jesús xi'n José ni siääd Nazare't.

<sup>46</sup> Räjp Natanael:

—¿La sajc guirii te beñsa'c guedx Nazare't, ä?

Räjp Felipe lojni:

—Gudaa, te filu.

<sup>47</sup> Che bahuii Jesús siääd Natanael nez lojni, räjpni:

—Colhunii te beñ Israelpac nani dipacni gusguee.

<sup>48</sup> Räjp Natanael:

—¿Xho numbeelu narä?

Badzu' Jesús diidxre lojni räjpni:

—Che gajd Felipe cueedx luj, che suga'lilu ni' te yagiigw, bahuiä lojlu.

<sup>49</sup> Badzu' Natanael diidxre, räjpni:

—Mastr, luj najc Xi'n Dios, luj najc Reii xten rexpen Israel.

<sup>50</sup> Räjp Jesús lojni:

—Sa'csi rniä lojlu, “bahuiä suga'lu ni' yagiigw”, ¿ni'c rililajzlu, ä? Xhidajl cosroru suhuiilu.

<sup>51</sup> Dxejcti räjpzani:

—Rniliäpac lojtu, suhuiitu guixal xhaguibaa, näjza rä'p riäjt rexangl Dios yejc Xi'n Dios ni gujc Niguii.

## 2

### *Te sa' ni guyu' guedx Caná xten Galilee*

<sup>1</sup> Che gudejd choñ dxej, guyu' te sa' guedx Caná xten Galilee. Ro'c guyu' xnan Jesús.

<sup>2</sup> Huijza Jesús näjza rexpejn pacni, sa'csi bidoñreni chääreni lo sa'ga. <sup>3</sup> Gubijdz bin. Dxejc räjp xnan Jesús lojni:

—Dirureni ga'p bin.

<sup>4</sup> Dxejc badzu' Jesús diidxre räjpni:

—¿Xhicuent rniilu si'c loä, xnanä? Gajd xhorä guidzujñ.

<sup>5</sup> Niluxh räjp xnanni loj remos ni tre' ro'c:

—Colyejn guira'ti si'ctis ni guiniini lojtu.

<sup>6</sup> Suga' xho'p guesguij nani rdxaj nis te rdiib naa rexpejn Israel te racnayareni te si'c guisa' xleii to Moisés. Neñ tejga guesguijga ru' si'cti te gayuu litr nis. <sup>7</sup> Räjp Jesús loj remos:

—Colguchaj reguesguijre nis.

Dxejcti bachadoo rebejn gani. <sup>8</sup> Dxejcti räjp Jesús lojreni:

—Colca' che'nni naj te colchanäni lo nani cahuii cayajc sa're.

Dxejc huinä remosga che'n bin lojni. <sup>9</sup> Che gu' dade'ga che'n nis ni gubixhloj bin (luxh dini gan caro siäädni, remostis ni gulä'p nis, ni'ctis najn). Dxejcti gurejdx dade'ga bi'n.

<sup>10</sup> Dxejcti räjpni:

—Guiraa rebejn rudeedreni binsa'c räxгаа rebejn, dxejcti che agudxaj xque'reni, rudeedreni bin nani di xcuent, niluxh luj gulucheelu binsa'cre najli.

<sup>11</sup> Seenre najc ganiddoo ni gusloj bejn Jesús; bejnnini neñ guedx Caná xten Galilee. Seenga bazäbdiidx yälrnibee xtenti luxh ni'cni huililajz rexpejn pacni xtiidxni.

<sup>12</sup> Che gudejd sa'ga, huijni guedx Capernaum con xnanni, rebejtzni näjza rexpejn pacni. Ro'c bia'nreni tio'p-choñ dxej.

### *Basia Jesucrist guidoro*

(Mt. 21:12-13; Mr. 11:15-18; Lc. 19:45-46)

<sup>13</sup> Sa'csi abidzungejxh lanij pascw xten rexpejn Israel cheni rnalajzreni guxhijñ ni gudejd guixhajg xten yälgujt neñ Egipto, ni'c sää Jesús guedx Jerusalén. <sup>14</sup> Neñ guidoro bidxälñi xhidajl bejn nani ruto' gon, xiil, palom näjza reni sobga' caguchaa melzijt.

<sup>15</sup> Dxejc bejnni te chico't con gaii duu, gulääni regon con rexiil neñ guidoo. Batie'chni xcoobr rebejn nani ruchaa melzijt, barexh-xhätni rexmexreni. <sup>16</sup> Räjpzani loj reni caguto' repalom:

—Colcuää redee, na'c rujntu rolijz xtadä si'c te guii cadre rdo' guiraloj.

<sup>17</sup> Dxejcti banajlajz rexpejn<sub>pacni</sub> xhi caj lo reguijtz ni bacuaa redade' ni gunii xtidx Dios: "Gucnaj lazä xcuent ni runnäjreni rolijzlu."

<sup>18</sup> Dxejcti gunabdiidx reni najc xpejn Israel lojni, räjpreni:

—¿Xhi seen guluiilu loonu naj te fiinu arajplu yäl<sub>rnibee</sub> te abejnlu recosre?

<sup>19</sup> Badzu' Jesús diidxre räjpni:

—Col<sub>gutzu</sub>jl guidoore, luxh narä neñ choñtis dxej sunchesacäni.

<sup>20</sup> Räjp rexpejn Israel lojni:

—Tiubixho'p ijz guclaa ni guc-chee guidoore, ¿xhixh sajc gunchesacluni neñ choñtis dxej, ä?

<sup>21</sup> Niluxh laani caniini xcuent guidoo ni najc lagajc tiejxhni. <sup>22</sup> Ni'cni cheni gubañsacni loj rebeñgut, banajlajz rexpejn<sub>pacni</sub> rediidxre ni guniini, dxejc huililajzreni nani caj lo rexquijtz Dios näjza rediidx ni gunii Jesús.

### *Numbee Jesús guiraa rebejn*

<sup>23</sup> Cheni guyu' Jesús guedx Jerusalén cadre cayajc lanij pascw, la<sub>l</sub> ni cayajc lanijga, xhidajl rebejn huililajz xtiidxni, bahuiizareni remilagwr ni bejn<sub>ni</sub>. <sup>24</sup> Luxh di Jesús nililajz xtidx rebejn<sub>ga</sub>, sa'csi arumbeeni xho najc rebejn. <sup>25</sup> Niluxh dini niquiin chu gäb lojni xho najc bejn, sa'csi lagajc laani anancheeni xho najc lastoo tejga bejn.

## 3

### *Jesús con Nicodem*

<sup>1</sup> Guyu' te niguii lo rexpejn refarisee ni laa Nicodem, najcni te beñroru loj reni rnibee rexpejn Israel. <sup>2</sup> Te guxhijñ biädxhiga'tzni nez loj Jesús, räjpni lojni:

—Mastr, nadonnu lo Dios siäädlu si'c te ni rului, sa'csi rut rajcdi rujn sa' remilagwr nani rujnlu palga di Dios sunäjni.

<sup>3</sup> Dxejcti räjp Jesús lojni:

—Rniliäpac lojlu, nani di gaal stehuält, di gacdi fiini xcäl<sub>rnibee</sub> Dios xhaguibaa.

<sup>4</sup> Dxejcti räjp Nicodem lojni:

—¿Xho gac gaal te bejn stehuält niluxh anajcni beñgool? ¿Xhixh sajc chusacni xque' xnanni stehuält te galsacni, ä?

<sup>5</sup> Badzu' Jesús diidxre räjpni:

—Rniliäpac lojlu, nani di gaal con nis, näjza con Sprit Dxan xten Dios, di gacdi jiu'ni lo xcäl<sub>rnibee</sub> Dios xhaguibaa. <sup>6</sup> Nani rajl xi'n beñ guedxliujre, ni'c najctisni bejn guedxliuj, luxh nani rajl por Sprit Dxan xten Dios, Spritza najcni. <sup>7</sup> Na'c rdxelojlu sa'csi rniä: "Nanabpac gaallu stehuält." <sup>8</sup> Rbi' bej cadrotis rlajzni; riejn diajglu rubejni niluxh dilu gan caro siädni, dizalu gan caro sääni. Si'cza rebejn guedxliuj direni gan xho rajl rexpejn Dios stehuält con Sprit Dxan xten Dios.

<sup>9</sup> Badzu' Nicodem diidxre, räjpni:

—¿Xho mood sajc gac recosre?

<sup>10</sup> Räjp Jesús lojni:

—¿La najclu te maestr xten rexpejn Israel luxh dilu gan recosre, ä? <sup>11</sup> Rniliäpac lojlu, aguniinu xcuent recos ni nadonnu, abasule'nu recos ni abahuiloonu, niluxh la'tu ditu nililajz xtiidxnu. <sup>12</sup> Palga ditu chalilajz xtiidxnu che guniinu xcuent recos guedxliuj nani rniinu: ¿Xho chalilajztu xtiidxnu palga guiniinu xcuent recos xhaguibaa?

<sup>13</sup> Rut chutejdi ahuä'p xhaguibaa, xtebtis nani biäjt xhaguibaa, lagajc Xi'n Dios ni gujc Niguii. <sup>14</sup> Lagajc si'cni guläsjaia toMoisés bäl guiib lo yajg neñ reyubijdz, sigajcza nanab chäs Xi'n Dios ni gujc Niguii jiaa; <sup>15</sup> te guiraa renani chalilajz xtiidxni direni nit lo Dios, sica'reni yäl<sub>nabajn</sub> par tejpas.

### *Xho huinälajz Dios rebeñ guedxliuj*

16 'Sa'csi huinälazduxh Dios rebejn guedxliuj, ni'cni badeedni biääd Xinxtebni lo guedxliuj, te guiraa renani chalilajz xtiidxni direni nit lo Dios, sa'csi sajpreni yäl'nabajn par tejpas. 17 Sa'csi di Dios nuxhal xi'nni te gusnijtni rebejn guedxliuj, alga baxhalnini te laa rebejn nen xtojlni xcuentni.

18 'Nani chalilajz xtiidxni näjza chalilajz najcni chu najni najcni dini nit, luxh nani di chalilajz xtiidxni agunijtni sa'csi dini nililajz xtidx Xinxteb Dios. 19 Ni'cni dee najc yäl'nijtga: abiääd bianijga loj guedxliuj, biädnä Xi'n Diosni, niluxh rebejn guedxliuj bidxaglazrurenini yäl'nacäy cadro tre'reni, gulälazreni bianijga sa'csi xhet laadi najc xtzunreni. 20 Guiraa reni rujn dzunguijdx, rbälaz bianijga, dizarenini guibig loj bianijga, didi guluiloj bianijga rextzunguijdxreni. 21 Luxh reni rusoo didxlii, rbigreni loj bianijga, te bianijga ruluiloj najc rextzunreni redzunsac xten Dios.

### *Rnisac Juan ni rutiobnis xcuent Jesús*

22 Dxejcti biääd Jesús näjza rexpejn pacni nez lo reyuj xten Judea. Ro'c guyunäjnirenini, batiobnisza rexpejn pacni rebejn. 23 Juan ni Rutiobnis cagutiobniszani bejn te lajt ni laa Enón ni tre' gajxh Salim, sa'csi ro'c yu' sijl nis. Ro'c sää rebejn lojni te cagutiobnisnirenini. 24 Dxejc gajdreni gusäu Juan nen latzguiib.

25 Dxejcti gusloj rexpejn Juan cayujy diidx con gaii xpejn Israel xcuent yäl'rdiib naarenini ni najc xcostumbr rexpejn Israel. 26 Dxejc biäädrenini lo Juan, räjprenini:

—Mastr, dade' nani guyunäjlu stelaad gueu Jordán, nani basule'lu xcuentni, adade'ga cagutiobnis, luxh guiraa rebejn asää lojni.

27 Dxejc badzu' Juan diidxre, räjpni lojrenini:

—Nicla tej bejn digacdi ga'p te xhi cos palga di Dios gudeedni lojni. 28 Lagajc la'tu nancheetu guniliä: “Dina gacä Crist ni cabäjztu jiääd.” Guniäza: “Narä nacä nani biädnijd lojni.” 29 Che rajc sa', nani sobganäj dxa'p, ni'c najc bi'n ni gac chäälni, luxh xamigw bi'n nani suga' ro'c, riejn diajgni rniini, rbalazduxhni sa'csi riejn diajgni xse' bi'n. Sigajcza abibaduxh lazä xcuentni. 30 Nanab gacni laani beñroru, beñsajcru, biädla narä riajl gacä beñhuinru, ni guxiiru saj lojni.

### *Nani siääd Xhaguibaa*

31 'Nani siääd jiaali, ni'c rnibee guiralii, niluxh nani najc beñ guedxliuj ni'c rnii xcuent recos guedxliuj. Nani siääd xhaguibaa ni'c rnibee guiralii. 32 Nani bahuiini, nani biejn diajgni, ni'c rusule'ni niluxh guxii rililajzrenini xtiidxni. 33 Nani rililajz diidx ni rusule'ni, bejnga ruluiloj guliipac najc xtidx Dios. 34 Nani baxhal Dios, ni'c rnii xtidx Dios sa'csi che rudeed Dios Sprit xtenni, dini gudeed guxiini. 35 Dad Dios sanälajzni xingaanni, abadeedzani guiraliiti chu ladznäani. 36 Nani rililajz xtidx xingaanni arajp yäl'nabajn par tejpas, luxh ni di chalilajz xtidx xi'nni, dini fii yäl'nabajn, siääd xcälrdxe'ch Dios yejcnini, sujn Dios castiigwni.

## 4

### *Rdxaag Jesús te gunaa Samaria*

1 Che guchee Jesús abiejn diajg refarisee xhidajlru bejn sanajl Jesús luxh guxiiru sanajlrenini Juan, luxh cagutiobnisrenini, 2 (niluxh xhet Jesúsdi cagutiobnis. Rexpejnini ni catiobnis), dxejc 3 biriini Judea gubisacni nez Galilee.

4 Lal ni sasajni, nanab tedni nez Samaria. 5 Ni'c bidzujnini te guedxro xten Samaria ni laa Sicar, gajxh nejz loj te la' yuj ni badeed toJacoo lo xi'nni toJosé. 6 Ro'c sojb te bisie ni rniirenini “xpisie Jacoo”. Sa'csi abadxajg Jesús siädsajni, gurejni ro bisiega. Agojl läidxej. 7 Bidzujn te gunaa siädla'pni nis, dxejc räjp Jesús lojni:

—Baniidx che'n nis yä'ä.

8 Sa'csi rexpejn pacni asäärenini guejdxga sasiirenini xhi gaurenini.

9 Räjpti guna samaritanga lo Jesús:



—¿Xho mood rniablu nis loä, luj ni najc te beñ Israel luxh narä nacä gunaa samaritan? (Sa'csi di rexpejn Israel chanä sa'reni rebejn Samaria.) <sup>10</sup> Räj Jesús lojni:

—Paru najnlu xhini'c najc yälruulaslajz xten Dios, paru numbeelu chuni'c canab nis lojlu, luj siniablu lojni te laani guniidxni nsnabajn lojlu.

<sup>11</sup> Räjpti gunaaga lojni:

—Dad, xhet ca'dilu te guiliä'plu nis, luxh bisiere najc jiätduxh. ¿Caxh chaca'lu nsnabajnnga, ä? <sup>12</sup> ¿La beñrorulu lo toxtadgoldoonu Jacob ni basa'n bisiere cadro huä'p nis gu'ni, gu'za rexi'nni, näjza rexquidxaani, ä?

<sup>13</sup> Badzu' Jesús diidxre lojni, räjpti:

—Guiraa reni rä' nis bisiere, siojreni stehuält. <sup>14</sup> Luxh nani yä nis nani gudedä, diruni jioj, sa'csi nis nani gudedä neñ lastooni sajcnä si'c te bisie nani rdatis nisni te gudeedni yäl'nabajn par tejpas.

<sup>15</sup> Dxejcti räjpti gunaaga lojni:

—Dad, baniidx nisga yä'ä, te na'cru jiolä, te na'cruza guibi'ä jiädlä'pä nis ree.

<sup>16</sup> Räjpti Jesús:

—Huij, huitejdx chäälü gudanäni ree.

<sup>17</sup> Räjpti gunaaga loj Jesús:

—Ruti chälä.

Räjpti Jesús lojni:

—Laaca guniilu, <sup>18</sup> sa'csi aguyu' gaili chäällu. Luxh nani rbäznäjlu naj dini gac chäällu; guliica najlu.

<sup>19</sup> Che biejn diajg gunaaga si'c, räjpti:

—Dad, rchaloä najclu te niguii ni rnii xtidx Dios. <sup>20</sup> Retoxtadgoldoonu gojnreni Dios lo dajnre, luxh la'tu rniitu guedx Jerusalén najc cadro nanab ganni Dios.

<sup>21</sup> Räjpti Jesús lojni:

—Guna, huililajz xtidxä, sidzujn or cheni nicla lo dajnre, niclaza guedx Jerusalén ditu chagajn Dad Dios. <sup>22</sup> La'tu rajntu Dios nani ditu gumbee, nuunu rajnnu Dios nani rumbeenu; sa'csi yälruuslaa bejn lo dojl siääd xcuent rexpejn Israel. <sup>23</sup> Niluxh sidzujn or, luxh alabidzujnni, che reni guliipac rajn Dad, reni'c neñ lastooreni, lo xcäriejnreni sajnnreni Dios. Sa'csi sa' bejnre rguuil Dad Dios te ganrenini. <sup>24</sup> Dios najc te Sprit. Reni rajn Dios nanab ganrenini neñ lastooreni, lo xcäriejnreni, guideb xtijpreni sa'csi rumbeerenini.

<sup>25</sup> Räjpti gunaaga lojni:

—Ananä siääd Mesías ni laaza Crist. Cheni jiäädni, laani susule'ni guiraliiti loonu.

<sup>26</sup> Räjpti Jesús lojni:

—Narä ni caniä lojlu, nacä laani.

<sup>27</sup> Dxejc bidzujn rexpejnpacni, bidxelojreni sa'csi gunii Jesús lo gunaaga, niluxh rut gunabdiidxdi xhi rlajzni, niclaza rut gunabdiidxdi xhini'c caninäjni gunaaga. <sup>28</sup> Dxejcti basa'n gunaaga xtie'ni, sä'tini guedxroga. Dxejcti räjpti loj rebejn:

<sup>29</sup> —Coltaa, fiitu te niguii ni gunii loä guira'ti nani abenä. ¿La et laadi dee Crist ni cabääznu jiääd, ä?

<sup>30</sup> Dxejc birii rebejnguejdxga, bidzujntireni lojni. <sup>31</sup> Reni najc rexpejnpacni canabduxhreni gau Jesús, räjpti:

—Mastr, gudajw.

<sup>32</sup> Laani räjpti:

—Narä rapä xhi gauä nani ditu gumbee.

<sup>33</sup> Dxejcti räjpti rexpejnpacni lo sa'reni:

—¿Xhaa yu' chu abiädnä xhi gudajwni, ä?

<sup>34</sup> Räjpti Jesús:

—Yälrajw xtenä najc gunä si'cni rlaiz nani baxhal narä, näj guluxä xtzuunni. <sup>35</sup> La'tu rniitu riäädx tajp bäi te guire' cose'ch. Narä rniä colguiliäs lojtu, colfisa'c loniaa, abiquijtz regäj, agoj guire' cose'ch. <sup>36</sup> Nani rujn dzuun rutie' cose'ch rca'ni xcuentni, luxh ni caca'ni najc par yäl nabaj par tejpas, te tejsi guibalaznä nani gule'c binij näj nani batie' cose'ch. <sup>37</sup> Sa'csi gulii najc diidx nani rnii bejn, rniireni: “Tejni rbe'c binij, ste'cani rutie'ni.” <sup>38</sup> Narä abaxhalä la'tu gutie'tu cose'ch nani ditu nibe'c; ste'ca najc nani bejn dzuun gule'cni binij, dxejc la'tu jiu'tu gutie'tu cose'ch loj xtzuunni.

<sup>39</sup> Xhidajl reben Samaria huililajz xtidx Jesús xcuent rediidx ni räjp gunaaga lojreni che räjpni: “Guniini loä guiralii nani abenä.” <sup>40</sup> Ni'cni, che biääd reben guedx Samaria lojni gunabreni loj Jesús jia'nni lajdxreni. Dxejc bia'nni ro'c tio'p dxej. <sup>41</sup> Dxejc xhidajlrureni huililajz xtiidxni ni guniini lojpacreni. <sup>42</sup> Dxejcti räjpreni loj gunaaga:

—Dirunu chalilajz ganaxtis xcuent diidx ni guniilu loonu, sa'csi lagajc nuure abiejn diajgnu xtiidxni, ni'c nancheenu dee najcpac ni ruslaa rebejn guedxliuj loj dojl. Laani najc Crist ni cabäaznu jääd.

### *Basiajc Jesús xi'n te bejn ni rujn xtzuun gubier*

<sup>43</sup> Che gudejd tio'p dxej, biriini guedx Samaria, huinuuni xnezyujni nez Galilee. <sup>44</sup> Sa'csi lagajc Jesús gunii, räjpni: Te bejn nani rnii xtidx Dios di reben lajdxpacni chanälajz xtiidxni. <sup>45</sup> Che bidzujñni rexyuj Galilee, reben Galilee huichaglojrenini sa'csi näj laareni huijreni lanij pascw guedx Jerusalén, ro'c bahuiireni guiraa redzuun nani bejn.

<sup>46</sup> Gubisacni, bidzujñni guedx Caná xten Galilee cadre bejn bidxaa nis gujcn bin. Dxejcti guyu' te dade' nani rujn xtzuun reii. Guedx Capernaum naga' te xi'nni cayacxhuu. <sup>47</sup> Che biejn diajg dade'ga abirii Jesús Judea, abidzujñni nez Galilee, huijni lo Jesús, gunabduxhni lojni cháäni te gusiajcn xi'nni nani naga' cuentro, ameerli guetni.

<sup>48</sup> Dxejcti räjp Jesús lojni:

—Paru ditu fii reseen, remilagwr, ditu chalilajz chuni'c nacä narä.

<sup>49</sup> Dade' ni rujn xtzuun reii, gunii lojni, räjpni:

—Do'o Dad, te di guet xi'nä.

<sup>50</sup> Räjp Jesús lojni:

—Huij. Di xi'nlu guet.

Huililajz dade'ga, sä'tini. <sup>51</sup> Che gubi'ni rolijzni, birii rexmosni, huichaglojni, badeedreni diidx nabaj xi'nni.

<sup>52</sup> Dxejcti gunabdiidxni:

—¿Corti gusloj cayajcni?

Räjpreni lojni:

—Nai si'cti rcatej gudxej biriini xliaa.

<sup>53</sup> Dxejcti guchee dade'ga lagajc orga ni räjp Jesús lojni: “Di xi'nlu guet.” Dxejc dade'ga näjza guiraa rebejn ni yu' rolijzni huililajzreni Jesús najc ni cabäzreni jääd.

<sup>54</sup> Dee barojp seen ni bejn Jesús cheni biriini Judea, biu'ni Galilee.

## 5

### *Bejn Betesda nani naxu'n*

<sup>1</sup> Che gujcti recosre, guyu' te lanij xten rexpejn Israel, dxejc huij Jesús guedx Jerusalén. <sup>2</sup> Guedx Jerusalén, gajxh ro' puert ni laa xten rexii, yu' te guipilro nis; xtidx hebreo laani Betesda. Cuä' guipilroga caj gaii cordoor. <sup>3</sup> Ro'c naga' xhidajl bejn racxhuu, yu' bejn ni di fii, beñcoj, näj bejn nani bixu'n tiejxhni. Cabäzreni guiniib nisga <sup>4</sup> sa'csi guctiguc riääd te xangl Dios rusniib nisga. Dxejc bejn nani gun gaan chachu' lo nis ganiddoo che guiniibni, riajcn lo xhitis yälgujdx ni rajcni. <sup>5</sup> Ro'c guyu' te beñ racxhuu nani agujc

galbitzubixhujn ijz cayacxhuuni. <sup>6</sup> Cheni bahuii Jesús naga'ni, badeedzani cuent lacti xchero raxchuuni, räjpni lojni:

—¿La rlanjlu jiajclu?

<sup>7</sup> —Dad —räjp bejn racxhuuga lojni—, dina gapä chu gusal narä nejn nis cheni rniib nisre. Cheni rlazä chachu'ä lo nis, stee bejn rujn gaan narä, ganidni richu'ni lo nisga.

<sup>8</sup> Räjp Jesús lojni:

—Huistie, guläs xta'lu, guzaj, huij.

<sup>9</sup> Lagajc dxejc biajc bejnga, guläsni xta'ni, gusloj gusajni. Niluxh dxejga najc dxej nani rusilajz rexpejn Israel, <sup>10</sup> ni'c räjp rexpejn Israel lo bejn ni biajcga:

—Nadxej najc dxej ni rusilajz bejn. Di gacdi guulu xta'lu.

<sup>11</sup> Laani räjpni:

—Nani basiajc narä, laani naj loä: “Guläs xta'lu, gusaj.”

<sup>12</sup> Dxejc gunabdiidxreni lojni:

—¿Chuni'c naj lojlu “Guläs xta'lu, gusaj”?

<sup>13</sup> Dxejcti bejn racxhuu ni biajcga dini gaan, sa'csi gunitloj Jesús, biriini ro'c laj ni tre' xhidajl bejn lajtga. <sup>14</sup> Che bidxaagni Jesús stehuält nejn guidoro, räjp Jesús lojni:

—Ahuii, naj ni abiajclu, na'c gunlu dojl stehuält, didi sajclu xhi stee ni najc cuentruru.

<sup>15</sup> Sä'ti bejnga, huiye'tzni loj rexpejn Israel laa Jesús ni basiajcn. <sup>16</sup> Ni'cni gusloj rexpejn Israel carinajlreni Jesús, rlanjreni guiga'ni te ju'trenini, sa'csi rujnni redzuunga dxej ni rusilajzreni. <sup>17</sup> Luxh räjp Jesús lojreni:

—Xtadä Dios najli cayujnni dzuun, ni'cni näjza narä cayunä dzuun.

<sup>18</sup> Ni'cni rlanjru rexpejn Israel ju'tni, xhet ganaxdi sa'csi rujnni dzuun dxej ni rusilajzreni, per näjza sa'csi räjpni Dios najc Xtadni, rniizani tebloj najcni con Dios.

### *Yälrnibee xten Xi'n Dios*

<sup>19</sup> Badzu' Jesús diidxre räjpni lojreni:

—Rniliä, rniliäpac lojtu. Di gacdi gun Xi'n Dios dzuun xtebni, palga dini fixgaa rujn Xtadni dzuunga, sa'csi guira'tis dzuun ni rujn Xtadni, dzuunga rujnza Xi'nni sigajc rujn Xtadni. <sup>20</sup> Sa'csi rinälajz Dad xi'nni, ruluiini lo xi'nni guiraa redzuun nani rujnni, luxh dzunroruza suluiini lojni gunni, te guidxelojtu. <sup>21</sup> Sigajc ni rliäs Dios rebengut, rudeedni yäl nabajn lojreni, sigajcza sudeed xi'nni yäl nabajn lo renani rlanjztisni. <sup>22</sup> Nicla Dad di gun yäl guxhtis, alga badeedni guiralii yäl guxhtis gun Xi'nni, <sup>23</sup> te guiraa bejn guiliä'p xpala'n xi'nni si'cni rliä'preni xpala'n Dad. Nani di guiliä'p xpala'n Xi'nni, dizani guiliä'p xpala'n Xtadni ni baxhalni biäädni.

<sup>24</sup> Rniliä, rniliäpac lojtu, nani rucuadiajg xtidxä, ni chalilajzzani nani baxhal narä, ni'c rajpni yäl nabajn par teipas; niluxh dini ted lo yäl guxhtis, alga abiriini lo yäl gujt, agudejdni lo yäl nabajn. <sup>25</sup> Rniliä, rniliäpac, sidzujn or, luxh alabidzujnni, cheni siejn diajg rebengut xse' Xi'n Dios, luxh reni riejn diajgni diidxga sibansacreni lo rebengut. <sup>26</sup> Si'cni rajp Dad Dios yäl nabajn lagajcsi laani, sigajcza badeedni lo Xi'nni ga'pni yäl nabajn lagajcsi laazani. <sup>27</sup> Badeedzani lojni yälrnibee te gunni yäl guxhtis, sa'csi najcni Xi'n Dios ni gujc Niguii. <sup>28</sup> Na'c rdxelojtu rediidxre, sa'csi sidzujn or cheni guiraa reni yu' nejn baa siejn diajgreni xse'ni <sup>29</sup> siriizareni nejn baa. Reni bejn dzunsa'c siriireni te guibansacreni loj yäl nabansa'c, niluxh reni bejn dzunguijdx, siriireni te guibansacreni te tedreni lo xcäl guxhtis Dios.

### *Nani ruluiloj yälrnibee ni rajp Jesús*

<sup>30</sup> Xhet rajcni runä lagajcsi narä. Sigajc ni riejn diagä, sigajcza runä yäl guxhtis. Luxh yäl guxhtis ni runä laaca najcni sa'csi dina quilä gunä nani rlazätis, rguilätis gunä si'c ni rlanj Dad nani baxhal narä. <sup>31</sup> Palga narätis rniä diidx lagajc xcuentä, xhet sajcdi diidxga. <sup>32</sup> Yu' stee nani rniliä diidx xcuentä, luxh nancheä diidx ni rniini xcuentä sacduxhni, guliipacni. <sup>33</sup> La'tu abaxhaltu chu huij loj Juan, huinabdiidxreni lojni “chu najc bejnga”,

niluxh badzu'ni diidx lojreni guniini diidx guliipac xcuent chu nacä. <sup>34</sup> Narä dina jiuä diidx nani rnii rebejn xcuentä luxh canisacä rediidxre te laatu lo xtojltu. <sup>35</sup> Juan gujc si'c te bajl ni ralguij, basaniizani. Luxh la'tu huihuiituni bibalajztu lo xpianiini balsi dxej. <sup>36</sup> Luxh narä rapä xhi ruluilojru chu nacä lo diidx ni gunii Juan; sa'csi lagajc dzuun nani baniidx Xtradä gunä, lagajc redzuun ni runä, huenliisi ruluilojreni Xtradä Dios baxhal narä. <sup>37</sup> Xtradä ni baxhal narä lojtu agunilii chu nacä. Gajdpactu jiejn diajg xse'ni, gajdzatu fii lojni. <sup>38</sup> Dizatu ga'p xtiidxni neñ lastootu, sa'csi di lajztu chalii xtiidx nani baxhal narä. <sup>39</sup> La'tu rolduxhtu reguijtz xten Dios sa'csi rchalotu si'c sidxäلتو yälnabajn par tejpas, luxh lagajc reguijtzga rusule' chu narä. <sup>40</sup> Naadditu jiäädte loä te ga'ptu yälnabajn par tejpas.

<sup>41</sup> 'Narä dina quilä chu bejn guiliä'p xpala'nä nez loä. <sup>42</sup> Luxh narä anumbeätu, ananä ditu chanälajz Dios neñ lastootu. <sup>43</sup> Narä biälä xcuent Xtradä, luxh ditu gucuadiajg xtidxä; paru jiääd chu stee bejn xcuentcani, ni'c sii sucuadiajgtu xtiidxni. <sup>44</sup> Xho gac chalilajztu, ni rliä'ptu xpala'n lagajc sa'tu. Ditu quiil xho gac guiliä'p Gueb Dios xpala'ntu. <sup>45</sup> Di naatu pet narä ni chale'cä xquejtu lo Xtradä. ToMoisés ni chale'c xquejtu, luxh rujntu xhigab lagajc xleiini gacnä j la'tu. <sup>46</sup> Paru la'tu nililajzpacu xtidx toMoisés, dxejc niliiza lajztu xtidxä sa'csi xcuentä bacuaa toMoisés lo reguijtz. <sup>47</sup> Palga ditu chalilajz nani bacuaani lo reguijtz, ¿xho chalilajztu rediidx nani cania lojtu, ä?

## 6

### *Bayaan Jesús gaii mil niguii*

*(Mt. 14:13-21; Mr. 6:30-44; Lc. 9:10-17)*

<sup>1</sup> Che gulujx gujc recosre, dxejc sää Jesús stelaad nezro' nisdoo xten Galilee, nani rniizareni nisdoo xten Tiberias. <sup>2</sup> Sanajl xhidajl bejn ni sa'csi rhuiireni remilagwr ni rujnni lo rebenracxhuu. <sup>3</sup> Dxejcti huä'p Jesús yejc te dajn, ro'c gurenäjni rexpejn pacni. <sup>4</sup> Niluxh ameer gac lanij pascw xten rexpejn Israel, cheni rudeedreni xquixhtios lo Dios xcuent dxej ni biriireni Egipto. <sup>5</sup> Cheni guläs Jesús lojni, bahuiini siääd xhidalduxh bejn, siäädreni nez lojni, dxejcti räjpni loj Felipe:

—¿Caro guisiinu yätxtiil te gau rebejnre?

<sup>6</sup> Dxejc räjpzani si'c te don xhi xhigab gun Felipe, luxh laani anajnni xho gunni. <sup>7</sup> Räjp Felipe lojni:

—Di tio'p gayuu beex yätxtiil gal te gaureni tlagaj.

<sup>8</sup> Tej rexpejn pacni ni laa Andrés, bejtz Simón Pedr, räjp lojni:

<sup>9</sup> —Ree suga' te biuux ca' gaii yätxtiil con tio'p bäjl, ¿xhixh sajl ni'c gau reben xhidajlre?

<sup>10</sup> Dxejcti räjp Jesús:

—Coljejtz loj rebejnre cuereni.

Yuduxh guixa' ro'c. Dxejcti gurej reniguii. Si'cti gaii mil najc reniguii. <sup>11</sup> Dxejcti cua' Jesús yätxtiilga, badeedni xquixhtios lo Dios, gudisni yätxtiilga lo rexpejn pacni. Dxejcti rexpejn pacni gudisrenini loj rebejn nani sobga'. Sigajcza gudisreni rebäjl si'ctisni rrajzreni gaureni. <sup>12</sup> Che gulujx gudajwreni, gudxaj xque'reni, dxejcti räjp Jesús loj rexpejn pacni:

—Colgutie' guiraa reyätxtilbiujy nani bia'n te xhet nitdi.

<sup>13</sup> Batie'tireni reyätxtilbiujy, guläsreni tzubitio'p dxijm yätxtilbiujy nani bia'n lo gaii yätxtiilga nani gula' gudajwreni. <sup>14</sup> Che bahuii rebejn ga reseem, remilagwr nani bejn Jesús, dxejc räjpreni:

—Guluiipacni, laa dee ni najc niguii ni rnii xtidx Dios nani cabäaznu jiääd lo guedxliuj.

<sup>15</sup> Sas che gucbee Jesús cayujnreni xhigab jiädnaazrenini te niujnreni gacni rei te guinibeeni lojreni, biriini ro'c, xtebni gubisacni neñ dajn.

*Gusaj Jesús lo nisdoo**(Mt. 14:22-27; Mr. 6:45-52)*

<sup>16</sup> Che gojl guxhijñ, bidzujñ rexpejn pacni lo nisdoo. <sup>17</sup> Biu'reni neñ te barcw te tedreni lo nisdoo nez guedx Capernaum. Abicäjy lo yuj niluxh gajd Jesús guibi' lojreni te chääni. <sup>18</sup> Gusloj cayäjs nisdoo xcuent te beduxh nani cabi'. <sup>19</sup> Ni'cni che gusajreni si'cti gaii o xho'p kilómetro, bahuiireni siäddzungenajxh Jesús lo barcw, lo nisdoo siädsajni. Bidxebduxhreni. <sup>20</sup> Luxh laani räjpni lojreni:

—Naräni. Na'c guidxejbtu.

<sup>21</sup> Dxejcru cuäjbreñ biu'ni neñ barcw. Dxejcti bidzungenajczeni stelaad lo yuj cadro sääreni.

*Caguiil rebejn Jesús*

<sup>22</sup> Che bara yääl, rebejn nani bia'n stelaad ro' nisdoo, bahuiireni asanä rexpejn pacni barcwbäz nani suga' ro'c, niluxh di Jesús nij, xtebsireni sääreni. <sup>23</sup> Luxh bidzungenajc sgaii barcw nani birii guedx Tiberias, te lajt ni tre' gajxh cadro gudajwreni yätxtiil che gulujx badeed Jesús xquixtios lo Dad. <sup>24</sup> Che bahuii rebejn ruti Jesús ro'c, niclaza rexpejnñi, biu'reni neñ rebarcw, sääreni guedx Capernaum satiilreni Jesús.

*Jesús najc yätxtiil xten yälñabajñ*

<sup>25</sup> Che bidxälreni Jesús stelaad ro' nisdoo, räjpreni lojni:

—Mastr, ¿guc bidzujñlu ree?

<sup>26</sup> Badzu' Jesús diidxre, räjpni lojreni:

—Rniliä, rniliäpac lojtu, caguiiltu narä sa'csi gudajwtu, gudxaj xque'tu, et sa'csi bahuiiditu remilagwr nani benä. <sup>27</sup> Na'c guntu dzuun ganax par yälrajw nani rnitloj. Colyejn dzuun par yälrajw nani di nitloj, ni runiidx yälñabajñ par tejpas. Yälrajwre suniidx Xi'n Niguii, sa'csi loj rebejn baluii Xtadni, Diospac, laani najc Xi'npacni.

<sup>28</sup> Dxejcti räjpreni:

—¿Xhini'c jiennu te gac jienpacnu dzuun ni rlanj Dios?

<sup>29</sup> Räjp Jesús lojreni:

—Dee najc ni rlanj Dios guntu: chalilajztu xtidx narä, nani baxhañni.

<sup>30</sup> Räjpreni lojni:

—¿Xhi seen gunlu te guihuiinu xcälñibeelu te cholilajznu xtiidxlu? ¿Xhi dzuun rujñlu? <sup>31</sup> Retoxtadnu gudajwreni yätxtiil ni laa mana loj reyubijdz si'cni caj loj reguijtz: “Badeedni yätxtiil ni biajb xhaguibaa gudajwreni.”

<sup>32</sup> Räjpza Jesús:

—Rniliä, rniliäpac lojtu, xhet toMoisésdi ni badeed yätxtiil ni biajb xhaguibaa. Xtadä ni suniidx yätxtiil nani siääd pac xhaguibaa. <sup>33</sup> Sa'csi yätxtiil xten Dios najc bejn ni siääd xhaguibaa, niluxh laani rudeedni yälñabajñ par tejpas loj rebeñ guedxliuj.

<sup>34</sup> Räjpreni:

—Dad, baniidx yätxtiilga loonu.

<sup>35</sup> Dxejcti räjp Jesús lojreni:

—Narä nacä yätxtiil xten yälñabajñ nani riäjñl jiaäd; chutis ni jiaäd loä diruni guiliaan, niluxh chutis ni rililajz xtidxä diruni jiojñl par tejpas. <sup>36</sup> Aguniä lojtu, la'tu ditu chalilajz, luxh abahuiitu loä. <sup>37</sup> Guiraa renani abaniidx Xtadä loä, siäädni loä, niluxh chutis ni jiaäd loä dina cuälazäni. <sup>38</sup> Sa'csi narä siälä xhaguibaali te gunä si'c ni rlanj Xtadä, xhet si'cdi ni rlazädi. <sup>39</sup> Dee najc ni rlanj Xtadä nani baxhañ narä: na'c nit nicla tej renani baniidxni loä, te guspañsacä guiragajczeni che gal dxej lult ni riäjñl jiaäd. <sup>40</sup> Scree rlanj nani baxhañ narä: guiraa renani fii lo Xi'n Dios, näj chalilajzreni xtiidxni, xca'reni yälñabajñ par tejpas niluxh narä suspañsacäreni che gal dxej lult ni riäjñl jiaäd.

<sup>41</sup> Rediidxre bejn gusloj casiey rexpejn Israel xcuent Jesús sa'csi räjpni: “Narä nacä yätxtiil ni biäjñt xhaguibaa.” <sup>42</sup> Dxejcti räjpreni:



—¿La et Jesúsdi, xi'n José dee, ä? Nuure numbeenu xtadni, xnanni, ¿xhoxh rniini xhaguibaa biäjtni?

<sup>43</sup> Dxejç räjp Jesús lojreni:

—Na'c rusieinäj sa'tu. <sup>44</sup> Rut rajçdi riääd loä palga di Xtradä ni baxhal narä jiädnäni loä, te guspañsacäni che gal dxej lult ni riäjł jiääd. <sup>45</sup> Loj reguijtz ni bacuaa redade' ni gunii xtidx Dios çaj scree: “Suliii Dios guiraareni.” Ni'cni guiraa reni rucua diajg xtidx Xtradä, reni rsieed lojni, reni'c ni jiääd loä.

<sup>46</sup> 'Dinä guiniä yu' chu abahuii lo Dios; tejtis ni abahuii lojni: nani baxhal Dios, ni'ctis abahuii lojni. <sup>47</sup> Rniliä lojtu che rniä: nani chalilajz xtidxä, ni'c räjp yälñabajn par tejpas. <sup>48</sup> Narä nacä yätxtiil nani rudeed yälñabajn. <sup>49</sup> Retoxtadtu gudajw mana ni bastejb Dios lo reyubijdz, dxejcti gujtzareni. <sup>50</sup> Dee najc yätxtiil ni siääd xhaguibaa, te chutis ni gau yätxtiilga dini guet. <sup>51</sup> Narä nacä yätxtiil bajn ni siääd xhaguibaa. Palga yu' chu gau yätxtiilre, sibajñni par tejpas. Yätxtiil nani runidxä narä te xca' reben guedxliuj yälñabajn najc lagajc bältiehxä.

<sup>52</sup> Dxejcti gusloj casiey rexpejn Israel räjpreni:

—¿Xho gac guniidx dee bältiehxhni guidaunu, ä?

<sup>53</sup> Räjp Jesús:

—Rniliä, rniliäpac lojtu, palga ditu gau bältiehxh Xi'n Dios ni gujç Niguui, palga dizatu yä xtiejñni, digacdi ga'ptu yälñabajn. <sup>54</sup> Nani gau bältiehxä, nani yäza xtienä, ni'c räjp yälñabajn par tejpas, niluxh suspañsacäni che gal redxej lult. <sup>55</sup> Sa'csi bältiehxä najc te yälrausa'cpac, xtienä najcza te yälräsa'cpac. <sup>56</sup> Nani gau bältiehxä, nani yäza xtienä, ni'c yu'pac con narä, luxh narä yu'äza con laani. <sup>57</sup> Xtradä ni baxhal narä räjp yälñabajn par tejpas. Narä nabanä xcuent laani. Sigajcza nani rajw narä, sibajnzani xcuent narä. <sup>58</sup> Dee najc yätxtiil nani biääd xhaguibaali; dini gac si'c mana ni gudajw xtadtu dxejç empac gujtreni, sa'csi nani gau yätxtiilre sibajñni par tejpas.

<sup>59</sup> Recosre baluii Jesús neñ te guidobäz lał ni guyu'ni guedx Capernaum.

### *Diidx xten yälñabajn par tejpas*

<sup>60</sup> Che biejn diajgreni si'c, xhidajł rexpejñpacni räjp:

—Naganduxh najc rextiidxni. ¿Chu laa nani gac cuadiajgni?

<sup>61</sup> Dxejcti guçbee Jesús çagusieyreni xcuent rediidxga, dxejç gunabdiidxni räjpni:

—¿La rusieed rediidxre la'tu, ä? <sup>62</sup> ¿Xhicha guntu paru fiitu çhä'p Xi'n Dios ni gujç Niguui çadro guyu'ni galoo? <sup>63</sup> Sprit xten Dios najc ni rudeed yälñabajn; bältiehxhni xhet rujndini gaan. Rediidx nani guniä lojtu najc didxlii xcuent recos xten Sprit, luxh rediidxga rudeed yälñabajn par tejpas. <sup>64</sup> Luxh lałtis yu' lojtu reni di chalilajz.

Sa'csi Jesús nancheeni galooli chu reni'c di chalilajz, anajnzani chuni'c guto'ni, guteedni laani ladzñaa reben dojl. <sup>65</sup> Dxejcti räjpni:

—Ni'cni rniä lojtu, nicla tej rut sajçdi jiääd loä palga di Xtradä jiädnäni loä.

<sup>66</sup> Lagajc dxejç gusloj çabicaj xhidajł rebejn ni agujç xchej gusanäj Jesús, dirureni nisianäj Jesús. <sup>67</sup> Dxejcti räjp Jesús loj guidzubitio'p rexpejñpacni:

—¿La nägajcza la'tu rłajztu jiitu, ä?

<sup>68</sup> Badzu' Simón Pedr diidxre, räjpni:

—Dad, ¿chuloj çonnu? Luj rajplu diidx ni rudeed yälñabajn par tejpas. <sup>69</sup> Nuure abiolilaaznu, anajñnu najçlu Crist Xi'n Dios nani nabajn.

<sup>70</sup> Badzu' Jesús diidxre, räjpni:

—¿La et lagajc narädi guleä guitzubitio'ptu? Luxh tejtü najc bendxab.

<sup>71</sup> Diidxga guniini xcuent Judas Iscariote, xi'n Simón, sa'csi Judas najc ni guto'ni mase nadxaagni lo guitzubitio'p rexpejñpac Jesús.

## 7

*Di rebejtz Jesús chalilajz*

<sup>1</sup> Che gujcti recosre, cansaj Jesús nez reyuj xten Galilee, di rlanjni jia'nni nez reguedx Judea sa'csi rlanj reben ro'c ju'tni. <sup>2</sup> Luxh ameer gal lanij xten cose'ch xten guidoguijd, te relanij xten rexpejn Israel. <sup>3</sup> Ni'c räjp rebejtz Jesús lojni:

—Na'c jia'nlu ree. Huij Judea te näjza rexpejn paclu fi redzunro nani rujnlu. <sup>4</sup> Sa'csi rut rujndi xtzuumni xhiga'tz palga rlanjni gacbee bejn xhi dzuun rujnni, te gumbee bejn. Palga rujnpaclu redzuunre, baluiini lo guiraa reben guedxliuj.

<sup>5</sup> Guniireni si'c lojni sa'csi nicla rebejtzni di chalilajz xtiidxni. <sup>6</sup> Dxejcti räjp Jesús lojreni:

—Gajd xhorä guidzujn, niluxh par la'tu xhitis or najc hueen. <sup>7</sup> Di gacdi guidxe'ch reben guedxliuj lojtu, luxh rdxe'chreni loä sa'csi narä rniliä xcuentreni: dzunguijdx najc xtzuumreni. <sup>8</sup> La'tu colchäj lanij; narä dina cha'a lanijga sa'csi gajd xhorä gal.

<sup>9</sup> Che gulujx guniini si'c lojreni bia'ntini nez Galilee.

*Huij Jesús lanij xten retabernaculos*

<sup>10</sup> Dxejcti che asää rebejtzni lanij, dxejc näjza laani sääni lanij, luxh dini nusäbdiidx, si'c xhiga'tz sääni. <sup>11</sup> Dxejcti caguil rexpejn Israelni lo lanijga, räjpreni:

—¿Concha niguiiga?

<sup>12</sup> Lo rebejn xhidaalga yu' xhidajl bejn ni cagusieyreni xcuentni. Yu'reni räjp: “Hueen najcni”, per sgaiireni räjp: “Dini gac hueen. Cagusgueeni reben guejdx.”

<sup>13</sup> Nicla tejreni xhet casäbdiidx direni xhini'c caniireni. Direni guinii dip sa'csi rdxejbrene rexpejn Israel nani rnibee.

<sup>14</sup> Agurojl lanij, che biu' Jesús nen guidoro. Dxejcti gusloj caguluiini. <sup>15</sup> Dxejcti rdxelox rexpejn Israel nani rnibee, räjpreni:

—¿Xho najn dee guiraloj, niluxh dini nisieed xleii to Moisés?

<sup>16</sup> Badzu' Jesús diidxre, räjpni:

—Yälrlului nani caluiyä et xtenädini, xten nani baxhal naräni. <sup>17</sup> Palga yu' chu rlanj gun nani rlanj Dios, sacbeeni la xten Dios najc reyälrlului xtenä, o la lagajcsi narä rbää diidx ni caguluiä. <sup>18</sup> Nani rusule'ni diidx nani lagajc laani rbääni, ni'c rniini diidxga te guiliä'p rebejn xpala'nni, luxh nani rguuil chä'p xpala'n nani baxhalni, ni'c ni rnii didxlii, xheti yälrusguee nen lastooni. <sup>19</sup> ¿La di to Moises nuniidx leii lojtu, ä? Niluxh nicla tejtutu di gusoob xtidx leiiiga. ¿Xhicuent rlanjtu ju'ttu narä, pes?

<sup>20</sup> Badzu' reben xhidajlga diidxre, räjpreni:

—¿Xpriet ben dxab yu' lastoolu! ¿Chuni'c rlanj ju'tlu?

<sup>21</sup> Badzu' Jesús diidxre lojreni, räjpni:

—Tejtis dzuun benä con xcälrnibeä, dxejc guiraatu cadxelojtu sa'csi benäni dxej ni rusilajztu. <sup>22</sup> Ni'cni baniidx to Moisés lojtu yälru'tu bee, luxh etlaadini guläxtejnini, agac guläxtej retoxtadgoldootuni. La'tu rusäl'tu bee rebiuux mase najcni dxej nani rusilajztu.

<sup>23</sup> Mbaj pes, palga rajc rusäl'tu bee bejn te dxej nani rusilajztu didi nit xleii Moisés, ¿xhicuent rdxe'chtu loä sa'csi basiacäpac te bejn te dxej nani rusilajztu, ä? <sup>24</sup> Na'c rujntu yälgu xhtis si'ctis ni rlanjtu. Colyejn yälgu xhtis con yälgu xhtis xten Dios.

*Rusule' Jesús casiädni*

<sup>25</sup> Dxejcti gusloj gaii bejn Jerusalén cayujn yälgunabdiidx, räjpreni:

—¿La etlaadi dee ni caguilreni te ju'trenini, ä? <sup>26</sup> Ani asuga', caniini nez loj guiraa reben guejdx, niluxh rut rudxojdini. ¿Xhaa ahuililajz reguxhtis, regubier laani najcpacni Crist, ä? <sup>27</sup> Niluxh nuure nadoncheenu caro siäd niguiire, niluxh che jääd Crist, rut gacbeedi caro siädni.

<sup>28</sup> Cagului Jesús nen guidoo che biejn diajgni rediidxre, dxejc dipduxh guniini, räjpni:

—La'tu numbeetu narä, najntu caro siälä; luxh dina niälä lagajcsi narä; nani baxhal narä guliipac nabajñni, luxh la'tu ditu gumbeeni. <sup>29</sup> Luxh narä numbeäni, sa'csi lojni biriä, laani baxhalzani narä.

<sup>30</sup> Dxejc rlanjreni niniaazrenini, niluxh rut gunaazdini, sa'csi gajd xhorni gal.

<sup>31</sup> Xhidajl bejn lo reben xhidajlga huililajz xtiidxni, dxejcti räjpreni:

—Cheni jiääd Crist, ¿xhixh sujnrundi milagwr loj nani rujn dee, ä?

### *Ruxhal refarisee guixhajg guiniaaz Jesús te jiäuni*

<sup>32</sup> Che biejn diajg refarisee xhi canii rebejn xcuent Jesús, laareni näjza rebixhojz nani rnibee lo rebixhojz baxhalreni guixhajg te guiniaazreni Jesús te jiäuuni. <sup>33</sup> Sas räjp Jesús lojreni:

—Bale'si dxej su'ä lojtu, dxejcti guibi'ä loj nani baxhal narä. <sup>34</sup> Siguiiltu narä, niluxh ditu guidxäl narä, sa'csi cadro cha'ä digacdi jiäädte.

<sup>35</sup> Ni'c gunii rexpejn Israel lo sa'reni; räjpreni:

—¿Cacharo chääni ni'c di gacdi guidxälñuni? ¿Xhaa sijni loj rexpejn Israel nani nare'ch nez lajdx regriegos te guluiini regriegos? <sup>36</sup> ¿Xhi säloj diidxre nani guniini loonu: “Siguiiltu narä, niluxh ditu guidxäl narä, sa'csi cadro cha'ä di gacdi jiäädte”?

### *Regueu nisnabajn*

<sup>37</sup> Lult dxe lanij, ni najc dxero, gusulii Jesús dipduxh guniini, räjpni:

—Palga yu' chu cayojl, sujiäädni loä te yäni. <sup>38</sup> Nani chalilajz xtidxä si'cni caj lo rexquijtz Dios nen lastoolini siliejn nisnabajn.

<sup>39</sup> Rediidxre guniini xcuent Sprit Dxi nani churu jädläjz nen lastoo reni rililajz xtiidxni, sa'csi gajd Sprit Dxi jääd, sa'csi gajd Jesús guibansac lo reben gut.

### *Gucgala' rebejn*

<sup>40</sup> Lo reben xhidajlga yu' reni biejn diajgreni rediidxga, dxejc räjpreni:

—Guliipacni, dade're najc laapac ni siääd, si'c ni rnii xtidx Dios.

<sup>41</sup> Yu'zarenii räjp:

—Dade're najc Crist ni cabääznu.

Yu'za sgaii ni räjp:

—Gurniälöjtu jääd Crist nez Galilee. <sup>42</sup> Ni loj rexquijtz Dios caj riäjlpac gac Crist te rexagdo toreei David, jäädzani guedx Belén, lagajc guejdx cadro siääd toreei David.

<sup>43</sup> Dxejcti gucgala' rebejn xcuent Jesús. <sup>44</sup> Yu'reni rlanj chääni pres luxh rut biajxdi gunaazni.

### *Di reguxhtis chalilajz biääd Crist*

<sup>45</sup> Gubi' reguixhajg xten guidoo loj rebixhojzro näjza refarisee. Dxejcti gunabdiidxreni loj reguixhajg, räjpreni:

—¿Xhicuent ditu niädñani?

<sup>46</sup> Badzu' reguixhajg diidxre, räjpreni:

—¿Gajdpac te bejn guinii si'cni rnii bejn ga!

<sup>47</sup> Dxejc räjp refarisee:

—¿La näj la'tu abasgueeni, ä? <sup>48</sup> ¿Xhixh loj regubier o loj refarisee yu' chu tej ni ahuililajz xtiidxni, ä? <sup>49</sup> Reben xhidajlre ni di gan xleii to Moisés, reni'c agunijtpac.

<sup>50</sup> Nicodem, nani huij lojni te guxhijn, najc te refarisee. Laani räjpni lojreni:

<sup>51</sup> —Lo xleiiu caj: digacdi guntu yälguxhtis te bejn palga gajdtu gucuadiagxgaa xtiidxni, te don xhi bejnii.

<sup>52</sup> Badzu'reni diidxre räjpreni lojni:

—¿La näjza luj siäädlu Galilee, ä? Bi'sa'c xhi caj lo xquijtz Dios, suhuiilu nicla tej niguii nani rnii xtidx Dios di jääd nez Galilee.

### *Gunaa nani biga' carälquijxh con te niguii*

<sup>53</sup> Dxejc cade tejreni sii rolizreni.

## 8

<sup>1</sup> Dxejcti huij Jesús nez dan Oliib. <sup>2</sup> Rsilru gubi'ni, bui'ni neñ guidoo. Luxh sanuutis siääd guiraa reben̄guedx lojni. Dxejc ro'c gurejni, gusloj caguluiinireni. <sup>3</sup> Dxejcti biääd refarisee näjza reben̄ najn, biädnäreni te gunaa nani biga' carälguijxh con te niguii. Basujrenini galäii reni suga' ro'c. <sup>4</sup> Räjpreni loj Jesús:

—Mastr, gunaare biganäj te niguii carälguijxhrene, niluxh yu' chäälni. <sup>5</sup> Loj leii xten Moisés caj guicuaanu guij yejc sa' gunaaga te guetni. Luj ¿xhicha naalu?

<sup>6</sup> Si'c räjpreni lojni te gaxäjsi gunijtni te diidx te gac cue'creni xquejni. Niluxh Jesús basajbtisni lojni lo yuj, gusloj cagucuaani lo yuj con bicueñaani. <sup>7</sup> Dxejc sanuutisreni canabdiidxreni, huisutini, räjpreni:

—Nani yu' lojtu ni xhettipac xtojlni, ni'c ganiddoo sugucuaani guij yejc gunaare.

<sup>8</sup> Basabsac lojni lo yuj sanuutis cagucuaani con bicueñaani lo yuj. <sup>9</sup> Luxh laareni che biejn diajgreni diidxga, sa'csi yu' xtojlni, gusloj biriireni tebgajreni, ganid ni najc ben̄golru, dxejcti ni najc huinru. Dxejcti bianxteb Jesús näjza gunaa ni suga' galäiireni.

<sup>10</sup> Dxejc gusulii Jesús, luxh sa'csi rutru lojdi bahuiini, xtebtis gunaaga, räjpreni lojni:

—Gunaa, ¿con reni cabe'c xquejlu? ¿La rut bacuaquiadiru luj, ä?

<sup>11</sup> Räjpreni Gunaaga:

—Nicla tejreni, Dad.

Dxejcti räjpreni Jesús lojni:

—Niclaza narä dina gucuaquiäru luj. Huij, na'cru gunlu dojl.

### *Jesús najc bianij xten guedxliuj*

<sup>12</sup> Gunii Jesús lo rebejn̄ stehuält, räjpreni lojreni:

—Narä nacä bianij xten guedxliuj; nani jiädnajl narä dini sa lo yäl̄nacäy, sica'ni bianij ni rudeedpac yäl̄nabaj̄n.

<sup>13</sup> Dxejcti räjpreni refarisee lojni:

—Luj caniilu diidx lagajcsi xcuentlu. Xhet sajcdi sa' diidxga.

<sup>14</sup> Badzu' Jesús diidxre, räjpreni lojreni:

—Masque lagajc narä rniä diidx xcuentä, sajcdi xtidxä, guliipacni, sa'csi ananä caro siälä, ananäza caro cha'ä. Niluxh la'tu ditu gan caro siälä, niclaza caro cha'ä. <sup>15</sup> La'tu rujntu yälguxhtis si'c najctis rexhigab xten ben̄ guedxliuj. Narä rut lojdi runä yälguxhtis.

<sup>16</sup> Palga gunä yälguxhtis, yälguxhtis xtenä laaca najcni, sa'csi et xtebädi runä yälguxhtis, sa'csi narä näj Xtaädä ni baxhaḷ narä rien̄nuni. <sup>17</sup> Luxh lo xleiitu caj diidxre: “Che rniä tio'p bejn̄ tejsi diidx, didxliini, colchalilajzni.” <sup>18</sup> Narä rniliäpac diidx lagajc xcuentä, dxejcti Xtaädä nani baxhaḷ narä rniliizani diidx xcuentä.

<sup>19</sup> Räjpreni loj Jesús:

—¿Caro yu' xtadlu?

Räjpreni Jesús lojreni:

—Ditu gumbee nicla narä, niclaza Xtaädä; paru niembeetu narä, niembeezatu Xtaädä.

<sup>20</sup> Rediidxre gunii Jesús cadre re' gojn, laḷ ni caguluiini neñ guidoro niluxh rut gunaazdini sa'csi gajd xhorni guidzuj̄n.

### *Cadro cha'ä, la'tu digacdi jiäädte*

<sup>21</sup> Gunisac Jesús lojreni, räjpreni:

—Narä sia'ä, luxh la'tu siguiiltu narä, niluxh loj xtojltu sejt̄tu. Cadre cha'ä di gacdi jiäädte.

<sup>22</sup> Räjpreni rexpejn̄ Israel loj resa'reni:

—¿Xhaa sugu'tni lagajc laani, ni'cni najni di gacdi chonnu cadre chääni?

<sup>23</sup> Räjpreni Jesús lojreni:

—La'tu najctu beṇ lo yuj. Narä nacä beṇ ni siääd jiaa. La'tu najctu beṇ guedxliujre. Luxh narä dina gacätis beṇ guedxliujre. <sup>24</sup> Ni'cni guniä lojtu, sejttu lo xtojltu sa'csi palga ditu chalilajz nacä chu nacä, sejtpactu lo xtojltu.

<sup>25</sup> Dxejcti räjpreni lojni:

—¿Chuxh najclu?

Dxejcti badzu' Jesús diidxre lojreni, räjpni:

—¿Xhini'c guniä lojtu galooli? <sup>26</sup> Xhidajl diidx rlazä guiniä, xhidajlza yälguxhtis rlazä gunä xcuenttu sa'csi ditu chalilajz, per nani baxhaḷ narä najc beṇ guliipac; nani biejn diagä guniini, rediidxga rniä loj rebeṇ guedxliuj.

<sup>27</sup> Luxh laareni direni niacbee la xcuent Dad Dios ni caniini. <sup>28</sup> Ni'cni räjp Jesús lojreni:

—Cheni guiliästu Xi'n Niguui jiaa, dxejc sacbeetu laa narä ni baxhaḷni, luxh xhetliidi runä lagajcsi xcuentä. Si'cni baluii Dad narä, si'ctis rniä. <sup>29</sup> Nani baxhaḷ narä suganäjni narä. Gajd Dad gusanxteb narä, sa'csi runätis ganax redzuun nani rchaglajzni.

<sup>30</sup> Laḷ ni caniini si'c, xhidajlreni huililajz xtiidxni.

### *Rexi'n Dios con remos xten dojl*

<sup>31</sup> Dxejcti räjp Jesús lo rexpejn Israel nani huililajzga:

—Palga la'tu sutijptu, guzoobtu xtidxä, dxejc guliipac najctu xpenä. <sup>32</sup> Sumbeezatu nani najc didxguli, niluxh didx guliiga susḷaa la'tu lo xtojltu.

<sup>33</sup> Räjpreni lojni:

—Rexagdo toAbraham najcnu, rut chu lojdi gudo'nu si'c mos. ¿Xho mood naalu “siliaatu”?

<sup>34</sup> Räjp Jesús:

—Riniliä, rniliäpac lojtu, chutis ni rujn dojl najc mos xten dojl. <sup>35</sup> Nani najc mos, dini jia'n rolijz xlamni guideb guibajjni, niluxh nani najc xi'n lamga, ni'c sii sia'n rolijz xtadni guideb guibajjni. <sup>36</sup> Ni'cni, palga rusḷaa xi'nni la'tu lo dojl, dxejcsii apac gulaatu. <sup>37</sup> Ananä najctu xagdo toAbraham, luxh la'tu rrajztu ju'ttu narä sa'csi di xtidxä jiu' lo xcäriejntu.

<sup>38</sup> Narä rniä nani abahuiä con Xtadä; luxh la'tu rujntu nani biejnza diajgtu lo xtadtu.

<sup>39</sup> Badzu'reni diidxre, räjpreni lojni:

—Xtadnu najc toAbraham.

Dxejc räjp Jesús lojreni:

—Palga la'tu najcpactu xi'n toAbraham, sujntu sa' dzuun ni bejn toAbraham. <sup>40</sup> Luxh naj rrajztu ju'ttu narä, sa'csi rniliä rediidx nani baluii Dios loä. ¿Di toAbraham niujn si'c!

<sup>41</sup> La'tu rujntu xtzuum xtadtu.

Dxejc räjpreni lojni:

—Nuure dinu gac xi'n chälbejn̄di; nuure tejtis xtadnu yu', laani najc Dios.

<sup>42</sup> Dxejcti räjp Jesús:

—Paru guliini najc xtadtu Dios, ninälajztu narä sa'csi loj Dios biriä siälä ree. Xhet lagajcsi xcuentä siälädi; Dios baxhaḷ narä. <sup>43</sup> ¿Xhicuent ditu gacbee rediidx ni rniä lojtu? Sa'csi di rrajztu gucuadiajgtu rextidxä. <sup>44</sup> Xtadtu najc beṇdxab. La'tu najctu xi'nni, rrajztu guntu nani rrajztisni guntu. Xtadtu galooli najcni te ni rugu't, dini suu xlaad didxlii, sa'csi xheti didxlii neṇ lastooni. Che rniini didx-xhii, si'c rniini sa'csi si'cpac najcni, sa'csi najcni beṇ didx-xhii, najczani xtad didx-xhii. <sup>45</sup> Niluxh narä rniä didxlii, ni'c ditu chalilajz xtidxä. <sup>46</sup> ¿Chu tejtü sajc guluii te dojl ni benä? Narä rniä didxlii. ¿Xhicuent ditu chalilajz xtidxä, ä? <sup>47</sup> Nani najc xpejn Dios, ni'c rucuardiajg xtidx Dios. Sa'csi la'tu ditu gac xpejn Dios, ni'cni ditu gucuadiajg xtidxä.

### *Ansde toAbraham, agac nabajn Crist*

<sup>48</sup> Dxejcti badzu' rexpejn Israel diidxre, räjpreni lojni:

—Laaca rniinu luj najclu te bejn ni siääd Samaria, beṇdxab yu' lastoolu.

<sup>49</sup> Räjp Jesús lojreni:



—Xhet beṇdxabdi yu' lastoä. Nani runätis rliä'pä xpala'n Xtradä, luxh la'tu alga rbälaztu narä. <sup>50</sup> Luxh narä dina quilä chu guiliä'p xpala'nä, yu' chu rguuil guiliä'p bejn xpala'nä, niluxh laani rujnni yalguxhtis. <sup>51</sup> Rniliäpac lojtu, nani riu, nani rusob xtidxä, dipacni guet.

<sup>52</sup> Dxejcti räjp rexpejn Israel lojni:

—Naj agucbeepacnu yu' beṇdxab lastoolu. ToAbraham näjza reniguii nani gunii xtidx Dios, guiraareni agujt. Luxh luj rniilu: “Nani riu, nani ruzoob xtidxä, dipacni guet.”

<sup>53</sup> ¿Xhixh sajcrulu lo toxtadnu Abraham, ä? Ni laani gujtni, gujtza reniguii ni gunii xtidx Dios. ¿Chuxh rchalolu najclu?

<sup>54</sup> Badzu' Jesús diidxre, räjpni lojreni:

—Palga lagajc narä rliä'pä xpala'nä, xhet sajcdi xpala'nä. Per nani rliä'p xpala'nä najc Xtradä, lagajcza Xtradä ni rniitu najc Xtioistu. <sup>55</sup> Niluxh la'tu ditu gumbeeni. Narä numbeäni. Paru guiniä dina gumbeäni, sacä te beṇ didx-xhii si'c najctu la'tu. Niluxh dee, numbeäpacni, luxh riuä ni rniini, rusobä xtiidxni. <sup>56</sup> ToAbraham toxtadgoldootu, bibalajzni sa'csi nuhuiini dxej nani jiälä, niluxh bahuiinini dxejc bibalazduxhni.

<sup>57</sup> Dxejcti räjp rexpejn Israel lojni:

—Nicla gajdlu chu tiubitzuu ijz, ¿xho naalu abahuiilu lo toAbraham?

<sup>58</sup> Räjp Jesús lojreni:

—Rniliäpac lojtu, che gajdli guibajn toAbraham, agac nabañä narä.

<sup>59</sup> Dxejcti cua'reni guij te nucuaareni yejc Jesús, per di Jesús niga', biriini neṇ guidoro, gudejdni galäiireni. Sä'tini.

## 9

### *Basijc Jesús te bejn ni natiä'p balojni che gojllini*

<sup>1</sup> Che cadejd Jesús te lajt, bahuiini sobga' te bejn ni che gojlli bejnga agajc natiä'p balojni. <sup>2</sup> Dxejc gunabdiidx rexpejnpacni lojni, räjpreni:

—Mastr, ¿chuni'c bejn dojl, la bejnre o la xcuzejnni, ni'c natiä'p balojni che gojlni, ä?

<sup>3</sup> Räjp Jesús:

—Nicla laani, niclaza xcuzejnni di niujn dojl. Si'c gojlni te xcuent ni sajc bejnre suhuii bejn xho najc xtzuun Dios. <sup>4</sup> Nanab gunä xtzuun nani baxhaḷ narä naj ni najc rdxee, sa'csi cheni guidzujn guxhijn rut gacdi gun dzuun. <sup>5</sup> Laḷni yu'ä lo rebejn guedxliuj, nacä xpianij guedxliuj.

<sup>6</sup> Che gulujx guniini si'c, batiobxhejnni lo yuj, bejnni bajn con xhejnni, gudääbnini con bicueñaani lo rebaloj lotiä'pga. <sup>7</sup> Dxejcti räjpni:

—Huij, huitiib lojlu neṇ nis ni laa Siloé. Laj nisga sälojza “baxhaḷni”.

Dxejcti huijni. Huitiibni lojni. Che gubi'ni, aruhuiini. <sup>8</sup> Dxejcti rexpisijn lotiä'pga, näj renani galoo bahuiireni natiä'p lojni, räjpreni:

—¿La et laadi dee ni rbej te rutie'ni gojn, ä?

<sup>9</sup> Yu'reni räjp:

—Laanini.

Yu'zareni räjp:

—Et laadini, rujnsi lojni si'c.

Laani räjpni:

—Laa naräni.

<sup>10</sup> Räjpreni lojni:

—¿Xho mood arien balojlu?

<sup>11</sup> Dxejcti räjp dade'ga nani gujc lotiä'p:

—Dade' ni laa Jesús bejn bajn, gudääbnini baloä, dxejcti najni: “Huitiib lojlu neṇ te nis ni laa Siloé”, dxejcti che huitibä loä, lagajc dxejc bien loä.

<sup>12</sup> Dxejcti räjpreni lojni:

—¿Con dade'ga naj?

Räjpti bejn̄ga:

—Dina ganä.

*Reben farisee bejn̄ yäl̄gunabdiid̄x lo dad lotiä'p nani biajc lojni*

<sup>13</sup> Huinäreni nani gujc lotiä'pga nez loj refarisee. <sup>14</sup> Luxh sa'csi najcni dxej ni rusilajzreni che bejn̄ Jesús bajn̄ ni gudäábni loj lotiä'pga te biajc balojni, <sup>15</sup> gunabdiid̄xsac refarisee loj dade' nani biajc balojni, xho mood arien̄ balojni naj.

Laani räjpn̄i lojreni:

—Bajn̄ gudäábni loä, dxejc gudibä loä, naj aruhuiä.

<sup>16</sup> Dxejc yu' refarisee ni räjpn̄:

—Di dade' ni bejn̄ dee gac xpejn̄ Dios, sa'csi dini jiu dxej ni rusilajz xpejn̄ Israel.

Yu'zaren̄i räjpn̄:

—¿Xho gac gunni sa' remilagwrga paru najcni bejn̄ dojl̄?

Ni'cni gula' sa'reni, gujcreni tio'p gala'. <sup>17</sup> Dxejcti gunabdiid̄xsacreni lo ni gujc lotiä'p:

—Luj a', ¿xhi rniilu xcuent nani basiajc balojlu?

Dxejc räjpn̄ dade'ga:

—Narä rniä najcni te bejn̄ nani rnii xtid̄x Dios.

<sup>18</sup> Luxh rexpejn̄ Israel naaddireni chalii lajzreni gujcpacni te lotiä'p ni abien̄ balojni, dxejcti gurejdxreni xcuzajn̄ dade' ni gujc lotiä'pga. <sup>19</sup> Dxejcti gunabdiid̄xreni lojreni, räjpn̄i:

—¿Laa xi'ntu dee nani najtu cheni gojllini natiä'p lojni? ¿Xhoxh arien̄ lojni naj?

<sup>20</sup> Badzu' rexcuzajnni diid̄xre, räjpn̄i:

—Nadonnu laa xi'nnuni, luxh che gojlni natiä'p lojni. <sup>21</sup> Niluxh dinu guidon naj xho mood arien̄ lojni, dizanu guidon chu basiajc balojni. Col̄guiniabdiid̄x lojni, anajcni bengool, lagajc laani saj̄c guiniini xhi gusajcni.

<sup>22</sup> Si'c gunii xcuzajnni sa'csi rdxejbreni rexpejn̄ Israel, sa'csi agac bia'nreni diid̄x sibääreni, diruren̄i gusaan jiu' nen̄ guidoo chutis te bejn̄ ni naa Jesús najc Crist nani abiääd. <sup>23</sup> Ni'cni räjpn̄ rexcuzajnni:

—Anajcni bi'n ni ayu' xcäriejn̄i. Lojni col̄guiniabdiid̄x.

<sup>24</sup> Dxejcti gured̄xsacreni nani gujc lotiä'pga, räjpn̄i lojni:

—Gulä'p xpala'n Gueb Dios. Nuure nadonnu bejn̄ dojl̄ najc dade'ga.

<sup>25</sup> Dxejcti badzu' dade'ga diid̄xre, räjpn̄i:

—Dina ganä la najcni bejn̄ dojl̄ o la dini gac. Tejtis nanä: gucä lotiä'p, luxh naj arien̄ balaä.

<sup>26</sup> Stehuält gunabdiid̄xreni, räjpn̄i lojni:

—¿Xho bennäjni luj? ¿Xho bejn̄ni basiajcni balojlu?

<sup>27</sup> Badzu' dade'ga diid̄xre, räjpn̄i:

—Ni aguniä guira'ti lojtu, luxh la'tu ditu jiu xtid̄xä. ¿Xhicuent rlajztu guinisacäni? ¿Xhixh näj la'tu rlajztu gactu xpejn̄pacni, ä?

<sup>28</sup> Dxejc gudil̄näjreni, räjpn̄i:

—Luj najclu xpejn̄ni, per nuure najcnu xpejn̄ toMoisés. <sup>29</sup> Anadonnu guninäj Dios toMoisés, niluxh dade're dinu guidon casiäädni.

<sup>30</sup> Dxejcti räjpn̄ dade' lojreni:

—Dee najc te cos ni guidxeloj bejn̄: la'tu ditu gan casiäädni, j̄niluxh laani basiajcni balaä! <sup>31</sup> Nadoncheenu di Dios cuadiajg xtid̄x reben̄ dojl̄; palga yu' chu rajn̄ Dios, ni rusoobza xtiid̄xni, rucuardiajg Dios xtid̄x sa' bejn̄ga. <sup>32</sup> Che guslojli guedxliuj gajd̄ diajgnu jiejn̄ xcuent te bejn̄ nani rusiajc baloj te bejn̄ lotiä'p nani natiä'p lojni cheni gojllini.

<sup>33</sup> Palga xhet lo Diosdi siääd dade're, xhet sajcdi gunni.

<sup>34</sup> Badzu'reni diid̄xre räjpn̄i lojni:

—Luj, lo dojl̄pac gojllu, ¿xho jiäd̄luilu nuure?

Dxejcti guläärenini neṅ guidoro, barilaagwrenini.

<sup>35</sup> Biejn diajg Jesús guläärenini neṅ guidoro, che bidxälnini, räjpni lojni:

—¿La rililajzlu xtidx ni najc Xi'n Dios ni gujc Niguui, ä?

<sup>36</sup> Badzu'ni diidxre, räjpni:

—¿Chuni'c najcni, Dad, te chalilazä xtiidxni?

<sup>37</sup> Räjp Jesús:

—Abahuiilu lojni, lagajcza laani caninäjlu ṅaj.

<sup>38</sup> Dxejcti räjpni:

—Rililazä Dad.

Dxejcti bazuxhijbni te gojṅnini.

<sup>39</sup> Räjp Jesús:

—Par yälguxhtis biälä lo guedxliujre, te fii renani di lojni jien, niluxh reni rien lojni sajcreni lotiä'p.

<sup>40</sup> Refarisee nani suganäjreni, che biejn diajgreni diidxre, räjpreni:

—¿Xhixh najczanu beṅ lotiä'p, ä?

<sup>41</sup> Räjp Jesús:

—Paru najctu lotiä'p, rut gucuaquijditu xtojltu, ṅaj sa'csi rniitu rien lojtu, sicaquijtu rextojltu.

## 10

### *Jesús najc te baxtorsa'c*

<sup>1</sup> Rniliä, rniliäpac lojtu, nani di jiu' ro' gurajl xte rexiiil, alga richu'ni stelaad, rä'pni cuä' gurajl, ni'c najcni te gubaan. <sup>2</sup> Nani riu' nez ro' gurajl xten rexiiil, laani najc xpaxtoorreni. <sup>3</sup> Che guidzujṅ baxtoor, ruxhal nani rcanäj ro lä', te jiu'ni. Rexiiilga numbeereni xse' baxtoor, dxejctiru laani rbejdxni rexiiilga, tebgaj xiilga yu' lajni, rinäzanireni cadre naga' guixasa'c. <sup>4</sup> Che rii rexiiilga neṅ gurajl, sanä baxtoorgareni, luxh numbee rexiiilga xse'ni, ni'c rsianäjreni baxtoorga. <sup>5</sup> Luxh dipacreni chanä te baxtoor nani direni gumbee, ruxuṅreni lojni sa'csi direni gumbee xse' garenca bejṅ.

<sup>6</sup> Bij Jesús rediidxga lojreni, niluxh direni niacbee xhi säloj ni guniini.

<sup>7</sup> Dxejcti gunisac Jesús diidx lojreni; räjpni:

—Rniliä, rniliäpac lojtu, narä nacä si'c roxlä' xcurajl rexiiil. <sup>8</sup> Guiraa reni abiääd galoo, najcreni ganax gubaan luxh di rexiiil nucuadiajg xse'ni. <sup>9</sup> Narä nacä si'c rolä' xten gurajl, nani jiu' nejzga, silaani loj xtojlni, siu'ni, siriini te guidxälni guixasa'c gauni.

<sup>10</sup> 'Ni najc gubaan riäädtsisni te cuanni, te ju'tni, te guxhiṅzani, niluxh narä siälä te ga'ptu yälṅabaṅsa'c, yälṅabajṅ par tejpas. <sup>11</sup> Narä nacä baxtorsa'c; luxh baxtorsa'c sudeed lagajc xcälṅabajṅni xcuent rexiiilni. <sup>12</sup> Niluxh te mos ni rajxh, di gac baxtoorpac, ni xhet xtendini najc rexiiil, che rhuini siääd te cuyo't, ruxuṅni, li rbälazni rexiiil. Dxejc rniaaz cuyo't rexiiil, rutie'chzani rexiiil. <sup>13</sup> Mosga ruxuṅ sa'csi najcni mostis, luxh dini jiu xhi rsiajg rexiiil.

<sup>14</sup> 'Narä nacä baxtorsa'c; numbeä reni najcpac rexilä; rexilä numbeezareni narä <sup>15</sup> sigajc numbee Xtadä narä, sigajc numbeäza Xtadä; luxh sudedä xcälṅabaṅä xcuent rexiiilga. <sup>16</sup> Rapäza ste cuaa xiil, ni di gac xten gurajlre; näjza laareni nanab chaxiä, te gusobdiajgreni xtidxä, te guidxagsa' guiro'p cuaareni, gacreni tejtis gurajl, tejtisza baxtoor.

<sup>17</sup> 'Narä siguixäza xcälṅabaṅä, guetä, te dxejcru siliässacä xcälṅabaṅä, guibaṅsacä, ni'cni sanälajz Xtadä narä. <sup>18</sup> Rut sajcdi ju't narä, lagajc narä gudedä xcälṅabaṅä, guetä. Rapä yälṅabee te gudedä xcälṅabaṅä, guetä, rapäza yälṅabee te xcasacä xcälṅabaṅä te guibaṅsacä, sa'csi dee najc yälṅabee ni baniidx Xtadä loä.

<sup>19</sup> Xcuent rediidxre gula' sa' rexpejṅ Israel, gujcreni tio'p gala'. <sup>20</sup> Xhidajlreni canii:

—¿Xhicuent riutuni? ¿La ditu gan te beñdxab yu' lastooni? Yejcni rajc. Xhigac rcuadiajgtu xtiidxni.

<sup>21</sup> Dxejc ste cuaareni:

—Dini gac. Di rediidxre gac xtidx te beñdxab. ¿Xhixh sajc rusiajc beñdxab baloj relotiä'p, ä?

### *Rdx'e'ch rebejn loj Jesucrist*

<sup>22</sup> Lagajc neñ redxejga gujc lanij xten xquidoo rexpejn Israel guedx Jerusalén.

<sup>23</sup> Najcni bäi najl. Biu' Jesús guidoro, sasajni nez neñ cordoor ni laa xten Salomón.

<sup>24</sup> Gubig rexpejn Israel guideb gabi Jesús, räjpreni lojni:

—¿Gucli gucua'tzlu loonu chu najclu? Palga luj najclu Crist ni cabääznu jiääd, guiniliini loonu tejpas.

<sup>25</sup> Dxejc badzu' Jesús diidxre, räjpni lojreni:

—Aguniä lojtu si'c, niluxh ditu nililajz. Redzuun nani runä xcuent xcälrnibee Xtradä, huenliisi ruluilojreni chuni'c nacä. <sup>26</sup> La'tu ditu chalilajz sa'csi ditu gac rexilä. <sup>27</sup> Rexilä numbee xse'ä, luxh narä numbeäzareni, riädnajlzareni narä. <sup>28</sup> Narä rudedä yäl'nabajn par tejpas loj rexilä, luxh direni nitloj par tejpas. Rutza laadi nani sajc gudzucajreni ladzñaä. <sup>29</sup> Xtradä baniidxreni loä, laani najcni guroobru, nadipru loj guiraareni. Rut laadi nani sajc gudzucajreni ladzñaä Xtradä. <sup>30</sup> Narä näjza Xtradä najcnu tejsi.

<sup>31</sup> Dxejc gulässac rexpejn Israel guij, te nucuaareni yejc Jesús. <sup>32</sup> Dxejcti räjp Jesús lojreni:

—Xhidajl dzuun xten Xtradä abaluiä lojtu, ¿lo redzuunga, xhi tej dzuun rujn gucuaatu guij yecä?

<sup>33</sup> Dxejcti räjp rexpejn Israel lojni:

—Xcuent redzuun ni rujnlu dinu gucuaa guijlu. Sa'csi guniyajlu, ni'c nucuaanu guij yejclu. Beñ guedxliujlu, luxh najlu najclu tejsi con Dios.

<sup>34</sup> Badzu' Jesús diidxre, räjpni lojreni:

—¿La et loj xleiiditu caj rediidxre: “Narä rniä, la'tu najc redios”? <sup>35</sup> Nancheenu digacdi guidxaa xquijtz Dios. Palga gulalajni redios rebejn nani bejn yälguxhtis loj rexpejn Israel, dxejc <sup>36</sup> naj ¿xhicuent guniitu loä: “Caniyajlu Dios”, sa'csi guniä lojtu narä nacä Xi'n Dios? Ni gule Dios narä, baxhalni narä lo guedxliujre. <sup>37</sup> Palga dina gunä redzuun xten Xtradä, na'c chalilajztu rextidxä. <sup>38</sup> Luxh palga runnäni, mascä ditu chalilajz xtidxä, colchalilajz ni ruluii reyälmilagwr nani runä, te gacheetu par tejpas, Xtradä yunäj narä, narä yunääza laani.

<sup>39</sup> Che rlanjreni niniaazrenini stehuält, laani biriini ladzñaareni.

<sup>40</sup> Dxejcti sääni, gubisacni nez stelaad gueu Jordán, nejzga huijia'nni, cadre gusloj batiobnis Juan. <sup>41</sup> Xhidajl bejn bidzujn lojni ro'c, räjpreni:

—Di Juan niujn nicla tej yälmilagwr luxh guiraa rediidx ni gunii Juan xcuent dade're najc didxliipac.

<sup>42</sup> Xhidalduxhreni huililajz xtiidxni ro'c.

## 11

### *Gujt Larz*

<sup>1</sup> Yu' te dade' ni cayacxhuu ni laa Larz. Rbäjzni guedx Betania, lajdxza rebisiajnni Marii näjza Mart. <sup>2</sup> Mariire, bisiajn Larz, najc nane' ni basäl setnejxh ni' Jesús, batiaazani ni'ni con xquidxejcn. <sup>3</sup> Ni'cni baxhal guiro'p bäljre diidx loj Jesús, räjpreni lojni:

—Dad, xamiigwlu nani sanälajzlu cayacxhuu.

<sup>4</sup> Che biejn diajg Jesús rediidxga, räjpni:

—Di yälracxhuure ju'tni, sa'csi yälracxhuure najc te guluilojni xcälrnibee Dios. Te guluilojza yälracxhuure xcälrnibee Xi'n Dios.

<sup>5</sup> Sanälajz Jesús Mart, bäljni, näjza Larz, <sup>6</sup> che räjpreni lojni cayacxhuu Larz, bia'nni stio'p dxej cadro yu'ni. <sup>7</sup> Dxejcti räjpni loj rexpejn<sub>pacni</sub>:

—Colcho', chonnu stehuält región Judea.

<sup>8</sup> Räjp rexpejn<sub>ni</sub> lojni:

—Mastr, gajd gac xchej rlajz rexpejn Israel ni rnibee nucuaa guij yejclu te nugu'treni luj, luxh naj rlajzlu chäsaclu ro'c.

<sup>9</sup> Dxejcti räjp Jesús lojreni:

—¿La xhet tzubitio'p orđi yu' lo tebdxej, ä? Palga sa bejn rdxee, dini jiajb sa'csi ruhuiini lo bianij nani yu' lo guedxliujre. <sup>10</sup> Palga chasajni guxhij<sub>n</sub>, siliaro'ni, sa'csi xheti bianijga.

<sup>11</sup> Dxejcti räjp Jesús lojreni:

—Nagayejs xamigwä Larz. Cha'a te chacuänäni.

<sup>12</sup> Dxejc räjp rexpejn<sub>pacni</sub> lojni:

—Dad, palga agudiesni, pet siajcnj.

<sup>13</sup> Jesús canii lojreni agujt Larz, niluxh rexpejn<sub>pacni</sub> bejn xhigab caniini xcuent yälrejs xten bacaltis.

<sup>14</sup> Ni'cni guniliipac Jesús räjpni lojreni:

—Agujt Larz. <sup>15</sup> Rbalazä sa'csi rutinu ro'c, te chalilajztu xtidxä. Colcho' te chohuiinuni.

<sup>16</sup> Dxejcti Tomás ni rniizareni “cua'ch”, räjpni loj resa'ni:

—Colcho' te guetnāzanuni.

### *Jesús najc yälrbansac lo yälgujt*

<sup>17</sup> Che bidzuj<sub>n</sub> Jesús lo guejdxga, agujc tajp dxej biga'tz Larz. <sup>18</sup> Guedx Betania tre' gajxh lo guedx Jerusalén, si'cti tio'p garol kilómetro. <sup>19</sup> Xhidajl rexpejn Israel abidzuj<sub>n</sub>, siädhuiireni Mart, näjza Marii, te di gac-huin lajzreni sa'csi gujt bisiajnreni. <sup>20</sup> Che gucbee Mart abidzuj<sub>n</sub> Jesús, biriini huichaglojnini; niluxh Marii bia'n rolijzreni. <sup>21</sup> Dxejcti räjp Mart lo Jesús:

—Dad, paru suga'lu ree, di bisianä niejt. <sup>22</sup> Narä nanä suniidx Dios guiraa nani guiniablu lojni.

<sup>23</sup> Jesús räjpni lojni:

—Sibansac bisiajnlu.

<sup>24</sup> Räjp Mart lojni:

—Acananä sibansacni che guidzuj<sub>n</sub> dxej ni guibansac bejn loj rebengut dxej lult che gun Dios yälguxhtis.

<sup>25</sup> Dxejc räjp Jesús lojni:

—Narä nacä yälruspansac bejn loj rebengut, näjza yäl<sub>n</sub>abaj<sub>n</sub> par tejpas. Nani rililajz rextidxä, masä agujtni, sibansacni. <sup>26</sup> Chutis tej bejn ni nabaj<sub>n</sub> ni chalilajz xtidxä, dini nitloj par tejpas, ¿riliiga lajzluni, ä?

<sup>27</sup> Dxejcti räjp Mart lojni:

—Rililazäni, Dad. Ahuililazä luj najclu Crist, Xi'n Dios nani bia'n diidx guxha<sub>l</sub> Dios lo guedxliujre.

### *Biin Jesús cuä' xpaä Larz*

<sup>28</sup> Che guluux gunii Mart, huitejdxni bäljni Marii, xhiga'tz räjpni lojni:

—Abidzuj<sub>n</sub> Mastr. Cabejdxzani luj.

<sup>29</sup> Che biejn diajg Marii rediidxga, huisugajcni, sahuuini Jesús. <sup>30</sup> Gajd Jesús jiu' guejdxga, la<sub>t</sub>is suga'ni cadro bidxaagni Mart. <sup>31</sup> Rexpejn Israel nani biäd<sub>c</sub>uenäj Marii, ni cahuii didi gac-huin lajzni, che bahuiireni huisu Marii, sääni, näjza laareni huirinajlreni Marii, naareni pet lo baa sayoonni.

<sup>32</sup> Ni'cni che bidzuj<sub>n</sub> Marii cadro suga' Jesús, bazuxhijbni lojni, räjpni:

—Dad, paru suga'lu ree, di bisianä niejt.



<sup>33</sup> Che bahuii Jesús cayoon Marii, nájza rexpejn Israel ni siädnajl Marii, guc-huin lastooni, biääd te rsliajz lastooni. <sup>34</sup> Dxejcti räjpni lojreni:

—¿Caro bacua'tztuni?

Räjpreni lojni:

—Dad, gudaa ree te filu.

<sup>35</sup> Dxejcti biin Jesús. <sup>36</sup> Ni'cni cayäjp rexpejn Israel:

—Colhuii, lacti sanälajznini.

<sup>37</sup> Yu'zareni räjp:

—Dade're basiajc beñ lotiä'p. ¿Xha di niajcdi nusiajcni bejnre te di niejtñi, ä?

### *Gubansac Larz*

<sup>38</sup> Guc-huinduxh lastoo Jesús, gubigni lo baa. Baaga najc si'c te biliää, suga' te guiro ni rusäuureni ro'ni. <sup>39</sup> Dxejcti räjp Jesús lojreni:

—Colgudzucaj guijga.

Mart, ni najc bisiajn bengutga, räjpni lojni:

—Dad, pet acaladxuudxni, sa'csi agujc tajp dxej gujtni.

<sup>40</sup> Dxejc räjp Jesús lojni:

—¿Et rniä lojlu, palga rililajztu, suhuiilu xcälrnibee Dios, ä?

<sup>41</sup> Dxejcti badzucajreni guijga. Guläs Jesús lojni xhaguibaa, räjpni loj Xtadni:

—Xtadä, runidxä xquixtios lojlu sa'csi abiejn diajglu xtidxä. <sup>42</sup> Narä nanä guliica rucuardiajglu xtidxä, luxh naj caniäni xcuent rebejn ni tre' ree, te chalilajzreni luj baxhallu narä.

<sup>43</sup> Che gulujx guniini rediidxga, guredxa'ni räjpni:

—¡Larz! ¡Gudaa ree!

<sup>44</sup> Dxejc birii bengutga nen biliää. Naliib reñaani, reni'ni, niäuu te baii lojni. Dxejcti räjp Jesús lojreni:

—Colguslaani, colgusaan jiini.

### *Bachaagreni diidx xho guiniaazreni Jesús*

(Mt. 26:1-5; Mr. 14:1-2; Lc. 22:1-2)

<sup>45</sup> Xcuent dzunrore huililajz rextidx Jesús xhidajl rexpejn Israel nani huinajl Marii, che bahuiireni xhi bejn Jesús. <sup>46</sup> Yu' reni huihuii loj rexpejn Israel ni laa farisee, bijreni diidx xhi bejn Jesús. <sup>47</sup> Dxejcti refariseega, nájza rebixhojz ni rnibee, bire'reni bidxagsa'reni lo Junt Suprem, räjpzareni:

—¿Xho jiennu? Niguiire cayujn xhidajl milagwr. <sup>48</sup> Palga guisaannuni si'c, guiralii bejn sililajz xtiidxni, sinajlrenini. Dxejcti jiääd reben roman ni rnibee, gudzucajreni xcälrnibeenu, sudzujlzareni lajdxnu.

<sup>49</sup> Dxejc Caifás, bixhojzro ni riäjñ gunibeeni lo rebixhojz ijzga, räjpni lojreni:

—La'tu xhetliidi najnditu. <sup>50</sup> Ditu gun xhigab laaca guet tejtis bejn xcuent guideb guejdx, didi nitloj guideb lajdxnu.

<sup>51</sup> Niluxh Caifás dini ninii diidxre xcuentcani. Sa'csi ijzga rnibeeni lo rebixhojz, lagajc Dios badeed diidxga guniini. Ni'c gunixgaani guet Jesús xcuent nación xten rexpejn Israel. <sup>52</sup> Luxh xhet ganaxtis xcuent naciónga, nájza te guire' guiraa rexpejn Dios nani nare'ch loj guideb guedxliujre. <sup>53</sup> Ni'cni dxejliga bachaag rebejnnga diidx te don xho gunreni gugu'treni Jesús.

<sup>54</sup> Ni'cni diru Jesús nisiaj nez loj rexpejn Israel. Biriini región Judea, huijni te lajt gajxh nez lo reyubijdz, lo te guejdx ni laa Efraín. Ro'c biannäjñi rexpejn pacni.

<sup>55</sup> Guxii dxej cayäädx guidzujñ lanij ni laa pascw ni rujñ rexpejn Israel. Xhidalduxh reben guejdx huij guedx Jerusalén te gusiareni lastooreni, te gac gunreni lanij xten pascw.

<sup>56</sup> Cansajreni caguilreni Jesús; che yu'zareni nen guidoro, canabdiidx lo sa'reni, räjpreni:

—¿Xhi najtu? ¿La siäädni lanijre o laa dini jiääd, ä?

<sup>57</sup> Refarisee näjza rebixhojz ni rnibee loj rebixhojz, agunibeerene palga yu' chu najn caro yu' Jesús, chaye'tzni lojreni te guiniaazrenini.

## 12

### *Gudäab te gunaa se't ni' Jesús* (Mt. 26:6-13; Mr. 14:3-9)

<sup>1</sup> Che riäädx xho'p dxej gal lanij pascw, huij Jesús guedx Betania cadre rbäjz Larz nani baspañsac Jesús loj rebeñgut. <sup>2</sup> Ro'c bejnreni te xchej te gau Jesús. Mart bateed xchejga, näjza Larz sobganäj Jesús näjza rexpejn pacni lo mex. <sup>3</sup> Dxejcti bidzunnäj Marii si'cti garol litr se't ni rlianexhduxh si'c nard. Sacduxh se'tga. Dxejcti gudäabni se'tga lo reni' Jesús, baspijdzni ni'ni con xquidxejcti. Guideb nen yu'ga gulanejxh se'tga. <sup>4</sup> Dxejcti räjp Judas Iscariot, xi'n Simón, ni najc te rexpejn pac Jesús, lagajc ni abejn xhigab guto'ni Jesús, räjpni:

<sup>5</sup> —¿Xhicuent di se'tre nido' choñ gayuu denar te nidis meelga loj rebeñproob? (Choñ gayuuga najc si'cti ni xca' te niguii paru gunni dzuun tzubiteb bäii.)

<sup>6</sup> Guniini si'c, xhet sa'csi riadini reproob, per sa'csi laani najcni te gubaan, luxh laani ca'ni bols cadre rucnee meel, luxh rbääni meel lojga te rca'nini. <sup>7</sup> Ni'cni räjp Jesús lojni: —Na'c gudxojn luni; subasälxgaanini, che gajd guidzujñ dxej nani guiga'tzä. <sup>8</sup> Dxej-yääl yu' rebeñproob lojtu, luxh narä dina chuä lojtu xchej.

### *Laareni rlajzreni nugu'tzareni Larz*

<sup>9</sup> Dxejc che gucbee xhidajl xpejn Israel yu' Jesús rolijz Larz ni gubañsac lo rebeñgut, bidzujñreni, xhet xcuentis Jesús. Biäädreni te fiizareni loj Larz nani baspañsacni lo rebeñgut. <sup>10</sup> Dxejcti rebixhojz ni rnibee bachaagzareni diidx te ju'tzareni Larz, <sup>11</sup> sa'csi xhidajl rexpejn Israel salilajzreni xtidx Jesús sa'csi bahuiireni gubañsac Larz.

### *Biu' Jesús guedx Jerusalén* (Mt. 21:1-11; Mr. 11:1-11; Lc. 19:28-40)

<sup>12</sup> Che bara yääl, rebejn xhidajl ni bidzujñ lanij biejn diajgreni asiäddzujñ Jesús guedx Jerusalén, <sup>13</sup> dxejcti batiu'reni naa reyagzijn, biriireni nen guejdx, sachaglojrenini. Guredxa'reni, räjpreni lo Jesús:

—¡Colguiliä'p xpala'n Dios! ¡Chicbaa nani siääd xcuent Dad nani najc rei lo rexpejn Israel!

<sup>14</sup> Bidxäl Jesús te burbäz, gubijbnini, si'cni caj lo reguijtz:

<sup>15</sup> Na'c guidxejbtu, bejn ni rbäjz nen guedx Sión.

¡Colhuii! Reii xtentu asiääd, bijbni dejtz te burbäz.

<sup>16</sup> Di rexpejn pacni niacbee recosga che gujcreni, niluxh che gubañsacni loj rebeñgut, dxejc banaj lajzreni recos nani caj lo guijsz xcuentni, näjza guiraa recos ni bejn rebejn lo Jesús te guzojb rediidxga.

<sup>17</sup> Rebeñ xhidajl ni suganäjni che gurejdxni Larz te biriini nen baa che baspañsacnini lo rebeñgut, bijzareni diidx xcuent guiraa ni bahuiireni. <sup>18</sup> Ni'cni biädchagloj rebeñ xhidajlgani, sa'csi abiejn diajgreni laani bejnmi milagwrre. <sup>19</sup> Ni'cni räjp refarisee lo sa'reni:

—Aruhuiitu xhet sajcdi jieñnu. ¡Colhuii! Empac sanajl guideb guedxliujni.

### *Riädtil regriegw Jesús*

<sup>20</sup> Yu' gaii beñgriegw nadxaag lo rebejn ni biädted lanij guedx Jerusalén. <sup>21</sup> Rebejnre bidzujñ loj Felipe nani siääd guedx Betsaida xten Galilee, gusloj gunabreni lojni, räjpreni: —Dad, rlaaznu guihuiinu lo Jesús.

<sup>22</sup> Biääd Felipe, räjpni loj Andrés, dxejcti guiro'preni huiye'tzreni lo Jesús. <sup>23</sup> Dxejcti räjp Jesús lojreni:

—Abidzujn or ni chä'p xpala'n Xi'n Dios ni gujc Niguii. <sup>24</sup> Rniliäpac lojtu, palga di te xob binij jiajb lo yuj, nen xhurc cadro cueni, te rianxtebni, guetni, dini guiliejn. Luxh palga guetni, siliejnni, rajcza te nisro lojni, rajc xhidajl xob binij. <sup>25</sup> Nani sanälajz xcäl'nabajnni, sunijtnini, luxh nani rbälaz xcäl'nabajnni lo guedxliujre, sica'ni yäl'nabajn par tejpas. <sup>26</sup> Palga yu' chu tej ni rlajz chu loä, sujiäd'najlni xnezyuä, te cadro yu'ä, ro'cza cuäz ni ru' loä. Palga yu' chu gun xtzunä, siliä'pza Xtadä xpala'nni.

### *Rnixgaa Jesús guetni*

<sup>27</sup> Räjzani:

—Naj cayac-huin lastoä. ¿Xhichani'cza gäpä lo Xtadä? ¿La siniä: Dad, gucnäj narä te di tedä or ni siääd? Ni te tedäpac orga biälä lo guedxliujre. <sup>28</sup> Xtadä, bejn si'cni riäjł gac te guiliä'p bejn xpala'nlu.

Dxejcti xhaguibaali biejn te xse' te ni räjp:

—Agulä'pä xpala'nä, siliä'pä xpala'nä stehuält.

<sup>29</sup> Ni'cni lo rebejn ni tre' ro'c, ni biejn diajgreni se'ga, yu' reni räjp:

—Lascanu gunii te guzii.

Guyu'zarenı räjp:

—Te xangl Dios ni gunii lojni.

<sup>30</sup> Dxejc räjp Jesús lojreni:

—Et xcuentädi gunii xse' ni gunii, xcuenttis la'tu guniini. <sup>31</sup> Naj abiääd xcälguxhtis Dios lo guedxliuj. Naj sibicaj xcäl'nibee nani rnibee lo guedxliujre. <sup>32</sup> Naj, che guiliäsreni narä jiaa lo guedxliuj, te galä ro'c, sutie'ä guiraa bejn loä.

<sup>33</sup> Rediidxre gunii Jesús te canixgaani xho guetni. <sup>34</sup> Räjz rebejn lojni:

—Nuure biejn diajgnu bilreni lo leii, Crist ni jääd sibajñ par tejpas. ¿Xho mood rniilu, nanab chäs Xi'n Dios ni gujc Niguii jiaa lo guedxliuj? ¿Chuxhni'c najc Xi'n Dios ni gujc Niguii ni ruzä'tlu?

<sup>35</sup> Dxejcti räjp Jesús lojreni:

—Stera'tsi yu' bianij lojtu. Col'saj lał ni rajptu bianijga, te di guiniaaz yäl'xcäjäy la'tu, sa'csi ni rsiaj loj nacäjäy, dini gan caro chääni. <sup>36</sup> Lał ni rajptu bianij, col'chalilajz bianijga te gactu rexi'n bianij.

Gunii Jesús rediidxga lojreni, dxejcti biunejzni ro'c, bicuatzlojni.

### *Xhicuent di rexpejn Israel nililajz xtidx Jesús*

<sup>37</sup> Xhidajl remilagwr bejn Jesús nez loj rexpejn Israel, niluxh direni nililajz xtiidxni, gulälazreni nani baxhał Dios lojreni. <sup>38</sup> Ni'cni guzobj diidx nani gunii Isaías, ni gunii xtidx Dios galoro, räjpni:

Dad, ¿chuni'c huililajz xtiidxlu?

¿Chuloj baluiilu xcäl'nibeduxhlu, ä?

<sup>39</sup> Ni'cni di niajcdi nililajzreni, sa'csi guniiza Isaías, räjpni:

<sup>40</sup> Abascäjyni lojreni,

abennajdni lastooreni,

te di rebalojreni fii,

te di lastooreni gacbee,

te di gusiejch lajzreni,

te di gusiacäreni.

<sup>41</sup> Rediidxre gunii Isaías, sa'csi bahuiini xcäl'rdimbicha' Jesús xhaguibaa, dxejc guniini xcuentni.

<sup>42</sup> Dxejcti gaii rebejn ni rnibee huililajz xtiidxni che räjpni abaxhał Diosni, niluxh bidxiejbreni reben farisee, ni'c direni nicäjp ahuililajzreni, te di gurilaagwreni laareni, gudxojnreni jiu'reni nen guidoo. <sup>43</sup> Sa'csi rdxaglaizrurenı guiliä'p rebejn xpala'nreni luxh guxiiru rlajzreni guiliä'p Dios xpala'nreni.

*Xtidx Jesús sigubee rebejn*

<sup>44</sup> Dxejcti gudidxa' Jesús:

—Nani chalilajz xtidxä, et ganaxdi ni caniä rililajzni, näjza xtidx Xtradä nani baxhal narä rililajzni. <sup>45</sup> Nani ruhuii loä, ruhuiizani loj ni baxhal narä. <sup>46</sup> Narä biälä si'c bajl lo guedxliujre, te guiraa renani chalilajz xtidxä, dirureni chu lo yälkäjy. <sup>47</sup> Nani riendiajg xtidxä, luxh dini gusoob rediidxga, dina gunä yälguxhtis lojni, sa'csi dina niälä te gunä yälguxhtis reben guedxliuj, biälä te guslää reben guedxliuj lo dojl. <sup>48</sup> Nani rbälaz narä, ni di gusoob xtidxä, yu' chu gun yälguxhtis xtojlni; lagajc rediidx nani guniä gun yälguxhtis xtojlni che gal lult dxej. <sup>49</sup> Sa'csi narä dina niädniä lagajc xcuentä, lagajc Dad ni baxhal narä, lagajc laani gunibeeni xhini'c guiniä, xhini'c guluiä. <sup>50</sup> Luxh nancheä gunibeeni chu yäl nabajñ par tejpas. Ni'cni rediidx nani rniä, rniäreni si'cpacni gunii Xtradäni loä.

**13***Jesús gudiibni ni' rexpejn pacni*

<sup>1</sup> Che gajd gal dxe lanij ni laa pascw, najn Jesús asiäddzungajx xorni, or ni jiunejzni lo guedxliujre te chääni lo Xtradni. Luxh sa'csi agajc sanälajzni rexpejn pacni nani yu' lo guedxliujre, sinälajzanireni par tejpas.

<sup>2</sup> Ni'cni laj ni cayauxchejreni biu' ben dxab nen lastoo Judas Iscariote, xi'n Simón, te guto'ni Jesús. <sup>3</sup> Sa'csi agucbee Jesús abateed Xtradni guira'ti ladzñaani, gucbeezani loj Dios biriini, lo Dios guibi'zani, <sup>4</sup> ni'c huisu Jesús lo xchejga, gulääni xhablojiaani, gudojbni te tuäi, batejbnini xque'ni. <sup>5</sup> Dxejcti cua'ni nis nen te chaa, guslojni gudiibni ni' rexpejn pacni, baspijdzni ni'reni con tuäiiga. <sup>6</sup> Che bidzujñni loj Simón Pedr, räjp Pedr lojni:

—Dad, ¿xhixh luj siguiiblu ni'ä?

<sup>7</sup> Dxejc räjp Jesús lojni:

—Nani cayunä dilu gacbeeni naj, guixee-huijdx sacbeeluni.

<sup>8</sup> Räjp Pedr lojni:

—¡Dipaclu quiib ni'ä!

Räjp Jesús lojni:

—Palga dina quibä ni'lu, digacdiru gaclu xpenä.

<sup>9</sup> Räjp Pedr lojni:

—Dad, na'c quiiblu ni'ätis näjza naä näjza yecä gudiib.

<sup>10</sup> Räjp Jesús lojni:

—Nani agojz di guiquiin gzsacni; ni'tisni guidiib, sa'csi naya guidebni; nayazatu, per xhet guiraaditu naya.

<sup>11</sup> Sa'csi anajnni chu guto'ni, ni'cni guniini: “Xhet guiraaditu naya.”

<sup>12</sup> Ni'cni che gulujx gudiibni ni' rexpejn ni, gotsacni xhajbni, guresacni lo mex, räjpni:

—¿La najntu xhini'c benä lojtu, ä? <sup>13</sup> La'tu rniitu narä, Mastr näjza Dad. Luxh laaca rniitu sa'csi nacäni. <sup>14</sup> Mbaj, palga narä ni nacä Dad, nacäza Mastr, gudibä ni'tu, la'tu sigajcza riäjñ quiibtu ni' resa'tu. <sup>15</sup> Sa'csi abaluiä lojtu xho gacni, te chanuu guntu sigajc ni benä lojtu. <sup>16</sup> Rniliä, rniliäpac lojtu, di te mos gac benroru lo xlamni; diza te ni rij xmandaad bejn gac benroru loj nani baxhalni. <sup>17</sup> Palga najntu recosre, chicbaazatu palga si'c guntu.

<sup>18</sup> Dina guiniä diidxre lo guiraatu. Numbeä reni aguleä, niluxh nanab soob xtidx Dios ni caj lo rexquijztni. Scree najc rediidxga: “Nani rajw xcuxtilä, ni'c agubiréni, agulälazni narä.” <sup>19</sup> Ni'cni agunixgaäni, che gajdni gac, te che gacni chalilajztni nacä chu rniä nacä. <sup>20</sup> Rniliä, rniliäpac lojtu, nani riu xtidx nani ruxhalä, riuzani xtidxä; luxh nani riu xtidxä, riuzani xtidx nani baxhal narä.

*Räjp Jesús chuni'c guto'ni**(Mt. 26:20-25; Mr. 14:17-21; Lc. 22:21-23)*

<sup>21</sup> Che gulujx gunii Jesús rediidxre, guc-huinduxh lastooni, dxejc guniliini:

—Rniliä, rniliäpac lojtu, tejtuto suto' narä.

<sup>22</sup> Dxejc gusloj cadxeloj rexpejnni lo sa'reni, di jien chuchani'c cagusä'tni. <sup>23</sup> Tej rexpejnni nani sanälajzruni sobga' cuä'ni. <sup>24</sup> Dxejcti bejn Simón Pedr seen lojni te guiniabdiidxni loj Jesús chu xcuent caniini. <sup>25</sup> Dxejc nani sobga' cuä'ni, gubigruni loj Jesús, gunabdiidxni lojni, räjpni:

—Dad, ¿chuni'c rusä'tlu?

<sup>26</sup> Dxejcti räjp Jesús lojni:

—Guhuadxä te la' yätxtiil. Loj nani gudedäni, ni'c najcni.

Dxejcti bahuajdxni tla' yätxtiil, badeednini loj Judas Iscariote, xi'n Simón.

<sup>27</sup> Che gulujx gudajw Judas yätxtiilga, biu' beñdxab lastooni. Dxejcti räjp Jesús lojni:

—Ni rlajzlu gunlu, bejngani.

<sup>28</sup> Nicla tej reni sobga' lo mex direni niacbee xhicuent räjpni lojni si'c. <sup>29</sup> Sa'csi Judas ca' bols meel, gaiireni bejn xhigab pet guniini si'c sa'csi yu' xhi chasiini par lanij, o pet yu' xhi gudeedni loj reben ni xhet rajpdi. <sup>30</sup> Che gudajw Judas yätxtiilga, birigajcni, luxh abiu' guxhijn.

*Didxcoob ni gunibee Jesús*

<sup>31</sup> Dxejcti che abirii Judas lojreni, räjp Jesús lojreni:

—Naj sienloj xcälrnibee Xi'n Dios ni gujc Niguui, luxh lojni sienloj xcälrnibee Dios.

<sup>32</sup> Palga suluiloj Xi'n Dios ni gujc Niguui xcälrnibee Dios, dxejc suluilojza Dios xcälrnibee Xi'n Dios ni gujc Niguui, luxh siojb gunnini. <sup>33</sup> Rexi'nä nani sanälazä, diru gac xchej chunää la'tu. La'tu siguiiltu narä, per si'cni räpä lo rexpejn Israel si'cza rniä lojtu naj: Di gacdi jiäädte cadro cha'a. <sup>34</sup> Te didxcoob rnibeä guntu: Colchanälajz sa'tu. Sigajc ni sanälazä la'tu, sigajcza colchanälajz sa'tu. <sup>35</sup> Palga rinälajz sa'tu, si'c sacbee guiraa benguedxliuj najcpectu rexpenä.

*Xhini'c gun Pedr loj Jesús**(Mt. 26:31-35; Mr. 14:27-31; Lc. 22:31-34)*

<sup>36</sup> Dxejcti räjp Simón Pedr loj Jesús:

—Dad, ¿caro chäälu?

Räjp Jesús lojni:

—Cadro cha'ä digacdi jiädnajllu narä naj; niluxh sidzujn dxej jiäädte ro'c.

<sup>37</sup> Räjp Pedr lojni:

—Dad, ¿xhicuent digacdi jiälä naj? Palga rquiin guetä xcuentlu, suguetä.

<sup>38</sup> Räjp Jesús lojni:

—¿La guliilu guetlu xcuentä, ä? Rniliäpac lojlu, nicla gajd guidgaii cuedxa' chon huält, säjblu dilu gumbee najrä.

## 14

*Jesús najc nezyuj lo Dad*

<sup>1</sup> Dxejcti räjp Jesucrist lojreni:

—Na'c chutu yärsia'. Rililajzto xtidx Dios, colchalilajzza xtidxä. <sup>2</sup> Yu' xhidalduxh yu' cadro rbäjz Xtadä. Palga xhet si'cni najcni, dizana niniä lojtu si'c. Sia'ä chasucheä reyu' par la'tu. <sup>3</sup> Luxh palga chasucheä cadro cuääzto, che guluxäni, sibisacä, te chanäätu ro'c, te cadro yu'ä, ro'cza chutu. <sup>4</sup> La'tu anajntu caro cha'ä, anajnzatu nezyuj ni chäätu.

<sup>5</sup> Dxejcti räjp Tomás loj Jesús:

—Dad, dinu guidon caro chäälu, ¿xho guidonnu nezyujga, ä?

<sup>6</sup> Räjp Jesús lojni:



—Narä nacä nezyuj. Narä nacä didxliipac, nacäza yäl'nabajñ. Por narätis sajc chää bejn cadre rbäjz Xtadä. <sup>7</sup> Palga la'tu niembeetu chuni'c nacä, niembeezatu Xtadä. Luxh najli abiembeepactuni sa'csi acahuiitu lojni.

<sup>8</sup> Räjp Felipe loj Jesús:

—Dad, basaan guihuiinu loj Xtadlu; ni'ctis rlaaznu.

<sup>9</sup> Dxejcti räjp Jesús lojni:

—Felipe, ¿la gajdlu gumbee narä, luxh lacti xchej yu'ä lojtu, ä? Nani ruhuii loä, abahuiini lo Xtadä. ¿Xhicient rniablu fiilu lo Xtadä, ä? <sup>10</sup> ¿La dilu chalilajz najrä yunää Xtadä, luxh Xtadä yunäjzani narä, ä? Rediidx nani rniä dina guiniäni lagajc xcuentä, sa'csi Xtadä ni yunäj narä laani rujn lagajc rextzuunni. <sup>11</sup> Colchalilajz xtidxä, che rniä narä yunää Xtadä, luxh Xtadä yunäj narä. O palga ditu chalilajzni sa'csi najcni xtidxä, colchalilajzni sa'csi abahuiitu rextzuun ni runä. <sup>12</sup> Rniliäpac lojtu, nani chalilajz xtidxä, sajc gunni redzuun nani runä, luxh sujnni dzunroru sa'csi sia'a cadre yu' Xtadä. <sup>13</sup> Luxh guiraa ni guiniablu lo Xtadä xcuentä, narä sunäni, te guluiloä xcäl'rnibee Xtadä. <sup>14</sup> Narä sunä xhitis ni guiniabtu por laä.

### *Ria'n diidx guxhal Jesús Sprit Dxañ*

<sup>15</sup> Räjpzani:

—Palga sanälajztu narä, susoobtu xtidxä. <sup>16</sup> Dxejc siniabä lo Xtadä, te guniidxni stee nani gacnäjtü te chunäjni la'tu par tejpas. <sup>17</sup> Nalajznu, Xpriet Dxañ xten Dios, ni rnili. Di gacdi xca' reben guedxliujni, sa'csi direni fii lojni, niclaza gumbeerenini. Niluxh la'tu numbeetuni sa'csi yunäjni la'tu, yu'ni neñ lastootu. <sup>18</sup> Dina gusanbisiäbä la'tu; sibisacä jiadhuiä la'tu. <sup>19</sup> Diru gac xchej, dxejc diru reben guedxliuj fii loä, niluxh la'tu suhuiitu loä. Sa'csi nabañä, la'tu nabajnzatu. <sup>20</sup> Neñ redxejga, dxejc sacbeetu yunää Xtadä, la'tu yunäjtu narä, luxh narä yunääza la'tu. <sup>21</sup> Nani numbee Xtadä, nani rusoobza xtidxä, ni'c ruluini sanälajzpacni narä. Luxh Xtadä sinälajzza nani sanälajz narä, näjza narä chanälazä bejnga, luxh suluiloä lagajc narä lojreni.

<sup>22</sup> Dxejcti räjp Judas (xhet Iscariótedi) lojni:

—Dad, ¿xhini'c gunlu te guluilojlu lojtisnu, xhet näjdi loj reben guedxliujdi, ä?

<sup>23</sup> Dxejcti räjp Jesús lojni:

—Nani sanälajz narä, ni'c riu xtidxä. Ni'c chanälajz Xtadä, dxejc jiopläznäänuni guiro'pnu Xtadä. <sup>24</sup> Nani di chanälajz narä, dini jiu xtidxä. Luxh rediidx nani biejn diajgtu, et xtidxadini; xtidx Xtadäni ni baxhal narä.

<sup>25</sup> 'Caniä guiraa rediidxre lojtu lalni yu'ä lojtu, <sup>26</sup> per Sprit Dxañ xten Dios nani jiadycnäjtü, nani guxhal Xtadä xcuentä, laani suluiini lojtu guira'ti, näjza susnajni lajztu guiraa rediidx nani aguniä lojtu. <sup>27</sup> Yäl'rbecdxilajz rusa'nä lojtu, xcäl'rbecdxilazä runidxä lojtu, et si'cdini runiidx guedxliujdi najc nani runidxä lojtu. Na'c chutu yärsia', na'cza guidxejbtu. <sup>28</sup> Abiejn diajgtu ni guniä lojtu: Sia'ä luxh siälsacä lojtu. Paru ninälajzpacku narä, sibalajztu xcuentä che guniä sia'ä lo Xtadä, sa'csi Xtadä najc beñroru loä. <sup>29</sup> Scree agunixgaäni lojtu, te che soobni, dxejcru chalilajztu xtidxä.

<sup>30</sup> 'Diruna guiniduxhä lojtu, sa'csi asiääd nani rnibee loj guedxliujre, luxh digacdi guinibeeni narä; <sup>31</sup> riäjñ gac recosre te gacbee reben guedxliuj sanälazä Xtadä, rusobäza xtidx Xtadä, runä nani gunibeeni. Colchastie, colcho' jiunejznu ree.

## 15

### *Jesús najc si'c te yaguub*

<sup>1</sup> Rämpzani:

—Narä nacä si'c te yaguub. Xtadä najc si'c nani rusuj yajgga. <sup>2</sup> Rebejn najc si'c reñaa yajgga. Guiraa reñaa yajgga nani xhet cajdi lojni rutiuugnini. Luxh guiraa reñaa yajgga ni caj ninejxh lojni, rusianini te xcajru ninejxh lojreni. <sup>3</sup> La'tu anajctü beñnaya xcuent

rediidx nani aguniä lojtu. <sup>4</sup> Colguibannäj narä, sigajc ni nabannää la'tu. Digacdi xcaj ninejxh lo te naa yajg palga agurujgni lo yaguub. Sigajcza la'tu, palga guibicajtu loä, di gacdi guntu xtzunä.

<sup>5</sup> 'Narä nacä si'c yaguub. La'tu najctu si'c reṇaa yajgga. Nani riannäj narä, naräza riannääni, ni'c sajc runduxhni xtzunä, sa'csi che guibicajni loä, xhet sajcdi gunni. <sup>6</sup> Nani di chupac loä, sibicajni si'c reṇaa yajg nani rdin sa'csi xhetru rcajdi lojni, dxejcti rbijdzni, rusäl bejnreni lo däj te checni.

<sup>7</sup> Palga chupactu loä, palgaza chupac xtidxä lastootu, colṇab nani rlanjztistu, luxh narä sunidxäpacni. <sup>8</sup> Che gunpactu xtzun Dios, dxejc fii bejn najcpactu xpenä, siliä'p bejn xpala'n Xtaḁä, Dios. <sup>9</sup> Si'cpacni sanälajz Xtaḁä narä, sigajcza sanälazä la'tu. Colchanuu lo xcälṛinälazä. <sup>10</sup> Palga jiutu rextidxä, sinuutu lo xcälṛinälazä, sigajc ni abasobä xtidx Xtaḁä, luxh rinuä lo xcälṛinälajz Xtaḁä.

<sup>11</sup> 'Rniä rediidxre lojtu te guibalaznäjtu narä, te si'c guibalazduxhpactu. <sup>12</sup> Dee najc diidx ni rnibeä guntu: colchanälajz sa'tu si'cni sanälazätu. <sup>13</sup> Xheti te yälṣanälajz ni guroobru lo yälṣanälajzre, gudeed te bejn xcälṇabajṇni, guetni lacuaa resa'ni. <sup>14</sup> La'tu najctu resa'ä palga gusoobtu diidx nani guinibeä guntu. <sup>15</sup> Diruna cuälää “mos” la'tu, sa'csi di remos gan xhi rujn xlamṛeni. Luxh narä agulälää la'tu “rexamigwä”, sa'csi guira'ti rediidx ni biejn diagä lo Xtaḁä aguniäza rediidxga lojtu. <sup>16</sup> Et la'ditu gule narä, narä guleä la'tu. Guleä la'tu te guntu xtzun Xtaḁä, te na'cza nitloj dzuunga. Te guira'tiza nani guiniabtu lo Xtaḁä por laä, ni'cza guniidxni lojtu. <sup>17</sup> Dee rnibeä guntu: colchanälajz sa'tu.

### *Rbälaz rebejn guedxliuj Jesús näjza rexpejṇni*

<sup>18</sup> Palga cuälaz rebejn guedxliuj la'tu, anajntu agulälazxgaareni narä. <sup>19</sup> Paru najctu bejn guedxliujre, sinälajzreni la'tu. Per ditu gac bejn guedxliuj, sa'csi narä guleä la'tu te jiutu xtidx Xtaḁä, ni'cni rbälaz rebejn guedxliuj la'tu. <sup>20</sup> Colṣnaj lajztu diidx nani guniä lojtu, 'di te mos gac beṇroru lo xlamṇi'. Palga basacsireni narä, susacsízareni la'tu. Palga rusoobreni xtidxä, susoobzareni xtiidxtu. <sup>21</sup> Guiraa recosre sunnäjreni la'tu xcentä sa'csi direni gumbee nani baxhaḁ narä.

<sup>22</sup> Paru dina niädniä lojreni direni niujn dojl xten xcälṛdxechlajzreni loä, per naj di gacdi guiniireni direni gacbee yu' xtojḁreni. <sup>23</sup> Nani rbälaz narä, rbälazzani Xtaḁä. <sup>24</sup> Palga dina niunä nez lojreni remilagwṛro, sa' nani rutru rajcdi rujn, direni niajp dojlga; sa'csi abahuiireni redzuunga, ni'c agulälazreni narä, näjza Xtaḁä. <sup>25</sup> Bejnreni si'c te guzobj diidx nani cuaj lo guijtz agujc xchero: “Gulälazreni narä, luxh xhetlidi benä.”

<sup>26</sup> Che jiääd nani gacnäj la'tu, laani sinii xcuentä, chu nacä. Laani najc Sprit ni yu' lo Xtaḁä, siniini didxlii. Narä suxhaḁäni lojtu; lo Xtaḁä guiriini jiäädni lojtu. <sup>27</sup> Näjza la'tu siniitu diidx xcuentä, chu nacä, sa'csi guyu'tu loä cheni gusloäli cagusule'ä diidxga.

## 16

<sup>1</sup> Rediidxre rnixgää lojtu, te didi yu' xhi gun jiajbtu te gunijttu lo xtidxä. <sup>2</sup> Sidzujṇ dxej sibääreni la'tu dirureni gusaan jiu'tu neṇ guidoro. Sidzujṇ or chutis ju't tejtü, suchaloni cayacnäjni Dios. <sup>3</sup> Guiraa recosre sujṇreni sa'csi direni gumbeepac Xtaḁä, niclaza narä. <sup>4</sup> Agunixgää rediidxre lojtu, te che guidzujṇ orga sinaj lajztu xcuent rediidx ni guniä lojtu.

### *Redzuun ni rujn Sprit Dxaṇ xten Dios*

'Dina niniä rediidxre lojtu che gusloä cagusule'ä diidx, sa'csi suganää la'tu. <sup>5</sup> Naj agojl guibi'ä loj nani baxhaḁ narä, luxh nicla tejtü di guiniabdiidx: “¿Caro chäälu?” <sup>6</sup> Dxejc sa'csi aguniä recosre lojtu, ni'c cayac-huin lastootu. <sup>7</sup> Luxh rniliäpac lojtu, hueenru par la'tu cha'ä. Palga dina cha'ä, di gacdi jiääd lojtu nani racnäj. Niluxh palga cha'ä, suxhaḁäni lojtu. <sup>8</sup> Luxh laani, che jiäädni lo guedxliujre, susanijni xcäriejn

rebejn te gacbeereni xcuent dojl, näjza xcuent xcäl\_naba\_naya Dios, näjza xcuent yäl\_guxhtis xten Dios. <sup>9</sup> Guluiizani xcuent dojl lojreni sa'csi direni chalilajz xtidxä. <sup>10</sup> Guluiini xcäl\_naba\_naya Dios lojreni sa'csi sibisacä lo Xtaädä, luxh dirutu fii loä. <sup>11</sup> Guluiini xcuent yäl\_guxhtis xten Dios lojreni sa'csi abejn Dios yäl\_guxhtis loj beñdxab nani rnibee lo guedxliujre.

<sup>12</sup> 'Yu' xhidajlru diidx rlazä guiniä lojtu, niluxh digacdi gacbeetureni naj. <sup>13</sup> Che jääd Sprit xten didxlii xten Dios, laani susanijni xcäriejntu te gacbeetu guiraa redidxgulii, sa'csi dini guinii diidx xcuentcani, siniitisni ganax rediidx nani gudeed Dios lojni te guiniini. Siniizani xcuent recos nani churu gac. <sup>14</sup> Laani siliä'pni xpala'nä sa'csi sica'ni xhixtenä, suluiinini lojtu. <sup>15</sup> Guiraa ni rajp Xtaädä najc xtenä, ni'cni rniä suluiini xhixtenä lojtu.

### *Xcälrac-huin lajztu sibixloj ni yälrbalajz*

<sup>16</sup> 'Sbale'si dxej, dxejc dirutu fii loä; dxejctiru sgaii dxej suhuisactu loä sa'csi narä sia'a lo Xtaädä.

<sup>17</sup> Dxejcti räjp rexpejn\_pacni lo sa'reni:

—¿Xhini'c caniini loonu? Sbale'si dxej, dxejc dirutu fii loä, dxejctiru sgaii dxej suhuisactu loä, näjza: sa'csi sia'a lo Xtaädä. <sup>18</sup> Ni'cni cayäjpreni lo sa'reni: ¿Xhi dee rniini, “sbale'si dxej”? Dinu gacbee xhini'c caniini.

<sup>19</sup> Gucbee Jesús xhini'c rlazjzreni guiniabdiidxreni lojni, dxejcti räjpni lojreni:

—Canabdiidx lo sa'tu xhi säloj nani guniä che guniä, sbale'si dxej, dxejc dirutu fii loä; dxejcru sbale'si dxej, suhuisactu loä. <sup>20</sup> Rniliäpac lojtu, la'tu soontu, niluxh reben guedxliujre sibalazduxhreni. Sac-huinduxh lastootu niluxh yälrac-huinre sibixhlojni yälrbalajz. <sup>21</sup> Te gunaa che gaal xi'nni, rdejdn trabajw, dxejcti che aguyu' xi'nni, riäl lajzni gudejdn trabajw, dxejc arbaa lajzni gojl xi'nni te niguii lo guedxliujre. <sup>22</sup> Ni'cni, sigajcza rac-huin lastootu naj, dxejcti che jäadhuisacätu, dxejc sii sibalajztu nen lastootu, luxh rut gacdi gudzucajdi yälrbalajzga.

<sup>23</sup> 'Nen redxejga xhetiru xhi yälguiniabdiidxdi guntu loä. Rniliäpac lojtu, nani guiniabtu lo xtaädä xcuentä, laani suniidxnini lojtu. <sup>24</sup> Naj xhet canabditu xcuentä. Col\_nabni, te xca'tuni, te guibalajztu.

### *Jesús, nani abejn gaan lo guedxliujre*

<sup>25</sup> 'Aguniä guiralaj lojtu con cuent ni ruluui, niluxh sidzujn dxej che diruna guiniä cuent ni ruluui lojtu. Siniä didxguyasi lojtu xcuent Xtaädä. <sup>26</sup> Nen redxejga guiniabtu por laä. Luxh dizana guiniä siniabä narä loj Xtaädä par la'tu, <sup>27</sup> sa'csi lagajcza Xtaädä sanälajzni la'tu, sa'csi la'tu sanälajztu narä, luxh ahuililajzzatu loj Dios biriä biälä lo guedxliuj. <sup>28</sup> Biriä lo Xtaädä xhaguibaa, biälä lo guedxliujre, siunezäza lo guedxliujre, sibisacä lo Xtaädä xhaguibaa.

<sup>29</sup> Räjp rexpejn\_pacni lojni:

—Naj sii caniilu guyasi, dini gac si'c redidx-xhiga'tz xten cuent ni ruluui. <sup>30</sup> Naj sii gucbeenu racbeelu guira'ti rexhicos, xhetru nanabdi guiniabdiidxrunu lojlu; ni'cni ahuililajznu biriilu lo Dios ni yu' xhaguibaa.

<sup>31</sup> Räjp Jesús lojreni:

—¿La rililajz\_pactu naj, ä? <sup>32</sup> Asiäddzungenajxh teb or luxh ala bidzujn orga, che guire'chtu, cade tejtü xnez-xnejztu, te gusanxtebtu narä, luxh dina jianxtebä sa'csi Xtaädä suganäj narä. <sup>33</sup> Aguniä rediidxre lojtu te cuedxi lastootu lo guedxliujre xcuentä. Lo guedxliujre sidejdpactu trabajw, col\_gusutijp lastootu sa'csi narä abenä gaan loj guedxliujre.

## 17

### *Gunab Jesús lo Dios xcuent rexpejn\_pacni*

<sup>1</sup> Che gulujx guniini loj rexpejn\_pacni rediidxga, guläsni lojni xhaguibaa, räjpni lo Dios:

—Xtadä, abidzujn or; gulä'p xpala'n xi'nlu te guiliä'pza xi'nlu xpala'nlu, <sup>2</sup> sigajc ni badeedlu lojni yälrnibee loj guiraa reben guedxliuj, te gac gudeedni yäl'nabajn par tejpas lo guiraa renani badeedlu lojni. <sup>3</sup> Redee rajp yäl'nabajn par tejpas; numbeereni luj ni najc tejtis GuebDios, näjza narä Jesucrist nani baxhallu lo guedxliujre.

<sup>4</sup> Narä gulä'pä xpala'nlu lo guedxliujre, abaluxä dzuun nani baniidxlu gunä ree. <sup>5</sup> Naj Xtadä, gulä'p xpala'nä con luj, con bala'n, con yälrdimbicha' ni gopä galooli che gajdli guirixtiej guedxliuj.

<sup>6</sup> Loj rebejn nani baniidxlu loä, ni gulelu lo reben guedxliujre, loj reni'c abasule'ä, abaluiä chu najclu. Xtenpaclu najcreni, baniidxlureni loä, luxh rapdzu'tzreni xtiidxlu.

<sup>7</sup> Naj agucbeereni guiraa rediidx ni guniä lojreni lojpaclu siäädni. <sup>8</sup> Sa'csi rediidx nani baniidxlu loä, aguniä rediidxga lojreni, luxh ahuililajzreni rediidxga, agucbeepacreni lojlu biriä, ahuililajzreni lujpac baxhal narä.

<sup>9</sup> Narä rniabä xcuentreni, dina guiniabä xcuent reben guedxliujre, ganaxtis xcuent renani abaniidxlu loä, sa'csi laareni najcreni xpejnlu. <sup>10</sup> Guiralii ni najc xtenä, najczani xtenlu. Guira'tiza ni najc xtenlu najczani xtenä. Agulä'pzareni xpala'nä.

<sup>11</sup> Narä diruna jia'nä lo guedxliujre, laareni sia'nruuni lo guedxliujre. Luxh narä siälä lojlu. Xtadä ni najc Dxanro, gucnäj renani baniidxlu loä con xtiidxlu, nani baniidxlu loä te gunreni tejsi xhigab sigajcni riennu nurnu tejsi xhigab. <sup>12</sup> Che guyunääreni lo guedxliujre, gucnää con xtiidxlu guiraa renani baniidxlu loä, luxh nicla tejreni di ninitloj, xtebtis nani gunijt te gusojb ni caj lo xtidx Dios.

<sup>13</sup> Luxh naj sibilacä lojlu. Caniä rediidxre laj ni yu'ä lo guedxliujre, sa'csi rlazä guibaa lajzreni si'c ni rbaa lazä. <sup>14</sup> Abasule'ä xtiidxlu lojreni, luxh rebejn guedxliuj rdxe'chreni lojreni sa'csi direni gac bejn guedxliujre sigajc ni dizana gacä bejn guedxliujre. <sup>15</sup> Dina guiniabä cuäälureni lo guedxliujre, rniabä gudzucajlureni loj bendxab. <sup>16</sup> Direni gac bejn guedxliuj, sigajc ni dizana gacä narä bejn guedxliuj. <sup>17</sup> Basyareni con xtiidxlu, sa'csi xtiidxlu najc didxguliipac. <sup>18</sup> Sigajc ni baxhallu narä lo guedxliujre, sigajcza ruxhaläreni te chääreni guideb guedxliuj. <sup>19</sup> Xcuentreni rudedä lagajc narä, te näj laareni gacnayareni con xtidxguliipaclu. <sup>20</sup> Dina guiniabä xcuent laatisreni, rniabäza xcuent guiraa renani churu chalilajz xtidxä ni gusule'reni. <sup>21</sup> Rlazä gun guiraareni tejsi xhigab, sigajc ni rujnlu, Xtadä, si'c runäza; te sigajc ni yu'äza con luj, sigajcza chureni con nuurnu, te gacbee reben guedxliuj luj baxhallu narä. <sup>22</sup> Yälrnibee ni baniidxlu loä, lagajc yälrnibeega badedä lojreni te gunreni tejsi xhigab, si'cni riennu tejsi xhigab. <sup>23</sup> Narä cayunnääreni dzuun, luj cayunnäjlu narä dzuun, te jiennu tejsi dzuun, te gacbee rebejn guedxliuj luj baxhallu narä, luxh sanälajzlureni si'cni sanälajzzalu narä.

<sup>24</sup> Xtadä, guiraa renani baniidxlu loä, rlazäza chureni cadre chuä xhaguibaa, te fiireni xcälrnibeä nani baniidxlu, sa'csi huinälajzlu narä galooli che gajdli guirixtiej guedxliujre. <sup>25</sup> Xtadä ni rujn cossa'ctis, di rebejn guedxliuj gumbeelu, luxh narä numbeälu, luxh redee agucbeezareni luj baxhallu narä. <sup>26</sup> Aräpä lojreni chu najclu; säpäzaru lojreni te chu yäl'sanälajz sa' ni rajplu par narä nejn lastooreni, te cuäzäza nejn lastooreni.

## 18

### *Xho gunaazreni Jesús*

*(Mt. 26:47-56; Mr. 14:43-50; Lc. 22:47-53)*

<sup>1</sup> Che gulujx gunii Jesús rediidxga, huinäni rexpejn pacni dejtz gueu Cedrón. Ro'c yu' xhiroob yuj cadre sojb guiraloj reyajg. Ro'c biu' Jesús näjza rexpejn pacni. <sup>2</sup> Anajn Judas, nani guto' Jesús, caro rij Jesús con rexpejn pacni sa'csi si'csi-si'c rdxaag sa'reni ro'c. <sup>3</sup> Dxejcti Judas, che biääd lojni te cuaa soldad roman, näj rebixhojz ni rnibee, näjza refarisee, huinätinireni ro'c, ca'reni balguejd näjza lintern, näjza spaad näjza lans. <sup>4</sup> Ni'cni Jesús, sa'csi ananxgaani xhini'c sacni, gubigni lojreni, räjpni lojreni:

—¿Chu rguiltu?

<sup>5</sup> Räjpreni lojni:

—Jesús nani siääd guedx Nazare't.

Räjp Jesús lojreni:

—Laa naräni.

Näjza Judas ni bato'ni suganäjnireni. <sup>6</sup> Che gunii Jesús lojreni: “Laa naräni”, biäxhanreni, biajbreni lo yuj. <sup>7</sup> Dxejcti gunabdidxsac Jesús lojreni:

—¿Chu rguiltu?

Dxejc räjpzaren stehuält:

—Jesús nani siääd guedx Nazare't.

<sup>8</sup> Räjpre Jesús lojreni:

—Aguniä lojtu, laa naräni. Palga narä rguiltu, colgusaan jii redee.

<sup>9</sup> Guniini rediidxga te gusojb rediidx nani guniini che räjpni: “Loj guiraa ni baniidxlu, nicla tejni di ninijt.” <sup>10</sup> Dxejcti Simón Pedr, sa'csi ca'ni te spaad, guläänini, batiuugni diag ladbee xten xmos bixhojzroga. Laj mosga najc Malco. <sup>11</sup> Dxejcti räjp Jesús lo Pedr:

—Guluchee spaad xtenlu neñ xpaguinni. ¿La dina tedä trabajwduxh nani agunibee Xtadä tedä, ä?

### *Jesús nez loj bixhojzro*

(Mt. 26:57-58; Mr. 14:53-54; Lc. 22:54)

<sup>12</sup> Dxejcti resoldaadga näjza comandant, näjza reguxhtis ni rnibee rexpejn Israel, gunaaazreni Jesús baliibrenini. <sup>13</sup> Dxejcti ganid huinärenini lo Anás, sa'csi najcni xtadsueegr Caifás, luxh ijzga biäjl najc Caifás bixhojzro ni rnibee lo rebixhojz. <sup>14</sup> Caifás najc nani baliidx rexpejn Israel nanab guet te niguii xcuent rebenguejdxga.

### *Cadro gunii Pedr dini gumbee Jesús*

(Mt. 26:69-70; Mr. 14:66-68; Lc. 22:55-57)

<sup>15</sup> Simón Pedr näjza stee xpejn pacni huinajl dejtz Jesús. Luxh numbee bixhojzro bejn ga, biunäjzani Jesús lo xle' bixhojzro. <sup>16</sup> Bia'nti Pedr rolä'ga. Dxejc birii xpejn pac Jesús nani numbee bixhojzroga, guniini lo nani cayajp rolä'ga, te biu' Pedr nez lo le'ga. <sup>17</sup> Dxejcti räjp mos gunaa ni rcanäj rolä', räjpni lo Pedr:

—¿La et näjdi luj najclu te xpejn pac Jesús, ä?

Räjp Pedr loj gunaaga:

—¡Xho gacäni!

<sup>18</sup> Dxejcti sa'csi cayacnalduxh, caguse'creni boo te cagucha'lajzreni. Näjza Pedr suganäjreni, cagucha'lajzni ro guibooga.

### *Bixhojzro cayujn yälgunabdiidx lo Jesús*

(Mt. 26:59-66; Mr. 14:55-64; Lc. 22:66-71)

<sup>19</sup> Dxejcti gusloj cayujn bixhojzro yälgunabdiidx lo Jesús xcuent chuni'c najc rexpejn pacni näjza xcuent xhini'c ruluiini.

<sup>20</sup> Dxejcti räjp Jesús lojni:

—Narä xhet xhiga'tzdi guniä rextidxä, guniäni lo guiraa rebejn guedxliuj. Basule'ä diidx neñ rexquidobäztu näjza neñ guidoro cadre re' guiraa rexpejn Israel, nicla tej diidx dina ninixhiga'tzädi. <sup>21</sup> ¿Xhicuent cayujnlu yälgunabdiidxga löä? Gunabdiidx loj renani biejn diajg xhini'c guniä lojreni. Laareni najnreni xhini'c guniä.

<sup>22</sup> Che gulujx gunii Jesús rediidxre, te rexpejn bixhojzroga huääz loj Jesús, räjpni lojni:

—¿La si'c rudzu' bejn diidx loj bixhojzro, ä?

<sup>23</sup> Dxejcti räjp Jesús lojni:

—Palga xhet laadi guniä, baluii narä xhi diidxga najc xhet laadi, niluxh palga laaca najc ni guniä, ¿xhicuent huääzlu löä?

<sup>24</sup> Dxejcti guideb naliibni baxhal Anásni lo bixhojzro lo ni laa Caifás.



*Gunisac Pedr dini gumbee Jesús*  
(Mt. 26:71-75; Mr. 14:69-72; Lc. 22:58-62)

<sup>25</sup> Sugasijc Pedr ro' guiboo, cagucha'lajzni, che räjpreni lojni:

—¿La et näjdi luj najclu te xpejn<sub>pac</sub> niguiiga, ä?

Badzu'ni diidxga räjpni:

—¡Xho gacäni!

<sup>26</sup> Dxejcti te xmos bixhojzroga, sa'csi sa'ni najc mos ni batiu' Pedr diajgni, räjpni lojni:

—¿La et lujdi ni bahuiä neñ huert con laani, ä?

<sup>27</sup> Dxejcti räjp Pedr stehuält:

—Nicla gumbeäni.

Cuantis guniini si'c, guredxagajc te guidgaii.

*Jesús nez loj Pila't*

(Mt. 27:1-2, 11-14; Mr. 15:1-5; Lc. 23:1-5)

<sup>28</sup> Dxejc birinäjreni Jesús rolijz Caifás, huinärenini rolijz gubernadoor cadre laaza Pretorio, niluxh direni niu' ro'c sa'csi ameer guiliejn gubijdx, te di gacdxuudxreni dxejc di gacdi gaureni lani pascw. <sup>29</sup> Ni'cni birii Pila't lojreni räjpni lojreni:

—¿Xhi yälquij xten niguiire siädle'ctu loä?

<sup>30</sup> Dxejcti räjpreni lojni:

—Paru di niguiire niajc te beñ latsiaj, dinu niopnäni ladz<sub>naa</sub> guejblu.

<sup>31</sup> Räjp Pila't lojreni:

—Colchanäni, colhuii xho gunnäjtuni yälguxhtis con lagajc xleiitu.

Dxejc räjp rexpejn Israel lojni:

—Dí xleiitu gusaan ju'tnu te bejn.

<sup>32</sup> Guniireni si'c te guzojb diidx nani gunii Jesús xcuent xho guetni.

<sup>33</sup> Ni'cni biusac Pila't neñ Pretorio, gurejdxni Jesús räjpni lojni:

—¿La luj najclu reii xten rexpejn Israel, ä?

<sup>34</sup> Dxejcti räjp Jesús lojni:

—¿La lagajc luj rniilu si'c, ä? O ¿laa yu' chureni'c naj lojlu si'c?

<sup>35</sup> Dxejcti räjp Pila't lojni:

—¿Xhixh näj narä nacä te xpejn Israel? Lagajc reben lajdxlu näjza rebixhojz bateedlu ladz<sub>naa</sub>. ¿Xhi bejnlu?

<sup>36</sup> Dxejcti räjp Jesús lojni:

—Xcäl<sub>rnibeä</sub> dini gac yäl<sub>rnibee</sub> sa' ni yu' guedxliujre. Paru najc xcäl<sub>rnibeä</sub> te yäl<sub>rnibee</sub> sa' ni yu' guedxliujre, ala cagucuaa rexpenä te di tedä ladz<sub>naa</sub> rexpejn nani rnibee Israel. Näj di xcäl<sub>rnibeä</sub> gac yäl<sub>rnibee</sub> sa' ni yu' lo guedxliujre.

<sup>37</sup> Ni'cni räjp Pila't lojni:

—¿Reii najclu, ä?

Räjp Jesús lojni:

—Laaca najlu nacä reii. Par ni'cpac golä, par ni'cpacza biälä lo guedxliujre, partis gusule'ä didxliipac. Guiraa renani najn didxlii, reni'c rucuadiajgreni xtidxä.

<sup>38</sup> Räjp Pila't lojni:

—¿Xhini'c najc didxlii?

Che guniini si'c gunisacni loj rexpejn Israel:

—Dina guidxälä nicla tej xtoj<sub>l</sub> bejnre. <sup>39</sup> Niluxh la'tu rajptu te costumbr, casob lani pascw, ruslaanu te bejn ni yu' neñ latzguiib. ¿Xhi najtu? ¿La rlanjtu guslää ni najc reii xten rexpejn Israel, ä?

<sup>40</sup> Dxejcti guiragajcreni guredxa', räjpreni:

—¡Na'c gusläalu niguiiga! ¡Basläa Barrabás!

Niluxh Barrabás najc te gubaan.

## 19

<sup>1</sup> Ni'cni gunibee Pila't gudijnreni Jesús con duu ni yu' guechguuib lojni. <sup>2</sup> Bejn resoldaad te coronguejch, bazaŕrenini yejc Jesús. Dxejcti bahuajcwrenini te ladmoraad.

<sup>3</sup> Dxejcti gusloj gubigreni lojni, te rájpreni lojni:

—¡Gubajñ par tejpas Reii xten rexpejn Israel!

Dxejc huääzreni lojni.

<sup>4</sup> Dxejcti birisac Pila't, rájpní lojreni:

—¡Colhuii! Acabääni nez lojtu, te gacbeetu dina guidxäl nicla tej xtojñi.

<sup>5</sup> Dxejcti birii Jesús nez lojreni, yu' coronguejch yejcní, najcwzani ladmoraadga.

Dxejcti rájpní Pila't lojreni:

—¡Colhuii! ¡Aree niguiire!

<sup>6</sup> Ni'cni, che bahuii rebixhojzro nájza rexquixhajgreni lojni, guredxa'reni, rájpreni:

—¡Colgucuaani lo cruzj! ¡Colgucuaani lo cruzj!

Rájpní Pila't lojreni:

—Lagajc la'tu colchanäni te gucuaatuni lo cruzj. Per narä dina guidxälä nicla tej xtojñi.

<sup>7</sup> Dxejcti rájpní rexpejn Israel lo Pila't:

—Nuurnu rajpnu te leii, luxh xcuent leiiiga, nanab guetni sa'csi najni najcni Xi'n Dios.

<sup>8</sup> Che biejn diajg Pila't rediidxga, bidxejbruni, <sup>9</sup> biusacni neñ Pretorio, rájpní loj Jesús:

—¿Caro siäädlu?

Per xhet rájpdí Jesús lojni.

<sup>10</sup> Dxejcti rájpní Pila't lojni:

—¿La dilu guinii loä? ¿La dilu gan narä rapä yälrnibee te gucuaälu lo cruzj, rapäza yälrnibee te guslaälu, ä?

<sup>11</sup> Rájpní Jesús lojni:

—Xhetliidi yälrnibee niajplu loä paru dilu nica'ni xhaguibaali. Ni'cni bejn nani bato' narä lojlu rapduxhruni dojl loj ni rajplu.

<sup>12</sup> Ni'cni gudiil Pila't xho nuslaani Jesús, niluxh rexpejn Israel rbedxaduxhrureni, rájpreni:

—Palga luj guslaaluni, dilu gac xamiigw reii César, sa'csi chutis ni rnii najcni reii, najcni xcontraar César.

<sup>13</sup> Che biejn diajg Pila't rediidxre, gulääni Jesús, dxejcti gurej Pila't lo yagxhiil cadro rujnni yälguxhtis, cadro laa Litóstoros con didx-griegw sälojni naga' guisa'c, con didx-hebreo laani Gabata. <sup>14</sup> Najcni dxej vispr lani pascw, si'cti läidxej, dxejcti rájpní loj rexpejn Israel:

—Colhuii, aree xreitu.

<sup>15</sup> Ni'cni guredxa'reni rájpreni:

—¡Suguetni! ¡Suguetni! ¡Bacuaani lo cruzj!

Dxejcti rájpní Pila't lojreni:

—¿La sucuaä xreitu lo cruzj, ä?

Dxejcti rájpní rebixhojz ni rnibee lojni:

—Rutru reiidi rajpnu, Césartis najc xreinu.

<sup>16</sup> Ni'cni bateed Pila't Jesús lojreni te chacuaarenini lo cruzj.

*Che bacuaarenini lo cruzj*

*(Mt. 27:32-44; Mr. 15:21-32; Lc. 23:26-43)*

<sup>17</sup> Dxejcti cua'reni Jesús, biriini ro'c guideb nuuni xcruzjni, cheni bidzujñlireni te lajt ni laa lajt xten Calabeer, con didx hebreo laani Gólgota. <sup>18</sup> Ro'c bacuaarenini lo cruzj. Bacuaazareni tio'p niguii lo stio'p cruzj, tejpni te laad cuä' Jesús. <sup>19</sup> Dxejc bacuaa Pila't diidx ni cháa yejc xcruzjni; rediidxga najc scree: “Jesús, beñ Nazare't, Reii xten rexpejn Israel.” <sup>20</sup> Xhidajl bejn bil diidx ni caj yejc xcruzjni, sa'csi lajt cadro bacuaarenini lo cruzj

najc gajxh ro' guejdxga, luxh didx hebreo, diidx griegw, nájza didx latin bacuaareni rediidxga. <sup>21</sup> Dxejcti rájp rebixhojzro xten rexpejn Israel loj Pila't:

—Na'c nucuaalu: “Reii xten rexpejn Israelni”, laacaru nacuaalu: “Laani najni, najcni reii xten rexpejn Israel”.

<sup>22</sup> Dxejcti rájp Pila't lojreni:

—Nani abacuaá, abacuaá. Si'c jia'nni.

<sup>23</sup> Dxejcti resoldaad, che gulujx bacuaareni Jesús lo cruzj, cua'reni rexhablojiaani bejnrenini tajp la', te cade tejreni cua'reni te la'ni. Luxh yu' stee xhajibni ni laa tunica, nadijbni, guejnni hasta lo yuj guc-cheeni. <sup>24</sup> Ni'cni rájpreni lo sa'reni:

—Na'c guitiáznuni; do'o guidzujtnu te daad lojni, te don chu xten gacni.

Si'c bejnreni te gusojb xtiidx Dios cadre caj scree: “Batiájsreni xhablojiaá; yejzca xhabä ni bia'n gudzujtreni daad.”

Ni'cni bejn resoldaad recosre. <sup>25</sup> Niluxh cuä' xcruzj Jesús suga' xnanni, con bäjl xnanni, ni laa Marii cháäl Cleofas, nájza Marii Magdalen. <sup>26</sup> Che bahuii Jesús loj xnanni, dxejc bahuiizani loj xpejnpacni nani sanälazduxhni, rájp Jesús loj xnanni:

—Nan, ¡bahuii, aro'c xi'nlu!

<sup>27</sup> Dxejcti rájp Jesús loj xpejnpacni nani sanälazduxhni:

—¡Bahuii, aro'c xnanlu!

Ni'cni dxejcli sinä nani najc xpejnpacni xnan Jesús rolijzpacni.

### *Xho gujt Jesús*

(Mt. 27:45-56; Mr. 15:33-41; Lc. 23:44-49)

<sup>28</sup> Ni'cni, sa'csi najn Jesús alagujc guiraa recos ni nanab gac te soob rextidx Dios, rájpni:

—Cayolä nis.

<sup>29</sup> Ro'c suga' te guejs vinagr, nenga bahuajdxreni te esponj dxejc bacuaarenini lo te yajg ni laa hisopo, guläsreni esponjga batzugrenini ro'ni. <sup>30</sup> Che gulujx gu' Jesús vinagra, rájpni:

—Agulujxni.

Dxejcti basajb yejcní, baslaani xaimni.

### *Xhi bejn te soldaad lo Jesús*

<sup>31</sup> Dxejga najc dxe vispr xte lani pascw, che ru' mandaad par lanijga. Rexpejn Israel di rlajzreni nia'n rebejnnga lo recruzj, sa'csi dxe sabdga najc dxej ni rusilajzreni. Ni'cni gunabreni lo Pila't guxhañi chu qui'ch ni'reni te guetreni, te jiájtreni loj recruzj.

<sup>32</sup> Dxejcti bidzujñ resoldaad, gudi'chreni guiro'p ni' nani caj te laad, sigajzca bennájreni stee ni caj ste laadga. <sup>33</sup> Che gubigreni lo Jesús, bahuiireni alagujtni, direni nigui'ch ni'ni. <sup>34</sup> Tej soldaadga baqui'tzni te lans ro' xcustiini, dxejc bixe' rejn nájza nis. <sup>35</sup> Lagajc narä Juan bahuiä recosga, ni'cni caniä rediidxre, luxh diidxga guliipacni. Lagajc narä nanä didxguliipac caniä, te chaliiza lajztu xcuentni. <sup>36</sup> Sa'csi si'c gujc guira'ti, te guzojb xtidx Dios cadre caj: “Nicla tej xtujtni di guech.” <sup>37</sup> Sigajzca lo stee guijtzc caj diidxre: “Sidxelojreni loj nani biguijtz te lans.”

### *Huicua'tzreni Jesús*

(Mt. 27:57-61; Mr. 15:42-47; Lc. 23:50-56)

<sup>38</sup> Che gulujx recosga, dxejcti huij José, te beñ Arimatea, nacxhiga'tzni te xpejn Jesús, sa'csi rdxejbni rexpejn Israel, ni'c huijni loj Pila't, gunabni loj Pila't te laani guiliätni Jesús lo cruzj. Cuájzba Pila't, dxejc biääd José gulätni Jesús, sanätini togoolga. <sup>39</sup> Nájza Nicodem biääd dxejc, nani galoo huininäj Jesús te guxhijñ. Biädñani si'cti tiuu kil te däneyxh ni najc si'c yaal ni laa mirra nájza áloes. <sup>40</sup> Dxejcti cua'reni Jesús batejbrenini te la' lad lino, basälzarení dájga ni laa mirra con áloes, sa'csi si'c najc xcostumbr rexpejn Israel che rucua'tzreni te togool. <sup>41</sup> Gajxh cadre cuaj Jesús lo cruzj, yu' te huert, neñ huertga yu' te bacoob si'c te biliää, cadre nicla tej bejn gajd guiga'tz. <sup>42</sup> Sa'csi abidzujñ dxej vispr

lani pascw xten rexpejn Israel, luxh gajxh suga' biliääga, nenga gudixhreni Jesús; si'c biga'tztini.

## 20

### *Gubansac Jesús loj rebengut*

(Mt. 28:1-10; Mr. 16:1-8; Lc. 24:1-12)

<sup>1</sup> Primer dxej xten xmaanga, cäjyru, gajd lo guedxliuj jianij che huij Marii Magdalen lo baaga. Che bidzujni ro' baaga, bahuiini agubicaj guij ni suga' ro' baaga. <sup>2</sup> Dxejcti ruxunni gubi'ni te huiye'tzni lo Simón Pedr näjza lo stee xpejn pac Jesús ni sanälazduxhni, räjpni lojreni:

—Ahuilääreni Dad neñ baa, luxh dinu guidon caro sanärenini.

<sup>3</sup> Dxejc biriguxun Pedr näjza stee bejnga, huijreni nez lo baa. <sup>4</sup> Ruxun guiro'preni. Niluxh stee bejnga ruxunduxhruni loj Pedr. Laani ganid bidzujni lo baaga. <sup>5</sup> Dxejcti guretänni te bahuiini neñ ba-biliääga. Bahuiini te laad naga' relajdtis nani bidejb Jesús, luxh dini niu' neñ baaga. <sup>6</sup> Dxejc bidzungajc Pedr, biugajcni neñ baaga, bahuiini naga' relajdga te laad. <sup>7</sup> Bahuiizani lajd ni guyu' yejcn, ni'c nie'tni saru, naga'ni te laad. <sup>8</sup> Dxejcti biu' stee bejnga nani bidzujn ganid. Che bahuiini neñ baaga, huililajzni gubansac Jesús. <sup>9</sup> Sa'csi gajdreni gacbee ni caj lo reguijtz, cadro caj nanab guibansacni loj rebengut. <sup>10</sup> Dxejc gubisac guiro'p rexpejn pacni rolizreni.

### *Baluloj Jesús loj Marii Magdalen*

(Mr. 16:9-11)

<sup>11</sup> Laltis suga' Marii cuä' baaga, cayoondi. Ni'cni lañ ni cayoondi, basajb lojni te bahuiini neñ baaga. <sup>12</sup> Dxejcti bahuiini lo tio'p xangl Dios, najcwreni ladnolbäj, sobga'reni, tejni nez cadro gojt yejc Jesús, steeni nez cadro gojt ni'ni. <sup>13</sup> Dxejcti räjpreni lojni:

—Nane', ¿xhicuent roonlu?

Räjpni lojreni:

—Sa'csi sanäreni Dad, luxh dina ganä caro huisa'nrenini.

<sup>14</sup> Che gulujx guniini si'c, gubiréni, dxejc bahuiini loj Jesús suga' ro'c, niluxh dini niembee Jesús. <sup>15</sup> Dxejc räjp Jesús lojni:

—Nane', ¿xhicuent roonlu? ¿Chu rguillu?

Marii bejn xhigab laa dade' ni rcanäj huertga, ni'c räjpni lojni:

—Dad, palga luj sanäluni, gunii caro gudixhluni te guiliäsäni te chanääni.

<sup>16</sup> Dxejcti räjp Jesús lojni:

—¡Marii!

Dxejc gubiré Marii, räjpni neñ xtidx hebreo:

—¡Raboni!

(Säloj diidxga “Mastr”).

<sup>17</sup> Dxejcti räjp Jesús lojni:

—Na'c guiniäazlu narä sa'csi gadna cha'a lo Xtradä xhaguibaa. Huij loj rebetzä, huiye'tz lojreni, cha'a lo Xtradä, näjza Xtadtu, loj Xtiozä näjza Xtiooztu.

<sup>18</sup> Dxejcti huij Marii Magdalen, bidzujni loj rexpejn pacni badeedni didxcoob, räjpni:

—Abahuiä lo Dad Jesús.

Räjpzani lojreni guiraa recos ni gunii Jesús lojni.

### *Baluloj Jesús loj rexpejn pacni*

(Mt. 28:16-20; Mr. 16:14-18; Lc. 24:36-49)

<sup>19</sup> Che gojl gudxej, najcni dumingw, primer dxej xten xmaan, abiäudzu'tz ro lä' ro' yu' cadro tre' rexpejn pacni, sa'csi rdxejbreni rexpejn Israel. Chela bidzujn Jesús, guzujni nez galäiireni, räjpni lojreni:

—Suchu yälrbedxi lastootu.

<sup>20</sup> Che guniini si'c, baluigajcni reñaani lojreni näjza cuä' xcustiini. Ni'cni bibaduxhlajz rexpejn̄pacni che bahuiireni lo Dad Jesús. <sup>21</sup> Dxejc räjp Jesús lojreni stehuält:

—Suchu yälrbedxi lastootu. Si'c ni baxhaļ Xtadä narä, si'cza ruxhaļä la'tu.

<sup>22</sup> Che gulujx guniini rediidxga, balejbni yejcreni, räjpni, lojreni:

—Suguibajñ Sprit Dxan xten Dios neñ lastootu. <sup>23</sup> Rextojļ rebejn̄ nani siällajztu, sibicajreni. Rextojļ rebejn̄ nani ditu jiällajz, siannäjreni redoļga.

### *Tomás bahuii lo Jesús ni gubañsac*

<sup>24</sup> Tomás, ni laaza Didimo, najcni te retzubitio'p xpejn̄pac Jesús. Rutini che biääd Jesús loj rexpejn̄pacni. <sup>25</sup> Dxejcti räjp rexpejn̄pacni lojni:

—Abihuiinu loj Jesús, agubañsacni loj rebeñgut.

Dxejcti laani räjpni lojreni:

—Palga dina fiä loj reñaani cadre caj seen xten reclaab, palga dina guqui'tzä bicuenaä cadre guyu' claabga, guqui'tzäza ñaa cadre bixal cuä'ni, di lazä chaliñ gubañsacni loj rebeñgut.

<sup>26</sup> Che gudejd xhujñ dxej, tresac rexpejn̄pacni neñ yu', nadxaagza Tomás lojreni. Niäudzu'tz yu'ga, luxh chela gucbeereni abidzujñ Jesús, guzujni galäiireni, räjpni lojreni:

—Suchu yälrbedxi lastootu.

<sup>27</sup> Dxejcti räjpni loj Tomás:

—Baqui'tz bicuenaalu ree loj patñaä, basälza ñaalu cuä'äre, na'c ractio'p lajzlu, huililajzpac gubañsacä loj rebeñgut.

<sup>28</sup> Dxejcti räjp Tomás lojni:

—¡Xtadä, Xtioozä!

<sup>29</sup> Dxejcti räjp Jesús lojni:

—Sa'csi abahuiilu lö, Tomás, huililajzlu. Chicbaa renani mase direni fi, rililajzreni xtidä.

### *Xhicuent bacuaani reguijtzre*

<sup>30</sup> Xhidalroduxhru dzuun bejn Jesús nez loj rexpejn̄pacni, nani di nicaj lo guijtz.

<sup>31</sup> Redzuunre nani bejn Jesús nani cuaj lo guijtzre cuajni te chalilajztu diidxre: Jesús najc Crist, nani cabäjz rebejn̄ jiääd, Xi'n Dios. Luxh che chalilajz te bejn̄ xtiidxni, sajpn̄i yälñabajñ par tejpas.

## 21

### *Jesús baluilojni lo gajdz xpejn̄pacni*

<sup>1</sup> Dxejcti baluiloj Jesús loj rexpejn̄ni ro' nisdoo ni laa Tiberias. Scree baluilojni lojreni.

<sup>2</sup> Nadxaag sa' rebejn̄re: Simón Pedr, Tomás ni laaza Didimo, näjza Natanael, nani siääd Canä xten Galilee, rexi'n Zebedeo, näjza stio'p rexpejn̄pacni. <sup>3</sup> Dxejcti räjp Simón Pedr loj resa'ni:

—Chanazä bäjł.

Räjpreni lojni:

—Näjza nuure chonnu.

Dxejcti sääreni, huä'preni neñ te barcw. Guideb guxhijnga xhet bäjłdi gunaazreni. <sup>4</sup> Che acayanij loj guedxliuj, suga' Jesús ro' nidooga, di rexpejn̄ni niembeeni. <sup>5</sup> Ni'cni räjp Jesús lojreni:

—Rexi'nä, ¿la xhet bäjłdi rajptu, ä?

Räjpreni lojni:

—Xhet rajpdinu.

<sup>6</sup> Dxejcti räjpni lojreni:

—Colgusäl xquijxhtu ladbee xten barcwga, te ro'c siniaaztuni.



Dxejcti bacuaareni guijxhga ladbee xten barcwga, dxejcti ameer diniajcdi nibääreni guijxhga ro'c sa'csi gudxadotzu'tzni bäjl. <sup>7</sup> Dxejcti bejn nani sanälazduxh Jesús, räjp loj Pedr:

—Laa Dad Jesús.

Che biejn diajg Simón Pedr laa Dad Jesús, gotgajcni xhablojiaani sa'csi ladxhagjiättis najcwni sa'csi canaazni bäjl, dxejcti gutiäjsni lo nisdoo. <sup>8</sup> Sgaili rexpejn pacni biädnäreni rebarcwga sa'csi ameer guidzujnreni ro' nisdoo, si'cti tegayuu metrtis cayäädx. Siädnäzareneni guijxh guidxa rebäjl. <sup>9</sup> Che bidzujnreni ro' nisdoo, bahuiireni re' guiboo, ro'c dzuub te bäjl näjza yätxtiil cague'. <sup>10</sup> Dxejcti räjp Jesús lojreni:

—Coltanä gaili bäjl nani entis gunaaztu.

<sup>11</sup> Dxejcti huij Simón Pedr, gulääni guijxhga, guidxani bälro. Guyu' si'cti te gayuu garol con chon bäjl nejn guijxhga, niluxh dini niräsyä' mase guyu' xhidalduxh bäjl nejni.

<sup>12</sup> Dxejcti räjp Jesús lojreni:

—Coltaa te gauxharejntu.

Nicla tej rexpejn pacni dini niabdiidx lojni: “¿Chu luj?” sa'csi anajnreni laa Jesúsni.

<sup>13</sup> Dxejcti cua' Jesús yätxtiil, badeedni lojreni, sigajcza rebäjl.

<sup>14</sup> Dee najc ni riojn huält baluilojni loj rexpejn pacni, che gubañsacni loj rebeñgut.

### *Jesús rninäj Simón Pedr*

<sup>15</sup> Che gulujx gudajwreni, räjp Jesús loj Simón Pedr:

—Simón xi'n Jonás, ¿la sanälajzrulu narä loj chu stee, ä?

Räjpni lojni:

—O'n, Dad, luj najnlu sanälazä luj.

Räjp Jesús lojni:

—Gojp rexilä'ä.

<sup>16</sup> Räpsacni lojni ni rojp huält:

—Simón, xi'n Jonás, ¿la sanälajzlu narä, ä?

Räjpni lojni:

—O'n, Dad. Luj najnlu sanälazä luj.

Räjpni lojni:

—Gojp rexilä.

<sup>17</sup> Räpsacni lojni ni riojn huält:

—Simón xi'n Jonás, ¿la sanälajzlu narä?

Guc-huin lastoo Simón Pedr sa'csi gunabdiidx Jesús lojni chon huält: “¿La sanälajzlu narä?” Dxejcti räjp Simón lojni:

—Dad, luj najnlu guira'ti. Luj najnlu sanälazä luj.

Räjp Jesús lojni:

—Gojp rexilä. <sup>18</sup> Rniliäpac lojlu, che gujclu bi'nru, lagajc luj rajcwlu xhajblu, rijlu cadrotis rlajzlu. Che anajclu beñgool, susgaatislu ñaalu te gushuajcw ste'ca bejn xhajblu, te chanäreni luj cadre di rlajzlu.

<sup>19</sup> Luxh diidxga gunii Jesús te cagusule'ni xho gugu'treni Pedr te guiliä' pni xpala'n Dios. Che gulujx guniini si'c, räjpni loj Pedr:

—Gudanajl narä.

<sup>20</sup> Che gubiré Pedr, bahuiini loj stee xpejn ni, nani sanälajzru Jesús, siädnajlni dejtzreni. Lagajc bejnre ni gurej cuä' Jesús lo lult xchej, ni räjpza loj Jesús: “Dad, ¿chuni'c najc nani guto'lu?” <sup>21</sup> Ni'cni, che bahuii Pedr lojni, räjpni loj Jesús:

—Dad, deea', ¿xhi gun dee?

<sup>22</sup> Dxejcti räjp Jesús lojni:

—Palga rlazä jia'nni che guibisacäli loj guedxliujre, ¿xhixh najcni? Basaanni. Luj gudanajl narä.

<sup>23</sup> Ni'cni bire'ch diidx lagajc loj resa'ni, di bejn̄ga guet. Di Jesús niäjb lojni dini guet, alga räjpni: “palga rlazä jia'nni loj guedxliujre che guibisacäli lo guedxliujre, ¿xhixh najcni?”

<sup>24</sup> Luxh bejn̄ga najc narä, xpejn̄ Jesús nani bahuiloj guiraa recosre, nani bacuaazareni. Anadonnu didxliipac najc recos nani rniini.

<sup>25</sup> Yu'ru xhidalduxh dzuun ni bejn̄ Jesús. Palga gucuuanu guiralii redzuun ni bejn̄ Jesús, nicla lo guedxliujre di gal̄ chu reguijtz cadre xcajni.

## Redzuun Rexpejn Dios

### *Siäd Sprit Dxan xten Dios te cuääzni neñ lastootu*

<sup>1</sup> Xamigwä Teófilo, abacuaä lojlu xcuent guiraa recos nani bejn Jesucrist näjza nani baluui Jesucrist, che guslojlini, <sup>2</sup> hasta dxejli ni huäjsni xhaguibaa. Gunibexgaani xhini'c gun renani guleni gac xpejn'pacni. Sprit Dxan xten Dios baluui Jesucrist xhi guiniini lojreni. <sup>3</sup> Gudejd Jesucrist trabajwduxh, dxejcti gujtni. Dxejc gubansacni lo rebengut, baluilojni lo rexpejn'pacni. Tiuu dxej baluilojni loj rexpejn'pacni balti huält te gacbeereni agubansacni. Guniizani lojreni xcuent xcäl'nibee Dios.

<sup>4</sup> Che gudejd tiuu dxejga, batojp Jesucrist rexpejn'pacni, gunibeeni na'c guiriireni guedx Jerusalén, cuääzreni jiäd Sprit Dxan xten Dios nani aguniipac Dios jiäd. Räj'pni:  
—Dee abiejn diajgtu guniä lojtu. <sup>5</sup> Juan batiobnis con nis, luxh naj guxii dxej cayäädx dxejcru siäd Sprit Dxan xten Dios te cuääzni neñ lastootu. Si'c guirobnistu —räj'pni.

### *Huäjs Jesucrist siini xhaguibaa*

<sup>6</sup> Lagajc dxejc che abidojpreni loj Jesucrist, gunabdiidxreni lojni:

—¿La naj gudedsaclu yäl'nibee lo rexpejn Israel, ä?

<sup>7</sup> Dxejcti räj'p Jesucrist loj rexpejn'pacni:

—Di riäj'l gacbeetu xcuent redxej näjza retiemp nani abasobxga Dios con xcäl'nibeeni.

<sup>8</sup> La'tu sica'tu yäl'nibee che abiäd Sprit Dxan xten Dios neñ lastootu. Dxejc chatie'chtu xtidxä näjza rextzunä neñ guedx Jerusalén, neñ guiraa reguedx Judea, neñ guiraa reguedx Samaria, näjza neñ guideb guedxliuj —räj'pni.

<sup>9</sup> Gulujxtis gunii Jesucrist rediidxga, luxh lañi cahuii rebejn lojni huäjsni xhaguibaa, sa'csi gurejdx Diosni. Dxejc biäd te za, biu'ni neñ zaga. Ro'cti diru rebejn nuhuii lojni.

<sup>10</sup> Lañi cadxelodxi rebejn xhaguibaa cadre gunitloj Jesucrist, tiop angl xten Dios ni najcw ladnol suga' gajxh cadre suga'reni. <sup>11</sup> Dxejc räj'p reangl loj rebejn:

—¿Xhi rajctu beñ Galilee? ¿Xhicuent cadxelojtu xhaguibaa? Abahuiitu xho huäjs Jesucrist siini xhaguibaa. Lagajc si'c guibisacni —räj'preni.

### *Gulereni Matías ni najc apostcoob*

<sup>12</sup> Dxejc birii rebejn yejc dajne' ni laa Dan Oliib, siireni guedx Jerusalén. Dan Oliib suga' gajxh Jerusalén. Gusajrenini si'cni rnii leii sajz sareni dxej ni rusilajzreni. <sup>13</sup> Che biu'reni Jerusalén, bidzujn'reni ro' yu' cadre rbäzlaareni. Yu'ga najc jiaa yejc stee yu'. Ro'c rbäzlaa Pedr näjza Jacoob, Juan, Andrés, Felipe, Tomás, Bartolomé, Mateo, Jacoob xi'n Alfeo, Simón nani laaza Zelote, näjza Judas bejtz Jacoob. <sup>14</sup> Ro'c yu' guiraareni näjza regunaa näjza Marii xnan Jesucrist näjza rebetzhuin Jesucrist. Cabejdx, canabreni loj Dios; tejsi najc xhigab xten guiraareni.

<sup>15</sup> Nadxagsa' te gayuu gaj'l bejn. Dxejcti huisulii Pedr galäiireni, räj'pni loj rebejn:

<sup>16</sup> —Caniä lojtu, resa'ä, nanabpac soob xtidx Sprit Dxan xten Dios ni bacuaa toDavid lo guiitz xcuent Judas, nani bato' Jesucrist loj renani gunaaazni. <sup>17</sup> Gujc Judas sa'nu, bejnzani lagajc dzuun ni biennu. <sup>18</sup> Cua' Judas meel ni badeedreni lojni che bato'ni Jesucrist. Che gulujx bejnni dzunguijdx ni bejnni, badeedsacni meel lojreni. Gusiireni te la' yuj. Dxejcti lagajc Judas basäl duu guejnni, guzäbnajl'ni lo bej, gujtni. Gusaguijni, dxejcti biräjs xque'ni birii guiraa reziini. <sup>19</sup> Che biejn diajg rebejn Jerusalén si'c, gulälajreni yujre Acéldama, ni säloj yurejn. <sup>20</sup> Neñ guiitz ni laa Salmos abacuaa toDavid rediidxre:

Sujianxteb rolijzni;

na'c cuääzru bejn rolijzni;

näjza:

Suxca'za ste'ca niguii xtzuumni.

<sup>21</sup> Naj nanab cuenu stee niguii —räjp Pedr—. Nanab gacni tej ni gusanäj nuunu guideb redxej ni guyunäj Jesucrist nuunu, <sup>22</sup> dxejli ni gusloj batiobnis Juan hasta dxej ni huäjs Jesucrist xhaguibaa. Te gacnäj niguiire nuunu gusule'nu diidx gubañsacpac Jesucrist lo rebengut.

<sup>23</sup> Dxejc gulääreni tiop niguii lojreni, tejni laa José Barsabás ni rbälajreni Justo, steeni laa Matías. <sup>24</sup> Gurejdx, gunabreni lo Dios, räjpreni:

—Dad, Dios, ni racbee lastoo guiraa rebejn, baluii loonu con ni najc niguii ni agulelu loj guiro'p niguiire, <sup>25</sup> te jiu'ni lo dzuun näjza lo yälapost ni basa'n Judas cheni sääni garenca nejz —räjpreni.

<sup>26</sup> Dxejcti gudzujtreni daad te gulereni lo guiro'preni. Che biajb daad, gulereni Matías. Dxejc bigabnäj Matías stzubiteeb reapost te gujcreni tzubitio'p apost.

## 2

### *Biääd Sprit Dxañ xten Dios*

<sup>1</sup> Che bidzujñ dxej ni rajc lanij xten Pentecostés, tre' guiraareni tejsi lajt neñ te yu', <sup>2</sup> chela gusloj cayubej xhaguibaa si'c te beroduxh, bachajni guideb neñ yu' cadre suga'reni. <sup>3</sup> Dxejc bahuiireni astoo carechxeb xhidajl bale' casanij rebajlga yejc tejga reni sojb ro'c. <sup>4</sup> Biu'ti Sprit Dxañ xten Dios neñ lastoo guiragajcreni. Dxejc gusloj caniireni garen-garen didxsaj si'ctisni badeed Sprit Dxañ xten Dios guiniireni.

<sup>5</sup> Neñ redxejga, xhidajl rexpejn Israel ni sasanäjpac xtidx Dios bidzujñ guedx Jerusalén. Xhidajl lajt biriireni siäädreni. <sup>6</sup> Che biejn diajgrenti guyubej beduxhga, bidojp rebeñ xhidaalga, bachaag sa'reni. Rdxeloduxh rebeñ xhidaalga sa'csi cayejñ diajgrenti canii reapost xtidxsajpac cade tejreni. <sup>7</sup> Cadxelojreni räjpreni:

—¡Bahuilaare! ¿La et beñ Galileedi renani canii, ä? <sup>8</sup> ¿Xhoxh riejñ diajgnu caniireni xtiidxpacnu si'ctis ni rniinu laadxnu, ä? <sup>9</sup> Najcnu beñ nación Partia, beñ nación Media, beñ región Elam, beñ Mesopotamia, beñ Judea, beñ estad Capadocia, beñ región Ponto, näjza beñ Asia. <sup>10</sup> Najczanu beñ distrit Frigia, beñ estad Panfilia, beñ nación Egipto, näjza beñ ni siääd stelaad Cirene, te estad neñ Africa. Loj rebejn ni siääd Roma yu' reni najc xpejn Israel, yu'za reni bazuxhijb lo Dios sa'csi rililajzreni si'cni rililajz rexpejn Israel. <sup>11</sup> Yu'za beñ Creta. Yu'za beñ nación Arabia. Guiragajcnu riejñ diajgnu caniireni xtiidxpacnu si'ctis ni rniinu laadxnu. Caniireni loonu xcuent recosroduxh ni cayujñ Dios.

<sup>12</sup> Bidxeloduxh rebeñ xhidaalga, dijiejn xhi xhigab gunreni. Räjpreni lo sa'reni:

—¿Xhi säloj dee?

<sup>13</sup> Dxejcti guyu' rebejn ni baxhiznäjreni, räjpreni:

—Agusojz redee.

### *Gunii Pedr loj rebejn*

<sup>14</sup> Dxejcti gusulii Pedr näjza tzubiteeb sa'ni, guredxa'ni guniini lo rebeñ xhidaalga:

—Guejbtu, rexpejn Israel, nani rbäjz distrit Judea näjza guedx Jerusalén. Colcuadijg diidx nani guiniä. <sup>15</sup> Xhet sojzdinu si'cni cayujntu xhigab. Rsilru naj, entis gojl rcagaa.

<sup>16</sup> Dxejc scree gunii Joel che guniini xtidx Dios agujc xchero. <sup>17</sup> Räjp Dios:

Sidzujñ dxej che guxhalä Xsprit Dxañä cuääzni neñ lastoo guiraa rebejn.

Rexingaantu näjza rexindxa'ptu sinii xtidxä xcuent recos ni gajd gac.

Rexi'ntu sinixcal,

rextadgoldootu sului loj bacal recos nani guluiä lojreni.

<sup>18</sup> Guxhalä Xsprit Dxañä loj guiraa reni siädnañ narä.

Siniireni rediidx ni gudedä lojreni xcuent recos nani gajd gac.

<sup>19</sup> Suluiä lojtu balti senro xhaguibaa näjza lo guedxliuj.

Resenro ni gac najc rejn con guiboo, luxh guxh sire' si'c te za.

<sup>20</sup> Sicäjy loj gubijdx, sajc bäii si'c rejn.

Sajc guiraa recosre,

dxejcru sidzujn dxeduxh che jiälsacä narä, Dios.

<sup>21</sup> Dxejc guiraa rebejn nani cueedx guiniab gacnäy Diosreni, reni'c siliaa lo dojl.

<sup>22</sup> Räjpedr lojreni:

—Rexpejn Israel, colcuadiajg xtidxä. Dios baluui Jesucrist, beñ Nazare't, lojtu por recosro, remilagwr, reseen nani bejnne nez lojtu. Lagajc Dios badeed yälrnibee loj Jesucrist te bejnne redzunroga. La'tu nancheetu dee. <sup>23</sup> Galooli ananchee Dios xhi guntu loj Jesucrist Xi'nni. Basaanza Dios bateedtu Jesucrist ladznaa rebenguijdx te bacuaareni Jesucrist lo cruiz te bagu'trenini. <sup>24</sup> Baspañsac Dios Jesucrist, baslaa Diosni ladznaa yälgujt, sa'csi di niajcdi nica' yälgujtni par tejpas, sa'csi laani rnibee lo yälgujt. <sup>25</sup> Che gubañsac Jesucrist, guzobj diidx ni bacuaa David lo guijtzc xcuent Jesucrist. Räjpedr David lo Dios:

Guira dxej ruhuiä lojlu, Dios.

Suga'lu xladbeä cayacnäjlü narä te di guidxejb lastoä.

<sup>26</sup> Ni'cni bibalajz lastoä, guniäza lojlu lacti rbaa lazä.

Rbalazä sa'csi suhuiilu narä che guetä.

<sup>27</sup> Dizalu gusaan jia'n xaimä neñ baa.

Dizalu gusaan gudx tiejxh xi'nlu nani sanälajzlu.

<sup>28</sup> Abaluiilu löä xho guibañä par tejpas.

Sibalazduxhä sa'csi guibañää luj,

si'c räjpedr David xcuent Jesucrist.

<sup>29</sup> Räjpedr:

—Guyasi guiniä lojtu agujc xchero gujt David. Aguyutzutznä neñ baa. Sajc guihuiinu baa cadre biga'tz David. <sup>30</sup> Gunii David xtidx Dios. Che nabajñli David bia'n diidx gudeed Dios te xajgni ni guirilaj Crist, luxh laani gacni reii si'cni gujc David. <sup>31</sup> Sa'csi baluixgaa Dios recosre lo David, ni'c räjpedr David sibansac Crist lo rebengut sa'csi di Dios gusaan jia'n xaimni neñ baa, dizani gusaan gudx tiejxhni. <sup>32</sup> Guläs Dios Jesucrist lo rebengut. Nuure bahuiloonuni, najcnu testiigw gubañsacni lo rebengut. <sup>33</sup> Gurejdx Dios Jesucrist. Naj nabajñ Jesucrist xhaguibaa, nabejni xladbee Dios ro'c canibeeni. Badeed Dios Xsprit Dxanni loj Jesucrist si'cni bia'n diidx. Naj abaxhal Jesucrist Sprit Dxan lo guedxliuj. Jesucrist cayujn guira'ti nani cahuiitu, nani cayejn diajgtu nadxej. <sup>34</sup> Di David nij xhaguibaa, sa'csi lagajc David räjpedr:

Gunii Dios lo Dad nani rnibee löä: “Gurej xladbeä

<sup>35</sup> che guidzujñli dxej gudzugä guiraa reni rdxe'ch lojlu te gacbeereni luj rnibeelu guira'ti.”

<sup>36</sup> 'Rniliäpac lojtu —räjpedr—. La'tu bacuaatu Jesús lo cruiz. Ni'cni, colgacbee, guiraatu xpeñ Israel, abejn Dios gac Jesúsre Dad nani rnibee loonu.

<sup>37</sup> Che biejn diajgreni laareni bacuaareni Jesús lo cruiz, guc-huinuxh lajzreni. Räjpreni lo Pedr näjza lo reapost ni suga' ro'c:

—Aiilu, resa'nu, ¿xhini'c jiennu naj?

<sup>38</sup> Dxejcti räjpedr lojreni:

—Colgusiech lajztu, colguirobnisza, sa'csi ni'c najc te seen rlanjztu chanajltu Jesucrist, te si'c jia xtojltu. Dxejc suniidx Dios Sprit Dxan cuääz neñ lastootu. <sup>39</sup> Si'c rlanjz Dios guniidx Xsprit Dxanni lojtu näjza loj rexintu, näjza lo rebejn ni rbäjz zijtru, näjza loj guiragajc rebejn nani cueedxni —si'c gunii Pedr lo rexpejn Israel.

<sup>40</sup> Dxejcru gunii Pedr xhidajlru diidx, balijdxni rebejn:

—Colguirii loj reben latsiaj ni re' lo guedxliuj naj, te laatu lo dojl.



<sup>41</sup> Xhidajlreni huililajz rediidxga. Dxejcti gurobnisreni sa'csi huililajzreni xtidx Dios. Lagajc dxejga huililajz si'cti choṇ miḷ bejn. <sup>42</sup> Sanuutis rusoobreni diidx ni baluii reapost, bibalazduxhreni sa'csi bidxaag sa'reni con rexpejn Jesucrist, gudaunäj sa'reni si'c gudaunäj Jesucrist rexpejn pacni, bidojpreni tejsi lajt te guniireni lo Dios.

### *Xho gubajn rexpejn Jesucrist galoo*

<sup>43</sup> Bidxeloduxh guiraa rebejn luxh bejn reapost redzunro, remilagwr. <sup>44</sup> Bichaag sa' renani huililajz xtidx Dios. Bachagsa'reni xhixtenreni te tejsi gojpreni guiraa xhixtenreni. <sup>45</sup> Bato'reni xhixtenreni, dxejcti badeedreni meel lo sa'reni si'ctis ni caquiin chutis tejreni. <sup>46</sup> Guixe-guixee bidojpreni neṇ guidoro xten Israel. Tejsi najc rexhigabreni. Gudaunäj sa'reni rolizj cadetejreni, guiraareni bibalaznăduxh sa'reni. <sup>47</sup> Gulă'preni xpala'n Dios. Guiraa rebejn gunii rexpejn Jesucrist najc bensa'c. Guixe-guixee batie' Dios xhidajlru bejn nani rililajz xtiidxni, badzucajni rextojlreni, dxejc bachaagreni lo rexpejn Jesucrist.

## 3

### *Biajc niguii nani racxhuu ni'ni*

<sup>1</sup> Guyu' te dxej sää Pedr năjza Juan nez loj guidoro si'cti rcachon gudxej. <sup>2</sup> Guyu' te niguii nani racxhuu ni'ni, digacdi sani che gojllini. Guixe-guixee rile'c bejn niguiiga ro' puertroga xten guidoro. Puertroga laa Sacré. Ro'c rbejni rniabni gojn lojreni riu' guidoo. <sup>3</sup> Che bahuiini agojl jiu' Pedr năjza Juan neṇ guidoroga, gunabni te gojn lojreni. <sup>4</sup> Dxejcti bahuii Pedr năjza Juan lojni. Răjp Pedr lojni:

—¡Bahuii loonu!

<sup>5</sup> Che biejn diajg niguiiga xtidx Pedr, bahuiini lojreni sa'csi naani sudeedreni meel lojni.

<sup>6</sup> Răjp Pedr lojni:

—Xhetliidi meeldi rapă, nani rapătis sunidxă lojlu. Xcuent xcălrnibee Jesucrist, beṇ Nazare't, rniă lojlu: ¡Gusulii! ¡Gusaj! —răjpn.

<sup>7</sup> Dxejcti gunaaz Pedr naani, gulăsnini. Biligajc ni'ni, gusutijp ni'ni. <sup>8</sup> Huisuyălni, gusajni. Biunăjni Pedr năjza Juan neṇ guidoro. Rsiajni, rtiăsni, cală'pni xpala'n Dios. <sup>9</sup> Bahuii xhidajl bejn lojni neṇ guidoro, rsiajni, cală'pzani xpala'n Dios. <sup>10</sup> Biembeereni laa niguii ni rbej ro' puertro xten guidoro, rniabni gojn. Guiraareni bidxeloduxhreni bahuiireni xhi gusajc niguii ni gucxhuu ni'ni.

### *Baluii Pedr xtidx Dios neṇ cordoor xten guidoro*

<sup>11</sup> Ro' guidoroga yu' te cordoor ni laa Cordoor xten Salomón. Ro'c suga' Pedr năjza Juan, naztzu'tz niguiiga naareni. Ruxuṇ guiraa rebejn bidzujṇ neṇ cordoorga. Bidxelojreni sa'csi arsiajc niguii ni gucxhuu ni'ni. <sup>12</sup> Che bahuii Pedr lo rebejn răjpn lojreni:

—¿Xhicuent rdxeloj guejbtu, rexpejn Israel? Pet naatu nuure basiajcnu ni' niguiire. Xhet nuudire basiajcnu ni'ni. Xcuent xcălrnibee Jesucrist biajc ni' niguiire. <sup>13</sup> Xtiooznu, ni najc Xtiooz toxtadgoldoonu Abram, toxtadgoldoonu Isaac, năjza toxtadgoldoonu Jacob, lagajc Diosga abadeed yălrnibee loj Xi'nni Jesús. Niluxh la'tu bateedtuni ladzṇaa reguxhtis. Che rlajz Pila't ni rnibee nuslaa Jesucrist, ditu nicăjb niriini, alga guniyajtuni nez loj Pila't. <sup>14</sup> Niluxh la'tu baro'ntu Xi'n Dxaṇ xten Dios nani rujn ganax dzunsa'c. Alga gunabtu birii te niguii nani bagu't bejn. <sup>15</sup> Jesucrist rudeed yălnabajn, luxh la'tu gunabtu bacuaareni Jesucrist lo cruzj. Gulăssac Dios Jesucrist lo rebeṇgut. Bahuiloonu nabajn Jesucrist, najcnu testiigw gubaṇsac Jesucrist lo rebeṇgut. <sup>16</sup> Cahuiitu loj niguiire nani gucxhuu ni'ni, luxh rumbeetuni. Xcălrnibee Jesucrist abasiajc niguiire, sa'csi huililajzni. Sa'csi huililajznu xtidx Jesucrist, ni'c biajcni te najcni si'cni rhuiituni naj.

<sup>17</sup> 'Rexpejn Israel, nară nană di'tu niacbee, diza rexcuxhtistu niacbee laa Xindxaṇ xten Dios ni bacuaatu lo cruzj. <sup>18</sup> Scree gujc te guzojb xtidx Dios ni cuaj lo guijtz

agujc xchero. Diidxre bacuaa reniguii ni gunii xtidx Dios, Crist xten Dios sidejd trabajwduxh. <sup>19</sup> Ni'cni colsiechlajztu, colguibi' loj Dios te guibicaj xtojltu. Dxejc susiälyuj Dios lastootu, sujnni gac nacoob guira'ti, si'cni bia'n diidx gacni. <sup>20</sup> Lojtu suxhalza Dios Jesucrist nani rnibee, nani aguleni galooli. <sup>21</sup> Naj nungäjl jia'n Jesucrist xhaguibaa dxejli guscoob Dios guiralii recos si'cni bia'n diidx gac, si'cni gunii Dios lo reniguii nani gunii xtiidxni lo retoxtadgoldootu agujc xchero. <sup>22</sup> Scree gunii toMoisés lo retoxtadgoldoonu, räjpni: “Xtadnu Dios suxhal te niguii sa' narä nani cueni lo resa'tu. Siniini xtidx Dios. Colgusobdiajg guiralii diidx nani guiniini lojtu. <sup>23</sup> Renani di gusooob rextiidxni, sinitlojreni, direni gac rexpejn Dios.”

<sup>24</sup> Räjpza Pedr:

—Sigajcza agunii guiralii reniguii nani gunii xtidx Dios. Si'c agunixгаа toSamuel, näjza guiraa reniguii ni siädnajlni, xcuent recos ni cayajc nen redxejre. <sup>25</sup> La'tu najc xajg reniguii ni gunii xtidx Dios. La'tu biannäjtü diidx nani gunii Dios loj retoxtadgoldoonu. Bia'n diidx, räjp Dios loj toxtadgoldoonu Abram: “Jiädjiajl te xajglu ni guspalazduxh reben guedxliuj, sa'csi suslaanireni lo dojl.” <sup>26</sup> Dxejcti ganiddoo lojtu baxhal Dios Jesucrist te guibaa lajztu che gusiejch lajztu, te na'cru guntu dojl —räjp Pedr.

## 4

### *Baluu Pedr näj Juan xtidx Dios loj reguxhtis*

<sup>1</sup> Laļ ni caniireni lo rebejn, ro'c bidzujn rebixhojz xten Israel näjza nani rnibee lo resoldaad xten guidoro näjza resaduceos. <sup>2</sup> Bidxe'chduxhrene sa'csi cagulijdxrene rebejn, cayäjpreni:

—Sibañsac rebejn lo rebeñgut sa'csi gubañsac Jesucrist lo rebeñgut.

<sup>3</sup> Gunaaz reguxhtisrene, biäureni sa'csi agudxej luxh abiäu jusgaad. Nen latzguiib barareni yääl. <sup>4</sup> Xhidajļ reni biejn diajg xtiidxrene huililajz xtidx Dios. Si'cti gaii mil niguii huililajz xtidx Dios.

<sup>5</sup> Che bara yääl, bachaag sa' guiraa rebeñgool, renani rnibee guedx Jerusalén, näjza rebejn ni ruluii leii, <sup>6</sup> näjza Anás ni rnibee guiraa rebixhojz, näjza xpagojzni ni laa Caifás, näjza Juan, näjza Alejandro, näjza guiraa reniguii ni najc sa' rebixhozro ni rnibee.

<sup>7</sup> Gunibeereni biääd Pedr näjza Juan gusuj galäiireni te gunabdiidxrene lojreni:

—¿Chu xcälrnibee rajptu? ¿Chu laj basä'ttu te basiajctü niguiire?

<sup>8</sup> Dxejcti sa'csi cayu Pedr diidx ni canii Sprit Dxan xten Dios nen lastooni, räjpni lojreni:

—Caniä lo guejbtu, reguxhtis näjza rebeñgool xten rexpejn Israel, <sup>9</sup> palga canabdiidxtu xhicuent gucnäjnu niguii nani gucxhuu ni'ni, palga canabdiidxtu xho basiajctü niguiiga, <sup>10</sup> gusule'nu xcuent dee te gacheetu te gacheeza guiraa rexpejn Israel. Xtidx Jesucrist najc yälrnibeduxh. Diidxga abasiajctü ni' niguiire, xhet rajcdini suga'ni nez lojtu. La'tu abacuaatu Jesucrist lo cruzj, niluxh Dios guläsni lo rebeñgut. <sup>11</sup> Di'tu ninälajz xtidx Jesucrist. Laani najc si'c te guij nani rbäcajtu che runcheetu te yu'. Per Dios abejn najc Jesucrist si'c guij nani maazru nacsac, nani guyu' squiin xte yu'. <sup>12</sup> Xtebtis Jesucrist ruslaa bejn lo dojl, ruti stee bejn lo guedxliuj nani baxhal Dios te guslaani bejn lo dojl —si'c räjp Pedr.

<sup>13</sup> Che biejn diajgreni xtidx Pedr, bidxelojreni sa'csi di Pedr näjza Juan guidxejb, dizareni guitujy. Dxejcti räjp rebixhojz ni sajcro lo sa'reni:

—Direni ganduxh guijt, bejñtisrene.

Dxejcti gucbeereni gusanäj redee Jesucrist, lojni bisieedrene. <sup>14</sup> Bahuiiza rebixhojz lo niguii ni abiajctü ni'ni, suganäjni guiro'preni. Ro'cti xhetru gujcdi gunii rebixhojz sa'csi laaca bejnrene. <sup>15</sup> Dxejcti gunibee rebixhojz birii guidxojnrene telaad te bij rebixhojz diidx ensilaareni. <sup>16</sup> Räjpreni lo sa'reni:

—¿Xhi jiennäanu reniguiire? Guiraa reben Jerusalén anajn xcuent dzunroduxhre ni cayujnreni. Digacdi gucuatzlaaznuni. <sup>17</sup> Per te di guire'ch xtidx Jesucrist ste'ca guejdx, do'o gulijdxnu guidxojnreni te na'c guiniirureni xtidx Jesucrist ste'ca guejdx.

<sup>18</sup> Huixisac rebixhojzreni. Dxejcti räjpreni lojreni:

—Na'c guluirutu xtidx Jesucrist, na'cru guiniitu xtiidxni.

<sup>19</sup> Dxejc gunii Pedr näjza Juan, räjpreni lojreni:

—¿Colguinii loonu chu xtiidx sajcrú guicuadaaagnu? ¿Xtiidx la'tu, o xtiidx Dios?

<sup>20</sup> Digacdi gusäunu ro'nu. Nanabpac gusule'nu diidx xcuent recos nani abahuiinu näjza rediidx ni abiejn diajgnu.

<sup>21</sup> Balidxsac rebixhojzreni te na'cru guiniireni xtidx Jesucrist. Dxejc basläa rebixhojz guiro'preni, sa'csi xhetru niajcdi niujnreni lo Pedr näjza Juan, sa'csi canii rebejn bejnreni te dzunsa'c. Xhidajl rebejn gulä'pza xpala'n Dios sa'csi bahuiireni xhini'c gujc ro'c. <sup>22</sup> Sa'csi niguii ni basiajcreni xcuent yälmilagwr agudejdni tiuu ijz.

### *Guredx-gunab rexpejn Jesucrist lo Dios*

<sup>23</sup> Che basläa rebixhojz guiro'preni, gubi'reni lo sa'reni ni najc rexpejn Jesucrist. Bijreni diidx guiraa ni gunii reguxhtis xten rebixhojz näjza rebeṅgool lojreni. <sup>24</sup> Che biejn diajg rexpejn Jesucrist xtiidxreni, tejtis xhigab bejnreni guredx-gunabreni lo Dios, räjpreni:

—Xtadnu Dios, nani benchee xhaguibaa näjza guedxliuj näjza nisdoo näjza guira'ti ni yu' lojreni, neṅreni, <sup>25</sup> nani bejn basoob toDavid xtidx Sprit Dxaṅ te bacuaani xtiidxlu, räjpni:

¿Xhicuent guyuduxh reben guedxliuj yärsia'?

¿Xhicuent bejn rexpejn Israel xhigab ni xhet sajcdi?

<sup>26</sup> Bidxagsa' rereii lo guedxliuj näjza reguxhtis xten reguejdx te gudxojnreni xtzun Dios näjza xten Dad Crist nani baxhal Dios, si'c gunii toDavid.

<sup>27</sup> 'Aguzojb diidxre, sa'csi lo guejdxre bidxagsa' Herodes näjza Poncio Pila't näjza rexpejn Israel näjza rebeṅzijt nani di gac xpejn Israel. Bidxehnäjreni Xi'nlu nani najc Crist ni baxhallu. <sup>28</sup> Naj abejnreni dzunguijdx si'cni galooli guniilu gac. <sup>29</sup> Naj Guejblu Xtiosnu, bahuii xho cagusacsíreni nuure, gucnäj nuure te gutiplaaznu, te na'c guidxeebnu guiniinu xtiidxlu, sa'csi najcnu rexpejnlu. <sup>30</sup> Baniidx xcälrnibeelu loonu te guisiajcnu rebejn, te jienzanu redzunro, remilajgwr con xcälrnibee Xi'ndxaṅlu Jesucrist.

<sup>31</sup> Che gulujx gurejdxreni lo Dios, gusloj canibsejz yu' cadre tre'reni, cayac si'c te xu. Dxejcti biääd Sprit Dxaṅ xten Dios basutijpruni lastooreni. Dxejc dirureni nidxejb guniireni xtidx Dios.

### *Rudeedreni xhixtenreni lo sa'reni*

<sup>32</sup> Guiraa renani huililajz xtidx Dios, tejsi xhigab bejnreni. Rut chu tejdireni bejn guinibexteb xhixtenni: bachaagreni sa' rehxixtenreni te xca' guiraareni nani rquiinreni. <sup>33</sup> Gucnäj Dios reapost, gusutzu'tzreni bijreni diidx bahuilojreni loj Jesucrist che gubaṅsacni lo rebeṅgut. Gucnäj Dios guiraa rexpejn Jesucrist, luxh gopduxh rebeṅ guejdx respe'treni. <sup>34</sup> Ni'cla tejreni di niääd xhixtenni sa'csi renani gojp xyujni, rolizjni, bato'renini, dxejcti biädnäreni xcuentni, <sup>35</sup> badeedreni meelga lo reapost. Dxejcti gudis reapost meelga lo guiraa renani rquiinni. <sup>36</sup> Guyu' te niguii ni laa José. Lajdxni najc Chipre, ni re' lo nisdoo. Najcni sa' rexfamil levita. Reapost gulälajni Bernabé (ni säloj xtiidxreni bejn ni rbecdxi lajz sa'ni). <sup>37</sup> Scree gulälajrenini sa'csi bato'ni te la' yuj xtenni, dxejcti badeedni meel ni cua'ni lo reapost.

## 5

*Ananías näj chäälmi rujn dojl*

<sup>1</sup> Guyu' stee niguii ni laa Ananías. Chäälni laa Safira. Bato'reni te la' yuj. <sup>2</sup> Niguiire biannäjni gala' meel, dxejc sgala' meelga badeedni lo reapost si'c guiraa xcuent yujga luxh chäälni nanchee xhi cayujnni. <sup>3</sup> Dxejcti räjp Pedr lojni:

—Ananías, ¿xhicuent rusooblu xtidx Satanás ni rnibee lo rebeñdxab, ä? ¿Xhicuent rlajzlu gusgueelu Sprit Dxan xten Dios? Biannäjlu gaii meel ni cua'lu che bato'lu te la' yuj. <sup>4</sup> Che gajdlu guto' yujga, xtenluni. Che bato'lu yujga, ¿la xhet xtendilu meel ni cua'lu? ¿Xhicuent bejnlu xhigab neñ lastoolu gunlu dee? Loj Dios guniilu didx-xhii, xhet loodinu.

<sup>5</sup> Che biejn diajg Ananías xtidx Pedr, biajbni lo yuj, gujtni. Bidxebduxh rebejn che biejn diajgreni xhi gusajcni. <sup>6</sup> Sas gubig gaii bi'n batejbreni Ananías neñ lajd. Dxejcti sanärenini huicua'tzrenini neñ baa.

<sup>7</sup> Pet agujc choñ or gujtni chela bidzujñ chäälni Ananías. Dini gan agujt chäälni. <sup>8</sup> Räjp Pedr lojni:

—Gunii, ¿la bato'tu xyujtu si'cni naj chäällu huijni, ä?

Räjp Safira lojni:

—O'n, si'c huijni.

<sup>9</sup> Dxejcti räjp Pedr lojni:

—¿Xhicuent bejnlu tejsi xhigabguijdx con chäällu? ¿Xhicuent rlajzlu gusgueetu Sprit Dxan xten Dios? Ro lä' siääd renani huicua'tz chäällu. Naj näjza luj chacua'tzreni neñ baa.

<sup>10</sup> Si'ctis biajb Safira, gutgajczani. Dxejcti bidzujñ rebi'n, bahuiireni agujtni. Dxejcti guläsrenini, biriireni huicuatgajcneni cuä' baa cadre biga'tz chäälni. <sup>11</sup> Bidxebduxh guiraa rexpejn Jesucrist, näjza guiraa rebejn nani biejn diajgni recosre.

### *Bejn reapost xhidajl redzunro, remilagwr*

<sup>12</sup> Xhidajl redzunro, remilagwr bejn reapost nez loj rebeñguejdx. Nadxaag sa' rexpejn Jesucrist, caguchaagreni diidx neñ cordoor ni laa Salomón. <sup>13</sup> Guyu' xhidajl bejn ni di nuchaag lo rexpejn Jesucrist sa'csi bidxebreni guchaagreni lojreni. Rebeñguejdxga guläpduxhreni xpala'n rexpejn Jesucrist. <sup>14</sup> Neñ redxejga xhidalduxh rebejn huililajz xtidx Jesucrist, niguii sigajc gunaa. <sup>15</sup> Dxejcti gulääreni lo nezyuj rebejn nani cayacxhuu. Siädnä rebejn beñracxhuu naga' lo da', te gaxäjsi ted xpala Pedr yejcreni che ted Pedr ro'c, te si'c jiajcreni. <sup>16</sup> Guedx Jerusalén bidzujñ xhidajl rebejn ni siääd ste'ca guejdx. Biädnäreni rebejn ni cayacxhuu näjza balti bejn ni yu' beñdxab neñ lastooreni. Con xcälrnibee Jesucrist basiajc reapost rebeñ racxhuu, gulääzreni rebeñdxab neñ lastoo balti bejn.

### *Gudejd reapost trabajw*

<sup>17</sup> Dxejcti bidxechlajz bixhojz ni rnibee, näjza reniguii ni laa saducee, sa'csi calä'p rebeñguejdx xpala'n reapost sa'csi basiajcreni rebeñ racxhuu. <sup>18</sup> Gunaazreni reapost. Basäurenini neñ latzguiib. <sup>19</sup> Niluxh yäälga, biääd te angl xten Dios, baxhalni ro' latzguiibga. Dxejcti gulääni reapost neñ latzguiib. Räjpni lojreni:

<sup>20</sup> —Colchäj guidoro. Ro'c colguinii lo rebejn xho gac guibaññajreni Dios par tejpas.

<sup>21</sup> Che biejn diajgreni si'c, rsildooru biu'reni neñ guidoro, ro'c baluiireni xtidx Dios lo rebejn.

Dxejc bixhojz nani rnibee, näjza rebeñgool, bachagsa'reni gurejdxreni guiraa reguxhtis xten guidoo, näjza guiraa reguxhtis xten rexpejn Israel. Dxejcti gunibeereni jiädnä reguixhajg reapost nani biäu neñ ladtguiib. <sup>22</sup> Che bidzujñ reguixhajg latzguiib, bahuii reguixhajg neñ latzguiibga, niluxh rut yu'di neñ latzguiib. Che gubi'reni biädnäreni diidx, räjpreni loj reguxhtis:

<sup>23</sup> —Che bidzunnu latzguiib, niäudzu'tz ro' latzguiib luxh resoldaad ni cayajp ro' latzguiib suga' guiro'p laad. Che baxhalnu ro' latzguiib, rut yu'di neñ latzguiib.



<sup>24</sup> Che biejn diajg bixhojz ni rnibee, näjza capitán nani rnibee resoldaad xten guidoro, näjza rebixhojz, ben tio'p lajzreni, räjp lo sa'reni:

—¿Xhini'c gujc? ¿Xhoni gac naj? —räjpreni.

<sup>25</sup> Dxejcti bidzujñ te niguii, räjpni lojreni:

—Reniguii ni basäutu neñ latzguiib, areni suga' neñ guidoro, luxh caguluiireni rebejn —räjpreni.

<sup>26</sup> Dxejcti sanä capitán xten resoldaad rexcuxhtis guidoro te biädnäreni reapost, luxh direni nusacsí reapost sa'csi rdxejbreni nucuaarení guij yejcreni. <sup>27</sup> Che bidzunnäjreni reapost, räjpreni suurení nez loj reguxhtis xten Israel, sas gunii bixhojz ni rnibee, <sup>28</sup> räjpni loj reapost:

—¿Et agunibeenu lojtu na'cru guiniitu xtidx Jesucrist? Xhoxh naj cagutie'chtu rediidxga lo guiraa rebejn neñ guedx Jerusalén. La'tu rlanjtu cuaquijtu nuure bagu'tnu Jesucrist.

<sup>29</sup> Dxejc räjp Pedr näjza reapost lojreni:

—Nanabpac gusoobnu xtidx Dios, lacuaa gusoobnu xtidx bejn. <sup>30</sup> Bagu'ttu Jesucrist che bacuaatuni lo cruiz. Niluxh Xtios xtagoldoonu guläsni lo rebeñgut. <sup>31</sup> Naj agule'c Diosni xladbeeni cadro rnibeeni, abadeedza Dios yälrnibee loj Jesucrist te guslaani nuure, te si'c rlanjni guibicaj xtojñ guiraa rexpejn Israel nani gusiechlajzreni. <sup>32</sup> Bahuiloonu xhi bejn Dios. Ni'c cagusule'nu. Nadoncheenu Sprit Dxan xten Dios cayacnäy nuure te gusule'nu rediidxre. Badeed Dios Sprit Dxan xtenni lo guiraa renani susoob xtiidxni.

<sup>33</sup> Che biejn diajg reguxhtis rediidxga, bidxechduxhreni, rlanjreni nugu'treni reapost.

<sup>34</sup> Dxejcti huisulii te niguii ni laa Gamaliel, nani najc te farisee nani ruluii leii xten Israel, rebejn rapduxh respe't dade'ga. Gunibee Gamaliel guirii reapost neñ yu'ga.

<sup>35</sup> Dxejcti räjp Gamaliel lo rebixhojz:

—Guejbtu rexpejn Israel, colyensa'c xhigab xhini'c rlanjtu gunnäjtu reniguiire. <sup>36</sup> Colzaa lajztu gajd gac xchej guyu' tej ni laa Teudas, räjpni rnibeduxhni. Dxejc huinajl tajp gayuu bejn. Che bagu'trenini, bire'ch guiraa rexpejn, xhetru bejndireni. <sup>37</sup> Neñ ijz ni guyu' cens, biriiza Judas ni siääd Galilee. Dxejc gurejdxni xhidajl bejn ni huinajlni. Bagu'tza bejn, dxejcti bire'chza guiraa reni huinajlni. <sup>38</sup> Naj rniä, colguibicaj, colgusaan reniguiire, rexpejn Jesús. Palga guejbcarení cayujnreni dzuunre, xtebcani sinitlojni. <sup>39</sup> Palga xtzuun Dios ni cayujnreni, digacdi guscuääznu dzuunga, sa'csi guidiñnu guidxe'ch Gueb Dios loonu.

<sup>40</sup> Bichagljajz rebixhojz xtiidx Gamaliel. Gurejdxreni reapost, dxejcti gudijnreni reapost, gunibeereni loj reapost na'cru guiniireni xtidx Jesús. Dxejc baslaarenini.

<sup>41</sup> Biriitireni nez loj rebixhojz. Cabaduxh lajzreni sa'csi gujc gudejdeni trabajw xcuent Jesucrist. <sup>42</sup> Guixe-guixee laltis baluiireni xtidx Jesucrist neñ guidoro näjza rolizj bejn. Cagusule'reni diidx lo rexpen Israel:

—Jesús najc Crist nani cabääztu jiääd.

## 6

### *Gulereni reniguii ni gudeed yätxtiil lo rexpejn Jesucrist*

<sup>1</sup> Neñ redxejga, xhidalro gujc rexpejn Jesucrist. Niluxh gusloj camojm rexpejn Jesucrist nani rnii didx griegw. Räjpreni:

—Xhet laadi cayujn rebejn ni rnii didx hebreo. Rebiuud nani rnii didx hebreo rca'ru loj rexpiuudnu. Rebiuud ni rnii didx hebreo rca'ru xhi gaurení che rguisreni xhi gau rebiuud guixe-guixee.

<sup>2</sup> Dxejcti batie' guitzubitio'p reapost guiraa rexpejn Jesucrist, räjpreni lo guiraarení:

—Et laadi guisaannu guluiinu xtidx Dios te quisnu xhi gau rebiuud. <sup>3</sup> Ni'c nanab cuetu lo resa'tu gajtz niguii nani najntu najc beñsa'c, nani rbäjz Sprit Dxan xten Dios



neŋ lastooreni, nani yu' xcäriejnreni. Reniguiire quis xhi gaureni. <sup>4</sup> Te si'c sajc chanuutis guiniabnu lo Dios, guiluizanu xtidx Dios lo rebejn.

<sup>5</sup> Guiralii rebejnğa bidxaglazreni diidxga. Dxejcti gulereni Esteban, te niguii ni rililajzpac xtidx Dios, rbäjzsa Sprit Dxan xten Dios neŋ lastooni. Gulezareni Felipe, Prócoro, Nicanor, Timón, Parmenas; gulezareni Nicolás nani siäd guedx Antioquía. Nicolás najc te proselite, nalajznu, dini gac xpejn Israel, per basoobni xleii toMoisés che gajdni chalilajz xtidx Jesucrist. <sup>6</sup> Sas biädnä rexpejn Jesús guigajtz niguiiga lo reapost. Dxejcti guredx-gunab reapost lo Dios xcuent reniguiiga, batzuubreni ñaareni yejc reniguiiga si'c te seen abiu'reni lo xtzuunreni.

<sup>7</sup> Birechduxh xtidx Dios. Xhidajl beŋ Jerusalén huililajz xtidx Dios, näjza xhidajl bixhojz.

### *Gunaazreni Esteban sanärenini lo rebixhojz nani rnibee*

<sup>8</sup> Gucnäduxh Dios Esteban, bejni redzunro, remilagwr nez lo rebejn. <sup>9</sup> Dxejc reben guidoo ni laa Libertados gusloj cadiñaj Esteban. Lojreni nadxaag beŋ Cirene, näjza beŋ Alejandría, näjza gaii beŋ Cilicia, näjza sgaii bejn ni siäd reguedx Asia. <sup>10</sup> Reniguiire di niajcdi nuzejceni diidx lo Esteban, sa'csi nasiñduxhni, luxh cayacnäj Sprit Dxan xten Diosni. <sup>11</sup> Dxejcti baquileni sgaii niguii ni di gac xpejn Jesús, te räjpreni:

—Biejn diaagnu caniyaj Esteban toMoisés näjza Dios.

<sup>12</sup> Scree gujc bache'chreni rebejn näjza rebejn ni ruluii leii näjza rebengool. Dxejcti bachagsa'reni, gunaazreni Esteban. Huinärenini lo reguxhtis xten Israel. <sup>13</sup> Dxejcti biädnäreni reniguii nani baquileni te guniireni didx-xhi. Räjp reniguiire:

—Entis rniyaj Esteban leii xten toMoisés näjza guidodxanre. <sup>14</sup> Abiejnza diaagnu gunii Esteban: “Jesús nazareno sutzujl guidoro, suchaazani leii nani baniidx toMoisés loonu.”

<sup>15</sup> Dxejcti guiraa rebejn ni sobga' ro'c bahuiireni lo Esteban, bahuiireni rujn lojni si'c rujn loj te angl xten Dios.

## 7

### *Diidx ni basule' Esteban lo rebixhojz*

<sup>1</sup> Dxejcti räjp te bixhojz nani rnibee lo Esteban:

—¿La gulii si'c guniilu, ä?

<sup>2</sup> Räjp Esteban lojreni:

—Colgucuadajg rextidxä, guejbtu dad, näjza resa'ä. Xtioznu ni sacduxh, ni rnibee, baluiloj lo toxtadgoldoonu Abram che guläjzni Mesopotamia, che gajdni chaläjz neŋ guedx Harán. <sup>3</sup> Räjp Dios loj toAbram: “Birii lajdxtu, basa'n guiraa resa'lu. Huij cadrotis guluiä lojlu” <sup>4</sup> —räjp Esteban—. Dxejcti birii toAbram lajdx reCaldeos. Huiläjzni guedx Harán. Che gujt xtadni, biädnä Dios toAbram nez ree, cadre rbääznu ñaj. <sup>5</sup> Di Dios nuzalajz nicla tla' yuj cadre suu te ni' toAbram. Niluxh räjp Dios sudeedni yujga lo rexajg toAbram, jiannäjreni yujga che guet toAbram. Niluxh nicla gajd xi'n toAbram chu dxejc. <sup>6</sup> Stee huält räjp Dios lo toAbram: “Rexi'nlu, rexagdoolu, siläjzreni si'c benzijt. Ladxbejn gacreni mos, ro'c susacsí bejnreni si'cti tajp gayuu ijz.” <sup>7</sup> Räjp Dios: “Narä sunä castiigw rebejn ni gusacsíreni che najceni mos. Narä cuää rexagdoolu ro'c, te ree guzuxhijbreni loä neŋ guejdxre”, si'c räjp Dios <sup>8</sup> —räjpza Esteban—. Dxejcti si'c bia'n Dios diidx con toAbram, gunibee Dios gutiuug Abram lagajc laani, te chuni bee; ni'c najc te seen xten diidx ni bia'n Dios con Abram. Guyu' te xi'n toAbram, ni laa Isaac. Che guyu'ni xhujn dxej, basälza toAbram beegani si'c te seenza. Sigajcza bennäj Isaac xi'nni Jacob. Sigajcza bennäj Jacob guitzubitio'p rexi'nni nani najc rexpengoldoo xpejn Israel.

<sup>9</sup> Räjp Esteban:

—Guitzubiteb rexi'n Jacob guyu' te yälrudxojn lo bejtzreni José. Dxejc bato'reni José lo te beŋ Egipto. Dxejc Dios goptzu'tz José. <sup>10</sup> Che gudejd José trabajwduxh, gucnäj Diosni.

Badeed Dios yäl<sub>n</sub>asi<sub>n</sub>duxh lojni. Bejn Dios bichag<sub>l</sub>ajz reii Faraón José. Badeed reii Faraón guj<sub>c</sub>ni gubernadoor xten Egipto. Gunibeeza José guira'ti xhixten reiiga.

<sup>11</sup> Räj<sub>p</sub>za Esteban:

—Che bidzuj<sub>n</sub> dxej guj<sub>c</sub> te gubij<sub>n</sub>, guiraa ne<sub>n</sub> reguedx Egipto näjza guiraa ne<sub>n</sub> reguedx Canaán, trabajw<sub>d</sub>uxh cadejd guiraa rebej<sub>n</sub>. Xhet guyu'di xhi niajw retoxtadgoldoonu.

<sup>12</sup> Che biejn diajg xtadgoldoonu Jacob yu' xhi gaureni ne<sub>n</sub> reguej<sub>d</sub>x xten Egipto, ro'c baxha<sub>l</sub>ni rexi'nni, bica'reni xhi gaureni te huält. <sup>13</sup> Che huijreni stehuält, dxej<sub>c</sub> bazäbdiid<sub>x</sub> José lojreni laani najc bejtzreni. Biembeza Faraón resa' José. <sup>14</sup> Dxejcti baxha<sub>l</sub> José diid<sub>x</sub> jääd xtadni Jacob, näjza guiraa resa'ni, cuääzreni Egipto. Najc rebej<sub>n</sub>ga si'cti gayon<sub>b</sub>itzubigaii bej<sub>n</sub>. <sup>15</sup> Si'c guj<sub>c</sub> te huij Jacob gued<sub>x</sub> Egipto. Ro'c gulä<sub>j</sub>zni, ro'c gujt<sub>n</sub>i. Ro'c gujtza retoxtadgoldoonu. <sup>16</sup> Dxejcti huiinäreni rextzujtreni loj Siquem te biga'tzsacreni ne<sub>n</sub> baa nani gusii toxtadgolnu Abram lo rexi'n Hamor ne<sub>n</sub> gued<sub>x</sub> Siquem.

<sup>17</sup> Räj<sub>p</sub> Esteban:

—Che bidzuj<sub>n</sub>gajx dxej, si'c diid<sub>x</sub> ni bia'n Dios con toxtadgoldoonu Abram, bidal<sub>d</sub>uxh rexpeng<sub>o</sub>ldoonu ne<sub>n</sub> gued<sub>x</sub> Egipto. <sup>18</sup> Dxejcti guyu' te xreii Egipto ni di gan guiraa redzusa'c nani bejn toxtadgoldoonu José. <sup>19</sup> Reiiga basgueeni rexpeng<sub>o</sub>ldoonu, basacsinireni, trabajw<sub>d</sub>uxh bateedni rexpeng<sub>o</sub>ldoonu. Gunibee reiiga basälreni guiraa rebäz niguii te di laareni, te guetreni. <sup>20</sup> Ne<sub>n</sub> redxejga, gojl Moisés. Che guj<sub>c</sub> Moisés báz, te báz daani, saru ruj<sub>n</sub> lojni, huiälajz Diosni. Gulaani cho<sub>n</sub> bäi rolijzni. <sup>21</sup> Dxej<sub>c</sub> huisälrenini, te guzobj xtidx Faraón. Dxej<sub>c</sub> lagajc xindxa'p Faraón bidxäl<sub>n</sub>i Moisés, cua'nini baslaanini si'c xi'nni. <sup>22</sup> Bisieed Moisés guiraa ni najn rebe<sub>n</sub> Egipto. Gunisa'cni diid<sub>x</sub>, bensa'cni dzuun.

<sup>23</sup> Räj<sub>p</sub> Esteban:

—Che guyu'ni tiuu ijz, banaj lajzni resa'ni ni najc xpej<sub>n</sub> Israel, huijni cadro rbäjzreni. <sup>24</sup> Dxej<sub>c</sub> bahuiini casacsí te be<sub>n</sub> Egipto te be<sub>n</sub> sa'ni. Sas bagu'tni be<sub>n</sub> Egipto. <sup>25</sup> Bejn Moisés xhigab pet sacbee resa'ni cayacnä<sub>j</sub> Diosni te guslaani rexpej<sub>n</sub>ni. Luxh di resa'ni niacbee si'c. <sup>26</sup> Che bara yääl, bahuii Moisés cadilnä<sub>j</sub> sa'reni tiop xpe<sub>n</sub> Israel. Räj<sub>p</sub> Moisés lojreni: “Co<sub>l</sub>cuedxi, Dad. Lagajc sa'tu cadilnä<sub>j</sub>tu. ¿Xhicuent rdijltu?” si'c gunii Moisés, te na'cru tilnä<sub>j</sub> sa'reni. <sup>27</sup> Dxejcti nani cayunniälajzga, balanaani Moisés, räj<sub>p</sub>ni loj Moisés: “¿Chu baniid<sub>x</sub> yäl<sub>n</sub>nibee lojlu te jääd<sub>n</sub>ibeelu nuure? <sup>28</sup> ¿La r<sub>l</sub>ajzlu ju'tlu narä si'c bagu'tlu be<sub>n</sub> Egipto naiti?” —räj<sub>p</sub>ni—. <sup>29</sup> Che biejn diajg Moisés rediidxga, baxu<sub>n</sub>ni, huijni zijt. Huiläzsjicni gued<sub>x</sub> Madián. Ro'c bachnaani, guyu' tiop xingaanni.

<sup>30</sup> Räj<sub>p</sub>za Esteban:

—Che gudejd tiuu ijz, bidzuj<sub>n</sub> te dxej cansajni nez lo reyubijdz ni naga' guideb gabi daj<sub>n</sub> ni laa Sinaí. Ro'c bahuiini te bajl ne<sub>n</sub> te yaguejch. Ne<sub>n</sub> bajlga baluiloj angl xten Dios lo Moisés. <sup>31</sup> Bidxeloduxh Moisés che bahuiini si'c. Dxejcti gubigni te r<sub>l</sub>ajzni nuhuisa'cni yajgga. Dxej<sub>c</sub> biejn diajgni gunii Dios, räj<sub>p</sub>ni lo Moisés: <sup>32</sup> “Narä nacä Xtios rextadgoldoolu, narä nacä Dios xten Abram, näjza xten Isaac näjza xten Jacob.” Dxejcti gucsez Moisés sa'csi bidxebduxhni, diruni nuhuisa'c yajgga. <sup>33</sup> Dxejcti räj<sub>p</sub> Dios lojni: “Gulää xcura'chlu. Yuj cadro suga'lu najc dxan, sa'csi narä yu'ä ree. <sup>34</sup> Abahuiä xho cagusacsí rebe<sub>n</sub> Egipto rexpenä. Abiejn diagä xho roonreni. Naj abiälä te guslää rexpenä. Gudaa naj, suxha<sub>l</sub>älu chääl<sub>u</sub> Egipto.”

<sup>35</sup> Räj<sub>p</sub> Esteban:

—Dios badeed yäl<sub>n</sub>nibee lo Moisés nani baze' retoxtadgoldoonu che räj<sub>p</sub>reni: “¿Chu baniid<sub>x</sub> yäl<sub>n</sub>nibee lojlu te jääd<sub>n</sub>ibeelu nuure?” Baxha<sub>l</sub> Dios Moisés te guinibeeni xpej<sub>n</sub> Dios, gucnä<sub>j</sub>za Dios Moisés baslään<sub>i</sub> rexpej<sub>n</sub>ni ne<sub>n</sub> nación Egipto si'c gunii angl xten Dios che baluilojni lo Moisés ne<sub>n</sub> yaguejchga. <sup>36</sup> Gulää Moisés rebej<sub>n</sub>ga. Ganiddoo bejn Moisés redzunro, yäl<sub>r</sub>dxeloj ne<sub>n</sub> nación Egipto näjza ro' nisdoo ni laa nisdoo xniaa. Tiuu ijz cuansaj retoxtadgoldoonu ne<sub>n</sub> yubijdzroga, ro'c bejnza Moisés redzunro, remilagwr.

<sup>37</sup> Lagajc Moisésre gunii xtidx Dios che räjpni loj rexpejn Israel: “Sibe Dios lo rexajgtu te niguii ni najc sigac narä. Siniini xtidx Dios. Colgusoob xtiidxni.” <sup>38</sup> Lagajc Moisés geyunäj rebejn neñ yubidzro. Xangl Dios guninäj Moisés neñ dajn xten Sinaí. Dxejcti badeed Moisés rediidx ni gunibee Dios lo retoxtadgoldoonu. Laareni basa'nreni diidxga loonu.

<sup>39</sup> Räjp Esteban:

—Niluxh di retoxtadgoldoonu nusoob rextidx Moisés. Di rlanjreni guinibee Moisésreni. Canaduxhlajzreni naciön Egipto. <sup>40</sup> Che sää Moisés dajn Sinaí, räjpreni loj Aarón bejtz Moisés: “Benchee banäjb gac xtiooznu, te nidreni loonu, te chanajlnuren. Chu gan con Moisésre ni baluui nezyuj che gulääni nuure guejdx reEgipto.” <sup>41</sup> Sas bencheereni te banäjb ni najc si'c te gonbäz. Dxejcti bagu'treni guidxaa te badeedreni rejnga lo banäjb te bazuxhijbreni lojni. Bibalazduxhreni sa'csi abencheereni banäjbga. <sup>42</sup> Dxejcti gubicaj Dios loj rexpejn Israel sa'csi bejnreni si'c. Basaan Dios gojnreni gubijdx, näjza bäii, näjza rebal xhaguibaa. Gujcn i'cni caj lo guijtz ni bejn reniguii nani bacuaa rextidx Dios. Räjp Dios:

La'tu beñ Israel, cheni cuansajtu tiuu ijz nez lo reyubijdz,

¿la par narä bagu'ttu guidxaa, ä?

¿La loä baniidxtu xtiejnreni, ä?

<sup>43</sup> Xho gacni si'c, räjp Dios.

Cuansanjtu te yu' najcw guiid cadro chu te banäjb.

Nenja guyu' banäjb ni laa Moloc, nani najtu najc xtiostu.

Gojnzatu balbäze' xten xtiostu ni laa Remfán.

Redios ni bencheetistu reni'c gojntu.

Ni'cni sibää la'tu ree guxhalä la'tu stelaad guedx Babilonia.

<sup>44</sup> Guniiru Esteban, räjpni lojreni:

—Neñ reyubijdz gojp retoxtadgoldoonu te yu' najcwni guiid. Gujcn xquidooreni. Ro'c guninäjreni Dios. Benchee retoxtadgoldoonu yu' najcw guiidga si'cni gunibee Dios che baluui lo Moisés xhoni gacni. <sup>45</sup> Che gujt Moisés, Josué gunibee lacuaa to Moisés, huinäni retoxtadgoldoonu naciön Canaán. Batzujlreni yuro ni najcw guiid te näj ni'c huinäreni Canaán. Gulää Dios rebejn ni guläjz neñ reguedx Canaán. Dxejcti bia'n retoxtadgoldoonu neñ reguejdxga. Bazuxhijbreni lo Dios neñ yuguiid ni najc xquidooreni che gojlli xtiemp reii David. <sup>46</sup> Huinäälajz Dios David. Räjp David lo Dios: “Rlazä gunä te guidoo par guejblu, Dios xten nuure, rexpejn Israel.” <sup>47</sup> Dxejcti di Dios nusoob xtidx David. Alga Salomón, xi'n David, ni'c benchee xquidoro Dios. <sup>48</sup> Naj di Dios guiquiin te yu' nani runchee bejn. Scree bacuaa te niguii nani gunii xtidx Dios. Räjp Dios:

<sup>49</sup> Si'c najc te yagxhilsa'c cadro rnibee reii, si'c najc xhaguibaa cadro rbeä.

Si'c te bancw cadro rsiuj ni' reii, si'c najc guedxliuj nani bencheä.

Dina guiquinä guncheetu te xyu'ä.

Dina guiquinä te lajt cadro gusilazä, räjp Dios.

<sup>50</sup> ¿La et naädi benchee guiraa nani ruhuiitu?, räjp Dios.

<sup>51</sup> Räjp Esteban lojreni:

—Te beñ nadduxh najctu. Ditu jiu xtidx Dios. Niäu lastootu, niäuza diajgtu. Di'tu chanälajz xtzuun Sprit Dxan xten Dios, dizani cuääz neñ lastootu. Si'c bejn retoxtadgoldootu, si'cza rujntu. <sup>52</sup> Basacsí retoxtadgoldootu guirali reniguii nani gunii xtidx Dios. Nicla tejni direni niu. Bagu't retoxtadgoldootu guiraa reniguii nani gunii siäd te niguidxan xten Dios. Naj abiäd niguidxanga, Jesucrist laani, luxh la'tu huinäatuni lo guxhtis te gunibeetu gujtni. <sup>53</sup> La'tu biannäjtü leii nani gunii reangl xten Dios loj Moisés, luxh la'tu ditu nucuadiajg rediidxga.

*Bagu'treni Esteban*

<sup>54</sup> Che biejn diajgreni rextidx Esteban, bidxe'chduxhreni, rauya' läijreni sa'csi rdxe'chreni lo Esteban. <sup>55</sup> Rbäjz Sprit Dxi xten Dios neñ lastoo Esteban, ni'cni bahuitzu'tzni xhaguibaa, ro'c bahuiini yälrdimbichasejz xten Dios. Bahuiizani suga' Jesucrist xladbee Dios. <sup>56</sup> Räjz Esteban lojreni:

—Colhuilaa. Narä cahuiä xhaguibaa cadre yu' Dios, ruhuiäza loj Xi'n Dios nani gujc Niguii; ani suga' xladbee Dios.

<sup>57</sup> Guredxaduxhreni basäuzareni diajgreni. Dxejcti baxunreni bixa'treni yejc Esteban. <sup>58</sup> Dxejc gudobyujrenini, gulääreni Esteban neñ guejdxga. Ro'c bacuaareni guij yejc Esteban. Che cagucuaareni guij yejcti, guläyalreni xhajbreni; te niguii ni laa Saulo biannäj xhajbreni. <sup>59</sup> Lal ni cagucuaareni guij yejcti, gunii Esteban loj Jesucrist räjpni:

—Guejblu, Dad Jesucrist, cua' narä.

<sup>60</sup> Dxejcti biajb Esteban, bazuxhibni, guredxa'ni räjpni:

—Dad Jesucrist, na'c gudzuublu dojlre yejc rebejnre, na'c gucuaquijlureni.

Gulujxsi guniini si'c, gujtni.

## 8

### *Saulo basacsí rexpejn Jesucrist*

<sup>1</sup> Rbaduxh lajz Saulo bagu'treni Esteban.

Lagajc dxejga gusloj gudejd rexpejn Jesucrist trabajwduxh nen guedx Jerusalén. Dxejcti bire'ch rexpejn Jesucrist. Biunejzreni ro'c sääreni nez guiraa reguedx Judea näjza nez guiraa reguedx Samaria. Xtebtis reapost bia'n Jerusalén, direni nire'ch.

<sup>2</sup> Reniguii nani sanälajz Dios huicua'tz Esteban. Cayonduxhreni sa'csi riareni gujt Esteban. <sup>3</sup> Biädza Saulo, guixe-guixee basacsíni rebejn nani huililajz xtidx Dios. Biu'ni rolijzreni, gunaazni reniguii näjza regunaa te basäunireni nen latzguuib.

### *Basule' rexpejn Jesucrist xtidx Dios nez región Samaria*

<sup>4</sup> Che bire'ch rebejn nani huililajz xtidx Dios, basule'reni xtidx Dios nez cadrotis sääreni. <sup>5</sup> Tej rebejnnga laa Felipe. Siini nez te guedx Samaria. Ro'c basule'ni xtidx Dios. Räjpni:

—Jesús najc Crist nani cabäjztu jiäd.

<sup>6</sup> Ro'c bachagsa' rebejn bacuadiajgreni rextidx Felipe, bahuiizareni redzunro, remilagwr nani bejn Felipe. <sup>7</sup> Gaii bejn yu' bendxab neñ lastooreni. Che gunibee Felipe guirii rebejdxab lastoo rebejnnga, guredxa' rebejdxabga, dxejcti biriireni neñ lastoo rebejnnga. Yu'za xhidajl bejn nani digacdiru guiniib, yu'za reni rajc ni'reni, naareni. Con xcälrnibee Jesucrist basiajc Felipe guiraa rebejnnga. <sup>8</sup> Sa'csi gujc si'c, bibalazduxh guiraa rebejn nen guejdxga.

<sup>9</sup> Guyu' te niguii ni laa Simón neñ guejdxga. Bisieedni bejnni xhidajl redzuun yälbidxaa, basgueeni rebejguejdxga. Bidxeloduxh rebejguejdx lojni. Räjpni lo rebejn rutru chu stee bejn ni najc maazru benro lojni. <sup>10</sup> Luxh guiraa rebejn, rebiuux, rebejgool, rebenrajp, rebenproob bacuadiajgreni xtidx bidxaaga, räjpreni:

—Laani rajpni yälrnibee xten Dios.

<sup>11</sup> Xchero basgueeni rebejn, bidxelojreni rextzunyaälbidxaani. Guiraa rebejn huililajz xtiidxni. <sup>12</sup> Dxejcti baluii Felipe xcuent xcälrnibee Dios, näjza xcuent Jesucrist. Xhidajl rebejguejdxga huililajz rediidx nani gunii Felipe. Dxejcti birobnisreni, niguii näjza gunaa. <sup>13</sup> Nägajcza Simón huililajz rediidxga dxejc gurobnisani. Dxejc guyunäj Simón Felipe. Che bahuii Simón lo redzunro, remilagwr nani cayujn Felipe, bidxeloduxh Simón.

<sup>14</sup> Che biejn diajg reapost ni yu' guedx Jerusalén huililajz reben Samaria xtidx Dios, baxhalreni Pedr näjza Juan ro'c. <sup>15</sup> Che bidzujn guiro'preni guejdxga, gunabreni lo Dios xcuent rebejn ni huililajzga te gudeed Dios Sprit Dxi xtenni lojreni, <sup>16</sup> sa'csi gajd Sprit



Dxan xten Dios jiädläjz neñ lastooreni. Che huililajzreni, gurobnistisreni te gucbee rebejn chuni'c najc rexpejn Jesucrist. <sup>17</sup> Dxejc batzuub Pedr näjza Juan ñaareni yejc tejpga renani ahuililajz xtidx Dios, dxejc badeed Dios Sprit Dxan xtenni biädläjzni neñ lastooreni.

<sup>18</sup> Che bahuii Simón biädläjz Sprit Dxan xten Dios lastoo rebejn ni batzuub reapost ñaani yejcreni, rlajz Simón nudeedni meel loj reapost, <sup>19</sup> räjpni lojreni:

—Colguniidx yälrnibee loä te si'cza gudzubä ñää yejc rebejn, te jiu' Sprit Dxan xten Dios neñ lastooreni.

<sup>20</sup> Dxejcti räjp Pedr lojni:

—¡Sunitloj xmeellu con luj! Xho gunlu xhigab siilu Sprit Dxan xten Dios nani rudedxlia' Dios. <sup>21</sup> Digacdi gunlu dzuun ni riennu, sa'csi xhet laadi najc lastoolu nez loj Dios; yu' dojl neñ lastoolu. <sup>22</sup> Basie'ch lajzlu, badzucaj rexhigab guijdx xtenlu. Guredx-gunab lo Dios, top susiäjł lajz Dios xtojllu ni bejnlu neñ lastoolu. <sup>23</sup> Naj narä nanä ruguilazduxhlu, luxh runduxhlu xhigabgujdx.

<sup>24</sup> Dxejcti räjp Simón lo guiro'preni:

—Colñab loj Dios xcuentä te na'c sacä si'cni caniitu.

<sup>25</sup> Che gulujxti bijreni diidx xcuent ni bahuilojreni bejn Jesucrist, che gulujx basule'reni xtidx Jesucrist loj reben Samaria, gubisacreni Jerusalén.

### *Felipe näjza te dade' ni siääd nación Etiopía*

<sup>26</sup> Dxejcti biääd te xangl Dios, räjpni lo Felipe:

—Huij lo nezyuj ni rii guedx Jerusalén, ni rij nez guedx Gaza. Nezyujga rdejd lo reyubijdz.

<sup>27</sup> Sä'ti Felipe. Che bidzujñni lo nezyujga, bidxaagni te dade' ni siääd nación Etiopía. Najcni te eunuco, najczani xcuxhtis reina Candace. Laani rgucheeni guiraa xmeel reinaga. Biääd dade'ga guedx Jerusalén te sagajñni Dios. <sup>28</sup> Siädbisacni lajdxni. Sobga'ni neñ te gare't saruduxh, cayolni xtidx Isaías, nani bacuaa xtidx Dios agujc xchero.

<sup>29</sup> Dxejcti räjp angl xten Dios lo Felipe:

—Gubig cuä' gare'tga, guninä dade'ga.

<sup>30</sup> Che gubig Felipe cuä' gare'tga, biejn diajgni cayol dade'ga rextidx Isaías. Dxejcti räjp Felipe lojni:

—¿La racbeelu ni caj lo guijtz nani cayollu, ä?

<sup>31</sup> Dxejcti räjp dade'ga lojni:

—¿Xho gacbeäni palga rut gusule'dini loä?

Sas räjp dade'ga lo Felipe chä'pni neñ gare'tga.

<sup>32</sup> Cadro cayol dade'ga neñ guijtz ni caj xtidx Dios rnii scree:

Di xiil cuedxa' che rinä bejnni cadro guetni;

dxitis raa xiil che ruhuajrenini.

Si'c te xiil najc niguiire,

xhet rniidini mase rusacsíduxhrenini.

<sup>33</sup> Basacsíduxhrenini.

Reguxhtis ni niujn yälguxhtisni xhet laliidi bejnreni.

Xhet si'cti nunyäjł gunreni.

¿Xho guiniinu yu' xpejñni?

Ni abagu'trenini. Diruni guibajn lo guedxliuj.

<sup>34</sup> Dxejcti gunabdiidx ben Etiopía, räjpni lo Felipe:

—Gunilaa loä, chuni'c ruzä't niguii nani bacuaa reguijtzre, ¿la ruzä'tni lagajc laani o la ruzä'tni ste'ca bejn, ä?

<sup>35</sup> Gusloj basule' Felipe rediidx nani abil dade'ga. Dxejcti basule'ni rediidx xcuent Jesucrist. <sup>36</sup> Lal ni sääreni lo nezyuj, bidzujñreni te lajt cadro yu' nis. Dxejc räjp dade'ga lo Felipe:



—¡Bahuii, ree yu' nis! ¿Xhi rudxojn tiobnisä?

<sup>37</sup> Dxejc räjp Felipe lojni:

—Palga rililajzlu xtidx Dios neñ lastoolu, sajc tiobnislu.

Dxejc räjp dade'ga lo Felipe:

—Rililazä Jesús najc Crist Xi'n Dios.

<sup>38</sup> Dxejc gunibee dade'ga gusudxi gare't, sas biäjt guiro'preni, biu'reni neñ nis, ro'c batiobnis Felipe dade'ga. <sup>39</sup> Che biriireni neñ nis, huinä Sprit Dxañ xten Dios Felipe ste'ca lajt. Dxejc diru dade'ga nuhuii lo Felipe. Sä'ti dade'ga lajdxni, cabalazduxhni. <sup>40</sup> Dxejcti chela gucbee Felipe abidzujñni guedx Azoto. Baluiizani xtidx Dios neñ guiraa reguejdx che bidzujñlini guedx Cesarea.

## 9

### *Huililajz Saulo rextidx Jesucrist (Hch. 22:6-16; 26:12-18)*

<sup>1</sup> Laltis cagusacsí Saulo rexpejn Jesucrist. Rlajzni ju'tni guiraareni, ni'c huijni lo bixhojz nani rnibee, <sup>2</sup> gunabni gac te guijtz chanäni lo reguidoo neñ guedx Damasco te palga guidxälñi reni najc xpejn Jesucrist neñ reguidooga, niguii sigac gunaa, guliib-nireni, jiädñäni guedx Jerusalén te jiäureni. <sup>3</sup> Laļ sasajni lo nezyuj, asiäddzujgajxhni guedx Damasco, basaniya' te bal xhaguibaa, basanijni guideb gabi cadro siädsaj Saulo. <sup>4</sup> Dxejc biajbni lo yuj, biejn diajgni te xse' bejn nani canii lojni:

—Saulo, Saulo, ¿xhicuent rusacsílu narä, näjza rexpeña?

<sup>5</sup> Räjp Saulo lojni:

—¿Chuluj Dad?

Räjpni lo Saulo:

—Narä nacä Jesucrist, nani cagusacsíduxhlu. Niluxh lagajc luj cadejdlu trabajw si'c rajc te gon ni rucuaní' yejc caru'ch.

<sup>6</sup> Bidxebduxh Saulo, racsejsni räjpni:

—Dad, ¿xhini'c rlajzlu gunä?

Dxejc räjp Jesús lo Saulo:

—Huistie, biu' guedx Damasco. Ro'c suluii te niguii xhini'c gunlu.

<sup>7</sup> Rebejn ni siädñä Saulo sugadxireni, bidxebbreni sa'csi biejn diajgreni te xse' bejn, luxh rut lojdi bahuiireni. <sup>8</sup> Che huistie Saulo lo yuj, baxhalni lojni, niluxh di lojni jien. Dxejc gunaazreni ñaani, sanärenini guedx Damasco. <sup>9</sup> Ro'c guyu'ni choñ dxej, natiä'p balojni, dini niä', dizani niajw.

<sup>10</sup> Guedx Damasco rbäjz te xpejn Jesucrist ni laa Ananías. Baluiloj Jesucrist loj Ananías lo te bacal, räjp Jesucrist lojni:

—Ananías.

Dxejc räjp Ananías lojni:

—Anaree Dad.

<sup>11</sup> Räjp Jesucrist lojni:

—Huistie te chäálu lo nezyuj ni laa Ladbee cad rbäjz Judas. Ro'c guiniabdiidxlu con te niguii ni laa Saulo, beñ Tarso. Cabejdx, canabni loä ñaj. <sup>12</sup> Lo bacal abahuiini siäd te niguii ni laa Ananías te gutzuubni ñaani yejcní te fiini stehuält.

<sup>13</sup> Dxejcti räjp Ananías lojni:

—Dad, abiejn diagä xho basacsí niguiiga rexpejñlu neñ guedx Jerusalén. <sup>14</sup> Luxh rebixhojz ni rnibee abadeed guijtz lojni te guiniaazni ree guiraa rebejn nani rbedx-rniab lojlu, chanänireni jiäureni.

<sup>15</sup> Dxejcti räjp Jesucrist lojni:

—Huij, narä aguleäni te gunni xtzunä. Suluiini xtidxä loj rebenzijt nani digac xpen Israel, näjza loj reni rnibee renacion, näjza loj rexpejn Israel. <sup>16</sup> Narä suluiä lo Saulo trabajwduxh ni tedni te jiädnajlni narä.

<sup>17</sup> Dxejcti säa Ananías, bidzujn ni ro yu' cadre rbäzlaa Saulo. Batzuubni naani yejc Saulo. Dxejcti räjp Ananías loj Saulo:

—Betzä Saulo, Jesucrist ni rnibee, nani baluiloj lojlu lo nezyuj cheni siädldu, lagajc laani baxhalni narä te filu stehuält, te jiädläjzsa Sprit Dxan xten Dios neñ lastoolu.

<sup>18</sup> Lagajc dxejc bitejb si'c xmelbäjł yec baloj Saulo, biacgajc balojni, bahuisa'cni stehuält. Dxejc huistieni, gurobnisgajcni. <sup>19</sup> Dxejc gudajwni, guc nadaanni stehuält. Xchej guyunäj Saulo rexpejn Jesucrist neñ guedx Damasco.

### *Gusloj basule' Saulo xtidx Dios neñ guedx Damasco*

<sup>20</sup> Dxejcti gusloj basule' Saulo xtidx Dios neñ reguidoo xten rexpejn Israel, räjpni:

—Jesucrist najc Xi'n Dios nani gujc Niguii.

<sup>21</sup> Che biejn diajgreni xtiidxni, bidxelojreni, räjp lo sa'reni:

—¿La xhet laadi niguiire ni rusäu rexpejn Jesucrist neñ latzguiib guedx Jerusalén, ä? Lagajcza dee bidzujn ree te guliibni rexpejn Jesucrist te chanänireni guedx Jerusalén lo rebixhojz.

<sup>22</sup> Dxejcti gusutzut'z Saulo guniini xtidx Dios. Basacajnni rexpejn Israel nani rbäjz Damasco sa'csi basule'pacni Jesús najc Crist nani rnibee.

### *Baxun Saulo guedx Damasco*

<sup>23</sup> Che gudejd xhidajł dxej, bachagsa' rexpejn Israel te nugu'treni Saulo. <sup>24</sup> Dxejcti gucbee Saulo xhi xhigab bejnreni. Dxej, yääl cabäjzreni Saulo ro' guiraa renezyuj ni rdzujn guejdxga te ju'trenini. <sup>25</sup> Dxejcti che gojł te yääl basäl rexpejn Jesucrist Saulo neñ te dximro, basiäjtreni dxijmga nez ro' te padeer ni dejd gabi guejdxga. Basiäjtrenini nez dejtz padeerga, te si'c baxunni guejdxga.

### *Bidzujn Saulo guedx Jerusalén*

<sup>26</sup> Che bidzujn Saulo guedx Jerusalén, rlajzni nuchaagni loj reni rililajz xtidx Jesucrist, niluxh guiraareni bidxeybrenini sa'csi direni gan ahuililajzni xtidx Dios. <sup>27</sup> Dxejcti huinä Bernabéni lo reapost, bijni diidx xcuent Saulo. Räjp Bernabé lojreni:

—Baluiloj Jesucrist lo Saulo loj nezyuj. Guninä Xtioznu Saulo loj nezyuj, ni'cni gusutzut'z Saulo basule'ni xtidx Jesucrist guedx Damasco.

<sup>28</sup> Dxejc bia'n Saulo guedx Jerusalén, bidxaagni lo rexpejn Jesucrist. <sup>29</sup> Dxejcti gusutzut'z Saulo gusloj bijni xtidx Jesucrist lo rebejn. Dxejcti gudilnäj Saulo rexpejn Israel nani rnii didx griegw. Laareni rdxechduxhreni, rlajzreni nugu'treni Saulo sa'csi direni nichagljaz xtidx Jesucrist. <sup>30</sup> Che gucbee rexpejn Jesucrist si'c, huinäreni Saulo guedx Cesarea, ro'c gulääreni Saulo, baxhalrenini guedx Tarso.

<sup>31</sup> Dxejc guredxi lajz guiraa renani huililajz xtidx Dios neñ reguedx Judea, neñ reguedx Galilee, näjza neñ reguedx Samaria, sa'csi diru Saulo nusacsi rexpejn Jesucrist, luxh guc xhidajlrureni. Basoobreni xtidx Jesucrist, bisieedrureni rextiidxni, gucnäjza Sprit Dxan xten Diosreni.

### *Biajc Eneas*

<sup>32</sup> Che gusloj sahuui Pedr guiraa renani huililajz xtidx Dios, huihuiizani rexpejn Jesucrist nani yu' guedx Lida. <sup>33</sup> Ro'c bidxälni te niguii ni laa Eneas. Agujc xhujn ijz naga' niguiiga cayacxhuuni. Abixu'n tiejxhni, digacdiru guiliini.

<sup>34</sup> Dxejcti räjp Pedr lo Eneas:

—Eneas, cagusiajc Jesucrist guejblu. Huistie, guläs xta'lu.

Lagajc dxejc biajcti, huistietini.

<sup>35</sup> Guiraa rebejn ni rbäjz guedx Lida, näjza reben ni rbäjz guedx Sarón, bahuiireni abiajc niguii ni cayacxhuu. Dxejc xhidajlreni neñ reguejdxga huililajz xtidx Dios.

### *Gubañsac Dorcas*

<sup>36</sup> Neñ guedx Jope yu' te gunaa ni laa Tabita; rniizarenini Dorcas con xtidx griegw. Gunaaga huililajz xtidx Dios, rudeedzani xhi rquiin rebenproob, najczani huenduxh loj chutis bejn. <sup>37</sup> Gucxhuu gunaaga, dxejc gujtni. Che gulujx bahuajz rebejn togoolga, huitixhrenini neñ te yu' ni najc jiaa yejc sa'ni. <sup>38</sup> Sa'csi gajxh guedx Jope tre' guedx Lida, luxh biejn diajg rexpejn Jesucrist ro'c yu' Pedr, baxhalreni tiop dade' saxii Pedr. Räj p redade'ga loj Pedr:

—Bejn huen salu chonnu Jope nanajga.

<sup>39</sup> Dxejc sanägajc Pedr redade'ga. Che bidzujnreni, huinäreni Pedr neñ yu' cadre naga' togunaaga. Ro'c cayonduxh guiraa regunabiuud, baluiireni lo Pedr guiraa rexhajbreni nani benchee Dorcas, ni badeed Dorcas lojreni che nabajnni. <sup>40</sup> Dxejcti gunibee Pedr birii guirareni neñ yu'. Dxejc bazuxhijbni, guredx-gunabni loj Dios. Dxejc gubiréni bahuiini loj togoolga, räjpni:

—Tabita, huistie.

Dxejcti baxhal gunaaga balojni; che bahuiini loj Pedr, gurejni. <sup>41</sup> Dxejc gunaaz Pedr naani, basuliinini, dxejcti gurejdx Pedr regunabiuud näjza sgaii reni najc rexpejn Jesucrist. Baluiini gunaaga lojreni te bahuiiojreni agubañsacni. <sup>42</sup> Gucbegajc reben guedx Jope xhini'c gujc, dxejcti xhidajl rebejn ga huililajz xtidx Jesucrist. <sup>43</sup> Xchejza guyu' Pedr ro'c, guläjzni rolijz dade' ni laa Simón, nani ruscoodz guijd.

## 10

### *Pedr con Cornel*

<sup>1</sup> Guedx Cesarea guyu' te niguii ni laa Cornel. Rnibeeni te gayuu resoldaad lo te cuaa ni laa Italiano. Cornel najc beñzajt, dini gac beñ Israel. <sup>2</sup> Beñsacduxh najc Cornel, näjza guiraa resa'ni, sacruduxh rusoobreni xtidx Dios. Rudeedni gojn lo reben proob xten Israel. Guixe-guixee rbejdx, rniabni lo Dios. <sup>3</sup> Te dxej, si'cti rcachon gudxej, si'c lo bacal bahuiini loj xangl Dios, räjpni loj Cornel:

—¿Conlu Cornel?

<sup>4</sup> Che bahuii Cornel xangl Dios, bidxejbni, bidxelojni, räjpni lojni:

—¿Xhini'c, Dad?

Dxejcti räjp angl xten Dios lojni:

—Che rniilu lo Dios, riejn diajg Dios xtiidxlu, che rudeedlu meel lo reben proob, ruhuii Dios ni rujnlu, ni'cni rnalajz Dios luj. <sup>5</sup> Naj baxhal tiop niguii chää guedx Jope te chaxiireni Simón Pedr. <sup>6</sup> Rbäjzni rolijz te dade' ni laa Simón nani ruscoodz guijd. Rolijz Simón sojb gajxh ro' nisdoo. Simón Pedr gusule' xhini'c nanab gunlu.

<sup>7</sup> Che sii angl xten Dios, gule Cornel tiop mos xtenni näjza te xsoldaadni nani sanälajz Dios. <sup>8</sup> Dxejc bij Cornel diidx lojreni xcuent ni gusajcni, dxejc baxhalni redade'ga guedx Jope.

<sup>9</sup> Che bara yääl, sääreni lo nezyuj. Asiäddzunañgajxhreni guedx Jope, pet si'cti läidxejni. Lagajc orga huä'p Pedr yecyu' te guininäjni Guejb Dios. <sup>10</sup> Calanduxh Pedr, rlanjzni gauni. Lañ ni cayujnreni xhi gauxhuejni, gusloj canixcalni. <sup>11</sup> Bahuiini bixal xhaguibaa, bahuiizani biäj'te bariadro nani naliib guidap xi'ni. Siädjiätchäiini gajxh nez loj Pedr. <sup>12</sup> Neñ bariaadga yu' guiraa reman ni yu' lo guedxliuj nani rsianäj guidap ni'ni, näjza renani rxeeb si'c bäl, näjza renani rutaj't. <sup>13</sup> Gunii Dios lo Pedr, räjpni lojni:

—Pedr, huisu te ju'tlu man gaulu.

<sup>14</sup> Dxejc räjp Pedr lojni:

—Na'c Dad. Nunc gauä sa' remandxuudxga, abia'a dina gauä reman nani rnii xleilu najc mandxuudx.

<sup>15</sup> Gunisac Dios loj Pedr, räjpni:

—Na'cru guiniilu nacdXuudx reman nani abasia.

<sup>16</sup> Che gujc choñ huält gujc si'c, huä'psac bariaadga xhaguibaa. <sup>17</sup> Laļ ni cayujn Pedr xhigab xhichani'c säloj nani bahuiini, bidzujñ reniguii ni baxhaļ Cornel ro' yu'ga, sa'csi agunabdiidxreni caro rbäjz Simón nani ruscoodz guiđ.

<sup>18</sup> Che bidzujñreni rolä'ga canabdiidxreni la ro'c rbäjz te dade' ni laa Simón Pedr. <sup>19</sup> Laļ ni cayujn Pedr xhigab xcuent ni bahuiini, gunii Sprit Dxan xten Dios lojni, räjpni:

—Bahuii, choñ dade' caguiillu. <sup>20</sup> Biäjť yejc yu're te jinälureni. Na'c gunlu xhi stee xhigab, sa'csi lagajc narä baxhaļäreni lojlu.

<sup>21</sup> Dxejcti biäjť Pedr jiaaga, bidzujñni cadro suga' redade'ga, räjpni lojreni:

—Narä nacä ni caguiiltu. ¿Xhi siäädťu?

<sup>22</sup> Räjp reniguiiga lo Pedr:

—Cornel, nani rnibee te gayuu soldaad, te beñsa'c, te bejñ ni rajñ Dios, te bejñ ni sanälajz rexpejñ Israel, laani baxhaļ nuure lojlu, sa'csi räjp angl xten Dios lojni, jiopxiinu luj te jiejn diajgnu xtiidxlu.

<sup>23</sup> Dxejcti gurejdx Pedr rebejñga, biu'reni neñ yu'. Ro'c bia'nreni te guxhijñ. Che bara yääl, Pedr näjza sgaii beñ Jope ni najc xpejñ Jesucrist, sanä redade' ni baxhaļ Cornel.

<sup>24</sup> Che bara yääl, bidzujñreni guedx Cesarea. Abatojp Cornel resa'ni näjza rexamigwni rolijzni. Cabäjzreni guidzujñ Pedr. <sup>25</sup> Che bidzujñ Pedr ro yu', huichagloj Cornelni, bazuxhijbni lo Pedr. <sup>26</sup> Dxejc gunaaz Pedr ñaani, guläsnini, räjpni lojni:

—Huisulii, sa'csi narä nacä te niguiitis sigajc najclu.

<sup>27</sup> Cayuiireni diidx, biu'reni neñ yu'. Che biu'ni bahuii Pedr nadxagsa' rebejñ neñ yu'.

<sup>28</sup> Räjp Pedr lojreni:

—Anajntu xhi caj lo leii xten rexpejñ Israel: digacdi guchaag te xpejñ Israel loj benzijť nani digac xpejñ Israel, digacdiza jiu'ni rolijzreni. Niluxh agunii Dios loä lo te bacal, te gacbeä digacdiru jiuä releiire. Abaluii Dios narä sajč guchagsa'ä chutis bejñ. <sup>29</sup> Ni'cni, che gurejdxťu narä biälgacä. Naj rniabdixä, ¿xhicuent gurejdxťu narä?

<sup>30</sup> Dxejcti räjp Cornel loj Pedr:

—Gudajp dxej si'cti rcachon gudxej, cabedx-canabä lo Dios rolizä chela baluiloj te niguii najcw te ladmol ni rdimbicha'. <sup>31</sup> Najni loä: “Cornel, che rbedx-rniablu lo Dios, riejn diajg Dios xtiidxlu, che rudeedlu meel lo rebeñ proob, racbee Dios, di lajzni jiäl luj.

<sup>32</sup> Ni'cni naj baxhaļ tiop dade' chää guedx Jope te chaxiireni Simón Pedr nani rbäzlaa rolijz Simón ni ruscoodz guiđ. Rolijzni sojb gajxh ro' nisdoo. Che guidzujñni, laani gusule'ni xtidx Dios lojtu.” <sup>33</sup> Dxejc baxhaļä chu biädxiilu. Xquixtiostelu biäädľu. Naj anadxagsa'nu ree nez loj Dios te jiejn diajgnu rextidx Dios ni baniidxni lojlu guiniilu loonu.

### *Basule' Pedr xtidx Dios rolijz Cornel*

<sup>34</sup> Dxejcti räjp Pedr lojreni:

—Naj gucheliä tebloj rinälajz Dios guiraa bejñ; rebenzijť sigajc rexpejñ Israel. <sup>35</sup> Niluxh rinälajz Dios chutis beñ guedxliuj nani ruzuxhijb lojni, nani rusoob rextiidxni, nani laaca nabajñ. <sup>36</sup> Badeed Dios xtiidxni loj rexpejñ Israel, basule' Dios biääd Jesucrist te gac chanälaaznu Dios te cuedxilajznu, sa'csi Jesucrist rnibee guideb guedxliuj. <sup>37</sup> Che gulujx baluii Juan ni rutiobnis xcuent yälrobnis, dxejc gusloj basule' Jesucrist xtidx Dios nez reguedx Galilee. La'tu najntu xho bire'ch xtidx Jesucrist guideb nez neñ reguedx Judea. <sup>38</sup> Nancheetu xho badeed Dios yälrnibee loj Jesucrist, beñ Nazare't. Badeedza Dios Sprit Dxan xtenni te cuääzni neñ lastooni. Nancheetu xho bejñni redzunro, remilagwr, basiajcnii rebejñ nani caguteed beñdxab trabajwduxh. Redzunroga bejñni sa'csi bennäj Diosni dzuun. <sup>39</sup> Bahuiloonu guiraa redzuun ni bejñ Jesucrist neñ reguedx Israel näjza guedx Jerusalén. Bacuaa rexpejñ Israel Jesucrist lo cruzj, ro'c gujťni. <sup>40</sup> Dxejcti che

biojn dxej, guläs Dios Jesucrist lo reben<sub>g</sub>ut, guba<sub>n</sub>sacni, badeed Dios yäl<sub>n</sub>ibee lojni te gujc biäd<sub>l</sub>uiloj Jesucrist loonu. <sup>41</sup> Di Jesucrist nululoj loj chutis bejn. Lojtis renani agule Dios gutie'ch diidx guba<sub>n</sub>sac Jesucrist lo reben<sub>g</sub>ut, loj reni'c baluilojni. Nuure nadxagnu loj reni gule Dios. Bidaunänuni, bidunnäänuni che guba<sub>n</sub>sacni lo reben<sub>g</sub>ut. <sup>42</sup> Baxha<sub>l</sub>ni nuure chatie'chnu diidx loj guiraa rebejn, chosule'pacnu Dios gule Jesucrist te gacni juejz xte reben<sub>b</sub>ajn näjza xte reben<sub>g</sub>ut. <sup>43</sup> Galooli bacuaa renani gunii xtidx Dios lo guijtz, räjpreni: “Guiraa rebejn ni chalilajz xtidx Jesucrist sudzucaj Dios xtoj<sub>l</sub>reni.”

### *Biäd<sub>l</sub>ajz Sprit D<sub>x</sub>an xten Dios ne<sub>n</sub> lastoo reben<sub>z</sub>ijz*

<sup>44</sup> La<sub>l</sub> ni canii Pedr rediidxga, biäd<sub>l</sub>ajz Sprit D<sub>x</sub>an xten Dios ne<sub>n</sub> lastoo renani huililajz xtiidxni. <sup>45</sup> Bidxeloj guiraa rexpejn Israel nani huinä Pedr sa'csi biäd<sub>l</sub>ajz Sprit D<sub>x</sub>an xten Dios ne<sub>n</sub> lastoo renani najc ben<sub>z</sub>ijz. <sup>46</sup> Gucbeereni biu' Sprit D<sub>x</sub>an xten Dios lastoo reben<sub>z</sub>ijz sa'csi bejn Sprit D<sub>x</sub>an guniireni stee didxsaj nani gajdreni guiseed, calä'pzareni xpala'n Dios. <sup>47</sup> Dxejcti räjp Pedr lo rexamiigwni:

—Chu laa ni gudxojn yäl<sub>r</sub>obnis lo rebejn<sub>r</sub>e, ni sigajc biäd<sub>l</sub>ajz Sprit D<sub>x</sub>an xten Dios ne<sub>n</sub> lastoonu, abiäd<sub>l</sub>ajzni ne<sub>n</sub> lastoo rebejn<sub>r</sub>e.

<sup>48</sup> Dxejcti gunibee Pedr gurobnisreni te gacbee bejn najcreni xpejn Jesucrist. Dxejcti gunabreni loj Pedr jia'nni ro'c tiop-cho<sub>n</sub> dxej.

## 11

### *Basule' Pedr xho biäd<sub>l</sub>ajz Sprit D<sub>x</sub>an xten Dios lastoo reben<sub>z</sub>ijz lo rexpejn Jesucrist ne<sub>n</sub> gued<sub>x</sub> Jerusalén*

<sup>1</sup> Reapost, näjza renani huililajz xtidx Jesucrist ne<sub>n</sub> reguedx Judea, biejn diajgreni huililajz reben<sub>z</sub>ijz ni digac xpejn Israel xtidx Dios. <sup>2</sup> Che bidzuj<sub>n</sub> Pedr gued<sub>x</sub> Jerusalén, rexpejn Israel nani r<sub>l</sub>ajz chu guiraa rexpejn Jesucrist bee si'cni bejn toAbram, gudil<sub>n</sub>äjreni Pedr. <sup>3</sup> Räjpreni lo Pedr:

—¿Xhicuent biu'lu rolijz ben<sub>z</sub>ijz nani xhet yu'di bee si'c nuure? ¿Xhicuent gu-daunäj<sub>l</sub>ureni, ä?

<sup>4</sup> Dxejcti basule' Pedr diidx xho gujc huijni loj reben<sub>z</sub>ijz:

<sup>5</sup> —Yu'ä gued<sub>x</sub> Jope. Cabedx-canabä lo Dios, dxejc si'c gunixcalä, bahuiä bixal xhaguibaa, siädjiäjt te bariadro, naliib guidap xi'ni. Siädjiätchäiini nez loä. <sup>6</sup> Che bahuisa'cä, ne<sub>n</sub>ga yu' guiraloj reman ni yu' lo gued<sub>x</sub>liuj nani rsianäj guidap ni'ni, renani rbäjz ne<sub>n</sub> dajn, renani rxeeb si'c bäl, näjza renani rutajt. <sup>7</sup> Dxejcti biejn diagä naj Dios loä: “Pedr, huisu. Bagu't man gaulu.” <sup>8</sup> Dxejcti räpä: “Digac<sub>d</sub>ini Dad. Nicla tej gadna gauä te man nani rnii leii xtenlu najc mandxuudx.” <sup>9</sup> Dxejc gunisac Dios loä: “Na'cru guiniilu nacd<sub>x</sub>uudx recos nani abasia Dios.” <sup>10</sup> Che gujc cho<sub>n</sub> huält gunii Dios si'c, huä'psac bariaadga xhaguibaa. <sup>11</sup> Lagajc orga bidzuj<sub>n</sub> cho<sub>n</sub> dade' ro yu' cadre yu'ä. Gued<sub>x</sub> Cesarea biriireni, biäd<sub>x</sub>iireni narä. <sup>12</sup> Dxejc gunii Sprit D<sub>x</sub>an xten Dios loä: “Huinä reniguiire. Na'c gun tiop lajzlu.” Dxejcti huinä xho'p be<sub>n</sub> Jope, dade' nani rililajz xtidx Jesucrist. Che bidzuj<sub>n</sub> gued<sub>x</sub> Cesarea, biu'nu rolijz Cornel. <sup>13</sup> Basule' Cornel diidx loonu xho baluiloj te angl xten Dios lojni lagajc rolijzni. Räjp angl xten Dios lojni: “Baxha<sub>l</sub> tiop dade' chää gued<sub>x</sub> Jope te chaxiireni Simón ni rniireni Pedr. <sup>14</sup> Laani siniini xtidx Jesucrist te gacbeelu con resa'lu xhini'c nanab gunlu te gus<sub>l</sub>aa Dios la'tu lo rextoj<sub>l</sub>tu.” <sup>15</sup> Che gusloj cagusule'ä xtidx Dios lojreni, biu' Sprit D<sub>x</sub>an xten Dios ne<sub>n</sub> lastooreni si'c biu'ni lastoonu galooli. <sup>16</sup> Dxejcti banaj lazä rextid<sub>x</sub> Dad Jesucrist che najni: “Juan abatiobnis con nistis, biädla narä suxha<sub>l</sub>ä Sprit D<sub>x</sub>an xten Dios te cuääzni ne<sub>n</sub> lastootu.”

<sup>17</sup> Dxejc räjpza Pedr:



—Palga badeed Dios Sprit Dxan xtenni lojreni si'c baniidxni Sprit Dxan xtenni loonu che huililajznu xtidx Jesucrist, ¿chu narä? te niäpä lo Dios: “Na'c gudeedlu Sprit Dxan xtenlu lojreni.”

<sup>18</sup> Che biejn diajg reben Jerusalem rediidxga, biäuu ro'reni, dirureni nidilnäy Pedr. Alga gulä'preni xpala'n Dios, räjpreni:

—Näjza rebenzajt nani digac rexpejn Israel abasaan Dios gusiechlajzreni te guibanäjreni Dios par tejpas.

### *Rexpejn Jesucrist ni yu' guedx Antioquía*

<sup>19</sup> Che gujt Esteban bire'ch renani huililajz rextidx Jesucrist. Bire'chreni lo yuj Chipre ni re' lo nisdoo, lo reguedx Fenicia, näjza lo guedx Antioquía sa'csi cadejdreni trabajwduxh. Basule'reni rextidx Jesucrist lojtis rexpejn Israel. <sup>20</sup> Lojreni nadxaag gaii ben Chipre, näjza gaii ben Cirene. Redee bidzujn guedx Antioquía. Ro'c gusloj caniireni lo benzajt nani rnii didx griegw. Basule'reni lo rebenzajtga guiraa xcuent Jesucrist. <sup>21</sup> Gucnäy Diosreni caniireni xtiidxni. Xhidajl rebejn ga huililajz xtidx Jesucrist, basobreni xtiidxni.

<sup>22</sup> Che biejn diajg rexpejn Jesucrist ni yu' guedx Jerusalem rililajzreni, baxhalreni Bernabé guedx Antioquía. <sup>23</sup> Che bidzujn Bernabé guedx Antioquía, bibalazduxhni che bahuiini xho cayunnäj Dios rebejn ga. Dxejcti balijdx Bernabéreni: gutijp lajzreni gusoobreni xtiidxtis Jesucrist. <sup>24</sup> Bensa'c najc Bernabé. Rililazduxhni xtidx Jesucrist. Racnäjduxh Sprit Dxan xten Diosni. Xhidajl rebejn huililajz xtidx Jesucrist guejdxga.

<sup>25</sup> Che birii Bernabé guejdxga, huijni guedx Tarso satiilni Saulo. <sup>26</sup> Che bidxälni Saulo, huinänini guedx Antioquía. Ro'c bia'nreni tebijz, bachagsa'reni renani huililajz te baluiireni xtidx Jesucrist lo xhidalduxh bejn. Ganid ben guejdxga gulälaj “Cristianos” renani rililajz xtidx Jesucrist.

<sup>27</sup> Nejn redxejga birii gaii dade' nani rnii xtidx Dios. Guedx Jerusalem biriireni, bidzujnreni guedx Antioquía. <sup>28</sup> Huisulii te dade'ga ni laa Agabo. Gucnäy Sprit Dxan xten Diosni te guniini siääd te gubijn guideb guedxliuj. Luxh gujc gubijn ga nejn reijz ni gunibee rei Claudio ni saj cru. <sup>29</sup> Dxejcti rexpejn Jesucrist ni rbäjz guedx Antioquía bejn xhigab cade tejreni gudeed meel chää lo rexpejn Jesucrist ni rbäjz nejn reguedx Judea. <sup>30</sup> Batojpreni meel, baxhalrenini lo reben gool ni rnibee rexpejn Jesucrist ro'c. Saulo näjza Bernabé huinä meelga che huijreni Judea.

## 12

### *Gujt Jacob, biäu Pedr nejn latzguiib*

<sup>1</sup> Nejn redxejga, trabajwduxh bateed rei Herodes gaii rexpejn Jesucrist. <sup>2</sup> Gunibeeni gujt Jacob betz Juan, biru' guejni. <sup>3</sup> Che bahuii Herodes bibalazduxh rexpejn Israel sa'csi bagu'tni Jacob, gunibeeni gunazgajczeni Pedr. Dee gujc nejn redxe lanij che rajwreni yätxtiil ni di saguij. <sup>4</sup> Che gunaazreni Pedr, biäuni nejn latzguiib. Gunibee Herodes biääd tajp cuaa soldaad cuanäjreni ro' latzguiib. Tapgaj soldaad cuanäj ro' latzguiibga cade xho'p or. Bejn Herodes xhigab cuääni Pedr te guetni nez loj rexpejn Israel che ted lanij. <sup>5</sup> Yu'ti Pedr nejn latzguiib, dxejcti durtis cabejdx, canab rexpejn Jesucrist lo Dios xcuent Pedr.

### *Gulää Dios Pedr nejn latzguiib*

<sup>6</sup> Bidzujnti dxe bispr dxej ni rlanj Herodes nibää Pedr nez loj rexpejn Israel. Yäälga nagayejs Pedr galäi tiop soldaad. Caden naliib guiro'p naa Pedr. Stiop soldaad canäj ro' latzguiib. <sup>7</sup> Chela baluiloj te angl xten Dios, bianij te bajl nani basanij nejn latzguiib. Dxejcti gunaazni xhajcw Pedr, basniibnini te gubajjni. Räjpni lo Pedr:

—Basquejn ga, huistie.

Dxejcti bixec recaden, bitejbreni naa Pedr. <sup>8</sup> Räjp xangl Dios lo Pedr:

—Gojt xhajblu, baläj xcura'chlu.

Si'c bejn Pedr, dxejc räjp xangl Dios lo Pedr:

—Gojt xhablajzlu, gudanajl narä —räjpni.

<sup>9</sup> Biriitini latzguiib sanajlni angl xten Dios. Niluxh dini gun xhigab guliipac nani bejn xangl Dios. Bejn xhigab pet canixcalni. <sup>10</sup> Gudejdreni nez loj te soldaad, gudedgajczeni nez loj steeni, dxejc bidzujñreni ro' puertguiib xten latzguiib nani caj lo nezyuj ni rdejd galäii guejdxga. Xtebca bixal puertroga, biriireni gusajreni tebnezyuj. Dxejcti te squiin gunitloj xangl Dios. Xtebtis Pedr sasaj lo nezyuj. <sup>11</sup> Dxejc si'cni gubajñ Pedr, bejn xhigab:

—Naj sii nanä baxhal Dios te xanglni baslaa narä ladzña Herodes te digacdi gun rexpejñ Israel nani rlajzreni gunnäjreni narä.

<sup>12</sup> Che gucbee Pedr xhi gusajcni, huijni rolijz Marii, xnan Juan ni rniireni Marcw. Ro'c nadxagsa' xhidajl rexpejñ Jesucrist, cabedx-canabreni lo Dios xcuent Pedr. <sup>13</sup> Cagusejz Pedr rolä', dxejc gubig te dxa'p ni laa Rode, bacuadiajgni ro lä'. <sup>14</sup> Che biembee Rode xse' Pedr, sa'csi bibalazduxhni, biallajzni nuxhalni ro lä'. Alga baxuñni biusacni neñ yu', räjpni lojreni:

—Pedr suga' ro lä'.

<sup>15</sup> Dxejcti räjpreni lo Rode:

—Yejclu cayajc.

Dxejcti duurtis gunii dxape'ga suga' Pedr ro lä'. Dxejcti räjpreni loj Rode:

—Xho gacni Pedr. Pet biejn diajglu gunii xangl Dios ni rcanäj Pedr.

<sup>16</sup> Dxejcti laltis cagusejz Pedr ro lä'. Che baxhalreni ro lä' bidxeloduxhreni bahuiireni lo Pedr. <sup>17</sup> Dxejcti bazääb Pedr ñaani te na'cru jieyreni. Dxejc bij Pedr diidx xho baxhal Dios ro' latzguiib. Dxejc räjpni:

—Colchaye'tz lo Jacoob näjza lo rexpejñ Jesucrist guiraa ni gusacä nayääl.

Dxejcti birii Pedr ro'c, huijni ste'ca lajt.

<sup>18</sup> Che bara yääl, rsildooru, bieiduxh resoldaad sa'csi direni gan xho gujc birii Pedr neñ latzguiib. <sup>19</sup> Gunibee Herodes huitilreni Pedr, gunabdiidxzani lo resoldaad xho gujc birii Pedr, dxejc gunibeeni gujt resoldaad ni cuanäj latzguiib che birii Pedr. Dxejcti birii Herodes reguedx Judea, xchej huijia'nni guedx Cesarea.

### *Gujt Herodes*

<sup>20</sup> Bachechduxh rebeñ Tiro näjza rebeñ Sidón Herodes, ni'cni diruni gusaan guto' rebeñ nez cadro rnibeeni xhi gau rebeñ Tiro näjza rebeñ Sidón. Ni'c biääd xhidajlreni te guiniabreni jäjñ lajzni, te na'cru guidxe'ch Herodes lojreni. Abenxgaareni xamiigwreni Blasto, mos ni yu' lo rei Herodes, mos ni sajru lo guiraa rexmos Herodes. Guninäj Blasto Herodes xcuentreni te na'cru guidxechañ Herodes rebejñga. <sup>21</sup> Basoobtini te dxej te guininäjreni. Dxejga gojt Herodes xhajb reiini, gurejni lo xyacxhil reiini. Dxejcti gusloj caniini didxsa'c loj rebejñga. <sup>22</sup> Guredxa' rebeñ räjpreni lojni:

—Huenduxh najc diidxre. Guejblu najc te dios, xhet xtiidxdi niguii najc diidxre.

<sup>23</sup> Lagajc dxejc biääd te angl xten Dios, bejn gusloj cayacxhuu Herodes, gudajw rebisiujg Herodes, gujtni sa'csi basaanni gunii rebeñ najcni te dios, sa'csi dini niliä'p xpala'n Dios.

<sup>24</sup> Xhidajl beñ bieñ diajgni xtidx Dios, huililajzreni xtidx Dios.

<sup>25</sup> Che gulujx badeed Bernabé näjza Saulo meel ni batojp rebeñ Antioquía lo rebeñgool, biriireni guedx Jerusalén. Sanäreni Juan ni rniireni Marcw lo guedx Antioquía.

## 13

### *Gule Sprit Dxan xten Dios Bernabé näjza Saulo*

<sup>1</sup> Lo rexpejn Jesucrist ni rdxaag sa' guedx Antioquía guyu' gaii niguii ni gunii xtidx Dios, nájza gaii niguii ni rusule' xtidx Dios loj guiraa rexpejn Jesucrist. Loj redee nadxaag Bernabé, náj Simón ni rniireni Negr; náj Lucio, beñ Cirene; náj Manaén ni gulanäj reii Herodes gujcní si'c bejtzni; nájza Saulo. <sup>2</sup> Bidzujñ te dxej cagucua'nreni lañ ni cabedx-canabreni lo Dios, dxejc räjp Sprit Dxaan xten Dios lojreni:

—Colcue Bernabé nájza Saulo te gunreni dzuun ni rlazä gunreni.

<sup>3</sup> Che gulujx bacua'nreni, che gulujxza guredx-gunabreni lo Dios, batzuubreni ñaareni yejc guiro'preni, te si'c baxhalreni Bernabé nájza Saulo te guluiireni xtidx Dios ste'ca lajt.

### *Guiro'preni baluii xtidx Dios lo rebeñ Chipre*

<sup>4</sup> Baxhal Sprit Dxaan xten Dios Saulo nájza Bernabé guedx Seleucia. Ro'c biu'reni nen barcw, sääreni nez yuj ni tre' galäii nisdoo, ni laa Chipre. <sup>5</sup> Che bidzujñreni Chipre, biu'reni guedx Salamina. Ro'c basule'reni xtidx Dios nen guiraa rexquidoo rexpejn Israel. Náj Marcw gucnäjreni. <sup>6</sup> Che cuansajreni guideb yuj Chipre, bidzujñreni guedx Pafos. Ro'c bidxaagreni te niguii ni laa Barjesús. Najcni te bidxaa, najczani te xpejn Israel. Cagusgueeni rebejn guejdxga, räjpni xtidx Dios caniini, niluxh dini gac xtidx Dios. <sup>7</sup> Bidxaare nu'ch lo rexpejn Sergio Paulo, nani najc gubernadoor xten Chipre. Nasinduxh Sergio Paulo. Gurejdxni Bernabé nájza Saulo, sa'csi rlazni jieñ diajñni xtidx Dios. <sup>8</sup> Dxejcti Barjesús, ni laaza Elimas, bidxagdijñni guiro'preni sa'csi di rlazni chalilajz Sergio Paulo xtidx Dios. <sup>9</sup> Saulo, nani laaza Pabl, bahuitzu'tz loj Barjesús. Batijp Sprit Dxaan xten Dios lastoo Pabl, räjpni loj Barjesús:

<sup>10</sup> —Rusgueduxhlu rebejn, najclu beñlatsiaj, beñguidxduxhlu, najclu xi'n Satanás, beñdxab ni rnibee. Rdxehnäjzalu guiraa recossa'c xten Dios. ¿Guc cuääz guxhiidlu xtidxlii Jesucrist te di chalilajz bejn xtidx Jesucrist? <sup>11</sup> Naj siääd xcastiigw Dios yejclu. Xhidajl dxej sicäy lojlu, xhetliidi filu —räjp Pabl.

Gujcsi räjpni si'c, bicäigajc lojni. Dxejctiru cuansajni caguuilni chu guiniaaz ñaani guluiini canejz chääni. <sup>12</sup> Che bahuii Sergio Paulo xhi gusajcni, huililajzni xtidx Dios, sa'csi bidxeloduxhni xcuent xcäl'ruluii Dios.

### *Bidzujñ Pabl nájza Bernabé guedx Antioquía xten distrit Pisidia*

<sup>13</sup> Che baluux Pabl nájza resa'ni xtzunreni guedx Pafos, biu'reni nen barcw, gudejdreni lo nisdoo, sääreni guedx Perge nen estad Panfilia. Che bidzujñreni guejdxga, gubisac Juan, ni rniireni Marcw, Jerusalén. <sup>14</sup> Dxejcti birinäj Pabl resa'ni guedx Perge, sääreni guedx Antioquía nen distrit Pisidia. Dxejc te dxe sabd, dxej ni rusilajz rexpejn Israel, biu'reni nen xquidoo rexpejn Israel, ro'c gurejreni. <sup>15</sup> Che gulujx bil te dade' reguijtz xten Dios ni laa leii nájza reprofe't, baxhal reguxhtis xten guidoo chu huigajñreni, räjpreni lo Pabl nájza Bernabé:

—La'tu sa'nu, palga rajptu te diidx ni gulijdx rebejnre, colguiniini.

<sup>16</sup> Dxejc huisulii Pabl, guläsni ñaani bejnñi seen lo rebejn te cuadiajgreni xtiidxni. Räjp Pabl lojreni:

—Colcuadiajg, la'tu rexpejn Israel, guiraatu ni rajñ Dios. <sup>17</sup> Galooli gule Xtios rexpejn Israel retoxtadgoldoonu. Luxh che guläjzreni nación Egipto, bidalduxh retoxtadgoldoonu. Gucnäjduxh Diosreni bejnñi remilagwr, te guläänireni guedx Egipto. <sup>18</sup> Tiuu ijz guläjzreni lo reyubijdz. Xhidajl huält direni nusoob xtidx Dios, niluxh empac gucnäjza Diosreni. <sup>19</sup> Guyu' gajtz nación guläjz nen reyuj ni laa Canaán. Dios bejn gunitloj reguejdxre, te gudisni reyujga loj retoxtadgoldoonu. <sup>20</sup> Dxejcti badeed Dios reniguii ni gujc juejz, gunibeereni rebejn. Tajp gayugarol ijz gunibeereni rexpejn Israel. Samuel nani gunii xtidx Dios gujc lult juejz. <sup>21</sup> Dxejcti gunab rexpejn Israel te reii lo Dios te guinibee reiiga lojreni. Badeedti Dios Saúl xi'n Cis, sa' toBenjamín. Gunibeeni tiuu ijz. <sup>22</sup> Che badzucaj Dios Saúl, badeedni gunibee toreii David. Räjp Dios: “Agucbeä David xi'n Isaí rujñ tejsi xhigab con narä. Susoobni xtidxä sujñni guiralii ni rlazä gac.”

<sup>23</sup> Rājpa Pabl:

—Galooli bia'n diidx lo rexagdoo David guxhaļ Dios te bejn ni gudzucaj xtojlnu, ni guslaa nuure lo dojl. Naj aguzojb diidxga. Jesucrist najc bejnga, rudzucajni xtojlnu, ruslaani nuure lo dojl. <sup>24</sup> Che gusloj cagulijdx Juan rebejn, baluiini nanabpac gusiechlajz rexpejn Israel, tiobnisreni te jia xtojlneni. <sup>25</sup> Niluxh guxii riäädx guluux Juan dzuun ni badeed Dios gunni che räjpni lo rebejn: “¿Chu rujntu xhigab nacä narä? Dina gacä Crist nani bia'n diidx guxhaļ Dios. Colhuii, detzä siääd tej ni sacduxhru loä; nicla gac surloä te cuää xcura'chni.”

<sup>26</sup> Rājpa Pabl:

—Rniä lojtu sa'ä, rexagdoo toAbram, näjza lo chutis ni rajn Dios, loonu baxhaļ Dios xtiidxni ni rusule' xho rudzucaj Jesucrist xtojlnu, xho ruslaani nuunu lo dojl. <sup>27</sup> Rebejn Jerusalén, näjza renani rnibeereni, direni niembee Jesucrist nani rnibee, dizareni niacbee diidx xcuent Dios nani bacuaa reniguii ni gunii xtidx Dios agujc xchero, luxh rolreni xtidx Diosga gasob sabd. Niluxh che bagu'treni Jesucrist, guzobj xtidx Dios ni caj lo guijtzga. <sup>28</sup> Baliidxreni Pila't ju'tni Jesucrist, luxh xhet bejndini te guetni. <sup>29</sup> Che bagujc guiraa ni caj lo guijtz xcuent Jesucrist, gulätreni Jesucrist lo crujz, bacua'tzrenini nen baa cuä' te guilaj. <sup>30</sup> Dxejcti guläs Dios Jesucrist lo rebengut. <sup>31</sup> Balti huält baluiloj Jesucrist lo rexamigwni nani biädnajlni nez rexyuj Galilee, renani biädnajlzani nez guedx Jerusalén. Bahuilojreni gubaṣac Jesucrist lo rebengut, te naj rusule'reni diidx xcuent Jesucrist.

<sup>32</sup> Naj siopnānu xtidx Diosre lojtu te guibalajztu. Agujc xchero bia'n Dios diidxre con retoxtadgoldoonu. <sup>33</sup> Guläs Dios Jesucrist te huile' diidxga par nuure, rexagdooreni. Agujc xchero gunii Dios te diidx ni caj nen Salmo ni bacuaa toDavid. Lo Salmo ni rojp räjp Dios: “Luj najclu xi'nä. Nadxej guleälu te guinibeelu.”

<sup>34</sup> Rājpa Pabl:

—Dxejcru stee lajt caj xcuent ni guläs Diosni lo rebengut te nuncru guetni. Scree bacuaa te niguii, räjp Dios: “Sunidxä recossa'c lojlu si'c ni bia'nä diidx con toDavid.” <sup>35</sup> Ni'cni bacuaaza toDavid nen stee Salmo ni gunii Dios, guniini: “Dipaclu gusaan gudx tiejxh Xi'nlu nani sanälajzlu.” <sup>36</sup> Che guluujx gunibee toDavid lo retoxtadgoldoonu, si'cni badeed Dios gunni, dxejc gujtni. Biga'tznäjni retoxtadgoldooni. Niluxh guyujdx tiejxh toDavid. <sup>37</sup> Niluxh guläs Dios Jesucrist lo rebengut, ni'c di tiejxhni niujdx. <sup>38</sup> Ni'cni colyabee, la'tu resa'ä, Jesucristre, bejn ni caniä xcuentni, laani rudzucajni rextojlnu. <sup>39</sup> Chutis ni rililajz xtidx Jesucrist ruslaa Jesucristni loj guiraa rextojlni nani digacdi guibicaj mascä rusoobni guiralii ni caj lo leii xten toMoisés. <sup>40</sup> Colṣusiṣ te na'c sajctu recos ni caj lo guijtz ni bacuaa te niguii nani bacuaa xtidx Dios:

<sup>41</sup> Colhuilaa, la'tu ni ruxhiznäj xtidxä colguidxeloj, colnitloj, sa'csi naj ni nabajntu sunä te dzunro, te milagwr nez lojtu, niluxh dipac lajztu chalii, mascä jiääd chu gusule'pacni lojtu.

<sup>42</sup> Gulujxti xtidx Pabl, biunejz rebejn. Che birinäj Pabl Bernabé biädni rebejnre lojreni, räjpreni:

—Jiädsactu ste xmaan te gusule'rutu rediidxre loonu.

<sup>43</sup> Che care'ch rebejnga, xhidajl rexpejn Israel, näjza xhidajl rebenzajt nani rusoob xtidx Dios si'c rujn rexpejn Israel, birinajlneni Pabl näjza Bernabé. Dxejc baliidxreni rebejn ni siädnajlneni, räjpreni lojreni chanuutis chalilajzreni didxlii xcuent Jesucrist.

<sup>44</sup> Che gojlti stee sabd, dxej ni rusilajz rexpejn Israel, xhidalduxh rebenuejdx bire' te gucua diajgreni guinii Pabl xtidx Dios. <sup>45</sup> Che bahuii rexpejn Israel guiraa rebejn ni bire', bidxechlajzreni, gucnadareni. Dxejc gusloj cadxagdijl rexpejn Israel Pabl. Che rniini te diidx, laareni rniireni “didxxhiini”. Caniyazareni Pabl näjza Bernabé, caguereni lojreni. <sup>46</sup> Luxh di Pabl niclaza Bernabé nidxejb. Gusutijptisreni, räjpreni lo rebejn:



—Nungäjł ganid lojtu guiniinu xtidx Dios, sa'csi la'tu najctu rexpejñ Israel. Niluxh ditu chalilajz xtidx Dios, lagajc la'tu caniitu digacdi guibannäjtu Dios par tejpas. Ni'c sibiré loonu, te guiniinu xtidx Dios lo rebenzajt ni digac xpejñ Israel. <sup>47</sup> Sa'csi si'c agunibee Xtiosnu. Scree caj xtidx Dios lo guijt:

Suxhalätu te guluiilu rextidxä lo rebenzajt ni digac xpejñ Israel,  
te chalilajz rebejnğa xtidxä,  
te laareni lo xtojłreni, cadrotis yu'reni lo guedxliuj,  
räjp Dios.

<sup>48</sup> Che biejn diajg rebenzajt rediidxre, bibalazduxhrene, gulä'preni xpala'n xtidx Dios. Renani gule Dios galooli huililajz xtidx Dios. Xhidajł najcreni. <sup>49</sup> Bire'ch xtidx Dios guideb nez reguejdxga. <sup>50</sup> Dxejc rexpejñ Israel balijdx regunaa ni sajcu, näjza reniguii ni sajcu neñ guedx Antioquía, te bidxehnäjreni Pabl näjza Bernabé, barilaagwreni Pabl näjza Bernabé te biunejzreni guedx Antioquía. <sup>51</sup> Dxejcti Pabl näjza Bernabé gubijb guxhuj ni'reni si'c te seen te gacbee rebejn xhet laadi bejnreni. Sä'tireni guedx Iconio. <sup>52</sup> Baspaa Dios lajz rexpejñ Jesucrist guedx Antioquía xten Pisidia. Bazutijpza Sprit Dxañ xten Dios lastooreni.

## 14

### *Guyu' Pabl näj Bernabé guedx Iconio*

<sup>1</sup> Che bidzujñ Pabl näjza Bernabé guedx Iconio, biu'reni xquidoo rexpejñ Israel. Basule'reni xtidx Dios lo rexpejñ Israel näjza lo rebenzajt. Xhidajł rebejnğa huililajz xtidx Dios. <sup>2</sup> Niluxh sgaii rexpejñ Israel nani di chalilajz xtidx Jesucrist balijdx rebenzajt te bidxehnäjreni rebejn nani huililajz xtidx Jesucrist. <sup>3</sup> Ni'cni bia'n Pabl näjza Bernabé lo guejdxga balti dxej. Gusutzu'tz guiro'preni guniireni xtidx Jesucrist. Badeed Dios bejnreni redzunro, remilagwr xcuent xcälrnibee Dios te bahuii bejn cayacnäj Diosreni. <sup>4</sup> Guyu' tiop cuaa bejn neñ guejdxga. Gala' guejdxga huililajz xtidx Dios nani gunii Pabl näjza Bernabé, <sup>5</sup> dxejc sgala' guejdxga bacuadiajg xtidx rexpejñ Israel. Dxejc bire' te cuaa rexpejñ Israel, näjza benzajt, näjza reguxhtis, rłajzreni nidxagdiłreni reapost, rłajzzareni nucuaareni guij yejc Pabl näjza Bernabé. <sup>6</sup> Dxejc gucbeereni xhi rłajzreni gunreni, ni'c baxuñreni ro'c huijreni nez reguedx Licaonia, ro'c bidzujñreni guedx Listra, guedx Derbe, näjza reguejdx ni re' nejpga. <sup>7</sup> Che bidzujñreni ro'c, cadrotis huijreni basule'reni xtidx Dios.

<sup>8</sup> Guedx Listra guyu' te niguii ni digacdi sa, che gojllini racxhuu ni'ni. <sup>9</sup> Cagucuardiajg niguiiga xtidx Pabl. Che bahuii Pabl lojni, gucbee Pabl rililajz niguiiga xtidx Dios, rililajzzani sajc gusiajc Diosni. <sup>10</sup> Dxejcti dip gunii Pabl lojni, räjpni:

—jHuisulii!

Dxejcti huisuyälñi, gusajni. <sup>11</sup> Che bahuii rexpejñ Licaonia xhi bejn Pabl, lagajc xtiidxreni guniireni, räjpreni lo sa'reni:

—jRedios abiädluiloj loonu si'c niguii!

<sup>12</sup> Gulälajreni Bernabé Júpiter, si'c laa tej rextiosreni. Dxejcti Pabl gulälajreni Mercurio, si'c laa stee rextiosreni, sa'csi laani rniiruni lo guiro'preni. <sup>13</sup> Dxejcti te bixhojz xten xquidoo Júpiter cua' tiop gon najł guii guejnreni. Biädñani regonga ro' xquidoo Júpiter ni suga' ro' guejdxga. Rebejn näjza bixhojz rłajzreni nugu'treni regon te ganreni Bernabé näjza Pabl si'c rajñreni rextiosreni. <sup>14</sup> Che biejn diajg reapost xhi cayajc, batiäjsreni tla' xhajbreni si'c te seen direni guichagłajz xhi cayujñ rebejnğa. Ruxuñreni bidzujñreni lo rebejn, räjpreni lo rebejn:

<sup>15</sup> —Cołcuadiajg xtiidxnu. ¿Xhicuent cayujñ guejbtu recosre? Ni lagajc sabejñtu najcnu, lagajc beñ guedxliuj najcnu. Rusule'nu xtidx Dios lojtu te lacuaa ruzuxhijbtu lo redios ni runchee bejn, guzuxhijbtu lo Gueb Dios ni nabajñ par tejpas, ni benchee xhaguibaa näjza guedxliuj, näjza nisdoo, näjza guiralii ni yu' lojreni, neñreni, <sup>16</sup> Galoo basaan Diosga



gun reben guedxliuj si'ctis ni rlanjreni. <sup>17</sup> Huen najc Dios, rudeedni nisguij, rudeedni rajc xhi rajw rebejn, rdxaj xque'reni, rbaa lajzreni. Ni'cni riembeepacnu yu' Dios.

<sup>18</sup> Xhidajl diidx guniireni te chäii bejnreni gaan guredxi rebejn, sa'csi rlanjpac rebejn nugu'treni regon.

<sup>19</sup> Dxejcti bidzujn gaii xpejn Israel siädreni guedx Antioquía nájza guedx Iconio. Baquuilreni reben Listra te gucuaareni guij yejc Pabl. Bacuaareni guij yejc Pabl, gudobxhajxhrenini guläärenini ro' guejdxga, sa'csi naareni agujtni. <sup>20</sup> Dxejc laj ni suga' rexpejn Jesucrist guideb gabi cadro naga' Pabl, huistieni, biusacni guejdxga. Che bara yääl, huinäni Bernabé sääreni guedx Derbe.

<sup>21</sup> Che bidzujnreni guejdxga, basule'reni rextidx Dios lo rebejn ga. Xhidajlreni huililajz xtidx Dios. Dxejc gubi'reni, biu'reni guedx Listra, nájza guedx Iconio, nájza guedx Antioquía. <sup>22</sup> Balijdxreni rebejn nani huililajz xtidx Dios, gucnäjreni rebejn ga te batiplajz rebejn ga, räjpreni lo rexpejn Jesucrist:

—Colsnaj lajztu xtidx Dios. Susacsí rebejn la'tu, sidejdtu trabajw te jiu'tu cadro rnibee Dios.

<sup>23</sup> Dxejcti gule reapost gaii dade' ni najc bengool te fiireni rexquidoo xpejn Jesucrist. Che gulujx bacua'nreni, laj ni guredx-gunabreni lo Dios, basadiidxreni rebejn, räjpreni: “Gacnäj Jesucrist la'tu ni huililajz xtiidxni.”

### *Gubisac guiro'preni guedx Antioquía xten Siria*

<sup>24</sup> Che gudejd Pabl nájza Bernabé distrit Pisidia, bidzujnreni estad Panfilia.

<sup>25</sup> Basule'reni xtidx Dios lo reben Perge, dxejcti biriireni ro'c sääreni guedx Atalia.

<sup>26</sup> Che bidzujnreni guejdxga, biu'reni nen barcw, gudejdreni lo nisdoo te bidzujnreni stee guejdx ni laaza Antioquía. Ni'c najc guejdx ni biriireni che sääreni. Lo guejdxre yu' rexpejn Jesucrist ni gunab lo Dios xcuentreni, gacnäj Diosreni, baxhałreni Pabl nájza Bernabé chasule'reni xtidx Dios nen guiraa reguejdx. Naj abaluux Pabl nájza Bernabé dzuunga. <sup>27</sup> Che bidzujnreni guejdxga, bachagsa' rexpejn Jesucrist. Dxejcti bijreni diidx lo rebejn ga guira'ti ni bennäj Dios laareni, nájza xho badeed Dios huililajz rebenzajt nani digac rexpen Israel. <sup>28</sup> Xchej biannäjreni rexpejn Jesucrist ro'c.

## 15

### *Bidxagsa'zarenin en guedx Jerusalén*

<sup>1</sup> Nen redxejga bidzujn gaii dade' ni siäd nez Judea, caguluiireni rexpejn Jesucrist, räjpreni lojreni:

—Palga ditu gusal bee si'c gunibee toMoisés, di Dios guslaatu lo xtojltu.

<sup>2</sup> Che biejn diajg Pabl nájza Bernabé rediidxga, bidxagdijlreni redade'ga. Dxejc gule rexpejn Jesucrist Pabl nájza Bernabé nájza sgaii rexpejn Jesucrist chääreni guedx Jerusalén te guininäjreni reapost nájza rebengool te guidon xho gac xcuent beega.

<sup>3</sup> Huisunejz rexpejn Jesucrist ni najc ben Antioquía Pabl nájza rebejn ni sanäjreni, sääreni guedx Jerusalén. Gudejdreni reguedx Fenicia, nájza reguedx Samaria. Cadrotis gudejdreni bijreni diidx lo rexpejn Jesucrist ahuililajz rebenzajt xtidx Dios. Bibalazduxh rexpejn Jesucrist che biejn diajgreni rediidxga.

<sup>4</sup> Che bidzujnreni guedx Jerusalén, huichagloj rexpejn Jesucristreni. Dxejcti bij Pabl nájza Bernabé diidx lo reapost, lo rebengool nani rnibee rexpejn Jesucrist, nájza lo rexpejn Jesucrist, guiraa redzunro nani cayunnäj Diosreni. <sup>5</sup> Dxejc huisulii gaii refarisee ni ahuililajz xtidx Dios, räjpreni lojreni:

—Che chalilajz rebenzajt xtidx Dios, nanab churenin bee, nanabza gusoobrenin leii xten toMoisés.

<sup>6</sup> Dxejcti bachagsa' reapost nájza rebengool nani rnibee rexpejn Jesucrist, te don xho gunreni. <sup>7</sup> Huisulii Pedr, räjpni lojreni:

—Guejbtu, resa'ä, anajntu xho bejn Dios gubalti ijz. Gule Dios narä lo guiraanu te gusule'ä xtidx Dios loj rebenzajt, te chalilajzreni xtidx Dios. <sup>8</sup>Luxh Dios, nani numbechee lastoo guiralii bejn, badeed seen huililajzpac rebenzajt xtiidxni. Badeed Dios Sprit Dxan xtenni lojreni si'c te seen te gacbee bejn najcreni xpejn. Sigac baniidxni Sprit Dxan xtenni loonu galoo, si'cza badeednini lo rebenzajt. <sup>9</sup>Sigajc rinälajz Dios nuunu, sigajcza rinälajzni rebenzajt. Che huililajz rebenzajt xtiidxni, basia Dios lastooreni. <sup>10</sup>Naj ¿xhicient rusieedtu Dios, ä? Di niajcdi nisianäj retoxtadnu releiiga, digac diza chosanäjnu releiiga naj. ¿Xhicient rlaiztu chasanäj rebenzajt releiiga? <sup>11</sup>Xhet si'cti gacni sa'csi Dios ruslaa nuure lo xtojlnu che rililajznu xtidx Jesucrist, luxh si'cza ruslaani rebenzajt lo dojl che rililajzreni xtidx Jesucrist —räjp Pedr.

<sup>12</sup>Che gulujx gunii Pedr, dxitis gurej rebejn, bacuadiajgreni xtidx Bernabé, xtidx Pabl. Guiro'preni bijreni diidx xho cayujn Dios redzunro, remilagwr nez lo rebenzajt.

<sup>13</sup>Che gulujx gunii guiro'preni, xhet guniidi rebejn. Jacoobtis räjp lojreni:

—Sa'ä, colcuadiajg xtidxä. <sup>14</sup>Agunii Simón ni rniireni Pedr lojtu xho ganiddoo baxhal Dios laani lo rebenzajt te gurejdx Dios rexpejn ni nadxaag lo rebenzajt. <sup>15</sup>Luxh si'cza caj lo guijtz. Agujc xcheroduxh bacuaa reniguii nani gunii xtidx Dios, che räjpni:

<sup>16</sup>Sidzujn dxej ni guibisacä.

Sunä guzuxhijb guiraa rebejn nez loä si'c bazuxhijb rexpejn Israel che gubajn toDavid. Si'c gunä,

<sup>17</sup>te jädgajn rebejn narä te gacä Xtiosreni,

näzja guiraa rebenzajt nani najc rexpenä jädgajn narä,

<sup>18</sup>si'c räjp Dios nani galooli baluiloj guiraa redzuunre.

<sup>19</sup>Dxejcti räjp Jacob lojreni:

—Dee najc xhigab ni runä. Na'cru gusieednu rebenzajt ni cagusiechajzreni, renani salilajz xtidx Dios. <sup>20</sup>Gucuaanu te guijtz, jie'tznu lo rebenzajt: Na'c gaureni xhi cos ni basuj bejn loj rebanäjb, sa'csi dinu chalilajz xcuent rebanäjb. Na'cza guesnäjreni bejn ni di gac chäälni, na'cza gaureni bääl nani gurerejn, na'cza gaureni rejn. <sup>21</sup>Dee gucuaanu te di guche'chreni xpejn Israel sa'csi nen guiraa reguejdx galooli yu' rexpejn Israel nani rol leii xten toMoisés gasob sabd —räjp Jacob.

<sup>22</sup>Che biejn diajg reapost näzja rebenzajt nani rnibee, näzja guiraa rexpejn Jesucrist xtidx Jacob, bichagajzreni xtiidxni. Dxejcti gulereni tiop sa'reni chanä Pabl näzja Bernabé guedx Antioquía. Gulereni Judas ni rniireni Barsabás näzja Silas. Guiro'preni najc bejn ni sajcro loj rexpejn Jesucrist. <sup>23</sup>Dxejcti bejnreni guijtz huinäreni. Bacuaareni rediidxre:

“Nuure reapost, näzja rebenzajt ni rnibee, näzja rexpejn xquidoo Jesucrist ruxhalnu xtixtios lojtu, resa'nu nani rbäjz guedx Antioquía näzja estad Siria näzja estad Cilicia.

<sup>24</sup>Rucuaanu guijtzre sa'csi biejn diajg birii gaii resa'nu ree biädsieedreni la'tu con xtiidxreni, cayu'tu yärsia' sa'csi najreni lojtu nanab chutu bee si'c gunibee toMoisés, guibajnzatu si'c rnii leii xten toMoisés. Xhet nuudinu gunibeenu jädnireni si'c. <sup>25</sup>Ni'cni biennu xhigab guxhalnu lojtu tiop dade' ni gulenu loj resa'nu te chanäreni Bernabé näzja Pabl, nani sanälaznu. <sup>26</sup>Agajc balti huält rlaizreni nugu'treni Bernabé näzja Pabl, luxh direni guidxejb gusule'reni xtidx Jesucrist. <sup>27</sup>Naj ruxhalnu Judas näzja Silas lojtu. Laareni susule'za guiraa rediidxre lojtu. <sup>28</sup>Tejsi najc xhigabnu con Sprit Dxan xten Dios. Di rlaaznu gutaalrunu leii ni chasanäjtu. Releiitis nani nanab rusoobnu rucuaanu lojtu. <sup>29</sup>Na'c gautu xhicos ni basuj bejn lo rebanäjb, sa'csi dirunu chalilaaz xcuent rebanäjb. Na'cru gautu rejn, na'cza gautu bääl nani gurerejn, na'cza guesnäjtu nani digac chäältu. Palga gusoobtu recosre, laaca cayujntu. Sacru guibajntu. Sujiannäjtu Dios.”

<sup>30</sup>Dxejcti basadiidx rexpejn Jesucrist Judas näzja Silas huinäreni Pabl näzja Bernabé guedx Antioquía. Che bidzujnreni ro'c batojpreni guiraa rebejn nani huililajz xtidx Dios te bilreni guijtzga lojreni. <sup>31</sup>Che biejn diajg rexpenzajt Jesucrist diidx ni caj lo guijtzga,

bibalazduxhreni sa'csi gulecdxi diidxga lastooreni. <sup>32</sup> Dxejcti basule' Judas nájza Silas xtidx Dios lojreni, sa'csi rudeed Dios xtiidxni loj guiro'preni. Xhidajl diidx guniireni te balijdxreni rexpejn Jesucrist. Lacti gulecdxi rediidx ni guniireni lastoo guiraa rexpejn Jesucrist. <sup>33</sup> Ro'c bia'nreni xchej, dxejcru cuájb rexpejn Jesucrist gubi'reni te gudeedreni xtixtios loj reni baxhalreni.

<sup>34</sup> Dxejc Silas bejn xhigab jia'nni ro'c. <sup>35</sup> Luxh Pabl nájza Bernabé bia'n guedx Antioquía. Guiro'preni baluui, basule'reni xtidx Dios loj rebejn. Guyu'za sgaii dade' ni gucnäjreni.

### *Huihuisac Pabl rexpejn Jesucrist nen guiraa reguejdx*

<sup>36</sup> Che gudejd xhidajl dxej, räjp Pabl lo Bernabé:

—Do'o guibi' lo guiraa reguejdx cadre basule'nu rextidx Dios te chohuiinu don xho yu' rexpejn Jesucrist.

<sup>37</sup> Niluxh Bernabé rlanj chanäreni Juan ni laa Marcw. <sup>38</sup> Naaddi Pabl chääni, sa'csi birii Marcw lojreni che guyu'reni nez Panfilia, diruni nisianäj Pabl nájza Bernabé. <sup>39</sup> Dxejc gudildiidxreni. Gubicajtireni lo sa'reni. Ni'c sanä Bernabé Marcw, biu'reni nen barcw, sääreni Chipre ni re' galäi nisdoo. <sup>40</sup> Dxejcti Pabl gule Silas te sanänini. Badeed rexpejn Jesucrist xtixtios lojreni, räjpreni gacnäj Diosreni. <sup>41</sup> Lał ni sasajreni gudejdreni guiraa reguedx Siria nájza guiraa reguedx Cilicia, ro'c gucnäjreni guiraa rexpejn Jesucrist, basule'rurenireni xtidx Jesucrist lojreni.

## 16

### *Huinä Timoteu Pabl náj Silas*

<sup>1</sup> Bidzun̄sac Pabl nájza Silas reguedx Derbe nájza Listra. Ro'c bidxaagreni te xpen Jesucrist ni laa Timoteu. Xnanni najc beñ Israel ni huililajz xtidx Jesucrist. Xtdadni najc beñ griegw. <sup>2</sup> Didxsa'ctis rnii rexpen Jesucrist ni yu' Listra nájza Iconio xcuent Timoteu. <sup>3</sup> Rlanj Pabl chanäni Timoteu. Dxejcti basäl Pabl bee Timoteu te gujcn̄i si'c xpen Israel, te xhet naadi rexpejn Israel, sa'csi guiraarenireni nanchee xtdad Timoteu najc beñ griegw. <sup>4</sup> Che bidzujñreni cade tej reguejdx, basule'reni xtidx reapost nájza rebeñgool nani rnibee xpen Jesucrist guedx Jeurusalén, te gusoob rexpejn Jesucrist diidx ni bacuaarenireni lo guijtz. <sup>5</sup> Bazutijp xtidx Dios lastoo renani huililajz xtidx Jesucrist. Guixe-guixee xhidajlr̄u bejn huililajz xtidx Dios xcuent Jesucrist.

### *Lo te bacal̄ gunii te niguii lo Pabl*

<sup>6</sup> Che gudejdreni distrit Frigia, nájza estad Galacia, di Sprit Dxi xten Dios nusaan nusule'reni xtidx Jesucrist nen reguedx Asia. <sup>7</sup> Bidzujñtirenireni gajxh estad Misia. Dxejc rlanjreni nijreni estad Bitinia, niluxh di Sprit Dxi xten Dios nusaan nijreni ro'c. <sup>8</sup> Ni'c gudejdtirenireni stelaad estad Misia, bidzujñrenireni guedx Troas. <sup>9</sup> Te yääl si'c lo te bacal̄ bahuii Pabl suga' te beñ Macedonia. Canabduxh niguiiga lo Pabl, räjpni:

—Gudaa ladxä, estad Macedonia, te gacnäjl̄u nuunu.

<sup>10</sup> Che bara yääl ni gunixcal̄ Pabl, gudilgajcnu te barcw te chonnu estad Macedonia, sa'csi gucbeenu Dios najc nani caguxhal̄ nuure te guluiini xtiidxni lo rebeñ Macedonia. Narä, Lucas, ni cagucuaä rediidxre, gusanää Pabl nájza Silas.

### *Che guyu' Pabl con Silas guedx Filipos*

<sup>11</sup> Biu'tinu nen barcw ro' guedx Troas. Bidzun̄nu Samotracia, te yuj ni re' nen nisdoo. Che bara yääl bidzun̄nu guedx Neápolis. Ro'c biriinu nen barcw, <sup>12</sup> bionnu guedx Filipos, guejdx nani sajcr̄u lo estad Macedonia. Guedx romanni. Ro'c bia'n̄nu tiop choñ dxej. <sup>13</sup> Che gojl sabd, dxej ni rusilajz rexpejn Israel, biriinu guejdxga bionnu ro' te gueuu, sa'csi biennu xhigab ro'c jiäd rexpejn Israel te guininäjrenireni Dios. Ro'c gurejnu, guniinu lo renane' nani bire' ro'c. <sup>14</sup> Lojreni nadxaag te nane' ni laa Lidia, te ben̄zijt ni digac xpejn

Israel. Guedx Tiatira siäädni. Ruto'ni ladmuraad ni sacduxh. Rajn gunaaga Dios si'c rajn rexpejn Israelni. Bacuadiajgni xtidx Jesucrist ni cagusule' Pabl. Guclnäj Dios nane'ga te huililajzni xtiidxni. <sup>15</sup> Birobnisni, näjza guiraa reni rbäjz rolijzni. Dxejc guniini loonu:

—Palga ruhuiitu guliä rililazä xtidx Dios, coltaa rolizä te ro'c cuääztu.

Lacti gunab nane'ga nuunu, ni'c huijia'nnu rolijzni.

<sup>16</sup> Te dxej cheni sionnu cadro rninäj bejn Dios, bidxaagnu te dxa'p nani yu' te bendxab nen lastooni. Rajp rexpaxhuaanni melduxh sa'csi rusule' dxa'pga recos ni gajd gac.

<sup>17</sup> Birinajl dxa'pga Pabl näjza nuure. Rbedxa' dxape'ga, räjpni:

—Reniguiire najc xmos Dios nani rnibee guideb guedxliuj. Ruluiireni loonu xho laanu lo xtojlnu —räjp dxape're.

<sup>18</sup> Balti dxej birinajl dxape'ga nuure, entis caniini rediidxga lo rebejn. Lacti basieed dxape'ga Pabl, ni'c gubiréni, räjpni lo bendxab ni yu' nen lastoo dxape'ga:

—Xcuent xcälrnibee Jesucrist rniä lojlu: “Birii nen lastoo dxape'ga.”

Lagajc dxejc birii bendxab nen lastoo dxape'ga.

<sup>19</sup> Che bahuii rexpaxhuaan dxape'ga diru dxape'ga gun gaan melro, gunaazreni Pabl näjza Silas. Dxejcti gudobxhajxhreni guiro'preni nez roguii cadro suga' reguxhtis. <sup>20</sup> Che bidzunäjreni Pabl näjza Silas lo reguxhtis, räjp rexpaxhuaanni lo reguxhtis:

—Reniguiire najc xpejn Israel. Cayujnreni bieju lo guejdxre. <sup>21</sup> Caguluiireni garenca leii nani digacdi gusoobnu sa'csi najcnu ben roman.

<sup>22</sup> Dxejcti bidxechnäj rebejn Pabl näjza Silas. Gunibee rejuejz gulääreni xhajb Pabl, näjza xhajb Silas, te batiäjlni baar guideb tiejxh guiro'preni. <sup>23</sup> Che gulujx gudin-duxhreni Pabl näjza Silas, biäurenin nen latzguiib. Dxejcti räjp reguxhtis lo reguixhajg:

—Colgapdzu'tzreni, di gusaantu guiriireni.

<sup>24</sup> Basäl guixhajgreni nen latzguiib. Guyu' ni'reni nen te baräjd ni sojb gueed te di guxunreni.

<sup>25</sup> Garolyääl guninäj Pabl näjza Silas Dios, gusloj cayolreni dij ni rliä'p xpala'n Dios. Biejn diajg guiraa rebejn ni yu' nen latzguiib cayolreni. <sup>26</sup> Chela gujc te xuduxh, basniib guideb latzguiibga. Bixal guiraa repuert, birucya' guiraa recaden, bixal ro' rebaräjd cadro naaz ni'reni. <sup>27</sup> Che gubajn guixhajg ni canäj latzguiib, bahuiini naxhal latzguiib, gulääni spaad xtenni, te rlanjni nugu'tni lagajc laani, sa'csi naani abadxun reni niäu nen latzguiib. <sup>28</sup> Dxejc guredxa' Pabl, räjpni lo guixhajgga:

—Na'c gunlu si'c. Bahuii, guiraliinu suga'nu ree.

<sup>29</sup> Dxejc gunibee guixhajg biääd te bajl te biu'ni nen latzguiib. Racsejsni biäädni bazuxhijbni nez loj Pabl näjza nez loj Silas. <sup>30</sup> Dxejcti gulää guixhajgreni nen latzguiib. Gunabdiidxni räjpni lojreni:

—¡Colguinii, dade'! ¿Xhini'c nanab gunä te guslaa Dios narä lo dojl?

<sup>31</sup> Räjp Pabl näjza Silas lo guixhajg:

—Huililajztis xtidx Dios xcuent Jesucrist, luj näjza guiraa reni yu' rolijzlu, te guslaa Diostu lo dojl.

<sup>32</sup> Basule' Pabl näjza Silas rextidx Dios lojni näjza loj guiraa rebejn ni yu' rolijzni.

<sup>33</sup> Lagajc dxejc, garol yääl, huiinä guixhajgreni gudiibni dejtreni cadro batiuug baarreni. Dxejcti batiobnisreni guixhajg näjza guiraa reni yu' rolijzni. <sup>34</sup> Dxejc huiinä guixhajgreni rolijzni, ro'c badeedni xhi gudajwreni. Laani näjza guiraa reni yu' rolijzni bibalazduxhreni sa'csi huililajzreni xtidx Dios.

<sup>35</sup> Che bara yääl, baxhal reguxhtis stiop guixhajg räjpni lo guixhajg nani cuanäj latzguiib:

—Baslaa reniguiiga.

<sup>36</sup> Dxejcti huiye'tz guixhajgga lo Pabl, räjpni:

—Anaj reguxhtis guslaätu. Naj colchäj, gacnäjä Dios la'tu, saru chäätu.

<sup>37</sup> Niluxh räjp Pabl loj reguixhajg:



—Nuure najczanu beṇ roman. Batiäjlreni baar detznu nez loj guiraa rebejn. Nicla niniabdiidxreni la yu' xhi dojl biennu. Basäuren nuure neṇ latzguiib. Leii xten roman di gusaan gac rebeṇ roman si'c. Luxh naj rlaizreni guslaareni nuure xhiga'tz. ¡Dinu guirii si'c! Lagajc laareni sujiädslääreni nuunu.

<sup>38</sup> Che huiye'tz reguixhajg diidxga lo reguxhtis, bidxebduxhreni che biejn diajgreni beṇ roman najc Pabl näjza Silas. <sup>39</sup> Dxejcti biääd reguxhtis, gulääreni Pabl näjza Silas, gunabreni jiäjlajzreni. Gunabduxhreni lo Pabl näjza Silas; räjpreni:

—Coljiunejz guejdxre.

<sup>40</sup> Che biriireni neṇ latzguiib, huijreni rolijz Lidia. Baliidxreni rexpejn Jesucrist, gulecdxireni lajz rexpejn Jesucrist. Dxejc biunejzreni guejdxga.

## 17

### *Cadxechduxh guiraa rebeṇ Tesalónica*

<sup>1</sup> Che gudejdreni reguedx Anfípolis, näjza guedx Apolonia, bidzujṇreni guedx Tesalónica cadro yu' te xquidoo rexpejn Israel. <sup>2</sup> Ro'c basule' Pabl xtidx Dios si'c ni rujnpacni. Choṇ sabd, dxej ni rusilajz rexpejn Israel, basule'ni xtidx Dios lojreni. <sup>3</sup> Basule' Pabl xtidx Dios ni caj lo guijtz ni bacuaa reniguii ni gunii xtidx Dios galooli. Caj lo guijtzga: “Nanab ted Crist trabajwduxh, guetni, niluxh sibansacni lo rebeṇgut.”

Dxejc räjp Pabl lojreni:

—Ruiä lojtu diidx xcuent Jesús; lagajc Jesúsre najc Crist —räjpni.

<sup>4</sup> Yu' rexpejn Israel huililajz xtidx Dios, gusanäjreni Pabl näjza Silas. Näjza xhidalduxh beṇ griegw nani rajṇ Dios näjza xhidajl reguna griegw ni sajcro huililajz xtiidxni.

<sup>5</sup> Luxh yu' rexpejn Israel ni di chalilajz, ni bidxechlajz. Batie'reni gaii benploj, beṇlatsiaj, bejnreni bieje nez galäii. Biu'reni rolijz Jasón caguuilreni Pabl näjza Silas te cuääreni guiro'preni nez lo rebejn. <sup>6</sup> Niluxh che direni nidxäl Pabl näjza Silas, alga Jasón gulääreni näjza gaii renani rililajz xtidx Dios, sanääreni redee lo reguxhtis, cabedxa'reni:

—Reniguiire ni abejn bieiduxh guideb guedxliuj abidzujṇreni laadxnu, <sup>7</sup> luxh badeed Jasón rolijzni jia'nreni. Direni gusoob leii xten César, najreni yu' stee rei ni laa Jesús.

<sup>8</sup> Che biejn diajg reguxhtis näjza rebejn diidxre, guyu'reni yärsia'. <sup>9</sup> Cua' reguxhtis meel lo Jasón näjza lo rexamigwni. Räjp reguxhtis sudedsacreni meelga che jii Pabl näjza Silas, jiunejzreni lo guejdxga. Dxejcti baslaareni Jasón näjza rexamigwni.

### *Che guyu' Pabl con Silas guedx Berea*

<sup>10</sup> Che biu' guxhijn, baxhalgajc rexpejn Jesucrist Pabl näjza Silas ste guejdx ni laa Berea. Che bidzujṇreni guejdxga, biugajczeni xquidoo rexpejn Israel. <sup>11</sup> Hueenru najc rebeṇ Berea loj rebeṇ Tesalónica, sa'csi rbaali lajzreni bacuadiajgreni xtidx Pabl ni guniini xcuent Jesucrist. Guixe-guixee bilreni guijtz cadro caj xtidx Dios te gucbeereni la guli rextidx Pabl. <sup>12</sup> Xhidajl rexpejn Israel näjza xhidajl beṇ griegw ni sajcro, gunaa sigajc niguii, huililajz xtidx Dios. <sup>13</sup> Che gucbee rexpejn Israel ni rbäjz guedx Tesalónica caguluii Pabl xtidx Dios guedx Berea, biäädreni guedx Berea. Che bidzujṇreni lo guejdxga bejnreni bieje ro'c. <sup>14</sup> Dxejcti baxhal rexpejn Jesucrist Pabl, huijni ro' nisdoo. Niluxh Silas näjza Timoteu bia'n guedx Berea. <sup>15</sup> Dxejcti rebejn ni guzanäj Pabl huinänini guedx Atenas. Ro'c räjp Pabl lo rebejn ni biädnäni gudeedreni diidx lo Silas näjza Timoteu jiädgajczeni lojni. Dxejcti rebejn ni sanä Pabl gubisac guedx Berea.

### *Guyu' Pabl guedx Atenas*

<sup>16</sup> Laṽ ni guläjz Pabl guedx Atenas, guyuduxhni yärsia' sa'csi bahuiini rajṇ guiraa rebejn rebanäjb nani runchee lagajc bejn. <sup>17</sup> Ni'c neṇ xquidooreni gudildiidx Pabl rexpejn Israel näjza rebeṇzajt ni rajṇ Dios si'c rajṇ rexpejn Israelni. Guixe-guixee gudildiidxni chutis bejn ni re' lo guii. <sup>18</sup> Dxejcti biääd gaii bejn lojni. Yu' reni rolduxh



guijtz ni bacuaa epicúreos, yu'za renani rolduxh guijtz ni bacuaa estoicos, gudildiidxreni Pabl. Yu' reni räjp lo sa'reni:

—¿Xhicha guinii bejnre loonu? Entis naxhal ro'ni.

Yu'zarení räjp lo sa'reni:

—Pet calä'pni xpala'n tiop dioscoob.

Si'c guniireni sa'csi biejn diajgreni bazä't Pabl “Jesús” näjza “Resureccion”, ni säloj yälgubansac lo rebenğut. <sup>19</sup> Dxejcti gunaaazreni Pabl sanärenini nez dajn ni laa Areópago. Ro'c yu' si'c te jusgaad. Räjpreni lo Pabl:

—Rlaaznu gacbeenu xhi diidx ruluiu, <sup>20</sup> sa'csi rujylu diidx nani dinu jiacbee. Ni'cni bejn huen, basule' diidxre loonu te gacbeenu xhi sälojreni —räjpreni.

<sup>21</sup> Reben Atenas näjza rebenzijt ni yu' ro'c ruteedreni redxej rniireni didxcoob lo sa'reni, o rucua diajgreni didxcoob. Ni'cpac rchaglajzreni.

<sup>22</sup> Galäii Areópago huisulii Pabl, räjpni lojreni:

—Colcuadiajg guejbtu, beñ Atenas. Abahuiä xho ranğuxhtu xhidajl banäjb. <sup>23</sup> Che siädsaa lo guejdxre, bahuiä lo rexpanäjb. Bahuiäza loj te piään cadro caj rediidxre: “Dios ni dinu jiembee.” Narä ranä Diosga. Rumbeä Diosga nani rajntu mase ditu gumbeeni. Susule'ä xtiidxni lojtu.

<sup>24</sup> Räjp Pabl:

—Diosre benchee guedxliuj näjza guiralii ni yu' lo guedxliuj, sa'csi rnibeeni xhaguibaa näjza guedxliuj. Di Diosre cuääz lo piään niclaza nen reguidoo ni runchee bejn. <sup>25</sup> Diza Diosre guiquiin chu gacnäjni sa'csi lagajc Diosre rudeed yälñabajñ, yälñadaan, näjza guiralii nani rquiin reben guedxliuj.

<sup>26</sup> Räjp Pabl:

—Guiralii reben guedxliuj najc rexagdo tejsi gunaa näjza tejsi niguii. Desde galooli gunibee Diosga bal ijz chu renacion, näjza cati gunibee renacionga. <sup>27</sup> Benchee Dios guiraa reben guedxliuj te quiilreni Dios te chalilajzreni xtiidxni. Luxh suga' Dios gajxh cadetejnu, <sup>28</sup> sa'csi Dios rujñ nabajñnu lo guedxliuj, runiidxni rsiaan lo guedxliuj, runiidxzani rdajlru xcälñabañnu lo guedxliuj. Laaca bacuaa rexpenñajntu: “Najcnu xi'n Dios, sa'csi benchee Diosnu.” <sup>29</sup> Ni'cni, sa'csi najcnu xi'n Dios, di nungäjł jiennu xhigab najc Dios si'c rebanäjb ni nac-chee pla't, o guij, o yajg si'ctis ni runchee bejn rexpanäjb. <sup>30</sup> Nen redxej ni di bejn niembee Dios, diza Dios niujñ castiigwreni. Niluxh naj gunibee Dios gusiechlajz guiraa rebejn, <sup>31</sup> sa'csi abasoobni te dxej cheni gac Jesús juejz lo guiraa reben guedxliuj. Agule Diosni gacni juejz, sa'csi rumbechee Jesucrist chu najc beñğuijdx, chuza najc beñsa'c. Rnili Jesucrist rediidx ni najc guliitis. Guläs Dios Jesucrist, baspañsacnini lo rebenğut, te gacbeenu rajp Jesucrist yälñnibee lo guiraa recos.

<sup>32</sup> Che biejn diajg rebejnga gubansac Jesucrist lo rebenğut yu' reni baxhizñäx xtiidxni. Yu'za reni räjp:

—Sucua diajgrunu xcuent ni rusule'lu.

<sup>33</sup> Dxejcti birii Pabl lojreni. <sup>34</sup> Yu'za reni huinajłni, huililajzreni xtidx Dios. Lojreni nadxaag te dade' ni laa Dionisio ni najc te juejz lo Areópago; näjza te nane' ni laa Dámaris. Guyu'za sgaii bejn ni huililajz.

## 18

### *Guyu' Pabl guedx Corinto*

<sup>1</sup> Biriiti Pabl guedx Atenas, huijni guedx Corinto. <sup>2</sup> Ro'c bidxaagni te dade' ni najc ben Israel, ni laani Aquila. Ponto najc lajdxni. Biädğajni ro'c, biriini Roma, sa'csi gunibee rei Claudio guirii guiraa rexpejn Israel guedx Roma. Birinäj Aquila Priscila chääłni. Biriireni Italia, biädreni guedx Corinto. Bihuii Pablreni, <sup>3</sup> sa'csi lagajc dzuun ni rujñreni rujnzani. Tejsi lajt guläjzreni te bejn jionreni tejsi dzuun. Runcheereni yuguijd. <sup>4</sup> Gasob sabd, dxej ni rusilajz rexpejn Israel, basule' Pabl xtidx Dios nen xquidoo rexpejn Israel.

Rlajzni chalilajz rexpejn Israel nájza beñ griegw ni digac xpejn Israel diidx ni rniini xcuent Jesucrist.

<sup>5</sup> Dxejcti birii Silas nájza Timoteu Macedonia. Che bidzujñreni guedx Corinto, gusloj rusule'tis Pabl xtidx Dios guixe-guixee, guniliini lo rexpejn Israel:

—Jesús najc Crist ni runloj rexpejntu guxhal Dios.

<sup>6</sup> Dxejc bidxechnäj rexpejn Israelni, guniyajzareni xtiidxni. Dxejcti gubijb Pabl xhajbni si'c te seen diruni jiureni, caguro'nnireni. Räjpzani lo rexpejn Israel:

—Lagajc la'tu rajptu dojl nittu lo Dios. Xhet dojldi rapä narä. Aguniä xtidx Jesucrist lojtu. Naj lo rebejn nani di gac beñ Israel gusule'ä xtidx Jesucrist —räjpni.

<sup>7</sup> Dxejcti biriini lojreni, huijni roliz Justo, te bejn ni rajñ Dios si'c rajñ rexpejn Israelni. Rolizni sojb cuä' xquidoo rexpejn Israel. <sup>8</sup> Crisp, ni rnibee xquidoo Israel, huililajz xtidx Jesucrist. Huililajza guiraa reni rbäjz rolizni. Xhidajlza beñ Corinto huililajz xtidx Jesucrist, dxejcti birobnisreni. <sup>9</sup> Gojl te yääl gunii Dios lo te bacal, räjpni lo Pabl:

—Na'c guidxejblu. Guniitis, na'c gusäulu ro'lu, <sup>10</sup> sa'csi narä suganää luj. Rut gacdi gun latsiajlu. Aguleä xhidalduxh bejn lo guejdxre te gacreni xpenä —räjp Dios.

<sup>11</sup> Ni'c bia'n Pabl ro'c tebizgarol. Baluiini xtidx Dios lojreni.

<sup>12</sup> Che gujc Galíon gubernadoor xten Acaya, tejsi xhigab bejn rexpejn Israel bidojpreni te gunaazreni Pabl. Sanäreni Pabl jusgaad cadro yu' Galíon. <sup>13</sup> Räjpreni lo Galíon:

—Niguiire caguluii rebejn ganreni Dios garenca mood, xhet si'cti ni caj lo xleiinu —räjpreni.

<sup>14</sup> Agojl ninii Pabl, che räjp Galíon lo rexpejn Israel:

—Palga gulanni o bagu'tni te bejn, dxejc yu' xtojlni te gucuadiagä xtiidxtu. <sup>15</sup> Per la'tu cadxe'chtu xcuent diidx, xcuent laj bejn, xcuent ni caj lo leii xtentu. Gubernadoor narä, xho gucuadiagä diidxga. Lagajc la'tu colchahuii xho guntu yälguxhtis —räjp Galíon.

<sup>16</sup> Gunibee Galíon barilaagw resoldaad rexpejn Israel. <sup>17</sup> Dxejc gunaaz reGriegw Sóstenes nani rnibee xquidoo rexpejn Israel. Batiäjñreni baar dejtz Sóstenes nez ro' jusgaad xten Galíon. Niluxh nicla niu Galíonreni.

### *Chon huält huihuii Pabl rexpejn Jesucrist*

<sup>18</sup> Bia'nti Pabl Corinto xchej. Dxejc badeed Pabl xtixtios lo rebejn nani huililaz xtidx Jesucrist, biriini ro'c. Sanäni Priscila nájza Aquila, biu'reni neñ barcw te siireni nez estad Siria. Dxejc ganid gudejdreni guedx Cencrea, cadro bahuañ Pabl yejñni si'c te seen yu' xhi diidx bia'nni con Dios. <sup>19</sup> Che bidzujñreni guedx Éfeso, basa'n Pabl Priscila nájza Aquila ro'c. Biu' Pabl xquidoo rexpejn Israel, ro'c bachaagni diidx con rexpejn Israel. <sup>20</sup> Dxejcti che gunabreni jia'n Pabl ro'c xchej, naaddini jia'nni. <sup>21</sup> Badeedni xtixtios, räjpni lojreni:

—Nungäjñpac chatedä laniro guedx Jerusalén. Siälsacä ree palga gusaan Dios jiälä.

Biusacni neñ barcw, biriini guedx Éfeso. <sup>22</sup> Che bidzujñni guedx Cesarea, biriini neñ barcw, huijni guedx Jerusalén. Che bidzujñni, guniini xchan lo reapost nájza lo rexpejn Jesucrist. Dxejc huijni guedx Antioquía xten Siria. <sup>23</sup> Che gudejd balti dxej, biriini guejdxga, gudejdni guideb estad Galacia nájza guideb distrit Frigia. Neñ cade tej reguejdxga, balijdxni rexpejn Jesucrist te gutijpru lajzreni.

### *Baluii Apolos xtidx Dios neñ guedx Éfeso*

<sup>24</sup> Neñ redxejga, te dade' ni laa Apolos bidzujñ guedx Éfeso. Najcni xpejn Israel, gojlni guedx Alejandría xten Egipto. Lacti rajc rnisa'cni, nanduxhzani xtidx Dios. <sup>25</sup> Nanduxhni xtidx Dios xcuent Jesucrist. Laaca basule'ni xtidx Dios, guideb xcälñabajñni rinälajzni Dios. Niluxh xcuent Jesucrist najntisni yälrobnis xten Juan. <sup>26</sup> Nicla nidxejb Apolos gusloj caniini neñ guidoo xten rexpejn Israel. Che bieñ diajg Priscila nájza Aquila xtiidxni, huinärenini rolizreni. Ro'c basule'rureni xtidx Dios nani gajdñni gan. <sup>27</sup> Dxejc, sa'csi abejñ Apolos xhigab chääni reguejdx ni tre' nez Acaya, bacuaa

rexpejn Jesucrist guiitz lo rexpejn Jesucrist ni yu' neñ reguejdxga te gacnäjreni Apolos. Gucnäduhx Apolos rebejn nani badeed Dios huililajz xtidx Dios neñ reguejdxga, <sup>28</sup> sa'csi gunilii Apolos nez loj guiraa rebejn xhet laadi rnii rexpejn Israel. Di niajcdi nuzejc rexpejn Israel diidx lo Apolos sa'csi ganax con xtidx Dios ni bacuaa reniguii ni gunii xtidx Dios galoo basule'ni: “Jesús najc Crist nani cayunlojtu guxhaḷ Dios.”

## 19

### *Guyu' Pabl guedx Éfeso*

<sup>1</sup> Laḷ ni guyu' Apolos guedx Corinto, huij Pabl xhidajl reguejdx neñ región Asia, dxejcti bidzujñni guedx Éfeso cadre bidxaagni gaii bejn nani huililajz xtidx Dios. <sup>2</sup> Gunabdiidx Pabl lojreni:

—Che huililajztu xtidx Dios, ¿la biädlajz Sprit Dxan xten Dios neñ lastootu, ä?

Räjpreni lojni:

—Nicla gajd diajgnu jiejn la yu' te Sprit Dxan xten Dios.

<sup>3</sup> Räjp Pabl lojreni:

—¿Xho birobnistu, pues?

Räjpreni lojni:

—Birobnisnu si'cni baluii Juan tiobnis bejn.

<sup>4</sup> Dxejcti räjp Pabl lojreni:

—Guliica bastiobnis Juan che basiejch lajz rebejn xtojḷreni. Räjpza Juan lo rebejn: “Coḷchalilajz xtidx bejn ni siääd detzä.” Bejn ni basä'tni najc Jesucrist —räjp Pabl.

<sup>5</sup> Che biejn diajgrenti rextidx Pabl birobnisreni te gacbee rebejn najcreni xpejn Jesucrist. <sup>6</sup> Che batzuub Pabl ḡaani yejcreni, biu' Sprit Dxan xten Dios neñ lastooreni. Dxejc gusloj caniiireni garen-garen didxsaj. Guslojza caniiireni diidx ni badeed Dios lojreni. <sup>7</sup> Si'c tzubitio'p dade' gusajc si'c.

<sup>8</sup> Si'c choñ bäii, guixe-guixee gunii Pabl rextidx Dios, basule'ni xcuent xcälrnibee Dios loj rebejn neñ xquidoo rexpejn Israel. Dini nidxejb guniini loj rebejn.

<sup>9</sup> Dxejc guyu' reni gucnajd, dirureni nililajz xtidx Dios. Che gusloj caniyajreni xtidx Dios lo rebejn, biunejz Pabl ro'c sanäni rexpejñni ni rililajz xtidx Jesucrist. Sanä Pablreni te bidxagsa'reni ro scueel xten mastr Tiranno. Ro'c bidxagsa'reni te guixe-guixee basule' Pabl xtidx Dios lojreni. <sup>10</sup> Tiop ijz bejn Pabl si'c, ni'c guiraa rebejn ni rbäjz Asia biejn diajgrenti xtidx Dios. Rexpejn Israel sigajc reben griegw biejn diajgrenti xtidx Dios. <sup>11</sup> Gucnäj Dios Pabl bejñni xhidajl dzunro, remilagwr. <sup>12</sup> Ni'cni biääd bejn ca'reni baii, ca'reni tla' lajd te guxheebreni relajdga lo Pabl. Dxejcti rinäreni relajdga lo rebejn ni racxhuu, luxh riacgajc rebejn ni racxhuuga, rigajcza rebeñdxab lastoo renani yu' beñdxab.

<sup>13</sup> Dxejcti guyu' gaii beñ Israel nani entis rcansaj, direni cuääz tejsi guejdx. Najcreni bejn ni rbää beñdxab lastoo rebejn. Bejn redee xhigabcoob, naareni cuääreni beñdxab xcuent laj Jesucrist, ni'cni räjpreni lo renani yu' beñdxab neñ lastooni:

—Xcuent xcälrnibee Jesucrist nani ruluii Pabl rnibeenu guiriilu neñ lastoo bejnga —räjpreni.

<sup>14</sup> Guyu' gajdz xi'n Esceva, te beñ Israel, nani sajcro lo rebixhojz. Rujn redee dzuun rbääreni rebeñdxab neñ lastoo rebejn. <sup>15</sup> Che gunii rexi'n Esceva loj beñdxabga si'c, räjp beñdxab ni yu' neñ lastoo bejnga lojreni:

—Rumbeä Jesucrist, rumbeäza Pabl. ¿La'tu, chu la'tu? Dina gumbeä la'tu.

<sup>16</sup> Dxejcti bixa't niguii nani yu' beñdxab neñ lastooni yejc rexi'n Esceva, gudin-duxhnireni, basälta'nireni, batiäjsni xhajbreni. Dxejcti baxuñreni biriireni neñ yu'ga, bidxälguijdzxareni biräsya' xhajbreni. <sup>17</sup> Dxejcti guiraa reben Éfeso, rexpejn Israel sigajc beñ griegw, gucbee xho bennäj beñdxab reniguiiga. Bidxebduhx rebejnga, luxh huä'p xpala'n Jesucrist.

<sup>18</sup> Xhidalduxh reni huililajz xtidx Dios biääd lo rexpejn Jesucrist. Cacäjpreni guiraa recos xhet laadi nani rujnreni. <sup>19</sup> Xhidajl reni najc bidxaa biädnä reguijtz cadre caj yälñajñ xten rebidxaa. Dxejcti base'creni reguijtzga nez loj guiraa rebejn. Bejnreni cuent lacti meel sajc reguijtzga. Sajcreni tiubitzuu mił melpla't. <sup>20</sup> Xhidalduxh rebejn huililajz xtidx Dios. Batijp Dios lastoo rexpejn. Gulä'p guiraareni xpala'n Dios.

<sup>21</sup> Che gulujx recosre, bejn Pabl xhigab chääni guedx Jerusalén, niluxh tedxgaani reguejdx ni re' nez Macedonia näjza Acaya, bejnzani xhigab, naani:

—Che ahua'a Jerusalén, nanabza cha'a guedx Roma.

<sup>22</sup> Ni'cni baxhal Pabl Timoteu näjza Erasto, tio'p renani racnäjni, huijreni Macedonia, luxh laani bia'nni Asia.

### *Bidxechduxh reben Éfeso*

<sup>23</sup> Neñ redxejga, guyuduxh rebejn yärsia' sa'csi baluii Pabl xtidx Dios. Direni nichaglajz care'ch xtidx Dios. <sup>24</sup> Te dade' ni laa Demetrio runchee ni'ch pla't xten banäjb ni laa Diana, ni najc banäjb xten guejdxga. Demetrio näjza guiraa replateer ni rujn ni'ch xten Diana runduxhreni gaan meel ro'c. <sup>25</sup> Gurejdx Demetrio guiraa replateer ni rujn reni'chga, räjpni lojreni:

—Colcuadiajg, la'tu resa'ä: najntu rbäänu melro lo dzuun ni riennu. <sup>26</sup> Abahuiitu niguiire ni laa Pabl. Abiejnza diajgtu xtiidxni. Räjpni lo rebejn: “Xhet diosdi najc reni racchee con ñaa bejn.” Guedx Éfeso näjza guideb nación Asia cagusiejchni lajz bejn, xhidalduxh bejn salilajz xtiidxni. <sup>27</sup> Ni'c ries nitloj xtzuunnu palga diru bejn sii ni'ch ni riencheenu. Luxh riesza diru bejn jiädgajn Diana neñ xquidoro Diana. Naj reben Asia, näjza guiraa reben guedxliuj randuxh Diana, banäjb ni sajcro, niluxh palga diru rebejn gan Diana, pet sinitlojni —räjpni.

<sup>28</sup> Che biejn diajg replateer xtiidxni, bidxe'chduxhreni, guredxa'reni räjpreni:

—Sacduxh Diana xtios reben Éfeso.

<sup>29</sup> Guideb guejdx guyu' biejy. Dxejcti ruxunreni bidxagsa'reni lo yuj cadre rajc rexjuntreni. Gunaazreni Gayo näjza Aristarco, beñ Macedonia ni rinajl Pabl. <sup>30</sup> Rlajz Pabl niu'ni cadre bidxagsa' rebejn, niluxh di rexpejn Jesucrist nusaanni. <sup>31</sup> Gaii guxhtis ni rnibee Asia, sa'csi najcreni xamijgw Pabl, baxhalreni diidx lo Pabl, räjpreni:

—Na'c chäälü cadre nadxagsa' rebejnğa —räjpreni.

<sup>32</sup> Lo rebejn ni re'ga, yu' reni rbedxa' tej diidx, sgaiireni rbedxa' garenca diidx. Te bieiduxh cayajc. Xhidalduxh rebejnğa nicla gan xhicuent bidxagsa'reni. <sup>33</sup> Dxejcti gulää rexpejn Israel te dade' ni laa Alejandro lo reben xhidaalga, te guiniini lo rebejn. Dxejcti basääbni ñaani lo rebejn te gac dxi rebejn. Rlajz Alejandro guiniini xcuent rexpejn Israel loj guiraa rebejn, te di guidxe'chreni lo rexpejn Israel. <sup>34</sup> Niluxh che gucbee rebejn najc Alejandro beñ Israel, tiop or guredxaduxhreni, räjpreni:

—Sacduxh Diana xtios reben Éfeso.

<sup>35</sup> Dxejcti biääd secretaar xten guejdxga lo rebejn, gunibeeni guc dxi rebejn, te räjpni lojreni:

—Colcuadiajg, la'tu beñ Éfeso, caguidxäjł te beñ guedxliuj ni di gacbee reben guedx Éfeso rajnpac Diana, nani xhaguibaali bitejb lo guedxliuj. <sup>36</sup> Sa'csi rediidxre najc guli, nungäjł cuedxitu, na'c guntu recos guiidxre. <sup>37</sup> ¿Xhicuent gunaaztu reniguii ni siädñätu ree? Direni gac gubaan ni rbajn recos guidoo, dizareni niniyaj xtiosnu. <sup>38</sup> Naj palga rlajz Demetrio näjza rebejn ni najc plateer chale'c quej, naxhal jusgaad, suga' reguxhtis. Ro'c suchale'creni xquejreni. <sup>39</sup> Niluxh palga yu' xhi stee, nanab gac te junt xte rebeñguejdx si'c ni caj lo xleiinu. <sup>40</sup> Ries jii xquejnu lo gubier, naareni bidojpnü te guidxagdılñu gubier. ¿Dxejca'? ¿Xhi jie'tznu xcuent ni bidxagsa'nu ree?

Dxejcti räjpni:

—Agojl, coljiunejz.



<sup>41</sup> Che gunii secretaar si'c, bire'ch rebejn, biunejzreni ro'c.

## 20

### *Huihuisac Pabl rexpejn Jesucrist ni yu' Macedonia näjza Grecia*

<sup>1</sup> Che bire'ch rebejn, gurejdx Pabl rexpejn Jesucrist biääd lojni, te balijdxnireni. Badeedni xtixtios lojreni. Sä'tini nez reguedx Macedonia. <sup>2</sup> Guiraa reguejdxga cadre gudejdni, balijdxni rexpejn Jesucrist, basule'runi xtidx Dios lojreni. Dxejc sääni reguedx Grecia. <sup>3</sup> Che bidzujñni Grecia, bia'nni ro'c choñ bäii. Dxejcti niu' Pabl neñ barcw te nijni reguejdx Siria. Niluxh che biejn diajgni cabäz-xhiga'tz rexpejn Israelni te guiniaazrenini, gunaazni nezyuj, gubi'ni nez Macedonia. <sup>4</sup> Huinäni Sópater, xi'n Pirios, te beñ guedx Berea; näj Aristarco näjza Secondo, beñ guedx Tesalónica; näj Gayo, beñ guedx Derbe; näj Timoteu; näj Tíquico näjza Trófimo, beñ Asia. <sup>5</sup> Guiraa redee gunijd loonu, huiläjzreni nuure guedx Troas. <sup>6</sup> Guedx Filipos bidxaag Pabl narä, Lucas. Ro'c gudejdnu lanij xten rexpejn Israel che rajwreni yätxtiil ni di saguij. Biriitinu guejdxga, biu'nu neñ barcw te sonnu nez guedx Troas. Gaii dxej gusaanu neñ barcw, dxejc bidzujñnu guedx Troas. Ro'c bia'nnu gajdz dxej.

### *Baluu Pabl xhidalduxh xtidx Dios lo rexpejn Jesucrist guedx Troas*

<sup>7</sup> Che gojl dumingw, primer dxej xman, bidxagsa'nu te bidaunu yätxtiil si'c gudaunäj Jesucrist rexpejn pacni galoo che gajdni guet. Abejn Pabl xhigab guira yääl guiriini guejdxga. Che biu' guxhijñ, gusloj cagusuleduxh Pabl xtidx Dios, huinuuni si'cti garolyäälli. <sup>8</sup> Yu' cadre bidxagsa'nu najc jiaa yejc stiop yu'. Xhidalduxh balgandeeel cagusanij ro'c. <sup>9</sup> Sobga' te bi'n ni laa Eutico ro' te bentaan. Lañ ni cagusuleduxh Pabl xtidx Dios lo rebejn, gunaaz bacal bi'nga, gudiejsni, bitejbni lo yuj desde yu' ni riojñ pis. Che huiläsrenini, agujtni. <sup>10</sup> Dxejcti biäjñ Pabl lo yuj cadre bitejb bi'nga. Bazuxhijñ Pabl cadre naga' bi'nga, gudäznini. Dxejcti räjp Pabl lojreni:

—Na'c chutu yärsia'. Agubañsacni. Baspajñ Diosni.

<sup>11</sup> Dxejcti huäpsac Pabl lo yujiaaga. Ro'c bidaunu yätxtiil si'c gudaunäj Jesucrist rexpejn pacni galoo che gajdni guet. Gunii Pabl lojreni xchejru, che bianijli lo guedxliuj. Dxejc biunejzni. <sup>12</sup> Xhetliidiru rajcdi bi'nga nani gubañsac, nani guläs Pabl. Bibalaz-duxhreni, huisa'nrenini rolizni.

### *Biu'nu neñ barcw, bionnu guedx Mileto*

<sup>13</sup> Gunijdnu lo Pabl. Biu'nu neñ barcw, sonnu guedx Asón, te ro'c guidxaagnu Pabl, sa'csi abejñ Pabl xhigab ni'ni jiini guejdxga, ro'cli jiu'ni neñ barcw. <sup>14</sup> Che bidxaag Pabl nuunu guedx Asón, biu'ni neñ barcw, sonnu lo nisdoo te bidzujñnu guedx Mitilene. <sup>15</sup> Neñ barcw biriinu ro'c. Che bara yääl, gudejdnu yuj ni re' lo nisdoo ni laa Quío. Che bara stee yääl, bidzujñnu guedx Samos. Guedx Trogilio basilaaznu. Che bara stee yääl, bidzujñnu guedx Mileto. <sup>16</sup> Di rlanj Pabl jiu'nu guedx Éfeso, diza rlanjni chunu Asía xchej, sa'csi riojñ lajzni guidzujñnu guedx Jerusalén te ro'c tedni redxe lanij ni laa Pentecostés.

### *Guedx Mileto guninäj Pabl reni rnibee xpejn Jesucrist ni yu' guedx Éfeso*

<sup>17</sup> Che guyu'nu guedx Mileto, baxhañ Pabl diidx lo rexpejn Jesucrist ni yu' guedx Éfeso, gurejdxni reni rnibee. <sup>18</sup> Che bidzujñreni lo guejdxga, räjp Pabl lojreni:

—Lagajc la'tu najntu xho nabañä nez lojtu, dxejli ni bidzunä, nabannää Dios. <sup>19</sup> La'tu najntu xho runä xtzuun Jesucrist guixe-guixee, guideb xcälnadipä. Dina niliä'p ä xpala'nä. Najntu xho ronä che di bejn chalilajz xtidx Jesucrist. Che rlanj rexpejn Israel nugu't narä, gudedä trabajwduxh. <sup>20</sup> La'tu najntu xho baluiä lojtu guiralii rextidx Dios ni najc huen par la'tu. Che nadxagsa'tu baluiä xtidx Dios lojtu, näjza roliz cade tejtju huiluiä xtidx Dios lojtu. <sup>21</sup> Basule'ä xtidx Dios lo rexpejn Israel näjza lo rebenzajt ni di gac xpejn Israel. Röpä lojreni nanab gusiechljazreni, gusa'nreni xtojñreni, nanab



chalilajzreni xtidx Jesucrist te gudzucaj Dios xtojłreni. <sup>22</sup> Naj cadedä te laad guejdx xtentu, sia'ä guedx Jerusalén, sa'csi caguxhał Sprit Dxaan xten Dios narä cha'ä guedx Jerusalén. Dina ganä xhi sacä ro'c. <sup>23</sup> Niluxh nanä cade tej reguejdx cadre rdedä rnii Sprit Dxaan xten Dios loä sidedä trabajwduxh, siäüä neñ latzguiib guedx Jerusalén. <sup>24</sup> Niluxh dina guidxebä, dizana chanälazduxhä xcäl'nabanaätis, te guluxä dzuun nani baniidx Jesucrist gunä. Lo dzuun ni baniidx Jesucrist nanab chaye'tzä lo guiraa rebejn sibicaj xtojłreni palga chalilajzreni xtidx Dios xcuent Jesucrist —räjp Pabl.

<sup>25</sup> Räjpzani:

—Naj agucbeä dirutu fisac loä, la'tu nani basule'ä xcäl'rnibee Dios lojtu. <sup>26</sup> Rniliäpac lojtu, xhet doįłdi rapä palga yu' te bejn ni di chalilajz xtidx Dios, ni di Dios gudzucaj xtojłni. <sup>27</sup> Xhetliidi biäädxdı loį rextidx Dios ni basule'ä lojtu. Dina nucua'tzä nicla tej xtiidxni xcuent xho rłajz Dios guibañnu. <sup>28</sup> Colga'p lagajc la'tu si'c ra'p baxhtoor xiil, si'c colga'p guiraa rebejn nani rililajz xtidx Dios sa'csi Sprit Dxaan xten Dios abaniidx dzuunga guntu, ni'cni abixe' xtiejn Jesucrist lo crujz te gac gudzucaj Dios xtojłreni. <sup>29</sup> Anancheä che rutdiru narä, siääd bejn nani rłajz chalilajztu ste'ca diidx, na'c chalilajztu niclaza jıutu rebejnğa. Rusgueetisreni la'tu. Sutie'chreni la'tu lo sa'tu si'c rutie'ch cuyo't rexiil. <sup>30</sup> Su'za lagajc sa'tu ni guinii didx-xhii lojtu te gunreni gusaan rexpejn Jesucrist xtidx Dios, te chanajłreni redee ni rusguee. <sup>31</sup> Colhıui te di gusgueereni la'tu. Di jiäl-lajztu choį ijz, dxej yääl basule'ä xtidx Dios, ronäli balıdxațu, sa'csi sanälazätu.

<sup>32</sup> Räjpa Pabl:

—Asia'are, rusa'nätu ladzñaa Dios, gacnäj Dios la'tu. Sutijp xtidx Dios lastootu, te xca'tu guiraa ni bia'n diidx guniidx Dios lojtu, näjza loį guiraa ni abejn Dios beñsa'c, nani najc xpejnıni. <sup>33</sup> Dina niniabä meel, niclaza xhabä che baluiä xtidx Jesucrist lojtu. <sup>34</sup> Anajntu lagajc narä benä dzuun con ñaä te bio' xhi gudaunää rexamigwä. <sup>35</sup> Si'c benä te filojtu xho guntu dzuun te gacnäjtu sa'tu ni xhet rajpdi, te guinaj lajztu xtidx Jesucrist che najni: “Huenru guideednu lo bejn quela xcaxlia'nu xhi cos” —räjpni.

<sup>36</sup> Che gulujx gunii Pabl rediidxga, bazuxhibnäjni rebejnğa, guredx-gunabni lo Dios. <sup>37</sup> Dxejcti rıduuxh guiraa reni gudäazreni guejn Pabl, bachagro'renini. <sup>38</sup> Guc-huıduuxh lajzreni dxej sa'csi räjp Pabl dirurenı fisac loįni. Dxejcti huısa'nrenini lo barcw.

## 21

### *Huij Pabl guedx Jerusalén*

<sup>1</sup> Che basa'ntinu rexpejn Jesucrist ro'c, biu'nu neñ barcw, sionnu te lii neįz lo yuj ni laa Cos, ni tre' lo nısdoo. Che bara yääl, bidzıñnu lo xyuj Rodas ni tre'za lo nısdoo. Ro'c biriinu sionnu neñ barcw nez guedx Pátara. <sup>2</sup> Che bidzıñnu ro' guejdxga, bidxälnu te barcw ni sää nez reguedx Fenicia. Dxejc biu'nu neñ barcwga te chonnu ro'c. <sup>3</sup> Bahuiinu lo yuj Chipre ni tre' lo nısdoo, xladbäıcwınu tre' yujga, bideednu te laad. Siontinu nez Siria, ro'c bidzıñnu guedx Tiro cadre gule'creni cargw ni nuu barcwga. <sup>4</sup> Ro'c bidxälnu rexpejn Jesucrist. Biannänureni gajdz dxej. Baluii Sprit Dxaan xten Diosreni te guniireni lo Pabl, räjpreni:

—Na'c chäälü guedx Jerusalén.

<sup>5</sup> Che baza' gajdz dxej, biuneįznu guejdxga. Dxejc guzaj renıguıi, regunaa, näjza rexi'nreni biriinu guejdxga. Ro' nısdoo bazuxhibnu te guredx-gunabnu lo Dios.

<sup>6</sup> Che abazadiidxnu sa'nu, nuure biu'nu neñ barcw, biädla laareni gubısacreni roli-jzreni.

<sup>7</sup> Biriitinu guedx Tiro. Che bidzıñnu ro' guedx Tolemaida, gulujx xpıajnu biäįtnu neñ barcw. Dxejc biohuiinu rexpejn Jesucrist ni yu' guejdxga, biannänureni teįtis yääl. <sup>8</sup> Che bara yääl, biriinu guejdxga, sonnu guedx Cesarea. Che bidzıñnu guejdxga, bionnu rolıjz Felipe, te dade' ni rusule' xtidx Dios lo bejn. Felipe gujc tej lo gajdz niguii nani gudis xhi gudajw rexpen Jesucrist nani xhet rajpdi guedx Jerusalén. Rolıjzni huijia'nnu. <sup>9</sup> Yu' tajp

xindxapxteb Felipe. Dios badeed diidx guiniireni lo bejn. <sup>10</sup> Xhidajl dxej guläjznu rolijz Felipe. Lał ni dxunnu ro'c, bidzujn te niguii ni laa Agabo, biriini nez Judea. Ruzanij Dios xcäriejnni te guiniini xtidx Dios.

<sup>11</sup> Che bidzujnni loonu, cua' Agabo xsindoor Pabl, baliibni lagajc reni'ni näjza renaani, najni loonu:

—Anaj Sprit Dxan xten Dios: “Scree suliib rexpejn Israel ni yu' guedx Jerusalén niguii ni najc xtenni sindoorre te gutedrenini ladznaa rebenzajt.”

<sup>12</sup> Che biejn diaagnu rediidxga, nuure näjza reben ro'c, gunabduxhnu lo Pabl na'c chääni guedx Jerusalén. <sup>13</sup> Dxejc naj Pabl loonu:

—¿Xhicuent roontu? ¿Xhicuent runhuiintu lazä? Xhet najcdi jiäuä nen latzguiib, xhet najcdi palga nungälä guetä guedx Jerusalén xcuent Jesucrist —räjp Pabl.

<sup>14</sup> Che naaddi Pabl gusiechlajzni, xhetru guniidinu lojni. Räjptisnu lojni:

—Sugac nani rlanjtis Dios.

<sup>15</sup> Che gudejd redxejga, bilucheenu rehxixtennu, biriinu guejdxga, sontinu guedx Jerusalén. <sup>16</sup> Gaii rexpejn Jesucrist ni najc ben Cesarea huisa'n nuure guedx Jerusalén. Ro'c huinäreni nuure rolijz te dade' ni laa Mnasón, ben Chipre, yuj ni tre'lo nisdoo. Laani galooli huililajzni xtidx Dios. Huijia'nnu rolijzni, ro'c gulääznu.

### *Huihuii Pabl Jacob*

<sup>17</sup> Che bidzunnu guedx Jerusalén, bibalazduxh rexpejn Jesucrist sa'csi siopnu ro'c.

<sup>18</sup> Che bara yääl huinänu Pabl lo Jacob näjza lo renani rnibee guidoo xten rexpejn Jesucrist. <sup>19</sup> Dxejc gudääz Pablreni, bijni diidx xcuent tebgaj redzuun nani badeed Dios bejnni che guyunäjni rebenzajt nani di gac xpejn Israel, te biejn diajgreni xtidx Dios.

<sup>20</sup> Che biejn diajgreni xtidx Pabl, gulä'preni xpala'n Dios, räjpzarenı lo Pabl:

—Guejblu, sa'nu, anajnlu lacti xhidalduxh xpejn Israel yu' nani rililajz xtidx Jesucrist luxh rapdaduxhrenei leii xten toMoisés. <sup>21</sup> Abiejn diajg rebejnre xcuentlu. Abiejn diajgreni garenca ruluiilu guiraa rexpejn Israel nani rbäjz nen reguejdx xten rebenzajt, ruli-jdxlureni na'c gusälreni bee rexi'nreni, na'cza chazanäjrureni rexcostumbrnu. <sup>22</sup> ¿Xhini'c jiennu? Siejn diajgreni abidzujnlu ree, dxejc suchagsa'reni te jiädreni lojlu. <sup>23</sup> Naj gunlu nani guiniinu lojlu. Yu' tajp resa'nu ree nani basa'nreni diidx lo Dios. <sup>24</sup> Huinäreni, näjza luj bejn si'ctis gunreni si'c ni caj lo leii xten toMoisés, te gaclu naya nez lo Dios. Luj quixlu guiraa ni banijtreni, te che abasa'tu guiraa ni nanab gac sajg guigaj yejctu si'c te seen te gacbee guiraa rebejn abasoobtu leii. Dxejcti gan guiraa rebejn didx-xhii najc rediidx ni biejn diajgreni xcuentlu. Te gacbeerenei laaca rusoooblu xleii toMoisés. <sup>25</sup> Biädla rebenzajt nani huililajz xtidx Jesucrist, xhet najcdi, sa'csi abacuaanu lojreni, rie'tznu lojreni: na'c gautu recos nani gule'c bejn si'c gojn loj banäjb, na'c gautu rejn, niclaza bääł nani gurerejn, na'c guesnäjtu nani di gac chäältu.

### *Gunaaz rexpejn Israel Pabl*

<sup>26</sup> Che bara yääl, huinä Pabl guidap niguiiga, bejnreni si'c caj lo xleii toMoisés, biu'reni nen xquidoo rexpejn Israel te huiye'tzreni lo bixhojz nen guidoo xhi dxej jiädnä teygareni te man te ju't rebixhojz remanga lo Dios.

<sup>27</sup> Si'c nanab gunreni gajdz dxej. Che ameer guiza' redxejga, bahuii rexpejn Israel ni siäd Asia lo Pabl nen guidoroga. Gunaazreni Pabl, dxejcti gusloj cayujnreni bieje, <sup>28</sup> guredxa'reni räjpreni:

—¡Coltaa xpejn Israel! ¡Coltaa te gacnäjtu nuure! ¡Bahuilaa! Niguiire najc nani rniyaj rexpejn Israel cadrotis rijni. Rulijdxni bejn te di chazanäjrureni xleii toMoisés, riye'tzni lo bejn xhet sajcdi xquidoronure. Colhuilaa xho siädnäni ree ben griegw, benzajt ni di gac xpejn Israel, te gundxuudxni xquidoronu —räjpreni.

<sup>29</sup> Si'c caniiireni sa'csi te huält bahuiireni sanä Pabl Trófigos lo nezyuj. Trófigos najc te benzijt ni siääd guedx Éfeso. Naj cayujnreni xhigab laa niguiiga ni siädnä Pabl neñ xquidoro rexpejn Israel.

<sup>30</sup> Guideb guejdxga guyu' yärsia', bire' benguihxuj, bixa'treni yejc Pabl, gunaazrenini, gudobxhaxhreni Pabl, gulägajcneni neñ guidoroga. Biägajc repuertro xten guidoro.

<sup>31</sup> Lal ni cayujnreni xhigab ju'trenini, yu' chu huiye'tz lo nani rnibee resoldaad ni caya'p guejdxga, räjpreni:

—Cayajc te bieiduxh neñ guejdxre.

<sup>32</sup> Guredxgajc comandant resoldaad näjza gaii capitán, ruxunreni bidzujnreni cadre tre' rebejn. Che bahuii rebejn lo comandant näjza resoldaad, guläjz caguijnreni Pabl.

<sup>33</sup> Dxejcti gubig comandant lo Pabl, gunibeeni baliib resoldaad ñaa Pabl con tiop cadenguiib. Dxejcti gunabdiidxn lo Pabl, räjpni:

—¿Chu luj? ¿Xhini'c bejnlu?

<sup>34</sup> Lo reben xhidaalga yu' rexpejn Israel ni guredxa' tej diidx, yu'za reni guredxa' ste'ca diidx. Di comandant niujn gan niacbeen xhicuent cayajc biey sa'csi cabedxa' guiraa rebejn. Dxejc gunibeeni chanä resoldaad Pabl cadre rbäjzreni. <sup>35</sup> Che bidzunäj resoldaad Pabl ro' scaleer ni caj ro'c, biireni Pabl te bejnreni gan biunäjreni Pabl, sa'csi nialazduxh rebejn rlajzreni nugu'treni Pabl.

<sup>36</sup> Siädnañl guiraa rebejn Pabl, rbedxa'reni:

—Colgugu'tni.

<sup>37</sup> Che agojl jiu' Pabl neñ yuro xten resoldaad, räjpni lo comandant con diidx griegw:

—Rlazä guiniä tiop diidx lo guejblu.

Räjp comandant lo Pabl:

—¡An rniilu xtidsaä! <sup>38</sup> An dilu gac niguii ni siääd nación Egipto, nani gudilnä j gubier, nani huinä lo reyubijdz tajp mil niguii nani rugu't bejn.

<sup>39</sup> Dxejc räjp Pabl lojni:

—Narä nacä te beñ Israel, te beñ Tarso xten Cilicia. Sacduxh guejdxga lo reguedx Cilicia. Canabä gun guejblu te hueen, gusaan guejblu guiniä lo rebejnre.

<sup>40</sup> Dxejc cuäjb comandant guinii Pabl lo rebejn. Lal ni suga'ni lo scaleer basäab Pabl ñaani lo rebejn te gucdxireni. Che aguredxi rebejn, gusloj Pabl canii lojnreni didxsaj hebreo, räjpni:

## 22

<sup>1</sup> —Guejbtu bengool, guejbtu resa'ä, näjza la'tu dade'. Gucudiajgtu rextidxä —räjpni.

<sup>2</sup> Che biejn diajgreni caniini didx hebreo, dxidujru guzuj rebejn. Räjp Pabl lojnreni:

<sup>3</sup> —Narä nacä te xpejn Israel. Guedx Tarso xten Cilicia golä. Reepac gulaä. Lo Gamaliel bisiedä guijtz. Baluisa'cni narä guiragajc releii xten retoxtadgoldoonu. Guideb xtipä basobä ni gunibee Dios. Gucä si'cpac ni najctu naj. <sup>4</sup> Dxejcti bidxechduxhä loj renani huililajz xtidx Jesucrist, bagu'tazareni. Balibä xhidajl bejn, niguii näjza gunaa, con cadenguiib. Basäuäreni neñ latzguiib. <sup>5</sup> Bixhojz ni sajru näjza guiraa rebengool ni sajru neñ xquidootu, saj guinii xhini'c benä. Laareni baniidxreni guijtz loä. Ni'c huinä lo rexpejn Israel ni yu' guedx Damasco, cadre hua'a te niniazä rebejn nani huililajz xtidx Jesucrist. Benä xhigab jiädnääreni guedx Jerusalén te jiäuren neñ latzguiib, te gusacsireni rebejnnga.

*Gunii Pabl xho huililajzni xtidx Jesucrist  
(Hch. 9:1-19; 26:12-18)*

<sup>6</sup> Räjpzani:

—Dxejc hua'a guedx Damasco. Laidxejti ameer guidzunä guejdxga, chela bazanij te balro guideb gabi narä. Xhaguibaali siääd bajlga. <sup>7</sup> Biabrloä lo yuj, dxejc biejn diagä te se' ni canii loä, najni: “Saulo, Saulo, ¿xhicuent rusacsílu narä näjza rexpenä?” najni.

<sup>8</sup> Dxejcti räpä lojni: “¿Chuluj, Dad?” Najni loä: “Narä nacä Jesucrist ni siääd Nasare't, nani cagusacsíduxhlu.” <sup>9</sup> Rebejn ni sanää bahuiloj bajlga, bidxejbreni, niluxh di diajgreni niejn xse' nani gunii loä. <sup>10</sup> Räpä lojni: “Dad, ¿xhini'c gunä?” Dxejcti najni loä: “Huistie, huij guedx Damasco. Ro'c sinii te dade' lojlu guiraa ni guinibeä gunlu.” <sup>11</sup> Bastujxh bajlga loä, diru loä nien, ni'cni gunaaz resa'ä naä, sontinu guedx Damasco.

<sup>12</sup> Räj pabl:

—Guejdxga guläjz te niguii ni laa Ananías. Rusoobni guiraa releii xten toMoisés. Guiraa rexpejn Israel rnii nadalajz lo dade'ga. Biääd Ananías loä. <sup>13</sup> Cuä'ä guzujni najni loä: “¡Saulo, betzä, bahuisac!” Lagajc dxejc biajc loä, bahuiä lojni. <sup>14</sup> Naj Ananías loä: “Xtios retoxtadgoldoonu agulelu. Gule Dios luj te jiejn diajglu rediidx ni rlajzni gunlu, te filojlu Jesucrist, Xindxan Dios, te jiejnza diajglu rextiidxpac Jesucrist. <sup>15</sup> Loj guiraa bejn susule'lu guiraa ni bahuiilu näjza nani biejn diajglu. <sup>16</sup> ¿Xhicuent sojbtislu ro'c? Basquejn, huistie te tiobnislu. Huililajz xtidx Jesucrist, gurejdx lo Dios te gudzucajni rextojllu.”

### *Gunii Pabl xhicuent baluiini xtidx Dios lo rebenzijt*

<sup>17</sup> Che gubi'ä guedx Jerusalén, biu'ä nejn guidoro xten rexpejn Israel te guredx-gunabä lo Dios. Laḷ ni cabedx-canabä lo Dios, astoo gunixcalä, <sup>18</sup> dxejc bahuiä lo Jesucrist. Najni loä: “Basquejn, birii guedx Jerusalén sa'csi di rebejn chalilajz xtidxä ni gusule'lu lojreni.” <sup>19</sup> Narä räpäza lojni: “Dad, anajnreni xho biu'ä guiraa reguidoo, gunazä guiraa rebejn nani huililajz xtiidxlu, gudinuxhäreni, basäuäreni nejn latzguiib. <sup>20</sup> Che bacuaareni guij yejc Esteban nani gunii xtiidxlu, ro'c guzuä, cuäbä bejnreni si'c. Go'pä xhajn xten renani bagu't Esteban laḷ ni bacuaareni guij.” <sup>21</sup> Dxejcti naj Jesucrist loä: “Huij. Suxhalä luj zitduxh. Chäälü lo guiraa rebenzijt ni di gac xpejn Israel.”

### *Bia'n Pabl nejn rolizro xten resoldaad*

<sup>22</sup> Bacuadiajg guiraa rebejn laḷ ni gunii Pabl rediidxga, dxejcti guredxa'reni, räjpreni:

—Colgu't niguiiga. Di nunyäjḷ guibajjruni.

<sup>23</sup> Sanuutis cabedxa'reni. Gulääreni xcamangwreni, cacuaazareni yuyoḷ jiaa.

<sup>24</sup> Dxejcti gunibee comandant lo resoldaad, räjpni:

—Colchanä Pabl nejn yuro xtenu. Ro'c colquiin Pabl te guiniini didxgulii, te gacbeenu xhicuent rbedxaduxh rebejn lojni.

<sup>25</sup> Sanätireni Pabl. Entis baliibreni ni', naa Pabl con duguijd te niguijnrenini che gunabdiidx Pabl lo capitán, räjpni:

—¿La rajc rguijntu te bejn roman che gajdtu gacbee xhi dojl bejn, ä? Et si'cti caj lo kleiilu.

<sup>26</sup> Che biejn diajg capitán xtiidxni, bidxejbni, huijni lo comandant, räjpni lojni:

—Colnati xhi gunnäjlü dade're, sa'csi najcni bejn roman.

<sup>27</sup> Biädguxun comandant lo Pabl, räjpni:

—¿La gulii najclu bejn roman, ä?

Räj pabl lojni:

—Guliini.

<sup>28</sup> Dxejcti räjp comandant:

—Narä badedä xhiroob meel te nacä bejn roman.

Dxejcti räjp pabl lojni:

—Narä che goḷali nacä bejn roman.

<sup>29</sup> Che biejn diajg resoldaad nani niguijn Pabl si'c, baslagajczeni reduguijd ni naliib ni', naani. Che biejnza diajg comandant najc Pabl bejn roman, bidxejbni sa'csi gunibeeni biliib Pabl.

### *Basule' Pabl diidx xcuentni lo rebixhojz nani rnibee rexpejn Israel*

<sup>30</sup> Che bara yääl, rlaĵz comandant gacheeni xhicuent rlaĵz rexpejn Israel ju't Pabl. Ni'c gunibeeni ĵiääd rebixhoĵz ni saĵcru näĵza reguxhtis xten guidoro. Dxeĵcti biädnäni Pabl, bazujnini nez loĵ guiraa rebejn ni bire' ro'c.

## 23

<sup>1</sup> Rdxelodzu'tz Pabl lo rebejn ni tre' ro'c laĵ ni räjpni loĵreni:

—Narä gusule'ä tiop diidx lo guejbtu, beĵ Israel, sa'ä. Guideb ni nabaĵä ruzobä xtidx Dios. Di lastoä guidxejb nez lo Dios —räjp Pabl.

<sup>2</sup> Che bieĵn diaĵg Ananías, bixhoĵz ni saĵcru, xtidx Pabl, bidxechduxhni, gunibeeni lo renani suga' gajxh lo Pabl ca'preni ro' Pabl.

<sup>3</sup> Räjp Pabl lo Ananías:

—Sigajcza ca'p Dios ro'lu, beĵguijdx. Ro'c sobga'lu te gunlu yälguxhtis si'cni caj lo leii. ¿Xhicuent rujnlu nani rnii leiĵga di nungäĵl gun bejn? ¿Xhicuent gunibeelu guda'preni ro'ä? —räjp Pabl.

<sup>4</sup> Reni suga' cuä' Pabl räjp lo Pabl:

—¿La dilu gachee laa bixhoĵz ni saĵcru xten Dios? Na'c guiniyajluni.

<sup>5</sup> Dxeĵcti räjp Pabl loĵreni:

—Rexamigwä, dina niacbeä caniä lo bixhoĵz ni saĵcru, sa'csi nanä agunii Dios: “Na'c guiniyajlu reni rnibee xpejnlu.” Si'c caj lo guiĵtz ni bacuaa reni gunii xtidx Dios.

<sup>6</sup> Guchee Pabl tiop cuaa najc reni tre' ro'c. Yu' reni najc beĵ saducee, yu'za reni najc beĵ farisee. Dxeĵc guredxa' Pabl räjpni loĵreni:

—Sa'ä, narä nacä te beĵ farisee, xi'nza te beĵ farisee narä. Rililazä sibansac bejn lo rebengut, ni'c cabe'creni xqueĵä ree.

<sup>7</sup> Entis guniini si'c loĵreni, chela gusloĵ caniireni lo sa'reni. Tiop cuaa gujcreni, gala' refarisee, sgala' resaducee. <sup>8</sup> Di laĵz resaducee chalii sibansac rebengut, dizareni chalilajz yu' rexangl Dios, dizareni chalilajz yu' aim xten bejn. Niluxh refarisee rililajz guiraa rediidxga. <sup>9</sup> Guyu' te bieiro. Dxeĵcti huisulii gaii farisee nani najn leii, gusloĵ caniduxhrenei, räjpreni:

—Di niguiire gac beĵguijdx. Palga gunii te angl xten Dios o te togool loĵni, alga Dios tilnäĵnu, dxeĵc sidxehnäĵ Diosnu.

<sup>10</sup> Che gusloĵ cabedxaduxhrenei lo sa'reni, bidxejb comandant, andi ju'treni Pabl, caxha'treni yeĵcni. Dxeĵcti gunibeeni biäĵt resoldaad cadre suga' Pabl. Guideb xtijpreni guläärenei Pabl galäii rebejnĵga huinäsaĵreni neĵ yuro xtenreni.

<sup>11</sup> Che biu' guxhijn, baluiloĵ Jesucrist lo Pabl, guzujni cuä'ni, räjpni loĵni:

—Batijp laĵzlu, na'c guidxejblu, Pabl. Si'cni basule'lu xtidxä guedx Jerusalén, sigajcza nanab gusule'lu xtidxä guedx Roma.

### *Rexpejn Israel bejn xhigab nugu'treni Pabl*

<sup>12</sup> Che bara yääl, bachagsa' gaii xpejn Israel, bejnrenei xhigab nugu'treni Pabl. Räjpreni lo sa'reni:

—Na'c guidaunu, na'cza guidaunu nis che guigu'tlinu Pabl —räjpreni.

<sup>13</sup> Si'cti tiuu niguii bia'n diidxga. <sup>14</sup> Bidzujnrenei lo rebixhoĵz näĵza rebengool, räjpreni loĵreni:

—Abia'nnu diidx, xhet guidaudinu, xhetza guidaudinu palga dinu guigutxga Pabl —räjpreni—. <sup>15</sup> Naj la'tu näĵza guiraa rebengool ni rnibee rexpejn Israel, colguxhal diidx lo comandant te guixee ĵiädnäni Pabl loĵtu. Colyejn si'c ni rlaĵztu ĵiejnru diaĵgtu diidx xcuent Pabl. Che ĵiädnä comandant Pabl ree, nuure sugu'tnuni lo nezyuj che gajdni guidzujn ree —räjp reniguiiga.

<sup>16</sup> Niluxh bieĵn diaĵg xi'n bisiajn Pabl cabäzxhiga'tz reniguiiga te ju'treni Pabl, huijni royuro xten resoldaad. Che bidzujnni, biu'ni räjpni lo Pabl rediidx ni bieĵn diaĵgni.

<sup>17</sup> Dxeĵcti gurejdx Pabl te capitán, räjpni loĵni:



—Huinälaa bi'nre lo comandant te gäbni te diidx lojni.

<sup>18</sup> Huinäti capitán bi'nga lo comandant, räjpni lo comandant:

—Pabl, nani niäu nen yuro xten resoldaad, gunab loä jädnälää bi'nre lo guejblu te guiniini te diidx lo guejblu —räjpni.

<sup>19</sup> Dxejc gunaaz comandant naa bi'nre, huinänini te laad cadre rut jiejni diajgni xtiidxreni, dxejc räjpni lojni:

—¿Xhini'c rlazzlu guiniilu loä?

<sup>20</sup> Dxejc bazejcn diidx, räjpni loj comandant:

—Abia'n te cuaa xpejn Israel diidx siniabreni lo guejblu jädnä guejblu Pabl ro jusgaad guixee. Sujnsireni si'c ni rlazj jiejnru diajgreni diidx xcuent Pabl. <sup>21</sup> Na'c chalilajz guejblu xtiidxreni. Tiu niguii sibäzxhiga'tz cuä' nezyuj te ju'treni Pabl. Abia'nreni diidx direni gau, dizareni yä palga direni jutxgaa Pabl. Naj cabäjtisreni guxhal guejblu diidx sinä guejblu Pabl ro jusgaad.

<sup>22</sup> Che biejn diajg comandant diidxga, basaanni sii bi'nga rolizni, räpxgaani lojni:

—Rut lojdipac gäblu guniilu diidxre loä.

### *Huij Pabl lo Pels ni najc gubernadoor*

<sup>23</sup> Dxejcti gurejdx comandant tiop capitán, räjpni lojreni:

—Colgutojp tiop gayuu soldaad, chää guedx Cesarea näjza gayonbitzoo soldaad ni bijb cabaii, näjza tiop gayuu soldaad ni ca' spaad. Rcagaa guxhijn guiriireni ree. <sup>24</sup> Colquiiil tiop cabaii cuib Pabl te xhet gacdi Pabl cheni chanätuni lo gubernador Pels —räjpni.

<sup>25</sup> Dxejcti bejn comandant te guijt chanäreni lo gubernadoor.

<sup>26</sup> Loj guijtza rnii scree: “Gubernador Pels, nani sacduxh. Narä, Claudio Lisias, ruxhalä xtixtios lo guejblu. <sup>27</sup> Rediidxre rucuaä lo guejblu. Gunaaz rexpejn Israel niguiire, luxh paru dina nidzunga'cä con resoldaad, nugu'trenini. Che gucbeä najcni bejn roman, guläänuni ro'c. <sup>28</sup> Rlazä niacbeä xhi quej rbe'creni, ni'c huanääni lo junt xten rexpejn Israel ni rnibee guidoro. <sup>29</sup> Dxejc gucbeä requej ni rbe'creni najc ganax xcuent leii xtenreni, niluxh xhet bejndini te nungäj guetni, niclazä nanab jäuni nen latzguiib. <sup>30</sup> Che baxhalreni diidx loä cabäzxhiga'tz rexpejn Israelni te ju'treni dade're, baxhalga'cäni lo guejblu. Agunibeäza jädle'c rexpejn Israelre xquejreni lo guejblu. Ni'ctis rniä lo guejblu”, si'c caj lo guijt ni bejn comandant.

<sup>31</sup> Che biu' guxhijn, huixii resoldaad Pabl sanärenini guedx Antípatris si'cni gunibee comandant gunreni. <sup>32</sup> Che bara yääl, gubi' resoldaad nani guzaj ni'reni. Resoldaad ni bijb cabaii guzanäj Pabl guedx Cesarea. <sup>33</sup> Che bidzujn redee Cesarea, badeedreni xquijt comandant lo gubernadoor, huinäzarenini Pabl lojni te biembeenini. <sup>34</sup> Che gulujx bilni guijtza, gunabdiidxni lo Pabl:

—¿Caro siäädlu?

Che gucbeeni siääd Pabl Cilicia, <sup>35</sup> räjpni lo Pabl:

—Guidzujnsi rexpejn Israel ni cadxechnäj luj, sucuadiaggacä xtiidxlu —räjp gubernadoor.

Gunibeeni ga'p resoldaadni nen yuro xten Herodes.

## 24

### *Gunii Pabl xtiidxni lo Pels*

<sup>1</sup> Gudejdti gaii dxej, dxejc bidzujn Ananías, bixhojz ni sajcro, näjza gaii rebengool xten guidoro, näjza te dade' ni laa Tértulo ni gunii xcuentreni. Gusloj cabe'cni xquej Pabl lo gubernadoor. <sup>2</sup> Che biädnäreni Pabl, gusloj Tértulo cabe'c xquej Pabl lo gubernadoor. Räjpni lo gubernadoor:

—Xquixtioste guejblu dxiduxh nabañnu. Cayacnäduxh guejblu laadxnu con redzun-sacduxh ni cayujn guejblu. <sup>3</sup> Xquixtiosduxh guejblu, gubernadoor Pels, xcuent guiraa redzunsac'c ni rujn guejblu guira nejz. <sup>4</sup> Luxh na'cru gusieednu guejblu, gucuadiaglaa

guejblu tiop diidx. <sup>5</sup> Agucbeenu xho najc niguiire. Benguidxduxhni. Cadrotis rijni rujnni bieje lo rexpejn Israel. Laani rnibee te cuaa ni laa nasaren, nalajznu rebejn nani rililajz xtidx Jesucrist ni biääd guedx Nasare't. <sup>6</sup> Rlajzlini nuxhinni xquidoronu, ni'c gunaaznuni. Niennu te junt te lagajc nuure niennu yälguxhtisni si'cni caj lo xquijtznu. <sup>7</sup> Niluxh bidzujn comandant Lisias näjza resoldaad. Diptis badzucajreni niguiiga ladznaanu. <sup>8</sup> Laani gunibeeni lo guejblu jääd reni rbe'c xquejni. Naj lagajc guejblu sajc guiniabdiidx lojni te gacbee guejblu guli guiraa requej nani rbe'cnu xcuentni —räjp Tértulo.

<sup>9</sup> Dxejcti guiraa rexpejn Israel ni suga' ro'c räjp guliica xtidx Tértulo. <sup>10</sup> Dxejcti bejn gubernadoor seen lo Pabl te guiniini. Baze'c Pabl diidx, räjpni lojni:

—Rbaaliza lazä guze'cä diidx lo guejblu, sa'csi anana agujc xchero lacti huen rujn guejblu yälguxhtis nación Israelre —räjp Pabl—. <sup>11</sup> Gutzbitio'p dxejtis bidzunä guedx Jerusalén te saganä Dios. Najn rebejn xhi dxej biu'ä Jerusalén, guyasi guniidxreni diidx. <sup>12</sup> Nicla tej dina nichagdila bejn nen guidoro. Nicla tej dina niunä bieje nen reguidobaz, nicla ro nezyuj. <sup>13</sup> Agule'creni quej xtenä lo guejblu, niluxh nicla tej redzuunga dina niunä. Di gacdi guluipacreni lo guejblu guli najc xtiidxreni. <sup>14</sup> Rniliäpac lo guejblu: Rañä Xtios retoxtadgoldoonu. Jesucrist baluii xho gansa'cnu Dios. Rililazä rextiidxni. Xhidalduxh rexpejn Israel rniyaj xho basule' Jesucrist gan bejn Dios. Ruzobä guiraali releii xten toMoisés. Rililazä guiraa rextidx Dios ni bacuaa reni gunii xtidx Dios. <sup>15</sup> Rililazä xtidx Dios si'c rililajzza rebejnre xtidx Dios. Si'c ni najnreni, si'cza nanä sidzujn te dxej che guibansac rebengut, rebenguidx sigajc rebensa'c. <sup>16</sup> Ni'cni racbeä laaca nabanä guiraa dxej, di lastoä guidxejb, nicla nez loj bejn niclaza nez loj Dios, sa'csi rut rajcdi guiliäs dixhii xcuentä.

<sup>17</sup> Räjp Pabl:

—Agujc xchej yu'ä zijt, lajdx garenca bejn, naj gubinää meel ni baxhal reben nejzga te gudedäni lo rebejn ni xhet rajpdi. Biädnääza gojn xtenä gudedäni lo Dios. <sup>18</sup> Ni'c sanää guidoro. Ro'c bidxäjl rexpejn Israel ni siääd Asia narä. Agucnayaä si'c ni rnibee xleinu. Xhet benxhidajldi suganää, xhetza biejeydi cayunä. <sup>19</sup> ¿Con rebejn ga naj? Te cue'creni quej lo guejblu palga yu' xhini'c rdxechnäjreni narä. <sup>20</sup> O guiniiza redee palga yu' xhini'c et laadi benä che suga'ä nez loj junt xten guiraa rebixhojz ni rnibee näjza rebengool lo guedx Jerusalén —räjp Pabl—. <sup>21</sup> Tejtis diidx guniä che suga'ä galäiireni, guredxa'a räpä lojreni: sa'csi rililazä sibansac guiraa rebejn lo rebengut, ni'c biädnätu narä lo rebejnre —si'c guniä lojreni.

<sup>22</sup> Che biejn diajg Pels xtidx Pabl näjza sa'csi najne'ni xcuent diidx nani baluii Jesucrist, basoobni stee dxej guidxagsac sa'reni räjpni lojreni:

—Che jäädli comandant Lisias dxejc gunä yälguxhtis —räjp Pels.

<sup>23</sup> Dxejcti gule Pels te capitán ni rnibee te gayuu resoldaad ga'p Pabl. Niluxh räjpni lojni gusaanni gun Pabl nani rlajztisni gunni. Na'cza gudxoynni jääd reexamigwni te fiireni lojni.

<sup>24</sup> Che gudejd balti dxej, gubi' Pels, biädnäni chäälni Drusila. Drusila najc bejn Israel. Dxejc gurejdx Pels Pabl te gusule'ru Pabl xtidx Jesucrist. <sup>25</sup> Gunii Pabl xho nanab guibansa'c bejn nez loj Dios si'c ni gunibee Dios guibajn bejn. Nanabza gacbee bejn na'c gun bejn cos guijdx, sa'csi sidzujn dxej gac Dios juejz loj guiraa rebejn te fini xhi bejnreni. Raclesli Pels tant bidxejbni biejn diajgni diidxga. Räjpni lo Pabl:

—Huij naj. Sibedxsacälu che latä stee —räjp Pels.

<sup>26</sup> Naa Pels sudeed Pabl meel lojni te guslaanini, ni'c masru guet-guejt gurejdxnini te guninäjnini. <sup>27</sup> Si'c gudejd tiop ijz. Dxejc birii Pels gubernadoor. Dxejcti biu' Porcio Festo, gujcn gubernadorcoob. Niluxh Pels rlajz chanälajz rexpejn Israelni, ni'c basa'nni niäusijc Pabl.

## 25

### *Gunii Pabl xtiidxni lo Festo*

<sup>1</sup> Che biu' Festo gujcni gubernadorcoob xten reguejdxga, bia'nni guedx Cesarea chon dxej. Dxejc biriini ro'c sääni guedx Jerusalén. <sup>2</sup> Che bidzujñni guejdxga, rebixhojz nani rnibee näjza reniguii ni sajcro lo rexpejn Israel biääd lo Festo. Gusloj cabe'creni xquej Pabl lojni. Gunabduxhrene lo Festo <sup>3</sup> sa'csi rlajzrene gunni te huen laareni, guinibeeni jäädnärene Pabl guedx Jerusalén. Si'c gunabrene, sa'csi abenxgaareni xhigab cuäzxhiga'tzrene te ju'trene Pabl lo nezuj.

<sup>4</sup> Dxejcti räjp Festo lojrene:

—Suniäu Pabl guedx Cesarea. Di gaclaa guibi'ä guedx Cesarea. <sup>5</sup> Suchää reniguii ni sajcro lo sa'tu guedx Cesarea, te ro'c cue'creni xquej Pabl loä, don la yu' xhi dzunguijdx bejnne —räjpni.

<sup>6</sup> Che gudejd si'cti tzuu dxej, gubi' Festo guedx Cesarea. Che bara yääl, gurejni lo yagxhil xten gubernador, gunibeeni biääd Pabl lojni. <sup>7</sup> Che bidzujñ Pabl lojni, biääd rexpejn Israel nani biääd guedx Jerusalén ro'c. Guzujrene guideb gabi Pabl. Gule'creni xhidalduxh xquej Pabl, luxh di niajcdi nuluiireni guliipac xtiidxrene.

<sup>8</sup> Dxejcti räjp Pabl lojrene:

—Nicla tej latsiaj dina niunä, dina niunä latsiaj loj leii xtennu, dizana niunä latsiaj lo guidoro ni sojb guedx Jerusalén, dizana niunä latsiaj loj xgubier César.

<sup>9</sup> Dxejcti Festo, sa'csi rlajzni guiliäsni xpala'nni loj rexpejn Israel, räjpni lo Pabl:

—¿La sisiajlu guedx Jerusalén te cue'c rexpejn Israel xquejlu ro'c nezloä, ä?

<sup>10</sup> Dxejcti räjp Pabl lojni:

—Naj suga'a loj guejblu, ni gule reii César. Guejblu rnibee guiraa reguejdxre. Ree nungäj] cue'creni xquejä lo guejblu, xhet guedx Jerusaléni. Ananchee guejblu xhet latsiajdi benä lo rexpejn Israel. <sup>11</sup> Palga nacä te benguijdx, o palga yu' xhi latsiaj benä te nungäj] guetä, xho dina xcäbä guetä. Palga xhet latsiajdi benä nani canii rexpejn Israel benä, dxejc rutliidi sajc guteed narä ladzñaareni. Suchale'creni xquejä lo César nani najc reii xten reben roman —räjp Pabl.

<sup>12</sup> Che guninäj Festo reguxhtis xten xquidoro rexpejn Israel, räjpni lo Pabl:

—Luj gunablu chäällo loj reii César. Mbaj. Sijlu lo reii César —räjp Festo.

### *Huixiireni Pabl huinärenini lo reii Agripa*

<sup>13</sup> Che gudejd balti dxej, bidzujñ reii Agripa näjza chäälni Berenice guedx Cesarea. Biädhuiireni gubernador Festo. <sup>14</sup> Che guyu'reni ro'c xchej, bij Festo diidx lo Agripa xcuent Pabl. Räjp Festo lojni:

—Ree niäusijc te niguii ni laa Pabl ni basa'n Pels. <sup>15</sup> Che guyu'ä guedx Jerusalén, rebixhojz ni rnibee näjza rebengool xten rexpejn Israel gule'c xquejni loä. Rlajzrene guinibeä guetni. <sup>16</sup> Röpä lojrene: “Di leii xten nación roman gusaan guet te bejn palga di bejn jäädxgaa te guiniireni nez lojpacni xhi bejn niguiiga, te guzejcza niguiiga diidx xcuent requej, te guiniini la guliireni.” <sup>17</sup> Ni'cni che biääd rexpejn Israelga lo guejdxre, che bara yääl guregacä lo yagxhil xten gubernador. Dxejc gunibeä huixiireni Pabl guzuj nez loä. <sup>18</sup> Benä xhigab pet yu' xhi cosro bejnne. Luxh che gusloj cabe'creni xquejni, gucbegacä xhet latsiarodi bejn Pabl. <sup>19</sup> Alga cadilñäjrenini xcuent xleiiireni, xcostumbrreni. Guniizareni xcuent te niguii ni laa Jesucrist. Agujtni, niluxh canii Pabl gubansacni lo rebengut. <sup>20</sup> Guxii nanä xcuent sa' diidxre, ni'cni gunabdixä lo Pabl top sicäjbni chanääni guedx Jerusalén te ro'c cue'c rexpejn Israel xquejni. <sup>21</sup> Dxejc che gunii Pabl lojpac reii César chale'c rexpejn Israel xquejni, ni'c gunibeä jääusijcni la] ni gac guxhaläni lo César —räjp Festo.

<sup>22</sup> Dxejcti räjp Agripa lo Festo:

—Narä rlazäza jiejn diagä xtidx niguiiga —räjp Agripa.

Dxejcti räjp Festo lojni:

—Guixee gucuadiajglu xtiidxni —räjpni.

<sup>23</sup> Che bara yääl, biääd Agripa näjza Berenice, luxh sucheduxhreni. Näjza recapitán ni sajcro näjza rebejn ni sajcro lo guejdxga biu'reni neñ yuro xten Festo. Dxejc gunibee Festo biääd Pabl. <sup>24</sup> Dxejcti räjp Festo lo guiraa reni re' neñ yuro:

—Reii Agripa näjza guiraa rebejn ni tre' ree, colcuadiajg. Colhuiu lo niguiire. Reni rnibee xpejn Israel guedx Jerusalén näjza guejdxre agule'c xquejni loä, canabduxhreni guetni. <sup>25</sup> Niluxh narä rchaloä xhet bejndini te nungäjł guinibeä guetni. Luxh lagajc laani gunabni chääni te gac César juejz lojni, ni'c runä xhigab guxhaläni lojni. <sup>26</sup> Naj dina ganä xhini'c gucuaä lo guijtz te guxhaläni lo César ni rnibee narä. Ni'c biädnää niguiire nez lo guiraatu, ganid nez loj guejblu, reii Agripa, filaa guejblu te gaxäjsi che aguiniini xtiidxni lo guiraanu, sidxälä xhi diidx gucuaä lo guijtz ni chää lo César. <sup>27</sup> Narä runä xhigab di nungäjł guxhalä niguiire ni niäu latzguiib lo César palga di gacdi gusule'ä xhi quej xcuentni cabe'c rexpejn Israel loä.

## 26

### *Gunii Pabl rextiidxni lo reii Agripa*

<sup>1</sup> Dxejcti räjp Agripa lo Pabl:

—Gunilaa xtiidxlu loonu.

Dxejcti guläs Pabl naani, gusloj cagusule'ni diidx lojreni. Räjpni:

<sup>2</sup> —Reii Agripa, rbalazduxhä sa'csi sajc gusule'ä diidx lo guejblu, sa'csi naj suze'cä diidx xcuent guiraa requej ni gule'c rexpejn Israel. <sup>3</sup> Sa'csi guejblu nanduxh xcuent guiraa releii xten rexpejn Israel. Najnza guejblu xhicuent rdxagdijł sa'reni. Ni'c rniabduxhä na'c jieed guejblu gucuadiaglaa guejblu guiraa rextidxä.

<sup>4</sup> Räjpza Pabl:

—Guiraa rexpejn Israel nanchee xho nacä che gucäli biuux guedx Jerusalén. Galooli najc guedx Jerusalén ladxä. <sup>5</sup> Galooliza numbeereni narä, malaii guicäjpreni gucä te farisee nani bazobduxhru xleiinu si'cni rililajznu. <sup>6</sup> Naj suga'a ree, rlajzreni jiäuä sa'csi rililazä diidx nani bia'n Dios con retoxtadgoldoonu. <sup>7</sup> Guitzubitiop cuaa rexpejn Israel huililajz siliäs Dios guiraa rebengut te guibañsacreni. Ni'cni bazuxhijbreni lo Dios dxej-yääl. Naj rniliä lo guejblu reii Agripa, sa'csi rililazä siliäs Dios guiraa rebengut te guibañsacreni, ni'cni rlajzreni gusäureni narä. <sup>8</sup> Palga abejn Dios xhigab guiliäsni guiraa rebengut te guibañsacreni, ¿xhicuent di lajztu chalii xtidx Dios?

<sup>9</sup> Räjpza Pabl:

—Narä benäza xhigab galoo nanabpac guidxe'chä loj rexpejn Jesucrist ni siääd Nazare't, ni'c batedäreni trabajwduxh basäuäreni neñ latzguiib. <sup>10</sup> Guiraa recosre benäza guedx Jerusalén. Baniidx rebixhojz ni rnibee guijtz loä te basäuä rexpejn Jesucrist neñ latzguiib. Che biäureni neñ latzguiib, narä gule'cä xquejreni te gujtreni. <sup>11</sup> Balti huält basacsiduxhäreni lagajc neñ reguidobäz te niniyajreni Jesucrist. Luxh basacsiduxhäreni, hua'a guideb nez reguedxzijz te ro'c huisacsíä rexpejn Jesucrist.

### *(Hch. 9:1-19; 22:6-16)*

<sup>12</sup> Räjpza Pabl:

—Ni'c sa'a nez guedx Damasco, ca'a guijtz ni baniidx rebixhojz ni rnibee. <sup>13</sup> Rniliä lo guejblu, reii, si'cti läidxej, bahuiä te bajł ni siääd xhaguibaali. Rsanijruni loj gubijdx. Basanijni guideb gabi cadre suga'a näjza reni sanää. <sup>14</sup> Che biabrloonu lo yuj, biejn diagä xse' te ni canii loä con didx hebreo: “Saulo, Saulo, ¿xhicuent rusacsílu narä näjza rexpeñä? Che rusacsílu narä, lagajc luj rdejdlu trabajw, si'c te gon ni rucuaní' yejc garu'ch.” <sup>15</sup> Dxejcti räpä lojni: “¿Chu luj Dad?” Dxejc najni loä: “Narä nacä Jesucrist nani cagusacsíduxhlu. <sup>16</sup> Huistie, gusulii. Narä baluiloä lojlu sa'csi rlazä gaclu te xpenä.



Aguleälu te gusule'lu lo rebejn guiraa ni bahuiilu nadxej, näjza guiraa recos ni churu guluiä lojlu. <sup>17</sup> Naj suxhalälu loj rexpejn Israel näjza lo rebenzijt nani di gac xpejn Israel. Che gusacsí rexpejn Israel näjza rebenzijt luj, sacnäduxhälü, te di ju'treni luj. <sup>18</sup> Gacnäã lastooreni te che jiejn diajgreni xtidxä, chalilajzrenini, diru xcäriejnreni gac nayääl, sianij xcäriejnreni. Dxejc dirureni gusoob xtidx Benxäb ni rnibee rebenxäb, sa'csi susoobreni xtidx Dios. Che chalilajzreni rextidxä, sudzucaj Dios xtojreni. Dxejcti suchaag Diosreni loj renani anajc beñnaya sa'csi basoobreni xtidx Dios, huililajzreni xtidxä.”

<sup>19</sup> Räjpa Pabl:

—Ni'cni rniliä lo guejblu, rei Agripa, cayunä si'cni naj Jesucrist loä gunä che baluilojni loä. <sup>20</sup> Gunixgää xtiidxni lo reben Damasco. Röpä lojreni: “Colgusiechlajz, colgusoob xtidx Dios. Colyujn dzunsa'c te gacbee rebejn abasiechlajztu, arusoobtu xtidx Dios.” Si'cza guniä lo reben Jerusalén, näjza lo rebejn ni yu' reguedx Judea, näjza lo rebenzijt ni di gac xpejn Israel. <sup>21</sup> Sa'csi benä si'c, gunaaz rexpejn Israel narä neñ guidoro, rlajzreni nugu'treni narä. <sup>22</sup> Naj racnäj Dios narä, naj sanuutis cagusule'ä rediidxga lo guiraatis bejn. Loj rebejn ni xhet rajpdi sigajc loj rebejn ni rapduxh. Rusule'ätis nani caj lo guijt nani bacuaa toMoisés näjza guiraa reniguii nani gunii xtidx Dios. Laareni galooli guniireni xcuent xhini'c gac naj. <sup>23</sup> Najreni sidejd Crist trabajwduxh, sugu'trenini. Niluxh sa'csi ganiddoo laani guibañsacni lo reben gut, ganiddooza laani suluini loj rexpejn Israel näjza loj guiraa rebenzijt guliipac xtidx Dios, sibañsac bejn lo reben gut, si'c ni guniini galooli.

### *Di Agripa nililajz xtidx Jesucrist*

<sup>24</sup> Lañ ni canii Pabl rediidxga lojreni, dip gunii Festo, räjpni lo Pabl:

—Pabl, yejclu cayajc. Pet sa'csi nanduxhlu guijt ni'c cayajc yejclu.

<sup>25</sup> Dxejcti räjp Pabl lojni:

—Rniliä lo guejblu dad gubernador Festo, xhet rajc di yecä. Ganax didxlii caniä.

<sup>26</sup> Ree suga' rei Agripa. Laani nancheeni guiraa rediidxre, ni'c guyasi caniä rediidxre lojni, dizana guidxebä sa'csi anajnni guli guiraa ni gujc, sa'csi xhet xhiga'tzdi gujcreni.

<sup>27</sup> Guejblu rei Agripa, ¿la rililajz guejblu xtidx reniguii nani bacuaa xtidx Dios, ä? Nancheä rililajz guejblu diidxga —räjp Pabl.

<sup>28</sup> Dxejcti räjp Agripa lo Pabl:

—Tuche'nsi riäädx gunlu gan chalilazä xtidx Jesucrist te gacä xpen Dios.

<sup>29</sup> Räjpa Pabl lojni:

—Xhet najc di palga guxii o xhidajl cayäädx, narä canabä guniidx Dios chalilajz guejblu xtiidxni si'c rililazä xtiidxni, nägajcza guiraa reni cacuadiajg xtidxä te gactu si'c nacä, niluxh xhet näjdi resa' cadenre —räjp Pabl.

<sup>30</sup> Dxejcti huisu Agripa, Festo, Berenice, näjza rebejn ni sobganäjreni. <sup>31</sup> Che gubigreni stelaad, räjpreni lo sa'reni:

—Niguiire xhet bejndini te guetni, xhetza bejndini te jäuni.

<sup>32</sup> Dxejcti räjp Agripa lo Festo:

—Paru dini niniab chääni lo César, saj nusanuni.

## 27

### *Birii Pabl sää nez guedx Roma*

<sup>1</sup> Basoobtiren dxej ni niu'nu neñ barcw te chonnu Italia. Dxejc bateedreni Pabl näjza sgaii bejn nani niäuzä lo capitán ni laa Julio. Rnibee Julio te gayuu soldaad, najcreni te cuua ni laa Augusto. <sup>2</sup> Näjza te dade' ni laa Aristarco guzaj, siäädni guedx Tesalónica xten Macedonia. Biu'nu neñ barcw ro' guedx Cesarea. Barcwga siääd guedx Adramitio. Biriitinu, najc xhigab teednu nez reguejdx nani yu' ro' nisdoo lo reyuj xten Asia. <sup>3</sup> Che



bara yääl guläjz barcw ro' guedx Sidón. Huenduxh gujc Julio con Pabl, basaanni bihuii Pabl rexamigwni ni yu' guejdxga te bahuiireni Pabl, badeedreni xhi rquiinni. <sup>4</sup> Che säsac barcw lo nisdoo, bideednu stelaad Chipre, yuj ni tre' lo nisdoo, sa'csi säab te beduxh, ni'c naga' Chipre xladbäjgwnu, te guxiiru rda' bej loonu. <sup>5</sup> Che sonnu neñ barcw, bideednu xnisdoo reguedx Cilicia näjza xnisdoo reguedx Panfilia, te bidzunnu ro' guedx Mira xten Licia. <sup>6</sup> Ro'c bidxäjł capitán xten resoldaad stee barcw ni siääd guedx Alejandría. Agojł chää barcwga Italia. Bateedtini guiraanu lo barcwga. <sup>7</sup> Balti dxej chäigaj sonnu lo nisdoo. Trabajwduxh bidzunnu lo nisdoo ro' guedx Gnido, sa'csi entis cabi' beduxh nez cadre sonnu. Ni'c trabajwduxh bideednu xladbäjgw yuj Creta ni tre' lo nisdoo xladbeenu. Gudejdu guedx Salmón. <sup>8</sup> Dxejcti chäiduxh sonnu neñ barcw lo nisdoo nez cuä' yu Creta; si'ctis gujc bidzunnu te lajt ro' nisdoo ni laa Buenos Puertos cadre guxii säab bej. Gajxh ro'c tre' guedx Lasea. <sup>9</sup> Agujc balti dxej cayaclaanu, luxh agudejza dxej ni rucua'n rexpejñ Israel, guxii riäädx chaa ijz. Rebäire di bejñ chää neñ barcw sa'csi yuduxh riesgw lo nisdoo, ni'c balijdx Pabl rebejñ, <sup>10</sup> räjpni lojreni:

—Rexamigwä, runxgaä bis guejbtu, palga chonnu neñ barcw chanuunu xnejznu, sajc te liädxduxh. Sinitloj cargw, sibijxh barcw, luxh silo' xhidajł bejñ, —räjpni.

<sup>11</sup> Niluxh di capitán xten resoldaad niu xtidx Pabl. Biuruni xtidx nani rusaj barcw näjza xtidx baxhuaan xten barcw. <sup>12</sup> Luxh sa'csi lajtga dini gajc huen tedreni rebäii nalduxh, bejnreni xhigab hueenru guiriinu ro'c te chonnu guedx Fenice ni tre'za lo yu Creta, sa'csi di bej guibiduxh ro'c. Hueenru ro'c guilääznu ted rebäinajł, rajpreni.

<sup>13</sup> Ni'c che gusloj cabi' te bebäz nez lad sur, naareni pet xhet najcdi guiriinu lo nisdoo con barcw. Dxejc baslaareni barcw, sontinu ro' nisdoo gajxh cuä' Creta. <sup>14</sup> Niluxh di niaclaa gusloj te nisguipeduxh birii nez redajn xten Creta. <sup>15</sup> Gunaaz bejga barcw, diru gacdi gusajrenini. Basa'ntireni sanä bejga barcw cadrotis rlajzni. <sup>16</sup> Siädgobiuj barcw te canuu. Che bidzunnu stelaad te yuje' ni tre' lo nisdoo ni laa Claudia, guxiiru cabi' beduxhga. Dxejcli bejnreni gaan guläsreni canuu neñ barcw. <sup>17</sup> Che basälñu canuu neñ barcw, cua'reni gaii duro te baliibreni barcwro, bateedreni gaii duu xque' barcw te na'c guibiłni. Cadxejbreni te di chachu' barcw lo yujxh ni laa Sirte ni yu' neñ nisdoo. Ni'c guläjtreni ladro ni rniaaz bej te rusajni barcw, gudixhreni lajdga neñ barcw. Sanäti beduxhga barcw cadrotis rlajzni. <sup>18</sup> Che bara yääl caguscuä' beduxh barcw lo nisdoo. Sas basälreni che'n cargw lo nisdoo te bicharu barcw. <sup>19</sup> Ni riojñ dxej, lagajc laareni basälreni lo nisdoo guiraa xtrast barcw. <sup>20</sup> Che agujc balti dxej niäu lo gubijdx, diza rebale' nien xhaguibaa sa'csi laltis cayajb nisguipeduxhga, biennu xhigab guiraanu sejtnu. <sup>21</sup> Xchero rut rlajzdi gau. Dxejc gusuj Pabl galäii rebejñ räjpni lojreni:

—Rexamigwä, paru nucuadiajg guejbtu xtidxä, na'c niriitu xyuj Creta, di liäädxre niajc, dizanu nidejd trabajwduxhre. <sup>22</sup> Niluxh colcuedcxi lastootu. Niclatej bejñ ni siääd lo barcw di guet. Barcwtis sinitloj. <sup>23</sup> Nacä te xpejñ Dios, runä xhitis ni rnibeeni gunä. Nayääl biädsuj te xangl Dios cuä'ä, <sup>24</sup> najni loä: “Na'c guidxejblu Pabl. Nanabpac chäälü lo reii César. ¡Bahuilaa! Abasalajz Dioslu reni siädñälu; nicla tej reni yu' neñ barcwre di guet”, najni loä. <sup>25</sup> Ni'cni cania lo guejbtu, na'c guidxejbtu. Narä rililazä xtidx Dios. Rililazä sisiojb xtidx Dios si'c ni naj xangl Dios loä. <sup>26</sup> Niluxh yu' cadre chalaj barcw lo yujxh neñ nisdoo gajxh lo te yuje' ni tre' neñ nisdoo —räjp Pabl.

<sup>27</sup> Si'cti tiop xman balañaa beduxhga barcw nezre, nezrec lo nisdoo ni laa Adria. Pet garol yääl ni bejn reniguii ni ruzaj barcw xhigab abidzujñ barcw gajxh lo yuj, <sup>28</sup> ni'c bastejbreni te guib lo duu xhajn nisdoo, te barexhreni ro'c, dxejc gucbeereni najc nisdoo jäät si'cti galbitzubixho'p metr. Che guzaj barcw stelabäze', bastebsacreni guib con duu xajn nisdoo, dxejc gucbeereni ro'c najc nisdoo jäät si'cti galbigajdz metr. <sup>29</sup> Dxejc bidxejbreni te di chalaj barcw yejc reguij. Bacuaatireni tajp guibro si'c guench ni naliib te caden te ru'reni neñ yujxh te ruscuääzreni barcw, te jia'nni tejsi lajt. Dxejc rlajzreni malaii jianijga lo guedxliuj. <sup>30</sup> Dxejcti gulät remos canuu lo nisdoo cayujnsireni

si'cni chastejbreni stee guench guiib lo nisdoo, niluxh rlanjreni guxunreni guidon la sajc guidzujnreni ro' nisdoo. <sup>31</sup> Dxejcti räjp Pabl lo capitán näjza lo resoldaad:

—Palga di redee jia'n neñ barcw, di gacdi guslaatu xcälñabajntu —räjpnj.

<sup>32</sup> Dxejcti batiugya' resoldaad duu ni naaz canuu te bitejbni lo nisdoo, sanäti nisdoo canuuga. <sup>33</sup> Che gusloj cayanij, gunibee Pabl, räjpni lojreni:

—Nadxej rajc tiop xman gajdtu gues, gajdzatu gau. <sup>34</sup> Naj coltajw te gac guixoobtu lo nisdoo. Na'c guntu xhigab guettu, nicla tej xquidxejcti di nitloj.

<sup>35</sup> Che gulujx gunii Pabl si'c, cua'ni yätxtiil, badeedni xquixtios lo Dios nez loj guiraareni. Dxejc gula'nini, gusloj cayajwnini. <sup>36</sup> Dxejc bibaa-lajzreni, näjza laareni gusloj cayajwreni. <sup>37</sup> Nuunu najcnu tiop gayuu gayonbitzubixho'p bejn ni yu' neñ barcwga. <sup>38</sup> Che agujc gudajwreni, basälreni triuu lo nisdoo te bicharu barcw.

<sup>39</sup> Che bianisac, direni niembee yujga, niluxh bahuiireni cadro rdzujn te gueubäz ro' nisdoo cadro yu' xhiroob yujxh ro' nisdoo. Rlanjreni nusiureni barcw ro'c. <sup>40</sup> Dxejcti baslaareni guidap guench guiib ni naaz barcw, bia'nreni guideb caden neñ nisdoo, baxheczareni yajg ni ruzaj barcw, guläszareni ladro nez delant barcw te balañaa bej barcw. Badzuréreni barcw sääreni nez ro' nisdoo. <sup>41</sup> Sas biu'reni te lajt cadro rdxagsa' tiop cuaa nis. Ro'c huilaj yejc barcw neñ yujxh neñ nisdoo, digacdiru guiniibni. Dxejcti gusloj cabijl dejtz barcw sa'csi sanuutis caguijn nisdoo detz barcw. <sup>42</sup> Dxejcti rlanj resoldaad nugu't repres te di guixoobreni lo nis guxunreni. <sup>43</sup> Niluxh di rlanj capitán xten resoldaad guet Pabl, ni'c dini nusaan nugu't resoldaad repres. Gunibee capitán ganiddoo renani rajc rxoob lo nis guitiäjs lo nisdoo te guidzujnreni lo yujxh. <sup>44</sup> Dxejcti birinajl rebejn ni digacdi guixoob lo nis, naazreni barajd o te la' yajg ni gula' detz barcw. Si'c gujc bidzujn guiragajc rebejn lo yujxh ro' nisdoo. Nadaanreni bidzujnreni lo yujxhga.

## 28

### *Bidzujn Pabl lo yuj ni laa Malta ni re' lo nisdoo*

<sup>1</sup> Che bidzujn nu lo yuj ni tre' lo nisdoo, biembeenu yujga najc ni laa Malta. <sup>2</sup> Gucnä j rebejn ro'c nuure, gule'creni guiboo bahuiireni nuure sa'csi cayacnalduxh, cayajbza nisguij. <sup>3</sup> Ca' Pabl te däaz yajg, sale'cnini lo guiboo, chela biriyäl te bäl nialajz neñ yajgga. Saa gudauya'ni naa Pabl. <sup>4</sup> Che bahuii reben Malta li najl bäl nialajzga cayauya' naa Pabl, gusloj cayäjbreni lo sa'reni:

—Pet rugu'tni bejn ni'c mase bejn ni gaan lo nisdoo siguijxni xtojlni, sejtni naj.

<sup>5</sup> Gubijb Pabl naani dxejcti bitejb bälga lo guiboo. Xhet gujcdi naa Pabl. <sup>6</sup> Dxejc reben ro'c cabä jz fiireni la sisiäguij naa Pabl o laa sejtni. Xchero bidxelojreni. Che bahuiireni xhet gujcdini, gusloj bejnreni ste'ca xhigab, räjpreni lo sa'reni:

—Pet dios najcni.

<sup>7</sup> Gajxh ro'c naga' xyuj te dade' ni laa Publio ni najc xcubernadoor Malta. Biojia'nnu rolijzni chon dxej. Huenduxh gujc dade'ga, baniidxni guiraa ni biquiinnu. <sup>8</sup> Naga' xtad Publio cayacxhuuni, yu'ni xliaa, cayajczani yobrejn. Huihuii Pabl ni. Guredx-gunab Pabl lo Dios, dxejc batzuub Pabl naani yejcnj, basiacgajcnini. <sup>9</sup> Che gucbee rebenguejdxga abasiajcnj beñ racxhuuga, bidzunnä jreni beñ racxhuu lo Pabl, basiajc Pabl guiraareni. <sup>10</sup> Ni'c banidx-xliaareni xhidalduxh xhicos, luxh che biriinu ro'c, baniidxreni guiralii recos ni biquiinnu neñ barcw.

### *Bidzujn Pabl guedx Roma*

<sup>11</sup> Agujc chon bäi yu'nu ro'c che biu'nu neñ te barcw ni siääd Alejandría. Lagajc ro'c bateed barcwga rebäinajl che rsiäb beduxh. Yejc barcwga caj tiop figuur xten tiop biuux ni laa Cástor näjza Pólux, rexingancua'ch dios ni laa Zeus. <sup>12</sup> Biriinu Malta sonnu neñ barcw nez guedx Siracusa. Ro'c bia'nnu chon dxej. <sup>13</sup> Dxejcti biusacnu neñ barcw, sonnu

lo nisdoo cheni bidzunlinu guejdx ni laa Regio. Che bara yääl, gubi' te bej birii lad sur. Biusacnu neñ barcw. Bara yääl bidzunnu guedx Puteoli. <sup>14</sup> Ro'c bidxaagnu gatii xpejn Jesucrist. Najreni loonu:

—Coljiannäj nuunu —najreni.

Bia'nnu ro'c gajdz dxej. Dxejc biriinu guejdxga, ni'nu sonnu nez guedx Roma. <sup>15</sup> Che guchee rexpejn Jesucrist ni yu' guedx Roma siopsaanu nez Roma, biädreni guedx Foro de Apio näjza stee guejdx ni laa Tres Tabernas, ro'c bidxaagreni nuure. Che bahuii Pabl lojreni, guzutijp lastooni, badeedni xquixtios lo Dios. <sup>16</sup> Che biu'nu guedx Roma, bateed capitán repres ladzñaa comandant, niluxh basaanni cualaa Pabl te yu' cadre cuääzni. Tejtis soldaad biannäj Pabl.

### *Baluii Pabl xtidx Dios lo reben Roma*

<sup>17</sup> Che gudejd choñ dxej, gurejdx Pabl reni rnibee lo rexpejn Israel. Che bidxaag sa'reni cadre yu' Pabl, räjpni lojreni:

—Guejbtu reexamigwä, resa'ä, xhetliidi nani xhet laadi benä lo rexpejn Israel, dizana nibälazä xleii toMoisés. Niluxh basäureni narä neñ latzguiib guedx Jerusalén, dxejcti bateedreni narä ladzñaa reroman. <sup>18</sup> Che biejn diajgreni xtidxä, rlajz reguxhtis roman nuslaa narä sa'csi xhet benädi te nugu'treni narä. <sup>19</sup> Niluxh naaddi rexpejn Israel guslaareni narä, gunabätis lojpac reii César jädle'creni quej ni cabe'creni xcuentä. Niluxh narä xhet xquejdi rexpejn Israel cue'cä. <sup>20</sup> Ni'cni guredxä la'tu te fiä lojtu, te guininää la'tu, sa'csi rililazä lagajc si'c rililajz xpejn Israel sibansac rebengut, ni'c nalibä cadenre.

<sup>21</sup> Dxejcti räjpreni lojni:

—Nicla tej guijtj gajd reguxhtis xten reguedx Judea guxhañ loonu xcuentlu, gajdza rexpejn nu ni bidzujñ ree jädsa'n diidx xhet laadi bejnlu. <sup>22</sup> Rlajznu jiejn diajgnu xtiidxlu, don xhi naalu, sa'csi racheenu xhidajl lajt rniyajreni redidxcoob xten Jesucrist —räjpreni.

<sup>23</sup> Guletireni te dxej guidxagsa'reni. Che bidzujñ dxejga, bidxagsa' xhidalduxh bejn neñ yu' cadre rbäjz Pabl. Guideb dxej basule' Pabl xtidx Dios lojreni. Basule'ni xho rnibee Dios lojreni. Con rediidx ni caj lo xleii toMoisés näjza diidx ni bacuaa reniguii nani gunii xtidx Dios basule'ni Jesús najc Crist nani galooli cabäjz reben Israel jäd. <sup>24</sup> Yu' reni huililajz xtidx Pabl, yu'za reni di nililajz xtiidxni. <sup>25</sup> Sa'csi di niajcdi niujnreni tejsi xhigab gusloj siireni. Ganiddoo räjp Pabl lojreni:

—Guliica naj toIsaías che badeed Sprit Dxan xten Dios rediidxre guniini, räjpni lo rextadgoldoonu:

<sup>26</sup> Huij, gunii lo rebejnre, scree gojz lojreni:

Siejn diajgtu xtidxä, niluxh ditu gacheeni.

Suhuiitu nani runä luxh ditu gumbee xhini'c ruhuiitu.

<sup>27</sup> Agucnajd lastoo rebejnre sa'csi di rlajzreni chalilajzreni xtidxä.

Direni cuadiajg xtidxä sa'csi di rlajzreni jiejn diajgreni diidx ni guliipac.

Rusäuzareni balojreni te di fiireni, te di lajzreni chalii.

Ni'cni direni gusiechljazreni te gusaan gunreni dojl te gudzucaj Dios xtojlni.

<sup>28</sup> Räjp Pabl lojreni:

—Colgachee. Najli sisiule' xtidx Dios lo rebenzajt ni di gac xpejn Israel te gusiejch lajzreni, te gudzucaj Dios xtojlni. Rniliäpac lojtu, sililajzreni rextidx Dios.

<sup>29</sup> Che gulujx gunii Pabl rediidxga lojreni, ensilaareni gusloj cadxagdijl sa'reni lañ ni sääreni.

<sup>30</sup> Tiop ijz guläjz Pabl guejdxga neñ yu' ni cualaani. Biuni guiralii rebejn ni biäd rolizni. <sup>31</sup> Lo guiraa rebejn ga basule'ni xho rnibee Dios lojreni. Bijzani diidx xcuent redzuun nani bejn Jesucrist. Di lastooni nidxejb, rutza badxojndi guniini.

## Guijtz Nani Bacuaa Pabl Lo Rebeņ Roman

### *Rucuaa Pabl lo rebeņ guidoo neņ guedx Roma*

<sup>1</sup> Narä, Pabl, nacä te xmos Jesucrist, laani gule narä te gusule'ä xtidx Dios loj rebeņ.

<sup>2</sup> Agujc xchero bia'n Dios diidx loj renani basule' xtiidxni, suniidxni diidxre loonu, luxh diidx ni bia'n Dios caj lo guiitz xten reprofetga. <sup>3</sup> Rediidx ni rusule'ä najc xcuent Jesucrist, Xi'n Dios, ni najc xagdoo toreei David xcuent tiejxhni. <sup>4</sup> Xcuent Xsprit Dxan Dad Jesucrist, najcni Xi'npac Dios. Badeed Dios yälrnibee lojni, ni'cni gubansacni lo rebengut. <sup>5</sup> Laani gucnäjni narä, guleni narä te gusule'ä xtiidxni te guzobdiajgtu, te chalilajz rebeņ ni rej guideb guedxliuj xtiidxni. <sup>6</sup> Luxh nadxaagtu loj rebeņ ni guleni te chalilajzreni xtiidxni.

<sup>7</sup> Ruxhalä guiitzre lojtu ni yu' guedx Roma, guiraatu ni sanälajz Dios ni bibeetu gactu beņdxan. Gacnäj Dios ni najc Xtdnu näjza Dad Jesucrist la'tu, guscuecdxireni lajztu.

### *Rlajz Pabl chää guedx Roma*

<sup>8</sup> Ganidtoo rudedä xquixtios loj Dios con laj Jesucrist xcuent guiraatu, sa'csi guideb guedxliuj ruju beņ diidx xcuent xcälrlilajztu. <sup>9</sup> Lagajc Dios anajn xho rniabä guet-guejt xcuent la'tu lojni. Narä runä xtzun Dios guideb lastoä, rusule'ä diidx xcuent Xi'nni Jesucrist. <sup>10</sup> Sanuutis canabä lojni, top sajc jädhuiä lojtu si'cni rlazä gunä agujc xchejli. <sup>11</sup> Sa'csi rlazduxhä fiä lojtu, te gacnäätu, te gulidxä la'tu xhi te xtidx Dios te sudzu'tzrutu lo xtiidxni. <sup>12</sup> Nalajznu, te gustioobnu lajz sa'nu xcälrlilajz xtidx Dios xten sa'nu.

<sup>13</sup> Rebetzä rlazä gacheetu balti huält benä xhigab jädhuiä lojtu, luxh gajd gacdi jäälä. Rlazä jädhuiä lojtu te chalilajz xhidajlru beņ xtidx Dios sigajcni salilajzreni guiralajt cadro hua'a loj rebeņ ni di gac xpen Israel. <sup>14</sup> Nungäjlpac gusule'ä xtidx Dios loj rebeņ nani rni garen-garen didxsaj, sigajc loj rebeņ griegw, loj renani nayääl, sigajc loj rebeņ najn. <sup>15</sup> Rbaali lazä suga'a naj, te gusule' xtidx Dios näjza lojtu ni yu' guedx Roma.

### *Xcälrnibee xtidx Dios*

<sup>16</sup> Sa'csi dina guituiä xcuent xtidx Dios, sa'csi najcni yälrnibee xten Dios te guslaani lo dojl chutis beņ nani rlazchalilajz xtiidxni, ganidtoo reni najc rexpeņ Israel, dxejcti näjza rebeņ ni di gac xpen Israel. <sup>17</sup> Sa'csi xtidx Dios rusule' xho nanab chalilajz te beņ te gacni te beņsa'c nez lo Dios sa'csi huililajzni xtiidxni. Lo xtidx Dios caj scree: "Palga rililajz te beņ xtidx Dios, najcni te beņnaya nez lo Dios, nabañnäjni Dios xcuent xcälrlilajzni."

### *Rextojl beņ*

<sup>18</sup> Xcälrdxe'ch Dios nani yu' xhaguibaa siajbni yejc rebeņ nani gun dojl, nani rlazgun cosguijdx, nani di gusaan guisieed sabeņreni didxguli. <sup>19</sup> Sa'csi anancheereni nani sajc gan beņ xcuent Dios, ni'cni najnreni rajpreni dojl, sa'csi ruluipac Dios na'c gunreni dojl. <sup>20</sup> Cheni birixtiejli guedxliuj, recos nani di gacdi fii beņ xcuent Dios, si'c xcälrnibeeni ni najc par tejpas, si'c xtujxh xtenni, huenliisi ruzenreni sa'csi ruluilojreni recos ni ruzen nani benchee Dios. Guiraa reni'c ruluiloj najcni Gueb Dios ni rajp yälrnibee par tejpas, ni'c di gacdi guiniireni loj Dios direni niembee xhini'c rlaz Dios gunreni. <sup>21</sup> Ni'cni, mase biembeereni Dios, direni niliä'p xpala'nni te ganreni Gueb Dios, dizareni nudeed xquixtios lojni. Alga gualajz gujcreni, bicäy xcariejnreni, naareni hueen najc gunreni si'ctis ni jiajb yejcreni, si'cni rsia' lajzreni neņ lastooreni. <sup>22</sup> Caniireni nanduxhreni, per direni gan, nayäälreni. <sup>23</sup> Gulälazreni xcälrdimbicha' Dios ni najc tejsi par tejpas, te bazuxhijbreni nez loj rebanäjb ni benchee naareni, ni najc guiraa ni rujn lojni si'c rujn lo te niguii ni rnitloj, näjza guiraa ni najc si'c reman ni rutajt, näjza guiraa ni najc si'c reman ni yu' tajp ni'ni, näjza ni najc si'c rebäjl.



<sup>24</sup> Ni'cni gulälaz Diosreni, basaanni gunreni si'ctis ni rlanjreni. Bejnreni dojl con resa'reni. <sup>25</sup> Sa'csi ahuililajzreni didx-xhii lacuaa nililajzreni xtidxlii Dios, ruzuxhi-jbzareni nez loj recos ni benchee Dios, lacuaa guzuxhijbreni loj Dios nani benchee guiraa rexhicos, Dios nacle' par tejpas. Sugacni si'c.

<sup>26</sup> Ni'cni gulälaz Diosreni, subia'nreni lo xcällatsiajreni, lo yälxtujy xtenreni. Diru regunaa guesnäjä niguui, lagajc sagunaareni resnäjäreni. <sup>27</sup> Sigajcza reniguui gulälaz regunaa, rujnreni dojl con lagajc saniguiireni. Luxh lagajc laareni siguijxreni latsiaj ni rujnreni.

<sup>28</sup> Luxh sa'csi di rlanjreni jiuren Diös, basaanti Diös suyu' cosguijdxctis xcäriejnreni, te chanuutisreni lo xcällatsiajreni, rujnreni recos ni xhet laadi. <sup>29</sup> Guidxareni dojl, näjza cosguijdx, näj yälruguilajz xhixten sa'reni; rugu'treni bejn, rujnreni yälrsiäblajz, rucuanäjäreni resa'reni, rusgueereni sa'reni, rdxechnäjäreni sa'reni, rniizareni didxxhii. <sup>30</sup> Rniyaj sa'reni, rdxe'chreni lo Diös, gualajzreni, dipacreni guitujy, rliä'preni lagajc xpala'nreni, entis latsiacoob rbäxtiejreni, gualajzreni lo xcuzajjnreni, <sup>31</sup> nadduxhreni, xheti xcäriejnreni, xhet sajcdi xtiidxreni ni ria'nreni lo sabejnreni, direni chanälajz sa'reni si'cni nungäj gacni, dizareni gulasajz sa'reni. <sup>32</sup> Luxh mase agucebereni gun Diös yälguختis lojreni, najnzareni nungäj guetpac renani rujn recosre, nicla jiuren, rujnreni guiraa recosguijdxre, luxh rbaali lajzreni richunäjäreni rebejn ni rujnza recosguijdxga.

## 2

### *Dios rujn yälguختis con didxguliipac*

<sup>1</sup> Ni'cni, ¿canejz chäätu, la'tu benguedxliuj? Chutis luj ni rgubeelu sabejnlu, lagajc si'c cubeezareni luj, lagajc xcuent ni'c sajclu yälguختis, sa'csi luj rgubeelu sabejnlu, lagajcza luj rujnlu lagajc dojlga. <sup>2</sup> Nancheenu sujn Diös yälguختissa'c loj renani rujn sa' dojlga. <sup>3</sup> Bejn guedxliuj ni rgubee loj renani rujn dojl, luxh sigajcza rujnlu, ¿la rujnlu xhigab sidedcaj gun Diös yälguختis lojlu xcuent xtojllu, ä? <sup>4</sup> O ¿la rbälazlu ni rujn Diös, najcni huenduxh, lacti guroob najc xcälrulesajzni, rapduxhzani pasens? ¿La dilu gan dee najc ni gacnäjlü gusiechlajzlu te guibicajlu lo dojl, ä? <sup>5</sup> Luxh sa'csi nadduxhlu, di lastoolu guigoodz te gusiechlajzlu, cagutajllu yälguختis ni gaclu che guidzujn dxej ni gun Diös yälguختis loj rebejn guedxliuj, <sup>6</sup> siguijx Diös loj tejpgatu xcuent dzuun nani bejn tejpgatu. <sup>7</sup> Loj rebejn nani rlanjztisreni guiba'nsa'c, ni gusoob xtiidxni, sudeed Diös yäl'nabajn par tejpas sa'csi gudiilreni xhaniduj näjza go'preni xpala'nreni loj Diös, rlanjzreni guibajnreni loj Diös par tejpas. <sup>8</sup> Luxh sidxe'ch Diös, sidxe'chduxhni loj renani sanälajz lagajc laareni, nani di jiu xtidxguliini, alga rusobreni reyällatsiaj, redidxguijdx. <sup>9</sup> Guiraa rebejn guedxliuj ni rujn dojl sidejd trabajwduxh näjza sac-huin lastooreni; ganid rexpén Israel, dxejcti näjza rebejn griegw. <sup>10</sup> Loj guiraa rebejn nani rujn cos-hueen, sudeed Diös xhaniduj, näjza bala'n, näjza yälrbecdx lastooreni, ganid rexpén Israel, dxejcti näjza rebejn griegw.

<sup>11</sup> Sa'csi tebloj najc guiraasi rebejn nez loj Diös. <sup>12</sup> Guiraa rebejn nani bejn dojl, luxh direni niembee xleii Diös, sinitlojreni sin leiiga; guiraa reni biembee xleii Diös, lagajc con leiiga sujn Diös yälguختisreni xcuent xtojlni. <sup>13</sup> Xhet ganaxdi renani rucua diajgtis xleii Moisés najc be'naya nez loj Diös; rebejn ni rusobpac rexleii to Moisés, reni'c najc be'naya loj Diös. <sup>14</sup> Yu' xhidäl bejn ni di gumbee xleii to Moisés, dizareni gac rexpén Israel, rujnreni recos ni caj lo leii. Najnreni xhini'c najc cos sa'c. Ni'cni lagajc xcäriejnreni najc si'c leii par laareni. <sup>15</sup> Recossa'c ni rujnreni ruluiloj nezyusa'c ni yu' lastooreni. Xcäriejnreni ruluiloj xhini'c loj guiraa nani rujnreni najc cos sa'c, xhini'c najc dojl. <sup>16</sup> Guiraa recosre saj che guidzujn dxej ni gun Diös yälguختis guiraa rexhigabxhiga'tz ni yu' lastoo rebejn. Jesucrist gac juejz lojreni, dxejc sisiojb guiraa rediidx ni cagusule'a lojtu.



### *Rexpen Israel näj xleii to Moisés*

<sup>17</sup> Luj ni laalu xpen Israel, ni rniilu sanäpaclu xleii to Moisés, rniduxhlu najclu xpen Dios, <sup>18</sup> rniilu nancheezalu xhini'c rlajz Dios gunlu, anajnzalu xhini'c najc hueenru sa'csi bisiedsa'cpaclu leii. <sup>19</sup> Rchalolu sajz guluiilu nezyusa'c lo rebejn nani najc si'c lotiä'p, sajz guzanijlu xcäriejn reni nacäy xcäriejnreni. <sup>20</sup> Rchalolu najclu maestr lo renani nayääl, najczalu maestr lo rebiuux, sa'csi nansa'clu leii, luxh lojni caj guiraa yäl najn näjza guiraa didxguliipac. <sup>21</sup> Ni'cni rniä lojlu, luj ni caguseed xtee bejn, ¿xhicuent dilu guseed lagajc luj? Luj ni rusule'lu diidx na'c cuan bejn, ¿xhicuent rbajnlü? <sup>22</sup> Luj nani rniilu na'c guesnäjni te ni di gac chääl ni, ¿la resnäjlu nani di gac chäällu, ä? Rdxechlu xcuent rebanäjb, ¿xhicuent rbäälü xhicos nen xquidoo rebanäjb, ä? <sup>23</sup> Luj rlajzlu chä'p xpala'nlu sa'csi najnlü leii, ¿la rusanxtujyлу Dios sa'csi dilu gusoob xtidx leiiga, ä? <sup>24</sup> Bahuii xho rebejn nani di gac xpen Israel rniyajreni Dios sa'csi la'tu ditu gusoob xtiidxni, rujntu dojl, sigajc ni caj lo xtidx Dios.

<sup>25</sup> Palga la'tu chutu bee si'cni caj lo leiiga, palga gusoobtu guiraa diidx ni caj lo leii, laaca. Luxh palga ditu gusoob guiraliipac xtidx leiiga, xlia'si guyu'tu bee, sa'csi rujntu dojl. <sup>26</sup> Ni'cni palga te bejn ni di chu beega, luxh rusobni guiraliipac xtidx leiiga, ¿la di gacdi guchaagni cuent najcni si'c te nani yu' beega, ä? <sup>27</sup> Bejn nani di chu beega, luxh rililajzni guiraliipac xtidx leiiga, sujnni yälguxhtis la'tu sa'csi mase yu'tu beega, luxh nanduxhtu leiiga, ditu gusoob xtidx leiiga, alga rujntu dojl. <sup>28</sup> Sa'csi xhet guiraadi rebejn ni yu' beega najc rexpejn Israel, luxh di beega ni ru' bejn gun gusoobpac bejn xtidx leiiga. <sup>29</sup> Najcpac te xpen Israel nani najcni nen lastooni, nani yu' bee lastooni, rusobpacni xtidx Dios xcuent Sprit xtenni, dini gunni sa'csi najctisni costumbr. Dios ni siliä'p xpala'nni, xhet bejndi.

## 3

<sup>1</sup> ¿Xhini'c sacnäj te bejn najcni te rexpen Israel, ä? O ¿xhi sajz chuni beega? <sup>2</sup> ¡Empac sacduxhni! Ganidtoo, sa'csi loj rexpen Israel badeed Dios xtiidxni. <sup>3</sup> Mase yu' renani di nililajz diidxga, ¿la ni'cni xhet sajcdi diidx ni bia'n Dios loj rexpejnni, ä? <sup>4</sup> ¡Xho gacni si'c! Diostis najc guliipac, guiralii bejn rusguee. Scree caj lo xtidx Dios:

Lagajc xtiidxlu suluii laaca rujnlü,  
te che gaclu yälguxhtis,  
nicla tej xtojllü di guidxäjl.

<sup>5</sup> Palga xcällatsiajnu ruluiiru najc Dios huenduxh, ¿xhini'c guiniinu dxejc? Palga gun Dios yälguxhtis nurnu, dxejc tednu trabajwduxh, ¿la rujnni latsiaj loonu, ä? (Caniä si'c te bejn guedxliuj naj.) <sup>6</sup> ¡Xho gacni si'c! Paru najcni si'c, ¿xho mood gun Dios yälguxhtis loj rebejn guedxliuj?

<sup>7</sup> Paru redidx-xhii ni rniä riliä'pru xpala'n Dios näjza xtidxliini, ¿xhicuent gunni yälguxhtis narä si'c te bendojl? <sup>8</sup> Yu'za bejn ni canii didx-xhii, najreni cayäjpnu lo rebejn: "Colyejn cosguijdx te guiluilojni recoshuen." Per rebejn ni canii si'c sidzujn dxej gacreni yälguxhtis.

### *Guiraanu najcnu bendojl*

<sup>9</sup> ¿Dxejca'? ¿La najcnu beñhuenduxhru lojreni, ä? Dini gac; tebloj abile'cnu yälquij xten rexpen Israel con rebejn ni di gac xpen Israel, sa'csi guiraareni yu'reni lo dojl. <sup>10</sup> Si'cni caj lo guijtz:

Ruti te bensa'c, nicla tejni.

<sup>11</sup> Ruti te bejn ni racbee,  
ruti chu tej nani rguuil Dios.

<sup>12</sup> Guiragajcreni abirii lo xnejz Dios,  
teblojsi xhet sajcdireni.

Ruti chu tej ni rujn cossa'c, nicla tejni.

<sup>13</sup> Ro'reni rii ganax didxguijdx,  
najcni si'c te baa ni naxal,  
rusgueereni con lujdxreni,  
didxlatsiaj rii ro'reni najcni si'c benen ni yu' ro' te bälñialajz.

<sup>14</sup> Ro'reni entis cague,  
entis canii didxrdxe'ch lo sa'reni.

<sup>15</sup> Ni'reni ruxunli saxhe' xtiejn sa'reni.

<sup>16</sup> Cadrotis rijreni rujnreni latsiaj,  
ruteedreni sa'reni trabajw.

<sup>17</sup> Direni gumbee nezyuj ni ruscuecdxilajz.

<sup>18</sup> Niclaza guidxelojreni Dios.

<sup>19</sup> Racheenu najc rediidx nani caj lo xleii Dios par rebejn ni rnibee leii lojreni, te jiäuu ro' guiralii rebejn, te guiraa reben guedxliuj gacbeereni yu' xtojlneni nez loj Dios. <sup>20</sup> Sa'csi mase gusoob bejn guira'ti diidx ni caj lo leii, di leiiga gudzucaj xtojln bejnga, sa'csi leiiga najc nani guluii dojl ni yu' neñ lastooni.

### *Ruslaa Dios lo dojl xcuent yälñirilajz xtiidxni*

<sup>21</sup> Naj ruluii Dios stee mood guibicaj xtojlnu, nani di gac mood ni caj lo xleii toMoisés. Luxh galooli gusloj canii Dios xcuent nezyujre, cajni lo reguijtz xten leii näjza lo reguijtz ni bejn rebejn nani gunii xtidx Dios galoo. <sup>22</sup> Stee mood najc scree: Chutis ni chalilajz xtidx Jesucrist, sajc naya lastooni nez loj Dios; si'c sajc garaliiza nani salilajz, sa'csi tebloj najcnu nez lojni. <sup>23</sup> Sa'csi guiralii rebejn guedxliuj abanijt lo Dios, direni guiga' guidzujnreni lo xnezyuj Dios. <sup>24</sup> Niluxh balaslajz Dios nuunu, banidxxlia'ni loonu yälñabannaya nez loj Dios sa'csi Jesucristis gudijx yälñuxhtis xten dojl che baxhe'ni xtiejni lo cruzj te badzucajni xtojlnu. <sup>25</sup> Baxhal Dios xi'nni, Jesucrist, te cuajni lo cruzj nez loj rebejn te si'c gudijxni guiraa rextojln chutis bejn ni rililajz xtidx Dios xcuent xtiejn Jesucrist. Si'c bejn Dios te guluiini xho guibannaya bejn lojni. Galoo gojptis Dios pasens rebejn, dini niujn yälñuxhtis rextojlneni, <sup>26</sup> sa'csi acanajn Dios guc gunni yälñuxhtis redojlga, te si'c guiluiini xcälñayani nez loj guiraa rebejn, te Diospac gunnaya nez lojni chutis ni rililajz xtidx Jesucrist.

<sup>27</sup> Ni'cni ¿con yälñaro? ¿Con yälñindaan? ¿Xhet sajc dini! ¿Xhi leii rudzucaj xtojlnu? ¿La leii najc ni rnii jienu dzunsa'c, ä? ¿Dini gac si'c! Yu' tejtis leii ni rudzucaj dojl, nani rnii chalilajztis bejn xtidx Jesucrist. <sup>28</sup> Dxejc sajc guiniä lojtu chutis bejn sajc gac naya nez loj Dios sa'csi rililajzni xtidx Jesucrist, xhet sa'csi rujnni redzunsa'c ni caj lo leii.

<sup>29</sup> ¿La najc Dios Xtiooztis rexpenn Israel, ä? ¿La dini gac näjza Dios xten rebejn ni di gac xpen Israel? ¿Xho dini gac! Najcni Dios xten guiop cuaa bejn. <sup>30</sup> Ruti chu stee Dios, tejtis Dios yu'. Ruslaani lo dojl rebejn ni guyu' bee sa'csi huililajzreni xtiidxni, sigajcza ruslaani lo dojl rebejn ni xhet beedi guyu' sa'csi huililajzzeneni xtiidxni. <sup>31</sup> ¿La rudzucajnu leii sa'csi rililajznu, ä? Ajndi. ¿Xho gacni si'c! Alga basoobnu xtidx leiiga che huililajznu xtidx Jesucrist.

## 4

### *Xcälñirilajz toAbram*

<sup>1</sup> ¿Xhini'c sajc guiniinu xcuent toxtadgoldoonu, Abram? <sup>2</sup> Paru niajc toAbram bennaya nez loj Dios por redzuun ni bejn, pet sajc guibalazduxhni, per xhet nez lojdi Dios.

<sup>3</sup> ¿Xhini'c caj lo xtidx Dios? Caj rediidxre:

Huililajz toAbram xtidx Dios,

ni'c bachaag Dios cuent najcni te bennaya nez lojni.

<sup>4</sup> Meel nani rca' te bejn ni rujn te dzuun, meelga najc ni riäjñ xca'ni, xhet rcaxlia'dinini.

<sup>5</sup> Luxh nani rililajztis xtidx Dios ni ruslaa bejn lo dojl, lacuaa naani yu' xhi dzuun sajc

gunni te guibicaj xtojlni, bejn̄ga najc te beñnaya nez loj Dios, sa'csi huililajzni xtiidxni. <sup>6</sup> Sigajcza naj toDavid, chicbaa bejn̄ nani ruchaag Dios cuent najcni te beñnaya luxh di niqiiin niujnni redzuun ni caj lo leii. Räjpn̄i:

<sup>7</sup> Chicbaa renani abaslaa Dios lo xtojln̄reni, renani abiäuu loj xtojln̄reni.

<sup>8</sup> Chicbaa bejn̄ nani diru Dios gun cuent xtojln̄ni.

<sup>9</sup> ¿La sajc guiniini chicbaa rebejntis nani guyu' bee, ä? ¿La et näjdiza renani di niu' bee, ä? Sa'csi rniinu: “ToAbram gujc te beñnaya nez loj Dios sa'csi huililajzni xtidx Dios.”

<sup>10</sup> Guc bidxaag cuent najcni te beñnaya nez loj Dios ¿che gajdni chu bee, ä? O ¿Laa che guyu'ni bee? Bidxaagpac xcuentni che gajdni chu bee. <sup>11</sup> Dxejcti guyu'ni bee si'c te seen xten yäl̄naya sa'csi huililajzni xtidx Dios che gajdlini chu bee te gacni xtad guiraa renani rililajz lał ni xhet beedi yu'reni, te näjza laareni guidxaag cuent najcreni beñnaya nez loj Dios, <sup>12</sup> te gaczani xtad guiraa renani yu' bee ni huililajzza xtidx Dios si'c huililajz toAbram cheni gajdni chu bee.

### *Diidx ni bia'n Dios rsiojb xcuent yäl̄rililajz*

<sup>13</sup> Bia'n Dios diidx loj toAbram näjza loj rexagdooni, xca'ni guedxliujre si'c yäl̄nasa'c xtenni. Xhet sa'csi gusoobni xtidx leii xca'nini, sica'nini sa'csi najc toAbram te beñnaya nez loj Dios sa'csi huililajzni xtidx Dios. <sup>14</sup> Sa'csi paru renani rusoob xtidx leiiga najc nani xca' yäl̄nasa'cga, xlia'si chalilajz bejn̄ xtidx Jesucrist, luxh xhetza sajcdi diidx nani bia'n Dios loj toAbram. <sup>15</sup> Che yu' te leii, luxh yu' chu di gusoobni, dxejc rdxe'ch Dios loj bejn̄. Cadro xheti leii, xhetiza xtojln̄reni.

<sup>16</sup> Ni'cni balaslajz Dios nuunu, te sudzu'tz diidx ni bia'nni loj toAbram, te guiraa rexagdooni ni rililajz sica' yäl̄nasa'c, xhet xtebtis renani sasanäj xleii toMoisés, nägajcza renani rililajz xtidx Dios si'c huililajz toAbram, nani najc xtad guiraanu nani chalilajz xtidx Dios. <sup>17</sup> Si'cza caj lo xtidx Dios, caj rediidxre: “Abenä gaclu xtad xhidal renación̄.” Si'c bia'n Dios diidx loj toAbram, Gueb Dios nani gudeed yäl̄nabajn̄ loj rebeñgut, nani rnii xcuent recos nani gajd gac ascanu ala najcni.

<sup>18</sup> Anaj̄n toAbram naganduxh soob diidx ni bia'n Dios con laani, luxh laani empac huililajzni, ni'c gujcni xtad xhidajl nación̄, te gusojb xtidx Dios ni guniini che räjpn̄i: “Scree gac xhidajl rexagdoolu.” <sup>19</sup> Di toAbram nunij̄t xcäl̄rililajzni, mase ayu'ni tegayuu ijz, najnni anajcni beñgool, luxh sigajcza Sara abeñgool diru xi'nreni chu. <sup>20</sup> Dini niun-tio'p lajz̄ni xcuent rediidx nani bia'n Dios con laani, alga gusutijpruni huililajz̄ni xtiidxni, gulä'pni xpala'n Dios, badeedni xquixtios lojni. <sup>21</sup> Anajnni rajp Dios yäl̄rnibee te gunni guiralii nani bia'n diidx gunni. <sup>22</sup> Ni'c bachaag Dios cuent najcni te beñnaya nez lojni sa'csi huililajz̄ni xtidx Dios.

<sup>23</sup> Xhet xtebtisdi xcuent toAbram cuaj rediidxre: “Bidxaag cuent najcni te beñnaya nez loj Dios sa'csi huililajz̄ni xtidx Dios”, <sup>24</sup> näjza xcuentnu cuajni, sa'csi che chalilaaznu xtiidx nani baspañsac Xtad Jesucrist loj rebeñgut, sidxaag cuent najcnu beñnaya nez loj Dios. <sup>25</sup> Bacuaareni Jesucrist lo cruz̄ te gudijxni rextojln̄u nez loj Dios, luxh gubañsacni lo rebeñgut, te gac gacnu beñnaya nez loj Dios.

## 5

### *Xhi rsiajc bejn̄ che najcreni beñnaya nez loj Dios*

<sup>1</sup> Ni'cni che rililajz̄nu xtidx Dios rudzucaj Jesucrist xtojln̄u rajcnu beñnaya nez loj Dios, ni'cni ruscuecdxini lajznu. <sup>2</sup> Sa'csi gujt Jesucrist, sa'csi gubañsacni lo rebeñgut xcuent nuurnu, che rililajz̄nu xtidx Dios xcuent Jesucrist, rulaslajz Dios nuurnu, ni'cni rbalajz̄nu, rajpnu yäl̄nabajn̄, su'pacnu lo xcäl̄rdimbicha' Dios. <sup>3</sup> Luxh xhet ni'ctis, sajcza guibalaaznu che tednu trabajw, sa'csi najnnu trabajwga suj̄n jia'pnu pasens. <sup>4</sup> Luxh che rajpnu pasens rajcnu te beñguyajlru; che anajczanu beñguyajl, rililazsa'crunu. <sup>5</sup> Luxh

yälirililazsa'cnu dini gusanxtujy, sa'csi yälšanälajz ni rajp Dios ruchaj lastoonu sa'csi nen lastoonu rbäjz Xsprit Dxa xten Dios ni baniidxni loonu.

<sup>6</sup> Laḷ ni xhetliidi sajcdi jienu lagajc xcuentnu te guibicaj xtojḷnu, che basa' dxej biääd Jesucrist te gujtni lo cruzj xcuent rebendoḷ. <sup>7</sup> Guliipacni, naganduxh guidxälni te bejn ni xcäjb guet lacuaa te bejn ni laaca rujnni. Per sidxäjl te bejn ni xcäjb guet lacuaa te beṅsa'c. <sup>8</sup> Luxh Dios baluiloj xcälrinälajzni xcuent nuurnu sa'csi laḷ ni yugajcnu lo doḷj, gujt Jesucrist lo cruzj xcuentnu. <sup>9</sup> Aticaxh ṅaj ni najcnu beṅnaya nez loj Dios sa'csi baxhe'ni xtiejnni te gubicaj xtojḷnu, ṅaj sidedcaj gacnu xcälguxhtis Dios. <sup>10</sup> Palga laḷ ni rdxe'chnu lo Dios, basiäjlḷni lajzni xcuentnu sa'csi gujt Xi'nni lo cruzj, ṅaj ni abiäjl lajzni, suslaani nuure lo doḷj sa'csi gubansac Xi'nni loj rebengut. <sup>11</sup> Luxh xhet ni'ctis, sibalaznäjnu Dios xcuent Dad Jesucrist, sa'csi xcuentni ara'pnu yälrbedxi lajzni nez loj Dios.

### *Adán con Dad Jesucrist*

<sup>12</sup> Ni'cni, xcuent tejtis niguii biu' doḷj lo guedxliuj, luxh xcuent doḷj biäädza yälgujt, gudejdti yälgujt loj guiraa rebejn, sa'csi guiraa rebejn bejnreni doḷj. <sup>13</sup> Cheni gajd xleii toMoisés chu lo guedxliujre, alabejn rebejn doḷj, per di niajcdi nucuaquijni rebejn sa'csi xheti leii. <sup>14</sup> Luxh empac gujt rebejn nen redxej ni gubajṅ toAdán hasta redxej ni gubajṅ toMoisés, mase direni niujṅ lagajc doḷj nani bejn toAdán; luxh ruluiloj yu' chu stee bejn nungäjl jiääd.

<sup>15</sup> Luxh nani runidx-xlia' Dios dini gac si'c najc xtojḷ toAdán. Dini gac si'c sa'csi palga xcuent doḷj ni bejn toAdán, gujt xhidalduxh bejn, cuantimaaz ṅaj sunidx-xlia' Dios yälṅabajṅ par tejpas loonu por xcälṅulasajz Dios, nāgajc por xcälṅulasajz Dad nani laa Jesucrist. <sup>16</sup> Luxh nani runidx-xlia' Dios loonu dini gac si'c yälrunijṅ ni biääd loonu xcuent doḷj ni bejn toAdán; sa'csi xcuent tejtis doḷjga biääd yälguxhtis xten Dios, sa'csi guiraliiza rebejn guedxliujre yu' lo doḷj, per xcuent nani banidx-xlia' Dios, nalajznu, gujt Xi'nni Jesucrist lo cruzj, ni'c gujc sa'csi yuduxhtej doḷj, te xcuent ni bejn Jesucrist sajcdi gac bejn beṅnaya nez loj Dios. <sup>17</sup> Palga xcuent doḷj ni bejn tejsi bejṅga gunibee yälgujt lo guiraa bejn, cuantimaaz lo yälṅabajṅ par tejpas sinibee guiraa reni rca' xcälṅulasajz Jesucrist nājza renani rcaxlia' lojṅi yälṅacnaya nez loj Dios.

<sup>18</sup> Ni'cni sigajc ni biääd yälguxhtis lo guiraa rebejn guedxliuj xcuent doḷj ni bejn tejsi niguii, sigajcza sa'csi basoob stee niguii xtidx Dios, xhidald bejn gujc beṅnaya nez loj Dios, cua'reni yälṅabajṅ par tejpas. <sup>19</sup> Nalajznu sigajc ni baniṅj xhidalduxh bejn nez loj Dios xcuent tej niguii ni di nusoob xtidx Dios, sigajcza xhidalduxh bejn sajcdi beṅnaya nez loj Dios xcuent tej niguii ni basoob xtiidx Dios. <sup>20</sup> Ni'cni badeed Dios xleii toMoisés, te guzenru doḷj. Niluxh cadro guyuduxh doḷj, ro'c nanabza chuduxhru xcälṅulasajzduch Dios, <sup>21</sup> te sigajc ni gunibee doḷj guyu' yälgujt, sigajcza guinibeeru xcälṅulasajz Dios te jia'cnu beṅnaya nez loj Dios, te xca'nu yälṅabajṅ par tejpas xcuent Xi'nni, Dad Jesucrist.

## 6

### *Agujtnu lo doḷj per nabannäjnu Jesucrist*

<sup>1</sup> ¿Xhini'c guiniinu, ṅaj? ¿La sajcdi guidxunrunu lo doḷj te tioobru xcälṅulasajz Dios, ä? <sup>2</sup> ¿Gurniälojtu gacni si'c! Nuurnu najcnu si'c te beṅgut lo doḷj sa'csi rililajznu xtidx Dios; ¿xhoxh gac guibajṅrunu lo doḷj? <sup>3</sup> ¿La ditu gan, che gurobnisnu con laj Jesucrist, najcni si'c ni nājza nuurnu gujtnu si'c ni gujt Jesucrist? <sup>4</sup> Sa'csi che gurobnisnu bigatznäjnuni si'c lo yälgujt, te sigajcni huäjs Jesucrist lo yälgujt xcuent xcälṅnibee Dios, sigajcza nāj nuurnu sajcdi guidxunnu lo te yälṅabaṅcoob.

<sup>5</sup> Sa'csi palga gujcnu tejsi con laani lo xcälgujtni che birobnisnu, sigajcza sajcdi tejsi con laani lo yälṅabansac lo rebengut. <sup>6</sup> Ni'cni xcärienbiejwnu cuaj lo cruzj con laani, te badzucajni rextojḷnu, te di gacdiru guinibee doḷj loonu. <sup>7</sup> Sa'csi nani agujt, di gacdiru



guinibee dojl lojni. <sup>8</sup> Palga nuurnu agujtnu con Jesucrist, rililaaznu sibansaczanu con laani. <sup>9</sup> Sa'csi nadonpacnu gubansac Jesucrist loj rebengut, ni'c diruni guet, diru yalgujt ga'p yalrnibee lojni. <sup>10</sup> Che gujt Jesucrist, gujtni xcuent dojl, luxh diru gacdi guinibee dojl laani par tejpas; naj ni gubansacni, nabajnni nez loj Dios. <sup>11</sup> Ni'cni la'tu colguchaag cuent najctu si'c te bengut lo dojl, luxh nez loj Dios, colguchaag cuent nabannajtu Jesucrist.

<sup>12</sup> Ni'cni na'c gusaantu guinibee dojl tiejxhtu te guntu si'ctis ni rlanj tiejxhtu. <sup>13</sup> Na'cruza gusaantu jiajb guideb lagaa tiejxhtu lo dojl te guntu cosguijdx. Maazru hueen colgudeed tiejxhtu lo Dios si'c te bejn nani gubansac lo rebengut, najza colgudeed guideb lagaa tiejxhtu te guntu recoshueen si'c ni rlanj Dios guntu. <sup>14</sup> Sa'csi diru dojl guinibee lojtu, sa'csi dirutu chu loj xleii toMoisés, sa'csi yu'tu lo xcäl'rulaslajz Dios.

### *La'tu najc si'c remos*

<sup>15</sup> ¿Xho gacni naj? ¿La sajc jienrunu dojl naj ni dirunu chu lo leii sa'csi yu'nu lo xcäl'rulaslajz Dios, ä? ¿Xho gacni si'c! <sup>16</sup> La'tu nansa'ctu palga yu'tu si'c te mos loj te lam te gusobdiajgtu xtiidxni, najcactu xmos bejn nani rusoobtu xtiidxni. Ni'cni, palga gusoobtu xtidx dojl, ni'c najc xlamtu, ni'c siädnä yalgujt lojtu. Palga gusoobtu xtidx Dios, ni'c najc xlamtu. Dxejc sajctu bejnaya nez loj Dios. <sup>17</sup> Xquixtios lo Dios, galoo gujctu xmos dojl, per naj guideb lastootu basobdiajgtu xtidxcoob Dios, huililajztu xtiidxni ni basule'nu lojtu. <sup>18</sup> Luxh agulaatu lo dojl, biädjiajctu xmos Dios lo dzunsa'c. <sup>19</sup> Narä cagusule'ä diidx con sa' didx guyasire sa'csi gajdtu gacbesa'c xho najc xnezyuj Dios. Che gujctu xmos dojl, guideb lagaatu bejntu dojl, bejntu latsiaj, luxh ni'c satajltis latsiaj ni bejntu. Naj ni najctu xmos Dios lo dzunsa'c, guideb lagaatu colyejnru dzunsa'c, te si'c sidajlru dzunsa'c ni guntu sa'csi najctu bejnaya nez loj Dios.

<sup>20</sup> Sa'csi che gujctu xmos dojl, di rextidx Dios guinibee la'tu. <sup>21</sup> Naja', ¿xhini'c bejntu gaan che gujctu xmos dojl, bejntu recos ni rtuinajtu naj? Ni xnezyuj recosga rdzujn loj yalgujttis. <sup>22</sup> Per naj, sa'csi agulaatu lo dojl, abiu'tu najctu xmos Dios, sujntu sajctu bejnaya nez loj Dios, luxh xnezyuj recoscoobre rdzujn lo yalnabannaj Dios par tejpas. <sup>23</sup> Xcäl'rajx xten dojl najc yalgujt, per nani runidx-xlia' Dios najc xcäl'nabannaj Dios par tejpas xcuent ni bejn Jesucrist xtadnu.

## 7

### *Yäl'rului ni rudeed yalguchnaa*

<sup>1</sup> Caniä lojtu ni najn xleii toMoisés. ¿La ditu gan, resa'ä, xleii toMoisés rnibee loj te bejn guideb nabajnni lo guedxlijre? <sup>2</sup> Najcni si'c te gunaa nani bachnaa te niguii. Nanabpac cuäznajni chäälni guideb nabajnni. Si'c rnibee leiiga. Palga guet chäälni, diru gacdi guinibee leiiga lojni xcuent chäälni. <sup>3</sup> Ni'cni, laj ni nabajn chäälni gunaaga, palga cuäznaj gunaaga ste'ca niguii, cayujnni dojl sirilajni gunaguijdx. Palga agujt chäälni gunaaga, agulaani lo leiiga, sajc guchnaani stee niguii, xhet dojldi cayujnni, dizani guirilaj gunaguijdx.

<sup>4</sup> Ni'cni la'tu, rebetzä, sigajcza agulaatu lo leiiga, sa'csi najcni si'cni gujctu si'c bengut lo leii che gujt Jesucrist lo cruzj, te naj sajc jiu'tu lo ste'ca bejn, loj lagajc Jesucrist nani gubansac loj rebengut te sajc jienu redzunsa'c ni rlanj Dios jienu. <sup>5</sup> Sa'csi laj ni gubajnnu lo yalnabanbiejwga, lagajc rediidx nani rnii leiiga di gacdi gun bejn, lagajc recosga rlanj gun tiejxhnu, luxh si'c sozaatisnu lo xnezyuj yalgujt. <sup>6</sup> Naj abiriinu lo leiiga, sa'csi agujtnu lo leiiga nani gunibee loonu galoo. Naj con xpitcoob ni yu' nen lastoonu yu'nu lo Dios, xhet con xcärienbiejwdi ni gojpnu che nanab gusoobpacnu leii.

### *Redojl nani yu' tiexhä*

<sup>7</sup> ¿Xhixhni'c guiniinu naj? ¿La dojl najc leii, ä? ¿Xho gacni si'c! Palga dina niembeä xhi caj lo leiiga, dizana niacheä cayunä dojl. Dina niacheä cayunä dojl che rlazä xca'a xhixten ste'ca bejn palga dina niolä lo leii rediidxre: "Na'c chuguij lajzlu rexhixten bejn." <sup>8</sup> Ni'cni



lagajc diidx ni caj lo leiiga bejn guyuguij lazä rexhixten bejn sa'csi nancheä najcni dojl. Paru xheti leii, xhetiza dojl, agujtni. <sup>9</sup> Galoo gubanä xhet leiidi nanä, luxh che biääd diidx ni rnibee leii, gucbeä xhini'c najc dojl, dxejc banitä lo Dios, si'c ni gutä. <sup>10</sup> Luxh baxhal Dios leiiga loonu te jiuäni, te xca'ä yäl**n**abajn, luxh alga bazeñni benä dojl, banitä nez loj Dios, gutäti dxejc. <sup>11</sup> Con leiiga, basguee dojl narä, bejn ni narä si'c te bengut nez loj Dios.

<sup>12</sup> Ni'cni, leii najc dxan, näjza rediidx ni caj lo leiiga najc dxan; hueen najcni, didxgulii najcni. <sup>13</sup> ¿Dxejca? ¿La nani najc te coshueen huinä narä lo yälgujt, ä? ¡Xho gacni si'c! Dojl najc ni huinä narä lo yälgujt. Te si'c xcuent leiiga ni nasa'c, jienlojni dojl pac najc dojl sa'csi bagu'tni narä con te coshueen, te lagajc rediidx ni caj lo leiiga jienloj lacti latsiaj najc dojl.

<sup>14</sup> Sa'csi nadonnu leiiga najc xtidx Dios, luxh narä nacä te beñ guedxliujre, nacä xmospac dojl. <sup>15</sup> Sa'csi dina gacheä xhini'c runä. Dina gunä recos nani rlazä gunä, alga cayunä latsiaj nani dipacna rlazä gunä. <sup>16</sup> Naj palga narä runä latsiaj nani dipacna rlazä gunä, lagajc za ni'c ruluii hueenca najc leii. <sup>17</sup> Naj, diruni gac narä ni cayujn latsiaj, sa'csi yu' dojl neñ lastoä, ni'c ni cayujn runä latsiaj. <sup>18</sup> Sa'csi narä nanä neñ lastoä, nalajznu lo tiexhä, xhetliidi cossa'c di yu'; sa'csi rlazä gunä cossa'c, per dina gac dipä te gunä pac recossa'cga. <sup>19</sup> Sa'csi dina gunä redzunsä'c nani rlazä gunä, alga latsiaj nani diru rlazä gunä, ni'c runä. <sup>20</sup> Ni'cni palga runä latsiaj nani diru rlazä gunä, xhet narä di runäni, dojl ni yu' tiexhä, ni'c ni cayujn runä latsiaj.

<sup>21</sup> Ni'cni narä, nani rlazä gunä redzunsä'c, rdxälä leiire: yu'pa dojl tiexhä. <sup>22</sup> Sa'csi neñ lastoä, rlazä pac gusobä diidx xten xleii Dios. <sup>23</sup> Luxh ruhüiä garenca leii yu' guideb lagaa tiexhä, ruchagdi jni leii ni yu' xcärienä, rutedzani narä ladzña xleii dojl nani yu' guideb lagaa tiexhä.

<sup>24</sup> ¡Proobza narä! ¿Chuni'c guslaa tiexhä ni nungäj j guet xcuent dojl? <sup>25</sup> ¡Xquixtios loj Dios sa'csi Dad Jesucrist sajc guslaa nuurnu lo dojl! Ni'cni con xcärienä rusobä xtiidx Dios, yu'ä lo xleii Dios, niluxh tiexhä rlazj gusoob xtiidx dojl, chuni lo xleii dojl.

## 8

### *Yäl**n**abajn ni najc xcuent Sprit Dxan xten Dios*

<sup>1</sup> Ni'cni naj rut rajc di rbe'c xcälquij renani ahuililajz xtidx Jesucrist, renani diru jiu gunreni latsiaj ni rlazj gun tiejxhreni, alga riurureni rujnreni ni rnibee Sprit Dxan xten Dios ni rbäjz neñ lastooreni. <sup>2</sup> Sa'csi leii xten Sprit Dxan xten Dios ni rudeed yäl**n**abajn xcuent Jesucrist, abaslaani narä lo yäl**n**ibee xten xleii dojl näjza yälgujt. <sup>3</sup> Sa'csi nani di niajcdi niujn leibiejw, sa'csi dini niajcdi nadip lo rebenguedxliuj te gacreni beñnaya nez loj Dios, ni'c bejn Dios che baxhal ni Xi'nni Jesucrist, si'c te beñ guedxliujre xcuent dojl, te bejn ni yälgujxtis lo dojl ni rnibee tiejxh bejn. <sup>4</sup> Te si'c gac xcälgujxtis xten leibiejw lo tiejxh nuurnu, renani dirunu gusoob nani rlazj gun tiejxhnu, sa'csi naj rbajñnu si'c ni rnibee Sprit Dxan xten Dios ni yu' neñ lastoonu.

<sup>5</sup> Sa'csi renani rusoobtis nani rlazj gun tiejxhreni, rujntisreni xhigab xcuent redojlga, luxh renani rusoob xtidx Sprit Dxan xten Dios rujntisreni xhigab xcuent nani rlazj Dios gunreni. <sup>6</sup> Sa'csi renani yu'tis yejcreni nani rlazj gun tiejxhreni, sejtreni, sinijtreni; luxh renani yu'tis yejcreni nani rnii Sprit Dxan Dios, reni'c sibecdxi lajzreni, sica'reni yäl**n**abajn lo Dios par tejpas. <sup>7</sup> Te xcäriejn nani riutis ni rlazj gun tiejxh bejn rdxe'ch Dios lojni sa'csi dini gusoob xleii Dios, luxh nicla gac gunnini. <sup>8</sup> Renani nabajntis te gunreni latsiaj ni rlazj gun tiejxhreni di Dios guibalaznäjreni.

<sup>9</sup> Luxh la'tu dirutu gun si'ctis ni rlazj gun tiejxhtu, ni'cni rujntu si'c ni rlazj Sprit Dxan xten Dios guntu, palga rbäjz ni neñ lastootu. Palga yu' chu tejtü ni di Sprit Dxan cuääz neñ lastooni, di ni'c gac xpejñni. <sup>10</sup> Palga rbäjz Jesucrist neñ lastootu, agujt tiejxhtu xcuent dojl, xprittu nabajn sa'csi anajctu beñnaya nez loj Dios. <sup>11</sup> Luxh palga neñ lastootu rbäjz Sprit xten nani baspañsac Jesucrist loj rebengut, lagajc nani baspañsac Jesucrist

lo rebengut suspañsac tiexhnu ni nabajn lo guedxliujre xcuent Xpřitni nani yu' nen lastoonu.

<sup>12</sup> Ni'cni rebetzä, najcnu bejn ni cuaj di'n, xhet lojdi tiexhnu te jiennu si'c ni rlanj gun tiexhnu. <sup>13</sup> Sa'csi palga cayujntu si'c ni rlanjtis gun tiejxhtu, sejtpactu. Palga nabajntu xcuent Sprıt Dıan xten Dıos ni rbäjz nen lastootu, sibälaztu latsıaj ni rlanj gun tiejxhtu, sibannäjtu Dıos par tejpas.

<sup>14</sup> Sa'csi guiraa renani rulıı Sprıt Dıan xten Dıos guiraa reni'c najc rexi'n Dıos. <sup>15</sup> Naj ditu nica' te sprıt xten te mos te chusactu lo yälrdxejb, alga cua'tu sprıt xten ni najc si'c te bisiäjb ni cua' bejn si'c xi'npacni, naj najcnu xi'nni, ni'cni sajc gäbnu lojni: “Guejblu, Xtadä.” <sup>16</sup> Sa'csi lagajc Sprıt Dıan xten Dıos rulıı loj xpřitnu, najcpacnu xi'n Dıos. <sup>17</sup> Luxh palga najcnu rexi'nni, sica'zanu yälñasa'c lo Dıos, tejsi yälñasa'c con Dad Jesucrist, palga guliini tednu lagajc trabajw ni gudejdni xcuent xtiidxni, te tejsiza siliä'p xpala'nnu con laani.

<sup>18</sup> Sa'csi narä runä xhigab retrabajw ni cadejdnu nen redxejre, digacdi gun tebloonureni con yälrdimbicha' nani churu guihuiinu. <sup>19</sup> Sa'csi guiraa recos nani benchee Dıos lo guedxliujre, cabäjzreni, yuduxhreni gaan fiireni dxej che guluıloj Dıos chuni'c najc rexi'nni. <sup>20</sup> Guiraa recos ni gulecxtiej Dıos lo guedxliujre, xlia'si gujcreni, xhet sa'csi si'c rlanjdi recosga, per sa'csi si'c bejn Dıos, ni cabäjztis <sup>21</sup> guslaapacni guiraa recos ni bencheeni lo guedxliujre lo xcälñabee yälgujt, yälñitloj, te dxejc sajc jiu'ni lo yälrbedxi xten xcälrdimbicha' xten rexi'n Dıos. <sup>22</sup> Guiraa recos ni gulecxtiej Dıos lo guedxliujre entis roonreni, guira dxej rdejreni trabajw, si'c rdej te gunaa trabajw che rajl xi'nni. <sup>23</sup> Luxh xhet nani tre'tis lo guedxliujdi, näjza nuunu ni yu' Sprıt Dıan xten Dıos nen lastoonu, roonzanu cabääznu dxej cheni xca' Dıos nuure si'c rexi'nni, cheni guscoobzani tiexhnu. <sup>24</sup> Sa'csi xcälñililaaznu ni rbääznu, ni'c bejn gulaanu luxh yälrbäjz ni guyasi rien, di ni'c gac yälrbäjz, sa'csi ¿chu laa ni cuääz xcuent te cos ni ala bahuiini? <sup>25</sup> Palga cabääznu xcuent te cos ni gajdnu guihuii, rbaali laaznu, rsiudzu'tznu rbäjznu guihuiinu gacni.

<sup>26</sup> Sigajcza racnäj Sprıt Dıan xten Dıos nuure cadre xheti yälrutıj laaznu sa'csi nicla guidonnu xho mood riäjł guiniab bejn lo Dıos. Luxh lagajc Sprıt Dıan ni yu' lastoonu rniabni lo Dıos xcuent nuure con yälrbedxnen nani nicla gajd bejn gäb con diidx xho najcni. <sup>27</sup> Dıos, nani rula'tz lastoonu, nanchee xhini'c rniab Sprıt Dıan xtenni xcuent nuurnu, sa'csi rniabni si'cpac ni rlanj Dıos guiniabnu xcuent rexejnpac Dıos.

### *Siennu gaanpac loj guira'ti*

<sup>28</sup> Nadoncheenu guira'ti ni rsıajc rebejn ni sanälajz Dıos, reni agule Dıos te gunreni xtzuunni rsıajc renini te gun Dıos gac recosga par xcälñasa'ceni. <sup>29</sup> Sa'csi renani biembec Dıos galooli, reni'c gule Dıos cheni gajdli guırixtiej guedxliujre, te gaceni si'c ni najc Xi'nni; te gacza Xi'nni ganid loj guiraa ni najc famil xten Dıos. <sup>30</sup> Renani guleni galooli, reni'c gurejdxni; renani gurejdxni, bejnzani najceni beñnaya nez loj Dıos; renani bejnni najceni beñnaya nez loj Dıos, gulä'pzani xpala'nreni.

<sup>31</sup> ¿Xhixhni'c guiniinu xcuent dee? Palga yu' Dıos xlaadnu, ¿chuxh ni'c najc ni gun gaan loonu? <sup>32</sup> Dıos nani di nudxojn Xi'nni, nani cuäjb cuaj Xi'nni lo cruz te gujtni, te gudıjxni xcuent xtojłnu, ¿xho dini gunııdx loonu xcuent Xi'nni guira'ti nani rquiınnu, ä? <sup>33</sup> ¿Chuni'c sajc cue'c xhi xcälñııj reni agule Dıos nez lo Dıos, ä? Ni lagajc Dıos najc nani rniı najcnu beñnaya nez lojni. <sup>34</sup> ¿Chuni'c najc nani cue'c xhi xcälñııjnu nez lo Dıos? Jesucrist najc nani gujt por nuure, luxh et ni'ctis. Laani gubanısaczani loj rebengujt, luxh naj sobga'ni xladbee Dıos cadre rñibeeni; laazani cabejdx canabni lo Dıos xcuentnu. <sup>35</sup> ¿Chuni'c sajc gudzucaj nuurnu lo yälñanälajz xten Jesucrist: trabajw, o yälñııııı, o yälñııııı, o yälñııııı, o yälñııııı, o te spaad, ä? Nicla tejni. <sup>36</sup> Si'c ni caj lo guıjtz ni caj xtıdx Dıos: Xcuentlu, sa'csi najcnu xpejñlu caye'tnu guıxe-guıxee. Ruchaagreni cuent najcnu si'c xiil ni aguro' te ju't bejñni.

<sup>37</sup> Luxh loj guiraa recosre, sujnpacnu gaan xcuent nani sanälajz nuure, sa'csi sacnäjpacni nuure. <sup>38</sup> Sa'csi anancheä nicla yälgujt, niclza yälñabajñ, nicla rexangl Dios, niclaza renani rnibee, nicla recos ni yu' naj, niclaza recos nani churu gac, niclaza yälñmilaagwr, <sup>39</sup> nicla jiaroduxh, niclaza jiäjt pac, niclaza xhitis cos ni guc-chee, nicla tej redee di gacdi gudzucaj nuurnu lo xcälñsanälajz Dios, yälñsanälajz ni rajpza Dad, Jesucrist.

## 9

### *Dios agule rebeñ Israel*

<sup>1</sup> Caniä didxguliipac lojtu sa'csi rililazä xtidx Jesucrist. Dina guiniä didx-xhii. Sprit Dxañ xten Dios caguluii xcärienä laaca rniä; <sup>2</sup> cayac-huinduxh lastoä, sanuutis yälñliajsga. <sup>3</sup> Sa'csi narä rlazä malaii sajc lagajc narä nitloä lo Dios te sajc gacnää resa'ä lo guedxliujre, rexpejñ Israel. <sup>4</sup> Sa'csi laareni najc xagdoo toIsrael, luxh laareni nungäjñ gacreni si'c xi'npac Dios. Gubaññäj Diosreni. Bia'n Dios didx con laareni. Basa'n Dios xleii Moisés lojreni. Bazuxhijbreni nez lo Dios neñ guidoo. Sica'reni reyälñnasa'c xten Dios palga jiureni xtiidxni. <sup>5</sup> Laareni najc rexagdoo xten toxtadgoldoonu ni gubajñ agujc xhero. Jesucrist gujca xagdoo xten toIsrael che gojñni si'c te beñ guedxliuj. Laani najczani Dios loj guiraanu. Suchä'p xpala'nni par tejjpas. Sugacni si'c.

<sup>6</sup> Luxh dini gac si'cni abanijt xtidx Dios nani bia'nni loj toIsrael. Sa'csi xhet guiraadi rebeññ ni najc xagdoo toIsrael najc xpejñ pac Israel. <sup>7</sup> Diza guiraa reni najc rexagdoo toAbram gac xi'nguliipacni sa'csi räjp Dios lo toAbram: “Rexagdodoolu nani guigab najc reni gac xagdoo Isaac.” <sup>8</sup> Ni'cni xhet guiraadi rexagdoo toAbram najc rexi'n Dios, xtebtis renani chalilajz xtiidxni, reni'c najc xi'nni. <sup>9</sup> Sa'csi bia'n Dios diidx loj toAbram: “Stebijz, lagajc bäiire guibisacä, te dxejc chu te xi'n Sara.”

<sup>10</sup> Xhet diidxtisga gunii Dios. Guniizani lo toRebeca, che nuxi'nni cua'ch, xi'n chäälñni, toxtadgoolnu Isaac. <sup>11</sup> Ni'cni ansde gaal rexi'nni, ansde niujñreni te dzunsa'c o te dzunguijdx, te soobpac xtidx Dios xcuent chuni'c cueni lo guiro'p rebäzre, xhet sa'csi bejñdireni dzunsa'c, per sa'csi agule Diosni, <sup>12</sup> ni'c räjp Dios lo toRebeca: “Xingangaloolu gac xmos xinhuinlu.” <sup>13</sup> Si'cza caj lo guijt rediidxre: “Sanälazä Jacob, niluxh bidxechnää Esau.”

<sup>14</sup> ¿Xhini'c guiniinu naj? ¿Xhet laadi rujñ Dios, ä? ¿Xho gacni si'c! <sup>15</sup> Sa'csi räjp Dios loj toMoisés: “Sulaslazä chutis bejñ nani rlazä gulaslazä, sacnää chutis bejñ nani rlazä gacnää.” <sup>16</sup> Ni'cni dini gac xcuent ni rlaz rebeññ gac, dizani gac xcuent nani rujñ rebeññ. Rajctisni si'c rlaz Dios nani rulaslaz bejñ. <sup>17</sup> Ni'cni caj lo guijt xten Dios che gunii Dios xcuent Faraón: “Narä benä gujclu reii xten Egipto te guluiloj xcälñrñibeä, te guiliä'p bejñ xpala'nä guideb guedxliujre.” <sup>18</sup> Rulaslazñni rebeññ nani rlazctisni, runnadipzani lastoo bejñ nani rlazctisni.

<sup>19</sup> Naj la'tu siniitu loä: “¿Xhicuent rucuaquijni bejñ? ¿Chuni'c sajc sudzu'tz nez loj nani rlazñni gac, ä?” <sup>20</sup> ¿Chuxh luj, beñ guedxliuj, te jieinäjñ Dios? Xhixh säjb te gues loj nani bencheeni: “¿Xhicuent bejñlu narä scree?” <sup>21</sup> Gurniälojñlu. Bejñ nani runchee guejs, ¿la di gacdi gunni si'ctisni rlazñni con bajñga, ä? ¿La di gacdi guncheeni te guesa'c nägajca te guesyuj ni xhet sirbdi con lagajc bajñga?

<sup>22</sup> ¿Xhiru najc, palga Dios rlazñni guluilojñni xho rujñni yälñguxhtis, näjza rlazñni guluilojñni xcälñrñibeeni, gopñajñni pasens renani nungäjñ gac yälñguxhtis, te nitlojzaren, ä? <sup>23</sup> Bejñni si'c te guluilojñni lacti sajc xcälñrdimbicha'ni loj renani galooli guleni chú lojñni lo xcälñrdimbicha'ni. <sup>24</sup> Lagajc nuurnu najcnu reni aguleni; xhet xtebtis loj rexpeñ Israel guleni nuurnu, näjza loj rebeññ ni di gac rexpeñ Israel guleni nuurnu. <sup>25</sup> Cajza lo guijt ni bacuaa Oseas:

Renani di gac xpeñä, reni'c cuälää “xpeñä”.

Luxh nani dina ninälazä, sinälazäni.

<sup>26</sup> Dxejcti lagajc cadre räjpreni lojreni:

“Ditu gac rexpənä”,  
lagajc ro'c säjpreni lojreni:  
“La'tu najctu xi'n Dios ni nabajn par tejpas.”

<sup>27</sup> Cajza lo guiitz ni bacuaa Isaías: “Mase najc xhidajl rexpən Israel si'c najc yujxh ni tre' ro' nisdoo, guxii gac reni laa lo dojl. <sup>28</sup> Sa'csi susoobpac Dad, Dios xtiidxni xcuent xcälguxhtis reben guedxliuj, luxh siojbza gunnini.” <sup>29</sup> Guniiza Isaías, xcuent nani churu gac, bacuaani:

Palga di Dios ni yu' xhaguibaa nusa'n gaii xagdoo reben tiemp,  
niajcnu si'c gujc Sodoma näjza Gomorra, reguejdx ni gunitloj.

### *Xtidx Dios näj rexpən Israel*

<sup>30</sup> ¿Xhini'c sajc guiniinu naj? Rebejn nani di gac xpen Israel, direni niguiil xho gacreni beñnaya nez loj Dios, niluxh agujcreni beñnaya nez loj Dios sa'csi huililajzreni xtidx Jesucrist. <sup>31</sup> Luxh rexpən Israel, mase sanuutisreni lo xleii Moisés ni ruluii xho gac bejn beñnaya nez loj Dios, banijtreni, direni niujn gaan nusoobreni guideb leiiga. <sup>32</sup> ¿Xhicuent gujcn si'c? Sa'csi direni nililajz xtidx Dios, alga rlanjreni guntisreni dzuun xten leii, naareni si'c gacreni beñnaya nez lo Dios. Ni'cni gulaj ni'reni lo guij ni rutienta' bejn, nalajznu direni nililajz xtidx Dios xcuent Jesucrist. <sup>33</sup> Si'cza bacuaa Isaías, räjpni: Aguleä te bejn lo guedx Sión ni gac si'c te guij cadro rtiäjł ni' bejn, te guij ni rusälta' bejn.

Chutis tej nani chalilajz xtiidxni, dini jianxtujy.

## 10

<sup>1</sup> Rebetzä, rlazduxhä chalilajz rexpənä xtidx Dios. Rniabduxhä lo Dios te guslaanireni lo xtojłreni. <sup>2</sup> Narä rniäpac nancheä ruzuxhijb rexpən Israel lo Dios, niluxh direni gumbesa'c xhini'c rlanj Dios gunreni. <sup>3</sup> Sa'csi direni niacbee xcuent xho rajc te bejn te beñnaya nez loj Dios, ni'c rlanjreni gunreni dzuun si'c ni caj lo leii te gacreni beñnaya nez loj Dios, ni'cza direni nusoob xtidx Dios te gacreni beñnaya nez lojni. <sup>4</sup> Abasoob Jesucrist xtidx Leii, ni'cni che chalilajz bejn xtidx Jesucrist, anajcreni beñnaya nez loj Dios.

<sup>5</sup> ToMoisés bacuaa rediidxre: “Chutis ni rlanj gac beñnaya nez loj Dios sa'csi rusoobni xtidx leii, nanab gusobsa'cpacni diidxga guideb nabajłni lo guedxliujre.” <sup>6</sup> Xcälñayareni nez loj Dios sa'csi rililajzreni xtidx Jesucrist, rnii scree: “Na'c guiniitu neñ lastootu, ¿chuni'c chä'p xhaguibaa?” nalajznu, te jädnäsacni Jesucrist loj guedxliuj. <sup>7</sup> Na'cza gäbni: “¿Chuni'c jäjt gabijł?” (nalajznu te chaxiini Jesucrist loj rebengut). <sup>8</sup> ¿Xhini'c rniini naj? Rniini: “Diidxga suga' gajxh ro'tu, neñ lastootu.” Nalajznu, diidx xcuent yälřililaaz nani cagusule'nu lojtu. <sup>9</sup> Rniinu lojtu, palga guiniitu con ro'tu, Jesucrist najc Dad loonu, palga chalilajztu baspañsac Dios Jesucrist loj rebengut, suslaani la'tu lo dojl. <sup>10</sup> Sa'csi con lastooni rililajz biniet xtiidxni, ni'c rajcni beñnaya nez loj Dios; luxh che rcäjpza biniet con ro'ni, Jesucrist rnibee loonu, ruslaa Diosni lo dojl.

<sup>11</sup> Sa'csi rnii xtidx Dios scree: “Chutis ni rililajz xtidx Dad Jesucrist, dini jianxtujy.” <sup>12</sup> Sa'csi guiraa rebejn najc tebloj nez lojni, rexpejn Israel sigajc rebenzajt, sa'csi lagajc laani najcni Dad lo guiraareni, rulaslazduxhni guiraa renani rbedx-rniab lojni. <sup>13</sup> Lo xtidx Dios caj rediidxre: “Chutis ni rbedx-rniab lo Dad, siliaani lo xtojłni palga rililajzni xtidx Dios.” <sup>14</sup> ¿Xho gac guiniabreni lo Dad, palga direni chalilajz xtiidxni? ¿Xho gacza chalilajzreni xtiidxni, palga gajd diajgreni jiejn xtiidxni? ¿Luxh xho jiejn diajgreni xtiidxni palga rut rusule'di diidxga lojreni, ä? <sup>15</sup> Luxh ¿xhoza gusule'reni diidxga palga rut guxhalđireni? Si'cni caj lo guiitz: “Chipza saru najc ni' renani riädnä diidx xcuent cossa'c, yälřbecdxi lajz rebejn.”

<sup>16</sup> Xhet guiraadireni rusoob xtiidxni, sa'csi guniiza toIsaías: “Dad, ¿chuni'c chalilajz xtiidxnu?” <sup>17</sup> Rililajz bejn xtidx Dios che rucua diajgreni diidxga; rucua diajzaren che yu' chu rusule' xtidx Jesucrist.



<sup>18</sup> Naj arniä: Gajdpac diajgreni jiejn xtiidxni, o ¿la babiejn diajgreni, ä? Pues abiejn diajgreni, sa'csi lo xtidx Dios caj scree:

Abire'ch xse'reni guideb guedxliuj,

abidzujnza rextiidxreni lo guiraa reguejdx ni tre' lo guedxliujre.

<sup>19</sup> Rniäza: Dipac rexpén Israel niacbee, o ¿la gucbeereni, ä? Galooli gunii toMoisés rediidxre:

Sunä gudxojntu xcuent rebejn ni di gac te guejdx,

con te guejdx nani di gacbee suche'chä la'tu.

<sup>20</sup> Diza toIsaías nidxejb guniini rediidxre:

Renani di niguuil narä, bidxäjl narä,

baluiloäza loj renani di niniabdiidx narä.

<sup>21</sup> Guniiza toIsaías xcuent rexpén Israel:

Desde galooli, dxej-yääl basgää ñaä lo rebejnğa te niureni xtidxä,

luxh najcreni bejn ni di gusoob diidx, rutzu'reni didxnaj.

## 11

### *Rexpén Israel nani gulaa lo dojl*

<sup>1</sup> Arniä: ¿La agulälaz Dios rexpén Israel, ä? ¡Xho gacni si'c! Ni lagajc narä nacä te xpen

Israel, te xagdoo toAbram, nadxagä lo resa' toBenjamín. <sup>2</sup> Di Dios nibälaz rexpejnni,

xpen Israel nani guleni galooli che gajdli guirixtiej guedxliuj. O ¿la dilu gacbee xhi

caj lo xtidx Dios cadre rnii xcuent Elías, xho gunabduxh Elías didxnaj lo Dios xcuent

rexpén Israel, ä? Räjpnii scree: <sup>3</sup> “Dad, abagu'treni guiraa reniguii nani gunii xtiidxlu,

abatzujlreni rexquidoolu, xtebtis narä bia'nä, luxh naj rlanjreni ju'treni narä.” <sup>4</sup> Luxh,

¿xhini'c räjp Dios lojni? Räjpnii: “Abaluheä gajdz mił bejn nani gajd guzuxhijb nez loj

Baal.” <sup>5</sup> Si'cza naj, abia'n te chinae' rexpén Israel nani agule Dios xcuent xcälruulasajzni.

<sup>6</sup> Dxejc palga ruslaani nuure lo dojl xcuent xcälruulasajzni diruni gac sa'csi yu' xhi dzuun

biennu te nuslaani nuure lo dojl. Paru si'c najcni diru xcälruulasajz Dios gac yälruulasajz.

<sup>7</sup> ¿Dxejca'? Di rexpén Israel nidxäl nani caguuilreni, luxh rebejn nani agule Dios, ni'c

bidxälni, luxh ste cuaareni, aguyalajzreni. <sup>8</sup> Gujcnii si'c caj lo xtidx Dios:

Bascäy Dios xcäriejnreni, näjza balojni di jien,

lo dxe najli di diajgreni jiejn.

<sup>9</sup> Guniiza toDavid, scree caj lo xtidx Dios:

Sugun xmex lanijreni jiajbreni,

te gac guiga'reni,

sugacni si'c guij ni rulani' bejn, te gacreni yälguxhtis.

<sup>10</sup> Suguscäy Dios balojreni te na'c fisa'creni,

sujie't dejtzenii, sutedreni trabajwduxh par tejpas.

### *Yälruslaa lo dojl xten bejn ni di gac xpen Israel*

<sup>11</sup> Naj rniabdiidxä: ¿La biajb rexpén Israel te gunijtreni par tejpas, ä? ¡Xho gacni si'c!

Sa'csi biajb rexpejn Israel, ni'cni gojl biääd yälruslaa lo dojl lo bejn ni di gac xpen Israel,

te si'c guisiäblajz lajz rexpén Israel laareni lo dojl. <sup>12</sup> Palga xcuent dojl ni bejn xpen Israel

gojp reben guedxliuj xcäl'nasa'c Dios, palga xcuent yälrunijt xten rexpén Israel guyu'

xcäl'nasa'c Dios par rebejn ni di gac xpen Israel, aticaxh chu xcäl'nasa'creni che gusoob

xpen Israel xtidx Dios.

<sup>13</sup> Naj caniä lojtu ni najc bejn ni di gac xpejn Israel. Gule Dios narä te gusule'ä xtiidxni

lojtu, ni'cni caläpä xpala'n xtzunä, <sup>14</sup> te don xho gunä te guisiäblajz reben ladxä ni najc

xpen Israel, te si'c chalilajzreni xtidx Jesucrist. <sup>15</sup> Palga gulecdxireni lajz reben guedxliuj

con Dios sa'csi gulälaz rexpén Israel xtidx Jesucrist, aticaxh che chalilajz rexpén Israel

rextidx Jesucrist, sibansac renani najc si'c beñgut. <sup>16</sup> Palga tla' cojb najc hueen, guideb



cojbgä najc hueen. Sigajcza najc te yajg; palga xlobaani najc hueen, guidebni najc hueen.

<sup>17</sup> Rexpen Israel najcreni si'c te yajg oliib; palga gutiuugreni te naa yajgga, dxejc ro'c guquiidreni naa ste'ca yajg te guibajnni con xtiejn yajg oliibga. <sup>18</sup> Ni'cni, na'c gactu guyalajz lo renaapac yajgga. Colgusnaj lajztu, xhet la'ditu ni rudeed yäl'nabajñ lo xlobaa yajgga, lobaaga ni runiidx yäl'nabajñ lojtu.

<sup>19</sup> Dxejc colguinii: "Batiuugreni naapac yajgre, te gujc biguidä cuä' yajgga." <sup>20</sup> Guliipacni, biru' naapac yajgga sa'csi direni nililajz xtidx Dios luxh la'tu biguiidtu cuä' yajgga sa'csi huililajztu xtiidxni. Na'c gactu guyalajz, colguidxejb, <sup>21</sup> sa'csi palga di Dios nutedbia renaa yajgga, diza Dios gutedbia la'tu. <sup>22</sup> Bahuii j'lacti hueen najc Dios! Luxh lacti niälajzzani; con renani banijt najcni niälajz, luxh lacti rulasajz Dios la'tu palga chanuu jiutu xtiidxni. Palga ditu jiu xtiidxni, näjza la'tu sudzucaj Dios. <sup>23</sup> Luxh sigajcza reni bidin, palga di chanuu cuälazreni xtiidxni sajc suquidsac Diosreni lo yajgga. <sup>24</sup> Luxh la'tu najctu benzijt, najctu si'c naa te yagoliib ni xtebca gulejn nen dajn. Luxh batiuugni la'tu te baquiidni la'tu lo te yagoliib ni najc yagsa'c ni rcaduxh oliib lojni, mase xhet si'cti najc olibguijxhga, jaticaxh rexpen Israel ni banijt najc si'c naapac xten yagolibsa'cga ni bidin, palga chalilajzpacreni xtidx Dios, suquidsac Diosreni loj yajg ni najc xtenpacreni!

### *Che laapac rexpen Israel lo dojl*

<sup>25</sup> Rebetzä, rlazä gacheetu xcuent te diidx nagajn, te di naatu nanduxhtu. Dee najc didx nagajnga: yu' rexpejn Israel ni guc najd lastooreni te direni nililajz xtidx Dios, hasta guisa' redxej ni chalilajz rebenzijt xtidx Dios. <sup>26</sup> Dxejcti siliaapac guiraa rexpen Israel lo dojl che chalilajzreni xtidx Dios, sa'csi si'c caj lo xtidx Dios, cadre caj rediidxre: Nani ruslaa sajc ben guedx Siön, luxh sudzucajni xtoj renani najc xagdoo to Jacob.

<sup>27</sup> Dee najc diidx ni bia'nä con laareni, che gudzucaä xtojreni.

<sup>28</sup> Naj, najcreni xcontraar Dios sa'csi rdxe'chreni xcuent xtidx Jesucrist, te chalilajztu; niluxh Dios sanälajzreni sa'csi si'c abia'nni diidx con retoxtadgoldooreni. <sup>29</sup> Sa'csi rut rajcdi rudzucaj nicla yäl'nasa'c ni rudeed Dios, niclaza yäl'rbejdx xten Dios. <sup>30</sup> La'tu galoo ditu nusoob xtidx Dios. Naj rulasajz Dios la'tu sa'csi gulälaz rexpen Israel xtiidxni. <sup>31</sup> Sigajcza naj direni gusoob xtidx Dios, niluxh si'c najcni te gulasajz Diosreni sa'csi balaslajzzani la'tu. <sup>32</sup> Dios basaan bjajb guiraanu lo dojl, te si'c sajc gulasajz Dios guiraanu.

<sup>33</sup> j'Lacti guroob najc yäl'nasa'c xten xcäl'najn, xcäl'racbee xten Dios! Nicla tej bejn guedxliuj di gachee guiraa rexcäl'guxhtisni, rudliidiza najn rexnezyujni. <sup>34</sup> Si'c caj lo guijtz: "¿Chuni'c guchee xcäriejn Dios? ¿Chuni'cza abaluuini? Rutliidi. <sup>35</sup> O ¿chuni'c badedxgaa te xhi cos lojni, te quixsacnini lojni, ä? Rutliidi." <sup>36</sup> Sa'csi loj Dios siäd guira'ti, luxh laani bencheeni guira'ti par lagajcza laani. Suguiiä'pnu xpala'nni par tejpas. Sugacni si'c.

## 12

### *Yäl'nabajñ rliä'p xpala'n Dios*

<sup>1</sup> Ni'cni rulidxä la'tu rebetzä, sa'csi rulasajz Dios nuure, colgudeed xcäl'nabajntu lo Dios te gac guiba'nsa'ctu si'cni rlanj Dios. Dee najc yäl'rajnpac Dios si'c ni nungäjl gantu Dios.

<sup>2</sup> Na'c rujntu lagajc xhigab ni rujn reben guedxliuj, colguscoob rehxigabtu te guidxaapac xmoodtu te si'c guluii Dios xhini'c rlanjni guntu, nalajznu xhini'c najc hueen, xhini'c rdxagljaz Dios, xhini'cza najc laapac.

<sup>3</sup> Sa'csi balaslajz Dios narä, ni'c rusule'ä xtiidxni loj tejgatu, rniä lojtu, na'c guiliä'ptu lagajc xpala'ntu, naatu sajcrutu loj sa'tu. Colyejn xhigabsa'c, te laaca gac xhigabtu,

si'cni baniidx Dios lo tejgatu xho chalilajztu xtiidxni. <sup>4</sup> Sa'csi sigajc najc tiejxhnu, yu' xhidaj la'ni, luxh tejgareni rujn xtzun-xtzunreni, <sup>5</sup> sigajcza nuure nani rililajz xtidx Jesucrist, najcnu xhidajl, najcnu si'c tejsi tiejxh lo Jesucrist, mase tejganu rujn xtzun-xtzunnu, tejsi najcnu.

<sup>6</sup> Luxh sa'csi tejganu rajpnu garen-garen dzuun xcuent yäl'rulaslajz ni baniidx Dios loonu, sujiennu rextzuunnu screeza: nani rajc rnii xtidx Jesucrist, suguiniinini, si'c ni najc xcäl'rililajzni; <sup>7</sup> nani rajc racnäy sa'ni, sugacnäyjni; nani rajc ruluii xtidx Dios, suguluiini; <sup>8</sup> nani rajc gulijdx resa'ni, sugulijdxnireni, nani rajc rudedxlia' xhixtenni lo sa'ni, saru sugudeedni xhixtenni; nani rajc rnibee lo sa'ni, suguinibeeni con yäl'nadolajz; nani rajc rulaslajz resa'ni, sugulaslajzni con yäl'rbalajz.

### *Xho nanab guibanu lo xnezyuj Dios*

<sup>9</sup> Colchanälajzpac resa'tu, na'c gunsitu si'cni rinälajztureni. Colcuälaz redzunguijdx, colyejntis redzunsac. <sup>10</sup> Colchanälajz resa'tu si'c rinälajz bejn rebejtzni. Colguiliä'p xpala'nreni.

<sup>11</sup> Colyejn dzunsac, na'c cuedxitu. Colyejn xtzun Jesucrist con guideb xtijptu, guideb xcäriejntu.

<sup>12</sup> Colguibalajz sa'csi ahuililajztu xtiidxni. Colcuedxij lajztu che tedtu trabajw. Colcuedx-colnabtis lo Dios guideb nabajntu.

<sup>13</sup> Colgacnäy rebejn nani rililajz xtidx Dios; sacru colnii loj ni riädhuiitu.

<sup>14</sup> Colguinii didxsa'c xcuent renani rusacsí la'tu, na'c gudzubdetureni.

<sup>15</sup> Colguibalaznäy renani rbalajz, colyonnäy renani roon.

<sup>16</sup> Colyejn tejtis xhigab con resa'tu, na'c gactu gualajz, colguchaag loj reben nadolajz. Na'c guchalotu najctu bejnanduxh.

<sup>17</sup> Na'c gudzu'tu dzunguijdx loj renani rujn dzunguijdx lojtu. Colyejn recossa'c nez loj guirasi bejn. <sup>18</sup> Cadrotis sajcnii, dxitis colguibanäy guiraa rebejn. <sup>19</sup> Rebetzä, na'c guntu xhigab lagajc la'tu gudeedtu xten renani rujn dojl lojtu, sa'csi lagajc Dios gun yäl'guxhtis lojreni, ni'cni caj lo xquijzntis scree: "Narä gunä yäl'guxhtis, narä quixä lojreni si'c naj Dad, Dios." <sup>20</sup> Näjza: "Palga calaan nani rdxe'ch lojtu, colgudeed xhi gauni, palga cayojlni, colgudeedza xhi yäni, te si'c jianxtiujni." <sup>21</sup> Na'c gusaantu gun redzunguijdx gaan lojtu, colyejn gaan lo dzunguijdx con recossa'c ni rujntu.

## 13

<sup>1</sup> Guiraatu nanab jiutu xtidx renani rnibee lojtu. Sa'csi xheti te yäl'rnibee nani di Dios nudeed, luxh guiraa reyäl'rnibee ni yu' lo guedxliujre, lagajc Dios gule'creni. <sup>2</sup> Ni'cni renani di gusoob xtidx renani rnibee, xtidx Dios cabälazni. Luxh renani rujn si'c, lagajc laareni xcaquijreni dojl, sujn Dios yäl'guxhtis lojreni. <sup>3</sup> Renani rnibee di guchejb renani riu xtiidxreni, ruchejbreni renani najc bejn guijdx ni di jiu xtiidxreni. Palga di rlajztu guidxejbtu reguxhtis, bejntis dzunsac, dxejcti guiliä'preni xpala'ntu sa'csi rujntu dzunsac. <sup>4</sup> Reguxhtis rujnreni lojtu xtzun Dios te guibansa'ctu. Palga guntu dzunguijdx, colguidxejb, xhet xlia'di ca'ni spaad, sa'csi najcreni nani rujn xtzun Dios te gunreni yäl'guxhtis, te quixpac renani rujn dojl. <sup>5</sup> Ni'cni nanab jiutu rextiidxreni, xhet ganaxtis sa'csi rujnreni yäl'guxhtis lojtu, näjza te ga'ptu te xcäriejnsa'c, te xcäriennaya. <sup>6</sup> Ni'cni colquijx lojreni nani riäj l xca'reni sa'csi renani rnibee najc xmos Dios, luxh ni'cpac najc xtzunreni.

<sup>7</sup> Colgudeed lo guiraa bejn nani riäj l xca'reni. Colquix loj renani nazääbtu; colquijx impuest loj ni riäj l xca'ni; colchanälajz renani riäj l chanälajztu; colguiliä'p xpala'n renani riäj l chä'p xpala'reni. <sup>8</sup> Na'c xcajlu di'n loj nicla tej bejn, di'ntis xten yäl'rinälajz sa'ni, sa'csi nani rinälajz xpisinni, bejnga abasoob xleii Dios. <sup>9</sup> Sa'csi lo xleii Dios caj scree: "Na'c guesnäjl bejn ni di gac chäällu, na'c ju'tlu, na'c cuanlu, na'c gusgueelu, na'c chuguij lajzlu xhixten resa'lu." Luxh palga yu' xhi stee leii rsa'ni con leii ni rnii: "Chanälajzlu

resa'lu si'c sanälajzlu lagajc luj.” <sup>10</sup> Nani rajp yälsanälajz, dini gun latsiaj lo resa'ni. Ni'cni yälsanälajz rusooob releii ni caj lo xtidx Dios.

<sup>11</sup> Colyejn guiraa redee, sa'csi anajntu xho najc redxej ni nabajnnu naj, anajntu alagojl or guibajnnu lo bacal sa'csi abidzungejxhru dxej che laanu neñ dojl lo dxej che huililajznu.

<sup>12</sup> Aguxhinduxh, asiädgajxh bianij. Ni'cni cuääz jiennu redzuun guiidx ni rajc lo xcäy, te jientisnu redzunsac ni rajc rdxee, lo bianij. <sup>13</sup> Guibansa'cnu si'c riäjł guibajñ rebejn rdxee, na'c guibanu lo yälrä', niclaza lo yälbiejy, na'c guidiesnäjn bejn ni di gac chäälnu, na'c ga'pnu rebis, na'c guidxagdilu resa'nu, na'c chuguij lajznu xhixten resa'nu. <sup>14</sup> Ni'cni colca' xcälrnibee Jesucrist te na'c guntu redojl ni rrajz gun tiejxhtu.

## 14

### *Na'c guiniyajtu rebejztu*

<sup>1</sup> Colnii didxdoo lo rebejn nani di gumbesa'c xtidx Dios, na'c tilnäjtureni. <sup>2</sup> Sa'csi yu' reni rililajz nani sajc gaurenı guira'ti xhi cos, niluxh nani gajd sutijp lo yälirilajz, ganaxtis berduur rajwni. <sup>3</sup> Nani rajw guira'ti, na'c guidxechnäjni nani di gau guira'ti; luxh nani di gau guira'ti, na'cza guiniyajni nani rajw sa'csi Dios aguleza bejnğa. <sup>4</sup> ¿Chuxh luj te guiniyajlu lo xmos te bejn, ä? Sugäb lagajc xlamni lojni la laaca rujnni o la xhet laadi rujnni. Luxh sujnni laaca sa'csi Dad Jesucrist sujñ sutijp lastooni.

<sup>5</sup> Tej bejn naa sajcro tej dxej lo stee dxej, dxejc ste'ca bejn rchalo guiraa redxej najc tebloj. Xhet najcđi, tejga bejn sugunpac lagajc xhigabni. <sup>6</sup> Nani rapda te dxej, rujnnini te guiliä'pni xpala'n Dios, luxh nani di gunni, rliä'pzani xpala'n Dios sa'csi dini gapda te dxej. Luxh nani rajw guira'ti, rajwni te rliä'pni xpala'n Dios, sa'csi rudeedzani xquixtios lo Dios; nani di gau guira'ti, nez lo Dios dini gau, rliä'pzani xpala'n Dios, rudeedzani xquixtios lo Dios.

<sup>7</sup> Sa'csi nicla tejnu dinu guibajñ xcuentcanu, nicla tejzanu dinu guet xcuentcanu.

<sup>8</sup> Palga nabaannu, nabaannu xcuent Dad Jesucrist; palga guetnu, rejtzanu xcuent Dad, Jesucrist. Ni'cni palga nabaannu, o palga guetnu, laltis najcnu rexpen Dad, Jesucrist.

<sup>9</sup> Ni'cni gujt Jesucrist, ni'cni gubansaczani, te sajc gacni Dad xten rebejñgut, näjza Dad xten rebejn nani nabajñ.

<sup>10</sup> Dxejc luj, ¿xhicuent cubeelu bejtzlu, ä? O ¿xhicuent rdxe'chlu rhuiilu lojni, ä? Ni guiragajcnu tednu nez loj Jesucrist cadro cueni te gunni yälguxhtis loonu. <sup>11</sup> Sa'csi scree caj lo xtidx Dios:

Si'ctis ni nabañä, rniliäpac lojtu, räjp Dad Dios,

guiraa reben guedxliuj suzuxhijbreni loä,

luxh guiragajc ro'reni sicäjp narä nacä Dad Dios.

<sup>12</sup> Ni'cni guiraanu, tejganu sudeednu cuent loj Dios xcuent nani biennu.

### *Na'c guzällu bejtzlu*

<sup>13</sup> Ni'cni na'cru cubeenu sa'nu. Maazru hueen jiennu xhigab neñ lastoonu xhetliidi jiennu ni gun jiajb resa'nu lo dojl. <sup>14</sup> Narä nanä, racbeäpac guira'ti najc hueen. Jesucrist Xtadnu baluii narä si'c. Luxh palga yu' chu tej ni rchalo dini gac hueen, par laatisni dini gac hueen. <sup>15</sup> Palga la'tu guntu gac-huin lajz te sa'tu sa'csi yu' xhi rajwtu, dirutu chasanäj xnezyuj yälsanälajz. Na'c gunlu gunijt te sa'lu xcuent nani rajwlu, sa'csi agujt Jesucrist xcuentni. <sup>16</sup> Ni'cni na'c gusaanlu guiniyajreni nani najc te cos hueen par luj. <sup>17</sup> Sa'csi xcälrnibee Dios dini gac xcuent yälrajw, niclaza xcuent yälrä'; xcälrnibee Dios najc xcuent te yäl'nabañnya nez loj Dios, näjza yälrbedxilajz con yälrbalajz xcuent Sprit Dxan xten Dios. <sup>18</sup> Sa'csi nani rujñ si'c lo xtzuun Jesucrist, bejnğa rchaglajz Dios, luxh reben guedxliuj rniiza didxsa'c xcuent sa' bejnğa.

<sup>19</sup> Ni'cni chanuutis guidiilnu recos nani rujñ chu yälrbedxilajz, näjza nani rujñ racnäjnı resa'nu te tioobrurenı loj xnezyuj Dios. <sup>20</sup> Na'c guntu nit xtzuun Dios xcuent ni rajwtu.

Guliicani guira'ti ni rajw bejn najc naya, niluxh palga gautu te cos nani gun jiajb bejtzlu neñ dojl, ni'c najc xhet laadi. <sup>21</sup> Hueen najc na'c gautu bääl, na'cza yätu bin, na'cza guntu jiajb sa'lu neñ dojl. <sup>22</sup> Nani rililajztu, ni'c colyajp xcuentcatu nez loj Dios. Chicbaa nani di cubee lagajc laani xcuent recos nani rniini laaca najcni. <sup>23</sup> Luxh palga guntio'p lajz te bejn xcuent nani rajwni, sigubeeni lagajc laani, sa'csi dini gau xcuent yäl\_rililajz, sa'csi xhitis ni di gac xcuent yäl\_rililajz, lagajc ni'c najc dojl.

## 15

### *Huinälajz sa'lu*

<sup>1</sup> Nuurnu ni agusutijpnu lo yäl\_rililajz nanab gacnäjnu resa'nu nani gajd chalilazsa'c. Di gacdi guibantisnu xcuentcanu. <sup>2</sup> Tejganu nanab chonälaaznu resa'nu lo xcäl\_nabansa'cni te gacnäjnu chalilajzrureni. <sup>3</sup> Sa'csi nicla Jesucrist dini nibajp xcuentcani, luxh si'cni caj loj xtidx Dios: “Redidxyaj ni guniyajreni lojlu biajbreni yecä.” <sup>4</sup> Guiraa rediidx ni cuaj lo guijtz galooli, cuajreni te guluiireni nuurnu te ga'pnu yäl\_sutijp näjza yäl\_rustioblajz te gacza guibääznu lo xtidx Dios. <sup>5</sup> Dios rusutijp lajznu, Dios rutioob lastoonu. Rniabä loj Diosga gacnäjni guntu tejtis xhigab xten Jesucrist con resa'tu. <sup>6</sup> Te dxejcti tejtis gac xse'tu guiliä'ptu xpala'n Dios, Xtrad Jesucrist.

### *Gusule' xtidx Dios loj rebenzijt*

<sup>7</sup> Ni'cni colca' resa'tu, renani ahuililajz xtidx Dios sigajc cua' Jesucrist nuure te guiliä'pnu xpala'n Dios. <sup>8</sup> Sa'csi narä rniä lojtu, biääd Jesucrist te gujcn si'c te mos loj rexpen Israel te baluiini xcuent didxgulii xten Dios te gusojb rediidx nani bia'n Dios loj retoxtadgoldoonu, <sup>9</sup> näjza par rebenzijt, te guiliä'preni xpala'n Dios sa'csi baluilojni xcäl\_rulaslajz Dios lojreni, si'c ni caj lo xtidx Dios: Ni'cni siliä'pä xpala'nlu nez loj rebenzijt, soläza dij lojlu.

<sup>10</sup> Dxejcti stee lajt rniini:

La'tu benzijt, colguibalaznäj rexpenä rexpejn Israel.

<sup>11</sup> Stee lajt cajza:

Guiraatu, rebenzijt, colguiliä'p xpala'n Dad, suguiliä'pza guiralii rebejn xpala'nni.

<sup>12</sup> Stee huält guniiza Isaías scree:

Siricaj te xagdoo toIsai,  
näjza te ni chäs te guinibeeni loj rebenzijt,  
laani cabäjz rebenzijt.

<sup>13</sup> Naj rniabä lo Dios ni rudeed yälrbäzljajz, te laani gacnäj guibalajztu, cuecdxilajztu, sa'csi salilajztu, te tioobru yälrbäzljajz ni rajptu sa'csi Sprit Dxi xten Dios yu' neñ lastootu, luxh laani rajpni yäl\_rnibee.

<sup>14</sup> Luxh xcuent la'tu rebetzä, anancheä nabaansa'ctu nasinduxhtu, arajcza rulijdxtu sa'tu, <sup>15</sup> luxh loj guijtzre bacuaä gaii didxnaj xcuent tiop-choñ cos, te gusnaä lajztu. Runä si'c xcuent yäl\_rulaslajz ni baniidx Dios loä <sup>16</sup> te gacä xpen Jesucrist ni rusule' diidx loj rebenzijt. Ni'cni cagusulesa'cä xtidx Dios lojreni, te xca' Dios rebenzijt si'c te gojn ni rudedä, sa'csi agujcreni beñnaya sa'csi rbäjz Sprit Dxi neñ lastooreni.

<sup>17</sup> Ni'cni xcuent Jesucrist abidxälä xhicuent guiniduxhä didxro xcuent recos ni najc xten Dios. <sup>18</sup> Sa'csi dina guiniä diidx xcuent xhi stee cos, ganaxtis xcuent xho gucnäj Jesucrist narä, luxh xcuent ni'c basoob rebenzijt diidx, huililajzreni xtiidxni sa'csi biejn diajgreni xtiidxni, bahuiizaren rextzuunni, <sup>19</sup> con yäl\_milaagwr xten redzunro, resenro, ni gujcn con xcäl\_rnibee Sprit Dxi xten Dios. Ni'cni lo guedx Jerusalénli, näjza guideb gabi ro'c, lo guedx Ilírico, guiraa nejzga abasule'ä xtidx Jesucrist. <sup>20</sup> Si'cza guyu'ä ganduxh gusule'ä xtidx Dios xhet cadro ahuisule'direni xtidx Jesucrist, alga ganax cadro gajdreni



gumbee Jesucrist, te na'c gunä dzuun cadre gusloj cayujn ste'ca bejn dzuun. <sup>21</sup> Te gacni si'cni caj lo guijtz:

Renani rutliidi bij diidx xcuentni, suhuiipacreni lojni,  
luxh renani gajdpac diajgreni jiejn xtiidxni, sacbecheereni xtiidxni.

### *Rujn Pabl xhigab chääni guedx Roma*

<sup>22</sup> Ni'cni balti huält badxojn Dios narä jiadhuiä lojtu. <sup>23</sup> Luxh naj sa'csi abaluxä xtzunä guideb nezree, näjza sa'csi agujc balti ijz rlazduxhä jiadhuiä lojtu, <sup>24</sup> naj che cha'a España siadhuiäpac lojtu. Che tedä, jiadhuiäpac contu te ganid guibalaznäã la'tu, dxejcti gacnäjtu narä te cha'a España. <sup>25</sup> Naj sia'a guedx Jerusalén te chanää xcoobr rexpejn Dios ni yu' ree loj rebejn ro'c. <sup>26</sup> Sa'csi rebejn Macedonia näjza reben Acaya rlajzpacreni guxhalreni te coobr loj rebenproob ni yu' lo reni huililajz xtidx Dios nen guedx Jerusalén. <sup>27</sup> Bejnreni xhigab hueen gunreni si'c, luxh guli'careni, sa'csi yu' xhi nazääbreni lojreni sa'csi rebejn Jerusalén najc reni baxhal xtidx Jesucrist lojreni, naj laaca rujnreni cayacnäjreni reben Jerusalén con xhixtenreni. <sup>28</sup> Ni'cni che chasa'nä meel lojreni dxejc tedä lajdxtu, jiadhuiä contu, dxejc cha'ä España. <sup>29</sup> Luxh ananä che jiälä lojtu, li guidxa lastoä xcäl'nasa'c xtidx Jesucrist guidzunä lojtu.

<sup>30</sup> Rebetzä, rniabduxhä lojtu xcuent xtidx Dad Jesucrist näjza xcuent xcäl'rinälajz Sprit Dxa xten Dios, colguidxagsa'tu, te colgacnäj colcuedx-guiniabtu lo Dios xcuentä. <sup>31</sup> Colnab lo Dios te guslaani narä loj reben Judea nani di gusoob xtiidxni te saru gun reben dxan ni yu' Jerusalén te xca'reni ni chanää lojreni. <sup>32</sup> Te cabaa lazä guidzunä lojtu, sa'csi rlajzpac Dios jiälä lojtu, te lalni yu'ä lojtu siäljuä, susilazäza con la'tu. <sup>33</sup> Dios ni rbecdxilajz bejn gacnäj guiraatu. Sugacni si'c.

## 16

### *Ruxhalni xtixtios lojreni*

<sup>1</sup> Colgacnäj bisiajnnu Febe. Nane're bejn dzunduxh nen guidoo ni tre' Cencrea. <sup>2</sup> Colca'ni xcuent Dad, Jesucrist, si'cni riäjl gun bejn gacnäj renani rililajzpac xtidx Dios. Colyacnäjni lo xhitis nani guiquiinni, sa'csi laani gucnäduxhni xhidal rebejn, nägajcza narä gucnäjni.

<sup>3</sup> Ruxhalä xtixtios lo Priscila näjza lo Aquila, ni racnäj narä lo xtzun Jesucrist. <sup>4</sup> Laareni nicäjpreni niejtrene xcuentä, ni'c rudedä xquixtios lojreni, luxh xhet narätis, näjza guiraa rebejn ni yu' lo rexquidoo rebenzijt. <sup>5</sup> Ruxhalä xtixtios loj resa'ä ni rdxagsa'reni rolijz Priscila näjza Aquila. Ruxhalä xtixtios loj Epeneto, ni sanälazduxhä, ni gujc ben ganid ni huililajz xtidx Jesucrist nen guedx Acaya. <sup>6</sup> Ruxhalä xtixtios lo Marii nani benduxh dzuun lojtu. <sup>7</sup> Ruxhalä xtixtios loj reben ladxä ni laa Andrónico näjza Junias; laareni gyunäj narä nen latzguiib, najceni benro loj reapost. Ganid laareni huililajz xtidx Jesucrist, dxejcti huililazä.

<sup>8</sup> Ruxhalä xtixtios loj Amplias, ni sanälazä xcuent Jesucrist. <sup>9</sup> Ruxhalä xtixtios loj Urbano, ni runnäj nuurnu xtzun Jesucrist. Ruxhaläza xtixtios loj Estaquis, ni sanälazä. <sup>10</sup> Ruxhaläza xtixtios loj Apeles, ni abadeed balti seen rililajzpacni xtidx Jesucrist. Ruxhaläza xtixtios loj guiraa ni tre' rolijz Aristóbulo. <sup>11</sup> Ruxhaläza xtixtios lo Herodiön ben ladxä, näjza loj resa' Narciso nani ahuililajz xtidx Jesucrist. <sup>12</sup> Ruxhaläza xtixtios loj nan Trifena näjza nan Trifosa, guiro'preni cayujn xtzun Jesucrist. Ruxhaläza xtixtios loj nan Pérsida, sanälazäni, abenduxhni xtzun Jesucrist. <sup>13</sup> Ruxhaläza xtixtios lo Rufo nani agule Dios, näjza lo xnanni, sa'csi gujcn si'c xnanzäza. <sup>14</sup> Ruxhaläza xtixtios loj Asíncrito, näjza lo Flegonte, näjza lo Hermas, näjza lo Patrobas, näjza lo Hermes, näjza lo rebetzä ni yunäjreni. <sup>15</sup> Ruxhaläza xtixtios loj Filólogo, näjza lo Julia, näjza lo Nereo con bisiajnni, näjza lo Olimpas näjza guiraa rexpen Dios nani yunäjreni ro'c.

<sup>16</sup> Colye'tz xchan loj resa'tu. Guiraa rexquidoo Jesucrist ruxhal xtixtios lojtu.



<sup>17</sup> Rebetzä, rniabduxhä lojtu ga'ptu cuidaad xcuent renani rujn bieje te guilia' sa' bejn, nani rlanj guntu guiraloj nani najc garenca loj yäl\_rului ni bisieedu, colguibicaj lojreni, <sup>18</sup> sa'csi sa' rebejn\_ga direni gun xtzuum Jesucrist. Laareni rlanjtisreni gunreni si'c rlanj tiejxhreni; rniireni didxdoo, diidx ni rgudxguel diajg bejn te rusgueereni lastoo rebejn nani di susin. <sup>19</sup> Guiranejz abire'ch diidx xcuent xho rusobsacpactu xtidx Jesucrist, ni'cni rbaa lazä, ni'cni rlazä gactu nasin\_duxh xcuent recoshueen, luxh si'c báz xhet ganditu xcuent recosguijdx. <sup>20</sup> Luxh Dios nani ruscuecdxilajz bejn siojb guta'cwni ben\_xab xhan ni'tu. Gacnäj Dad Jesucrist la'tu.

<sup>21</sup> Timoteu nani racnäj narä lo dzuun, ruxhal\_xtixtios lojtu. Lucio, Jasón, näjza Sosípater, ben\_ladxä, ruxhal\_za xtixtios lojtu.

<sup>22</sup> Najrä Tercio, ni cagucuaä guijtzre xcuent Pabl, ruxhal\_äza xtixtios lojtu xcuent Jesucrist.

<sup>23</sup> Ruxhal\_za Gayo xtixtios lojtu. Rbääznu rolijzni, luxh rudeedzani rolijzni guidxagsa' reben\_guidoo. Ruxhal\_za Erasto, ni najc tesoreer xten guejdxre, xtixtios lojtu, sigajcza bejtznu ni laa Cuarto.

<sup>24</sup> Gacnäj Dad Jesucrist la'tu. Sugacni si'c.

### *Rediidx lult xten Pabl*

<sup>25</sup> Colguiliä'p xpala'n nani sajc gusudzu'tz la'tu loj xtiidxni nani basule'ä, näjza loj xtidx Jesucrist xcuent rexhigab ni naga'tz galooli, <sup>26</sup> naj abaluiloj rediidxga lojtu; näjza xcuent ni bacuaa reprofe't galooli; si'c najc diidx ni bia'n Gueb Dios ni nabajn par tejpas loj rexpejnni, agusule'ni loj guiraa reben\_guedxliuj, te gusoobreni diidx sa'csi rililajzreni xtiidxni, <sup>27</sup> colguiliä'p xpala'n ni najc tejtis Dios ni nanduxh. Suguiliä'pnu xpala'n Dios xcuent Jesucrist. Guiliä'pnu xpala'n Dios par tejpas. Sugacni si'c.

## Guijtz Ganid Ni Bacuaa Pabl Lo Guidoo Xten Guedx Corinto

### *Bacuaa Pabl te guijtz lo guidoo xten guedx Corinto*

<sup>1</sup> Narä Pabl nacä apost xten Jesucrist sa'csi agule Dios narä te gusule'ä xtiidxni. Narä näjza Sóstenes ni najc bejtznu lo xtidx Dios rucuaanu guiitzre lojtu <sup>2</sup> ni ahuililajz xtidx Dios, ni yu' nen guidoo xten guedx Corinto. La'tu agule Jesucrist, abasiani lastootu sa'csi ahuililajz xtiidxni. La'tu näjza guiraa rebejn ni ahuililajz rextidx Jesucrist loj guideb guedxliuj, najctu xpejn Dios, ni najc Dad xten guiraanu. <sup>3</sup> Rniabnu lo Dios ni najc xtadnu näjza lo Dad Jesucrist, gacnäjreni la'tu, guscuecdxireni lajztu.

### *Abaniidx Dios xhidajl dzunsa'c xcuent Jesucrist*

<sup>4</sup> Rudedätis xquixtios lo Dios xcuentu, xcuent yäl\_rulasajz xten Dios ni cua'tu xcuent Jesucrist, <sup>5</sup> te xcuentni acua'zatu guiraa dzunsa'c, te gusule'tu xtiidxni, näjza te gacbesa'ctu xtiidxni; <sup>6</sup> sigajcza con xcäl\_nabansa'ctu baluiitu huililajz\_pactu xtidx Dios xcuent Crist. <sup>7</sup> Ni'cni xhetliidi cayääd\_xditu loj redzunsa'c ni runiidx Dios, la\_l ni ganduxh yu'tu cabäjztu guibisac Jesucrist lo guedxliuj. <sup>8</sup> Laani susutijpni lajztu dxejli ni guibisac Dad Jesucrist loj guedxliuj, te rutliidi gac cue'c xhi te quej xcuenttu. <sup>9</sup> Rusoobpac Dios xtiidxni. Laani gurejdxni la'tu te jiu'tu lo xnejz Xi'nni Jesucrist ni najc Dad xtenu, te sanäj\_tuni.

### *Rlia' sa'reni nen guidoo*

<sup>10</sup> Rulidxä la'tu, rebetzä, xcuent Xtad Jesucristnu, colyejn tejsi xhigab te na'c la' sa'tu, saru guibannäjtu sa'tu, colyejn tejsi xhigab, colga'p tejsi xcäriejn. <sup>11</sup> Sa'csi agucbeä xcuenttu, betzä ni huililajz xtidx Dios. Tej resa' Cloé biädsä'n diidx loä xcuenttu, yu' yälrdijl lojtu. <sup>12</sup> Rlazä guiniä scree lojtu sa'csi yu'reni rnii: "Narä nacä te rexpejn Pabl", näjza: "Narä nacä te rexpejn Apolos"; näjza: "Narä nacä te rexpejn Pedr", yu'zareni rnii: "Narä nacä xpejn Crist." <sup>13</sup> ¿La rujntu xhigab nala' sa' Crist, ä? ¿La cuaj Pabl lo cruzj xcuent xtojltu, ä? o ¿La gurobnistu con laj Pabl, ä? <sup>14</sup> Rudedä xquixtios lo Dios dina nutiobnisä nicla tejtü, xtebtis Crispo näjza Gayo, <sup>15</sup> te rut naadi con laä batiobnisäreni. <sup>16</sup> Abanaj lazä batiobnisä resa' Estéfanas. Di lazä guinaj la yu' chu stee bationnisä. <sup>17</sup> Di Crist nuxhal narä te gutiobnisä. Baxhalni narä te gusule'ä rextiidxni xcuent xho gun bejn te laareni lo dojl, xhet con didxnanduxhdi, te di gudzucaä loj dzunroduxh ni bejn Jesucrist che gujtni lo cruzj.

### *Crist najc xcälmilaagwr näjza xcäl\_najn Dios*

<sup>18</sup> Rediidx ni rniinu xcuent Jesucrist xcuent xho gujtni lo cruzj te guslaani rebejn lo dojl najcni te diidx ni xhet sajcdi lo rebejn ni canijt sa'csi direni chalilajz xtiidxni. Luxh loj rebejn ni ruslaa Dios lo dojl najc rediidxga xcälmilaagwr Dios. <sup>19</sup> Scree caj loj rexquijtz Dios:

Narä sutzulä yäl\_nasin xten rebennajn, sudzucaäza xcäl\_nadxällajz, xhigab rebejn ni nadxällazduxh.

<sup>20</sup> ¿Con bejn ni nanduxh? ¿Con bejn ni rucuaa, ni najc maestr? ¿Con bejn ni ruchagduxh diidx xcuent recos guedxliujre, ä? ¿La et abejndi Dios najc guiraa yäl\_nasin xten guedxliuj si'c nayällajz nez loj Dios, ä? <sup>21</sup> Ni'cni loj xcäl\_nasin Dios, di rebejn guedxliuj niembee Dios con xcäl\_nasin guedxliujre, ni'c bichagljaz Dios con yäl\_rusule' diidx ni rniireni nayällajz, con ni'c baslaani lo dojl rebejn ni huililajz xtiidxni xcuent Crist.

<sup>22</sup> Rexpejn Israel rlazpacrene fiireni remilaagwr; rebejn griegw rguuil yäl\_nanduxh. <sup>23</sup> Niluxh nuurnu rusule'nu diidx xcuent xho cuaj Jesucrist lo cruzj, niluxh loj rexpejn Israel najc diidxre si'c te guiro ni chalani' bejn, luxh loj rebenzijt xhet sajcdi rediidxre.

<sup>24</sup> Niluxh loj rebejn ni gule Dios chalilajz rediidxre, rexpejn Israel sigajc loj rebenzajt, rediidxre najczani yälmlaagwr najczani yäl̄nasin̄ xten Dios. <sup>25</sup> Sa'csi xcäl̄nayääl̄ xten Dios si'c rchalo rebejn ni'c najc nasinduxhru loj xcäl̄nasin̄ xten reben̄ guedxliuj; luxh xcäl̄rniaj xten Dios sacduxhruni loj guiraa xcäl̄nadaan reben̄ guedxliuj. <sup>26</sup> Col̄huii la'tu, betzä ni ahuililajz xtid̄x Dios, xho gule Dios la'tu, col̄yejn xhigab guxiitu najctu ben̄ nasin̄ loj reben̄ guedxliuj, guxiiza rajptu yäl̄rnibee, guxiizatu najctu bejn ni agojl̄ guiga'tu ben̄sa'c. <sup>27</sup> Niluxh agule Dios rebejn ni xhet nanduxhdi te gusanxtujyni rebejn ni nanduxh, aguleza Dios rebejn ni guxii rnibee te gusanxtujyni rebejn ni rnibeduxh. <sup>28</sup> Agule Dios rebejn ni di guiga' ben̄ro, näjza rebejn ni rut riudi, reni rut najcdi, te gusanxtujyni rebejn nani najc guiraa reni'c. <sup>29</sup> Te nicla tej bejn digacdi guiliä'p lagajc xpala'n̄ni nez loj Dios. <sup>30</sup> Lagajc Dios abachaag la'tu loj Dad Jesucrist; baxhalzani Jesucrist loonu te basanijni xcäriejn̄nu te ga'pnu yäl̄nasin̄ xten Dios, te guibaṅsa'cnu nez loj Dios, te gacnaya lastoonu, näjza te quiixni rextoj̄lnu. <sup>31</sup> Si'c bejn Dios te soob xtiid̄xni cadro caj scree: Ni rlaiz guinii didxro, suguiliä'pni xpala'n̄ dzuun ni bejn Jesucrist.

## 2

### *Rediid̄x xcuent Crist ni cuaj lo cruiz*

<sup>1</sup> Ni'cni cheni biädsule'ä xtid̄xlii Dios lojtu, rebetzä, dina niädniä didxnajn lojtu, niclaza didxnagajn, xhet si'cti basule'ä xtid̄x Dios xcuent Crist. <sup>2</sup> Cheni guyu'ä lojtu, benä xhigab dina niädniä xhi stee diid̄x lojtu, biädsule'ätis diid̄x xcuent Dad Jesucrist, ni cuaj lo cruiz. <sup>3</sup> Bidzunä lojtu guideb rdxagä, guideb racditä sa'csi cadxebduxhä. <sup>4</sup> Cheni basule'ä diid̄x lojtu, dina niniä didxro xten yäl̄nasin̄ xten guedxliuj, alga guniä xtiid̄x yäl̄nasin̄ xten Sprit D̄xan xten Dios näjza xcäl̄rnibee Dios, <sup>5</sup> te di gac xcäl̄rililajztu xcuent yäl̄nasin̄ xten guedxliujre, te gac xcäl̄rililajztu xcuent yäl̄rnibee xten Dios.

### *Rumbee bejn Dios xcuent ni ruluii Sprit D̄xan xten Dios*

<sup>6</sup> Rniizanu lo sa'nu ni aguyajl lo xtid̄x Dios rediid̄x xten yäl̄nasin̄ xten Dios, per te yäl̄nasin̄ ni di gac xcäl̄nasin̄di guedxliuj, niclaza xten reni rnibee lo guedxliujre, sa'csi sidzuj̄n dxej sinitlojreni. <sup>7</sup> Niluxh che rniinu yäl̄nasin̄ xten Dios, rniinu diid̄x ni rut racbextebdi, xcuent xho gac guidzunn̄u cadro yu' Dios xhaguibaa. Cheni gajdli gac guedxliuj, rapcheeni yäl̄nasin̄xhiga'tz xtenni. Baluiinini loonu te guibaṅnäänuni lo xcäl̄rdimbicha' xtenni. <sup>8</sup> Nicla tej reni rnibee lo guedxliujre gajd gacbee recosre niluxh paru niacbeerenini, direni nucuaa lo cruiz Dad Jesucrist nani rajp xcäl̄rdimbichaduxh. <sup>9</sup> Najcni si'cni caj lo rextid̄x Dios cadro rnii:

Recos ni gajdpac baloj bejn̄ fii,  
nani gajdpacza diajg bejn̄ jiejn;  
nani gajdpacza jiu' lo xhigab bejn̄, guiraa recosga abaluchee Dios par rebejn̄ ni chanälajzni.

<sup>10</sup> Niluxh abaluii Diosreni loonu con Sprit D̄xan xten Dios, sa'csi laani basule'nireni loonu. Sprit D̄xan xten Dios rachesa'c guiraa rexhigab, näjza recos xhiga'tz xten Dios.

<sup>11</sup> Loj reben̄ guedxliuj ¿chuni'c racbee rexhigab ni rujn̄ bejn̄? Lagajc sprit xten bejn̄ ni yu' neṅni racbee xhi xhigab cayuj̄nni. Sigajcza rut racbeedi rexhigab xten Dios; Sprit D̄xantis xten Dios racbeeni. <sup>12</sup> Luxh nuurnu dinu nica' yäl̄naj̄n xten guedxliuj, alga cua'nu Sprit D̄xan ni siäd̄ lo Dios te gacbeenu rexhicos ni abasalajz Dios loonu. <sup>13</sup> Nuurnu rniizanu xcuent recosga, xhet diid̄xdi ni ruluii xcäl̄naj̄n guedxliujre, diid̄xtis ni baluii Sprit D̄xan xten Dios loonu. Si'c ruluiinu rediid̄xga loj rebejn̄ ni rbäjz Sprit D̄xan xten Dios neṅ lastooreni.

<sup>14</sup> Niluxh reni di chalilajz xtid̄x Dios, direni gacbee rexhigab xten Sprit D̄xan xten Dios, sa'csi laareni xhigabyäältis rchaloreni xcäl̄nasin̄ Dios. Di gacdiza gabeereni rexhigabga, sa'csi Sprit D̄xan xten Diostis rajc ruluii lo bejn̄ rexhigab xtenni. <sup>15</sup> Rebejn̄ ni ahuililajz

xtidx Dios, rula'tzreni guira'ti ni ruluii Sprit Dxaan xten Dios lojreni. Luxh rebejn ni ahuililajz rutliidi rula'tzdiireni. <sup>16</sup> Sa'csi scree caj lo xtidx Dios: “¿Chuni'c agucee xho najc xhigab xten Dios te gac guluini Gueb Dios, ä?” Nicla tej bejn. Niluxh nuurnu rajpnu lo xcäriejnu xhigab xten Crist, nalajznu racbeenu rextiidxni.

### 3

#### *Reni rujn dzuun lo Dios*

<sup>1</sup> Rebetzä, di niajcdi niniä redixnagajn lojtu si'c ni rniä loj rebejn ni rajp yäl<sub>nasin</sub> xten Sprit Dxaan xten Dios, basule'ä ganaxtis didx guyasi lojtu, sa'csi najctu bejn guedxliuj o biuxbäz ni guxii racbeeni xcuent Crist. <sup>2</sup> Basule'ä ganax didxguyasi lojtu si'c rudeed bejn le'ch lo te biuxbäz lacuaa gauni bääl. Dina niniä lojtu guiraa rextidx Dios ni nanab gacbeetu, sa'csi gajd gacdi gacbeetuni, niclaza naj gajd gacdi gacbeetuni, <sup>3</sup> sa'csi nabansijctu si'c nabajn reben guedxliuj laltis runembiidtu, rdexchajztu lo sa'tu, ¿la ditu gacbee nacsijctu si'c bejn guedxliuj, ä? ¿La laltis nabajntu si'c nabajn reben guedxliuj ni di gumbee xtidx Dios, ä? <sup>4</sup> Sa'csi cheni rnii tejni: “Narä nacä te xpejn Pabl”, dxejcti steeni rnii: “Narä nacä te xpejn Apolos”, ¿la xhet cayujnditu sigajctis ni rujn rebejn guedxliuj, ä?

<sup>5</sup> ¿Chuni'c najc Pabl? ¿Chuni'c najc Apolos? Nuurnu najctisnu xmos Dios ni basule' xtidx Dios lojtu te huililajztu, luxh cade tejnu riennu dzuun ni runiidx Dios jiennu. <sup>6</sup> Ganid basule'ä xtidx Dios lojtu, dxejc biääd Apolos te gucnäjzani gucbeerutu xtidx Dios, niluxh lagajc Dios najc ni cagusanij xcäriejntu te gacbesa'ctu xtiidxni. <sup>7</sup> Ni'cni nicla ni rusulexgaa diidx, niclaza nani racnäj racbeeru bejn rediidxga xhet sajcdireni; Diostis sajc nani rusaniij xcäriejn rebejn. <sup>8</sup> Nuurnu najcnu si'c rexmos ni rujn dzuun lo yuj. Tejsi najc nani rbe'c binij näjza nani rga' nis, niluxh Dios rguijx tejganu dzuun nani riennu. <sup>9</sup> Nuurnu najcnu si'c remos ni runnäj Dios dzuun. La'tu najctu si'c yuj cadre cayajc xtzun Dios, si'c te yu' ni cayunchee Dios. <sup>10</sup> Narä nacä si'c te mastr albañil. Baniidx Dios dzuun loä, gucnäjni narä te casuä reguij lo yujre, te naj ste'ca bejn quixh basuu yejcti. Niluxh tejga ni chanuu gun dzuun lojga, suga'pni cuidaad xho guiliäsni padeerga. <sup>11</sup> Sa'csi di gacdi gusujreni garenca cimient loj nani najc-xgaa, ni najc Jesucrist. <sup>12</sup> Naj palga guiliäs bejn te padeer yejc cimientga con oor, con pla't, con guij ni sacduxh, o con baräjd, guixhtriuu, o balag biquii, <sup>13</sup> sidzujn dxej sien xho najc dzuun ni bejn tejga bejn. Sa'csi siääd fis guiboo ni gululoj dzuunga, sa'csi lagajc guibooga gululoj dzuunga, xho najcni. <sup>14</sup> Palga yu' reni bejn te yusa'c yejc cimientga, luxh dini chec lo guibooga, sudeed Dios lo bejnga ni riäj<sub>l</sub> xca'ni sa'csi bejn<sub>ni</sub> yusa'c. <sup>15</sup> Niluxh palga chec ni bejn<sub>ni</sub> yejc cimientga xhet xca' dini, xcäl<sub>nabajntisni</sub> di nit, luxh xtzuunni sejc.

<sup>16</sup> ¿La ditu gan la'tu najctu xquidoo Dios, luxh nen lastootu rbäjz Sprit Dxaan xten Dios, ä? <sup>17</sup> Palga yu' chu gutiexhät xquidoo Dios, sunitloj Diosni par tejpas, sa'csi xquidoo Dios najc dxaan, luxh la'tu najctu guidooga.

<sup>18</sup> Nicla tejtu na'c gusgueetu lagajc la'tu. Palga yu' chu rujn xhigab nanduxhni xcuent yäl<sub>nasin</sub> xten guedxliujre, nanabpac gacni si'c te bejn ni xhet najndi te xca'ni yäl<sub>nasin</sub> xten Dios te guliipac gacni te ben<sub>naj</sub>, te bejn nasin. <sup>19</sup> Sa'csi yäl<sub>nasin</sub> xten guedxliuj xhet sajcdi nez loj Dios. Lo rexquijtz Dios caj scree: “Dios rujn rga' reni rajp yäl<sub>nasin</sub> xten guedxliuj lagajc xcuent xcäl<sub>rusgueer</sub>eni ni rujn lagajc xcäl<sub>nadxällajz</sub>reni.” <sup>20</sup> Ste'ca lajt caj scree: “Nanchee Dios xho najc xhigab ni rujn rebejn ni rajp xcäl<sub>nasin</sub> guedxliujre, luxh xhetliidi sajcti nez loj Dios.” <sup>21</sup> Ni'cni na'c guiliä'p bejn xpala'n te bejn guedxliuj. Sa'csi loj tejgatu abaniidx Dios guira'ti rexhicos najc xtengatu, <sup>22</sup> palga najcni Pabl, o Apolos, o Pedr, o guedxliuj, o yäl<sub>nabaj</sub>, o yäl<sub>gujt</sub>, o recos ni yu' naj, o recos ni churu gac, guiraareni najc xtentu. <sup>23</sup> La'tu najctu xten Crist, luxh Crist najc Xi'n Dios.

## 4

*Xtzuun reapost*

<sup>1</sup> Ni'cni la'tu nanab fiitu loonu si'c rexmos Dad Jesucrist ni rajp rehxigabxhiga'tz xten Dios te gusule'nureni lojtu. <sup>2</sup> Mbaj pues, te bejn ni cahuii te dzuun nanab gusoobreni diidx, gunreni te dzunsa'c. <sup>3</sup> Niluxh guxii runä xhigab gula'tztu narä, o gula'tz chutis guxhtis lo guedxliujre narä; nicla lagajc narä dina gunduxhä xhigab xho nacä nez loj Dios. <sup>4</sup> Entis rbedxi xcärienä, per xhet xcuent ni'c di sajc guiniä xheti xtolä, Dad Jesucrist najc nani rula'tz narä, rhuilojni xho nacä. <sup>5</sup> Ni'cni la'tu na'c gucuaquijtu bejn che gajd guidzujn dxej; colcuäjz jiaäd Jesucrist dxejc laani sibääni lo bianij guiralii ni naga'tz lo nacäjy, luxh suluilozani xhi xhigab yu' neñ lastoo tejga rebejn, dxejc lo tejganu sudeed Dios ni nungäjñ xca'nu.

<sup>6</sup> Rebetzä, xcäl'nasa'ctu caniä rediidxre lojtu. Caniä xcuent Apolos näjza narä, si'c te yäl'ruluii te fiitu xho riennu te na'cza guntu recos ni xhet caj di lo rexquijtz Dios, te na'cza guiliä'ptu xpala'n tejtü lo resa'tu, lañ ni cabälaztu steeni. <sup>7</sup> Sa'csi ¿chuni'c rñii najclu bensa'cru lo ste'ca bejn?, o ¿xhini'c rajplu ni di Dios nuniidx lojlu? Luxh palga cuaxlia'luni, ¿xhicuent lagajc luj rliä'plu xpala'ntu, lascanu rut baniidxdi lojlu recos ni rajplu?

<sup>8</sup> Rujntu xhigab rajptu xhidajñ cos, naatu najctu ricwduxh, rchalotu najctu reii, dirutu guiquiin nuurnu. Malaii gulii najcactu reii te näjzanu guinibenäjnu la'tu. <sup>9</sup> Niluxh runä xhigab gule Dios reapost si'c rebejn ni xhet sajcdi. Najcnu si'c rebejn ni gunibeereni guet. Nez loj rebejn guedxliuj näjza nez loj rexangl Dios najcnu si'c rebejn ni rdedlojtis bejn lojreni. <sup>10</sup> Nuurnu najcnu bejnayääl xcuent Crist, niluxh la'tu rchalotu racheduxhtu rextidx Crist. Nuurnu najcnu bejn ni xhet nadipdi, niluxh la'tu najc bendanduxh. Rliä'p rebejn xpala'ntu, ni'c rbälazreni nuurnu. <sup>11</sup> Cadeednu trabajwduxh naj, rliaannu, riojñnu, xho rñiaj xhajbnu, rdilñäj rebejn nuurnu, luxh xheti rolizñnu. <sup>12</sup> Rdxagñu riennu dzuun lagajc ñaanu te guidxälñu xhi guidaunu. Che rguerani loonu, rñiabnu lo Dios xcuentreni. Che rusacsí rebejn nuurnu, rientisnu huant. <sup>13</sup> Che rñiyajreni nuurnu, rulidxnäänureni didxdoo. Rujnreni xhigab najcnu si'c guijxh xten guedxliujre, ruhuiireni loonu si'cni xhet sajcdinu.

<sup>14</sup> Dina gucuaä rediidxre te gusanxtuiyätu. Rucuaä rediidxre te gulidxätu si'c rexi'nä ni sanälazä. <sup>15</sup> Palga ga'ptu tzuu miñ bejn ni guluiitu rediidx xten Crist, ruti stee xtadtü; narä gucä xtadtü, ganid narä basule'ä rextidx Dios lojtu. <sup>16</sup> Ni'cni rulidxä la'tu, colyejn si'cni ruhuiitu runä.

<sup>17</sup> Ni'cni baxhalä Timoteu lojtu, najcni si'c xi'nä ni sanälazä, ni rusooob diidx xcuent Crist. Laani susnajni lajztu xho mood nabañä lo yäl'nabajñ xten Jesucrist, sigajcni ruluiä neñ reguidoo guiraasi lajt. <sup>18</sup> Yu'tu ni acayajc gualajz, naatu pet dina guibisacä lojtu. <sup>19</sup> Cabazä jiaadhuiätu, palga si'c rlajz Dios, dxejc sacbeä chuni'c najc rebejn ni cayajc gualajz, fiä xhipacni rujnreni, xhet xtiidxtisreni gacbeä. <sup>20</sup> Sa'csi xcäl'nibee Dios xhet ganaxtis xcuent diidx najcni, näjza dzuun ni rujnreni ruluiloj xcäl'nibee Sprit Dxan xten Dios ni rajpreni. <sup>21</sup> ¿Xho rlajzzatu guidzunä lojtu, ä? ¿La sidzunä si'c te dad ni ca' te baar te quinätu o la guidzunää yäl'rinälajz näjza yäl'nadolajz te gulidxätu, ä?

## 5

*Xho nanab gunnäjtu te bejn ni rujn falt lo sa'ni*

<sup>1</sup> Agucbeä yu' tejtü ni ahuililajz xtidx Dios, cua'ni si'c chäälni te gunaa ni gujc chääñ xtadni. Dee najc te dolduxh nani nicla reni di chalilajz xtidx Dios direni gun. <sup>2</sup> Luxh la'tu gujctu gualajz lacuaa niac-huin lastootu; te bejn nani bejn dojñga, riäjñ nibääñtuni nez lojtu. <sup>3</sup> Mase ruti narä ro'c, lastoä suganäj la'tu. Alabenä xhigab xhini'c jiennäjnu bejnğa ni bejn dolduxhğa, sigajc ni niunä paru suga'ä ro'c. <sup>4</sup> Con laj Dad Jesucrist, che



abidxagsa'tu, luxh alastoä suganäj la'tu, con xcälrnibee Dad Jesucrist, <sup>5</sup> abenä xhigab gutednu bejnğa ladzṅaa beṅdxab te ted tiejxhni trabajw, niluxh sprit xtenni laani neṅ dxej ni jiädsac Dad Jesucrist lo guedxliujre.

<sup>6</sup> Di guchaag guiliä'ptu xpala'ntu xcuent dzuun ni rujntu. ¿La ditu gan te dojl najc si'c tudxe'n cojb ni ruslaj, rusaguijni cojb cadre ru'chni, ä? <sup>7</sup> Colgudzucaj cobyujxhga, te guibajntu te yälṅabannayacoob si'c te cobyä, sa'ni racchee yätxtiil ni xheti levaduur yejcnı par lanij xten pascw. Arajptu yälṅabannaya sa'csi agujt Jesucrist sigajc gujt te xile' lo lanij pascw te badzucajni rextojlṅu. <sup>8</sup> Si'c nanab jiennu lanij xten pascw con yätxtiil ni xheti levaduur yejcnı, nalajznu con yälṅuliipac neṅ lastoonu, xhet yätxtiildi ni yu' cobyujxhga yejcnı, nalajznu na'c gunlu latsiaj.

<sup>9</sup> Lo stee guijt abacuaä lojtu, na'c guchaagtu reben ni runnäj cosguijdx bejn ni di gac chäälreni. <sup>10</sup> Niluxh xhet caniädi xcuent reben guedxliuj ni rujn cosguijdx con bejn ni di gac chäälreni, niclaza xcuentdi reben ni rchaglazte meel, niclaza reben ni najc gubaan, niclaza reben ni riu rebanäjb. Paru si'c gacni, nanab jiunejztu guedxliujre. <sup>11</sup> Niluxh narä bacuaä guijtza lojtu te na'c guchagsa'tu te bejn nani rnii ahuililajzni xtidx Dios, luxh rujruni cosguijdx con bejn ni di gac chäälri, o rchaglaztejni meel, o riuni rebanäjb, o rniyaj sa'ni, o rsiojzni, o rusgueeni bejn te rca'ni xhi xtenni. Rniäza lojtu, nicla gaunäjtu sa' bejnğa. <sup>12-13</sup> Sa'csi narä di gacdi gunä yälṅuxhtis loj reben ni gajd chalilajz xtidx Dios. Gunti Dios yälṅuxhtis lojreni. La'tu nungäjṅ guntu yälṅuxhtis loj reben ni ahuililajz xtidx Dios. Ni'cni colgudzucaj bendojlga lojtu.

## 6

### *Na'c chäätu loj rebendojl te gunreni yälṅuxhtis lojtu*

<sup>1</sup> Palga tejtı ni ahuililajz xtidx Dios rlajz cue'c xquej stee sa'tu, ¿xhicuent chale'ctu xquejni loj rebendojl te gunreni yälṅuxhtis lojtu? ¿Xhicuent ditu guiniab yälṅuxhtis loj reben ni ahuililajz xtidx Dios, ä? <sup>2</sup> ¿La ditu gan, reben ni ahuililajz xtidx Dios sujn yälṅuxhtis lo reben guedxliuj, ä? Palga la'tu sujntu yälṅuxhtis lo reben guedxliuj, ¿la di gacdi guntu yälṅuxhtis lo sa'tu lo recosbäz lacuaa chäätu loj rebendojl te gunreni xcälṅuxhtisreni lojtu, ä? <sup>3</sup> ¿La ditu gan sienzaṅu yälṅuxhtis lo rexangl Dios, ä? ¿Aticaxh jiennu yälṅuxhtis loj recos baze' xten sa'nu lo yälṅabajṅre! <sup>4</sup> Palga la'tu cadilṅäj sa'tu xcuent recos xten guedxliujre, ¿xho mood chäälı loj rebendojl ni rut najcdi loj xquidootu, te naareni lojtu xhini'c guntu, ä? <sup>5</sup> Rniä rediidxga lojtu te guitujytu. ¿La ruti nicla tej beṅnasin loj guiraatu ni sajc gun yälṅuxhtis lo resa'tu, ä? <sup>6</sup> ¿Xhicuent rile'c te bejn ni rililajz xtidx Dios xquej bejtzni ni rililajz, luxh rijreni nez loj reguxhtis ni di chalilajz xtidx Dios?

<sup>7</sup> Mbaj naj, guliipacni alabanijttu sa'csi yu' yälṅrdilṅäj sa'tu; colṅutijp lajztu reben ni rujn dojl lojtu. Maazru huen colṅusaan sucua'reni xhixtentu. <sup>8</sup> Per dee, alga lagajc la'tu runnijttu loj lagajc resa'tu, luxh rca'tu xhixten lagajc resa'tu.

<sup>9</sup> O ¿la ditu gan reben dojl dipacreni jiu' lo xcälrnibee Dios, ä? Na'c gusaantu gusgueereni la'tu; nicla te resa' dee di jiu' lo xcälrnibee Dios: guiraa reni richagtoo regunaa; guiraa reni rajṅ rebanäjb; reni resnäjä bejn ni di gac chäälri; reniguii ni rungunaa; reni najc biräax; <sup>10</sup> reni najc gubaan; reni rsiäblajz xhixten bejn; reni rsiojz; reni rniyaj; reni rusguee bejn te rca'reni xmeel bejn. Nicla tej sa' redee di jiu' lo xcälrnibee Dios. <sup>11</sup> Yu'zatu ni gujc si'c galoo, niluxh naj abasia Dios lastootu, naj anajctu beṅnaya nez loj Dios sa'csi abiälṅajz Dios xtojltu xcuent Jesucrist, näjza xcuent Sprit Dxan xtenni. La'tu anajctu rexpejṅni.

### *Tiejxhnu najc xquidoo Dios*

<sup>12</sup> Guliini sajc gunä xhitis ni rlazä gunä, niluxh xhet guiraadini najc hueen par narä. Narä sajc gunä si'ctis ni rlazä, niluxh dina gusanä guinibee nicla tej xhi cos narä.

<sup>13</sup> Guliini najc yälrajw par xque'ni, luxh xque'ni najc par yälrajw, niluxh sidzujñ dxej sunitloj Dios guiro'preni. Per tiejxhnu di gac par jiennu cosguijdx con bejn ni di gac chäälnu. Tiejxhnu najc par Dios, luxh Dios najcza par tiejxhnu. <sup>14</sup> Luxh najc lagajc Dios guläs Dad Jesucrist lo rebengut, siliäszani nuurnu con xcälrnibeduxhni.

<sup>15</sup> ¿La ditu gan tejpgatu najc si'c te la' tiejxh Crist sa'csi ahuililajztu rextiidxni, ä? Palga tiejxhnu najc xten Crist, ¿la sajc gudeednuni loj te gunadxab, ä? ¿Gurniälöjlu jiennu si'c! <sup>16</sup> ¿La ditu gan cheni guchaagni te gunadxab rajcni tejtis tiejxh con laani, ä? Loj rexquijtz Dios caj: “Guir'o'preni sajc si'c tejtis bejn.” <sup>17</sup> Niluxh nani rudeed lastooni lo Dios anajczani tejtis con laani sa'csi rbäjz Sprit Dxan xten Dios neñ lastooni.

<sup>18</sup> Colguibicaj lo dojl ni rujn bejn con nani di gac chäälni. Xhitis stee dojl ni rujn bejn najcni lo jiaa tiejxhni, niluxh dojl ni runnäjni bejn ni di gac chäälni najc dojl lagajc neñ tiejxhni. <sup>19</sup> O ¿la ditu gacbee tiejxhtu najc xquidoo Sprit Dxan ni abaniidx Dios te cuääzni neñ lastoonu, ä? Ni'cni di gacdi guinibeeu lagajc la'tu. <sup>20</sup> Agudijx Jesucrist xtojñnu con xtiejñni lo crujz, ni'cni nanab jiennu dzunsa'c nani guiliä'p xpala'n Dios con tiejxhnu näjza Xpirtu.

## 7

### *Yälrlujdx xcuent yälruchnaa*

<sup>1</sup> Naj gudzu'ä diidx lojtu xcuent ni gunabdiidxtu cheni bacuaatu guijtz loä. Guliini hueen najcni na'c guchnaa te niguii. <sup>2</sup> Niluxh sa'csi yu' xhidajl reni richunäj chutis gunaa, suga'p tejpga reniguii chäälpacni; sigajcza suga'p tejpga regunaa chäälpacni. <sup>3</sup> Nanab niguii guchaagni chäälni che rlanj chäälni, sigajcza gunaa nanab guchaagni chäälni che ni si'c rlanj chäälni. <sup>4</sup> Di gunaa guinibee lagajc tiejxhni, sa'csi chäälni rnibee tiejxhni. Sigajcza di niguii guinibee lagajc tiejxhni, sa'csi chäälni rnibee tiejxhni. <sup>5</sup> Na'c gusuni' tejtu lo chäälni. Maazru hueen coljia'n diidx na'c guchagsa'tu te xcheje' te cuedx-guiniabtu lo Dios. Che luux cuedx-guiniabtu lo Dios, guchagsacs'a'tu te na'c guquil bendxabtu chunäjtu ste'ca bejn.

<sup>6</sup> Rniä rediidxre lojtu te ni rlanj guchnaa sajc guchnaani, niluxh dina guiniä lojtu, nanabpac guchnaatu. <sup>7</sup> Narä rlazä maläii sajc gac guiraa bejn si'c ni nacä. Dios abadeed loj tejpga bejn xho mood guibajñni. Yu'reni sajc guibajñ tej mood, yu'zareni sajc guibajñ garenca mood.

<sup>8</sup> Loj reben xteb näjza loj regunabiuud rniä, hueen najc na'c guchnaareni, gacreni si'c narä. <sup>9</sup> Niluxh palga di gacdi cue'cdxi lajzreni, suguchnaareni. Maazru huen guchnaareni te na'c guntisreni xhigab rlanjreni guchaagreni te niguii o te gunaa.

<sup>10</sup> Loj rebejn ni abachnaa, rniä rediidx ni basa'n Dad Jesucrist loonu: “Na'c guro'n gunaa chäälni.” <sup>11</sup> Niluxh palga guro'n te gunaa chäälni, na'c guchnasacni, o maazru hueen gusiäjñni diidx guibisacni lo chäälni. Sigajcza te niguii na'c guro'nni chäälni.

<sup>12</sup> Naj rediidx ni guiniä najc xhigab xtenä, xhet diidxdi ni basa'n Jesucrist loonu. Scree rulidxä la'tu. Palga yu' te niguii ni rililajz xtidx Dios, luxh chäälni di chalilajz xtidx Dios, luxh rlanj gunaaga cuäänäjni niguiiga, na'c guro'n niguiigani. <sup>13</sup> Palga yu' te gunaa ni rililajz xtidx Dios, luxh di chäälni chalilajz xtidx Dios, niluxh rlanjni cuäänäjni gunaaga, na'c guro'n gunaaga chäälni. <sup>14</sup> Palga yu' te niguii ni di chalilajz xtidx Dios, luxh chäälni rililajz xtiidxni, palga hueen nabannäj sa'reni, hueen najc yälruchnaaga nez loj Dios. Sigajcza palga yu' te gunaa ni di chalilajz xtidx Dios luxh chäälni rililajz xtiidxni, palga hueen nabannäjsa'reni, hueen najc yälruchnaaga nez loj Dios. Palga dini gac si'c, di Dios gunle' rexi'nreni, per naj abenle' Dios rexi'nreni. <sup>15</sup> Palga chäälni te gunaa o chäälni te niguii ni di chalilajz xtidx Dios luxh rlanjni guilia' sa'ni con chäälni ni ahuililajz xtidx Dios, sujiizani. Nani rililajz xtidx Dios diruni ga'p por cuäänäjni chäälni ni di chalilajz xtidx Dios, niluxh gurejdx Dios nuurnu te cuedxini lajznu. <sup>16</sup> Sa'csi ¿xho najnlu, gunaa, la

sus<sub>l</sub>aa Dios chäällu lo dojl<sub>l</sub> xcuentlu, ä? O ¿xho najnlu, niguii, la sus<sub>l</sub>aa Dios chäällu lo dojl<sub>l</sub> xcuentlu, ä?

<sup>17</sup> Si'ctis ni baniidx Jesucrist lo tejganu, si'ctis ni gule Dios tejganu, si'c suguibaj<sub>nnu</sub>. Si'cza rulidxä gunrenini ne<sub>n</sub> guiraa reguidoo. <sup>18</sup> Palga tej niguii rililajz xtidx Dios, luxh yu'ni bee tiejxhni, xhet najcdini. Palga stee niguii chalilajz xtidx Dios, luxh xheti bee tiejxhni, xhet najcdizani. Sujia'nni si'cni najcni. <sup>19</sup> Xhet najcdi la yu'ni bee o xhet beedi yu'ni. Tejtis ni nanab gunni, gusoobni rediidx ni gunibee Dios. <sup>20</sup> Tejgani jia'n si'cni najcni cheni gurejdx Diosni. <sup>21</sup> Palga najclu te mos ni guziireni te gunlu dzuun, dxejc huililajzlu xtidx Dios, na'c chulu yärsia' xcuent ni'c. Palga sajc gudzu'lu meel lo xlam<sub>l</sub>u, badzu'zani te gaclu te bej<sub>n</sub> ni rut rnibeedi. <sup>22</sup> Sa'csi nani najc te mos ni guziireni te gunni dzuun che huililajzni xtidx Dios, diruni gac te mos ni bio' nez loj Jesucrist, niluxh te bej<sub>n</sub> ni rut rnibeedi che rililajzni xtidx Dios, anajcni mos ni guzii Dios, najcni xmos Dios. <sup>23</sup> Guzii Cristtu con xtiej<sub>nni</sub>, ni'c na'c gusaantu guinibee bej<sub>n</sub> la'tu te gac guntu xtzun Dios. <sup>24</sup> Rebetzä, colchanuu gactu si'ctis ni najctu che gurejdx Dios la'tu, palga najctu mos ni guziireni, o te bej<sub>n</sub> ni rut rnibeedi.

<sup>25</sup> Redxa'p ni gajd guch<sub>naa</sub>, di Jesucrist ninibee xhini'c nanab gunreni. Gule Dios narä te gusule'ä xtiidxni. Naj gulidxäreni sa'csi nanä xtidx Dios, luxh racnäzjani narä. <sup>26</sup> Runä xhigab hueen najc palga di reniguii guch<sub>naa</sub> sa'csi siäd yäl<sub>n</sub>aganduxh lo guedxliujre. <sup>27</sup> ¿La alabach<sub>naa</sub>lu, ä? Na'c guro'nlu chäällu. ¿La alabaro'nlu chäällu, ä? Na'c chaxiilu chäällu. <sup>28</sup> Palga guch<sub>naa</sub>lu, xhet dojl<sub>di</sub> rujnlu. Palga guch<sub>naa</sub> te dxa'p, dizani gun dojl<sub>l</sub>. Niluxh reni ruch<sub>naa</sub> sidejdreni trabajw lo yäl<sub>n</sub>abaj<sub>nnre</sub>. Ni'cni rniä na'c guch<sub>naa</sub>tu sa'csi di rlazä tedtu trabajw.

<sup>29</sup> Rebetzä, rlazä guiniä lojtu rediidxre: Guxiiru dxej guibaj<sub>nnu</sub> lo guedxliujre, ni'cni reni abach<sub>naa</sub> na'c gunreni xhigab xtentis yäl<sub>r</sub>uch<sub>naa</sub>, te gac gunreni xtzuun Dios. <sup>30</sup> Luxh reni cayoon, nanab gunreni si'cni xhet cayoondireni; reni rbalajzreni, nanab gunreni si'cni xhet cabaadi lajzreni; reni rzii xhicos, nanab gunreni si'cni xhet rajpdireni; <sup>31</sup> näjza reni rujn recos lo guedxliujre, nanab gunreni si'cni dini gunni, sa'csi recos ni rhuinu lo guedxliujre, alacanitlojreni.

<sup>32</sup> Narä rlazä na'c chutu yärsia'. Rebej<sub>n</sub> ni gajd guch<sub>naa</sub>, riureni rextzuun Dios, näjza xho guspaareni lajz Dios. <sup>33</sup> Renani abach<sub>naa</sub> riureni recos guedxliujre te guspaani lajz chäälni, <sup>34</sup> tiop najc xhigabni xcuent recos nani gunni. Sigajcza najc te gunaa ni abach<sub>naa</sub> con tejni gajd guch<sub>naa</sub>. Sa'csi te gunaa ni gajd guch<sub>naa</sub> riuni rextzuun Dios te gacreni gunadxan nez loj Dios con tiejxhreni näjza con lastooreni. Niluxh regunaa ni abach<sub>naa</sub> riureni recos guedxliujre, näjza xho guspaani lajz chäälreni.

<sup>35</sup> Rniä rediidxre par xcäl<sub>n</sub>asa'ctu, xhet gudxonädi la'tu, te gunrutu redzunsac, te chanälazsa'ctu Dios.

<sup>36</sup> Palga yu' chu te niguii lojtu ni rujn xhigab, maazru hueen guch<sub>naa</sub> xindxa'pni sa'csi acayajcni gunagool, dini gun dojl<sub>l</sub>, sajc gudeednini guch<sub>naa</sub>ni. <sup>37</sup> Palga steeni dini gun xhigab si'c nanab gunni, sajc gunni si'ctis ni rlanjzni palga abejnpacni xhigab ne<sub>n</sub> lastooni di xindxa'pni guch<sub>naa</sub>, hueenza najc si'c. <sup>38</sup> Ni'cni nani rudeed xinda'pni guch<sub>naa</sub>, hueen ruj<sub>nni</sub>, sigajcza nani dini gudeed xindxa'pni guch<sub>naa</sub>, laacaza ruj<sub>nni</sub>.

<sup>39</sup> Te gunaa ni abach<sub>naa</sub>, rajpni por guibannäj<sub>ni</sub> chäälni guideb nabaj<sub>n</sub> chäälni. Palga guet chäälni, jianxtebni stehuält, dxejc sajc guch<sub>naa</sub>ni chutis niguii ni rlanjzni, palga najcni tej ni ahuililajz xtidx Dios. <sup>40</sup> Narä rchaloä maazru guibaa lajzni palga dini guch<sub>naa</sub>. Si'c najc xhigab ni runä, luxh riliipac lazä cayacnäj Sprit Dxan xten Dios narä.

## 8

### *Yäl<sub>r</sub>rajw ni ruzujreni lo rebanäjb*

<sup>1</sup> Rniä lojtu xcuent reyäl<sub>r</sub>rajw ni ruzujreni lo rebanäjb. Guliini guiraanu rajpnu yäl<sub>n</sub>aj<sub>n</sub> xcuent recosga. Niluxh yäl<sub>n</sub>aj<sub>n</sub> rujn rajc bej<sub>n</sub> gualajz. Luxh yäl<sub>r</sub>inälajz sa'ni, ni'c rujn

racnäjnu resa'nu. <sup>2</sup> Palga yu' chuni'c rujn xhigab nanduxhni, rusgueeni lastooni sa'csi cayäädxru gacbeeni si'c ni nanab gacbeeni. <sup>3</sup> Palga yu' chu sanälajz Dios, Dios anumbee bejnga.

<sup>4</sup> Ni'cni, xcuent reyälrajw ni risujreni loj rebanäjb, anancheenu xhet sajcdi rebanäjb ni yu' lo guedxliuj, ruti stee Dios; tejtis ni najc Gueb Dios. <sup>5</sup> Masque yu' reni rniireni najc “dios” xhaguibaa o loj guedxliuj, luxh yu'za xhidajl “dios” näjza xhidajl lam ni rnibee, <sup>6</sup> per nuurnu nadonnu yu' tejtis Gueb Dios, Dad nani benchee guiraa recos, luxh lojtisni nabajnu. Rajpnu tejtis Dad ni rnibee loonu, ni'c najc Jesucrist. Xcuent xcälrnibeeni gucchee guiraa recos loj guedxliuj, luxh nuurnu nabajnu xcuent Jesucrist.

<sup>7</sup> Niluxh xhet guira'ti bejn najn yu' tejtis Dios. Yu' rebejn ni ahuililajz xtidx Dios abia'reni rajnreni rebanäjb, luxh rajwzarenı reyälrajw lascanu guzujni loj banäjb sa'csi nacäjyru xcäriejnreni, ni'cni et laadi ria'n lastooreni, rxhinza xcäriejnreni. <sup>8</sup> Xhet xcuent xhi rdaudinu sajcdi guibansa'crunu lo xnejz Dios. Xhet najcdi palga guidaunu o palga dinu guidaunu. <sup>9</sup> Colnatiro xhi rujntu te na'c guntu jiajb te bejn lo dojl nani gajd chalilazsa'c xtidx Dios. <sup>10</sup> Palga te bejn ni gajd chalilazsa'c xtidx Dios fiini cayajwlu reyälrajw ni guzuj lo rebanäjb, luxh luj najclu te bejn najn, sa'csi dee gajd gacbesa'c rextidx Dios, ¿la di lajzni gac nadip te näjza laani chatajwni yälrajw ni guzuj lo rebanäjb? <sup>11</sup> Niluxh luj, xhet dojldi cayujnlu, per bejtzlu ni gajd chalilazsa'c xtidx Dios, sixijni, luxh najcni bejtzlu sa'csi näjza par laani gujt Dad Jesucrist lo cruzj. <sup>12</sup> Si'cza che rujnlu dojl lo bejtzlu, runnajlu lajzreni sa'csi gajd xcäriejnreni jiansa'c, luxh si'c cayujnzalu dojl lagajc lo Crist. <sup>13</sup> Ni'cni, palga narä runä riabsac betzä lo dojl xcuent ni rauä, hueenru dirunä gauä yälrajw ni gun jiajb betzä lo dojl stehuält.

## 9

### *Xhi sajcdi gun te apost*

<sup>1</sup> ¿La dina gacä te bejn ni rut lojdi yu'ä? ¿La xhet apostdi narä? Ni abahuiä lo Dad Jesucrist, abasule'ä rextiidxni lojtu, ni'c huililajztu xtiidxni. La'tu najctu xtzunä ni runä lo Dios. <sup>2</sup> Yu' reni di gumbeeni narä si'c te apost, niluxh la'tu abiembesa'ctu narä sa'csi ahuililajztu rextidx Jesucrist ni abasule'ä lojtu. Ni'c ruluiloj guliipac nacä te apost.

<sup>3</sup> Diidx ni rniä scree loj reni di chalilajz nacä apost najc scree: <sup>4</sup> ¿La di riäjl xca'ä guiraa ni runiidxtu gauä näjza ni runiidxtu yä'ä? <sup>5</sup> ¿La digacdiza gapä te chälä ni ahuililajz xtidx Dios dxejc chanääzani sigajc rujn guiraa reapost, näjza rebetzhuin xten Dad Jesucrist näjza Pedr? <sup>6</sup> O ¿la xtebtis Bernabé näjza narä di gacdi cuääz jiennu dzuun te guidaunu laj rusule'nu xtidx Dios? <sup>7</sup> ¿Chuni'c rajc soldaad luxh lagajc laani siini xhi gauni? O ¿chuni'c rusuj yaguub luxh dini gau ninejxh ni rcaj lojga, ä? O ¿chuni'c rajp gaii dxib, luxh dini yä le'ch ni rudeedreni, ä? <sup>8</sup> Na'c guntu xhigab lagajc xcuentä cania rediidxre lojtu, sa'csi näj loj xleii toMoisés caj diidx xcuent recosre. <sup>9</sup> Loj reguijtz xten xleii toMoisés caj rediidxre: “Na'c gusällu guijxh ro' gon che cayo'tni yejc triuu.” ¿La guniitis Dios rediidxre sa'csi riuni regon, ä? <sup>10</sup> ¡Dini gac! Xcäl'nasa'cnu guniini rediidxga, sa'csi bejn ni rujn dzuun lo niaa näjza nani rusia triuu riäjl gunlojni xca'ni te yäl'nasa'c ni rajc lo xnianı. <sup>11</sup> La'tu najctu si'c te yuj cadre gule'cnu binij sa'csi basule'nu rextidx Dios lojtu, ¿la rujntu xhigab dzunro najc gacnäjtu nuurnu tudxene', ä? <sup>12</sup> Palga racnäjtu ste'ca bejn ni ruluıitu, nungäjlrı gacnäjtu nuurnu.

Niluxh gajdnu guinii si'c lojtu sa'csi di rlaizdinu guidxoonnu chalilazsa'ctu rextidx Dios, ni'c chotipnu lajznu guiraa retrabajw ni cadeednu. <sup>13</sup> La'tu najntu reni rujn dzuun nejn guidoro rajwreni rebääl ni risa'nreni lo Dios, sigajcza reni rujn dzuun lo dxan cadre risa'nreni xpääl reguidxaa lo Dios, näjza laareni rajwreni rebäälga. <sup>14</sup> Si'cza gunibee Dad Jesucrist loj reni gusule' xtidx Dios, xca'reni xhi gaurenı lagajc loj reni rililajz xtiidxni. <sup>15</sup> Niluxh gajdpacna gunä si'c, xhetza caca'ädi. Dizana gucuaä rediidxre lojtu naj te



guniidxtu xhi xca'a. Hueenru guetä te na'c gudzucaj te bejn yälrbalajz ni rapä xcuent dzuun ni runä lo Dios.

<sup>16</sup> Narä dina gapä xhicuent guiliä'pä xpala'nä che rusule'ä xtidx Dios. Sa'csi si'c nanabpac gunä, sa'csi probe'za narä palga dina gusule'ä xtidx Dios. <sup>17</sup> Palga gunä dzuunre sa'csi rdxaglazäpac gunäni yu' xhi guniidx Dios loä. Mase runäni con yälrigaan, empac Dios agule narä te gusule'ä xtiidxni. <sup>18</sup> ¿Xhini'c najc xcuent ni xca'ä, ä? Che gusule'ä xtidx Dios lo chutis bejn, ligaj gusule'äni, te di gusule'ä xtiidxni te guniidx rebejn xhi guniidxreni xcuent xtzunä, mase si'c riäjl gunreni.

<sup>19</sup> Rut xmosdi nacä, luxh lagajc narä benä xhigab gacä si'c te mos te gunä gaan chalilajz xhidajl bejn xtidx Dios. <sup>20</sup> Cheni yu'ä loj rexpejn Israel, runä si'cni rujnreni te gunä gaan chalilajzreni rextidx Dios. Che rlazäza guiniä loj reni nabajn loj xleii toMoisés, dxejc runä si'c rujnreni te gunä gaan chalilajzreni rextidx Dios, niluxh diruna guibanä lo leiiiga. <sup>21</sup> Stee lajt cadro rlazä gunä gaan reni di guibajn lo xleii toMoisés, runä si'c rujnzaren, mase empac nabanä lo xleii Dios sa'csi rusobä diidxni basa'n Crist. <sup>22</sup> Cheni yu'ä loj reni guxii rililajz xtidx Dios, racäza si'c ni najczeni te gunä gaan chalilazsa'ceni. Narä runä sigajc rujnreni, te si'c gunä gaan chalilajz xhidajlreni xtidx Dios. <sup>23</sup> Runä guira'ti xcuent xtidx Dios ni rusläa bejn lo dojl, te xca'zanu, narä näjza rebejn ni ahuililajz xtidxä, yäl'nabajn par tejpas.

<sup>24</sup> Anajntu che ru' te lanij, che ruxun reniguii, guiraareni ruxun, niluxh tejtis ni rca' ni ruzalajzreni. Colguxunza nez lo Dios te gunzatu gaan. <sup>25</sup> Guiraa reni rlajz guxun rapdareni tiejxhreni te ga'p tiejxhreni yäl'nadip, yäl'nadaan. Luxh laareni ruxunreni si'c te gunreni gaan te cos ni di gaclaa agunitlojni. Niluxh nuurnu ruxunnu te guniidx Dios loonu nani dipac nitloj. <sup>26</sup> Narä dina guxunä si'cni dina ganä caro cha'ä, dizana gucuaä si'c te bejn ni rucuanäj te balaa, o cayäätzisi ni loj. <sup>27</sup> Niluxh narä runä rajc tiexhä si'c xmosä te na'c gunni si'ctis ni rlajzni, te gunni nani rlajz Dios te di cheni abasule'ä xtidx Dios loj xhidajl bejn, gusanxtujy tiexhä narä.

## 10

### *Yäl'rulijdx lo xcuent rebanäjb*

<sup>1</sup> Rebetzä, di rlazä jiäl'lajztu ni gusajc retoxtadgoldoonu. Gusajreni xpalaä te za gudejdzareni galäii nisdoo ni laa Nisdo Xniaa. <sup>2</sup> Gudejdreni xpalaä te za näjza gudejdreni galäii nisdoo; ni'c najc si'c te yäl'robnis sa'csi sanajlreni toMoisés. <sup>3</sup> Sigajcza guiraareni gudajw tejtis yäl'rajw ni baxhal Dios xhaguibaali. <sup>4</sup> Guiraaazareni gu' nis ni badeed Dios, Dios bejn birii nisga cuä' te guilaj. Luxh Xpirt Crist gusanäjreni cadrotis sääreni nez lo reyubidzroga. Luxh con xcäl'nibeeni birii nis loj guilajga, Crist najc si'c guilaj ni huinäreni. <sup>5</sup> Dios bidxechnäj xhidajlreni, ni'c xhidajlreni gujt nez lo reyubidzga.

<sup>6</sup> Guiraa rediidxga najc te yäl'rulijdx loonu, te na'c guichagljaznu jiennu lagajc redojl ni bejn retoxtadgoldoonu. <sup>7</sup> Na'cza gañtu rebanäjb si'c ni bejn baltireni; acaj lo rexquijtz Dios xcuentreni: "Rebejn ni guyaa lajz gurejreni te gu'reni, gudajwreni, dxejctiru huisuren te gusloj caguijtreni." <sup>8</sup> Na'c chunäjnu stee bejn di gac chäältu si'c bejnreni, ni'cni gujt gal'bichon mil'reni tejtis dxej. <sup>9</sup> Na'cza guche'chnu Dios con rextojl'nu si'c bejn balti rebejn'ga, ni'cni gujtreni sa'csi gudauya' bäl'reni. <sup>10</sup> Na'cza chamojmtu xcuent ni rujn Dios si'c ni bejn rebejn'ga xcuent ni bejn Dios, ni'cni baxhal Dios angl xten yäl'gujt bagu't xhidajlreni.

<sup>11</sup> Guiraa redee gusajc retoxtadgoldoonu te rulijdxni nuurnu, cuajzaren lo guijtz te guluii rediidxga nuurnu xho riäjl jiennu, nuurnu ni nabajn'nu neñ redxej naj. <sup>12</sup> Ni'cni chutis ni rujn xhigab nabañsa'cni nez loj Dios, sudzu'tzni te di jiabsacni. <sup>13</sup> Xheti te trabajw ni cadejdtu nani gajd ted chutis bejn. Niluxh di Dios cuälaztu, dini gusaan tedrutu dzunduxh nani digacdi guntu huant, suniidx Dios yäl'nadip yäl'nadaan lojtu te che tedtu trabajw sidxältu xho guibicajtu lo dzunduxhga, te gutiplajztu.



<sup>14</sup> Ni'cni rniä lojtu, rebetzä nani sanälazä, colbicaj lo yälrajn xten rebanäjb. <sup>15</sup> Rniä lojtu si'c lo te beñ nasin, te beñnajn: colgulatzsa'c rextidxä don la laaca najcreni. <sup>16</sup> Che rdaunu xchej xten Dad Jesucrist najcni te seen nabañnäänu Jesucrist. Che rdunnu neñ co'p, rnaalajznu gudijx Dad Jesucrist xtiejnni xcuent xtojlnu lo cruzj. Che rdaunu yätxtiil, sälojni anajcnu tejtis xcuent tiejxhni ni badeedni cuaj lo cruzj xcuentnu. <sup>17</sup> Sa'csi yu' tejtis yätxtiil, mase najcnu xhidajl, najcnu si'c tejsi tiejxh sa'csi tejsi yätxtiil rdaunu che rauxchejnu xchej xten Dad Jesucrist.

<sup>18</sup> ¡Bahuii xho rujn rexpejn Israel! Rajwreni xpääl reguidxaa ni rile'creni lo Dios lo dxan neñ guidoo, ni'c najcreni tejsi con guiraa rebejn nani rujn sigajc rujnreni. <sup>19</sup> ¿Xhixhni'c rlazä guiniä, naj? ¿La caniä yu' xhi sajc gojn nani gule'c bejn lo banäjb, ä? O ¿la yu' xhi sajc banäjbga, ä? <sup>20</sup> Xhet sajcdireni. Narä caniä lojtu dee: Recos nani rbe'c rebenzajt lo rebanäjb, lo rebenđxab cabe'crenini, et lojdi Dios. Luxh narä dina rlazä gactu tejsi con rebejn nani rbe'c lo rebenđxab, te di chachunäjzatu rebenđxab. <sup>21</sup> Sa'csi digacdi yätu co'p ni rusnaj laaznu ni bejn Dad Jesucrist lo cruzj năgajcza co'p nani rudeedreni lo rebenđxab. Digacdiza guidaunu xchej xten Dad Jesucrist năgajcza xchej ni rudeedreni lo rebenđxab. <sup>22</sup> O ¿la rlaznu guche'chnu Dad Jesucrist, ä? ¿Xhixh maazru nadipnu lojni, ä? ¡Gurniä lojtu!

### *Colyejn guira'ti te chă'p xpala'n Dios*

<sup>23</sup> Guliicani, sajc jiennu xhitis ni rlaznu jiennu, niluxh xhet guira'ti ni rlaznu jiennu najc hueen par nuurnu. Guira'ti najc laaca, niluxh yu' reni di gacnăj gustioobnu lo xcălrililajz Dios. <sup>24</sup> Na'c guntu xhigab quiiltistu lagajc xcălnasa'ctu; maazru hueen quiilzatu xcălnasa'c xpisintu. <sup>25</sup> Coltajw xhitis băäl ni rdo' lo guii, na'c guiniabdiidxtu caro siăädni te di gacnaj xcăriejntu. <sup>26</sup> Lo xtidx Dios caj rediidxre: “Sa'csi guideb guedxliuj năjza guiraa ni tre' lo guedxliuj najc xten Dios.”

<sup>27</sup> Palga jiădgajn te bejn ni di chalilajz xtidx Dios luj jiădtaunăjluni luxh acuăjblu chăälu, huijza, gudajw xhitis ni cue'cni nez lojlu, na'c guiniabdiidxlu te di gacnaj xcăriejnlu. <sup>28</sup> Palga yu' chu naa lojlu: “Dee najc băäl ni bile'cnu lo rebanäjb”, na'c gauluni, didi gunni gunijt dade'ga ni gunii si'c lojlu te di gacnajza xcăriejn chutis. <sup>29</sup> Dina guiniä xcăriejnlu, didi gunnajni xcăriejn stee dade'ga; mbaj naj, ¿xhicuent riăjl gula'tzreni narä sa'csi rajc rună guira'ti porsu racnaj xcăriejn ste'ca bejn, ä? <sup>30</sup> Palga rudedă xquixtios lo Dios nani runiidx xhi rauă, ¿xhicuent rniyajreni narä ni rauă, luxh abadedă xquixtios lo Dios? <sup>31</sup> Ni'cni palga gautu, o palga yätu o xhitis ni rujntu, colyujn guira'ti te chă'p xpala'n Dios. <sup>32</sup> Na'c guche'chtu nicla rexpejn Israel niclaza rebenzajt, niclaza rexpejn xquidoo Dios. <sup>33</sup> Sigajcza rună nară, rună guira'ti ni ruspaa lajz rebejn, dina quilă xcălnasa'cătis, alga rguilă xcălnasa'c xhidalduxh bejn, te laareni lo dojl sa'csi ahuililajzreni xtidx Dios.

## 11

<sup>1</sup> Colyejn si'cni rună nară, sigajcza nară rună si'cni rujn Jesucrist.

### *Xho riăjl gun regunaa neñ xquidoo Dios*

<sup>2</sup> Rliă'pă xpala'ntu sa'csi lo guira'ti rnaj lajztu nară, rnajza lajztu rediidx nani baluiă lojtu, sudzu'tztu rusoobtu rediidx sigajcni baluiăreni lojtu. <sup>3</sup> Nară rlază gacbeepactu Jesucrist najc nani rnibee lo niguii, dxejctiru niguii rnibee gunaa si'c rnibee Dios Jesucrist. <sup>4</sup> Chutis te niguii ni yu' xhumbreel yejcnu lălni cabedx-canabni lo Dios o lălni caguluini xtidx Dios, laani rusanxtujyni yejcnu. <sup>5</sup> Palga yu' te gunaa ni dini gusău xpăiini yejcnu che cabedx-canabni loj Dios o che caniini xtidx Dios, rusanxtujyni yejcnu sa'csi najcni sigajc najc te gunaa ni abigaj yejcnu. <sup>6</sup> Palga di te gunaa gusău xpăiini yejcnu suguigaj yejcnu. Palga najcni te xtujy guigaj yejcnu, sugusăuni xpăiini yejcnu. <sup>7</sup> Di guchaag gusău te niguii yejcnu sa'csi najcreni si'c xtuxh Dios, năjza xcălrđimbicha' Dios. Niluxh regunaa najc si'c xcălrđimbicha' niguii. <sup>8</sup> Sa'csi di niguii nărixtiej cuă' gunaa; gunaa najc

ni birixtiej cuä' niguii. <sup>9</sup> Xhetza xcuent gunaadi guc-chee niguii; gunaa najc ni guc-chee xcuent niguii. <sup>10</sup> Ni'cni nanab jäu yejc gunaa neñ guidoo si'c te seen lo rexangl Dios yu' chu rnibeereni. <sup>11</sup> Niluxh nez lo Dios nicla niguii niclaza gunaa digacdi guiban xtebreni. <sup>12</sup> Sigajc galoo birixtiej gunaa cuä' niguii, sigajcza naj gunaa najc nani ruu báz; luxh Diostis najc nani runchee guira'ti rebejn.

<sup>13</sup> Colyejn lagajc xhigabtu naj, ¿la laaca najcni cuedx-guiniab te gunaa lo Dios lañ ni xhet niäudi yejcnì, ä? <sup>14</sup> Loj reben guedxliuj guiraa reniguii rgaj yejcreni, sa'csi najcni te xtjuy guigaduxh xquidxejcreni. <sup>15</sup> Niluxh regunaa hueen najc rga' xquidxejcreni te rusäuni yejcnì. <sup>16</sup> Palga yu' chu tiläidix xcuent rediidix nani caniä lojtu, nanab gacbeeni si'ctis riennu, si'ctisza rujnreni neñ guiraa rexquidoo Dios.

### *Xho ruxhiñreni xchej Dad Jesucrist*

<sup>17</sup> Rediidixre ni cagucuaä lojtu, direni guiliä'p xpala'ntu, sa'csi che rdxagsa'tu neñ xquidoo Dios, lacuaa laaca cuetu, xhet laadi rujntu. <sup>18</sup> Rnixgaä dee: Abiejn diagä che re'tu lo xquidoo Dios, rlia'tu lo sa'tu rajctu tiop cuaa; luxh riliica lazä rediidixre. <sup>19</sup> Pet naatu nanab guntu si'c te gacbeetu chureni'c sanälajzpac Dios, chureni'c sajcro lo xtzuum Dios. <sup>20</sup> Ni'cni che rdxagsa'tu, dini gac te cuetu lo xmex xchej Dad Jesucrist, <sup>21</sup> sa'csi che agule'creni xchej lo mex, tejga bejn rlajz xcaxgaa xhi gauni, dxejc yu' reni agudxadoo xque'reni, agusojzarenì, lañni yu' stee cuaa bejn calaan, gajdreni gau. <sup>22</sup> ¿Xho mood? ¿La xheti roliztu cadre gac gautu, yätu, ä? O ¿la rbälazlu xquidoo Dios, ni'c rusanxtujylu rebejn ni xhet räjpdi, ä? ¿Xhini'c guiniä lojtu naj? ¿La naatu guiliä'pä xpala'ntu xcuent nani rujntu, ä? ¿Gurniälojtu guiliä'pä xpala'ntu!

### *Xchej Dad Jesucrist*

*(Mt. 26:26-29; Mr. 14:22-25; Lc. 22:14-20)*

<sup>23</sup> Baluiloj Dad Jesucrist loä lagajc nani baluiä lojtu xcuent xho bejnni guxhiñ che gudaunäjni rexpejnni te xchej xten pascw, guxhiñ ni gudo'ni. Cua'ni yätxtiil, <sup>24</sup> dxejc che abadeedni xquixtios lo Dios, gula'ni yätxtiilga, räjpni lojreni: “Colgajw, dee najc tiexhä ni gudedä guet xcuenttu. Scree guntu te guinalajztu narä.” <sup>25</sup> Si'cza bennäjni co'p che gulujx gudajwreni, räjpni lojreni: “Ni yu' neñ co'pre najc si'c xtienä; che ju'treni narä, sixe' xtienä xcuenttu, si'c te seen xten didxcoob ni gusa'n Dios loj rebejn ni aguleni. Scree guntu te guinalajztu narä.” <sup>26</sup> Che gautu yätxtiilga, che yätu neñ co'pga, ruluilosactu xhi bejn Jesucrist che gudijxni xcuent rextojñnu lo cruzj; si'cza colyujn dxejli ni guibisacni lo guedxliujre.

### *Xho riäjlgac xchej Dad Jesucrist*

<sup>27</sup> Ni'cni rniä lojtu, chutis tejtü ni rajw yätxtiil, ni rä'za co'p xten xchej Dad Jesucrist, palga dini gusoob xtidx Dios, rujnni dojl, najcni si'cni lagajc laani bagu't Jesucrist, baxhe'zani xtiejnni. <sup>28</sup> Niluxh sugula'tz tejtatu lagajc lastooni don la yu' xhi dojl bejnni, dxejcti sajç gauni yätxtiil, yäni co'p xten xchej Dad Jesucrist, sa'csi abaxhobdojñni. <sup>29</sup> Chutis bejn ni gau, ni yä xchej Dad Jesucrist, luxh dini gula'tz lagajc lastooni xhicuent gauni, yäni xchej Dad Jesucrist, lagajc laani rujnni jiajb xcälnej Dios yejcnì. <sup>30</sup> Ni'cni lacti resa'tu racxhuu, xhet nadaanreni, luxh yu'zarenì agujt. <sup>31</sup> Ni'cni nanab finu xho najcnu, guiniabnu lo Dios gudzucajni rextojñnu te didi tednu trabajw. <sup>32</sup> Niluxh che rdejndu trabajw, rdejnduni te na'c tednu trabajwduxh si'c ted reben guedxliuj che gacreni yälguxhtis xten Dios.

<sup>33</sup> Ni'cni rniä lojtu, rebetzä, che guire'tu te gautu xchej, colcuäjz resa'tu. <sup>34</sup> Palga yu' chu tejtü ni calaan, sugauni lagajc rolizjni, te di gun Dios yälguxhtis lojtu. Guiraa rexhistee cos, che jiälä ro'c fiä don xho gacsa'cni.

## 12

### *Dzuun ni rudeed Sprit Dxan xten Dios lo tejga ni rililajz*

<sup>1</sup> Rebetzä, rlazä gacheetu xcuent dzuun ni rudeed Sprit Dxan xten Dios lo tejganu.

<sup>2</sup> La'tu najntu che gajdtu chalilajz xtidx Dios, rajntu chutis banäjb ni di gachee, ni naatis bejn gantu. <sup>3</sup> Ni'cni rlazä gacheetu naj, nicla tejtü ni yu' Xsprit Dxan Dios nen lastooni sajc guinii: "Xhet sajcđi Jesucrist." Luxh rut rajcđi rnii: "Jesucrist najc Dadbid baxhuaannu", palga di Xsprit Dxan Dios cuääz nen lastooni.

<sup>4</sup> Mbaj naj. Yu' xhidajl dzuun ni rudeed Dios loj rebejn ni huililajz xtiidxni, niluxh tejsi najc Xsprit Dxan Dios ni rujn dzuunga nen lastoo guiragajcnu. <sup>5</sup> Yu'za balti cuaa dzuun nani riennu, niluxh tejsi najc Xtadbid baxhuaannu. <sup>6</sup> Yu' xhidajl mood rajc dzuun, niluxh tejsi Dios rujn dzuunga lastoo guiralii bejn. <sup>7</sup> Tejga bejn ruluiloj garen-garen xtzuum Sprit Dxan xten Dios, niluxh guira'ti redzuunga najc te gacnäjreni guiraanu. <sup>8</sup> Lo tej bejn rudeed Sprit Dxan yäl'nasiñ, lo steeni rudeed lagajc Sprit Dxanga yäl'najn. <sup>9</sup> Lagajcza Sprit Dxanga rudeedzani yäl'rililajzro lo tejni, dxejc lo steeni rudeedza lagajc Sprit Dxanga yäl'rnibee te rusiajcni yäl'racxhuu. <sup>10</sup> Loj stee bejn rudeedzani yäl'rnibee te gunni milaagwr, loj stee bejn rudeedni yäl'riembee te sajc guinixgaani xcuent recos ni churu gac; lo steeni rudeedni yäl'nasiñ te gumbeeni chu najc Sprit guliipac, näjza chu najc sprit ni rusguee. Lo stee bejn rudeedzani guiniini garen-garen redidxsaj; loj stee bejn rudeedzani yäl'racbee te rajc rniini loonu xhini'c gunii bejn ni rnii garen-garen redidxsaj. <sup>11</sup> Niluxh tejsi najc Sprit nani rujn guiraa redzuunre, racnäjni rujn tejganu xtzuumni si'ctis ni rlazjni.

### *Guiraanu najcnu te la' tejsi tiejxh*

<sup>12</sup> Sigajc ni najc tiejxhnu tejsi, mase yu' xhidajl la' xtenni, teygareni te la' tejsi tiejxh, sigajcza najc rebejn nani huililajz xtidx Jesucrist. <sup>13</sup> Guiraanu, mase najcnu rexpejn Israel o beñ griegw, mase najcnu mos o mastr, gurobnisnu con laj Sprit Dxan che huililajznu xtidx Dios, te gujcnu si'c tejsi tiejxh, luxh tejsi Sprit Dxan xten Dios biädläz nen lastoonu.

<sup>14</sup> Sa'csi tiejxhnu dini gac tejsi la', najcni balti la'. <sup>15</sup> Paru naa ni'nu: "Sa'csi dina gacä te naa, ni'cni dina gacä te la' tiejxhre." ¿Xhixh porsı ni'c dini gac tla' tiejxhga, ä? ¿Gurniälojlu! <sup>16</sup> Palga diajgnu naa: "Dina gacä te baloj, ni'cni dina gacä te la' tiejxhre." ¿Xhixh porsı ni'c dini gac tla' tiejxhga, ä? ¿Gurniälojlu! <sup>17</sup> Palga guideb tiejxhni niajc te baloj, ¿xhi cojn niejn diajgni? Palga guideb tiejxhni niajc te diajgni, ¿xhi cojn chuxhi'ni? <sup>18</sup> Mbaj naj, ni'c basoob Dios guiraa rela' te guc-chee tiejxhnu si'ctis ni rlazjni gacni. <sup>19</sup> Paru niajc guidebni si'c tejtis la'ni, ¿xho niajcpacni te tiejxhni dxejc? <sup>20</sup> Niluxh naj ensilaani yu' xhidajl la' te najcni tejsi tiejxhni.

<sup>21</sup> Te balojnu di gac gäbni lo naanu: "Dina guiquinälu", niclaza bitiuycni di gac gäbni lo ni'ni: "Dina guiquinälu." <sup>22</sup> Chucala lapacreni rquiinru nani ružen lascanu xhet sajcđireni. <sup>23</sup> Luxh retla'ga nani rchalonu guxii sajcđireni, reni'c maazru sajc. Luxh reni rtuinäanu, niguii sigajc gunaa, reni'c riapdarunu. <sup>24</sup> Biätla sgaii la' tiejxhnu nani rlui saruru, reni'c di guiquiin gapdanuni. Niluxh abenchee Dios tiejxhnu si'c, te gapdaru bejn retla' nani lascanu guxiiru sajc. <sup>25</sup> Bejnıni si'c te di chu yäl'rdijl lo retla' tiejxhnu, te guiraa retla'ga gacnäj sa'reni. <sup>26</sup> Ni'cni che et laadi yu' te la' tiejxhnu guidebni ru' et laadi. Sigajcza che guiliä'pnu xpala'n te la' tiejxhnu, guideb tiejxhnu rbalajz.

<sup>27</sup> Ni'cni guiraanu najcnu si'c tiejxh Jesucrist. Tejganu najc te la' tiejxhni. <sup>28</sup> Luxh abadeed Dios yäl'rnibee lo tejganu lo xquidooni te gunnu xtzuum-xtzuumni. Ganidtoo guleni reapost; ni rojpga guleni rebejn ni rnii xtidx Dios; ni riojnga, guleni rebejn ni ruseed; dxejcti guleni reni rujn remilagwr, reni rusiajc beñracxhuu, reni racnäj, reni rnii garen-garen redidxsaj. <sup>29</sup> Et guiraadi rexpejn Jesucrist najc apost. Et guiraadizareni rniireni xtidx Dios. Et guiraadireni rajc ruseed. Et guiraadizareni rajc rujn remilagwr.

<sup>30</sup> Et guiraadireni rajc rusiajc reben<sub>rac</sub>xhuu. Etza guiraadireni rajc rnii garen-garen didxsaj, et guiraadireni rajc rnii xhi säloj redidxsajga. <sup>31</sup> Nanab guideb lastootu rlaiztu guniidx Dios reyäl<sub>rn</sub>ibee ni najc maazru hueen lojtu. Niluxh narä guluiä lojtu te nezyuj ni najc hueenru loj guiraareni.

## 13

### *Yälsanälajz*

<sup>1</sup> Palga guiniä guiraloj xtidxsaj rebejn, o xtidx rexangl Dios, luxh dina chanälazä rebejn, rubejtis xtidxä si'c te tamboor o te platii. <sup>2</sup> Palga sajc guiniä xtidx Dios xcuent recos ni churu gac, luxh racbesa'cä guiraa recos xhiga'tz xten Dios, näjza guiralii yäl<sub>nas</sub>in xten guedxliujre, palga rapä yäl<sub>rilil</sub>azduxh te gac gäpä lo redajnre, “col<sub>guib</sub>icaj”, luxh rbicajreni, niluxh xhet sanälazädi rebejn, rut nacädi. <sup>3</sup> Palga gudedä guiraa rehxixtenä nani rapä te gau rebejn ni xhet rajpdi; palga gudedä tiexhä te checni, luxh xhet sanälazädi rebejn, xlia'si gunä guiraa redzuunga.

<sup>4</sup> Rebejn ni rajp yälsanälajz cabäzreni, najczareni bensa'c, direni säblajz xhi xten sa'reni, direni guschä'p lagajc xpala'nreni, direni gac gualajz. <sup>5</sup> Direni gun recos ni di guchaag, dini quuil xcäl<sub>nas</sub>a'ctisni, dini guidxe'ch, dini jiu redojl ni rujn bejn lojni. <sup>6</sup> Nani rajp yälsanälajz dini guibalajz che rujn stee bejn dojl, alga rbaa lajzni che laaca rujn bejn. <sup>7</sup> Nani rajp yälsanälajz rujn huant xhitis cos, rililajzni hueen xcuent xhitis cos, sanuutis cabäzni, rajc rdejdn xhitis trabajw.

<sup>8</sup> Yälsanälajz dipacni nitloj. ¿La rniireni xtidx Dios xcuent recos ni churu gac, ä? Sidzujn dxej sibäz rediidxga. ¿La rajc rnii bejn garen-garen redidxsaj, ä? Sidzujn dxej siacdx redidxsajga. ¿La yu' yäl<sub>naj</sub>n? Sidzujn dxej sinitlojpacni. <sup>9</sup> Sa'csi naj guxilii racbeenu, guxilii xtidx Dios xcuent recos ni churu gac rajc rniinu, <sup>10</sup> niluxh che jiädsac Jesucrist ni rajp guiralii yäl<sub>naj</sub>n, sinitloj xcäl<sub>nand</sub>xucnu.

<sup>11</sup> Che gucä biuux, guniä si'c biuux, benäza xhigab si'c biuux, niluxh che bidzunä lo yäl<sub>ben</sub>gol, gunitloj rehxigab biuux ni benä galoo. <sup>12</sup> Sa'csi naj rhuiinu si'c loj te guihuajn ni nacäy, luxh che guibanänu Dios xhaguibaa, suhüisa'cnu si'cni ruhüii bejn che suga'ni loj sa'ni cahüiinini. Naj racbeenu re'cti rec, niluxh dxejc sacbesa'cnu si'cpacni numbee Dios nuure. <sup>13</sup> Niluxh naj ria'n yäl<sub>rilil</sub>ajz näjza yäl<sub>rbäz</sub>lajz, näjza yälsanälajz. Lo guidxon redee, sajcru yäl<sub>rinäl</sub>ajz.

## 14

### *Renani rnii rediidx*

<sup>1</sup> Ganiddoo col<sub>quii</sub>l yäl<sub>rinäl</sub>ajz, col<sub>nab</sub>za lo Dios te guniidxruni xhi stee dzuun, niluxh col<sub>yejn</sub>ru te xca'tu yäl<sub>rnib</sub>esa'c te gusule'tu xtidx Dios. <sup>2</sup> Che rnii te bejn garenca diidx ni di rebejn gacbee, rniini lo Diostis, et lojdi rebejn, sa'csi rut racbeedi xtiidxni, mase caniini cosro, cosxhiga'tz nani rulüi Sprit Dxan xten Dios guiniini. <sup>3</sup> Niluxh bejn ni rusule' xtidx Dios, rustioobni xcäl<sub>rilil</sub>ajz bejn ni ruliidxni, ruspaani lajz nani rac-huin lajzni. <sup>4</sup> Che rnii te bejn garenca didxsaj ni rut racbeedi, lastootisni rustioobni, niluxh bejn nani rusule' xtidx Dios xcuent recos ni churu gac, laani rustioobruni lastoo guiraa reben<sub>guidoo</sub>.

<sup>5</sup> Narä rläzä maläii rajc rnii guiraatu garen-garen diidx, niluxh hueenru gac gusule'tu xtidx Dios. Maazru sajc nani rajc rusule' xtidx Dios loj nani rnii garenca diidx palga di gacdi gusule'ni lo rebejn xhini'c caniini. <sup>6</sup> Mbaj naj betzä, che jiälä lojtu, palga guiniä garenca diidx lojtu, ¿xhi gacnäjni la'tu? Hueenru guiniliä xcuent te cos ni abaluiloj Dios löä, o xcuent te yäl<sub>naj</sub>n, o xcuent te xtidx Dios, o xcuent te yäl<sub>rulüi</sub>.

<sup>7</sup> Ni ruhüiinu xho najcza reinstrument ni rol bejn si'c te bizej, o te harp; palga di bejn gol<sub>sa'</sub>creni, ¿xho jiennu gacbeenu xhi dij cayol<sub>reni</sub>, ä? <sup>8</sup> Sigajcza lo guerr, palga direni gol<sub>cornet</sub> dippac, ¿xho gacbeereni agojl chatijl<sub>reni</sub>, ä? <sup>9</sup> Sigajcza la'tu, palga ditu guinisa'c didxsaj nani racbee bejn, ¿xho gunreni gacbeereni xhini'c caniilu, ä? Xlia'si guiniilu, lo



bejtis sää xtiidxlu. <sup>10</sup> Yu' xhidalduxh didxsaj lo guedxliuj, luxh xheti tejni nani xheti xnejzni. <sup>11</sup> Niluxh palga dina gacbeä didxsaj ni rniireni loä, nacä si'c te beñzajt loj nani canii loä, sigajcza sajc nani caninäj narä. <sup>12</sup> Ni'cni la'tu ni rlajztu xca'tu yäl̄rnibee xten Sprit Dxan te guntu xhi redzuun, col̄guejs, col̄nab lojni xhidajl dzuun te gacnäjtuoobru xcäl̄rililajz rexpen guidoo.

<sup>13</sup> Ni'cni palga yu' te bejn ni rnii garenca didxsaj, suguniabni loj Dios yäl̄rnibee te gac gusule'ni diidx ni rniini lo rebejn. <sup>14</sup> Palga cuedx-guiniabä lo Dios con te didxsaj ni dina gacbeä, lastoätis ni calä'p xpala'n Dios, niluxh xcärienä xhet cayacbeedini. <sup>15</sup> ¿Xho ricajni dxejc? Siniab xspritä näjza xcärienä lo Dios; sol̄ xspritä näjza xcärienä dij. <sup>16</sup> Palga dini gac si'c, xsprittislu calä'p xpala'n Dios con ste'ca didxsaj, niluxh bejn nani cacuadiajg di gacdi gacnäjn̄ilu guiliä'pni xpala'n Dios, sa'csi dini gacbee xhini'c rniilu. <sup>17</sup> Hueenza calä'plu xpala'n Dios, per stee bejn̄ga dini tioob loj yäl̄rililajz. <sup>18</sup> Rudedä xquixtios lo Dios maazru rajc rniä garen-garen diidx loj guiragajctu. <sup>19</sup> Niluxh neñ guidoo maazru rlazä guiniä con xcärienä gaiitis diidx nani gacbeetu, nani guluii la'tu, loj tzuu miñ diidx nani guiniä con xspritä ni ditu gacbee.

<sup>20</sup> Rebetzä, na'c rujntu xhigab si'cni rujn rebiuux, xcuenttis cosguijdx nanab gacnayatu si'c biuxbäz, per col̄yejn xhigab si'c te beñgool. <sup>21</sup> Scree caj lo xleii toMoisés: “Mase guiniä lo rebejn con garenca diidx näjza xtidx beñzajt, niela si'c direni gucuadiajg xtidxä”, naj Dad baxhuaannu. <sup>22</sup> Ni'cni regaren-garen didxsaj najc si'c te seen lo renani gajd chalilajz xtidx Dios, et lojdi rebejn ni arililajz xtidx Dios. Niluxh yäl̄rusule' xtidx Dios xcuent recos ni churu gac, ni'c najc te seen loj renani ahuililajz xtidx Dios, xhet lojdi renani gajd chalilajz xtidx Dios. <sup>23</sup> Palga re'tu neñ guidoo dxejcti caniiu garen-garen diidx ni rut racbeedi, dxejc guidzujñ tej ni di gan xtidx Dios, siniini guiraatu rajc yejctu. <sup>24</sup> Palga re'tu neñ guidoo, dxejcti guiraatu cagusule'tu xtidx ni baniidx Dios lojtu, che jiu' tej ni di gan xtidx Dios, sacbeeni xhini'c caniiu, sacbeeni yu' xtojñni, <sup>25</sup> sienloj rexhigab xhiga'tz ni yu' neñ lastooni, dxejcti siabrlojni suzuxhijbni lo Dios, siniabni lo Dios, siniizani guliipacni suga' Dios galäiitu.

### *Col̄yejn guira'ti xnez-xnejzni*

<sup>26</sup> ¿Xho ricajni naj, betzä? Che guire'tu neñ guidoo suxca' tejpgatu tebgaj te salm, te xtidx Dios ni guluiini, te diidx ni baluiloj Dios lojni, te diidx con garenca diidx, nägajcza te ni gusule' xhi säloj diidxga. Col̄yejn guiraa ni rujntu te tioob xcäl̄rililajz renani ahuililajz xtidx Dios. <sup>27</sup> Palga yu' renani rnii con garenca diidx, sugunii tio'p-chon bejn, niluxh tebgajreni, dxejcti sugusule' steeni xhi säloj ni rnii tebgajreni. <sup>28</sup> Palga rut rajc di gusule' rediidxga, na'c guiniireni con garenca diidx neñ guidoo, suguinixtebreni lo Dios. <sup>29</sup> Si'cza renani rusule' diidx ni rudeed Dios lojreni, sugunii tio'p-chon bejn, niluxh tebgajreni, te cuadiajg stiop xchonreni donnu la laaca caniireni. <sup>30</sup> Palga guluiiloj Dios te cos loj te bejn ni sobga' cacuadiajg, sucuedxisijcni, dxejcru suguiini. <sup>31</sup> Sa'csi guiraatu sajc gusule'tu tebgajtu didx ni baniidx Dios lojtu te gac guisieedu, te tioob lastoo guiraatu lo yäl̄rililajz. <sup>32</sup> Rudeed Sprit Dxan xten Dios yäl̄najñ loj reni rusule' diidx ni rudeed Dios lojreni te acanajnreni che riäjñ guiniireni o che riäjñ cuedxireni, <sup>33</sup> sa'csi Dios najc te Dios ni rujñ guira'ti xnejz-xnejzni, dini gun bieje, niluxh rbecdxini lastoo bejn neñ guiraa reguidoo xten rebejn ni ahuililajzpac xtiidxni. <sup>34</sup> Sucuedxi regunaa neñ reguidoo, sa'csi di gacdi gusule' te gunaa xtidx Dios. Nanab gunreni si'c caj lo leii gunreni, gucuadiajgreni xtidx Dios ni rusule' reniguii lojreni. <sup>35</sup> Palga rlajzreni gacbeeruren̄i, suguniabdiidxreni loj chääl̄ni che guibi'reni rolijzreni, sa'csi sianxtujy gunaaga palga guiniini neñ guidoo.

<sup>36</sup> Col̄gacbee et la'ditu guläxtiejditu rextidx Dios, luxh etza xtebtis lojtu biäädni. <sup>37</sup> Palga yu' tejt̄u ni rchalo rajc rniini diidx ni rudeed Dios lojni, o palga rchaloni abadeed Xprit Dxan xten Dios te dzunro lojni, sugacbeepacni dee: guiraa rediidx ni cagucuaä lojtu,



rucuaäni sa'csi si'c gunibee Jesucrist gucuaäni. <sup>38</sup> Palga yu' chu tejtu ni di chalilajz rapä xcäl̄rnibee Jesucrist, rutza jiudi xtiidxni.

<sup>39</sup> Ni'cni, rebetzä, col̄yeynru te gusule'tu diidx ni runiidx Dios lojtu, na'c gudxojuentu renani rniiza garenca didxsaj. <sup>40</sup> Luxh guira'ti nani rujntu, col̄yensa'cni, xnejz-xnejzni.

## 15

### *Gubansac Jesucrist lo rebengut*

<sup>1</sup> Naj rniä lojtu betzä, col̄gusnaj lajztu xtidx Dios ni basule'ä lojtu, nani huililajztu, loj nani sutijptu, <sup>2</sup> näjza col̄gusnaj lajztu diidx xcuent ni badzucaj Dios xtojltu che huililajztu, palga sanuu sutijptu lojni, te di xlia'si huililajztu diidxga.

<sup>3</sup> Lojtu ganiddoo basule'ä rediidx ni sajru ni bisiedä, basule'ä xho gujt Jesucrist lo cruz, bixe' xtiejn̄ni te badzucajni rextojl̄nu, sigajc ni caj lo xtidx Dios gac. <sup>4</sup> Basule'äza xho biga'tzni, dxejc ni rion̄ dxej guläs Diosni, gubansacni si'cni caj lo xtidx Dios gacni. <sup>5</sup> Cheni gubansacni, baluilojni lo Pedr, dxejtiru loj guitzubito'p rexpejn̄pacni, <sup>6</sup> dxejcti baluilojni lo gabixh gaii gayuu bejn̄ ni tre' tejsi lajt. Xhidajlreni nabañsijc, niluxh yu'za reni agujt. <sup>7</sup> Dxejcti baluilojni lo Jacob, dxejtiru loj guiraa reapost.

<sup>8</sup> Dxejcti lultpac baluilojzani loä, luxh alagudejd ruluilojni lo rexpejn̄ni dxejc. <sup>9</sup> Narä guxiiru sacä loj guiraa reapost, niclaza nungäj̄l cuälajreni narä apost sa'csi basacsä rexpejn̄ xquidoo Dios. <sup>10</sup> Balaslazduxh Dios narä, ni'c narä nacä si'c ni nacä naj. Luxh et xlia'di balaslajzni narä. Narä benäru dzuun loj guiraareni, niluxh xhet narädi ni benä dzuun, sa'csi xcäl̄rulasajz Dios cayacnäjä narä. <sup>11</sup> ¿Xhiru najcni palga naräni o palga laareni? Empac cagusule'nu xtidx Dios, luxh la'tu salilajztu xtiidxni.

### *Xho guibansac rebengut*

<sup>12</sup> Mbaj naj, palga nuurnu cagusule'nu diidx xcuent ni gubansac Crist loj rebengut, ¿xhicuent yu'tu ni rni, xheti yäl̄rbansac loj rebengut? <sup>13</sup> Palga xheti yäl̄rbansac lo rebengut, dxejc nicla Crist di nibansac lo rebengut. <sup>14</sup> Luxh palga di Crist nibansac loj rebengut, ¡xlia'si najc diidx nani basule'nu! ¡xlia'siza najc xcäl̄rililajztu! <sup>15</sup> Luxh et ni'ctis. Abiga'nu sa'csi rusgueenu rniinu baspansac Dios Jesucrist loj rebengut, luxh dini nuspansacni loj rebengut, palga guliini di bejn̄ guibansac loj rebengut. <sup>16</sup> Niluxh palga di rebengut chäs, niclaza Crist di nibansa'c lo rebengut. <sup>17</sup> Luxh palga di Jesucrist nibansac loj rebengut, xhet sajcdi xcäl̄rililajztu, sanuutistu loj xtojltu. <sup>18</sup> Sigajcza agunijt rebengut nani huililajz xtidx Jesucrist. <sup>19</sup> Palga naj ni nabajntisnu loj guedxliujre cabäaznu Jesucrist, lo guiraa reben̄ guedxliuj nuurnu najcnu rebejn̄ ni riäj̄l jiaduxhtej guiraa reni ruhuii loonu.

<sup>20</sup> ¡Per dini gac si'c! Guliipacni gubansac Jesucrist loj rebengut. Laani gac ganiddoo loj guiraa rebengut ni gubansac, luxh laani dini niejt par tejpas. <sup>21</sup> Sigajcni biäd yäl̄gujt loonu xcuent tejtis niguii, sigajcza biäd yäl̄rbansac lo rebengut loonu xcuent tejtis niguii. <sup>22</sup> Sigajc xcuent te niguii ni laa Adán biäd yäl̄gujt, sigajcza xcuent Jesucrist biäd yäl̄rbansac loj rebengut. <sup>23</sup> Tejganu xcuent-xcuentnu; Jesucrist gujc ganiddoo, dxejcti guiraa reni najc rexpejn̄ni che jiädsacni lo guedxliujre, guiraareni suspansacni. <sup>24</sup> Che agujc ni'c, dxejcti siäd dxe lult che gudedsacni yäl̄rnibee lo Dios Xtdni, che abadzujl̄ni guiraa reyäl̄rnibee, guiraa reyäl̄guxhtis, guiraa reyäl̄milagwr. <sup>25</sup> Nungäj̄lpac guinibee Jesucrist cheni gunli Dios gaan loj guiraa reni rdxe'ch lojni, quixhni reni detz ni'ni. <sup>26</sup> Lult ni rdxe'ch lojni ni gunitlojni najc yäl̄gujt. <sup>27</sup> Lo xquijtz Dios caj: “Agudixhni guira'ti detz ni'ni te guinibeenireni.” Che rniini si'c huenliisi gacbee bejn̄ di gacdi guinibee Jesucrist Dios, sa'csi Dios badeed lojni xhini'c guinibeeni. <sup>28</sup> Che acanibee Jesucrist guiraali recos, dxejcti sudeedni guideb yäl̄rnibee loj Xtdni Dios, te xtebtis Dios guinibee guira'tipac.

<sup>29</sup> Palga rujntu xhigab di bejn guibansac loj rebengut, ¿xhi gun rebejn nani robnis xcuent rebengut? Palga di bejn guibansac lo rebengut, ¿xhicuent rutiobnisreni la'tu xcuent rebengut?

<sup>30</sup> ¿Xhicuentza rdxunnu lo casionduhx guira'ti or? <sup>31</sup> Rniliäpac lojtu, rebetzä, caläpä xpala'ntu xcuent Jesucrist Xtadnu ni cayun xtzuunni lojtu. Ni'cni guniä lojtu, guira dxej rguuilreni narä te ju'treni narä. <sup>32</sup> Palga benä xhigab si'c te niguii guedxliuj che bacuanää reniguii ni najc si'c man nialajz lo guedx Éfeso, ¿xhi gaan benä? Palga di bejn guibansac loj rebengut, do'o jien si'c ni caj lo guijt: “Do'o guidau, do'o guidun, sa'csi guixee empac sejtnu.”

<sup>33</sup> Na'c gusaantu gusgueereni la'tu, palga sachaaglu lo benguijdx näjza luj sajclu benguijdx. <sup>34</sup> Basaniy xcäriejnlu si'cni nanab gunlu. Bascuääz dojl ni rujnlu sa'csi yu' balti bejn ni dipac gumbee Dios. Te guitujytu ni'c rniä diidxre lojtu.

### *Xho guibansac rebengut*

<sup>35</sup> Naj yu' reni rniabdiidx: “¿Xho rbanasac bejn loj rebengut? ¿Xhoza gac tiejxhreni?” <sup>36</sup> ¡Chip nayäällu! Che rbe'clu te binij, di gäjl guiliejn palga di xhobga guet, nalajznu, palga dini guechduu. <sup>37</sup> Luxh che rbe'clu, dilu cue'c gäjlga si'cni rlanjzlu gacni, alga rbe'clu xhob o triuu o ste'ca binij, <sup>38</sup> niluxh Dios rujn rliejnni, rustioobni gäjlga, lo tejga gäjl rudeedni xpala'jni o tiejxhni, si'ctis ni rlanjzni. <sup>39</sup> Xhet guiraadi retiejxhreni najc tebloj. Yu' bääl xten bejn, yu'za bääl xten reguidxaa, yu'za bääl xten reman xhaguibaa, yu'za bääl xten rebäjl. <sup>40</sup> Sigajcza yu' tiejxh rebajl xhaguibaa, tiejxh rexten guedxliujre. Niluxh yälrdimbicha' xten rebajl xhaguibaa najc tej, dxejc yälrdimbicha' guedxliuj najc ste'ca. <sup>41</sup> Bicha' xte gubijdx najc garen lo xten bäi, sigajcza xpicha' rebal xhaguibaa najc garen-garenza lo sa'reni. <sup>42</sup> Sigajcza yälrbansac loj rebengut; che guet bejn rga'tz tiejxhni luxh rujdxni, rnitlojni. Luxh che guibansacni loj rebengut, garenca gac tiejxhni, diruni gudx, anabajn par tejpas. <sup>43</sup> Che rga'tzni, rujn bejn xhigab xhetru gacnäjd tiejxhga, niluxh che guibansacni, lacti sacru, lacti sajc tiejxhga. Che rga'tzni, xhetru sajcdi gunni, luxh che guibansacni, anadipduxhni. <sup>44</sup> Che rga'tz tiejxhnu, najcni xten guedxliujre, luxh che chäsni najcni te tiexhcoob ni runiidx Dios. Ni'cni yu' te tiejxhni ni siääd lo guedxliuj, yu'za te tiejxhni ni siääd xhaguibaa.

<sup>45</sup> Si'cza caj lo xtidx Dios: “Nigui galooga ni laa Adán, bejn Dios gujcn te ben nabajn.” Niluxh Adán ni biääd lult, Jesucrist najc Sprit ni runiidx yäl'nabañcoob loonu. <sup>46</sup> Ganid najc yäl'nabajn xten guedxliujre, dxejtiru yu' te yäl'nabañcoob xhaguibaali. <sup>47</sup> Sigajcza niguii galooga najc ben guedxliujre, niluxh ni rojp niguii ni biääd najc ben xhaguibaali. <sup>48</sup> Benchee Dios Adán con yuj, najcni ben guedxliuj. Xhaguibaali biääd Jesucrist, najcni ben xhaguibaa. <sup>49</sup> Sigajcni najcnu si'c ben guedxliujre, sigajcza sajcnu sigajc najc bejn ni yu' xhaguibaa.

<sup>50</sup> Naj guiniä rediidxre lojtu betzä, di gac ted tiejxhnu ni najc bääl näjza rejn xhaguibaa cadre yu' Dios. Tiejxhnure nani sinitloj di gacdiza xca'ni stee tiejxh ni najc par tejpas. <sup>51</sup> ¡Colhuii! Rlazäza gacheetu te didx-xhiga'tz; xhet guiraadinu guet, niluxh sidxaa guiraa retiejxhnu <sup>52</sup> tera't bälzule', si'c cheni rdinya' guzii, che jiel lult trompe't, dxejc sibansac rebengut, säjsreni guideb tiexhcoobreni ni najc par tejpas. Luxh näjza tiejxhnu sidxaa. <sup>53</sup> Sa'csi tiejxhnu ni najc xten guedxliuj nanab guidxaani te ga'pnu tiejxhnu ni najc xten xhaguibaa, sa'csi tiejxhnu ni najc xten guedxliuj rejtnei, niluxh tiejxhnu ni najc xten xhaguibaa di gacdi guetni, najcni par tejpas. <sup>54</sup> Niluxh che tiejxhnu ni najc xten guedxliuj abidxaa te ga'pnu tiejxhnu ni najc xten xhaguibaa, näjza che tiejxhnu ni sajcdi guet abidxaa te ga'pnu tiejxhnu ni di gacdi guet, ni najc par tejpas, dxejc sisiojb xtidx Dios ni caj scree: “Yälgujt agunitloj sa'csi bejn Jesucrist gaan lojni. <sup>55</sup> Yälgujt, ¿xho gac gunlu gaan naj, ä? Yälgujt, ¿Con xcäl'nayanlu naj, ä?” <sup>56</sup> Xcäl'nayan xten yälgujt najc dojl.

Xcäl̄rnibee dojl̄ najc leii. <sup>57</sup> Niluxh rdeednu xquixtios lo Dios, nani runiidx te yäl̄rnibee loonu te jiennu gaan lo yäl̄gujt xcuent Dad Jesucrist.

<sup>58</sup> Ni'cni rebetzä ni sanälazduxhä, colchanuutis, col̄sudzu'tz lo xtidx Dios, na'c guidxajgtu guntu xtzuunni, sa'csi anancheetu xhet xlia'di najc dzuun ni runiidx Dios riennu.

## 16

### *Meel ni guire' par rexpejn̄ Dios*

<sup>1</sup> Xcuent meel nani guire' par rebejtznu, col̄yejn̄ni sigajcni räpä gun rebejn̄ rexquidoo Galacia. <sup>2</sup> Casob dumingw, nalajznu ganid dxej xmaan, tejgatu col̄cuää te meel yejc nani rujntu gaan nen̄ te xmaan, col̄cucheeni, te na'c gutie'tu meel che jiälä. <sup>3</sup> Te che guidzunä, guxhalä meelga, näjza tiop-chon̄ guijtz chanä chutis bejn̄ ni cuetu chasa'n̄ni guedx Jerusalén. <sup>4</sup> Palga laaca cha'aza, sajca chänäreni narä.

### *Xhigab ni bejn̄ Pabl chääni biaj*

<sup>5</sup> Guidzunä lojtu che agudedä reguedx Macedonia, sa'csi sidedä nejzga galoo ni jiälä ro'c. <sup>6</sup> Dxejcti pet siannää la'tu, pet saclaä, sidedä guiraa rebäi najl ro'c, te gacnäjtu narä che cha'a cadrotis cha'a. <sup>7</sup> Sa'csi di rlazä jiädhuiätu te ladejtzsi, rlazä jiannää la'tu xchejpac, palga gusaan Dad Jesucrist gunä si'c. <sup>8</sup> Niluxh sia'nä guedx Éfeso, te ro'c tedä lanij ni rusnaj lajz bejn̄ che biääd Sprit Dxan xten Dios. <sup>9</sup> Sa'csi ro'c yu' xhidajl bejn̄ nani rlazj guisieed xtidx Dios, niluxh ro'c yu'za xhidajl reni rdxe'ch loä.

<sup>10</sup> Palga guidzujn̄ Timoteu lojtu, saru col̄huiini, te na'c chuni yärsia' laḷ ni yunäjni la'tu, sa'csi cayujn̄ni xtzuun Dios sigajc runä narä. <sup>11</sup> Na'c gusaantu chu tej ni cuälazni, col̄cuecdxi lajzni, dxejc col̄gusunejzni, te jiädhuiini narä ree, sa'csi ree cabääznu laani con rebejtznu.

<sup>12</sup> Niluxh xcuent bejtznu Apolos, räpäza lojni niäädpacni lojtu con rebejtznu, niluxh di rlazjpacni niäädni naj. Per siäädcani dxejtis ni gac jiäädni.

### *Rextixtios lult ni ruxhal̄ni*

<sup>13</sup> Col̄susin̄, col̄sudzu'tz lo yäl̄rililajz xten Dios, col̄yejn̄ dzuun si'c niguii, col̄yajc bendaan. <sup>14</sup> Xhitis ni rujntu col̄yejn̄ni con yäl̄rinälajz.

<sup>15</sup> La'tu rebetzä, anajntu xcuent rexfamil̄ Estéfan̄as, nani ganid huililajz xtidx Dios nez reguedx Acaya, najntu xho racnäduxhreni rebejtznu nani huililajz xtidx Dios ro'c. Naj rniabduxhä lojtu, <sup>16</sup> col̄gusoob xtidx rebejn̄ga, näjza xtidx guiraa rebejn̄ ni racnäj rexpejn̄ Dios, ni rujnza xtzuun Dios. <sup>17</sup> Rbalazä bidzujn̄ Estéfan̄as, näjza Fortunato, näjza Acaico, sa'csi laareni bejn̄reni par narä nani di niajcdi niujntu sa'csi rutitu. <sup>18</sup> Gulecdxireni lazä näjza lajztu, ni'cni, i col̄jiu sa' rebejn̄ga!

<sup>19</sup> Rebejn̄ xquidoo Dios nez reguedx Asia ruxhal̄ xtixtios lojtu. Aquila näjza chäälni Priscila näjza rebejn̄ ni re' rolizreni ruxhal̄zaren̄i xtixtios lojtu. <sup>20</sup> Guiraa rebejtznu ruxhal̄ xtixtios lojtu. Col̄guinii tejgatu lo sa'tu: "Xchan, gacnäj Dios la'tu."

<sup>21</sup> Narä Pabl, ruxhalä xtixtios lojtu, lagajc narä benä reletrre.

<sup>22</sup> Palga yu' chu tejtu ni di chanälajz Dad Jesucrist, sunitlojni. ¡Dad Jesucrist, gudaa!

<sup>23</sup> Gacnäj xcäl̄rulaslajz Jesucrist guiraatu. <sup>24</sup> Yäl̄rinälajz ni rapä xcuent Jesucrist suchunäjni la'tu. Sugacni si'c.

## Stee Guijtz Ni Bacuaa Pabl Lo Guidoo Xten Guedx Corinto

### *Ni rojp guiitz ni bacuaa Pabl lo guidoo xten guedx Corinto*

<sup>1</sup> Narä Pabl nacä apost xten Jesucrist sa'csi si'c rlazj Dios te gusule'ä xtiidxni. Narä näjza Timoteu, ni najc bejtznu lo xtidx Dios, rucuaanu guiitzre lojtu rexpejn xquidoo Dios ni yu' guedx Corinto, näjza loj guiraa rexpejn Dios ni rbäjz nez guiraa reguedx Acaya. <sup>2</sup> Rniabnu lo Dios ni najc Xtadnu näjza lo Dad Jesucrist, gacnäjreni la'tu, guscuecdxireni lajztu.

### *Trabajw ni gudejd Pabl*

<sup>3</sup> Guiliä'pnu xpala'n Dios Xtad Jesucrist, nani rulaslazj nuurnu, nani rustoolajz nuurnu. <sup>4</sup> Che rdejdn trabajw, rbecdxini laaznu te rajcza rbecdxinu lajz renani cadejd trabajw con lagajc yälrbecdxilajz ni baniidx Dios loonu. <sup>5</sup> Sigajc ni rdedduxhnu trabajwduxh ni gudejd Jesucrist sa'csi rusule'nu xtiidxni, sigajcza rbecdxiduxh Jesucrist laaznu. <sup>6</sup> Palga rdeednu trabajw, najcni te gustolajz la'tu, te laatu lo dojl. Palga ruscuecdxi Dios lajznu, si'c rujnni te cuedxilajztu te guntu huant che tedtu lagajc trabajw ni cadejznanu. <sup>7</sup> Rinudzu'tz yälrunloj ni rajpnu xcuent la'tu, sa'csi nadonnu palga rdejdtu lagajc trabajw ni cadejdn, suscuedxi Dios lajztu sigajcni ruscuedxini laaznu.

<sup>8</sup> Rebetzä, rlazä gacbeepactu lacti trabajwduxh bideednu nez reguedx Asia, tudxe'nsi dinu nien huant, sa'csi gudedcaj trabajwga, acasislinu. Trabawduxhtejni, benä xhigab sujnni gaan, sugu'tni nuurnu. <sup>9</sup> Gulicanu, alabiennu xhigab sejtpacnu. Niluxh dee gusajcnu te bisieednu na'c chaliilajznu lagajc nuurnu, alga chaliilajznu Dios nani ruspañsac rebengut. <sup>10</sup> Sa'csi Dios baslaa nuure lo yälgujtgä, luxh sinuutis guslaani nuurnu lo yälgujt. Salilazduxhnu Diosre suslaaruni nuurnu, <sup>11</sup> sa'csi cayacnäjtu nuurnu, cabedx-canabtu lo Dios xcuentnu. Dxejcti palga xhidajl bejn cabedx-canab lo Dios xcuentnu, xhidajlzareni sudeed xquixtios lo Dios xcuentnu xcuent xcäl'rulaslazj Dios ni baniidxni loonu.

### *Xhicuent di Pabl nij guedx Corinto*

<sup>12</sup> Dee najc nani ruspaä laaznu: rbedxi xcäriejnnu, ni'c ruluii loonu laaca nabajjnu, con yäl'nadolajz riennu si'cni rnibee Dios; xhet sa'csi rajpnu xcäl'najn reben guedxliujdi, alga sa'csi racnäj Dios nuure. Si'cpac nabajjnu lo guedxliujre, luxh maazru che yu'nu lojtu. <sup>13</sup> Cacuaanu lojtu rediidx ni sajc gołtu, ni sajc gacheetu, luxh cabäzä sachesa'ctu guiragajc rediidx ni gucuaä, <sup>14</sup> lagajc si'cni agucbeetu mase gaii xtiidxnu, cabäzä guibaa lajztu xcuent nuurnu, sigajcni guibaa lajznu xcuent la'tu nen dxej ni jääd Dad Jesucrist.

<sup>15</sup> Ni'cni ganiddoo benä xhigab niädhuiä la'tu te nibalajztu tio'p huält. <sup>16</sup> Nalajznu, benä xhigab nidedä ro'c che sa'a reguedx Macedonia, dxejcti stehuält cheni guibi'ä Macedonia, niädhuisacä la'tu ro'c te niacnäjtu narä te nia'a Judea. <sup>17</sup> ¿Xhaa dina niunsa'cä xhigab che benä xhigabre? ¿La rchalotu runä xhigabä si'c te bejn guedxliuj nani runtiop lajzni, nani tejsi diidx rniini "sia'ä" nägajcza "dina cha'a", ä? <sup>18</sup> Dios guluii lojtu guliica rniä lojtu, dinu guinii tejsi diidx "sia'ä" nägajc "dina cha'a". <sup>19</sup> Xi'n Dios, Jesucrist nani bisule'nu lojtu narä näjza Silvan, näjza Timoteu dini guntio'p lajzni, dini guinii tejsi diidx "sunäni" näj "dina gunäni", niluxh laani guiraa xtiidxni najc "sunäpacni". <sup>20</sup> Si'cza guiraa rediidx ni bia'n Dios loonu xcuent Jesucrist najcreni "sunäpacni"; näjza xcuent laani najcreni "sugacni si'c" par nuurnu, te chä'p xpala'n Dios xcuent nuurnu. <sup>21</sup> Dios cagusudzu'tzza nuure näjza la'tu lo xtidx Jesucrist, agulezani nuurnu te jiennu xtzuunni. <sup>22</sup> Abacuaazani xseenni loonu, ni'cni baniidxni Sprit Dxaan xtenni te cuääzni nen lastoonu.



<sup>23</sup> Rbedxä loj Dios gacbeeni xhi yu' lastoä, guliipacni te diruna gutalä xcälñajtu, ni'c dina niälsacä guedx Corinto. <sup>24</sup> Di rlanjnu guinibeenu xho chalilajztu, alga rlanjnu gacnäänutu lo dzuun te guibaa lajztu; guliipac agusudzu'tztu lo xcälñililajztu.

## 2

<sup>1</sup> Niluxh lagajc xcuent xcälñasa'cä benä xhigab dina jiädhuisacä la'tu che cayac-huin lazä. <sup>2</sup> Sa'csi palga narä siädyenä gac-huin lajztu, ¿chuni'c gun guibaa lazä? La'tistu, nani benä guc-huin lajzni. <sup>3</sup> Ni'cni lagajc xcuent ni'c bacuaä lojtu, te che jiälä lojtu, di rebejn gunhuin lazä nani riäjñ guspaa lazä. Luxh nancheä palga narä guibaa lazä, nägajc la'tu sibaaza lajztu. <sup>4</sup> Che bacuaä guijtzga lojtu, lacti xhigabduxh benä, binduxhä; xhet te gac-huindi lajztu, alga te gacbeetu yälñanalazduxh ni sanälazä la'tu.

### *Yälñrusiäjñ lajz ni yu' par nani bejn falt*

<sup>5</sup> Palga yu' chu tej ni cayujñ cayac-huin lazä, xhet xtebtis lazä cayunhuinni näjza lajztu cayunhuinni guxiä diidx guiniä sa'csi di rlazä guntu xhigabduxh. <sup>6</sup> Alabasacsiduxh xhidajñ bejn dade'ga, na'cru gusacsítuni ñaj. <sup>7</sup> Ñaj colñsiäjñ lajztu xcuent xtojñni, colñcuedxi lajzni didi gac-huinduxhtej lajzni. <sup>8</sup> Ni'cni rniabä lojtu, colñchanälajz bejnre si'c ni huinälajztuni galoo. <sup>9</sup> Bacuaxgaäza lojtu te gacbeä laa susoobtu xtidxä. <sup>10</sup> Ñaj renani jiäjñ lajztu xtojñni, näj narä siäjñ lazäni. Sigajcza narä, nani basiäjñ lazä, palga yu' xhi basiäjñ lazä, benäni xcuent xcälñasa'ctu, nez loj Jesucrist, <sup>11</sup> te di gun beñdxab gaan nuure, sa'csi anajñnu xho najc latsiaj ni rujñ beñdxab.

### *Guyu' Pablyärsia' che bidzujñni guedx Troas*

<sup>12</sup> Che bidzunä guedx Troas, te gusule'ä xtidx Jesucrist, bejn Dad Jesucrist rutliidi badxojñdi narä, <sup>13</sup> niluxh guyuduxhä yärsia' sa'csi dina nidxälä Tito, bejtznu. Ni'cni basadidxgacäreni, sa'äti nez reguedx Macedonia.

### *Jesucrist rujñ riennu gaan*

<sup>14</sup> Xquixtios lo Dios nani con Jesucrist racnäj nuurnu te dipacnu gunijt, empac rujntisnu gaan, luxh con nuurnu guiraa nejjz ruluilojni xhi saru najc gumbeepac bejn xtidx Dios. <sup>15</sup> Sa'csi najczanu si'c te guxh xten yalnejjh xten Jesucrist lo Dios nez loj renani chalilajz xtidx Dios näjza nez loj rebejn nani canijt sa'csi naadireni chalilajzreni xtiidxni. <sup>16</sup> Loj reni di chalilajz xtiidxni, najcnu si'c te guxh ni rugu't, loj renani rililajz xtiidxni, najcnu si'c guxh xten yalnejjh ni rudeed yälñnabañcoob. ¿Chu laa ni racbee sa' recosga? <sup>17</sup> Sa'csi dinu gac si'c najc xhidajñ bejn nani rusule' xtidx Dios te gunreni gaan meel. Nuure rusulesa'cnu xtidx Dios sa'csi rinälazpacnu Jesucrist luxh si'c ni gunibee Dios, si'c rusule'nu, rusule'nu diidx con xcälñracnäj Jesucrist nez loj Dios ni cahuii xhini'c riennu.

## 3

### *Diidx nacoob ni basa'n Dios loonu*

<sup>1</sup> Che rniinu rediidxga, ¿la rchalotu canisacnu didxsa'c lagajc xcuentnu, ä? Yu'reni ca' guijtz ni rnii najcreni beñsa'c. ¿La rlanjzatu guiluiinu lojtu sa' guijtzga, o guiniabnu guntu sa' guijtzga xca'nu, ä? <sup>2</sup> La'tu najc si'c xquijtznu ni rnii xho najcnu. Lastoopacnu acuajtu. Guiraa rebejn rajc rhuii xho huililajztu xtidx Dios sa'csi basule'nu xtiidxni lojtu. <sup>3</sup> Huenliisi rluijoj najctu si'c xquijtz Jesucrist, luxh nuurnu bizule'nu xtiidxni lojtu. Xhet con tintdi cuaj rediidxga, xhet lojdiza guij cuaj diidxga, Sprit Dxan xten Dios ni nabajñ bacuaa rextidx Diosga, bacuaanireni lastootu.

<sup>4</sup> Nadoncheenu redee, ni'cni xcuent Crist dinu guidxejjb nez loj Dios. <sup>5</sup> Di gacdi jien xtebnu xhitis dzuun ni riennu, riennuni sa'csi laa Dios ni racnäj nuurnu. <sup>6</sup> Laani runiidx yälñnadaan loonu. Nuurnu najcnu mos xten xtidxcoobni ni bia'nni con nuurnu. Luxh didxcoobga dini gac si'c xlei to Moisés ni bacuaareni lo guij, sa'csi xleiini biädñä dojj,



dxejc gujtnu. Niluxh didxcoobga ni rusule'nu biädnä Sprit Dxi xten Diosni, luxh runiidxni yälhabañcoob loonu. <sup>7</sup> Leii baluui yu' xtojĵ bejñ, riäjĵ guetreni. Xhidajĵ seen guyu' che bacuaa Dios rediidxga lo guij. Luxh di niajcdi nuhüi rexpejñ Israel loj Moisés, bidxejbreni sa'csi rdimbicha' lojni, luxh sanuu cayüi yälrdimbicha'ga. <sup>8</sup> Palga si'c gujc che biäd leii, aticaxh naj su'ru xcälrdimbicha' xleii Sprit Dxi xten Dios, ni najc redidxcoob nani abasule'nu. <sup>9</sup> Palga xleii toMoisés ni baluiloj yälgujñ xcuent dojĵ biädnä yälrdimbicha', aticaxh naj yu' xcälrdimbicha' xtidxcoob Dios ni rudzucaj dojĵ. <sup>10</sup> Naj dirunu fii xcälrdimbicha' xleii toMoisés sa'csi xtidxcoob Dios rdimbicha'ru par tejpas. <sup>11</sup> Palga yälrdimbicha' nani biüi bianisesduxhni tera't, stee yälrdimbicha're ni najc par tejpas sidimbichasesduxhni.

<sup>12</sup> Luxh ni'c runiidx yälrbecdx lajznu, dipacnu guidxejb che rusule'nu xtidxcoob Dios. <sup>13</sup> Dinu gac si'c toMoisés, ni basäu tla' lajd lojni te di fii rexpejñ Israel cayüi yälrdimbicha' ni guyu' lojni. <sup>14</sup> Niluxh bicäy xcäriejnreni; lo dxej najli che riel xleii toMoisés, najcni si'cni yu' xhi lajd rusäuu lastooreni, rudxojn gacbeereni, te di chalilajzreni, xtidx Jesucristtis rajc rudzucaj lajdga. <sup>15</sup> Lo dxe najli che rolreni xleii toMoisés, najcni si'cni ruscäy te lajd xcäriejnreni. <sup>16</sup> Lo xtidx Dios rñi scree: “Niluxh che gusiechlaiz te bejñ, gudzuréni nez loj Dad, sibicaj lajdga”, nalajznu sacbeeni xtidx Dios. <sup>17</sup> Dad Jesucrist najc Sprit luxh cadro yu' Sprit xten Dios badzucaj Diosni lo xleii toMoisés. <sup>18</sup> Niluxh nuure dinu gusäu lajd lojnu, didi guscäyjni xcäriejnñu. Nuure najcnu si'c te guihujñ cadro rdimbicha' xtuxh Dad Jesucrist, luxh chäi-chäi cadxaanu cayajcnu si'c najcni näjza caca'nu xcälrdimbicha' Jesucrist, sa'csi si'c cayujñ Sprit Dxi xtenni.

## 4

<sup>1</sup> Ni'cni sa'csi agule Dios nuure te gusule'nu xtiidxni, sa'csi balaslajzzani nuure, dipacnu jiäxhan. <sup>2</sup> Ni'cni rbälaznu recos ni rajc xhiga'tz, sa'csi rusanxtujyreni. Dizanu gusguee, dizanu guchaa xtidx Dios, niluxh rñinuni si'cpacni najcni, te si'c ruhüi guiraa bejñ rsiaapacnu lo xnezyuj Dios. <sup>3</sup> Niluxh palga yu' chu dipac gacbee rextidx Dios nani rusule'nu, najctisreni rebejñ nani ala canitloj par tejpas, <sup>4</sup> sa'csi abascäy bendxab ni rnibee guedxliujre xcäriejnreni, si'cni rujñni lo rebejñ nani di chalilajz xtidx Jesucrist, te na'c fiireni xcälrdimbicha' xtidx Dios ni rñi xcuent xhanij xten Jesucrist, ni najc xtujxh Dios. <sup>5</sup> Che rusule'nu xtidx Jesucrist, dinu guiliä'p lagajc xpala'nnu, rliä'pnu ganaxtis xpala'n Dad Jesucrist. Nuure najcnu xmostu xcuent Jesucrist. <sup>6</sup> Che benchee Dios guedxliuj, guniini: “Lo xcäy sugürii te bajl ni gusanij.” Lagajc Diosga abasanij lastoonu te baniidxni bajl ni najc yälriembee xcälrdimbicha' Dios nez loj Jesucrist.

### *Xho guibannu con yälirilajz*

<sup>7</sup> Nuurnu najcnu si'c te guesyuj, xhet sajcdinu, niluxh guidxanu te yälñasacduxh, ni najc xtidx Dios xcuent Jesucrist, te guiluloj xcälñasa'c xten xcälrnibee Dios lacuaa xhisi te yälñadipbäz xtenu. <sup>8</sup> Rdeednu trabajw guira nejz, niluxh dinu gunijñ yälrunloj. Mase di jien xho jiennu, dinu chu yärsia'. <sup>9</sup> Rusacsireni nuure, niluxh di Dios cuälaznu, rguijnreni nuure, dizareni ju't nuure. <sup>10</sup> Cadrotis rionnu rusacsireni nuure si'c basacsireni Jesucrist, te si'c neñ tiejxhnu gululojzani yälhabañsac loj rebeñgut xten Jesucrist. <sup>11</sup> Cadrotis rionnu rlajzreni ju'treni nuure sa'csi rusule'nu xtidx Jesucrist te si'cza neñ tiejxhnu gululojzani xcälñabajñ Jesucrist loj rebeñ guedxliujre. <sup>12</sup> Ni'cni rujñ yälgujñ dzuun loonu, per yälñabajñ cayujñ dzuun lojtu.

<sup>13</sup> Sa'csi rajpnu lagajc xsprit xten yälirilajzga, sigajc ni caj lo xtidx Dios: “Huillilazä ni'cni basule'ä diidx.” Sigajcza nuure, huillilaaznu xtidx Dios, ni'cni rusule'nuni. <sup>14</sup> Sa'csi nadonnu lagajc nani baspañsac Jesucrist loj rebeñgut, lagajcza laani gun guibañsacnu con Jesucrist te gunni sunäjnu la'tu nez lojni. <sup>15</sup> Rsiajñnu guiraa ni rsiajñnu te xcuentsi la'tu gudeedru bejñ xquixtios lo Dios, te guiliä'pruzareni xpala'nni xcuent yälñulasajz ni sanuutis care'ch lo xhidajĵ bejñ.

<sup>16</sup> Ni'cni dinu gunijt yälrunloj, per mase tiejxhre acayujxh, guixe-guixee cagustioob Dios spritnu. <sup>17</sup> Retrabajw ni cadeednu lo yäl'nabajñre rdedgajcreni, niluxh rujnreni ga'pnu te yälrdimbichaduxh ni gajdnu guidon, ni najc par tejpas. <sup>18</sup> Dinu fitis renani ruzeñ lo guedxliujre sa'csi sinitloj reni'c, alga cayenloonu renani di guzeñ, sa'csi renani di guzeñ najcreni par tejpas.

## 5

<sup>1</sup> Arabeenu tiejxhnu najc si'c te yu' xten xaimnu lo guedxliujre, sidzujñ dxej sinitlojni, nalajznu sejt tiejxhnu, suniidx Dios te tiejxhnu xten xhaguibaa nani di nitloj, nalajznu dini guet par tejpas. <sup>2</sup> Guliicani, lałni dxunnu neñ tiejxhre, rbedxneñnu rdeednu trabajw, ni'cni rłajznu maläii agojl guidxaa tiejxh guedxliujre te xca'nu te tiexhcoob ni siääd xhaguibaa. <sup>3</sup> Te si'c che acua'nuni, diruni gac si'cni suxhabääl xaimnu, sa'csi abicoob tiexhnu. <sup>4</sup> Lałni dxunnu neñ tiejxhre rbedxneñnu, rdeednu trabajw, sa'csi di rlaaznu suxhabääl xaimnu, rłajznu gacwnu tiexhcoobnu, te tiejxhre nani cayejt, sidebnäjni tiexhcoob ni siääd xhaguibaa. <sup>5</sup> Nani benchee nuure parpac dee najc Dios, lagajc nani runiidx Sprit Dxan xtenni loonu si'c te seen sujnpacnini.

<sup>6</sup> Ni'cni dinu guidxeb, sa'csi nadonnu lałni nabajñnu lo guedxliujre, di gacdi guibajñnu xhaguibaa loj Dadga. <sup>7</sup> Sa'csi nabajñnu xcuent nani rililajznu, xhet xcuentdi nani rajc rhuiinu. <sup>8</sup> Ni'cni rniä nabajñnu dinu guidxeb, rchaloonu hueenru guisa'nnu tiejxhnu lo guedxliujre, te choläznäänu Jesucrist xhaguibaa. <sup>9</sup> Ni'cni tejtis najc xhigabnu, palga lo guedxliujre o xhaguibaa, rłajztisnu jiennu renani gun guibaa lajzni. <sup>10</sup> Sa'csi guiraanu riäjł suunu nez loj yagxhiil cadre gun Jesucrist yälguxhtis, te tejanu guica'nu xcuent nani biennu lo guedxliuj, palga dzunsa'cni, o palga dzunguijdxni.

### *Diidx xcuent yäl'rbecdxi lajzni*

<sup>11</sup> Luxh sa'csi rdxejbnu (nalajznu rucuadaiaagnu xtidx) Dad Jesucrist, ruliidxnu rebejn te chalilajzreni xtiidxni. Luxh Dios najn xho nabajñnu; maläii näjza lo xcäriejntu guluilöj xho nabajñnu. <sup>12</sup> Dinu guiliä'p lagajc xpala'nnu lojtu stehuält, rniinu rediidxga lojtu te guibalajztu xcuentnu, te ga'ptu xhi diidx gusejctu lo rebejn ni rchagłajztis ruhuii xho rien bejn, direni gacbee xhi yu' neñ lastooreni. <sup>13</sup> Palga najcnu si'c bejn ni rajc yejcreni, si'c najcnu par Dios, palga najcnu si'c bejn ni nasa'c xcäriejñnu, najcnuni par la'tu. <sup>14</sup> Sa'csi sanälazduxh Jesucrist nuure, ni'c rusoobtisnu xtiidxni, sa'csi nancheenu gujt tejtis par guiraanu, ni'c najcni si'cni agujt guiraanu nez loj Dios. <sup>15</sup> Luxh Jesucrist gujt xcuent guiraa rebejn, te renani rililajz xtiidxni, na'cru guibajñreni xcuenttis laareni, alga guibajñpacreni xcuenttis Jesucrist nani gujt, nani gubansac xcuent laareni. <sup>16</sup> Ni'cni nuure dinu fii lo bejn si'cni najcreni lo guedxliujre. Galoo biembeenu Jesucrist si'cni gujcnı che gubajñni lo guedxliuj, niluxh naj et si'cti riembeenuni. <sup>17</sup> Ni'cni chutis bejn, palga rililajzni xtidx Jesucrist, sujnnini te beñcoob, diruni guichagłajz gunruni nani rajc lo guedxliuj, alga guichagłajzni gunni xtzun Dios.

<sup>18</sup> Guiraa dee siääd lo Dios, nani basiäjł lajzni xcuent Jesucrist, dxejcti baniidxni loonu rediidx xcuent xcäl'rusiäjł lajzni te gusule'nu rediidxga, <sup>19</sup> nalajznu, nanab gusule'nu diidxre: Dios guyunäj Jesucrist, cagusiäjł lajzni con reben guedxliuj, te xca'nireni, sa'csi diruni gudzuub xtojł reni ahuililajz xtiidxni lo xcuentreni. Dxejc gule Dios nuure te gusule'nu rediidxpacre lo rebejn. <sup>20</sup> Ni'cni sio'pnu te guiniinu xtidx Jesucrist, najcni ascanu lagajc Dios canabduxh lojtu che rniabduxhnu lojtu, colgusiäjł lajztu, colyajc tejsi con Dios. <sup>21</sup> Di Jesucrist niujn nicla tej dojl, niluxh sa'csi sanälajz Dios nuunu, xcuentnu bejn Dios gujc Jesucrist si'c te bendojł che gule'cni guiraa rextojł guedxliuj yejc Jesucrist che cuajni lo cruzj. Si'c gujcnı te sajç ga'pnu xcäl'naya, xcäl'nasa'c Dios xcuent Jesucrist.

## 6

<sup>1</sup> Ni'cni rniabnu lojtu, jia'cnu tejsi lo xtzun Dios, na'c cuälaztu xcälracnäjä Dios; palga guntu si'c, xlia'si cua'tuni. <sup>2</sup> Sa'csi loj xtidx Dios caj scree:

Dxej nani riäjł gunäni, bacuadiagä xtiidxtu,  
dxej che gubicaj xtojłtu gucnää la'tu.

¡Coljiejn! Naj najc te tiempsa'c,  
coljiejnza, naj najc dxej ni guibicaj xtojłtu.

<sup>3</sup> Na'c jiennu nicla tej ni gun guidxe'ch lajz bejn, didi guiniireni xhet laadi najc xcälrusule'nu. <sup>4</sup> Niluxh lo guira'ti dzuun ni riennu, guluilojnu lo rebejn najcnu xmos Dios; gacnu nadolajz; jiennu huant che rusacsireni nuure; che rdejndu trabajw; che di jien xho jiennu; <sup>5</sup> che rguijnreni nuure; che rusäureni nuure neñ latzguiib; che rdejndu lo bieiduxh; che rdajł xtzunnu; che re'ch bacal yääl; che rucua'nnu; <sup>6</sup> guluilojza najcnu xmos Dios xcuent xcäl'nabansa'cnu lo Dios; näjza xcäl'nansa'c xtidx Diosnu; näjza yälrajc nadolajz; sa'csi laaca riennu lo sa'nu; näjza sa'csi rbäjz Sprit Dxan xten Dios neñ lastoonu; näjza xcuent yälrinälajzpac bejn; <sup>7</sup> näjza xcuent didxguliipac; näjza lo xcälrnibeduxh Dios; ca'zanu si'c te madxed xcäl'naya Dios, ca'nuni guopnaanu, ladbee, näjza ladbäjgw. <sup>8</sup> Ruluilojzanu najcnu xmos Dios palga chä'p xpala'nnu, o palgaza jianxtujynu; palga guiniireni didxsa'c xcuentnu, o palgaza guiniyajreni nuunu; palga naareni najcnu beñrusguee, mase najcnu bejn ni rnii didxlii. <sup>9</sup> Palga rut rłajzdi gumbee nuunu, o palga guira'ti bejn numbee nuunu; acayejtnu, niluxh bahuii, anu anabajn; rusaan Dios rguijnreni nuure, niluxh dinu guet; <sup>10</sup> najcnu si'c bejn ni yu' xliajs, niluxh rbalaaznu; najcnu si'c bejn ni xhet rajpdi, luxh riennu gapduxh bejn; najcnu si'c bejn ni xhet rajpdi, niluxh rajpnu guiraloj.

<sup>11</sup> Lojtu, beñ Corinto, aguniliinu lojtu guiragajc rediidx ni yu' neñ lastoonu. <sup>12</sup> Xhetliidi diidxdı bacua'tznu lojtu, niluxh pet cacuatx lajztu diidx ni nanab guiniitu loonu. <sup>13</sup> Naj narä rulidxä la'tu si'c rulidx te Dad rexi'nni: ¡Colguinii loonu rediidx ni yu' neñ lastootu!

### *Najcnu si'c xquidoo Dios ni nabajn*

<sup>14</sup> Na'c guchaagtu lo rebejn nani di chalilajz xtidx Dios, sa'csi di gacdi gunteblojtu dzuun sa'csi tejni rłajz gun dzunsa'c, steeni rłajz gunni dzunguijdx, ¿xho gac sanäj bajł xcäjä, ä? <sup>15</sup> O ¿xho gac sanäj Jesucrist bendxab ni laa Satanás, ä? O ¿xho gac sanäj te bejn nani rililajz xtidx Dios te bejn ni di chalilajz xtidx Dios, ä? <sup>16</sup> ¿Xhixh tebloj najc xquidoo Dios con rebanäjb, ä? Ni nuunu najcnu xquidoo Dios ni nabajn, lagajc si'cni gunii Dios galoo:

Cuäzä neñ lastooreni, sisianääzareni.

Narä sacä Xtiosreni, laareni sajcreni rexpensä.

<sup>17</sup> Ni'cni colrii galäiireni, colguibicaj lojreni, te laad colcuääz, si'c naj Dios:

Te gac xca'ätu, na'c faltu recosdxuudx.

<sup>18</sup> Dxejc la'tu sajctu rexinganä, rexindxa'pä,

luxh narä gacä xtadtu,

si'c naj Gueb Dios ni rajp guiralii yälrnibee.

## 7

<sup>1</sup> Ni'cni, la'tu ni sanälazä, sa'csi abia'n Dios diidxre loonu, do'o guisia xcäriejnnu, lastoonu näjza tiejxhnu, do'o cuäcaj guiraa rehxigabguijdx, guiraa redojł, te gac sanu lo rexnezyudxan Dios con xcälrdxejb Dios.

### *Xho basiejch lajz rebeñ Corinto*

<sup>2</sup> ¡Colchanälajz nuunu neñ lastootu! Xhet latsiajdi biennu lojtu. Rut baxhiñdinu. Rutza basguedinu. <sup>3</sup> Dina guiniä rediidxre te cue'cä xquejtu; ni aguniä lojtu galooli, la'tu yu'tu

nen lastoonu palga tejsi guetnu, o palga tejsi guibajnrunu. <sup>4</sup> La'tu nadip lazä, rniduxhä didxsa'c xcuenttu lo bejn, rbedxi lastoä, rbalazduxhä loj guiraa retrabajw ni cadeednu.

<sup>5</sup> Ni'cni che guyu'nu reguedx Macedonia, di niajcdi nusilajznu sa'csi guiralajt cadejdnun trabajw, xcuent yälrdijl ni guyu' guideb gabinu, xcuentza yälrdxejb ni guyu' lastoonu. <sup>6</sup> Niluxh Dios ni racnäy rebejn ni rac-huin lajzreni, gucnäj nuure, sa'csi che bidzujn Tito guredxi lastoä. <sup>7</sup> Luxh xhet sa'csi bidzujntis Tito, näjza sa'csi gulecdxitu lastoo Tito, näjza sa'csi biädnäni diidx xho yu'tu, xho rlanjtu fiitu narä, xho yu' xliajs lastootu xcuent xtojltu, xho rlazduxhtu guntu si'cni guniä lojtu, ni'cni bibalasduxhäru.

<sup>8</sup> Acananä guc-huin lajztu che biltu guijtzi ni bacuaä lojtu, niluxh di lazä niac-huin mase che baxhaläni guc-huin lazä, sa'csi naj nanä mase bejn guijtzi guc-huin lajztu, xhet xchejdi guc-huin lajztu. <sup>9</sup> Niluxh naj rbalazä, et sa'csi guc-huindi lajztu, alga sa'csi guc-huin lajztu te basiejch lajztu xcuent xtojltu, sa'csi guc-huin lajztu si'cni rlanj Dios, te di yu' xhi gunijttu xcuent nuunu. <sup>10</sup> Sa'csi yälrac-huin ni ruxhal Dios loonu rujn rusiejch lajznu, te ruslaa Dios nuurnu lo dojl ni'cni rbaalazä che bejn ni si'c. Niluxh yälrac-huin xten guedxliuj dini gun gusiejch lajz rebejn rextojlreni, alga rujni nitloj bejn tejjas. <sup>11</sup> La'tu bejntu huant xliajs ni baxhal Dios si'cni rchaglajz Dios gac. Naj colhuii gan! jLacti xhi cossa'c bejn ni par la'tu! Bejn ni bahuisa'cpactu xhini'c gujc, te gac gusulegajctu xcuentni; dxejc bejn ni bidxe'chtu, näjza bejn ni bidxejbtu, ni'cni basaantu dojlga, dxejcti bejn ni rlanjpactu nuhuiitu loä, bejn zani guyu'tu yärsia' xcuentä, bejn zani rlanjtu guntu yälguhtis bejn nani bejn dojlga. Guiraa redee baluiloj et la'ditu bejn dojl. <sup>12</sup> Ni'cni, che bacuaä guijtzi, dina nucuaäni loj bejn ni bejn dojlga, niluxh bacuaä guijtzi lojtu te guiluiloj xcärsia'tu ni rajptu xcuent narä nez loj Dios. <sup>13</sup> Ni'cni aguredxi xcäriejnnu.

Naj aguredxi xcärienä, bibalazduxhäru xcuent xcälrbalajz Tito, sa'csi bicoob, bisilajz xpritni xcuent guiraatu. <sup>14</sup> Sa'csi palga yu' xhi didxsa'c ni räpä lojni xcuenttu, ditu nusanxtujy narä nez lojni. Niluxh sigajcni guniinu ganax didxguli, sigajcna naj guiraa redixsa'c xcuenttu ni guniä loj Tito, guliipacni. <sup>15</sup> Ni'cni maazru sanälajzni la'tu, che rnaj lajzni xho basoohtu diidx, xho bejntu cua'tuni che bidzujn nu, racsejlitu cadxejbtu. <sup>16</sup> Naj rbaalazä sa'csi loj guira'ti la'tu nadip lazä.

## 8

### *Saru rudeedreni meel*

<sup>1</sup> Naj bejznu, rlanjznu guiniinu lojtu xho badeed Dios xcälrulaslajzni lo reben Macedonia ni huililajz xtidx Dios. <sup>2</sup> Mase gudedduxhrenei trabajw, bibalajzreni, mase xhetliidi gojpreni, badeedreni meel si'c te ben ni rajp. <sup>3</sup> Narä caniliä lojtu, badeedreni xmeelreni si'cni gojpreni, luxh badeedruren i loj ni naa bejn saj gudeedreni. <sup>4</sup> Gunabduxharen i loonu guisaannu gudeedreni xmeelreni te gacnäjreni rexpenn Dios. <sup>5</sup> Niluxh direni niujn si'cni biennu xhigab gunreni. Ganiddoo badeedreni lagajc laaren i loj Dad Jesucrist, näjza loonu si'cni rnibee Dios gac. <sup>6</sup> Sa'csi batie' rexpenn Macedonia meel, ni'c naj räpä loj Tito chanuupacni gutie'ni meel lojtu si'cni gunii Tito lojtu galoo. <sup>7</sup> Rujntu xhidajl dzunsa'c. Rililazsa'ctu xtidx Dios; rnisa'ctu xtidx Dios; rajptu yäl najn; rchaglajzpac tu guntu dzuun; rinälajztu nuunu, ni'cni na'c gusaantu tedcaj gunzatu dzunsa'cre, nalajznu, gudeedtu meel.

<sup>8</sup> Dina guiniä lojtu colyujn pacni; narä rlazätis gacbeetu xho rbaalajz reni rudeed meel te guluiloj don la guli sanälajzpaczatu rexpejn Dios. <sup>9</sup> Sa'csi la'tu anumbecheetu rulaslajz Dad Jesucrist, te mase najcni ri'cw, rajpni guiraa xhixten Dios, xcuentu gujcn i si'c te bejn ni xhet rajpdi, te xcuentni ga'ptu guiraa rexhixten Dios xhaguibaa.

<sup>10</sup> Narä siniä lojtu xhi xhigab runä, par lagajc xcäl'nasa'ctu. Gudebijzli ganiid la'tu guslojtu bejntu dzunsa'cre, luxh rbaali lajztu rlanjzpac tu guntuni. <sup>11</sup> Naj colchanuu, colguluux dzuunga si'cni guslojtu cayujntuni. Naj te luux dzuunga colgudeed si'cni rajptu. <sup>12</sup> Sa'csi palga rlanjzduxh te bejn gudeed lo Dios, laaca najc gudeedni si'ctis ni rajppacni.



Di Dios guiniab gudeed bejn nani dini ga'p. <sup>13</sup> Dina guiniä gudeedtejtü te tedtu trabajw te gapduxh stee bejn, alga te gacteblojtistu. <sup>14</sup> Nani rajprulu naj ni'c colgudeed te gusalöjtu ni cayäädxtü, te stee dxej nani rajpreni laareni sajc suniidxzareni te gusalöjreni nani cayäädxtü te si'c gacni tebloj. <sup>15</sup> Sa'csi lo xtidx Dios caj scree: "Te bejn nani batopduxh yäl\_nasa'c, xhet bia'ndiru, dxejcti nani guxii batojpw yäl\_nasa'c, xhet biäädxtü."

### *Tito näjza rexcompanieerni*

<sup>16</sup> Xquixtios lo Dios nani rudeed lo Tito lagajc yärsia' ni rapä narä par la'tu. <sup>17</sup> Sa'csi cuäjbni gunni nani gunabä lojni gunni. Luxh sa'csi rlazduxhpacni gunni xtzüun Dios, naj lagajc laani bejn ni xhigab jäädhuiini lojtu te luux dzuunre.

<sup>18</sup> Caguxhalnu xtee bejtznu chanä Tito. Guiraa rebejn guidoo rnii didxsa'c hueen xcuent bejnre sa'csi laaca rusule'ni xtidx Dios. <sup>19</sup> Ni'ctis aguleza reben guidooni te chunäjni narä te gacnäjni narä lo xtzüun Dios nani cayennu te guiliä'pni xpala'n Gueb Dad Jesucrist, te guluilöjza lacti rlazpaci jiennu xtzüunni. <sup>20</sup> Ni'cni rlazä jiapdaduxhnu te di chu tej ni guiniyaj nuure xcuent melrore ni chosa'nnu lo rexpejn Dios. <sup>21</sup> Sa'csi narä riuduxhä runä nani najc laaca, et ganax nez lojdi Jesucrist, näjza loj rebejn.

<sup>22</sup> Con guiro'p redee, caguxhalzanu stee bejtznu, nani agujc balti huält bihuiinu xho rujnni, te bahuiipacnu rlazpaci gunsa'cni xhidajl dzuun, luxh naj rlazrzi gunsa'cni redzuunga sa'csi nadip lajzni la'tu. <sup>23</sup> Palga yu' chu guiniabdiidx xcuent Tito, colyejtz lojni laani najc nani cayunnäj narä dzuun lojtu. Dxejcti xcuent stio'p bejtznu, laareni najcreni xquixhajg reguidoo, rliä'pzareni xpala'n Jesucrist. <sup>24</sup> Ni'c na'c guidxejbtu che yu'tu lo rebejn reguidoo guluiipactu loj rebejn ga xho sanälajztu, näjza redzuun ni rujntu ni'c rniinu ganax didxsa'c xcuenttu.

## 9

### *Meel par rebejtznu*

<sup>1</sup> Ni'cni dina gucuaäru lojtu xcuent dzuunre, nalajznu, yälracnäj rexpejn Dios, <sup>2</sup> sa'csi anancheä rlazpactu guntuni, luxh xcuentpac ni'c agulä'pä xpala'ntu loj reben Macedonia, rapä lojreni la'tu, reben Acaya, gudebijzli batie'tu meel, luxh sa'csi bejntu si'c, xhidajlza reben Macedonia biniib te badeedzareni meel. <sup>3</sup> Ni'cni abaxhalä rebejtznu lojtu, te di xlia'si gulä'pä xpala'ntu xcuent dzuunre, te acabäjzlitu gudeedtu xmeeltu, sigajc ni agunixgaä lojtu. <sup>4</sup> Didi che jäädnää reben Macedonia jiophuiinu la'tu, xhet rajpditu, dxejc jianxtuyä narä, näjza la'tu. <sup>5</sup> Ni'cni benä xhigab, nanabpac jäädxgaa rebejtznu, jäädhuiireni la'tu, te fiireni don xho gac xcuent meelro ni galooli bia'n diidx gudeedtu, te abatiexgaatu nani gusalajztu sa'csi rlazpactu gudeedtuni, xhet sa'csi rniinu riäjlpac gudeedtuni.

<sup>6</sup> Rniliä lojtu, nani guxii rbe'c, guxiiza yäl\_nasa'c guiliäsni, niluxh nani rbe'c xhidajl binij, xhidajlza yäl\_nasa'c guiliäsni. <sup>7</sup> Tejgatu colhuii don lacti sajc gudeedni, dxejc si'c sugudeedni si'cti ni rlazzni, na'c gun tiopdi lajzni, etza sa'csi riäjlpac gudeednini, sa'csi Dios sanälajz bejn ni rbaali lajzni rudeedni meel lojni. <sup>8</sup> Luxh Dios sajc guniidxru xcälracnäjni lojlu, te si'c guixe-guixee sajplu xhidajl guiralöj rexhixtenlu, te ga'plu xhitis ni rquiinlu loj guira'ti xtzunsa'clu. <sup>9</sup> Sa'csi lo xtidx Dios caj scree:

Abadeduxhni loj reben ni xhet rajpdi luxh redzunsac ni rujnni, najcreni par tejpas.

<sup>10</sup> Dios nani rudeed binij ni rbe'c nani rujn dzuun loniaa, laani suniidxzani yätxtiil te guidaunu, lagajc Diosga suniidx, sutajlza binij cue'ctu, lagajc laani sustioobnini te gacduxh yäl\_nasa'c xten xtzunsa'ctu. <sup>11</sup> Te si'c ga'ptu lacti yäl\_nasa'c te gac gudeedzatu xhiroob. Luxh xcuent xtzüunnu, meel ni ruxhaltu loj rexpejn Dios sujn gudedduxhrene xquixtios lo Dios. <sup>12</sup> Sa'csi che racnäjtü rebejtznu, dinu guideed ganaxtis ni rquiinreni,



rujnzanu rudeedruren i xquixtios lo Dios. <sup>13</sup> Che racnäjtü sa'tu si'c, ruluilojtu lacti ru-soobtu xtidx Dios si'cni ahuililajztuni, ni'cni siliä'preni xpala'n Dios xcuent xcälracnäjtü, nalajznu xcuent meel ni badeedu lojreni, näjza loj guiraareni. <sup>14</sup> Dxejcti laareni sibedx-siniabzareni lo Dios xcuenttu, sinälazduxhreni la'tu sa'csi runidxduxh Dios xcälracnäjni lojtu. <sup>15</sup> iXquixtiosi Dios sa'csi baniidxni yäl\_nasa'cduxhtej loonu!

## 10

### *Yälrnibee ni rajp Pabl sa'csi najcni apost*

<sup>1</sup> Lagajc narä, Pabl, rniabduxhä lojtu, con guiraa didxdoo, guiraa didxsa'c xten Crist, (narä ni nac beñnadolajz che biälä lojtu, niluxh che suga'a zijt lojtu, dxejc nacä beñnialajz). <sup>2</sup> Narä canabä lojtu, colguibañsa'c te che jädhuiä lojtu, dina gacä nialajz dizana guiniä redidxnaj ni abenä xhigab guiniä loj gäi bejn nani rni nabañä si'c te beñguedxliuj. <sup>3</sup> Guliicani najcnu beñguedxliuj, niluxh dinu gucuanäj sa'nu guiib nani rca' beñ guedxliuj che rcuaareni. <sup>4</sup> Sa'csi reguiib ni rca'nu te guidiisa'nu direni gac sa' guiib ni rca' beñ guedxliuj. Nuunu rucuaanu con xcälrnibee Dios te riennu gaan loj guiraa rexcälrnibee guedxliujre. <sup>5</sup> Ni'cni cagutzuj\_nu guiraa rexhigabguijdxreni, näjza nani rchaloreni najc xhigabro nani rrajzreni guiniyajreni yälrumbee Dios, luxh caca'nu guiralii rexhigabnu cagutednuren i ladzñaa Jesucrist te gusoobnu rextidx Jesucrist. <sup>6</sup> Cabäätisnu te gunnu yäl\_guxhtis loj chutis bejn ni dini gusoob xtidx Dios, che abasoob guiragajctu xtidx Dios.

<sup>7</sup> La'tu cahuiitu redzuun ni rien. Palga yu' chu tejtü ni rchaloni najcni xpejn Crist, sugunsa'cni xhigab, fini xho najc lastooni, dxejcti sugacbeepacni sigajcni ahuililajzni xtidx Jesucrist, sigajcza nuure ahuililajznanuni. <sup>8</sup> Sa'csi mase guiliä'päru xpala'nä xcuent yälrnibee ni rapä, ni baniidx Dios te gustiobä xcäl\_rililajztu, et te guxhinädi la'tu, nicla si'c dina guituiä. <sup>9</sup> Dina rlazä guchalotu rlazä guchebä la'tu con rexquitzä. <sup>10</sup> Sa'csi rniireni: "Lo rexquijztni caj didxnagajn, didxnialajz, niluxh che suga'ni laapacni, xheti xcäl\_siudzu'tztni, luxh xho rniaj diidx ni rniini." <sup>11</sup> Luxh ni rii si'c, sugacbeepacni dee: si'cni najcnu con rextiidxnu che rucuaanu lojtu che yu'nu zijt, sigajcza najcnu che suganäjpacnu la'tu.

<sup>12</sup> Dinu gun xhigab najcnu tebloj loj rebejn ni runnaro lagajc laareni. Niluxh reni'c rchaloreni si'c sa'csi ruhuiireni xho najcreni cuä' stee lagajc sa'reni. Che rujnreni si'c, nayääl xcäriejnreni. <sup>13</sup> Nuure dinu gunnarotej lagajc nuurnu, niluxh riennu si'cni nungäj\_l jiennu, xcuent yälrnibee ni baniidx Dios loonu te jiennu dzuun cadro yu'litu. <sup>14</sup> Ni'cni dinu nidedcaj xcälrnibeenu che bio'pnu lojtu, sa'csi baniidx Dios yälrnibee loonu ganiddoo nuunu gusule'nu xtidx Jesucrist lojtu. <sup>15</sup> Dinu niennaro lagajc nuurnu xcuent xtzuum ste'ca bejn, ascanu lagajc nuunu biennuni. Cabääznu tioobru xcäl\_rililajztu, te gac jienrunu dzuun lojtu, si'ctis gal\_jiennuni. <sup>16</sup> Te gacza gusule'nu xtidx Jesucrist ste'ca lajt ni ria'n zijtru lo guejdx cadro yu'tu, na'cza gunnaronu lagajc nuunu xcuent dzuun ni bejn ste'ca bejn.

<sup>17</sup> Sa'csi nani rrajz gacnaro, suguiliä'pni xpala'n Dad Jesucrist. <sup>18</sup> Sa'csi et nani rliä'p lagajc xpala'ndini ni ria'n hueen nez loj Dios, niluxh bejn ni rliä'p Jesucrist xpala'nni, ni'cni rbalaznäj Dios.

## 11

### *Pabl näjza rebejn ni rniisi najcreni apost*

<sup>1</sup> Maläi chanunäsijctu narä la\_l ni guiniä gäi didxnayäle', niluxh asanunäjtu narä. <sup>2</sup> Randzu'ä la'tu con yälrandzu' ni baniidx Dios, sa'csi abia'n diidx gutedä la'tu ladzñaa Jesucrist te xca'ni la'tu. Rlazä gactu beñnaya chäätu lojni, si'c te dxa'p che ruchñaani te bi'n, rut bahual\_dini. <sup>3</sup> Niluxh rdxebä didi gusguee beñdxab la'tu si'c ni basguee bäl Eva con xcäl\_nadxällajzni. Didi gunni guichaa xhigabtu, guibicajtu lo xtidx Jesucrist luxh naj

laaca rajnpactu Jesucrist, guideb lastootu. <sup>4</sup> Sa'csi la'tu cagutipduxh lajztu che riädni ste'ca bejn lojtu xtidx stee Jesús nani digac nani bisule'nu lojtu; o che naareni xca'tu stee sprit ni digac nani acua'tu; o che naareni chalilajztu ste'ca diidx nani najc garenca lo xtidx Dios ni ahuililajztu. <sup>5</sup> Narä runä xhigab dina gacä bejn ni guxiiru sajc loj guiraa reapost.

<sup>6</sup> Mase di gacdi guinisa'cä, xhet yäl\_najndiza cayädxä; niluxh ni'c huenliisi rluiloj guiraa rediidx ni abaluiä lojtu, guiraa redzuun ni abenä ro'c.

<sup>7</sup> O ¿la benä te dojl guyu'ä lojtu si'c te bejn nadolajz, te gactu bejnroru, sa'csi xhetliidi cua'ädi xcuent ni basule'ä xtidx Dios lojtu? <sup>8</sup> Cua'ä meel ni baniidx garenca guidoo loä che guyu'ä lojtu, te benä xtzun Dios lojtu. <sup>9</sup> Che guyu'ä lojtu guyu' xhi biquinä, niluxh xhet cua'ädi lojtu, dina nutalä xtzuuntu. Sa'csi che biääd rebejtznu ni siääd Macedonia, baniidxreni guiraa ni biquinä. Loj guiraa redee dina nutalä xtzuuntu, luxh si'c sinuu gunä. <sup>10</sup> Guideb didxlii xten Jesucrist ni yu' nejn lastoä, rniliä rut sajc di gudzucaj xcuent xho yuä lojtu, ni'cni care'ch didxroga lo guiraa reguedx Acaya. <sup>11</sup> ¿Xhicuent rniä si'c? ¿Laa sa'csi dina chanälazä la'tu, ä? ¿Xho gacni si'c! ¿Dios anajn lacti sanälazä la'tu! <sup>12</sup> Niluxh nani rungacä, lagajc ni'c sinuu gunä, te gudxonä renani rrajz gacnaro, renani rrajz naa rebejn najcreni si'cpac najcnu, niluxh direni gac. <sup>13</sup> Direni gac apost, laareni rusgueereni, rujnsireni si'c ni najcreni apost xten Jesucrist, luxh rut najcdireni. <sup>14</sup> Luxh xho dini gac si'c, ni lagajc bejdxab ni laa Satanás rluiloj si'c te xangl Dios ni rdimbicha' te rusgueeni bejn. <sup>15</sup> Ni'cni na'c guidxelojtu palga näjza rexmos bejdxab riääd, rujnsireni si'c bejn ni rujn dzunsa'c, niluxh sinitlojreni par tejpas xcuent ni rujnreni.

### *Rdejð Pabl trabajw sa'csi najcni te apost*

<sup>16</sup> Rnisacä lojtu, na'c guntu xhigab yecä cayajc, niluxh palga si'c rujntu xhigab, colgusaanza guiniä si'c te ni rajc yejcnä te guniäza didxro lagajc xcuentä. <sup>17</sup> Diidx ni rniä dina guiniäni xcuent xcäl\_rnibee Dios, alga rniäni si'c te ni rajc yejcnä, lala redidxro ni rniä xcuent lagajc narä. <sup>18</sup> Sa'csi lacti bejn yu' ni rniä didxro xcuent redzuun ni rujnreni lo guedxliujre, sigajcza siniä didxro xcuent lagajc narä. <sup>19</sup> Ni la'tu, sa'csi nasin\_duxhtu, sanunäjtu rebejn ni rajc yejcnä. <sup>20</sup> La'tu sanunäjtu chutis ni rnibee lojtu si'c te lam, o rusguee la'tu te rbajnreni xhi xtentu, o rujnni runxlia'tu xtzuunni o rliä'preni lagajc xpala'reni, o rga'preni lojtu. <sup>21</sup> Mase rtuiyä guniäni, dipac niajcni niniä diidx lojtu te niacä si'c najc rebejn\_ga. Niluxh loj xhitis nani runnaroreni, (canisicä si'c te bejn\_nayäl) narä sajcru gunnaröä.

<sup>22</sup> ¿La najcreni xpejn hebreos? Sigajcza narä. ¿La najcreni xpejn Israel? Sigajcza narä. ¿La najcreni xajg toAbram? Sigajcza narä. <sup>23</sup> ¿La najcreni xmos Jesucrist? Narä nacärüni lojreni. Naj rniä si'c te bejn ni rajc yejcnä. Abenäru dzuun lojreni, agudijnrurenä narä loj ni gudijnreni laareni, abasäururenä narä nejn latzguuib, nicla gac guigab bal huält gudijnreni narä; baltiza huält ameer nietä. <sup>24</sup> Gaii huält gudijn rexpejn Israel narä, tejga huält batiäjlni duguijd detzä galbitzubigaa huält. <sup>25</sup> Choñ huält bahuajcwreni narä garo't; stee huält bacuaareni guij yecä; choñ huält biäaz barcw cadre sa'ä loj nisdoo; teb dxej, teb yäl guyu'ä lo nisdoo. <sup>26</sup> Huaduxhä biaj, lacti bixun riesgw xcuentä lo gueuu, xcuent regubaan, xcuent reben\_ladxä, xcuentza reben\_zijt. Bixunza riesgw nejn reguedxro, näjza nez lo reyubijdz, näjza lo nisdoo, näjza xcuent rebejn ni rusguee, rniisireni najcreni bejtznu lo xtidx Jesucrist. <sup>27</sup> Abenduxhä dzuun, agudedduxhä trabajw, balti yäl dina niesä, balti huält gulanä, biolä, balti huält xheti xhi niauä; agudedäza yäl\_nalduhx; guyu' huält xhetiza xhabä.

<sup>28</sup> Luxh xhet loj redeetis rdedä trabajw; guixe-guixee di lastoä cuedxi xcuent yärsia' ni ru'ä xcuent reben guidoo ni huililajz xtidx Dios. <sup>29</sup> Che rdxajg tejtü, näjza narä rdxagä. Palga tejtü riajb lo dojl, narä ruduxhä yärsia' xcuentni. <sup>30</sup> Palga nanab gunnaröä lagajc narä, sunäni xcuent rediidx nani rluiloj xcäl\_rdxagä. <sup>31</sup> Dios ni najc Xtad Jesucrist,

nani riäjł guiliä'p xpala'nni par tejpas, ananchee dina gusgueä la'tu. <sup>32</sup> Che guyu'ä guedx Damasco, gubernadoor nani guyu' ro'c, najcni xpejn reii Aretas, gunibee gojp rexcuxhtisni guejdxga te niniaazreni narä te nisäureni narä neñ latzguuib. <sup>33</sup> Niluxh basiäjtreni narä neñ te dximro nez ro' te padeer ni rdejd gabi guejdxga, te si'c guļää ladzñaareni.

## 12

### *Dios baluiloj lo bacal*

<sup>1</sup> Mase riäjł guiniäni, xhet gunädi gaan guiniä didxro lagajc xcuentä ni'cni rlazä chanuu diidx, guiniä xcuent rebacal näjza xcuent nani baluiloj Dios loä. <sup>2</sup> Numbeä te niguii ni ahuililajz xtidx Jesucrist. Gutzudaj ijz huijni guibaa ni riojnga, dina ganä laa guideb tiejxhni huijni, o la ganax xspritni huij, Diostis najn. <sup>3</sup> Diostis najn la guideb tiejxhni, o ganax xpritni, niluxh nanä xho huij niguiiga, <sup>4</sup> guläs Diosni cadro yu'pac Dios, luxh ro'c biejn diajgni didx-xhiga'tz, didxroduxhtej, nani di gacdi guinii beñ guedxliuj. <sup>5</sup> Xcuent sa' niguiiga sajc guiniä didxro, didxsa'c, niluxh xcuent lagajc narä, di gacdi guiniäni; siniätis diidx ni rululoj xcälrdxagä. <sup>6</sup> Mase rlazä guiniä didxro, didxsa'c xcuent lagajc narä, dini gac didxnayääl, sa'csi guliicazani. Niluxh dina guiniäni te di guntu xhigab nacä beñroru loj ni rhuiitu runä o nani riejn diajgtu rniä.

<sup>7</sup> Baluiloj Dios xhidalduxh cosroduxh loä, niluxh te na'c gacä beñnaro, basaan Dios gusloj guyuguijdx tiexhä, si'c te guejch huääz tiexhä, ni baxhal beñdxab xten Satanäs te gusacsini narä te di gacä te beñnaro. <sup>8</sup> Choñ huält agunabä lo Jesucrist xcuent ni'c, te guibicajni. <sup>9</sup> Niluxh laani najni loä: “Yälracnäj ni gunidxä salduxh luj, sa'csi ruzensa'cru xcälmilagwrä che xheti yälrutiplajz te bejn.” Ni'cni hueenru guiniä didxro sa'csi xhet yälrutiplazädi rapä, te guzeñ xcälrnibee Jesucrist lastoä. <sup>10</sup> Ni'cni rbedxilazä xheti xcälrutiplazä, rbedxizalazä rniyajreni narä, näjza che caquinä guiraloj, näjza che rdedä trabajw xcuent Jesucrist, sa'csi che xheti xcälrutiplazä, dxejc runiidx Dios yälñadip, yälñadaan loä.

### *Yu' Pablyärsia' xcuent guidoo ni yu' Corinto*

<sup>11</sup> Agucä si'c te beñnayääl, lagajc la'tu bejntu nacä si'c. La'tu riäjł niniitu didxro, didxsa'c xcuentä, sa'csi gajdpac biädxädi, nadxagä loj reapost ni sajcro mase rut nacädi. <sup>12</sup> Redzuun ni benä laļ ni guyu'ä lojtu, benäni si'c te ni najcpac apost, huinuutis benäni guideb nadolajz näjza reseñ, näjza remilagwr. <sup>13</sup> ¿Xhi benä lojtu te naatu runä xhigab guxiiru sajctu loj guiraa reguidoo? Nani benätis najc dee: dina nutalä xtzuuntu, nalajznu dina niniabä niacnäjtu narä si'c gucnäj narä reguidoo ni yu' garenca lajt. ¿Colsiäjł lajztu narä dojlre!

<sup>14</sup> Naj cayunä xhigab jiädhuiätu, naj gacni choñ huält siälä. Di quilä xhixtentu, alga lagajc la'tu rguilä. Di rlazä gutalä xtzuuntu. Di riäjł cuchee rebiuux meel par xcuzajnreni. Reguzajn ni riäjł cuchee meel par rexi'nreni. <sup>15</sup> Xhet najcdi gunitä guiraa nani rapä, näjza lagajc narä sujiuxä, te laa xaimtu lo dojl. Palga chanälazäru la'tu, ¿la guxiiru chanälajztu narä, ä?

<sup>16</sup> Niluxh mase si'c najcni, di narä nutalä xtzuuntu. Empac yu'reni canii basgueä la'tu sa'csi nadxällazä. <sup>17</sup> ¿Xhixh naatu cua'ä xhi xtentu sa'csi baxhalä rebejtznu lojtu, ä? <sup>18</sup> Che baxhalä Tito, rapä lojni chanääni stee bejtznu te jiädhuiireni la'tu. ¿Xhixh cua'ni xhi xtentu, ä? Xhixh et tejsi xhigab biennu, tebloj biennu dzuun guiro'pnu che guyu'nu lojtu.

<sup>19</sup> Laļni cayoltu guiraa rediidxre, cayujntu xhigab canabnu jiäjł lajztu, niluxh xhet si'cdini. Caniinu rediidxre nez loj Dios, caniizanu con xcälracnäj Jesucrist te si'c tioobrutu lo xtidx Dios, rebetzä nani rinälazä. <sup>20</sup> Sa'csi rdxebä andi che jiädhuiätu fiä ditu gac si'cni rlazä gactu, dxejctiru la'tu suhuiizatu dizana gacä si'cni rlazjtu gacä.

Rdxe**b**ä andi yu'tu ni cadijl, ni ruguij lajz**n**i xhixten sa'ni, ni cadxe'ch lo sa'ni, ni cala' lo sa'ni, ni caniyaj sa'ni, ni cagutajl diid**x** lo sa'ni; ni cayunnaro lagajc laani, ni cayujnza bie**j**y. <sup>21</sup> Rdxe**b**ä andi che jiädhuiätu stehuält, gusanx**t**ujy Dios narä xcuenttu. Rdxe**b**äza sondu**x**hä xcuent xhidajltu nani abani**j**t, be**j**ntu do**j**l galoo, luxh gajdtu gusiechlajz**t**u xcuent xto**j**ltu. Yu'tu ni di guiba**n**naya, res**n**ä**j**tu be**j**n ni di gac chää**l**tu, yu'za balti do**j**l ru**j**ntu.

## 13

### *Lult yäl**r**ulijdx xten Pabl*

<sup>1</sup> Naj gac cho**n** huält siädhuiä la'tu. Guira'ti quej nanab cue'creni con x**t**id**x** tio'p o cho**n** be**j**n ni najnpac xhi do**j**l be**j**n te**j**gani. <sup>2</sup> Mase ruti narä ro'c, arnixgaä lo**j**tu lagajc diid**x** ni guniä che guyu'ä lo**j**tu ni baro**j**p biälä lo**j**tu, luxh rniä lo**j** renani abe**j**n do**j**l, nä**j**za lo**j** guiraatu, palga jiälsacä, diruna gulaslazä**t**u nicla te**j**tu, <sup>3</sup> sa'csi r**l**ajz**t**u fiipactu la guli**i** runi**i**id**x** Jesucrist yäl**r**nibee loä te guiniä x**t**iid**x**ni. Luxh Jesucrist dini guisisni xcuenttu, niluxh laani rustioobruni x**t**iid**x**ni ne**n** lastootu. <sup>4</sup> Guliicani che cuajni lo cru**j**z, gu**c**ni si'c te be**j**n nani casis, niluxh n**a**j nabaj**n**ni sa'csi rapdu**x**hni xcäl**r**nibee Dios. Nä**j**za nuure rsia'cnu si'c te be**j**n nani casis**n**ä**j** laani niluxh naba**n**nä**j**nu laani xcuent xcäl**r**nibee Dios ni baniid**x**za Dios xcuenttu.

<sup>5</sup> Col**n**inä**j** lastootu lagajc la'tu, col**h**uii la guliipac ahuililajz**t**u x**t**id**x** Dios; col**h**uisa'c xho najc lastootu. ¿La ditu gacbee rbä**j**z Jesucrist ne**n** lastootu, ä? Palga rutini, rusqueetu lastootu, ditu nililajz**t**u x**t**id**x** Dios. <sup>6</sup> Narä r**l**azä gacbeetu, dinu nusguee lastoonu, ahuililajzpacnu x**t**id**x** Dios. <sup>7</sup> Rniabä lo**j** Dios na'c guntu cosguijdx, xhet te guiniidi be**j**n did**x**sa'c xcuentnu, alga te la'tu guntu recossa'c, mase guiniireni et laadi cayunä narä. <sup>8</sup> Sa'csi xhetliidi rajcdi riennu te nitlo**j** did**x**guli**i**, xcäl**r**nibeenu najc te gusule'nu did**x**lii. <sup>9</sup> Ni'cni rbaa lajznu che casisnu, niluxh la'tu nadip, nadaantu; rbe**j**dx-rniabzanu lo Dios guiza' xcäl**r**ililajz**t**u lo x**t**id**x** Dios. <sup>10</sup> Rucuaä reguijzre lo**j**tu che gajdna jiälä, te che jiälä na'c til**n**äätu si'cpacni nungä**j**l til**n**äätu xcuent yäl**r**nibee ni baniid**x** Dad Jesucrist loä, te gac tioobrutu lo x**t**id**x** Dios, xhet te nitditu.

<sup>11</sup> Ni'cni rbe**j**tznu, colguibalajz, col**h**uii guisa' xcäl**r**ililajz**t**u, col**c**uecdxi lajz**t**u, col**y**ennä**j** sa'tu tejsi xhigab, dxitis gubaj**n**. Dios xten yäl**r**inälajz nä**j**za yäl**r**becdxi lajz chunä**j** la'tu. <sup>12</sup> Col**n**ii: “Xchan” lo resa'tu. <sup>13</sup> Guiraa rebe**j**tznu nani ahuililajz ruxha**l** x**t**ix**t**ios lo**j**tu.

<sup>14</sup> Yäl**r**acnä**j** xten Dad Jesucrist, nä**j**za yäl**r**inälajz xten Dios, nä**j**za yäl**r**acnä**j** xten Sprit D**x**an chu ne**n** lastootu. Sugacni si'c.

## Te Guijtz Lo Reben Gálatas

### *Pabl rucuaa guijtz loj reben guidoo nez región Galacia*

<sup>1</sup> Narä, Pabl, nacä apost xten Jesucrist. Xhet rebejndi baxhal narä, xhetza bejndi gule narä. Lagajc Jesucrist näjza Xtradni Dios ni yu' xhaguibaa, nani guläs Jesucrist loj reben gut, laareni agulere ni narä. <sup>2</sup> Narä, näjza guiraa resa'nu nani yunäj narä, rucuaanu guijtzre lo reben guidoo ni yu' nez reguedx Galacia. <sup>3</sup> Xca' guejbtu xcälracnäy Dios con xcälrbexilajz xten Dios xtradnu näjza xten Dad Jesucrist. <sup>4</sup> Lagajc laani cuäjbni gujtni te guslaani nuure lo dojl xten guedxliuj guijdxre, si'cni gunibee Xtradnu, Gueb-Dios. <sup>5</sup> Chä'p xpala'n Dios par tejpas. Sugacni si'c.

### *Xhetdi xhi stee didxcoob ni sajc guslaa nuure*

<sup>6</sup> Rdxeloduxhä lacti riojb cabälaztu Dios ni gurejdx la'tu con xcälrinälajz Crist, luxh naj cagusoobtu ste'ca diidx. <sup>7</sup> Xhetdi stee diidx ni sajc guslaa nuure lo dojl. Yu'reni rlajz gusiejchreni lajztu con ste'ca diidx, rlajzreni guchaareni xtidx Jesucrist. <sup>8</sup> Niluxh palga jiääd chu jiädliui lojtu ste'ca diidx ni ruslaa bejn lo dojl, niluxh di diidxga gac si'c najc diidx nani abaluiinu lojtu, bejnga agubibdeni, chutis najcnu, mase naräni, mase te xangl Dios ni jiääd xhaguibaali. <sup>9</sup> Si'c ni guniä lojtu, si'c rnisacä lojtu naj: Pal yu' chu jiädliui lojtu ste'ca diidx ni ruslaa bejn lo dojl, luxh di diidxga gac si'c najc diidx nani abaluiinu lojtu, bejnga agubibdeni.

<sup>10</sup> ¿Xhi naatu? ¿La rlazä guinisa'c bejn xcuentä o la rlazä guinisa'c Dios xcuentä, ä? ¿La rlazä guspaä lajz bejn, ä? Paru rlazä guspaä lajz bejn, digacdi gacä xmos Jesucrist.

### *Xtzun Pabl*

<sup>11</sup> Colyabee sa'ä, diidx ni ruslaa bejn lo dojl nani abasule'ä lojtu di diidxga gac xhigab bejn guedxliuj. <sup>12</sup> Xhet lojdi bejn guedxliujdi cua'äni, rutza baluiidini loä, niluxh lagajc Jesucrist baniidx xtiidxni loä.

<sup>13</sup> Anajntu xho gucä, xho gubanä galoo che rusobätis rexleii toMoisés. Dxejc basacsíduxhä reben guidoo ni huililajz xtidx Jesucrist, si'c benä te rlazä nitlojreni. <sup>14</sup> Loj reni rusoob xleii toMoisés narä cagusobäru xtiidxni, nanduxhäru loj guiraareni. Loj rebejn nani sadxagä ladxä, maazru sanälazä xcostumbr retoxtadgoldoä. <sup>15</sup> Dios gule narä, guleni narä cheni nuuli xnanä narä, gurejdxni narä sa'csi sanälajzni narä. <sup>16</sup> Dxejc bibalajz Dios baluilojni Xi'nni Jesucrist loä te guiniä xtiidxni xcuent xho ruslaani bejn lo dojl loj reni di gac xpejn Israel. Che gujc si'c rut lojdi huiye'tzä. <sup>17</sup> Niclaza nia'ä guedx Jerusalén loj reni ganid gujc apost loä. Alga hua'a nez reguedx Arabia, dxejcti gubisacä guedx Damasco.

<sup>18</sup> Che agudejd si'cti chon ijz, dxejcru hua'a guedx Jerusalén te biembeä Pedr, dxejc biannäni tzun-gubijdx. <sup>19</sup> Niluxh dina nuhuiä loj chu stee apost ro'c. Lojtis Jacob, betzhuin Jesucrist bahuiä. <sup>20</sup> Rniliä nez lo Dios, dina guiniä didx-xhii, rediidx ni cacuaä najc guliipac.

<sup>21</sup> Dxejcti hua'a reguejdx xten Siria näjza Cilicia. <sup>22</sup> Resa'nu ni yu' nen xquidoo Crist guideb nez reguedx Judea, direni gumbee narä. <sup>23</sup> Riejntis diajgreni: "Bejn nani basacsíduxh nuure agujc xchej, abejnga caguluiini xcuent lagajc xcälirililajz nani galoo rlajzni nunitlojni." <sup>24</sup> Dxejc rliä'preni xpala'n Dios sa'csi huililazäza xtiidxni.

## 2

### *Bidxaag Pabl loj reapost*

<sup>1</sup> Che agudejd tzudaj ijz, dxejcru hua'a guedx Jerusalén con Bernabé, näjza Tito huinänu. <sup>2</sup> Gunii Dios loä, gunibeeni cha'a ro'c te gusule'ä xho huililajz rebejn ni



di gac xpejn Israel xtidx xcuent Jesucrist ni ruslaa lo dojl. Niluxh lojtis reni rnibee guidoo basule'ä diidx, te di xlia'si benä dzuun, o te di xlia'si gunäru dzuun. <sup>3</sup> Sanää Tito, te bejn griegw ni di gac xpejn Israel. Nicla lojni direni niäjb chuni bee si'c caj lo leii xten Moisés. <sup>4</sup> Niluxh gatii bejn ni rujnsi si'cni najcreni sa'nu, bidxaagreni loonu te gula'tzreni xho rajnnu Dios. Rdxechreni sa'csi nuunu, rexpejn Jesucrist, dinu jienru si'c ni bejn retoxtadgoldoonu. Laareni rlajzreni guxhiidreni nurnu, rlajzreni gusoobnu rextiidxreni. <sup>5</sup> Dipacnu nicäjb nucuadiajgnu xtiidxreni, sa'csi rlaaznu chanuu chalilajztu xtidx Jesucrist nani ruslaa bejn lo dojl.

<sup>6</sup> Niluxh reni sajc, nalajznu reni rnibee reben guidoo ro'c, xhet te didxcoobdi guniireni loä. (Luxh par narä xhet najcdi mase bensajcreni, sa'csi Dios runtebloj guiraa bejn.)

<sup>7</sup> Luxh bahuiireni abaniidx Dios xtidx Jesucrist loä, luxh rusule'äni loj rebenzijt te guibicaj xtojlni, sigajcni rusule' Pedr xtidx Jesucrist loj rexpen Israel nani rujnpac si'c ni caj lo leii. <sup>8</sup> Lagajc Dios nani badeed bejn Pedr dzuun xte apost loj rexpen Israel, lagajcza Diosre baniidx gunä dzuun, te gacä apost loj rebenzijt nani di gac xpejn Israel.

<sup>9</sup> Ni'cni Jacoob, Pedr, näjza Juan nani najc benroru nen guidoo xten Jesucrist, gucbeereni laa Dios ni cayacnäjä narä. Dxejc baniidxreni naareni loä näj lo Bernabé si'c te seen rbalajzreni, te chonnu guiro'pnu loj rebenzijt. Niluxh laareni chanuureni gusule'reni loj rexpen Israel. <sup>10</sup> Gunabtisreni loonu gacnäjnu rebejn ni xhet rajpdi, luxh ni'cza rlazä gunä.

#### *Pabl gudilnäjä Pedr lo guedx Antioquía*

<sup>11</sup> Che biääd Pedr lo guedx Antioquía, gudilnääni, sa'csi abejnni dojl xhet laadi cayujnni. <sup>12</sup> Galoo gudaunäjni rebenzijt, luxh che bidzujn gatii xpejn Israel ni baxhal Jacoob, dxejcti gubicajni lo rebenzijt, diruni niaunäjreni sa'csi bidxejbni rexpejn Israel ni ru' bee ni bidzujn ro'c. <sup>13</sup> Dxejcti sigajcza bejn guiraa rexpejn Israel ni nadxaag Pedr, gujcreni sigajc Pedr, runtio'p lajzreni, naareni gusgueereni. Näjli Bernabé bejn si'c. <sup>14</sup> Luxh che bahuiä direni gun si'cpacni najc xtidx Jesucrist, dxejc räpä loj Pedr nez loj guiraa reben guidoo: “Palga luj najclu te xpejn Israel, luxh nabajnlü si'c rebenzijt ni digac xpejn Israel, xhet si'cni ni caj lo leii, ¿xhicuent rlajzlu guinibeelu guibajn rebenzijt si'c rexpejn Israel nani rusooob xleii to Moisés?”

#### *Nungäjäl chalilajz rexpejn Israel, sigajc guiraa bejn, te guibicaj xtojlni*

<sup>15</sup> Nuure najcnu rexpejn Israel cheni gojllinu; dinu gac bejdojl si'c najc rebenzijt. <sup>16</sup> Anadonnu rut chu tejt bejn sajc guibicaj xtojlni che gunni si'cni caj lo leii, sa'csi nanab chalilajznu xtidx Jesucrist. Ni'cni biolilaaznu xtidx Jesucrist te jia xtojlnu sa'csi rililajznu, xhet sa'csi riennu si'cni caj lo leii. Di gacdi jia xtojlni bejn xcuent yälrusoob xleii to Moisés.

<sup>17</sup> Palga laäl ni rlajznu jia xtojlnu xcuent xcälrililajz xtidx Jesucrist, ruhuiinu cayenrunu dojl, la sajc guiniinu: Jesucrist ruluii rienrunu dojl, ¿ä? ¡Xho gacni si'c! <sup>18</sup> Palga rlazä gunsacä redzuun nani abarö'nä, lagajc narä rapä dojl nacä bejn dojl. <sup>19</sup> Niluxh xcuent leii, anacä si'c bejgut: digacdiru guinibee leii narä sa'csi naj nabanä lo xnejz Dios. Luxh lagajc leii bejn nacä si'c bejgut che gucbeä di gacdi gusobä guiraa ni caj lo leiiga. <sup>20</sup> Najcni si'cni gutnää Crist lo cruzj. Naj xhet narädi ni nabanä, laa Crist ni nabajn nen lastoä. Yäl nabajn ni nabanä naj lo guedxliujre nabanä sa'csi rililazä xtidx Xi'n Dios nani rinälajz narä luxh gujtni te gudijxni xtojlä. <sup>21</sup> Dina cuälazä xcälrulaslajz Dios. Paru sajc gudzucaj leii xtojlni bejn te gacreni bejnaya nez loj Dios, dxejc xlia'si gujt Jesucrist.

## 3

#### *Yälrililajz rusia dojl*

<sup>1</sup> ¡Chipsa nayäältu bejn Galacia! ¿Chu bascäjytu te di cuadiajgtu xtidx Jesucrist? Ni nez lojpactu bisule'nu diidx xho cuaj Jesucrist lo cruzj. <sup>2</sup> Tejtis diidx rlazä guiniitu loä. ¿La

cua'tu Sprit Dxan xten Dios sa'csi bejntu si'cni caj lo leii, ä? o ¿la sa'csi huililajztu diidx ni biejn diajgtu? <sup>3</sup> Chipsa nayäältu. Acua'tu Sprit Dxan xten Dios dxejcti naj rlaiztu guntu ni riajbtis yejctu guntu. <sup>4</sup> ¿La xlia'si gudejdtu trabajw? Chugan la guli xlia'sini. <sup>5</sup> Che runiidx Dios Sprit Dxan xtenni lojtu, che rujnni milaagwr nez lojtu, ¿xho rujnnini? Dini gunni sa'csi rujntu si'cni caj lo leii, rujnnini sa'csi rililajztu xtiidxni ni riejn diajgtu.

<sup>6</sup> Huililajz toxtadgoldoonu Abram xtidx Dios, ni'cni cua' Diosni si'c te bejn nani naya lastooni. <sup>7</sup> Ni'cni colyacbee dee: renani rililajz xtiidx Dios najc xi'n toAbram. <sup>8</sup> Galooli najn Dios xcuent yälirililajz susia Dios lastoo rebenzijt, ni'c räjpni lo Abram: “Guirali reben guedxliuj sacle' xcuentlu.” Diidxre cuaj lo guijtz ni gujc galooli, cadre caj xtidx Dios. <sup>9</sup> Ni'cni reni rililajz naj agucnäj Diosreni sigajc gucnäjni toAbram nani huililajz.

<sup>10</sup> Guiraa reni rlaiz guibajñreni gunreni si'cni caj lo leii, agubibdereni sa'csi scree caj lo leii: “Guiraa reni digunpac si'cni caj lo reguijtz xten leii, sucuibdereni.” <sup>11</sup> Niluxh huenliisi rien rut nayadi nez loj Dios xcuent leii, sa'csi dee najc xtidx Dios: palga rililajz te bejn xtidx Dios, najcni te bennaya nez lo Dios, nabannäjni Dios xcuent xcälirililajzni. <sup>12</sup> Leii dini naa chalilajz bejn te xca'ni yäl nabajñ. Scree caj lo leii: “Nani gunpac si'cni caj loj reguijtz xten leii, ni'c nanab guibajñ lojpac leiiga.”

<sup>13</sup> Jesucrist badzucaj nuure loj yälrbibde xten leii. Laani gubibdeni xcuentnu sa'csi xtidx Dios naj: “Anabibde te bejn ni najl loj te yajg.” <sup>14</sup> Scree gusajc Jesucrist te gusojb diidx ni räjp Dios loj toAbram, sacnäjni guiraa rebenzijt; näjza te guiraanu ni chalilajznu xtidx Jesucrist xca'nu Sprit Dxan xten Dios.

### *Leii näj diidx ni bia'n Dios loj toAbram*

<sup>15</sup> Betzä, naj gusä'tä te diidx xcuent bejn guedxliuj. Cheni rujn bejn te guijtz te jia'n diidx lo stee bejn, mase bejntis najcreni, che abacuaani lajni lo guijtzga, rut sajcdi gudzucaj guijtzga. Rutza sajcdi gucuaaru diidx lojni che anajcni. <sup>16</sup> Luxh anajnnu badeed Dios xtiidxni loj toAbram näjza loj xagdooni. Dini ninii “rexagdooni” si'c loj xhidajlreni, guniini lo tejtis xagdooni, luxh laani najc Jesucrist. <sup>17</sup> Diidx ni rlazä guiniä najc scree: Diidx nani bia'npac Dios loj toAbram gunii Diosni che cayäädx tajp gayuu galbitzuu ijz gudeedni leii lo Moisés te laani gudeednini loj rexpejn Israel. Niluxh di leiiga nuchaa diidx ni bia'n Dios loj toAbram, lajtis sajcdi. <sup>18</sup> Paru naquuin leii te xca' bejn erens, dxejc xhet erensdi cua' Abram lo Dios. Niluxh basa'n Dios erens lojpac Abram sa'csi bia'nni diidx lojni galooli.

<sup>19</sup> ¿Xhicuent badeed Dios leii loj Moisés? Badeed Dios leii sa'csi benduxh rexpejn Israel dojl, te gacbeereni xho najc xtojlni, lañ ni jääd nani najc xagdoo toAbram. Sa'csi bia'n Dios diidx con laani sigajc con toAbram. Rexangl Dios badeed leii loj toMoisés, te laani gujc si'c te bejn ni rusiäjñ diidx. <sup>20</sup> Te ni rusiäjñ diidx xhet par tejtis bejn di najcni, niluxh Dios tejtis najc.

### *Xcuent leii*

<sup>21</sup> ¿La garenca najc xleii Moisés lo diidx ni basa'n Dios loj toAbram, ä? ¿Xho gacni si'c! Paru nica'nu te leii ni rajc rudeed yäl nabajñ, dxejc sii xcuent leiiga nica' bejn yäl nabañnaya. <sup>22</sup> Niluxh loj reguijtz xten Dios caj diidx ni rnii: Guiraa bejn niäuu nen dojl, te reni chalilajz xtidx Dios si'c huililajz toAbram, reni'c xca' xcälirililajz diidx xcuent Jesucrist si'cni bia'n Dios diidx loj toAbram.

<sup>23</sup> Che gajd xcälirililajz xcuent Jesucrist jääd, dxejc basäuu leii nuure nen dojl, cabäjtisnu guiricaj xcälirililajz xcuent xtidx Dios. <sup>24</sup> Ni'cni anajc leii si'c xmastrnu te guluiini nuure nezyuj nez lo Dad Jesucrist te gusiani xtojlnu con yälirililajz xtiidxni. <sup>25</sup> Niluxh naj sa'csi arajpnu yälirililajz xcuent xtiidxni, dirunu guiquin te mastr, nalajznu leii.

<sup>26</sup> Guiraatu najctu xi'n Dios xcuent yälirililajz xtidx Jesucrist, <sup>27</sup> sa'csi guiraatu ni gurobnistu loj xtidx Jesucrist, najctu rexpejn Jesucrist. <sup>28</sup> Naj rutiru rexpen Israel

niclaza rebenzijt, niclaza mos, niclaza bejntis, niclaza niguii, niclaza gunaa, sa'csi guiraanu najcnu tebloj nez lo Jesucrist. <sup>29</sup> Palga najcnu xpejn Jesucrist, dxejc guliipac najcnu xi'n toAbram, dxejc sica'nu yálnasa'c ni abia'n diidx gudeed Dios loj Abram.

## 4

<sup>1</sup> Mbaj naj. Nani xca' yálnasa'c, che najcni biuux, najcni sigajc te mos, mase xtanni gac guiraa xhixten xtadni. <sup>2</sup> Yu' chu te bejn ruhuiini, yu'za chu rnibee xhixtanni cheni agurooblini, cheni guidzujn dxej xca'ni ni gudeed xtadni. <sup>3</sup> Sigajcza nuure che gacnu si'c biuux guyu'nu gacnu mos loj releii, rnibeeni xhini'c digacdi jieñnu lo guedxliuj. <sup>4</sup> Niluxh che bisa' dxej ni basoob Dios, baxhał Dios Xi'npacni. Xi'n te gunaa gojłni, loj rexpejn Israelza biädjiajłni, basoobni leii xten toMoisés. <sup>5</sup> Si'c gujc te xcasacni reni rusoobpac leii, te xca'ni nuure gacnu si'c te xpisiäjbni.

<sup>6</sup> Luxh sa'csi anajctu xi'nni, ni'c baxhał Dios Sprit xten Xi'nni te cuääzni neñ lastoonu. Laani rniini lo Dios xcuentnu: “Guejblu, Xtdnu.” <sup>7</sup> Ni'c dirunu gac mos, sa'csi anajcnu xi'nni. Luxh palga najcnu xi'nni, suniidxza Dios yálnasa'c loonu xcuent Dad Jesucrist.

### *Rulijdxni na'c gacsac bejn mos*

<sup>8</sup> Che gajdtu gumbee Dios najctu mos xten rebanäjb ni rajntu si'c Dios luxh dipacreni gac Dios. <sup>9</sup> Luxh naj anumbeetu Dios o naj anumbee Dios la'tu, xho chachusactu loj redzuun ni guyu'tu galoo che gujctu mos xten rebanäjb. <sup>10</sup> Cayutistu redxej, rebäii, retiemp, reijz. <sup>11</sup> Naj rdxebä andi xlia'si gudedä trabajw baluiätu.

<sup>12</sup> Rniabduxhä lojtu betzä, colyajc si'c narä, sa'csi narä ahuililazä xtidx Jesucrist sigajc la'tu. Xhetza xhi dzunguidxdi bejntu loä che guyu'ä lojtu. <sup>13</sup> La'tu anajntu galoo che basule'ä diidx xcuent Jesucrist lojtu, benäni sa'csi racxhuu tiexhä. <sup>14</sup> Dizatu nuze' niclaza nibälajztu narä xcuent yälracxhuu ni rajc tiexhä, alga si'c te xangl Dios, si'c lagajc Jesucrist cua'tu narä. <sup>15</sup> ¿Con yälrbalajz xtentu ni gojptu dxejc? Niluxh rniä lojtu, paru niajc nibäätu balojtu, nuniidxtuni loä dxejc, si'c niujntu. <sup>16</sup> Naj ¿la rdxe'chtu loä sa'csi caniä didxlii lojtu, ä?

<sup>17</sup> Naj yu' gaii bejn nani rujnsi si'cni sanäreni leii rujnsireni si'cni rinälajzreni la'tu. Niluxh rlajzreni gudzucajreni la'tu te gusaantu xtidxä, te chanajltu laareni, te jiutu xtiidxreni. <sup>18</sup> Laaca chanälajz bejn sa'ni, niluxh na'c gusgueeni, na'cza che suganääsi la'tu chanälajztu narä. <sup>19</sup> Rexi'nä, xcuent la'tu cadedä trabajwdx si'c te gunaa ni rajl xpäzni, luxh sinuu sidedä trabajw cheni arbäjpacni Jesucrist neñ lastootu. <sup>20</sup> Maläii gac jiälä lojtu lagajc naj te gac guiniä xhi stee diidx. Niluxh naj zijt yu'ä, dina gacbeä xhi xhigab gunä xcuenttu.

### *Diidx xcuent Agar näj Sara*

<sup>21</sup> Colguinii loä, la'tu ni rlajz gun si'cni caj lo leii, ¿la ditu gacbee, la di diajgtu jiejn xhini'c caj lo leii, ä? <sup>22</sup> ¿Coljiejn! Scree caj loj leii: guyu' tio'p xi'n toAbram. Tejni najc xi'n gunaa ni najc xmos Sara. Steeni najc xi'n chäälpacni. <sup>23</sup> Niluxh xi'n xmosni gojł sa'csi lagajc laani bejn ni xhigab si'c chu xi'nni. Luxh xi'n chäälpacni gojł sa'csi si'c bia'n Dios diidx loj Abram. <sup>24</sup> Diidx xcuent regunaare najc si'c diidx ni ruluii. Regunaare najc si'c tio'p diidx ni bia'n Dios. Agar najc mos, mosga najc si'c diidx ni bia'n Dios con Moisés lo dan Sinaí. Rexi'n mosga guyu' te gacreni mos lo leii. <sup>25</sup> Agar najc si'c dan Sinaí nez lo reguejdx xten Arabia. Luxh guedx Jerusalén najc si'c dan Sinaí, sa'csi naj ro'c naj cadre re' rexpen Israel con rexi'nreni, sanäreni leii. <sup>26</sup> Niluxh di guedx Jerusalén ni yu' guibaa gac si'c mos, luxh nuurnu najcnu xi'nni. <sup>27</sup> Scree caj loj xtidx Dios:

Bibalajz, luj gunaa ni gajd xi'nlu chu,

guredxa', bibalajz,

luj ni gajdlu ted trabajw ni rdejđ gunaa che rajl xi'nni.

Sa'csi su'ru xi'n gunaa nani gulälajz cháälni quela xi'n gunaa ni gudiesnä j cháäl stee gunaaga.

<sup>28</sup> Mbaj naj, rebetzä, nuure, sigajc Isaac, najcnu xi'n toAbram nani chu si'cni bia'n Dios diidx loj toAbram. <sup>29</sup> Che gojl xi'n gunaa ni najc mos, ni gojl sa'csi lagajc laani bejn xhigabga, bidxagdijl ni xi'n cháälpac Abram nani gojl xcuent diidx ni bia'n Dios loj Abram. Sigajcza najcni naj. <sup>30</sup> ¿Xhi caj lo reguijtz? “Barilaagw gunamos nä j xi'nni, te di xca' xi'n gunamos yäl'nasa'c xtenlu si'c ni xca' xi'n gunaa nani najc cháälpaclu.” <sup>31</sup> Naj nuure, betzä, dinu gac si'c xi'n gunamos te chunu lo leii. Nuurnu najcnu si'c xi'n gunaa nani najc cháälpac toAbram.

## 5

### *Colguzutijp lajztu lo yäl'rililajz xtidx Dios*

<sup>1</sup> Colgusutijp lajztu lo xtidx Dios nani baniidx Jesucrist loonu sa'csi guliipac gulää Jesucrist nuure ladzṅaa leii, badzucajni xtojṅnu che huililajznu xtiidxni, ni'cni na'cru gusiejch lajztu te gacsactu mos ladzṅaa leii.

<sup>2</sup> Narä Pabl rniä lojtu, palga la'tu chutu bee si'cni caj lo leii, dxejc xlia'si chalilajztu xtidx Jesucrist. <sup>3</sup> Rniäza stehuält, guiraa bejn nani rlanjpac chu bee, nanab gunni si'cpac ni caj lo leii. <sup>4</sup> Palga rlanjztu guntu redzuun ni caj lo leii te guibicaj xtojṅtu, dxejc agubicajtu lo Jesucrist, agubicajzatu lo xcäl'racnä j Dios. <sup>5</sup> Niluxh nuure xcuentpac Sprit Dxan xten Dios rililajznu gudijx Jesucrist xtojṅnu lo cru jz, cayenloonu jiädsacni te guniidxni yäl'ban'sa'c par tejpas loonu. <sup>6</sup> Sa'csi loj reni rililajz xtidx Jesucrist xhet sajcdi chu bejn bee, xhetza sajcdi na'c chu bejn bee, nani sajc najc chalilajz bejn xtidx Dios. Yäl'rililajzga rujn guiban'sa'cnu te chonälajznu resa'nu.

<sup>7</sup> La'tu laaca sasajtu. ¿Chu badxojn gusoobtu xtidxlii Dios? <sup>8</sup> Xhet Diosdi ni guletu badxojnditu. <sup>9</sup> Anajntu tudxe'nsi cobgulaj rusaguijni yätxtiil; si'c te cobgulajga najc te niguii ni caguluiitu xtidx leii. <sup>10</sup> Rialilazä xtidx Dad Jesucrist, ni'c nadiplazä la'tu; ananá ditu chalilajz stee diidx. Niluxh bejn ni cagusgueetu susacsí Diosni, chutis najcni.

<sup>11</sup> Narä rebetzä, paru narä caguluiä chutu bee, si'c ruluii rexpejn Israel, ¿xhi xcuent rusacsí rexpejn Israel narä? Paru si'c caguluiä, dirutu chalilajz gudijx Jesucrist xtojṅnu lo cru jz. Luxh si'cpacza rlanjzreni. <sup>12</sup> Rebejn nani cagusgueetu caniireni chutu bee, jmalaiiza gutiuugreni tejpas lagajc tiejxhreni!

<sup>13</sup> La'tu rebetzä, agurejdx Diostu loj xtiidxni te chalilajztu Jesucrist ni ruslaa bejn lo dojl. Colhuixgaa na'c xca'tistu rediidxga dxejcti guntu si'ctis ni rlanj tiejxhtu, si'ctis ni riajbza yejctu. Colgacnä j sa'tu con yäl'rinälajz, tejni sigajc steeni. <sup>14</sup> Sa'csi guiraa diidx ni caj lo leii con tejtis diidxre rsiojbni: “Chanälajztu sa'tu sigajc rinälajztu lagajc la'tu.” <sup>15</sup> Palga rdijṅtu, rauya'tu sa'tu, rajwtu sa'tu, jcol'natiro! Andi lagajc la'tu gunijttu sa'tu.

### *Nani rchagljaz rebejn nä j yäl'nabajn ni rudeed xtidx Dios*

<sup>16</sup> Rniä lojtu, colguibajn si'c ruluii xtidx Dios nä jza Sprit Dxan xtenni, te si'c na'c guibajntu si'ctis ni rlanj tiejxhtu, si'c ni najctis xhigabtu. <sup>17</sup> Sa'csi ni najc xhigab xten bejn rdxe'ch loj xhigab Sprit Dxan xten Dios. Sigajcza xhigab xten Dios dini gac tebloj con xhigab xte bejn. Rudxojntu loj sa'tu, ni'cni digacdi guntu dzuun ni rlanjztu guntu. <sup>18</sup> Luxh palga cagulijdx Sprit Dxan la'tu, dxejc dirutu quiquiin guntu si'c ni caj lo leii.

<sup>19</sup> Guyasi jiembee bejn xhireni'c najc redzuun ni rujn rebejn nani di gumbee xtidx Dios. Dee najc redzuunga: yäl'rusguee cháäl bejn, yäl'rusguee cháäl sa'reni, yäl'rusguee sa'ni che ruchaag sa' te dxa'p con te bi'n loj redolguijdx, guiraa redolguijdx ni rujn niguii con gunaa, <sup>20</sup> yäl'rajn rebanäjb, yäl'bidxaa ni rujn daan bejn, yäl'rdxechlajz loj sa'ni, yäl'rchagdijl sa'ni, yäl'nayedx lo sa'ni, yäl'rdxecha', yäl'riu lagajctis laani, yäl'rlia' lo sa'ni, yäl'rchaag lo te cuaa bejn. Najza sa' dzunguijdxre rujnreni: <sup>21</sup> yäl'rdxe'ch lajz, yäl'rugut sa'ni, yäl'rsiojz,



yälrauxha't, näjza guiraa dojl sa' redee. Sigajc ni balidxä la'tu xhi dxejga rulidxä la'tu naj. Nani rujn sa' redojlre direni jiu' loj xcälrnibee Dios xhaguibaa.

<sup>22</sup> Niluxh xtzuum Sprit Dhan xten Dios najc yälrinälajz sa'ni, yälrbalajz lastooni, yälrbedxi lajzni, yälrbecdxix lajz sa'ni, yäl'najc beñsa'c lo chutis bejn, yäl'nagodzajz, yäl'rilibajz, <sup>23</sup> yäl'nadolajz, yälrnibee lastooni lo ni rlajz gun tiejxhni. Xheti te leii ni rudxojn gun bejn sa' redzuunre. <sup>24</sup> Niluxh renani ahuililajz xtidx Jesucrist, abatio'nreni guiraa redolguijdx ni rlajz gun tiejxhneni. <sup>25</sup> Palga rbäjz Sprit Dhan neñ lastoonu, do'o guibajñ si'c rnibee Sprit Dhan guibajñnu.

<sup>26</sup> Na'c guiliä'pnu lagajc xpala'nnu, na'c guidxech lajznu lo sa'nu, na'c gunembiidnu sa'nu.

## 6

### *Colgacnäj sa'tu*

<sup>1</sup> Sa'ä, palga chu tejtü ni abiajb neñ dojl, lagajc la'tu nani aracheetu xtidx Dios colgulijdx bejnga, colgacnäjni te guiriini neñ dojl. Colnii lojni nadolajz, nasinlajztu lagajc la'tu didi che guidon nägajcza la'tu jiajbtu neñ dojl. <sup>2</sup> Colhuui xhi rquiiñ resa'tu, colgacnäjreni te si'c gusoobtu guiraa rediidx ni najc leii xten Jesucrist.

<sup>3</sup> Sa'csi nani rujn xhigab sacduxhni, yu'za chu najcni, niluxh rut najcdini, rusgueeni lagajcsi laani. <sup>4</sup> Tejgatu colcubee xho najc xtzuumtu te fiitu la laaca najcni, dxejcti sajç guiliä'ptu lagajc xpala'ntu. Dxejç ditu guiquiñ chu stee bejn guiliä'p xpala'ntu. <sup>5</sup> Sa'csi teja bejn susule'ni diidx lo Dios xhini'c bejnni.

<sup>6</sup> Nani casieed xtidx Dios nanab gacnäj bejn nani ruluuini, gudeedni tudxe'n xhixtenni loj nani ruluuini.

<sup>7</sup> Na'c gusgueelu lagajc luj. Dios digacdi guigueeni, ni'c guira'ti dzuun ni rujn bejn lagajcza ni'c xca' bejn. <sup>8</sup> Paru te bejn gun dzuun xcuenttis tiejxhni, dxejç che guidzujñ dxej xca'ni yäl'nasa'c, sinitloj tiejxhni, dizani jiu' loj xcälrnibee Dios. Palga te bejn gun dzuun xcuent Sprit ni badeed Dios lojni, che gal yäl'nasa'c, sica'ni yäl'nabajñ par tejjas. <sup>9</sup> Ni'cni na'c guidxajgnu jiennu dzunsa'c te che guidzujñ dxej ni xca'ni yäl'nasa'c, xca'zanu te yäl'nasa'cro. <sup>10</sup> Ni'cni nanab lañ ni sajçni, gacnäjnu chutis bejn, ganiddoo resa'nu ni ahuililajz.

### *Yälrulijdx näjza xtixtios*

<sup>11</sup> Colhuilaa lacti reletrduxh cacuaä lojtu con naäpac. <sup>12</sup> Guiraa reni rdxaglajz gun ni rlajztis tiejxhni, laa reni'c ni rlajz chutu bee, tedi tedreni trabajw xcuent ni cuaj Jesucrist lo cruzj. <sup>13</sup> Lagajc reni ru' bee direni gun si'cni çaj lo leii, niluxh rlajzreni chutu bee te guibaa lajzreni sa'csi bejnreni gaan guyu' beega tiejxhtu. <sup>14</sup> Luxh narä dilazä guibaa lo sa' recosga; rbaatis lazä sa'csi gujt Jesucrist, cuajni lo cruzj, te gudijxni rextojlñu. Ni'cni par narä xhetru xhi cos-guijdxdi yu' lo guedxliujre, diruna guichaglazä gunä redolguijdx xten guedxliujre. <sup>15</sup> Che ahuililajz te bejn xtidx Jesucrist, xhetru sajçdi chu bejn bee, xhetza sajçdi na'c chu bejn bee. Nani sajçtis najc gacni si'c te beñcoob lo xtidx Jesucrist. <sup>16</sup> Guiraa renani nabajñ si'cni ruluuini xtidx Jesucrist sibedxi lajzreni xcuent xcälrulasajz Dios. Näjza rexpen Israel nani ahuililajz xtidx Jesucrist sibedxi lajzreni.

<sup>17</sup> Na'cru guche'chtu narä sa'csi redib ni yu' tiexhä najc si'c te seen narä anacä te xmos Jesucrist.

<sup>18</sup> Rebetzä, gacnäj Dad Jesucrist guiragajçtu con Sprit Dhan xtenni. Sugacni si'c.



## Te Guijtz Lo Reben Efesios

### *Bacuaa Pabl lo reben guidoo nen guedx Éfeso*

<sup>1</sup> Narä, Pabl, nacä apost xten Jesucrist sa'csi si'c rlajz Dios. Cacuaä guijtzre loj rebejn nani huililajz xtiidxni, loj reni rujn si'cpac rniini nen guedx Éfeso. <sup>2</sup> Xca'tu yälracnäj, yälrbexi lajz xten Xtadnu Dios, näjza xten Dad Jesucrist.

### *Rusule' Pabl xtidx Jesucrist*

<sup>3</sup> Rliä'pnu xpala'n Dios, Dad näj Xtad Jesucrist. Dios racnäj nuure, xcuent Crist runiidxni guiraa reyälracnäj xca' lastoonu, astoo yu'lanu xhaguibaa. <sup>4</sup> Laani gule nuure, che gajdli guirixtiej guedxliujre, te gacnu xpejñni, te guibanayanu nez lojni con yälrinälajz. <sup>5</sup> Sigajcza anungäj xca'ni nuure te gacnu si'c xi'npacni sa'csi abiääd Jesucrist te guslaani nuure nen dojl, si'c ni gunibee Dios sa'csi balaslajzni nuure. <sup>6</sup> Gucnäj Dios nuure te guiliä'pnu xpala'n Dios, sa'csi lagajc laani acua'ni nuure, abejñni nuure tejsi con xi'nni ni sanälajzni. <sup>7</sup> Laani baslaani nuure nen dojl xcuent xtiejñni, laani badzucajni xtojñnu xcuent xcälruslaslajzni <sup>8</sup> nani banidxduxhni loonu. Guideb yälñajn, guideb xcäriejn <sup>9</sup> basule'ni loonu xhigab xhiga'tzni xcuent redzuun ni rlajzni gunni, xhigabza ni bejñni galooli. <sup>10</sup> Luxh sidzujñ dxej sisiojbpac xhigab ni bejn Dios. Che guidzujñ dxejga sutojñ Dios guiraali, sudeedni guinibee Jesucrist guira'ti ni yu' xhaguibaa, sigajc recos ni yu' lo guedxliuj.

<sup>11</sup> Arajpnu te xcälñasa'c Jesucrist, sa'csi galooli bejn Dios xhigab guniidxni yälñasa'cga. Lagajc Dios benchee guira'ti ni yu', luxh rujnpacni nani abejñni xhigab najc laaca gunni <sup>12</sup> te guiliä'p bejn xpala'n xcälñabeeni xcuentnu, nani ganiddoo biolilaaznu xtidx Jesucrist. <sup>13</sup> Näjza la'tu, che biejn diajgtu redidx guli, rediidx ni ruslaa bejn lo dojl, dxejc huililajztu xtidx Jesucrist, dxejc gujczatu tejsi con laani. Dxejc cua'tu Sprit Dxi xten Dios, ni'c najc si'c seen ahuililajztu, si'cni bia'n Dios diidx. <sup>14</sup> Baniidx Dios Sprit Dxi xtenni te cuääzni nen lastoonu, te ni'c najc seen xca'nu yälñasa'c nani guniidx Dios che abaluuxni xtzuumni, nalajznu guslaani guiraa rexpejñni te guiliä'preni xpala'nni lo xcälñabeeni.

### *Rniab Pabl gudeed Dios yälñajn loj renani ahuililajz*

<sup>15</sup> Ni'cni näjza narä, sa'csi abiejn diagä xho rililajztu xtidx Dad Jesucrist näjza xho sanälajztu guiraa rexpejñ Jesucrist, <sup>16</sup> dina gusanä gudedä xquixtios lo Dios xcuent la'tu. Rnaduxh lazä la'tu che rniabä lo Dios. <sup>17</sup> Rniabä lo Xtios Dad Jesucrist, xtadni ni rnibee xhaguibaa, guniidxni lojtu te yälñanduxh, te yälñaruluiloj recos xhiga'tz te gacbeduxhrutu xcuent Gueb Dios. <sup>18</sup> Rniabäza lo Dios jianij xcäriejntu te gacheetu xhini'c najc speranza xten yälñacrejdxtu lo xtiidxni, te gacheetu lacti saru, lacti sajc yälñasa'c ni gudeed Dios lo Jesucrist näjza loj rexpejñni, <sup>19</sup> te gacheezatu lacti gurobduxh najc yälñabee nani rajpni nez loonu nani ahuililajz xtiidxni. Guiraa redee rului lacti nadip najc yälñabee xten Dios. <sup>20</sup> Lagajc yälñabeere bejn dzuun par Jesucrist. Con yälñabeere baspajñ Dios Jesucrist lo rebengut, te gurejni xladbee Dios cadre rnibeeni xhaguibaa. <sup>21</sup> Maazru sajñni lo chutis gubier, lo chutis yälñabee, lo xhitis yälñadip, lo chutis ni rnibee; maazru sajñni lo chutis nani abibee te guinibee, sigajc naj, sigajc nen redxej ni churu jääd. <sup>22</sup> Niluxh badeed Dios guira'tini ladzñaa Jesucrist, laazani bejn bibee Jesucrist gunibeeni lo guiraa xhixten xquidooni. <sup>23</sup> Reben guidooore najc si'c tiejxh xten Jesucrist, luxh sigajc rudeed Dios guiralii loj Jesucrist, sigajcza rudeed Jesucrist guiralii loj rebejn ni najc xquidooni.

## 2

### *Ruslaa Dios nurnu sa'csi rinälajzni nurnu*

<sup>1</sup> Laani baniidxni yäl<sub>n</sub>abaj<sub>n</sub> lojtu che najctu si'c be<sub>n</sub>gut nez loj Dios sa'csi rujntu dojl.  
<sup>2</sup> Galoo gubajntu lo dojl, entis lo xnez guedxliujre guzajtu, biutu xtidx be<sub>n</sub>dxab nani rnibee guedxliujre. Sprit xtenni rujn dzuun ne<sub>n</sub> lastoo rexi'nni nani di gucuadiajg xtidx Dios. <sup>3</sup> Luxh galoo, näj nuure nadxaag<sub>n</sub>u lojreni, biennu si'c ni r<sub>l</sub>ajz tiejxhnu. Dxejc biennu si'ctisni r<sub>l</sub>ajz tiejxhnu, si'ctisni biajb xhigabnu. Nungäjl guidxe'ch Dios loonu, sigajc bidxe'chni loj guiraa rebe<sub>n</sub> guedxliuj. <sup>4</sup> Niluxh balaslajz Dios nuure. Con xcäl<sub>s</sub>anälazduxhni huinälajzni nuure. <sup>5</sup> Mase anajcnu be<sub>n</sub>gut lo dojl, laani baniidxni yäl<sub>n</sub>abaj<sub>n</sub> loonu. Rajpnu yäl<sub>n</sub>abaj<sub>n</sub>re con Jesucrist. Sa'csi balaslajzni nuure baslaani nuure ne<sub>n</sub> dojl. <sup>6</sup> Baspa<sub>n</sub>sacni nuure con Jesucrist; sigajcza bejn<sub>n</sub>i cuenäj<sub>n</sub>u Jesucrist xhaguibaa, <sup>7</sup> te ne<sub>n</sub> redxej ni churu jääd, guluilojni lacti saj<sub>c</sub> xcäl<sub>n</sub>asa'c xten yäl<sub>r</sub>ulasajzni, ni'c sanälajzni nuure, najcni huenduxh loonu por Jesucrist. <sup>8</sup> Sa'csi rulasajz Dios nuure, ni'c baslaani nuure ne<sub>n</sub> dojl che huililajznu xtiidxni. Luxh et sa'csi yu' xhi biennu; dee najc nani banid<sub>x</sub>-xlia' Dios loonu. <sup>9</sup> Xhet xcuent xhi dzunsa'c<sub>d</sub>i ni biennu, te di chu tejt<sub>u</sub> gac nayedx<sub>l</sub>ajzdi. <sup>10</sup> Dios najc ni benchee nuure. Sigajcza con Jesucrist bejn<sub>n</sub>i gacnu bej<sub>n</sub> ni rujn dzunsa'c nani galooli agunibee Dios jienpacnu.

### *Yäl<sub>r</sub>bedxilajz ni rajpnu por Jesucrist*

<sup>11</sup> Ni'c co<sub>l</sub>snaj lajztu xho gujct<sub>u</sub> galoo. Ditu niajc rexpej<sub>n</sub> Israel. Rniireni la'tu 'benzijt' sa'csi ditu chu bee si'c ru' rexpej<sub>n</sub> Israel. Sa'csi lagajc con naareni rusäl<sub>r</sub>eni bee. <sup>12</sup> Dxejc suga'tu ditu gumbee Jesucrist. Zijt yu'tu loj rexpej<sub>n</sub> Israel, najctu benzijt. Nicla gumbeetu rediidx ni bia'n Dios loj rexpej<sub>n</sub> Israel. Ditu niunloj guslaa Dios la'tu lo dojl, dizatu niembee Gueb Dios lo guedxliujre. <sup>13</sup> Niluxh naj ayu'tu lo Jesucrist, la'tu ni guyu' zijt lo Dios galoo. Naj agubigt<sub>u</sub> lo Dios sa'csi abia xtojlt<sub>u</sub> con xtiej<sub>n</sub> Jesucrist. <sup>14</sup> Jesucrist najc ni rbecdxi lajznu. Laani bejn gujc rexpej<sub>n</sub> Israel tejsi con rebenzijt. Laani badzucajni redzuun xten leii te gujc rexpej<sub>n</sub> Israel tejsi con rebenzijt. <sup>15</sup> Lagajc con tiejxh Jesucrist ni gojl lo cru<sub>j</sub>z banijtni redzuun xten leii nani bejn bidxe'ch rexpej<sub>n</sub> Israel lo rebenzijt. Lagajc laani bejn<sub>n</sub>i bidxagsa'reni te gujcreni tejsi che huililajzreni xtiidxni, gujcreni te be<sub>n</sub>coob. Dxejc gulecdxini lajznireni. <sup>16</sup> Con yäl<sub>g</sub>ujt ni gujtni lo cru<sub>j</sub>z badzu'ni guiro'preni lo Dios te gujcreni tejsi. Si'c guläjz rdxechnäj sa'reni.

<sup>17</sup> Cajza lo guijt<sub>z</sub> rediidxre:

Biäädni te basule'ni xho ga'p rebej<sub>n</sub> yäl<sub>r</sub>bedxi lajz rebej<sub>n</sub> ni suga' zijt lo Dios näjza reni suga' gajxh lo Dios.

<sup>18</sup> Laani bejn saj<sub>c</sub> jiu' guiro'p cuaa bejn lo Dios con tejsi xhigab, näjza tejsi Sprit. <sup>19</sup> Ni'cni dirutu gac benzijt, bejn ni rut numbeedi. Anajctu tejsi con rexpej<sub>n</sub>ni, najczatu sa' rexpej<sub>n</sub> Dios. <sup>20</sup> La'tu najctu si'c te yuro. La'tu najctu si'c padeer xten yu'ga. Reapost näjza reprofet najc si'c cheni birixtiej yu'ga. Jesucrist najc si'c guiro ni gusuj squi<sub>i</sub>n yu'ga, guij ni saj<sub>c</sub>ru, sa'csi Jesucrist rnibee. <sup>21</sup> Cayunsa'c Dios yu'ga, cayajc yu'ga con la'tu, caroobni te gacni xquidodxan Jesucrist. <sup>22</sup> Sigajcza la'tu näjza rexpej<sub>n</sub> Israel ni huililajz najctu tejsi con Jesucrist. Cagustioobtu guidooga te ne<sub>n</sub>ni cuääz Sprit Dxan xten Dios.

## 3

### *Pabl nungäjl chanä xtidx Dios lo rebenzijt*

<sup>1</sup> Ni'cni yu'ä ne<sub>n</sub> latzguiib, narä, Pabl sa'csi cagusule'ä Jesucrist, te jääd<sub>n</sub>ää xtiidxni lojtu, najctu benzijt. <sup>2</sup> Pet abiej<sub>n</sub> diajgtu lacti hueen najc Dios baniidxni dzuunre loä, jääd<sub>n</sub>ää xtiidxni lojtu. <sup>3</sup> Dios baluiini xhigab-xhiga'tzni loä (si'cni bacuaä lojtu galoo). <sup>4</sup> Che go<sub>l</sub>t<sub>u</sub> guijt<sub>z</sub>ga, sacbeetu cati ananä rexhigabxhiga'tz xten Jesucrist. <sup>5</sup> Xhigab-xhiga'tzre di bejn niembee galoo, niluxh naj Sprit Dxan xten Dios abaluiinini loj reapost näjza loj reprofet. <sup>6</sup> Dee najc xhigab-xhiga'tzga: por rediidx xcuent Jesucrist ni ruslaa

bejn nen dojl rujn Dios gac reni najc benzijt tejsi con reni najc xpen Israel, guidxaag sa'reni, gacreni tejsi bejn. Guiro'preni xca' yalnasa'c si'c bia'n Dios diidx.

<sup>7</sup> Narä nacä te apost xten dzuun ni baniidxni, por xcäl\_rulaslajz Dios ni cuaxlia'ä. Dios baniidx dzuunre loä con xcäl\_rnibeduxhni. <sup>8</sup> Luxh masä guxiiru sacä lo guiraa rexpejn\_i, loä baniidxni xcäl\_racnä\_jni te lo rebenzijt gusule'ä xtiidxni, nalajznu redidxcoob xcuent xcäl\_nasa'c Jesucrist, <sup>9</sup> te gusule'ä lo guiraa bejn rehxigabxhiga'tz nani bacua'tz Dios lojnu galooli. Dios benchee guiralii ni yu'. <sup>10</sup> Si'c gujc te naj jien guiralii yäl\_nanduxh xten Dios. Reni najc xpejn\_pacni nen xquidooi guluii yäl\_najnre lo rexangl Dios, loj reni rnibee xhaguibaa. <sup>11</sup> Galooli bejn Dios xhigabre par tejpas, ni'cni biääd xtadnu Jesucrist te guzojb xhigab ni bejn Dios. <sup>12</sup> Con Jesucrist dinu guidxejb guibignu, guiniabnu lo Dios sa'csi ahuililajznu xtiidxni. <sup>13</sup> Na'c gac-huin lajztu sa'csi cadedä trabajw xcuenttu. Col\_guibalajz; dee najc xcäl\_nasa'ctu.

### *Xcäl\_sanälajz Jesucrist*

<sup>14</sup> Ni'cni ruzuxhibä nez loj Xtad Dad Jesucrist <sup>15</sup> nani badeed lajni lo guiraa reni yu' xhaguibaa näjza reni yu' lo guedxliuj, <sup>16</sup> rniabä loj Dad xhaguibaa gutijpni lastootu con yäl\_rnibee xcuent Sprit Dxan xtenni, sa'csi yuduxh xcäl\_nasa'cni lo xcäl\_rdimbicha'ni xhaguibaa. <sup>17</sup> Rniabäza lo Dios te jädläjz Jesucrist nen lastootu sa'csi ahuililajztu. Te che agusudzu'tztu, agusutijptu lo yäl\_rinälajz <sup>18</sup> dxejc sajc gacheetu sigajc guiraa rexpejn\_pacni lacti gulajg, lactiza siool, lacti jäät, lactiza jiaa najc yäl\_sanälajz xten Jesucrist. <sup>19</sup> Te gumbeezatu xcäl\_sanälajz Jesucrist ni najc gurobduxhtej, digacdi guichalonuni. Te chaza lastootu, näjza xcäriejntu con guiraa rexcäl\_nasa'c Dios.

<sup>20</sup> Dios rnibeduxh. Sajc gunidxduxhruni loj xhitis ni rniabnu lojni, loj recos ni riennu xhigab. Con Sprit Dxan ni rujn dzuun nen lastoonu suniidxni reyäl\_nasa'c. <sup>21</sup> Loj Diosre col\_deed xquixtios. Col\_guiliä'p xpala'nni nen guidoo xcuent Dad Jesucrist guira dxej, par tejpas. Sugacni si'c.

## 4

### *Por Sprit Dxan nadxaag sa'nu*

<sup>1</sup> Narä yu'ä lojtis Jesucrist te rsule'ätis xtiidxni. Ni'cni rniabä lojtu, guibajntu si'cni nungäj\_l, si'cni bejnzatu xhigab cheni gurejdxni la'tu. <sup>2</sup> Col\_guibajn con yäl\_nalaslajz, näjza yäl\_nadolajz, col\_cuedxi lajztu. Col\_yujn huant resa'tu con yäl\_rinälajz sa'ni. <sup>3</sup> Col\_huii te guidxaag sa'tu gactu tejsi con Sprit Dxan ni ruscuecdxilajztu. <sup>4</sup> Si'c tejsi tiejxh najcnu loj Jesucrist, tejsiza najc xhigabnu con laani, tejsiza najc yäl\_runloj ni rajptu xcuent diidx nani gurejdxtu. <sup>5</sup> Rajptu tejsi Dad, tejsi yäl\_rililajz, tejsi yäl\_robnis, <sup>6</sup> tejsi Dios, tejsi Xtad guiraanu nani rnibee guira'ti lo guiraanu.

<sup>7</sup> Lo tejganu abaniidxni dzuun si'ctis bejn Jesucrist xhigab guniidxni lo tejganu. <sup>8</sup> Ni'cni caj lo reguijtz:

Che huä'pni xhaguibaa, cadre rnibeeni,  
abejn\_i gaan loj guiraa yäl\_rnibee,  
dxejcti badeedni dzuun lo rexpejn\_i lo guedxliuj.

<sup>9</sup> ¿Xhi säloj cadre caj, "huä'pni"? Dee säloj ganid biäjtni maazru jäät lo guedxliuj. <sup>10</sup> Lagajc nani biäjtgä, lagajc laani huä'pni jiaaru lo guiraa rehxaguibaa te sajc guinibeeni guibaa näjza guedxliuj. <sup>11</sup> Lagajc laani badeedni xtzuun tejegareni. Yu'reni badeedni gac apost, yu'reni badeedni gac profe't, gaiireni badeedni gusule' xho ruslaa xtiidxni bejn lo dojl, sgaiireni badeedni gac si'c ni ga'p reben guidoo, sgaiireni badeedni guluii rexpejn\_i. <sup>12</sup> Guiraa redee badeedni te guluiireni rexpejn\_i Jesucrist, te gunreni dzuun te gustaj\_lreni rebejn\_i ni gac xquidoo Jesucrist. <sup>13</sup> Nungäj\_l gac dzuunre che guidzuj\_nli dxej ni nadxaag-sa'nu guiraanu loj yäl\_rililajz, che guidzuj\_nli dxej riembesa'cnu Xi'n Dios, dxejc anajcnu benguyaj\_l lo xtiidxni, si'c te ni aguroob loj xcäl\_rnibee Jesucrist. <sup>14</sup> Dirunu

gac si'c rebiuux ni tera'tsi rusiejch lajzni, rucua diajgreni xtidx chutis bejn, mase xhitis diidx ruluiini. Dxejc riajbreni lo redidx-xhii xten bejn nani rusguee, nani cabäjztis gusguee bejn. <sup>15</sup> Maazru hueen chonuunu loj redidxlii xten Jesucrist con yälrinälajz te tioobnu lo guiraa recos xten nani rnibee, lagajc Jesucrist. <sup>16</sup> Loj Jesucrist nazdzu'tz guiraa rexpejn, te si'cni nazdzu'tzsa'reni sääreni, najcreni tejsi loj tiejxh Jesucrist, racnäj sa'reni segun xhi dzuun rujn tejegareni, casieedrureni te cayajc xhidajlru rebejn ga con yäl sanälajz.

### *Te yäl naban coob con Jesucrist*

<sup>17</sup> Laa ni'cni rniä rniabäza con laj Dad Jesucrist na'cru guibajntu si'c nabajn rebejn nani di gumbee Dios. Laareni rujn si'ctis ni riajb yejcreni. <sup>18</sup> Nayääl xcäriejnreni, direni ga'p xcäl nabajn Dios sa'csi nadduxh lastooreni. <sup>19</sup> Redee che gucnajd xcäriejnreni gusloj bejnreni guiraloj yälrtujy, guiraa redojl ni di nungäjl gunreni. <sup>20</sup> Niluxh la'tu xhet si'cdi bisieedu loj Jesucrist. <sup>21</sup> Palga abiejn diajgtu xtiidxni, niluxh abaluiini lojtu didxlii ni siädnä Jesucrist, <sup>22</sup> colgusaan yäl naba nyujxh ni gojptu: Lo yäl naba nyujxhga rujn bejn si'ctis ni rrajzni. Dxejcti si'c runijtni la'tu lo Dios. <sup>23</sup> Colgusiejch lajztu, colgusia xcäriejntu, <sup>24</sup> te gactu ben coob nani bejn Dios, colchanuu te yäl naba nsa'c, te yäl naba nya xten xtidxliini.

<sup>25</sup> Colguo' n diidx-xhii, colnii didxlii lo resa'tu sa'csi tejsi najcnu guiraanu.

<sup>26</sup> Che guidxe'chtu, na'c guntu dojl. Na'c gusaantu chu xcälrdxe'chtu guideb dxej che chääzli gubijdx. <sup>27</sup> Na'c gusaantu jiu' bendxab nen lastootu.

<sup>28</sup> Nani rilajn, na'cru cuanni. Laaca gunni dzuun con naani te gunni te dzunsa'c nani gudeed meel lojni te gac gacnäjzani rebejn nani xhet rajpdi.

<sup>29</sup> Na'c gusaantu guirii nicla tej didxguijdx ro'tu. Colnii ganax didxsa'c te gacnäjni guisieed reni rucua diajg xtiidxtu. <sup>30</sup> Na'c guntu gac-huin lajz Sprit Dxan xten Dios. Laani najc te seen xten Dios najctu xpejn Dios, ni'c rbäjzni nen lastootu che guidzujnli dxej ni chäätu lo Dios.

<sup>31</sup> Colguo' n yäl naba ndxuudx xtentu, näj yälrdxe'ch, näj yälrdxagdijl sa'ni, näj yälrbedxa', näj yälrgue. Colguibicaj lo guiraa redojlgä, na'c gactu benguijdx. <sup>32</sup> Nungäjl gactu huen loj resa'tu, colgulasajz resa'tu, colsiäjil lajztu con resa'tu ni rujn dojl lojtu si'c rsiäjil Dios lajzni rextojltu xcuent Dad Jesucrist.

## 5

### *Xho nanab guibajn rexi'n Dios*

<sup>1</sup> Colguibajn si'c nabajn Dios, sa'csi najctu xi'nni nani sanälajzni. <sup>2</sup> Colchasanäj yäl sanälajz sigajcni huinälajz Jesucrist nuure cheni badeedni lagajc laani lo Dios, cuajni lo cruuz, gujtni. Laani gujcnii si'c gojn, gujczani yälrbibyaal ni bidxagajz Dios.

<sup>3</sup> Nicla gusä'ttu yäl rusguee chääl bejn, nicla redojl dxuudx, niclaza yäl sanälaztej xhixtentisni. Nicla gusä'ttuni lo sa'tu, sa'csi xhet si'cdi nungäjl gun bejn ni naba n-naya. <sup>4</sup> Sigajcza colcuälaz diidx ni rujn xtujy, näjza didxnajd, näjza didxnaj nani digac laaca. Colgudeedtis xquixtios lo Dios. <sup>5</sup> La'tu anajntu nicla tej ni rusguee chälbejn, nicla tej bendxuudx, nicla tej ni sanälaztej xhixtentisni, nicla renani rajn rebanäjb, nicla tej reni'c di xca' yäl nasa'c loj Jesucrist, dizareni jiu' lo xcäl rnibee Jesucrist, xcäl rnibee Dios. <sup>6</sup> Na'c gusaantu gusguee bejn la'tu con diidx ni xhet sajcdi sa'csi xcuent redzuunga riädä xcälrdxe'ch Dios loj rebejn ni di gusoob xtiidxni. <sup>7</sup> Na'c guntu sigajc rujnreni.

<sup>8</sup> Galoo nacäjtis xcäriejntu gubajntu, luxh naj abasanij Jesucrist xcäriejntu. Colguibajn si'c nungäjl guibajn nani abianij xcäriejnii. <sup>9</sup> Sa'csi nani abianij xcäriejnii rujn dzunsa'c, rniini didxgulii. <sup>10</sup> Colguisieed xhini'c rchagajz Dios. <sup>11</sup> Na'c guntu redzundxuudx nani rujn reni nacäjy xcäriejnreni, coltilnäj reni rujn sa' dzunguijdxga. <sup>12</sup> Sa'csi te xtujyli najc jieinu diidx xcuent xtzuunreni ni runxhiga'tzreni. <sup>13</sup> Niluxh guiraa sa' redzuunre ni



rdilnäjnu, huenliisi sien xhi najcreni, suzenni lo xpianij Jesucrist. Sa'csi guira'ti ni ruzen najc nianij. <sup>14</sup> Ni'cni caj loj reguijtz, räjp Dios:

Gubajñ, huistie luj ni rejslu.

¡Huistie lo dojl, luj ni naga'lu lo dojl si'c beñgut,

te gusanij Jesucrist xcäriejnlu!

<sup>15</sup> Colhuui, colsin, na'c guibajntu si'c te bejn nani di gacbee, colguibajñ si'c bejn nani yu' xcäriejnni. <sup>16</sup> Coltedsa'c redxej sa'csi neñ redxejre ganax cosguijdx rujn bejn. <sup>17</sup> Ni'cni na'c guibajntu si'c rebejn nani di gacbee, colyacnasin, te gacbeetu xhini'c najc ni rlajz Dad xhaguibaa guntu. <sup>18</sup> Lacuaa yätu nejp nani runijt bejn, colgapchee Sprit Dxan xten Dios neñ lastootu. <sup>19</sup> Colnii loj resa'tu rediidx nani gunii rebejn tiemp gulä'preni xpala'n Dios, colyelza redij xten Dios, con reyälriel colguiliä'p xpala'n Dios neñ lastootu. <sup>20</sup> Di jiäl lajztu gudeedu xquixtios lo Dios xtadnu con laj Dad Jesucrist.

### *Xho guibannäj sa' rexpejn Jesucrist*

<sup>21</sup> Sa'csi rajntu Jesucrist, colgusoob xtidx sa'tu.

<sup>22</sup> Lojtu, regunaa ni abachnaa, rniä scree: Colgusoob xtidx chäältu si'c rusoobzatu xtidx Dad Jesucrist. <sup>23</sup> Sa'csi niguii rnibee gunaa si'cni rnibee Jesucrist xquidooni, niluxh laazani ruslaani rexpejn guidooni lo redojl, najcreni si'c tiejxhni. <sup>24</sup> Ni'cni, sigajc rusoob rebeñ guidooga nani rnibee Jesucrist gunreni, sigajcza nungäjñ gusoob regunaa ni abachnaa nani guinibeetis chäälni gunreni.

<sup>25</sup> Lojtu, reniguii ni abachnaa rniä scree: Colchanälajz chäältu sigajc ni huinälajz Jesucrist rexpen guidooni, badeedni lagajc tiejxhni loj Dios cheni cuajni lo cruz por laareni <sup>26</sup> te basiani xtojñ rexpejn guidooni, te gujcreni te beñcoob, abidiib lastooreni con xtiidxni si'c rdiib te cos con nis <sup>27</sup> te che xca'ni rexpen guidooni, najcreni te guidoo ni sajcro, te guidoo nani xheti xtojñni, te guidoo nani sugadzu'tz, te guidoo xhet xhi riäädxd, najcni te guidoya, xheti xhi xtojñdini. <sup>28</sup> Sigajcza, te niguii nani abachnaa nungäjñ chanälajz chäälni sigajc sanälajzni lagajc tiejxhni. Nani sanälajz chäälni sanälajz lagajc laani. <sup>29</sup> Ruti chu te bejn ni rbälaz tiejxhni; alga rajpni tiejxhni ruyaanni tiejxhni sigajc rajp Jesucrist rexpen guidooni. <sup>30</sup> Najczanu tejsi loj tiejxh Jesucrist, loj xpäälni, loj rextzujtni. <sup>31</sup> “Ni'cni che guchnaa te niguii rusa'nni xtadni, xnanni, te xca'ni gunaa, te gac guiro'preni si'c tejsi bääñ, si'c tejsi bejn.” <sup>32</sup> Dee najc te diidx xhiga'tzduxh; li te “¿chuj?” najcni. Niluxh narä rniä xcuent Jesucrist con rexpenguidooni. <sup>33</sup> Niluxh nanabpac chanälajz tejgatu chäältu sigajc sanälajz tiejxhtu. Dxejcti gunaa ga'pzani xpala'n chäälni.

## 6

<sup>1</sup> Lojtu biuux, rniä scree: Colgucuaiajg xtidx Jesucrist, colgusoob xtidx xtadtu sa'csi ni'c sajz nez loj Dios. <sup>2</sup> Colga'p xpala'n xtadtu, xnantu, sa'csi ni'c najc didx galoo xten leii nani runiidx xhi xca'tu palga gusoobtu diidxga; <sup>3</sup> “Te saruduxh guibajntu xchero lo guedxliujre.”

<sup>4</sup> La'tu, Dad ni najc guzajn, na'c guntu guidxe'ch rexi'ntu lojtu. Colguslaareni con yälñaj, colgulijdxreni con xtidx Jesucrist.

<sup>5</sup> La'tu ni najc mos, colgusoob xtidx xlamtu lo guedxliujre, colcuadiajg xtiidxni, xhet xhi steedi xhigabdi guntu neñ lastootu. Colyejn xtzuunni si'cni najc xtzuun Jesucrist.

<sup>6</sup> Colyejn xtzuunni, niluxh xhet che suga'tisreni, cahuiireni, parsi jiansa'ctu lojreni. Maazru hueen guntu dzuun si'c xmos Jesucrist; colyejn guira'ti si'cni rujntu xtzuunpactu; si'cni rlajz Dios. <sup>7</sup> Colyujñ xtzuunni guideb lastootu si'c xmos Jesucrist, et si'c di xmos beñ guedxliuj. <sup>8</sup> Anajntu dzunsa'c ni gun tejgatu, lagajcza xcuent ni'c xca'tu loj Dad Jesucrist, mase najctu mos o mase rutlojdi yu'tu.



<sup>9</sup> Lojtu, relam, rniä scree: Sigajcza colyujn lojreni. Colgusaan yälrusacsí, sa'csi anajntu yu' xlamtu xhaguibaa, luxh tebloj najc guiraa rebejn nez lojni.

*Nani gacw rexpejn Jesucrist lo guerr*

<sup>10</sup> Didx lult ni rniä, sa'ä, najc scree: Colsutijp lo xcälracnäj Jesucrist, colsudzu'tz lo xcälnadip xcälrnibeeni. <sup>11</sup> Colgajcw xhabguiib xten Dios te gac sudzu'tztu lo reyälrusguee xten bendxab. <sup>12</sup> Sa'csi xhet bejn guedxliujtis cadilnäjnu. Cadilnäjzanu reguxhtis xte yälkäjy, näjza reyälrnibee, rebejn nani rnibee loj reyälkäjyre, näjza rexangl bendxab nani rnibee bej xten guedxliujre. <sup>13</sup> Ni'cni colca' guideb lad-guiib xten Dios nani runiidxni loonu te gac sudzu'tznu nejn dxej ni guideednu trabajwduxh, te che agudejdni, laltis sisiudzu'tznu. <sup>14</sup> Colsudzu'tz pues. Xque'tu colguliib sindoor-guiib ni najc xtidx Jesucrist, colgajcw gamangw-guiib ni najc rextzunsac xten Dios ni rujntu. <sup>15</sup> Colcuuaa gurach-guiib ni'tu (ni'c najc xtidx Jesucrist ni ruscuecdxi lajztu). <sup>16</sup> Colca' escud-guiib ni najc yälirililajz te con yälirililajz xtidx Dios di bendxab gun gaan gusguee la'tu con rextidx-xhiini. <sup>17</sup> Colca' yälruslaa xten Dios lo dojl si'c te xhumbrel-guiib chu yejctu; colca'za lans xten Sprit Dxaan xten Dios ni najc xtidx Dios. <sup>18</sup> Colnab lo Dios guiraa dxej; colnab lojni con Sprit Dxaan xtenni; colsusintis; na'c jieedtu guiniabtu lo Dios xcuent guiraa xpejn. <sup>19</sup> Colnabza lo Dios por narä te guniidx Dios diidx cheni gal guiniä, te na'c guidxebä guiniä che guluiä didx-xhiga'tz xten yälruslaa bejn lo dojl. <sup>20</sup> Xcuent rediidxga ni yu'ä nejn latzguiib, caduä con caden. Ni'cni colnab lo Dios te na'c guidxebä guiniä rediidxga si'cpacni säbyäjl guiniäni.

*Lult xtixtios*

<sup>21</sup> Niluxh te gabeetu xho sasaj rextzunä, nägajcza xho yu'ä narä, Tíquico, sa'nu ni sanälajznu, ni runsa'cza xtzun Dad Jesucrist, siäd lojtu te gusule'ni diidx. <sup>22</sup> Laapacni ruxhalä lojtu, te gabeetu xho yu'nu, te si'c guscuecdxini lajztu.

<sup>23</sup> Rniabä yälrbexilajz par resa'nu, näjza yälirililajz con yälisanälajz xten Dios Xdadnu näjza xten Dad Jesucrist. <sup>24</sup> Gacnäj Dios guiraa reni di gusguee, reni sanälajzpac Dad Jesucrist. Sugacni si'c.

## Te Guijtz Lo Reben Filipos

### *Latzguiib yu' Pabl bacuaani loj reben guidoo xten guedx Filipos*

<sup>1</sup> Pabl najza Timoteu, nani najc rexmos Jesucrist, rucuaanu guijtzre lo guiraa rexpejn Jesucrist nani rbäjz guedx Filipos, loj rebejn nani ruluii xtidx Dios nen reguidoo najza loj rediaconos. <sup>2</sup> Gacnäj Dios la'tu con yälrbedxi-lajz xten Xtadnu najza xten Dad Jesucrist.

### *Rniab Pabl lo Dios xcuent rebejn nani rililajz*

<sup>3</sup> Che rnaj lazä la'tu, rudedä xquixtios lo Dios. <sup>4</sup> Che rniabä lo Dios, rbaa lazä rniabä lo Dios xcuent la'tu, <sup>5</sup> sa'csi abidxaag sa'nu lo xtidx Jesucrist che guslojli huililajztu hasta najli. <sup>6</sup> Anancheä Dios nani gusloj cayunsa'c dzuun nen lastootu, lagajc laani suluxsa'c dzuunga dxejli ni jääd Jesucrist. <sup>7</sup> ¿Xhiru xhigab nungäj gunä? Ni rapä la'tu nen lastoä sa'csi cayacnäjtu narä nen latzguiib luxh rsiudzu'tztu riye'tztu lo bejn, guli najc rediidx nani rusule'ä xcuent Jesucrist najza la'tu rusule'tu rediidxga. <sup>8</sup> Dios nanchee xho rbannäätu, xho sanälazä guiraatu lo xcäl'sanälajz Jesucrist. <sup>9</sup> Rniabä lo Dios te tioobru xcäl'rinälajztu näj xcäl'najntu nägajc churu xcäriejn guiraatu, <sup>10</sup> te cuetu nani najc dzunsa'c te si'c guiban nayatu, te na'c ga'ptu nicla tej dojl cheni jääd Jesucrist. <sup>11</sup> Te guidxa lastootu yäl'nasa'c xten te yäl'nabansa'c ni runiidx Jesucrist, te guspaa lajztu Dios, guiliä'ptu xpala'nni.

### *Jesucrist najc xcäl'nabanä*

<sup>12</sup> Rlazä gacheetu betzä: guiraa nani gusacä ni'c cayacnäj guire'chru xtidx Jesucrist. <sup>13</sup> Ni'c guiraa rebejn, renani yu' jusgaad sigajc renani yu' garenca lajt, anajnreni niäuä latzguiib xcuent Crist. <sup>14</sup> Xhidajlru resa'nu cheni gucbeereni yu'ä latzguiib, gusudzu'tzru lajzreni, direni nidxejb, guniirureni xtidx Dios.

<sup>15</sup> Guliica yu' reni rusule' xtidx Jesucrist sa'csi rdxe'ch lajzreni, rdxe'chzaren loä. Yu'za reni rusule' xtidx Jesucrist sa'csi laaca najc xhigabreni. <sup>16</sup> Yu'reni rusule' xtidx Jesucrist sa'csi rdxe'chreni, xhet sa'csi laaca najc xhigabreni, alga rujnreni xhigab gustioobruren trabajw nani tedä nen latzguiib. <sup>17</sup> Niluxh yu' reni rusule' rediidxga sa'csi sanälajzreni Jesucrist. Anajnreni yu'ä latzguiibre te gusule'äru guliipac najc xtidx Jesucrist. <sup>18</sup> Niluxh ¿xhiru najcni? Palga rujnsireni laaca o palga guluiipac laaca najc xhigabreni rusule'reni xtidx Crist; rbaa lazä sa'csi care'ch xtiidxni niluxh sibaaru lazä. <sup>19</sup> Ananä laaca guiriä loj guiraa recosre sa'csi canabtu lo Dios xcuentä. Luxh xcäl'racnäj Sprit xten Jesucrist <sup>20</sup> rujn runloä, rbäzäza dina jianxtuiä. Ni'cni dina guidxebä guiniä, si'cni runäpac, sigajcza runä naj te gac guiliä'pä xpala'n Jesucrist con tiexhä palga guibanä o palga guetä. <sup>21</sup> Sa'csi palga guibanä, su'ä lo Jesucrist; luxh palga guetä sunäru gaan. <sup>22</sup> Palga guibanäru lo guedxliujre, sajcru gunä xtzuun Dad Jesucrist, ni'cni dina gacheä xhinic cueä xca'ä. <sup>23</sup> Nagajn najcni par narä cueä lo guiro'preni. Te lajt runä xhigab: malaii guetä te cha'a cadre yu' Jesucrist sa'csi ni'c najc hueenru par narä. <sup>24</sup> Niluxh stee lajt nancheä nungäj guibanäru lo guedxliujre xcuent la'tu. <sup>25</sup> Niluxh narä racbeäpac siannäru la'tu, su'äru lojtu te chanuurutu lo xtidx Jesucrist, te guibalajztu lo yäl'rililajz, <sup>26</sup> te guibalajzrutu xcuentä loj Jesucrist che guibisacä lojtu stehuält.

<sup>27</sup> Colhuiitis guibajntu si'cpac ni rni xtidx Jesucrist, te palga jädhuiätu o palga ruti narä, jiejn diagä sugadzu'tztu, rujntu tejsi xhigab, nadxaag sa'tu rujntu tejsi dzuun con yäl'rililajz xten xtidx Jesucrist. <sup>28</sup> Na'c guidxejbditu renani rdxe'ch lojtu. Laareni huenliisi ruseñ agunijtreni ni'c rdxe'chreni, ni'cni la'tu huenliisi ruseñ agulaatu nen dojl si'c baniidx Dios, ni'cni ditu guidxe'ch. <sup>29</sup> Sa'csi lojtu abaniidx Jesucrist chalilajztu xtiidxni. Niluxh xhet ni'ctis; nägajcza tedtu trabajw xcuent laani. <sup>30</sup> Cadejdtu lagajc trabajw ni cahuiitu gudedä luxh naj riejn diajgtu cadedsicä trabajwga.

## 2

### *Xcälñalaslajz näjza xcälguobduxh Jesucrist*

<sup>1</sup> ¿La ruspaa Jesucrist lajztu? ¿La racnäj xcälñinälajztu la'tu? ¿La yu' Sprit Dxaan xtenni con la'tu? ¿La yu' xcälñanälajzni näj xcälñrulaslajzni lastootu? <sup>2</sup> Palga yu'ni, colguspaa lazä, colyejn tejsi xhigab con narä, colga'p lagajc yälñanälajzga, colguidxaag sa'tu, colyejn tejsi xhigab. <sup>3</sup> Na'c guntu nicla tej dzuun sa'csi cayutu lagajc la'tu, na'cza guntu dzuun te chä'p xpala'ntu. Colyejn xtzuuntu con yälñalaslajz, colhuii loj sa'tu si'c beñroru lojtu. <sup>4</sup> Na'c jiu chu tejtu lagajctis xhixtenni, coljiu tejgatu xhixten sa'ni.

<sup>5</sup> Colga'p lagajc sa' xhigab nani gojpa Jesucrist <sup>6</sup> nani mase najcni sigajc Dios, dini niniazdzu'tz xcälñnibee Dios, <sup>7</sup> alga basa'nni te laad yälñnibee nani rajpni con Xtadni Dios te gujcn mos cheni gojlni lo guedxliujre. Gujcn si'ctis te bejn. <sup>8</sup> Che gujcn si'ctis beñ guedxliuj, gujcn beñ nadolajz, beñ nasobdiidx. Basoobni xtidx Dios, gujtni lo cruuz, luxh yälñrejt lo cruuz najc te yälñtuiduxh. <sup>9</sup> Ni'cni baspañsac Diosni, gule'cni Crist te lajt ni najc jiaaru, badeedza Dios sajru lajni lo laj guiraa relaj ni rusä't bejn. <sup>10</sup> Luxh che jiejn diajgreni laj Jesucrist, suzuxhijb guiraa reni yu' xhaguibaa, guiraa reni yu' lo guedxliuj, näjza guiraa reni yu' nez neñ yuj. <sup>11</sup> Te guiraareni gacbeepac, guiniizareni: “Jesucrist najc Dad”, te si'c chä'pduxh xpala'n Xtadnu Dios.

### *Rexpejn Jesucrist najc si'c bajl ni rusanij lo guedxliuj*

<sup>12</sup> Ni'cni, resa'ä ni sanälazä, sigajcni rusoobtu xtidxä cheni suganää la'tu, sigajcza colgusoob xtidxä naj ni yu'ä zijt, colhuii tejgatu xho gac laatu neñ dojl, colyajc bejn ni rusoob diidx con yälñrdxejb. <sup>13</sup> Sa'csi Dios najc ni rujn dzuun neñ lastootu te rajc rujntu xhigabsa'c, dxejc racnäjzani la'tu te rajc rujntu si'cni rlanjni.

<sup>14</sup> Loj guira'ti ni rujntu, na'c gusmojm̄tu, na'cza gun tiop lajztu, <sup>15</sup> te rut gucuaquijditu, te gactu bejn ni ruchaag chutis bejn, gactu xi'n Dios, bejn nani xhet xtojldini yu' laj ni tre'tu loj rebeñguijdx ni rujn redzunduudx. Nez lojreni gactu si'c te bajl ni rdimbicha' si'c rebalxhaguibaa che nacäy, <sup>16</sup> sa'csi arapdzu'tztu xtidx yälñnabajn ni runiidx Crist nen lastootu te guspaatu lazä dxej cheni jiääd Jesucrist, sa'csi xhet xlia'di gujc xtzunä, xhetza xlia'di cayunä dzuun naj. <sup>17</sup> Mase lagajc xtienä guixe' te guiza' te gojn ni xca' Dios xcuent xcälñrililajztu, rbaa lazä, sibalaznääza la'tu. <sup>18</sup> Sigajcza colguibaa lajztu, colguibalaznäj narä.

### *Timoteu con Epafrodito*

<sup>19</sup> Nez loj Dad Jesucrist cayunloä guxhalgacä Timoteu lojtu te näjza narä guibaa lazä che agucbeä xho yu'tu nejzga. <sup>20</sup> Sa'csi rutru rapädi nani rujn tejsi xhigab, tej ni guliipac gun dzuun, jiupacni la'tu. <sup>21</sup> Guiraa rebejnre rujntis xtzuuncareni, direni jiu gunreni xtzuun Jesucrist. <sup>22</sup> Niluxh la'tu anajntu xho rujn Timoteu; si'c racnäj te bi'n xtadni, si'cza racnäjni narä lo xtidx Jesucrist. <sup>23</sup> Ni'cni rlazä guxhaläni te jiädhuiini la'tu, fixgaäsi don xho sasaj xcuentä ree. <sup>24</sup> Cabäzäza nez lo Dad Jesucrist don la näjza narä sajñ jiädhuigacätu.

<sup>25</sup> Niluxh rchaloä nanabpac guxhalä bejtznu Epafrodito ni najc sa'ä loj dzuun, loj retrabajw ni cadejdnu. Lagajc la'tu baxhaltuni te jiuni narä, fiini xhini'c rquinä. <sup>26</sup> Laani rlazduxhni fiini lojtu, lacti cayu'ni yärsia' sa'csi gucbeetu gucxhuuni. <sup>27</sup> Guliica gucxhuuni cuentro, ameer niejtni, niluxh Dios balaslajzni laani, luxh xhet laatisni, balaslajzzani narä te di nidedäru loj yälñahuinlajz ni yu'ä ree. <sup>28</sup> Ni'cni rlazä guxhalgacäni te guibalajztu che fisactu lojni, näjza te na'cru gac-huinlazä xcuent la'tu. <sup>29</sup> Colca'ni con yälñbalajz si'c bejtztu lo xtidx Dios, sigajcza colyejn reni najc sigajc laani. <sup>30</sup> Xcuent xtzuun Jesucrist ameer niejtni, dini niu xcälñnabajntisni te bejnri redzuun nani di niajcdi niujntu lagajc la'tu xcuentä.

## 3

*Te yäl̄nabaṅsa'c'pac*

<sup>1</sup> Naj rebetzä, col̄guibalajz nez lo Dad Jesucrist. Xhet najcdi gucuasacä lagajc rediidx nani abacuaä lojtu, sa'csi sacnäjni la'tu. <sup>2</sup> Col̄nati renani najc si'c bä'cw. Col̄natiza rebejn nani rujn dzun guijdx. Col̄natiza reni ru' bee tiejxhtisreni luxh xlia'si rujnreni si'c. <sup>3</sup> Renani guliipac yu' bee najc nuure nani ahuililajz xtidx Dios, rienzanu xtzuumni si'cni rlajzni sa'csi ayu' Sprit Dxan xtenni neṅ lastoonu. Rbalaaznu sa'csi najcnu xpejn Dad Jesucrist, xhet xcuentdi redzuun ni rujn tiejxhnu. <sup>4</sup> Narä sajca guibalazä xcuent ni rujn tiexhä. Palga yu' chu tej ni rbalajz, narä rbalazäru <sup>5</sup> sa'csi guyu'ä bee che guyu'ä xhujn gubijdx; narä nacä te rexpejn Israel; narä nacä tej rexpejn toBenjamín, nacä te hebreo, luxh xtadä najc te beṅ hebreo; xcuent leii nacä te farisee. <sup>6</sup> Basobduxhä guiralii rextidx Dios ni caj lo leii ni'cni basacsiduxhä rexpen Jesucrist; xcuent yäl̄nabaṅsa'c xten leii, xhetliidi xtolä yu'; basobdzu'tzä xtidx leii. <sup>7</sup> Niluxh naj rediidx nani galoo benä xhigab sacduxh, naj xhet sajcdini sa'csi sanälazä Jesucrist. <sup>8</sup> Niluxh maazru runä: runä xhigab xhet sajcdi guiraa nani rapä, sa'csi maazru sacduxh yäl̄riembee Jesucrist ni najc Dad xtenä. Xcuent Jesucrist gulälazä guira'ti, guira'ti najc si'c guixbiujy nez loä te gunä gaan Jesucrist, <sup>9</sup> te chu'ä lojni, xhet xcuentdi xcäl̄nabaṅsa'cä ni najc xcuent leii, alga xcuent yäl̄nabaṅsa'c ni najc xcuent xcäl̄rililajz Jesucrist, yäl̄nabaṅsa'c ni najc xten Dios xcuent yäl̄rililajz. <sup>10</sup> Ni'cni rlazä gumbeäru Jesucrist loj yäl̄rnibee ni rajpni sa'csi huistie gubaṅsa'cni sacni loj rebengut, te gumbeäru retrabajwduxh ni gudejdni, te ganä xho gunä ni rlajz Dios si'c guchee Jesucrist, bejnzani ni rlajz Dios che gujtni. <sup>11</sup> Te gac guidzunä lo yäl̄guibaṅsac loj rebengut te xca'ä yäl̄nabajn par tejpas lo Dios.

<sup>12</sup> Dizana guiniä “abenä gaan” o “anacä beṅsa'c”, alga sanuätis te gunä gaan yäl̄nabajn nani cua'ä lo Jesucrist. <sup>13</sup> La'tu rebetzä, dipacna gunä cuent alabenä gaan, niluxh tejtis nani runä, riallazä nani agudejd, rusgää naä si'cni guiniazä nani churu gac. <sup>14</sup> Si'cni sanuutis ruxun bejn te gunni gaan xhi guzalajzni, si'cza sanuutis cayunä dzuun nani baniidx Jesucrist loä, te che abenä gaan dzuunga sica'ä ni guzalajzni, nalajznu sibejdx Dios narä cha'a loj Jesucrist.

<sup>15</sup> Guiraanu nani ahuililajznu, nanab jiennu lagajc xhigabga, niluxh palga la'tu guntu ste'ca xhigab, rchaloä lagajc Dios suluiloini lojtu xcuent ni et laadi cayujntu.

<sup>16</sup> Naj, cadrotis abidzunnu lo nani abiembeenu, sigajca nanab guibaṅsijcnu, chanuutis gusoobnu rediidxga; nungäjl̄ guibajnnu loj rediidxre, jiennu tejsi xhigab.

<sup>17</sup> Rebetzä, col̄tanajl̄ narä, col̄yejn si'c runä narä, col̄huiiza rebejn nani nabajn si'c nabaṅä. <sup>18</sup> Xhidajl̄ huält aguniä lojtu, naj ronäli rnisacä lojtu, yu' xhidajl̄ reni rdxe'ch lojtu, rniyajreni nani bejn Jesucrist che gudijxni xtojlnu lo crujz. <sup>19</sup> Redee che luux xnezyujreni sinitlojreni, sa'csi xtioozreni najc yäl̄rausa'c; luxh rbaali lajzreni rujnreni dzun xtujy; luxh riutisreni xcäl̄nasa'c guedxliujre. <sup>20</sup> Niluxh nuure, xhaguibaali najc laadxnu, luxh ro'cli cabäaznu jiäd nani ruslaanu neṅ dojl̄, nalaaznu lagajc Dad Jesucrist. <sup>21</sup> Laani suchaani tiexhnu ni rajpnu lo guedxliujre, te gac tiexhnu sigajc najc tiejxhni lo xcäl̄rnibeeni. Sujnni dee con yäl̄rnibeduxh ni rajpni te rnibeeni loj guirali'ti, guiraa nejz.

## 4

*Col̄guibalajztis xcuent Dad Jesucrist*

<sup>1</sup> Ni'cni rniä lojtu, rebetzä nani sanälazä, lojtu ni rlazä fisacä, lojtu ni ruspaalazä, lojtu ni najc yäl̄nasa'c xtenä, col̄sudzu'tz loj xtidx Jesucrist.

<sup>2</sup> Rniabduxhä lo Evodia näjza lo Síntique, rulidxäreni gunreni tejsi xhigab xcuent Dad Jesucrist. <sup>3</sup> Sigajca rniabä lojlu betzä, ni runnäj narä dzuun, gucnäj regunaare ni bennäj narä dzuun, bideednu trabajw xcuent xtidx Jesucrist. Gucnäjza Clemente näjza guiraa reni bennäj narä dzuun; alajreni caj neṅ reguijtz xten yäl̄nabajn par tejpas.

<sup>4</sup> Colguibalaznäjti Dad Jesucrist; stehuält rniä: colguibalajz. <sup>5</sup> Sugabee guiraa rebejn xho najc xcälñabajntu lo xtidx Dios. Asiäddzũgajxh dxej xten Dad Jesucrist.

<sup>6</sup> Na'c guidxejbtu, colñabtis lo Dad guira'ti, colgudeedza xquixtios lojni laḷ ni cabedx-canabtu lojni. <sup>7</sup> Dios guniidx xcälrbedxilazduxhni, nicla guntu xhigab lacti najc yälrbedxilajzga. Yälrbedxilajzga ga'p lastootu näjza xcäriejntu loj Dad Jesucrist.

### *Colyejn xhigabsa'c*

<sup>8</sup> Mbaj naj, deetis guiniä lojtu rebetzä, sa'tis rediidxre gusaantu chu loj rexhigabtu: guiraa ni najc guliipac; guiraa rediidx ni nanab guiliä'pni xpala'nni, guira'ti nani nacsac; guira'ti nani naya; guira'ti nani najc saru; guira'ti nani rapsa'c xpala'n lajni; näj palga yu' xhi dzuun ni nacsac'pac, o palga yu' xhi te diidx ni sajc guiliä'p xpala'nni, xcuent guiraa reni'c colyejn xhigab. <sup>9</sup> Nani bisieedtu, nani cua'tu, nani biejn diajgtu, nani bahuiitu benä, ni'c guntu te Dios ni rbedcxilajz, laani jiannäjni la'tu.

### *Gojn xten reflipenses ni xca' Pabl*

<sup>10</sup> Rbaduxh lazä nez loj Dad Jesucrist sa'csi banasac lajztu gacnäjtu narä. Guliini; galooli rlaiztu niacnäjtu narä, luxh di niacjini. <sup>11</sup> Dinä guiniä si'c sa'csi yu' xhi cayädxä, sa'csi abisiedä guibaali lazä loj xhitis ni rapä. <sup>12</sup> Sajc guibanä che guxii rapä; sajc guibanä che xhidajl rapä; abisiedä guibanä xhotis: sajc gauduxhä, sajcza guilianä; sajc gapä xhidajl xhixtenä, sajcza tedä trabajw. <sup>13</sup> Guira'tini sajc gunä sa'csi Jesucrist racnäj narä. <sup>14</sup> Niluxh xhet najc di; laaca dzuun bejntu che bejntu xhigab gacnäjtu narä laḷ ni cadedä trabajw.

<sup>15</sup> Gabee guejbtu, dad filipenses, che gusloj caguluiä xtidx Jesucrist lojtu, cheni biriä reguedx Macedonia, nicla tej guidoo di niacnäj narä, la'tistu gucnäj narä. <sup>16</sup> Cheni yu'äli guedx Tesalónica, baxhaḷtu meel loä tej-tio'p huält. <sup>17</sup> Niluxh narä di rlazä xca'ätis xhixtentu ni guniidxtu, nani rlazä najc tioobru xcälñasa'ctu nez lo Dios xcuent dzuun ni rujntu ruxhaḷtu meel loä. <sup>18</sup> Naj acua'ä guiraa ni baxhaḷtu, arapä xhidajl, arapduxhä sa'csi acua'ä nani biädnä Epafradito baxhaḷtu loä, te gojn ni rlianejxh si'c guxhyaal, te dzunsa'c ni rchaglaiz Dios. <sup>19</sup> Dios xtenä guniidx lojtu guiraa nani riäädx xca'tu, si'ctisni rajpni reyälñasa'cduxh xhaguibaa con Dad Jesucrist. <sup>20</sup> Colguiliä'p xpala'n Dios xtadnu guixe-guixee par tejpas. Si'c gacni.

### *Lult xtixtios*

<sup>21</sup> Coldeed xtixtios lo guiraa rebejn ni abia lastooni nez loj Dad Jesucrist. Rebejznu ni yu' ree näj narä ruxhaḷnu xtixtios lojtu. <sup>22</sup> Guiraa rebenree ni abia lastooni nez loj Dad Jesucrist ruxhaḷ xtixtios, niluxh ruxhaḷru resa' César xtixtios lojtu.

<sup>23</sup> Suga'p xcälracnäj Dad Jesucrist lastootu. Sugacni si'c.



## Te Guijtz Lo Reben Colosas

### *Bacuaa Pabl loj reben guidoo ni yu' guedx Colosas*

<sup>1</sup> Narä, Pabl nacä te apost xten Jesucrist. Dios gule narä. Narä näjza bejtznu Timoteu <sup>2</sup> cagucuaanu reguijtzre loj reben Colosas nani nabannaya rujnreni si'cpacni rlajz Dios, näjza reni najc bejtznu lo xtidx Jesucrist. Xca'tu yälracnäjä näjza yälrbexilajz xten Dios xstadnu.

### *Rniab Pabl gudeed Dios yälñajn xtenni*

<sup>3</sup> Rdeednu xquixtios lo Dios xstad Dad Jesucrist rniabnu lojni xcuenttu guixe-guixee. <sup>4</sup> Abiejn diajgnu xho rililajztu xtidx Dad Jesucrist, näjza xho sanälajztu rebejn ni ahuililajz xtidx Jesucrist, <sup>5</sup> sa'csi cabäjztu xca'tu reyälñasa'c ni yuchee xhaguibaa par la'tu. Laa xcuent reni'c ni biejn diajgtnu cheni bacuadiajgtnu xtidxlii Jesucrist xcuent yälrusläa lo dojl. <sup>6</sup> Laa rediidxga ni abiääd lojtu sigajc ni bire'chni guideb lo guedxliuj, luxh cayac xhidajlru rebejn ni cayacbee diidxre, asalilajzreni diidxga, sigajc guzajctu la'tu. Cheni biejn diajgtnu xtidx Jesucrist, dxejc biembexatu guliipac najc xcälñulasajz Dios. <sup>7</sup> Sigajcza bisieedtuni lo Epafra, ni sanuutis cayacnäjni nuure lo dzuun. Laani najc te beñsa'c, yu'ni lojtu cayujnpacni xtzuum Jesucrist lacuaa nuure. <sup>8</sup> Laani abasule'ni diidx loonu xho sanälajz sa'tu sa'csi nabajn Sprit Dxan xten Dios neñ lastootu.

<sup>9</sup> Laa ni'cni dxejli nani biejn diajgnu diidxre xcuenttu, di cuääz cabedx-canabnu lo Dios, canabnu gacheduxhtu xho rlajz Dios guntu, guniidxni guiraa yälñajn näjza gusanijni xcäriejntu <sup>10</sup> te guibajntu si'cni nungäjñ guibajñ bejn ni sanajñ Dad Jesucrist, te guspaatu lajzni lo guiraa redzuun. Chanuuzatu gunrutu guiraa redzunsä'c näjza jianijru xcäriejntu xcuent yälñiembee Dios. <sup>11</sup> Tioobrutu loj xcälñadip, xcälñabee Dios te guibaa lajztu gusutiplajztu, cue'cdxilajztu loj xhitis ni sajctu. <sup>12</sup> Guibalajznu guideednu xquixtios loj xstadnu Dios nani basudzu'tz nuure te xca'nu yälñabajñ par tejpas sigajc guiraa rebejn nani ahuililajz xtiidxni yu'reni lo xpianijni. <sup>13</sup> Laani abasläani nuure loj xcälñabee yälñacäjä, abateedni nuure lo xcälñabee xi'nni ni sanälajzni. <sup>14</sup> Laa xi'nni ni basläa nuure neñ dojl cheni baxhe'ni xtiejñni, gujtni lo cruzj, dxejc gudijxni rextojñnu.

### *Gubisacnu loj Dios xcuent xcälñajñ Jesucrist*

<sup>15</sup> Rut rajcdi ruhuii lo Gueb-Dios, niluxh xi'nni najc si'cpac najc Dios; si'cpac rujn lojni. Laani guyu'ni galodoo luxh rnibeeni lo guiralii ni yu' lo guedxliuj. <sup>16</sup> Por laani benchee Dios guiralii ni yu' xhaguibaa ni yu'za lo guedxliuj, renani ruzen sigajc renani di guzen: reñei, näjza reni rnibee loj rexangl Dios, näjza reni rnibee loj rexangl beñdxab, nägajcza reyälñabee xten reguixhajg, sigajczani loj regubier, lo reguxhtis ni rajp yälñabee, guiraani guc-chee por laani, näjza par laani. <sup>17</sup> Alanabajñ Jesucrist galooli, che gajdli guirixtiej guedxliuj. Por laani yu' guira'ti ni yu'. <sup>18</sup> Laani najc nani rnibee guidoo, nalajznu rebejn nani ahuililajz xtiidxni. Laani najc ni guläxtiej guira'ti. Ganiddoo laani huäjs lo rebeñgut te rnibeeni. Loj guira'ti ni yu' laatisni najc nani sajñ guinibee. <sup>19</sup> Sa'csi bidxaglajz Dad Dios ga'p Jesucrist guiralii yälñabee nani najc xten Dios, <sup>20</sup> por lagajcza Jesucrist badzu' Dios guira'ti ni yu', guibi'reni lojni, reni yu' lo guedxliuj sigajc reni yu' xhaguibaa, sa'csi abiäjñ-lajzni, aguredxi lajzni sa'csi bixe' xtiejñ Jesucrist lo cruzj.

<sup>21</sup> Luxh la'tu gujctu si'c beñzijt lo Dios sa'csi galoo rdxe'chtu lo Dios neñ lastootu xcuent redzunguidx nani bejntu. <sup>22</sup> Niluxh najc abiäjñ-lajz Dios abadzu' Jesucrist la'tu, agucnayatu gubi'tu lo Dios xcuent xtiejñ Jesucrist ni baxhe'ni lo cruzj cheni gujtni. Ni'c bejñni te che suutu nez lojni, xhetiru xtojñtu, xhet xhi guiniidi Dios lojtu sa'csi anayapactu. <sup>23</sup> Niluxh riäjñ chanuu sudzu'tztu, cuedxitu lo yälñrililajz. Na'c gusaantu chu gusiejch-lajztu te cuälaztu xtidx Jesucrist nani abiejn diajgtnu. Rediidxga abasule'zanu loj

guiraa rebejn ni re' lo guedxliujre. Luxh lagajc narä, Pabl rusule'ä diidxga sa'csi parpac ni'c gule Dios narä.

### *Dzuun guidoo najc xcuent Pabl*

<sup>24</sup> Naj rbalazä cadedä trabajw xcuenttu sa'csi retribajw ni cadedä lagajc narä cagusa' nani cayäädx lo retribajw xten Crist xcuent guidoo, nalajznu rebejn ni ahuililajz xtiidxni, ni najc si'c tiejxh Jesucrist. <sup>25</sup> Ni'c nacä te bejn ni rusule' diidx nen guidoo. Dzuunga baniidx Dios gunä par xcäl'nasa'ctu te gusule'äpac guiragajc xtidx Dios, <sup>26</sup> te gacbeenu rehxigabxhiga'tz nani najc xhiga'tz galododuxh niluxh naj abaluiini redidx-xhiga'tzre loj rexpejni. <sup>27</sup> Lojreni bejn Dios xhigab guluiini reyäl'nasa'c xten yälrdimbicha' xten redidx-xhiga'tz ni cagusule'ni loj rebenzijt. Yäl'xhiga'tzre säloj Jesucrist rbäz nen lastootu ni'c runlojtu chaläjztu lo yälrdimbicha' xten Dios.

<sup>28</sup> Rusule'nu diidx xcuent Jesucrist, ruliidxnu guiraa rebejn, guideb yäl'najn ruluiinu te guisa' yäl'najn xten guiraa rebejn xcuent Jesucrist che guidzujnreni nez loj Jesucrist. <sup>29</sup> Xcuent dzuunre guideb xtipä runä dzuun con guiraa yäl'nibee nani runiidx Jesucrist narä.

## 2

<sup>1</sup> Rlazä gacbeetu lacti cadedä trabajw xcuentu, näjza xcuent reni yu' guedx Laodicea, näjza xcuent guiraa reni gajd gumbee narä. <sup>2</sup> Te tioob lastoo guiraatu sa'csi abidxagsa' lastootu lo yäl'sanälajz, näjza te ga'ptu guiraa reyäl'nasa'c ni rajp bejn che racbesa'creni xtidx Dios. Te gumbeezatu guiraa redidx-xhiga'tz xten Dios xtadnu näjza Dad Jesucrist. <sup>3</sup> Nen lastoo Dios näjza lastoo Jesucrist naga'tz guiraa reyäl'nasa'c xten guiraa reyäl'najn, guiraa yäl'numbee. <sup>4</sup> Dee rniä lojtu te di gusguee chu gusgueetu con rediidx-xhii. <sup>5</sup> Te palga ruti narä ro'c, canaj lazä la'tu, cabaa lazä cahuiä laaca cayujntu, sugatzu'tztu lo yäl'rilitajz xten Jesucrist.

<sup>6</sup> Ni'cni sigajc ni huililajztu xtidx Jesucrist, sigajcza colchasanäj Jesucrist. <sup>7</sup> Col'sudzu'tz lo Jesucrist si'c rsiobdzu'tz xlobaa te yajg. Col'sudzu'tz lo yäl'rilitajz xten Jesucrist si'c ni abisieedtu. Col'gudedduxhru xquixtios lo Dios.

### *Yäl'nabancocob ni rudeed Jesucrist*

<sup>8</sup> Col'huii, na'c gusaantu guxhiid bejn xcäl'rilitajztu con xtiidxtisreni näjza rediidx nani xhet sajcdi, si'c najc xtidx reben galoo, näjza si'c najc diidx xcuent xhigab xten reben guedxliuj, di rediidxga gac si'cni rlajz Jesucrist.

<sup>9</sup> Sa'csi guiralii ni najc Dios, lagajc ni'c najc Jesucrist, niluxh yu' tiejxh Jesucrist. <sup>10</sup> Xhet cayäädxdi lo yäl'nabajn xten Dios ni rajptu sa'csi najctu tejsi con Jesucrist. Laani rnibee guiraa reyäl'guxhtis, guiraa reyäl'nibee ni yu' guira lajt. <sup>11</sup> Sa'csi huililajztu Jesucrist aguyu'tu bee, niluxh xhet beedi nani rusäl' bejn con naareni, alga xpee Jesucrist, ni najc yäl'rusia xtojł bejn sa'csi rusaan bejn redzunguijdx, rujnreni tejsi xhigab con Jesucrist. Si'c najc xpee Jesucrist. <sup>12</sup> Cheni gurobnistu najcni si'cni agujttu ni'c biga'tztu con Jesucrist, najczani si'cni gubansactu con laani sa'csi huililajztu rajp Dios yäl'nibee nani gulässac Jesucrist lo reben'gut. <sup>13</sup> Che najctu si'c ben'gut lo dojł, näjza sa'csi di bee niu' tiejxhtu, dxejcli baniidx Dios yäl'nabajn par tejpas lojtu con Jesucrist, badzucajni guiraa rextojłnu. <sup>14</sup> Dios badzucaj guiraa releii nani basäuu nuure nen dojł, badzucajnini lojni, sa'csi bacuaanini lo crujz, cadre gudijx Jesucrist guiralii rextojłnu. <sup>15</sup> Cheni gujt Jesucrist lo crujz bejni gan loj reyäl'guxhtis näjza guiraa reyäl'nibee xten ben'dxab näjza rexspritni. Basanxujynireni nez loj guiraa rebejn. Laani bejni ganreni cheni cuajni lo crujz.

### *Col'quiil recos ni najc xten xhaguibaa*

<sup>16</sup> Nicla tejtü na'c cubee sa'ni xcuent reyäl'rajw näjza reyäl'rä', niclaza xcuent redxe lanij näjza rexchej rebäicoob, näjza redxej ni rusilajzni. <sup>17</sup> Guiraa redee najc si'csi te

balaa xten nani churu jiääd, te guluiireni ni rujn balaaga, nalajznu ni'c najc Jesucrist. <sup>18</sup> Na'c gusaantu gudzucaj bejn xcäl'nasa'ctu te gunreni gactu nadolajz, te gan̄tu reangl. Sa' bejn̄ga richu' loj nani gajdreni fii; rchaloreni najcreni beñro xcuent lagajc xhigabreni. <sup>19</sup> Laareni direni chanajl Jesucrist nani rnibee, nani rujn roobru tiejxhni, nalajznu rexpejn̄ni, sa'csi lojni rca'reni ni rquiin lastooreni, te ruhaagni sa' teygareni si'c nadxaquiid bääl cuä' dzujt lo tiejxh bejn̄, te gacreni tejsi con Dios.

<sup>20</sup> La'tu agujttu con Jesucrist, abiriitu lo rexhigab xten guedxliujre. Naj ¿xhicuent guibajntu sigajctis nabajn̄ rebejn̄ nani di gumbee xtidx Jesucrist, ä? ¿Xhicuent rusoohtu rediidx ni caj lo releii? Loj releii caj sa' diidxre: <sup>21</sup> “Di chahuallu dee, di gaulu ni'c, di canlu dec.” <sup>22</sup> Luxh guiraa redee rnitloj che runnäj̄nini dzuun. Luxh guiraa sa' leiiga najc diidxtis nani rului bejn̄. <sup>23</sup> Guluiicani sa' releiiga rien̄ asdoo ruluiireni yäl̄nanduxh, luxh che rusoob bejn̄ releiiga rchaloreni rajn̄reni Dios, rchaloreni rac nadolajzreni, rusacsíreni lagajc tiejxhreni. Niluxh xlai'si rujnreni guiraa redzuunga, sa'csi sanuutis rujnreni si'ctisni rlajz tiejxhreni.

### 3

<sup>1</sup> Palga anabansactu con Jesucrist, colquuil reyäl̄nasa'c ni yu' xhaguibaa cadre sobga' Jesucrist xladbee Dios. <sup>2</sup> Colyejn̄ xhigab xcuenttis reyäl̄nasa'c ni yu' xhaguibaa, na'c guntu xhigabtis xcuent reni yu' lo guedxliuj. <sup>3</sup> La'tu anajctu si'c beñgut loj reyäl̄nasa'c ni yu' lo guedxliuj, luxh yäl̄nabajn̄ ni rajptu naj, yäl̄nabajn̄ga naga'tz con Dios xcuent Jesucrist. <sup>4</sup> Che guluiilosac Jesucrist ni najc xcäl̄nabajn̄tu, dxejc nájza la'tu suluiilojtu con laani lo xcäl̄rdimbicha'ni.

#### *Yäl̄naban̄biejw con yäl̄naban̄coob*

<sup>5</sup> Colcuälaz redzunguijdx xten guedxliuj nani rujntu, yäl̄rusguee gunaxteb, yäl̄rujn recosdxuudx, recos ni rdxagljaz tiejxhtu, rexhigab-guijdx, yäl̄rsiäb-lajz xhi xten bejn̄, guiraa redee rujn runijt bejn̄ lo Dios sigajc rujn bejn̄ che rajn̄ bejn̄ rebanäj̄b. <sup>6</sup> Guiraa redzuunga rujn riääd xcäl̄rdxe'ch Dios yejc renani rujn sa' redzuunga. <sup>7</sup> Nájza la'tu bejntu sa' redzunguijdxga galoo cheni guyu'tu lo sa' yäl̄nabajn̄ga. <sup>8</sup> Niluxh naj nájza la'tu colgusaan recosre; nalajznu yäl̄rdxe'ch, yäl̄ruche'ch sa'ni, yäl̄rujn latzsiaj sa'ni, yäl̄rniyaj sa'ni, nájza rediidx-dxuudx ni rniitu. <sup>9</sup> Na'c gusgueetu resa'tu, sa'csi nanab gusaantu nani bejntu cheni guyu'tu loj redzunguijdx. <sup>10</sup> Colyajc te beñcoob, ni guixe-guixee cayani-jru xcäriejn̄ni, te gumbesa'ctu Dios, te gactu sigajc najc Dios ni benchee beñguedxliuj. <sup>11</sup> Lo yäl̄naban̄coobre rutiru beñzijt, niclaza xpeñ Israel, rutiza rebejn̄ ni ru' bee, niclaza bejn̄ ni di chu bee; rutiza beñzijt, niclaza bejn̄ ni siääd zitduxh; rutiza mos, niclaza bejn̄ nani di chu lo bejn̄, sa'csi che rililajz te bejn̄ xtidx Jesucrist najcni tebloj con guiraa reni rililajz xtidx Jesucrist; guiraareni najc xpejn̄ Jesucrist.

<sup>12</sup> Naj agule Dios la'tu te gactu xpejn̄ni nani gac naya, nani sanälajzni, colguibajn̄ con yäl̄rulasajz, na'c guidxe'chtu, colyacnadoo con yäl̄nadolajz, colniiza nadolajz. <sup>13</sup> Colyujn huant, na'c guidxe'chtu loj sa'tu, palga yu' chu sa'tu rdxe'ch loj sa'ni, colgusiäj̄l-lajztu sigajcni basiäj̄l-lajz Dad Jesucrist lojnu xcuent rextojl̄nu. <sup>14</sup> Che abejntu guiraa recosre, colguiilru yäl̄sanälajz nani rusa' loj guiraa recosre. <sup>15</sup> Xcäl̄rbedxilajz Dios guinibee neñ lastootu, sa'csi parpac ni'c gurejdxni la'tu, te gaczatu tejsi con rexpejn̄ Jesucrist. Colgudeed xquixtios loj Dios.

<sup>16</sup> Xtidx Jesucrist chuduxh neñ lastootu con guiraa yäl̄najn, te guluiitu, te gulijdxtu tejga resa'tu con redij nani gulä'p toDavid xpala'n Dios, nájza redij nani rol̄tu, nájza redij nani rliä'p xpala'n Dios. Redijga gol̄nu te guideednu xquixtios lo Dios neñ lastoonu. <sup>17</sup> Guira'ti nani guntu, sigajc rediidx ni rniitu, sigajcza redzuun ni rujntu, colyejn̄ guiraani con laj Dad Jesucrist, coldeed xquixtios lo Dios xtadnu con laj Jesucrist.

#### *Xho nanab guibajn̄ te famil̄ ni najc xpejn̄ Jesucrist*

<sup>18</sup> Regunaa nani abachnaa, colgusoob xtidx chäältu sa'csi si'c rlanj Dad Jesucrist. <sup>19</sup> Reniguii nani abachnaa, colchanälajz chäältu, na'c guidxechnäjtireni. <sup>20</sup> Reni najc biuux, colgusoob xtidx xtadt loj guira'ti, sa'csi si'c rchagljaz Dad Jesucrist. <sup>21</sup> Reni najc Dad, na'c guche'chtu rexi'ntu, didi gac-huin lajzreni. <sup>22</sup> Reni najc mos, colgucuadijg xtidx xlamtu lo guedxliujre loj guira'ti xtzuumni. Na'c gunsa'ctu dzuun che cahuiitisreni si'c rujn renani ruspaa lajz bejntis. Con yälndolajz colyejn dzuun sa'csi sanälajztu Dios. <sup>23</sup> Guira'ti nani guntu, colyejnmi guideb lastootu si'c xtzuum Dios, et si'c xtzuumdi rebejntis. <sup>24</sup> Anajntu lo Dad Jesucrist sica'tu yäl'nasa'c ni najc yäl'nabajn par tejpas, sa'csi loj Dad Jesucrist rujntu dzuun. <sup>25</sup> Niluxh nani rujn recosguijdx, lagajc xcuent recosguijdxga gudeed Dios lojni, sa'csi tebloj rujn Dios guiraa rebejnguijdx.

## 4

<sup>1</sup> Renani najc lam, coldeed loj rexmostu nani riäjł xca'reni sa'csi anantu näjza la'tu rajptu xlamtu xhaguibaa.

<sup>2</sup> Colchanuu colnab lo Dios, colsusin che rniabtu lo Dios. Colgudeed xquixtios lo Dios. <sup>3</sup> Colnabza lo Dios con nuure te gacnäj Dios narä gusule'ä xtidx Jesucrist, te gusule'ä redidx-xhiga'tz xten Crist. Xcuent ni'cza yu'ä neñ latzguiib. <sup>4</sup> Colnab lo Dios te guyasi gusule'ä rediidxga si'cni riäjł guiniä.

<sup>5</sup> Colguibansin loj rebejn nani di gumbee xtidx Jesucrist, colgusule' diidx cheni riäjł guiniitu lojreni. <sup>6</sup> Rextiidxtu nanab gacni si'c rchagljaz Dios, saruduxhza gac xtiidxtu te gabeetu xho riäjł gudzu'tu diidx loj tejgareni.

### *Lult xtixtios*

<sup>7</sup> Tiquico, bejtznu ni sanälajznu, ni runsa'c dzuun, ni najc xmos Dad Jesucrist, laani gusule'ni diidx lojtu xcuent guiraa rextzunä. <sup>8</sup> Ruxhaläni lojtu te gacheepactu xho yu'ä, te guspaani lajztu. <sup>9</sup> Laani jädnäzani Onésimo nani najc te betznu ni sanälajznu. Laani najc tej resa'tu. Laareni gusule'zareni guira'ti nani cadeednu ree.

<sup>10</sup> Aristarco, nani yunäj narä neñ latzguiib, ruxhalni xtixtios lojtu näjza Marcw, betz prim xten Bernabé (abacuaä lojtu xcuentni, xho guntu, palga jädhuiini la'tu, sacru colhuiini). <sup>11</sup> Näjza Jesús nani laaza Justo, ruxhal xtixtios lojtu. Laatisreni najc rexpejn Israel nani cayacnäj loj dzuun xten xcäl'nibee Dios. Laareni ruspaa lazä. <sup>12</sup> Epafra, ni najc te sa'tu, ruxhal xtixtios lojtu, luxh rniabduxhni xcuenttu lo Dios te sudzu'tztu guntu guiragajc ni rlanj Dios guntu. <sup>13</sup> Narä rniliä xho rdzuun Epafra xcuent la'tu, näjza xcuent rebejn ni yu' guedx Laodicea, näjza guedx Hierápolis. <sup>14</sup> Lucas, doctoorn ni sanälajznu, näjza Demas ruxhalzareni xtixtios lojtu.

<sup>15</sup> Coldeed xtixtios loj rebejtznu nani yu' guedx Laodicea, näjza loj Ninfas, näjza lo rebejn nani re' rolijzni. <sup>16</sup> Cheni agulujx biltu guijszre, colguxhalni te jielni neñ guidoo xten guedx Laodicea, dxejcti colyelza guijsz nani baxhalä lo rebejn guedx Laodicea. <sup>17</sup> Colye'tz loj Arquipo: "Bahuisa'c xtzuum Dad Jesucrist nani cua'lu lojni. Bensa'c dzuunga."

<sup>18</sup> Lagajc narä Pabl rucuaä xtixtiosre con lagajc naä, con lagajc xleträ. Colgusnaj-lajztu narä yu'ä latzguiib. Gacnäj Dios la'tu. Sugacni si'c.



## Guijtz Ganid Lo Reben Tesalónica

### *Bacuaa Pabl con reexamigwni lo guidoo guedx Tesalónica*

<sup>1</sup> Narä, Pabl, näjza Silvan, näjza Timoteu cacuaanu guiijtzre lojtu, resa'nu ni yu' guidoo lo guedx Tesalónica, reni yu' lo Dios Xtadnu näjza lo Dad Jesucrist. Guspaa Dios näjza Jesucrist lajztu, guscuedxizareni lajztu.

### *Xho huililajz beñ Tesalónica xtidx Dios*

<sup>2</sup> Guet-guejt rdeednu xquixtios lo Dios xcuent guiraatu, rnaduxhza laaznu la'tu cheni rbejdx rniabnu lo Dios. <sup>3</sup> Ruzä'tnu lo Dios xtadnu xho rujntu dzuun sa'csi rililajztu xtidx Dios; näjza xho runduxhtu dzuun te racnäjtü sa'tu ni xhet rajpdi sa'csi rinälajztu Dios; näjza xho rutip lajztu cabäjztu guibi' Dad Jesucrist lo guedxliuj. <sup>4</sup> Bejtznu, racbeenu sanälajz Dios la'tu, laani aguleni la'tu. <sup>5</sup> Sa'csi che basule'nu xtidx Dios lojtu, et ganax diidxtis gujcn, niluxh xcälrnibee Sprit Dxan xten Dios nen lastootu bejn gucbeepactu diidx ni najc didxlii. Nanchesä'ctu xho gujcn che guyu'nu lojtu. Si'c baluiinu la'tu te guibañsa'ctu.

<sup>6</sup> Sigajcni nabañnäjnu Dad Jesucrist sigajcza gusloj cua'tu xmoodnu, basoobzatu diidx guideb xcälrbalajz Sprit Dxan xten Dios ni baniidxn lojtu, mase gudejdtu trabajw. <sup>7</sup> Si'c gujc te baluiitu loj guiraa reni rililajz nez Macedonia näjza nez Acaya xho nungäj] gac. <sup>8</sup> Ni'c abire'ch xtidx Dios, xhet nejzdi Macedonia näjza Acayatis, bire'chza diidx guira nejz. Ro'c najnreni xho sanälajztu Dios, ni'c xhetru nanabti guiniinu lojreni. <sup>9</sup> Alga lagajc laareni rujyreni diidx xho guyu'nu lojtu; nägajcza xho basaantu gojntu rebanäjb te rajntu Dios ni nabajnpac ni najc guliipac. <sup>10</sup> Rujyzareni diidx xho cabäjzzatu guibisac Jesucrist lo guedxliuj. Laazani najc Xi'n Dios ni guläs Dios lo rebengut, Jesucrist ni rusläa nuurnu lo xcälrdxe'ch Dios ni churu siääd.

## 2

### *Xhi bejn Pabl nen guedx Tesalónica*

<sup>1</sup> Naj lagajc la'tu najntu, bejtznu, et xlia'di bio'pnu lojtu. <sup>2</sup> Et najntu xho gudéreni loonu, basacsíreni nuurnu guedx Filipos. Niluxh mase gudejdnu trabajw, gusutijpnu lo Dios, xhet bidxejbtinu basule'nu xtidx Dios lojtu, mase gudejdnu trabajwduxh. <sup>3</sup> Sa'csi dinu nulijdx la'tu con didx-xhii, niclaza didx-dxuudx, niclaza diidx ni rusguee. <sup>4</sup> Sa'csi rsoobnu xtidx Dios basannäjni nuurnu xtiidxn, ni'c rusule'nu xtidx Dios. Dinu guinii diidx te jiansa'cnu lo bejn, rniinu diidx te jiansa'cnu lo Dios ni ruhuii lastoonu. <sup>5</sup> Anajntu xho basule'nu xtidx Dios. Nicla tej dinu ninii xhi stee diidx ni xhet sajcdi lojtu. Dizanu nusule' xtidx Dios te xhiga'tz niennu gaan xhi nica'nu. Dios nanchee xcuent ni riennu. <sup>6</sup> Dizanu nidiil guiliä'p bejn xpala'nnu, niclaza la'tu, niclaza chu stee bejn, mase nungäj] niennu niacheetu rajpnu yälrnibee sa'csi baxhal Jesucrist nuurnu. <sup>7</sup> Niluxh guc nadolajznu che guyu'nu lojtu, cuanäjnu la'tu si'c rcanäj te nañ rexpäzni. <sup>8</sup> Sa'csi huinälazduxhnu la'tu, biennu xhigab xhet ganaxdi xtidx Dios guiniidxn lojtu, näjza lagajc xaimnu guniidxn te guseednu la'tu xtidx Dios sa'csi sanälazduxhnu la'tu. <sup>9</sup> Bejtznu, la'tu rnalajztu xho biennu dzuun te biennu gaan xcäl'nabaannu. Biennu dzuun dxej-yääl, te di niednäjtü nuurnu la] ni basule'nu xtidx Dios lojtu.

<sup>10</sup> Lagajc la'tu nancheetu, sigajc nanchee Dios, laaca biennu che guyu'nu lojtu: gujcn bejn ni randuxh Dios, gujcnu beñdxojn, gujcnu beñsa'c. <sup>11</sup> Anajntu xho baliidxn la'tu, xho bascuedxinu lajztu si'c runnäj te dad rexingaanni. <sup>12</sup> Guiraa dee biennu, te guibañsa'ctu si'c nungäj] gun reni najc xi'n Dios, lagajc Dios ni gurejdx la'tu te chunäjtni lo xcälrnibeeni näjza lo xcälrdimbicha'ni.



<sup>13</sup> Ni'cni rdedduhnu xquixtios lo Dios sa'csi che biejn diajgtu xtidx Dios ni basule'nu lojtu, cua'tuni si'c xtidx Dios xhet si'c xtiidxi beñ guedxliuj. Niluxh guli xtidx Diosni, sa'csi rusiani lastoo renani rililajz. <sup>14</sup> Bejtznu, dxejcti bejntu lagajc si'c rujn rebejn xquidoo Dios neñ reguedx Judea reni najc xpeñ Jesucrist; luxh gusajctu lagajc ni gusajcreni, basacsí reben lajdxtu la'tu. Sigajcza birinajl rexpen Israelreni. <sup>15</sup> Rexpen Israel bagu't Dad Jesucrist, si'cza bagu'treni lagajc rexprofe'treni, renani bacuaa xtidx Dios, barilaagwzareni nuurnu. Direni chanälajz Dios, dizareni gusaan chanajl rebejn Jesucrist. <sup>16</sup> Che rlanjnu gulijdxnu reni digac rexpen Israel, te najza laareni laareni lo dojl, direni gusaan, si'ctis cagutajlreni xtojreni. Niluxh naj abiäädpac yälrdxe'ch xten Dios vejcreni.

### *Rlajz Pabl nihuisacni ro'c*

<sup>17</sup> Bejtznu, mase biriinu ro'c, naj dirunu guihuii lojtu, rnalazduhnu la'tu, batijp lajznu jio'pnu ro'c, rlazduhnu fisacnu lojtu. <sup>18</sup> Rlajznu nio'pnu, narä, Pabl xhidal huält rlazä niälä, niluxh beñdxab di nusaan. <sup>19</sup> ¿Xhini'c najc xcälrbääznu, xcälrbalajznu, xcälracnaronu? Lagajc la'tu gactuni che suunu nez loj Jesucrist che jiädsac Dad Jesucrist. <sup>20</sup> La'tu najc ni ruspaalajznu ni rliä'pza xpala'nnu nez lo Dios.

## 3

<sup>1</sup> Dxejc, che dirunu nutijp lajznu, biennu xhigab bianxtebä guedx Atenas. <sup>2</sup> Dxejc baxhalä Timoteu, bejtznu nez loj Jesucrist, te biädhuini la'tu, sa'csi laani najcni te xpeñ Dios ni runnäj nuurnu dzuun, rniini xtidx Jesucrist, te guscuedxini lajztu, guzudzu'tzni xcälrlililajztu. <sup>3</sup> Te nicla tejtü di guidxejb che jiääd reyälhuin sa'csi la'tu anajntu agule Dios nuurnu ni'c sidejdnu trabajw. <sup>4</sup> Cheni yusijcnu lojtu, rnixgaanu lojtu sidejdnu trabajw; niluxh si'cni agusojb diidxga naj. <sup>5</sup> Ni'cni diruna nutiplazä, baxhalä chu jiädnä diidx xho najc xcälrlililajztu, sa'csi cadxebä andi abasguee beñdxab la'tu, luxh xlia'si biennu dzuun guyu'nu lojtu.

<sup>6</sup> Naj agubi' Timoteu, biädhuini la'tu. Biadnäni ganax didxlii xho sanuu rililajztu xtidx Jesucrist, xho rinälajztuni, najza sanuutis rnalajztu nuurnu, rlanjzatu fiitu loonu, sigajcza nuurnu rlanjznu fiinu lojtu. <sup>7</sup> Ni'cni, betznu, masä riäädx xhixtennu, masä rdeednu trabajw, rbalajznu sa'csi la'tu sanuutis rililajztu xtidx Dios. <sup>8</sup> Naj laaca rdxunnu sa'csi racbeenu sudzu'tztu nez loj xtidx Dad Jesucrist. <sup>9</sup> Xhocha gac guideednu xquixtios lo Dios xcuent guiraatu näj xcuent yälrbalajz ni yu' lastoonu xcuent la'tu nez lo Dios. <sup>10</sup> Dxejyäl rniabnu lo Dios gusaanni jiophuiinu la'tu te gusa'nu guiraa rediidx ni cayäädx gacheetu xcuent xcälrlililajztu.

<sup>11</sup> Rniabnu lo Xtdanu Dios, najza lo Dad Jesucrist, gacnäjreni nuurnu te gac jiophuiinu la'tu. <sup>12</sup> Rniabzanu lo Dad Jesucrist, gunni gustiobruni lastootu te ga'prutu yälrinälajz loj resa'tu najza loj guiraa rebejn, si'cni rinälajznu la'tu, <sup>13</sup> te gunni sudzu'tz lastootu, na'c ga'ptu dojl nez lo Xtdanu Dios, che jiääd Jesucrist najza guiraa rexpejñni xhaguibaali.

## 4

### *Guibajñnu si'c rchaglajz Dios*

<sup>1</sup> Naj, rebejtznu, rniabduhnu lojtu, rulijdxnu la'tu con laj Dad Jesucrist, guibajntu si'cni baluiinu la'tu nungäj l guibajntu te guspaatu lajz Dios, te si'c chanuutis guibañsa'ctu nez lo Dios.

<sup>2</sup> La'tu, anajntu rediidx ni baluiinu lojtu con xcälrnibee Dad Jesucrist. <sup>3</sup> Lagajc Dios rlanjz nayatis guibañsa'ctu, na'c gun niguii dojl guesnäj gunaa ni di gac chäälni, sigajcza na'c guesnäj gunaa niguii ni di gac chäälni. <sup>4</sup> Tejgatu gantu xho guibañajtu chäältu nayatis najza xpala'nni. <sup>5</sup> Xhet si'c ni rujndi regunadxab najza reniguii, nicla si'c ni rujn rebejn ni di gumbee Dios. <sup>6</sup> Rut chutejditu gusguee bejtzni lo redzunguijdxre, sa'csi Dios susacsí guiraa rebejn ni rujnza redojlre, ni'cni abiniinu lojtu, agunixgaanu

diidxre lojtu. <sup>7</sup> Sa'csi Dios gurejdxni nuurnu te guibajñnu lo yäl'nabannaya xtenni, xhet lo yäl'nabandxuudxdi. <sup>8</sup> Ni'cni bejn ni di gucuadiajg rediidxre, dini gac xtiidx te bejn ni dini cuadiajg, xtiidxpac Dios ni dini cuadiajg, Dios nani abaniidx Sprit Dxan xtenni loonu.

<sup>9</sup> Ditu guiquiin gucuaäru diidx xho chanälajztu resa'tu, sa'csi lagajc Dios abaluiitu xho chanälajztu resa'tu. <sup>10</sup> Luxh rinälajztu guiraa reni rililajz, guiraa reni siäd guideb nez Macedonia. Ni'cni rniabnu lojtu bejtznu, chä'pru xcäl'rinälajztu. <sup>11</sup> Colgutijp lajztu, dxitis colguibajñ, coljiu xtzuncatu, lagajc naatu colyejn dzuun si'cni agunibeenu guntu. <sup>12</sup> Te fii rebejn ni di chalilajz laaca nabansa'ctu, nägajcza te xhet jiäädxdi xhi rquiintu.

### *Xho gac che jiädsac Jesucrist lo guedxliuj*

<sup>13</sup> Bejtznu, rlanjznu gacheetu xcuent rebengut te di gac-huin lajztu si'c rujn rebejn ni di chalilajz xtidx Dios. <sup>14</sup> Si'c ni rililajznu gujt Jesucrist, dxejc gubansacni, sigajcza rililajznu suspañsac Dios guiraa reni nagayejs neñ baa, renani huililajz xtidx Jesucrist. Luxh che guibi' Jesucrist, siädnänireni.

<sup>15</sup> Xcuent xcäl'rnibee Jesucrist rniä lojtu, nuurnu ni nabajñnu che jiädsac Jesucrist, dinu nid lojreni nagayejs neñ baa. <sup>16</sup> Sa'csi lagajc Dad Jesucrist siäjt lo guedxliujre, sibedxa'ni, siejnza xse' guixhajg ni rnibee, sibedxa'za trompet xten Dios. Dxejc sibaxgaa reni nagayejs neñ baa, reni huililajz xtidx Crist. <sup>17</sup> Dxejc nuure ni nabansijcnu sidxaagnureni neñ rebäj te lo bej chachagloonu Dad. Si'c chonnu cholaznäjñuni par tejpas. <sup>18</sup> Ni'cni rniä lojtu, colcuedxilajz sa'tu con rediidxre.

## 5

<sup>1</sup> Niluxh xcuent redxejga, reijzga, xhet riquiinditu gucuaäni lojtu, <sup>2</sup> sa'csi la'tu anansa'ctu sidzujñ dxej ni jiäd Jesucrist cheni rut cayunlojdini, sigajc che riäd te gubaan yääl. <sup>3</sup> Che canii bejn: “laaca dxunnu, dxunsa'cnu”, chela gacheereni acadejdreni trabajw si'c che rdzujñ yäl'nayan te gunaa che rajl xi'nni, luxh digacdi guxunreni lojni. <sup>4</sup> Niluxh bejtznu, di gac nayäältu te di che xhet cayunlojditu dxej xten Jesucrist, guidzunxhiga'tz dxejga si'c gubaan. <sup>5</sup> Sa'csi guiraatu najctu bensa'c nabajñtu lo bianij, lo rdxee, dinu gac beñguijdx, dinu guibajñ lo yääl, lo yälrcäy. <sup>6</sup> Ni'cni di nungäjñ guidiesnu si'c rejs stecuaa bejn, ni'cni nungäjñ sunasiñnu na'cza jiennu redojl ni rlanjz tiejxhnu. <sup>7</sup> Reni rejs, rejsreni yääl, reni rsiojz, rsiojzreni yääl. <sup>8</sup> Niluxh nuure nabajñnu lo rdxee, ni'cni nanab na'c jiennu si'c, riäjñ xca'nu yäl'rililajz näjza yäl'rinälajz si'c rca' soldaad gamangw guib ni rajcwni, ni rusäuu lastooni. Riäjñza guiläzdzu'tznu sa'csi yäl'rusläa lo dojl najc si'c xhumbrel-guib ni ru' yejc soldaad ni rusäuu yejñi. <sup>9</sup> Sa'csi di Dios nibe nuurnu te chonnu gabijñ, alga guleni nuurnu te xca'nu yäl'nabajñ ni rudeed xi'nni, Jesucrist. <sup>10</sup> Sa'csi gujt Jesucrist lacuaa nuurnu, te guibannäjñuni masä nabajñnu lo guedxliujre o nagayejsnu neñ baa che guibi'ni. <sup>11</sup> Ni'cni, colguspaa lajz sa'tu, tejtü sigajcza steetu, sigajcni cayujñtu naj.

### *Rulijdx Pabl resa'ni*

<sup>12</sup> Bejtznu, rniabduxhnu lojtu, colhuiduxh reni ruluii xtidx Dios lojtu, sa'csi agule'c Dadreni te guinibeereni, te gulijdxreni la'tu. <sup>13</sup> Riäjñza chanälazduxhtureni xcuent dzuun ni rujñreni. Colcuedxi con resa'tu.

<sup>14</sup> Rulijdxnu la'tu, bejtznu, colgulijdx reni najc beñlatsiaj; colsudzu'tz lajz reni guxii rbalajz lo xnez Dios; colgacnäj reni di gumbesa'c xtidx Dios, colcuedxi lajz guiraasi bejn.

<sup>15</sup> Colhuii di chu tejtü gunza dolguijdx lo rebejn ni rujñ dolguijdx. Laaca guntu ganax dzunsa'c lo sa'tu, sigajcza lo chutis bejn.

<sup>16</sup> Colguibalajztis guideb nabajñtu. <sup>17</sup> Na'c cuäaz guiniitu lo Dios. <sup>18</sup> Mase xhitis rsiajctü, coldeed xquixtios lo Dios, sa'csi si'c rlanjz Dios gun reni rililajz Jesucrist.

<sup>19</sup> Di cuälaztu xtidx Sprit Dxan xten Dios ni rniini nen lastootu. <sup>20</sup> Na'c cuälaztu xtidx reni rnii xtidx Dios xcuent nani churu gac. <sup>21</sup> Colquiil guiraa rediidx, coljiannäjtis rediidx ni najc didxsa'c. <sup>22</sup> Colbicaj lo guiralii dolguijdx.

<sup>23</sup> Lagajc Dios, Dios ni rbecdxi lajztu, gusiapac lastootu, te cucheeni xaimtu, näj lastootu, näjza tiejxhtu, te na'c guntu dojl ni di riäjl guntu te cuääztu dxej ni guibisac Dad Jesucrist. <sup>24</sup> Dad ni gurejdx la'tu rujnza guiraa ni rniini, ni'c sujnzani guiraa redzuunre.

*Ruzadiidxnireni*

<sup>25</sup> Bejtznu, colnab lo Dios xcuent nuurnu.

<sup>26</sup> Colgudeed xtixtios lo rebejtznu ni yu' ro'c.

<sup>27</sup> Con laj Dad Jesucrist rnibeä, gołtu guijszre loj guiraa rebejtznu.

<sup>28</sup> Gacnäj Dad Jesucrist la'tu. Sugacni si'c.

## Guijtz Ni Rojp Lo Reben Tesalónica

### *Rucuaanu guiitzre lojtu, rexpē Jesucrist ni rbäz guedx Tesalónica*

<sup>1</sup> Narä Pabl, näjza Silvan näjza Timoteu, cacuaanu guiitzre lojtu, rebejtznu ni yu' guidoo lo guedx Tesalónica, reni yu' lo Dios Xtadnu näjza lo Dad Jesucrist. <sup>2</sup> Gacnäj Dios Xtadnu näj Dad Jesucrist la'tu, guscuedxizareni lajztu.

### *Gun Dios yälguxhtis loj rebendojl che guibi' Jesucrist lo guedxliuj*

<sup>3</sup> Bejtznu, rudeednu xquixtios lo Dios xcuentu, si'c riäjl jiennuni, sa'csi xcälrlilajztu siädroobru, näjza yälrinälajz ni rajp tejgatu näjza sa'tu siädroobruni. <sup>4</sup> Ni'cni rliä'pnu xpala'ntu nen reguidoo xten Dios. Rbaa lajznu sa'csi rsiudzu'tztu sanuutis rililajztu xtidx Dios mase rdejdtu trabajw, rusacsí bejntu. <sup>5</sup> Dee ruluiipac xcälguxhtis Dios najc laaca, ni'c rnii Dios riäjl jiu'tu lo xcälrnibeeni sa'csi cadejdtu trabajw xcuent yälrnibeega.

<sup>6</sup> Sa'csi rujn Dios xhigab riäjlza quix reni bateedtu trabajw xtojreni, ni'c suteedzani reni'c trabajw. <sup>7</sup> Niluxh la'tu ni cadejdtu trabajw, sujn Dios gusilaznäjtü nuure che guluiiloj Jesucrist, siriini xhaguibaa siädnäjni rexanglni ni sajc, ni rnibeduxh. <sup>8</sup> Lo te balduxh siädni, dxejc guisloj susacsíduxhni reni di gan Dios, dizareni gusoob xtidx Dad Jesucrist nani rudzucaj dojl. <sup>9</sup> Guiraareni sidejdreni trabajw, par tejpas agunijtreni, zijt chureni lo Dios, lo yälrdimbicha' xten xcälrnibeeni. <sup>10</sup> Che jiäd Dad guiriini xhaguibaa, dxejga siliä'p rexpejnri xpala'nni, sidxelojza renani huililajz laani näjza la'tu, sa'csi huililajztu diidx ni basule'nu che guyu'nu lojtu.

<sup>11</sup> Ni'c rniabtisnu lo Dios por la'tu, rniabnu lo Dios guinaj lajzni nabajntu si'c riäjl guibajn reni guleni. Rniabzanu guniidx Dios lojtu guntu guiraa redzunsac ni rchaglajz Dios guntu, gacnäjzani la'tu con xcälrnibeeni te guntu redzuun ni rujntu sa'csi rililajztu. <sup>12</sup> Te chä'p xpala'n laj Dad Jesucrist si'cni nabajntu, te laani guiliä'pzani xpala'ntu, xcuent yälrinälajz xten Dios näjza Dad Jesucrist.

## 2

### *Bendolduxh*

<sup>1</sup> Naj, rniabduxhnu lojtu bejtznu, xcuent dxej ni jiäd Jesucrist, dxej ni guidojpzanu lojni, <sup>2</sup> na'c chugajtu yarsia'. Na'cza gusaantu guchejbreni la'tu con diidx ni ruluii te bejn ni najc profe't, nicla con diidx ni rnii stee bejn lojtu, niclaza con diidx ni naareni lojtu caj loj te guiitz ni naareni baxhalnu lojtu, cadre caj "dxej ni guibi' Jesucrist abidzujn". <sup>3</sup> Na'c gusaantu gusguee bejn la'tu xcuent rediidxre. Che gajd dxejga guidzujn, su' bejn ni sibälaz xtidx Dios, dxejc suluiloj benlatsiaduxh, xi'n nani sinitloj par tejpas. <sup>4</sup> Bejnre siliä'p lagajc xpala'nni, sidxe'chni lo guiraa ni sanä laj Dios, näjza xhitis ni rajn bejn, te cueni nen xquidoo Dios, guluilojni si'c lagajc Gueb Dios.

<sup>5</sup> ¿La di lajztu guisaj cheni guyusicä lojtu, rniä rediidxre lojtu, ä? <sup>6</sup> Naj la'tu anajntu xhini'c ruscuääzni, te na'c guiricajni ansde guisa' redxej xteni. <sup>7</sup> Te yälxhiga'tz najc dzunlatsiaj ni alacayajc lo guedxliuj, cayäädxtis guibicaj nani caguscuääzni galäiini. <sup>8</sup> Dxejc suluiloj benlatsiaduxhre. Niluxh Dad Jesucrist, sugu'tnini con bero'ni, che guibi' Jesucrist lo guedxliuj xpianijni sujn nitlojni. <sup>9</sup> Benlatsiaduxhre najc si'cpac najc bendxab. Che guidzujnni, guidzujnni si'c te bejn nani rnibee, sujnni seen, sujnzani milagrw ni rusguee. <sup>10</sup> Con xcällatsiaj bejnre susgueeni guiraa renani alagunijt lo Dios sa'csi direni nicäjb ninälajzreni didxlii ni nuslaareni nen dojl. <sup>11</sup> Ni'cni susaan Dios jiäd te yälrusgueduxh te chalilajzreni didx-xhii. <sup>12</sup> Te gabijl jii guiraa renani di nicäjb nililajz didxlii, alga bidxaglajzreni yällatsiaj.

### *Reni gule Dios guirii nen dojl*

<sup>13</sup> Niluxh nuurnu riäj̄l gudeedtisnu xquixhtios lo Dios por la'tu, bejtznu, ni sanälajz Dad Jesucrist. Rudeednu xquixhtios sa'csi galooli gule Dios la'tu te guslaani la'tu lo dojl̄, xcuent Xsprit Dxanni ni rusia lastootu, näjza redidxlii ni huililajztu. <sup>14</sup> Ni'cni che biejn diajgtu diidx ni basule'nu lojtu, gurejdx Dios la'tu, te xca'zatu xcälrdimbicha' Jesucrist.

<sup>15</sup> Naj bejtznu, colchanuu, colsudzu'tz, na'cza jiällajztu rediidx ni baliidxnu la'tu che guyu'nu ro'c, näjza rediidx ni bacuaanu lo guijtz ni baxhalnu lojtu. <sup>16</sup> Lagajc Dad Jesucrist, näj Dios Xtradnu, ni sanälajz nuurnu, ni ruscäjñ lajznu par tejpas, ni baniidx xcälrbääznu racnäjni nuunu, <sup>17</sup> guspaani lajztu, gusudzu'tzni la'tu lo guiraa redidxsa'c ni guiniitu näjza redzuunsa'c ni guntu.

### 3

#### *Colnab lo Dios xcuent nuurnu*

<sup>1</sup> Bejtznu, colnab lo Dios xcuent nuurnu te chanuu guire'ch xtidx Dad Jesucrist, te che gusoob bejn̄ diidxga chä'p xpala'n diidxga, sigajcni gujçni con la'tu. <sup>2</sup> Colnabza lo Dios xcanäjñi nuurnu te di tednu ladzn̄aa rebenlatsiaj, reben̄guijdx, sa'csi xhet guiraadi bejn̄ rajp yäl̄rililajz. <sup>3</sup> Dios rusooob xtiidxni, susudzu'tzni la'tu, sacnäjzani la'tu te di sactu dol̄guijdx. <sup>4</sup> Abascuedxi Dios lastoonu xcuenttu sa'csi anancheenu cayujntu guira'ti nani gunibeenu guntu, luxh si'cza sinuu gusoobtu xtiidxnu. <sup>5</sup> Canabä lo Dad Jesucrist guniidxni gacbeerutu xcäl̄sanälajz Dios, canabäza col̄cuedxi lajztu si'cni bejn̄ Crist che gudejdni trabajw.

#### *Nanab jiennu dzuun*

<sup>6</sup> Bejtznu, con laj Xtrad Jesucristnu, rnibeenu guibicajtu lo chutis te sa'nu ni ricanzajtis, ni di rlajz gunni dzuun. Guibicajzatu loj reni di guibajñ si'cni baluiinu riäj̄l guibajñtu. <sup>7</sup> La'tu anajntu xho riäj̄l guibajñtu, chanuutu guntu si'cni riennu nuure. Najntu nuurnu dinu nicanzaj che guyu'nu lojtu sa'csi biennu dzuun. <sup>8</sup> Dizanu nidauxlia' xcu'n chu tejtü; guiraani bidiixnu, biennu dzuun dxej-yääl, te di nutaalnu xtzuun chu tejtü. <sup>9</sup> Masä nungäj̄l niniabnu niacnäjtü nuurnu, dinu niniabni; alga biennu dzuun te baluiinu xho chanuutu. <sup>10</sup> Cheni guyu'nu lojtu, gunibeenu scree guntu: Chutis ni di rlajz gun dzuun di riäj̄l xca'ni xhi gauni. <sup>11</sup> Aguniireni loonu baltitu ricanzajtis, direni gun dzuun, alga rihuiireni xhi cayujñ rebejn̄. <sup>12</sup> Rulijdxnu rebejn̄re, rnibeenureni con laj Xtrad Jesucristnu: col̄cuedxi, col̄yejn̄ dzuun te gautu.

<sup>13</sup> Bejtznu, na'c guidxajgtu guntu dzunsa'c. <sup>14</sup> Palga yu' chu tejtü di gucua diajg xtiidxnu ni caj lo guijtzre, col̄huii chuni'cni te na'c guchaagtuni, te guitujyni. <sup>15</sup> Niluxh na'c ga'ptuni si'c ni rdxe'ch lojtu, col̄guliidxni si'c bejtztu.

#### *Rusadiidxnireni*

<sup>16</sup> Gueb Dios xten yäl̄rbedxi, guscuedxi lajztu guixe-guixee, masä xhitis sajctü. Jiannäj Dad Jesucrist guiraatu.

<sup>17</sup> Narä, Pabl cacuaä xtiixiosre con ñaäpac si'c runä lo guiraa rexquitzä, scree rucuaä. <sup>18</sup> Gacnäj Xtrad Jesucrist guiragajctü. Sugacni si'c.



## Guijtz Ganid Lo Timoteu

### *Pabl rucuaa te guijtz lo Timoteu*

<sup>1</sup> Narä Pabl, nacä te apost xten Jesucrist, rucuaä guiitzre lojlu. Nacä apost sa'csi si'c gunibee Dios ni rusläa nuurnu lo dojl̄ näjza Dad Jesucrist nani cholääznu. <sup>2</sup> Timoteu, luj najclu si'cpac xinganä lo yäl̄rililajz. Xtradnu Dios näjza Xtrad Jesucristnu gacnäjl̄u, gulaslajzreni luj, guscuedxireni lastoolu.

### *Pabl rulijdx xcuent reni ruluii diidx-xhii*

<sup>3</sup> Che sia'ä reguedx Macedonia, gunibeä jia'nlu guedx Éfeso te gulijdxlu gaii bejn̄ te na'c guluiireni garenca diidx, <sup>4</sup> te na'c jiutejreni rexcuent rebeñtiemp, te na'cza jiuduxhreni chu gujc rexpengoldooreni, sa'csi di rediidxre gacnäj guiroobru lastooreni si'c rustioob yäl̄rililajz lastoonu. Naj rnibeä si'c chanuu gulijdxlu rebejn̄.

<sup>5</sup> Rulijdxnu bejn̄ te ga'preni yäl̄rinälajz sa'reni. Ganid nanab gacnaya lastooreni, nanab ga'preni xhigabsa'c, nanabza chalilajzpacreni. <sup>6</sup> Yu'reni abaro'n rediidxre, rieyjtis ro'reni saniduxhreni diidx ni xhet sajcdi. <sup>7</sup> Rlajzreni gacreni bejn̄ ni najn leii, niluxh niclaza laareni direni gacbee xhi säloj ni rniireni, niclaza xhi säloj rediidx ni ruluiireni, räjpreni, 'didxliipac dee'.

<sup>8</sup> Anajnnu leii xten Dios najc sacduxhni, palga jiennu si'cni rniipacni. <sup>9</sup> Najnnu di leii gac par beñsa'c, najcni par reni najc beñlatsiaj ni di jiu leii xten Dios, näjza reni di gusoob diidx; par rebeñ̄ guijdx, näjza rebeñ̄dojl̄; par reni di jiu Dios, näjza reni rusguee; par reni rugu't xtradni, xnanni, näjza guiraa reni rugu't bejn̄; <sup>10</sup> par reni resnäj te gunaa ni digac chäälreni, näjza reni resnäj lagajc saniguiireni; par reni rbajn̄ bejn̄; reni rnii didx-xhii; reni rnii didx-xhii si'c didxle' parsi rusguee sa'reni; näjza bejn̄ ni rujn̄ xhitis xhi xtee dzuun ni digac dzunsa'c, <sup>11</sup> nalajznu sa' redzunsa'c ni rulijdx xtidx Dios-le', diidx ni rusläa lo dojl̄. Narä biannä diidxre.

### *Rudeedni xquixtios lo Dios sa'csi rulaslajznini*

<sup>12</sup> Rdedä xquixtios lo Dad Jesucrist ni runiidx yäl̄rnibee narä sa'csi najnni nasob-didxä, ni'cni guleni narä gunä xtzuunni. <sup>13</sup> Luxh galoo guniyaäni, birinalä xpejn̄ni, basacsä'reni. Niluxh Dios balaslajz narä, sa'csi dina niacbeä xhini'c cayunä, sa'csi gajdna chalilazä. <sup>14</sup> Niluxh lacti guroob gujc yäl̄racnäj xte Xtradnu, guideb yäl̄rililajz, näj yäl̄sanälajz ni rajp Jesucrist.

<sup>15</sup> Diidxre najc guliduxh, nanab chalilajzpacuni: Jesucrist biääd lo guedxliujre te gusläani rebeñ̄ dojl̄; lo rebeñ̄ dojl̄ narä nacäru beñ̄dojlduxh. <sup>16</sup> Ni'cni balaslajz Dios narä, mase nacä beñ̄dojlduxh lo guiraareni, te ganid con narä guluiini xho rbäjz Jesucrist te chalilajz bejn̄ xtiidxni, te filoj reni churu chalilajz xtiidxni te ga'preni yäl̄nabajn̄ par tejpas. <sup>17</sup> Dios najc reii, reii ni di guet, reii ni di guzen, laatisni najc Gueb Dios ni nanduxh, ni'cni colgüiliä'p xpala'nni, colgajnni guideb guibajn̄tu näjza par tejpas. Si'c gacni.

<sup>18</sup> Xi'nä, Timoteu, dee najc yäl̄rulijdx ni runidxä lojlu te gucuaasa'clu si'c te soldaad ni abisieed, sigajc ni gunii reprofet̄ xcuentlu galoo. <sup>19</sup> Di gunijtl̄u yäl̄rililajz, bejnza xhigabsa'c, sa'csi yu'reni abaro'n xtidx Dios, ni'c abanijtreni yäl̄rililajz. <sup>20</sup> Si'c gusajc Himeneo näj Alejandro, luxh abatedäreni ladzñaa beñ̄dxab te guisieedreni na'c guiniya'reni Dios.

## 2

### *Ruluiini xho guiniabreni lo Dios*

<sup>1</sup> Rulidxälu ganiddoo cuedxlu, guiniablu lo Dios, gudeedlu xquixtios lo Dios xcuent guiraa rebejn̄. <sup>2</sup> Guiniabzalu xcuent rereii näj guiraa reni rnibee lo guedxliujre, te gac

guibaḅxinu, te gac chanuunu xnez Dios, te saru guibajḅnu. <sup>3</sup> Sa' yälriabga najc laaca, luxh si'c rdxaglaḅ Dios ni ruslaa nuru lo doḅḅ guiniabnu lojni. <sup>4</sup> Dios rlaḅḅ laa guiraa beḅḅ lo doḅḅ, rlaḅḅzani gacbeepacreni xtidxliini. <sup>5</sup> Yu' tejtis Dios, näḅḅa tejtisza nani rusiälḅ diidx lo Dios näḅḅa loḅ rebeḅḅ guedxliuj. Laani najc Jesucrist ni gujca niguii. <sup>6</sup> Jesucrist gujt lo cruḅḅ te gudixni redoḅḅ xten guiraanu ni tre' lo guedxliuj. Dee guj che goḅḅ dxeḅ ni gule Dios. <sup>7</sup> Dios gule narä te gacä apost te gusule'ä xtiidxni, yälriilajḅ näḅḅa didxlii lo reni di gac xpeḅḅ Israel. Si'c ni rlaḅḅ Jesucrist rniä didxlii, dina guiniä diidx ni rusguee.

<sup>8</sup> Ni'cni rlaḅḅä guiraatis laḅḅ guiniab rebeḅḅ lo Dios, saru guiliäs ḅaareni, gusaanreni yälrdxe'ch, na'c gunreni bieḅḅ. <sup>9</sup> Si'cza regunaa, saru gacwreni xhajibreni, na'c gacreni gunaroxhi, cuedxireni. Xhet si'c di regunaa ni entis rsiucheduxh con oor o perl o ladsajc, rajc guichniil yejcn i te guidxeloḅ beḅḅreni. <sup>10</sup> Masru rucaag gunreni si'cni rchalglajḅ Dios, si'c riälḅḅ gun guiraa regunaa ni yu' lo Dios. <sup>11</sup> Riälḅḅ dxitis gucuadiaḅḅ regunaa xtidx Dios ni rusule' reniguii. <sup>12</sup> Dina xcäbä gusule' te gunaa diidx lo guiraa rebeḅḅ, niclaḅa guinibeeni lo reniguii, dxitis cueni lo rebeḅḅ ni cagucuadiaḅḅ diidx nani cagusule'ni. <sup>13</sup> Sa'csi ganid benchee Dios Adán, dxejctiru bencheeni Eva. <sup>14</sup> Luxh et Adandi basguee beḅḅxab, beḅḅxab basguee gunaaga, dxejc biaḅḅni neḅḅ doḅḅ. <sup>15</sup> Niluxh siliaa regunaa, palga ḅiureni xtzuunreni si'c nan, palga chanuu chalilajḅreni xtidx Dios, palga chanälajḅreni sa'reni, palga chutisreni lo Dios, gaczaren i gunasa'c cuedxireni.

### 3

#### *Xho riälḅḅ gac reni rnibee*

<sup>1</sup> Dee najc didx gulii: palga rlaḅḅ te niguii ga'p dzuun xten Dios, gusule'ni xtidx Dios, guinibeeni rebeḅḅ, te dzunsa'c najc ni rlaḅḅzani gunni. <sup>2</sup> Ni'cni, ni rlaḅḅ gac nani rnibee, riälḅḅ guibaḅsa'cni te na'c chu xhicuent guiniyaj rebeḅḅni. Riälḅḅ gacni chääl tejtis gunaa, riälḅḅ susiḅḅni, gacni te beḅḅsa'c, cuedxini, te guibaḅsa'cni. Riälḅḅza di gudxoḅḅni rolijzani guidzujḅ beḅḅ, näḅḅajc riälḅḅ gacni te beḅḅ ni nansa'c te guluiini. <sup>3</sup> Na'c gacni te beḅḅ, nicla te ni rdxagdijl beḅḅ, na'cza gacni te nani rsia' laḅḅzani ga'pni xhidajl meel, riälḅḅ cuedxi laḅḅzani, na'c chanälajḅzani meel. <sup>4</sup> Riälḅḅ guinibesa'cni rolijzani, saru gunni te gusoob rexi'nni xtiidxni. <sup>5</sup> Sa'csi palga di te beḅḅ gan xho guinibeeni laḅḅajc rolijzani, aticaxh gac ga'pni guidoo xten Dios. <sup>6</sup> Di riälḅḅ guinibee te beḅḅcoob nani entis huililajḅ, te di guschä'pni xpala'nni sas ḅiaḅḅni lo laḅḅajc xcälḅḅaj Dios ni biaḅḅ beḅḅxab. <sup>7</sup> Luxh riälḅḅza guinii reni di chalilajḅ xtidx Dios laaca najcni, te na'c ḅianxtujyini, te na'cza ḅiaḅḅni ladzḅḅaa beḅḅxab.

#### *Xho riälḅḅ gac reni rcanäj neḅḅ guidoo*

<sup>8</sup> Si'cza rediaconos riälḅḅ gacreni beḅḅ ni yu' xcärieḅḅreni, nanab gunreni si'cpac ni rniireni, na'cza soozreni, na'c xca'reni meel ni direni niunsa'c gaan. <sup>9</sup> Riälḅḅ gapdzu'tzani rediidx nagajḅ xten yälriilajḅ, ni'c nanab gac naya lastooreni. <sup>10</sup> Riälḅḅ fixgaatu xho nabajḅreni. Palga nabāḅsa'creni, rutza gacdi gucuajḅdireni, sajc gacreni diacono. <sup>11</sup> Regunaa ni rlaḅḅ gac diaconos riälḅḅza chu xcärieḅḅreni, na'c güireni diidx ni di gucaag, na'c soozreni, gacreni gunasa'c, cuedxireni, gunreni si'cpac ni rniireni lo guira'ti dzuun. <sup>12</sup> Riälḅḅ gac rediacono chääl tejtis gunaa. Riälḅḅ guinibesa'cni rexi'nni näḅḅ guiraa reni yu' rolijzani. <sup>13</sup> Sa'csi rediaconos ni runsa'c xtzuunni, sanälajḅ beḅḅreni, dizareni guidxeḅḅ rsiudzu'tz lastooreni lo xcälriilajḅ xtidx Jesucrist.

#### *Gurobduxh najc yälxhiga'tz xten Jesucrist*

<sup>14</sup> Cacuaä diidxre loḅḅ, niluxh rlaḅḅä ḅiädhugaä la'tu. <sup>15</sup> Luxh palga gaclaä, anajḅḅlu xho riälḅḅ guibajḅ beḅḅ rolijz Dios, nalajḅḅnu xquidoo Gueb Dios ni nabajḅḅ par teḅḅpas. Guidoore rniasdzu'tz näḅḅa ruluiiru didxlii xten Dios. <sup>16</sup> Rdxeloyaduxh guiralii beḅḅ yälxhiga'tz xten xcälḅḅajḅ Dios:

Dios biääd lo guedxliuj si'c te beḅḅguedxliuj,  
Sprit Dxaḅ xten Dios gunii beḅḅxanni;

bahuii rexangl Dios lojni;  
 basule'reni xtiidxni lo rebejn ni di gac xpejn Israel;  
 guira lajt huililajz bejn xtiidxni;  
 huäjsni lo xcälrdimbicha' Dios xhaguibaa.

## 4

### *Reni rbicaj lo xnezyuj Dios*

<sup>1</sup> Aguniipac Sprit Dxan siääd redxej che chu reni guro'n yälrlilajz, sucuadiajgreni xtidx rebejn ni rusguee näj xtidx rebeñdxab, <sup>2</sup> nicla jiureni rniireni didx-xhii ni rusguee, sa'csi xhetiru xcäriejnreni, anajcni si'c najc cadre rudxuuj te guiblaa: xhetru racbeedini. <sup>3</sup> Suluii rebejnre na'c guchnaa bejn, suluiizareni na'c gau bejn guiraloj, niluxh Dios bejnpac redee te xca' rebejn ni rlilajz, ni racbeza didxlii, te gudeedreni xquixtios lo Dios. <sup>4</sup> Guiralii reni benchee Dios najc laaca, di riäj] cuälaznu xhi rca'nu che rudeednu xquixtios loj Dios. <sup>5</sup> Sa'csi xtidx Dios näj yälrbedx-rniab lo Dios runsa'c guira'ti.

### *Te ni runsa'c xtzuun Jesucrist*

<sup>6</sup> Palga susnajlu lajz rebejtznun rediidxre, sajclu te mossac xten Jesucrist, luxh si'c sisieedruzalu diidx xten yälrlilajz, näj yälrluisa'c ni sanuulu. <sup>7</sup> Na'c jiulu ni rnii regunaroyei ni xheti xtzuunni. Bisieed sudzu'tz lastoolu lo xtidx Dios. <sup>8</sup> Guxii sajc guinibduxh bejn te gusutijpni tiejxhni. Niluxh sacduxhru cucheeni xtidx Dios neñ lastooni, sa'csi racnäjni bejn lo yäl'nabajnre näjza lo yäl'nabajn ni najc par tejpas. <sup>9</sup> Dee najc didxlii, riäj] chalilajz guiraatuni. <sup>10</sup> Ni'c riennu dzuun, rdeednu trabajw, sa'csi cabäjznun Gueb Dios ni nabajn, ni ruslaa bejn lo dojl, ganiddoo renani rililajz xtiidxni.

<sup>11</sup> Sajplu guinibeelu soob rediidxre, näjza guluiilu rediidxre. <sup>12</sup> Di gusaanlu cuälazreni luj sa'csi najclu bi'n; riäj] gaclu te ni suu te fii guiraa reni rililazsa'cpac xho rniilu, xho nabajnlu, xho sanälajzlu sa'lu, xho rililajzlu, näjza xho rajplu xhigabsa'c. <sup>13</sup> La] ni guidzunä ro'c, bil] xtidx Dios lo rebejn, balijdxreni, baluiiza xtidx Dios lojni. <sup>14</sup> Di gusaanlu reyäl'najn ni baniidx Dios lojlu cheni basuj rebeñgool naareni yejclu por xtidx Dios, guniireni diidx xcuent nani churu gac.

<sup>15</sup> Guet-guejt basnaj lajzlu rediidxre, biusa'c rediidxre, te gac fii guiraareni xho sanuulu lo xtidx Dios. <sup>16</sup> Gopdzu'tz lagajc luj näjza rediidx ni ruluiilu; guzudzu'tz lo guiraa rediidxre, te si'c laalu lo dojl, te laaza reni rucadiajg xtiidxlu.

## 5

### *Xho guibannäjnu reni rlilajz*

<sup>1</sup> Na'c quidxa'lu loj te beñgool; guninäjni si'c xtadlu, balijdx rebi'n si'c bejtzlu, <sup>2</sup> balijdx renanbeñgool si'c xnanlu, balijdx redxap steeb si'c rebisiajnlu con rexhigabsa'c.

<sup>3</sup> Gucnäj rebuud ni guliipac rquiin chu gacnäjreni te chu xhi gaureni. <sup>4</sup> Niluxh palga yu' chu biuud yu' xi'nni o xajgni, suguisiedxgaareni guiban] nayareni lo xnez Dios, te quiixreni di'n ni nasääbreni lo xtadreni, näj xnanreni ni baslaareni, sa'csi ni'c najc laaca, rdxaglaajza Diosni. <sup>5</sup> Gunaa ni najcpac biuud, abia'n xtebni, ni'c rbäjztisni lo Dios, dxej-yääl rbejdx-rniabni lo Dios. <sup>6</sup> Niluxh biuud ni nabajn] cadedgustisni najc si'c te ni agujt neñ dojl. <sup>7</sup> Basule' rediidxre lojni te rut gucuaquijdireni. <sup>8</sup> Palga yu' chutej ni di gacnäj resa'ni, lagajc reni rbäjz rolijzni, ni'c agulälaz xtidx Dios, beñgujdxru najcni lo rebejn nani di chalilajz xtidx Dios.

<sup>9</sup> Di gucuaalu laj rebuud lo guijtz te gacnäjtuni palga gajdni chu gayojn ijz. Riäj]za gac biuudga te gunaa ni guban]näsa'c chäälni. <sup>10</sup> Riäj]za gumbec bejn]ni xcuent redzunsac ni rujnni; palga baslaani rexi'nni, palga badedlaani rolijzni gues beñ zijt, palga gudiibni ni' rexpejn Dios te si'c guzen] xcäl]nadolajzni, palga racnäjni reni rdej] trabajw, palgaza riuni rujnni guira'ti redzunsac.

<sup>11</sup> Niluxh na'c gucuualu laj biuud ni yu' guxiiru ijz sa'csi che guichaglajzreni te niguii, siällajzreni diidx ni bia'nreni lo Jesucrist, te rlanjni guchñasacreni. <sup>12</sup> Dxejc siu'reni nen dojl sa'csi rbälazreni rediidx ni bia'nreni che galoo bejnreni xhigab ninuureni lo xtzuun Dios. <sup>13</sup> Dxejc sia' lojreni xhet gundireni, rijreni roliz bejn ricuereni. Luxh malaii ni'ctis gunreni. Niluxh rliäszareni didxxhii, richu'reni lo xhitis, rniizareni diidx ni di guchaag guiniireni. <sup>14</sup> Ni'cni rlazä rebiuud ni najc dxa'pru guchñaareni stehuält, chu xi'nreni, fisa'creni rolizreni te na'c guiniyajreni rebejn ni rdxe'ch lojnu. <sup>15</sup> Sa'csi yu' gaii biuud ni alagubicaj lo xnez Dios sanajlreni beñdxab.

<sup>16</sup> Pal yu' tej resa'nu ni najc sa'ni te biuud, riäjł gacnäjnini, na'c gusaanni gutajłni xtzuun guidoo, te si'c guidoo sajç gacnäj rebiuud ni rquiiñpac chu gacnäjreni.

<sup>17</sup> Rebeñgool ni rnibesa'c guidoo, riäjł chanälajzrutureni näj gudeedrutu guiraa nani rquiiñreni, si'c najc reni rusulesa'c xtidx Dios, rulidxxa'creni la'tu con xtidx Dios. <sup>18</sup> Sa'csi lo xtidx Dios çaj scree: “Na'c gusällu guijxh ro' gon che rusiani triuu”; si'cça çaj stee diidx: “Riäjł gax bejn ni rujn dzuun.”

<sup>19</sup> Na'c cucuadiajglu xtidx tej ni rucuaquij te beñgool palga ruti tio'p, choñ testiigw. <sup>20</sup> Niluxh reni sanuu rujntis dojl, riäjł gulijdxlureni nez loj rebeñ guidoo, te näjza laareni guidxejbreni. <sup>21</sup> Nez loj Dios, nez loj Dad Jesucrist, nez lojza reangl ni gule Dios, rulidxdxhäu chanuulu lo rediidxre, na'c jiuurulu tej bejn lo sa'ni. Bejn tebloj loj guiraa rebejn. <sup>22</sup> Na'c gusiojb lajzlu gusujlu ñaalu yejc te bejn, te gacni beñ guidoo palga çajdni guisieed guibañsa'cni lo xnez Dios sa'csi lagajç yejclu jiajb rextojłni. Gubicaj lo guiraa dołguijdx.

<sup>23</sup> Na'cru yälu ganax nis. Gu'za tudxe'n bin sa'csi racxhuu xque'lu, näjza sa'csi yu'ru rexcälracxhuulu.

<sup>24</sup> Yu' bejn ruzeñgajç rextojłni ni'c rajcni çastiigw, niluxh yu' bejn ni di xtojłni guzeñgajç. <sup>25</sup> Sigajçsa redzunsa'c ni rujn bejn; yu'reni ruzeñgajç, niluxh mase dini guzeñgajç, digacdi jianxhiga'tzni, sidzujñ dxej suzeñni.

## 6

<sup>1</sup> Reni najc mos riäjł cuadiajgreni xtidx xlamreni, te na'c guiniyaj rebejn laj Dios niclaza xtidx Dios ni rusule'nu. <sup>2</sup> Palga yu' remos ni najc xlamni te nani rlilajz, na'c cuälazreni rextiidxni sa'csi najcni bejtzni lo xcälrlilajz Jesucrist. Riäjł gusa'crureni xtzuunni, sa'csi najcni sa'ni loj yälrlilajz xten Dios, luxh sanälajzzenini. Rediidxre baluii, basule'.

### *Yälñabañsa'c näjza te lastoo ni rbedxi*

<sup>3</sup> Palga yu' chu ruluii garenca diidx, diidx ni digac didxxa'c, si'c najc xtidx Jesucrist, näjza xhet si'c diidxdi ni ruluii xho guibañsa'c bejn, <sup>4</sup> bejnga rlanj guiliä'p lagajç xpala'nni, niluxh xhet najndini. Si'c te yälguijdx yu'tis yejçni yälguiniab diidx, yälrdildiidx. Luxh redee rujn rdxe'ch lajzreni, rujni rdxe'ch bejn lo sa'ni, rujni rniyaj bejn, rujnzani di bejn guinisa'c lo sa'ni. <sup>5</sup> Rujnzani rdilnäj bejn sa'ni. Guiraa redee gun bejn ni aguxhijñ xcäriejñni, bejn ni diru ga'p didxlii. Rchaloreni sujñreni ganduxh xcuent rediidx ni ruluiireni. Gubicaj lo sa' bejnre. <sup>6</sup> Niluxh yälñabañsa'c näjza te lastoo ni rbedxi, redee sa'cduxh. <sup>7</sup> Sa'csi xhet biopñädinu lo guedxliujre, luxh sigajçza xhet sajçdi çonänu che guetnu. <sup>8</sup> Niluxh palga rajpnu xhi gaunu, xhi gajcwnu, con ni'c riäjł guibalaaznu. <sup>9</sup> Niluxh reni rlanj ga'p xhidalduxh meel, riajbreni lo xhigab guijdx, rujnzareni xhidajł dzuun ni xhet sajçdi, ni rujn daan, ni rusiääz bejn lo yälruhxhiñ, lo yälrñitloj. <sup>10</sup> Sa'csi yälrñälajzni meel najc xlobaa guiraa redzunguixdx. Yu'za bejn ni rlazduxh ga'pni meel, rusaanreni xcälrlilajz Dios, dxejç lagajç laareni rujn rdedduxhrenei trabajw.

### *Dzun-huen xten yälrlilajz*

<sup>11</sup> Niluxh luj, bejn xten Dios, baxu'n lo guiraa dee, te chanuulu lo xcälxhigabsa'clu näjza yäl<sub>n</sub>abansa'clu; te chanajllu yäl<sub>r</sub>irililajz näjza yäl<sub>s</sub>anälajz; te chanuulu lo yäl<sub>r</sub>becdxi lajz näjza yäl<sub>n</sub>adolajz. <sup>12</sup> Benduxh dzuun xcuent yäl<sub>r</sub>irililajz Jesucrist, gunazdu'tz yäl<sub>n</sub>abajn ni najc par tejpas. Ni'cni gurejdx Dioslu, luxh aguniilu rililajzlu xtidx Dios nez loj xhidajl bejn, te anancheereni. <sup>13</sup> Naj rulidxälu nez loj Dios ni rudeed yäl<sub>n</sub>abajn lo guiraa ni yu' lo guedxliujre, näjza nez loj Jesucrist, ni basule' xtiidxni nez lo Poncio Pila't, <sup>14</sup> rnibeä guzobsa'clu guiraa rediidx ni rniä lojlu, na'c guchaaluni, te na'c guiniyajreni luj naj niclaza cheni jääd Xtrad Jesucristnu. <sup>15</sup> Sidzujn dxejga nani agunii Dios guidzujn. Dios ni najc le' sujn scree sa'csi laatisni najc Dios, najcni rei xten re<sub>r</sub>ei, rnibeezani reni rnibee. <sup>16</sup> Laatisni dini guet, nabaj<sub>n</sub>ni lo bianij cadre rut rajc<sub>d</sub>i rbig. Nicla te bejn gajd fii lojni, niclaza gac fiireni lojni. Xtebtis laani riäj<sub>l</sub> ga'p rebejn xpala'nni. Laani rajp yäl<sub>r</sub>nibee par tejpas. Sugacni si'c.

<sup>17</sup> Baliidx reni rajp xhidajl xhixtenu lo guedxliujre, na'c guschä'preni xpala'nreni, niclaza chanälajzreni xhixtentisreni. Huenru chanälajzreni Dios ni nabaj<sub>n</sub>, ni runiidx loonu guiralii xhixtenu ni rquiinnu te guibalajznu. <sup>18</sup> Baliidxreni gunreni dzunsa'c, gundaj<sub>n</sub>reni dzunsa'c, gacnä<sub>j</sub>reni reni xhet rajp<sub>d</sub>i, cuenäsa'creni sa'reni. <sup>19</sup> Si'c ga'preni yäl<sub>n</sub>asa'c ni guzudzu'tzreni che jääd Jesucrist, te guiniaztzu'tzreni yäl<sub>n</sub>abajn par tejpas.

### *Rulijdxni Timoteu*

<sup>20</sup> Timoteu, cuenä<sub>j</sub> ni rniä lojlu. Na'c jiulu didxguijdx ni yu' lo guedxliujre, niclaza didx-xhii, niclaza rediidx ni rusguee, ni rbälajreni 'yäl<sub>n</sub>naj'. <sup>21</sup> Sa'csi yu' reni sanuu yäl<sub>n</sub>najre ni'c banijtreni lo Dios xcuent yäl<sub>r</sub>irililajz. Gacnä<sub>j</sub> Dios luj. Sugacni si'c.



## Guijtz Ni Rojp Lo Timoteu

### *Stee guiitz ni baxhal Pabl loj Timoteu*

<sup>1</sup> Narä Pabl, nacä apost xten Jesucrist. Dios gule narä, xcuent yäl<sub>n</sub>abaj<sub>n</sub> ni gudeed Dios loj reni yunäj Jesucrist, si'c ni bia'n diidx. <sup>2</sup> Caciaä guiitzre lojlu, Timoteu, xi'nä lo yäl<sub>r</sub>irilajz. Rinälazä luj. Rniabä lo Xtradnu Dios näj lo Dad Jesucrist gacnäj luj, gulaslajzreni luj, guscuedxireni lajzlu.

### *Rusule'ni xcuent Jesucrist*

<sup>3</sup> Rnaj lazälu che rniabä lo Dios dxej-yääl. Dxejc rdedä xquixtios por luj lo Dios. Naya xcärienä yu'ä lo Dios, runä xtzuunni si'c bejnza rextadgoldoä. <sup>4</sup> Rnaj lazä xho biinlu, naj rlazä fiä lojlu te guibalazä. <sup>5</sup> Rnaj lazäza yu'pac yäl<sub>r</sub>irilajz lastoolu si'cni guyu'ni galoo lastoo xmanlu Loida dxejcru lastoo xnanlu Eunice si'cza yu' yäl<sub>r</sub>irilajzga lastoolu naj.

<sup>6</sup> Ni'cni rniä lojlu naj, si'cni rcanäj bejn rodäj te di juini, si'cza cuanäduh reyäl<sub>n</sub>ajn ni baniidx Dios lojlu cheni basuä naä yejclu. <sup>7</sup> Sa'csi di Dios nuniidx te lastoo ni rdxejb loonu, baniidxni te lastoo ni rsiutijp, baniidxni te lastoo ni rinälajz, baniidxzani yuduxh xcäriejnnu. <sup>8</sup> Na'c guitujylu guiniilu rediidx xten Xtrad Jesucristnu, na'cza guituinäjlu narä sa'csi yu'ä ne<sub>n</sub> latzguiib xcuent Jesucrist. Näj luj gudejd trabajw ni siääd xcuent yäl<sub>r</sub>usule' xtidx Dios si'ctis gacnäj Dios luj. <sup>9</sup> Dios ni gulää nurnu ne<sub>n</sub> dojl, gurejdx nurnu te guibansa'cnu lojtisni. Gurejdxni nuurnu xhet sa'csi biennu dzunsa'c, alga sa'csi si'c rlajzni laani, sa'csi balaslajzni nuurnu xcuent Jesucrist galooli che gajdli guncheeni guedxliuj. <sup>10</sup> Niluxh cheni biääd Jesucrist ni badzucaj rextoj<sub>n</sub>u lo guedxliujre, baluiloj yäl<sub>r</sub>uluslajzga. Jesucrist banitloj yäl<sub>r</sub>nibee xten yäl<sub>r</sub>gujt. Xtiidxni, ni rusule' xho rbicaj dojl, baluui yäl<sub>n</sub>abaj<sub>n</sub>, näjza yäl<sub>n</sub>abaj<sub>n</sub> par tejpas.

<sup>11</sup> Dios gule narä te gacä te ni rusule' xtiidxni, te gacäza te apost, näjza te bejn ni ruluii loj reni di gac xpejn Israel. <sup>12</sup> Ni'cni rdedä trabajw xcuent guiraa rediidxre. Niluxh dina guituiyä, sa'csi narä nanä chu xtiidx huililazä, nancheä laani sajc gapdzu'tzni dzuun ni baniidxni loä dxejli cheni gubi'ni.

<sup>13</sup> Chanuu guluiilu redidxsa'c ni banidxä lojlu. Gubajnzä lo yäl<sub>r</sub>irilajz näj lo yäl<sub>s</sub>anälajz ni rajpnu sa'csi yu'nu lo Jesucrist. <sup>14</sup> Cuanädu'tz reyäl<sub>n</sub>ajn ni baniidx Dios lojlu näj Sprit D<sub>x</sub>an xtenni ni rbäjz ne<sub>n</sub> lastoonu.

<sup>15</sup> Anajnl<sub>u</sub> guiraa reni siääd reguedx Asia gulälaz narä; lo redee nadxaag Figelo näj Hermógenes. <sup>16</sup> Dad Jesucrist gacnäj reni yu' rolizj Onesíforo sa'csi balti huält biädspaani lazä, dini nitujy sa'csi yu'ä ne<sub>n</sub> latzguiib. <sup>17</sup> Che bidzuj<sub>n</sub>ni guedx Roma, gudiilpacni narä te bidxäl<sub>n</sub>i narä. <sup>18</sup> Dad Jesucrist gulaslajz laani che guidzuj<sub>n</sub> dxej ni guibi' Jesucrist. Luj anajnl<sub>u</sub> balti dzunsa'c bejn<sub>n</sub>i che guyu'ni guedx Éfeso.

## 2

### *Te ni runsa'c xtzuun Jesucrist*

<sup>1</sup> Ni'cni xi'nä, guzutijp sa'csi rulaslajz Jesucrist luj, racnäjn<sub>l</sub>u. <sup>2</sup> Rediidx ni abiejn diajglu guniä nez loj xhidäl bejn lagajc rediidxga guniini lo rebejn ni rililajzpac, loj rebejn ni sajc guluiiza diidxga lo stecuaa bejn.

<sup>3</sup> Batijp lajzlu tednäjl<sub>u</sub> narä trabajw si'c te soldadsa'c xten Jesucrist. <sup>4</sup> Di te soldaad gun dzuun ni bejn<sub>n</sub>i che gajd<sub>n</sub>i gac soldaad. Ruj<sub>n</sub>ni xtzuun bejn ni guleni gacni soldaad, te si'c guspaani lajz bejn<sub>ga</sub>. <sup>5</sup> Sigajcza, ni rguijt digacdi xca'ni yäl<sub>n</sub>asa'c palga dini quitsa'c si'c riäj<sub>l</sub> quitni. <sup>6</sup> Bejn ni ruj<sub>n</sub> dzuun loniaa nanab xca'ni xcäl<sub>n</sub>asa'cni ganidoo. <sup>7</sup> Bejn xhigab xcuent ni rniä lojlu, dxejc suj<sub>n</sub> Dios gacheelu guiraani.

<sup>8</sup> Basnaj lajzlu Jesucrist, te xagdoo toDavid ni huäjz lo rebengut. Dee najc xtidx Dios ni rudzucaj dojl, si'c ni rusule'ä lojlu. <sup>9</sup> Ni'cni cagutipä lazä cadedä trabajw, caduä caden si'c te bejn ni bagu't sabejn. Niluxh digacdi xcaduu xtidx Dios. <sup>10</sup> Ni'cni cadedä trabajwre te gacnäã reni agule Dios te näjza reni'c chalilajz xtiidxni te guibajjreni lo bianij xten Jesucrist par tejpas.

<sup>11</sup> Guliiduxh najc diidxre;

palga agujtnu con laani, sibannäjzanu laani.

<sup>12</sup> Palga rdejndu trabajw, sinibenäjzanu laani.

Palga dinu guicä'p numbeenuni, dizani guicäjp numbeeni nuurnu loj Xtradni Dios.

<sup>13</sup> Mase dinu chanuu lo xtiidxni, laani susoobni xtiidxni sa'csi digacdi cuatzlajzni diidx lagajc laani.

### *Te bejn nani abia xtzuunni*

<sup>14</sup> Basnaj lajz rebejn xcuent rediidxre, gunibee lojreni nez lo Dad Jesucrist na'c til'diidxreni sa'csi sa' diidxga xhet sajcdini, ruxhntisni reni riendiajgni. <sup>15</sup> Batijp lajzlu te guidzujnlu lo Dios si'c te bejn ni runsa'c dzuun, xheti xhicient guitujylu, sa'csi ruluisa'cpaclu xtidxliitis Dios. <sup>16</sup> Gulälaz yäl'rniyaj näjza xhidalduxh diidx ni xhet sajcdi, sa'csi renani rucua diajg rediidxga riajbrureni lo redolguijdx. <sup>17</sup> Luxh diidx ni ruluiireni suxhingajcni lastoo bejn si'c rxhinlajz tiejxh bejn. Ni'c casiajc Himeneo näj Fileto. <sup>18</sup> Abanijtreni lo didxlii. Caniireni ala huäjs bejn lo rebengut. Si'c cagusiejchreni lajz gatii rebejn ni rililajz. <sup>19</sup> Niluxh xtidx Dios rsiudzu'tzni si'c te guij nani nadipduxh, luxh rajpnu diidxre si'c te seen: "Dad guibaa anumbee guiraa reni najc xpejn"; näjza "Nanab guibicajreni lo redolguijdx, guiraa reni ahuililajz xtidx Jesucrist."

<sup>20</sup> Nen te yuro, xhet ganaxdi cos or näjza cos plat yu'. Yu'za cos yajg näj cos bajn; yu'reni najc parsi te laniro, yu'za reni rquiin guixe-guixee. <sup>21</sup> Sigajcza te bejn ni rlajz gun dzuunro xten Dios, riäj'l guibicajni loj redolguijdx ni xhet sajcdi. Dxejcti Dad Jesucrist sacnäjni te gunni redzunro xtenni.

<sup>22</sup> Gubicaj lo redzunguijdx ni rujn rebejn, huinuu yäl'nabansa'c, yäl'rililajz, yäl'sanälajz, gulecdxiza lajzlu näj reni rujn xtzuun Dios, naya lastooreni rbedx-rniabreni lo Dios. <sup>23</sup> Na'c jiulu rediidx ni ruluii rebejn guedxliuj. Anajnlu rediidxga rujn rdil'näj rebejn sa'ni. <sup>24</sup> Niluxh te xmos Dad guibaa di riäj'l guchaagni reni rdijl; riäj'l gacni bensa'c loj guiraatis bejn. Riäj'lza guluisa'cni; riäj'lza gutip lajzni che xhet laadi rujn bejn lojni. <sup>25</sup> Guideb yäl'nadolajz guluiilu reni rdxe'ch loj rediidx ni ruluiilu. Cuääzlu gaxäjsi gusiejch lajzreni gun Dios gacbeereni didxgulii, <sup>26</sup> te jianij xcäriejnreni te guiriireni ladznäa bendxab, te gunreni ni rlajztis Dios.

## 3

### *Xho gac rebejn nen redxelult*

<sup>1</sup> Nanab gacbeelu nen redxelult sidzujn dxej tedtu trabajw. <sup>2</sup> Sa'csi su' bejn ni chanälajz lagajctis laani, ni rinälajz xmeeltisni, bejn ni rniyaduxhtis, bejn ni rchaglaiz chä'p xpala'ntisni, bejn ni rniyaj Dios; su' bejn ni di gusoob xtidx xtradreni, su' bejn ni di gudeed xquixtios lo Dios, su' bejn ni najc benguijdx. <sup>3</sup> Nen redxelultga su'za bejn ni di chanälajz sa'ni, bejn ni di lajzni jäjl, bejn ni rusgueduxh; bejn ni digacdi guscuääz dolguijdx ni rujnreni; bejn ni gualazduxh; bejn nani ru'o'n guira'ti dzunsa'c. <sup>4</sup> Nen redxelultga su' bejn ni ruto' sa'reni; bejn ni di guidxejb gunreni ni riajbtis yejcreni, bejn ni rchalosi najcreni bensacduxh; bejn ni rchaglaizru gun nani rchaglaiz tiejxhreni lacuaa chanälajzreni Dios. <sup>5</sup> Nen redxelult su' bejn ni najc si'c benguidoo, ascanu rusoobreni xtidx Dios, niluxh naadireni xca'reni yäl'nadip näj yäl'rniabee xten Jesucrist ni ruchaa lastoo bejn.

Na'c guchaaglu rebejn̄ga, <sup>6</sup> sa'csi loj sa' bejn̄re yu' reni richu' rolijz bejn̄, sasgueereni regunanayääl ni rujn̄ dojl̄. Regunaare rinuu rujreni ni rlanjz tis tiejxh̄reni, rujn̄reni guiraloj. <sup>7</sup> Rebejn̄re rsiedduxh̄ didxcoob, niluxh̄ di didxlii xten Jesucrist jiu' yejcreni. <sup>8</sup> Sigajcni gujc Janes näjza Jambres ni bidxe'ch loj Moisés, sigajcza najc rebejn̄re, cadxechnäjreni didxlii xten Jesucrist, najcreni bejn̄ ni aguxhijñ xcäriejn̄reni, luxh̄ direni gachee xtidx Dios, direni ga'p yäl̄rililajz. <sup>9</sup> Niluxh̄ direni chanuu xchej, sa'csi huenliisi suhii guiraa rebejn̄ najcreni beñguijdx. Si'cza gusajc guiro'p reni bidxe'ch loj Moisés.

### *Pabl̄rnibee sudzu'tz Timoteu*

<sup>10</sup> Luj sanuutislu lo nani rusule'ä, näj xho nabañä, näj xhicuent runä dzuunre, lo xcäl̄rililazä, lo xcäl̄nadolazä, lo xcäl̄sanälazä, näjza xho batip lazä. <sup>11</sup> Najnlu xho basacsíreni narä gudedäza trabajw ladzñaa rebejn̄ neñ reguejdx xten Antioquía, guedx Iconio, näjza guedx Listra. Gudedä trabajw niluxh̄ Dios baslaa narä loj guiraa retrabajwga. <sup>12</sup> Guliduxh̄ guiraa reni rlanjz chutis loj Jesucrist sidejdpacreni trabajw. <sup>13</sup> Niluxh̄ rebeñguijdx näj reni rusguee, sinuutisreni redol̄guijdx, sinuuru gusgueereni bejn̄, luxh̄ susgueeza bejn̄ laareni.

<sup>14</sup> Luj huinuu guzudzu'tz loj ni abisieedlu, nani ahuililajzzalu, luj anajnlu chuni'c baluiini lojlu. <sup>15</sup> Cheni biuuxlilu racbeelu xtidx Dios, ni ruluiilu xho guiriilu neñ dojl̄ te xca'lu yäl̄nabajn̄ par tejpas sa'csi rililajzlu xtidx Jesucrist.

<sup>16</sup> Guiraa rediidx xten Dios ni caj lo guijtz, lagajc Dios baniidxn̄ni te xcajni lo guijtz. Guiralii xtidx Dios najc laaca te guluii nuurnu xhini'c najc didxlii, te gacheenu xhi najc didx-xhii, te gacheezanu xho riäj̄l̄ guibañsa'cnu.

<sup>17</sup> Te susiñ niguii ni najc xpejn̄ Dios, te gac gunni guiraa redzunsa'c ni riäj̄l̄ gunni.

## 4

<sup>1</sup> Rulidxälu nez lo Dios näjza nez lo Dad Jesucrist ni jiäd̄ si'c reii te gunni yäl̄guxhtis loj reni nabajn̄ näjza loj reni agujt; rniäza dee lojlu: <sup>2</sup> basule' xtidx Dios, gususin lo Dios mase xhitis or̄. Baluii reben̄ dojl̄, gudil̄näj reni di rlanjz guzobdiidx xtidx Dios, balidxnäj resa'tu xtidx Dios. <sup>3</sup> Sa'csi sidzujñ dxej di rebejn̄ guidxagljaz gucuadiajz yäl̄rluisa'c; alga diidx ni najc lagajc si'c najc xhigabreni rlanjzreni jiendiajgreni, ni'cni siguiilreni xhidajl̄ bejn̄ ni ruluii te guisieedreni ganax ni rlanjzreni gucuadiajgreni. <sup>4</sup> Susäuureni diajgreni te di jiendiajgreni xtidxlii Dios; alga xhitis diidx gucuadiajgreni. <sup>5</sup> Niluxh̄ luj huinuutis lo xtidx Dios, batiplajz yäl̄huin, guniitis xho rudzucaj Dios rextojl̄reni, beñsa'c xtzuuunlu.

<sup>6</sup> Sa'csi narä suga'ä ree te ju'treni narä, asiäd̄dzun̄gajxh̄ dxej ni guetä. <sup>7</sup> Agulujx bacuaä si'c te soldaad ni huicuaasa'c lo guer, agulujx xnezyuä, gopdzutzä yäl̄rililajz. <sup>8</sup> Naj cabäzä xca'a yäl̄nasa'c ni guniidx Dad xhaguibaa, suniidxn̄ni yäl̄nabañsa'c. Dad najc juejz ni runsa'c yäl̄guxhtis. Niluxh̄ xhet loätis guniidxn̄ni yäl̄nabañsa'c. Sudeednini loj guiraa rebejn̄ ni catiplajz cabäjzreni dxej cheni guibisac Jesucrist.

### *Rediidx ni räjpni lojtis Timoteu*

<sup>9</sup> Basaaga lajzlu jiäd̄huigajlu narä; <sup>10</sup> sa'csi abasa'n Demas narä. Sanälajzruni redzuun xten guedxliujre, naj sääni guedx Tesalónica. Baxhalä Crescent sää lo reguejdx ni re' nez Galacia. Baxhalä Tito sää guedx Dalmacia. <sup>11</sup> Xtebtis Lucas suganäj narä. Gudiil Marcw te jiäd̄näluni sa'csi sajc gacnäjni narä lo xtzun Dios. <sup>12</sup> Tíquico baxhalä sää guedx Éfeso. <sup>13</sup> Cheni jiäd̄dlu, jiäd̄näluni ca'p ni basa'nä guedx Troas rolijz Carpo, näj rexlibrä; di jiäl̄za lajzlu rexquitzä. <sup>14</sup> Alejandro, ni najc gubetzguiib, basacsíduxhni narä. Dios quiixni sigajcni bejn̄ni. <sup>15</sup> Luj bahuii te di gunni xhi gunni luj sa'csi rdexchduxhni lo xtidx Dios ni rusule'nu.

<sup>16</sup> Galoo che bazecä diidx lo reguxhtis, rut gucnäjdi narä; guiraareni gulälazreni narä. Rniabä lo Dios na'c guchagcuentni nani bejnreni. <sup>17</sup> Niluxh Dad ni yu' xhaguibaa gucnäj narä, baniidxni yäl<sub>n</sub>adip te gujc guniä guiraa xtidx Dios te biejn diajg reni digac xpen Israel xtidx Dios. Luxh gucnäj Dios narä gulääni narä ladz<sub>n</sub>aareni, si'c ro' te beedz. <sup>18</sup> Sus<sub>l</sub>aani narä loj guiraa redol<sub>g</sub>uijdx, saptzu'tzni narä, sigucheezani narä te chunääni lo xcäl<sub>r</sub>nibeeni xhaguibaa. Lojni col<sub>d</sub>eed xquixtios, col<sub>g</sub>a<sub>n</sub>duxhni par tejpas. Sugacni si'c.

*Rudeedni xtixtios lo reexamigwni*

<sup>19</sup> Badeed xtixtios lo Prisca näjza lo Aquila näjza loj resa' Onesíforo. <sup>20</sup> Erasto bia'n guedx Corinto, niluxh basa'nä Tróximo guedx Mileto sa'csi cayacxhuuni. <sup>21</sup> Jiädgajlu ansde guisloj rebäinaj<sub>l</sub>. Eubulo, Pudente, Lino, Claudia, näjza guiraa rebejtznu ni yu' lo Jesucrist ree, ruxha<sub>l</sub>reni xtixtios lojlu.

<sup>22</sup> Dad Jesucrist chunäj xaimlu. Dios gacnäj guiraatu. Sugacni si'c.

## Te Guijtz Lo Tito

### *Bacuaa Pabl lo Tito*

<sup>1</sup> Narä Pabl, nacä xmos Dios, apost xten Jesucrist, te gacnäã guiroobru xcälirililajz reni agule Dios, te gacbeezareni didxlii ni rusia xcälınabajñnu. <sup>2</sup> Cayunlojzanu yälınabajñ par teppas nani Dios, ni digacdi guinii didx-xhii, bia'nni diidx guniidxni cheni gajdli guedxliuj guirixtiej. <sup>3</sup> Niluxh che bidzujñ dxej ni agulexgaa Dios, laani baluiini xtiidxni. Si'cza banüidxni xtiidxni loä te gusule'äni si'c gunibee Xtiosnu ni ruslaa nurnu nen dojl. <sup>4</sup> Cacuaã guijtzre lojlu, Tito, xi'nä lo yälirililajz ni ria'pnu xcuent Jesucrist. Rniabä lo Dios Xtadnu näj lo Dad Jesucrist ni rbää nuurnu nen dojl, gacnäjreni luj, gulaslajzreni luj, guscuecdxizareni lajzlu.

### *Dzuun ni rujñ Tito guedx Creta*

<sup>5</sup> Che basa'nälu lo yuj ni tre' lo nisdoo, ni laa Creta, basa'nälu te guluuxlu dzuun ni di niajldi nuluxä ro'c, näjza te cuelu rebengool loj reguidoo nen tejsa reguejdx si'cni gunibeä gunlu. <sup>6</sup> Gule bengool ni nabansa'c, te na'c guiniyaj bejñreni, nanab gacni chääl tejtis gunaa, riäjłza chalilajz rexi'nni, na'c guibajñreni si'ctisni rlajz tiejxhreni, jiureni xtidx xtadreni. <sup>7</sup> Niguii ni rnibee guidoo rcanäj rehxixten Dios, ni'cni riäjł ga'pni te yälınabanya. Na'c gacni te beñnajd, na'c gacni te beñnadxecha', na'c gacni bengü, na'c gacni te bejñ ni rdxagdijł bejñ, na'cza xca'ni meel ni dini niunsa'c gaan. <sup>8</sup> Nanab gacni te bejñ ni rudedlaa rolizni jia'n beñ biooz, riäjłza chanälajzni dzunsa'c, gac nasiñni, chu xcäriejnñi; guibansa'cni nez lo Dios, sigajcza nez lo rebejñ, guibanñayani nez lo Dios, na'c gunni nani rlajztis tiejxhni. <sup>9</sup> Riäjł chanuutisni lo didxlii ni bisieedni te gac gulidxnäjzani bejñ xtidx Dios, te guzejcni diidx lo rebejñ ni rniyaj xtidx Dios.

<sup>10</sup> Yu' xhidajł benguijdx, bejñ ni rnii diidx ni xhet sajcdi, näjza xhidajł bejñ ni rnii didx-xhii ni rusguee. Näjza lo rexpen Israel ni riuduxh leiü yu' sa' bejñre. <sup>11</sup> Sa' redee ni nanab jäü ro'ni, sa'csi rusgueerene xhidälro sa'reni, ruluiireni ni di riäjł guluiireni te gunreni gaan meel.

<sup>12</sup> Te niguii ni siääd lagajc lajdxreni guniini xcuent lagajc reben lajdxni: “Rebejñ ni najc cretenses rniduxhrene didx-xhii, niälajzzeneni. Rlajzreni gausa'creni niluxh di rlajzreni gunreni dzuun.” <sup>13</sup> Niluxh guliini, ni'cni gudilñajreni, te chalilazsa'creni xtidx Jesucrist, <sup>14</sup> te na'cruza gucuadijgreni rediidx ni rdxällajz rexpen Israel, niclaza rediidx ni rnibee bejñ ni gulälaz didxlii.

<sup>15</sup> Loj renani rujñ xhigabya, guira'ti najc naya, niluxh loj reni di chalilajz, ni xhet nayadi najc xhigabreni, guira'ti nacdxuudx, xcäriejnlireni nacdxuudx. <sup>16</sup> Naj rujnsireni si'cni numbeerene Dios, niluxh ni rujñreni huenliisi ruzen direni nililajz, najceni benguijdx, direni jiu xtidx Dios, digacdi gunreni nicla tej dzunsa'c.

## 2

### *Rulijdx Pabl Tito guluisa'cni rebejñ*

<sup>1</sup> Niluxh luj guniitis rediidx ni ruluisa'c. <sup>2</sup> Baluii rebengool gac benya, bejñ ni yu' xcäriejnñi, bejñ ni rumbee xhini'c najc dzunsa'c, xhini'c najc dzunguijdx, bejñ ni rajpza yälirililajz, yälınälajz, näjza ni rbecdxilajz. <sup>3</sup> Sigajcza, regunagool, nanab guibajñreni si'c te ni yusa'c lo Dios, na'c guiniireni diidx ni di riäjł guiniireni, na'cza soozreni. Riäjł guluiireni redidxa'c <sup>4</sup> te guluiireni regunaa dxa'p chu xcäriejnñeni, chanälajzreni chäälreni näj rexi'nreni. <sup>5</sup> Gacreni nasiñ, guibanñayareni, xcanäsa'creni rolizreni, gacreni beñsa'c gusoobreni xtidx chäälreni, te rut guiniyajdi xtidx Dios.



<sup>6</sup> Sigajcza gojz lo rebi'n riäjł chu xcäriejnreni. <sup>7</sup> Luj guzuj te fiireni xho riäjł gun bejn dzunsa'c. Che guluiilureni, saru baluii guiraa reni riäjł guluiilu. <sup>8</sup> Didкса'c gunii te rut gacdi guiniyaj diidxga, te si'c guitujy chutis ni rlajz guidxe'ch lojtu te xhet xhi didxguijdxdi gac guiniireni xcuentlu.

<sup>9</sup> Balijdx remos te gusoobreni xtidx xlamreni, te gunsa'creni dzuun, na'c guzejcreni diidx lo rexlamreni. <sup>10</sup> Na'c cuanreni alga guibaṅsa'creni te guluii xcälṅnabajṅreni lacti sacduxh xtidx Dios ni basłaa nuurnu neṅ dojl.

<sup>11</sup> Sa'csi abiääd xcälracnäj Dios, abiädṅäni yälrusłaa neṅ dojl lo guiraa rebejn. <sup>12</sup> La xcälracnäj Dios ni ruluii nuurnu gusa'nnu redzunguijdx, nājza dzuun xten guedxliujre te guibaṅsa'cnu, te chonälajznu Dios lo guedxliujre. <sup>13</sup> Ruluiizani nuurnu cuäāznu guidzujṅ dxej ni soob xtiidxni ni basa'nni loonu xcuent dxej che jiääd Gueb Dios nāj Xtad Jesucristnu ni rusłaa nuurnu lo dojl. <sup>14</sup> Laani gujtni te gusłaa ni nuurnu lo guiraa redolguijdx, te basiani nuurnu te gacnu xpejṅni, gaczanu te bejn ni rdxagłajz rujn dzunsa'c.

<sup>15</sup> Diidxre gunii, balijdx, basule' si'c te beṅnajn. Di gusaanlu cuälazreni luj.

### 3

#### *Ni riäjł gun reni rilajz*

<sup>1</sup> Basnaj lajz rebejn gusoobreni xtiidx rebejn ni rnibee nājza reguxhtis, gusoobreni xtiidxreni, xcäjbzarenı gunreni xhitis dzunsa'c. <sup>2</sup> Na'c guiniyajreni bejn, cuedxireni, gaczarenı bensa'c, saru gac nadolajzreni loj chutis bejn.

<sup>3</sup> Sa'csi galoo sigajcza xheti xcäriejṅnu, dizanu gusoob xtidx Dios; basguee bejn nuurnu, yu'tisnu lo guiraasi dolguijdx nājza lo ni rchagłajztis rujn tiejxhnu, nabajṅtisnu lo dolguijdx, rudxonłajznu, rdxe'ch bejn loonu, rdxe'chzanu lo sa'nu. <sup>4</sup> Niluxh che baluiiloj xcälṅrulasłajz nājza xcälṅrinälajz Dios ni rusłaa nuurnu nājza rebeṅ guedxliuj lo dojl, <sup>5</sup> dxejc basłaa Dios nuurnu lo dojl, xhet sa'csi yu'di xhi dzunsa'c biennu, alga sa'csi balasłajzni nuurnu. Basłaa Dios nuurnu lo dojl sa'csi bidiib lastoonu, te biäjł xtojṅnu te najcnu beṅcoob, sa'csi bascoobza Xsprit Dxan xten Dios xcäriejṅnu. <sup>6</sup> Baniidx Dios cuäāzpac Xsprit Dxanni neṅ lastoonu xcuent ni bejn Jesucrist ni basłaa nuurnu, <sup>7</sup> te sa'csi rujn Dios cuent najcnu beṅsa'c sa'csi abadzucajni xtojṅnu, ṅaj sica'nu xcälṅnasa'cnu ni cabäāznu, nalaaznu yälṅnabajṅ par tejpas.

<sup>8</sup> Dee ni najc guliipac, ni'cni rlazä chanuutislu guiniilu rediidxre loj rebejn, te rebejn ni rilajz xtidx Dios gunduxhreni ganax dzunsa'c. Rediidxre najc laaca, sacduxhreni loonu. <sup>9</sup> Naj basaan rediidx ni najc xlia'si, rediidx ni gunii rebeṅ galoo, yälṅrdiidx xcuent xleii toMoisés sa'csi guiraa rebiejyga xhet sajcdini, xhetza huendi rujnreni.

<sup>10</sup> Palga yu' te bejn ni gun la' sa' rebeṅ guidoo, gunii lojni tej o tio'p huält. Palga dini jiejn, colcuäāni lojtu. <sup>11</sup> Sa'csi anajntu sa' bejṅga abaro'nni, agulälazni didxlii, lagajc xtojṅni sujn nitni.

#### *Diidx ni bacuaani lojtis Tito*

<sup>12</sup> Che guxhalä Artemas o Tíquico lojlu, gudahuiipac narä lo guedx Nicópolis. Ro'c abenä xhigab tedä rebäinajł. <sup>13</sup> Gucnäduhx licenciaad Zenas nājza Apolos, badeed guiraa ni rquiinreni te chanuurenı xpiajreni, te xhet jiäädxdireni. <sup>14</sup> Suguisieedza resa'nu gunreni dzunsa'c te gacnäjreni che guiquiinnurenı, te na'c guibajṅreni xlia'si.

#### *Ruxhalni xtixtios*

<sup>15</sup> Guiraa reni yunäj narä ruxhal xtixtios lojlu. Badeedza xtixtios loj resa'nu lo yälṅrilajz. Dios gacnäj guiraatu. Sugacni si'c.

## Te Guijtz Lo Filemón

### *Rucuaa Pabl guijtz lo Filemón*

<sup>1</sup> Narä, Pabl, yu'ä neñ latzguiib sa'csi rniä xtidx Dad Jesucrist. Narä näjza bejtznu Timoteu cagucuaanu guijtzre lojlu, Filemón, ni sanälazduxhnu sa'csi najclu sa'nu lo xtzun Dios. <sup>2</sup> Rucuaazanu guijtzre lo Apia, bisiajnnu lo yälirililajz, näj lo Arquipo ni racnäj nuurnu lo dzuunre, näjza loj rebenguidoo ni rchagsa' rolijzlu. <sup>3</sup> Dios Xtadnu näj Dad Jesucrist gacnäj la'tu, guscuedxireni lajztu.

### *Xcälsanälajz näj xcälirililajz Filemón*

<sup>4</sup> Rudedä xquixtios lo Dios xcuent luj che rniä lo Dios. <sup>5</sup> Abiejn diagä xcuent yälirinälajz näj yälirililajz ni rajplu lo Dad Jesucrist, näjza reni yu' lo Dios. <sup>6</sup> Rniabä lo Dios tioobru xcälirililajzlu lañ ni rusule'luni, te gachesa'creni xcuent guiraa reyäl'nasa'c ni rajplu, ni runiidx Dad Jesucrist lojlu. <sup>7</sup> Lacti rbalazduxhä, rbedxi lazä sa'csi sanälajzlu resa'nu näjza sa'csi luj, betzä, agulecdxilu lastoo reni rililajz.

### *Pabl rniabni lo Filemón xcasacni Onésimo*

<sup>8</sup> Mase rapä xcälriabee Jesucrist sajc guiniä gunlu xhitis ni riäjñ gunlu, <sup>9</sup> rniabä lojlu gunlu te dzunsa'c sa'csi narä nacä Pabl ni rinälajzlu, nacä bengool, yu'ä latzguiib xcuent Dad Jesucrist. <sup>10</sup> Canabä xcuent Onésimo ni najc si'c xi'nä, sa'csi huililajzni xtidx Dios ni basule'ä lojni naj ni yu'ä latzguiib.

<sup>11</sup> Galoo, dini niajc bensa'c lojlu, niluxh naj sacnäduxhni guiro'pnu. <sup>12</sup> Ruxhañsacäni lojlu, te xcasacuni stehuält si'c ni najräni xca'lu, sa'csi siädñäni lojlu ascanu lagajc lastoä. <sup>13</sup> Narä rlazä niannäjni narä xcuentlu, te niacnäjni narä naj ni yu'ä latzguiib sa'csi basule'ä xtidx Dios. <sup>14</sup> Niluxh di rlazä niunä si'c palga luj dilu xcäjb gacni si'c. Dina guinia gacnäjpaclu narä si'c gojn. Narä rlazä gunluni sa'csi rlazjpaclu gacni si'c. <sup>15</sup> Pet gubicaj Onésimo lojlu tio'p-choñ dxejsi. Niluxh naj xca'luni te chuni lojlu par tejpas. <sup>16</sup> Naj xhetru si'c di te mos chuni lojlu. Naj sajcruni loj te mos. Naj najcni si'c te betzbiidlu ni sanälajzlu. Narä sanälazduxhäni, niluxh luj riäjñ chanälajzruluni, xhet si'c chutis te bejn, alga si'c te bejtzlu lo Dad Jesucrist.

<sup>17</sup> Näj palga rumbeelu narä si'c te sa'lu, cua'ni sigajc narä. <sup>18</sup> Palga yu' xhi bejn ni lojlu o palga yu' xhi nazääbni lojlu, basa'nni lo xcuentä. <sup>19</sup> Lagajc narä, Pabl abacuaä guijtzre con naä con xleträ, narä siguixäni. (Te na'c guiniä nazääbzalu lagajc luj loä.) <sup>20</sup> Betzä, benlaa hueenre narä si'c te ni sanälajz Dios te guspaalu lazä nez loj Dad Jesucrist.

<sup>21</sup> Bacuaä guijtzre lojlu sa'csi nancheä susooblu xtidxä, sujnzalu maazdi loj ni rniabä lojlu. <sup>22</sup> Sigajcza basuchee te lajt cadre jia'nä, sa'csi cabäzä gudzu' Dios ni gunabtu lojni, gusaan Dios jiädhuiä la'tu.

### *Ruxhañni xtixtios lojni*

<sup>23</sup> Epafra ruxhañ xtixtios lojlu. Laani yunäjni narä latzguiib, sa'csi guniizani xtidx Jesucrist. <sup>24</sup> Marcw, Aristarco, Demas, näj Lucas, ni racnäj narä lo dzuunre, ruxhañzareni xtixtios lojlu.

<sup>25</sup> Dad Jesucrist gacnäj la'tu. Sugacni si'c.

## Te Guijtz Nani Biääd Loj Rebeņ Hebreē

### *Agunii Xi'n Dios xtidx Xtadni*

<sup>1</sup> Neņ redxe galoo garen-garen mood guninäj Dios retoxtadgoldoonu. Xhidajlza huält guniini por reniguii ni bacuaa xtiidxni. <sup>2</sup> Neņ redxejre aguniini loonu por Xi'nni, lojzani badeed Dios yäl̄rnibee guncheeni guedxliujre, badeedzani guira'ti lojni. <sup>3</sup> Laani najc xtuxh xten xcäl̄rdimbicha' Dios, laani najczani sigajc najc Dios, laazani rapchee guira'ti con xtiidxni ni rnibee. Cheni gulujx basiani xtoj̄l̄nu, gurejni xladbee Gueb Dios xhaguibaa te canibeeni.

### *Sacduxhru Xi'n Dios loj rexangl Dios*

<sup>4</sup> Ro'c gurej Xi'n Dios sa'csi sajcruni loj reangl xten Dios, sa'csi acua'ni yäl̄rnibee si'c te bej̄n ni riannäj xhixten Xtadni. Lajzani sajcru lo relaj rexangl Dios. <sup>5</sup> Sa'csi Dios di niäj̄b loj nicla tej rexangl̄ni:

Luj najclu Xi'nä. Narä guleälu te guinibeelu.

Dizani niäj̄b xcuent nicla tej rexangl̄ni:

Narä gacä xtadni, laani gacni xi'nä.

<sup>6</sup> Niluxh che biädñäni Xi'n xtebni lo guedxliuj, guniini:

Guiraa rexangl xten Dios, ¡Colgaņ Xi'nä!

<sup>7</sup> Che gunii Dios xcuent rexangl̄ni räjp̄ni:

Ruj̄nni ruxhuņ rexangl̄ni si'c bej̄, ruj̄nni rbebajl rexmosni.

<sup>8</sup> Niluxh xcuent Xi'nni guniini:

Luj najc Dios.

Nabaj̄n̄lu par tejp̄as;

xcäl̄rnibeelu par tejp̄as najc te yäl̄rnibesa'c.

<sup>9</sup> Ahuinälajzlu xhigabsa'c, dipaclu nichagljaz xhigabguijdx, ni'cni Dios ni najc Xtioslu, baniidxru yäl̄rbalajz lojlu quela loj resa'lu.

<sup>10</sup> Rniizani:

Luj, Dad, che guslojli bencheelu guira'ti,

bencheelu cad soob guedxliuj, ñaazalu bencheelu reguibaa.

<sup>11</sup> Laareni sinitlojreni, niluxh luj nabaj̄n̄lu par tejp̄as.

Guiraareni siujx si'c riujx te lajd.

<sup>12</sup> Suse'tlureni si'c rie't te la' lajd, sidxaareni si'c rdxaa te lajd.

Niluxh luj dilu guidxaa.

Lałgajctis nabaj̄n̄lu, di rexijzlu ted.

<sup>13</sup> ¿Gucxha räjp̄ Dios lo te xangl̄ni scree, ä? Räjp̄ni:

Gurej xladbeä te guinibeelu dxejli cheni gudzugä guiraa ni rdxe'ch lojlu ladz ni'lu.

<sup>14</sup> Guiraa rexangl Dios najc sprit, ruxhał Diosreni te chayacñäjreni rebej̄n̄ ni xca' yäl̄nabaj̄n̄ par tejp̄as.

## 2

### *Na'c gusaanni diidx ni ruslaani lo dojl*

<sup>1</sup> Ni'cni nanab jiunu xtidx Dios ni abiejn diajgnu, te na'c guibicajnu lo xnezyujni.

<sup>2</sup> Anajntu aguzojb diidx ni gunii rexangl Dios neņ redxe galoo. Luxh reni di nusoob diidxga bejnreni dojl, dxejc bateed Diosreni trabajw. <sup>3</sup> ¿Xho gac guibicaj xcäl̄naj Dios yejcnu palga dinu jiu rextidx Dios xcuent yäl̄ruslaa lo dojl, ä? Ni Dad, Jesucrist basa'n diidxga lo rexpej̄pacni, dxejc laareni basule'reni rediidxre loonu. <sup>4</sup> Niluxh Dios baluii najc diidxga guliipac sa'csi bejn̄ni reseē, näjza yäl̄rdxeloduxh, näjza xhidajl remilagrw.

Badeedzani Sprit Dxi xtenni loj renani ahuililajz xtiidxni te gun tejpgareni garen-garen xtzunreni si'ctis ni rrajz Dios gunreni.

*Nani guläxteij yälruslaa bejn lo dojl*

<sup>5</sup> Di Dios gudeed yälribee lo rexanglni te guinibeereni guedxliucoob ni cagusä'tnu naj.

<sup>6</sup> Guyu' tej ni bacuaa xtidx Dios lo guijtz, räjpni:

¿Chu najc niguii, te guinalajz Dios laani?

¿Chu najc xi'n niguii te jädhuiizaluni?

<sup>7</sup> Nagabsi dxej guxiiru sajcnj lo reangl xhaguibaa,

dxejcti badesaclu xcäl'nasa'cni,

badesaclu xpala'nni,

badeedzalu yälribee lojni te guinibeeni guira'ti ni bencheelu.

<sup>8</sup> Badeedlu guinibeeni guiralii ni yu' lo guedxliuj.

Cheni badeed Dios guira'ti te guinibeeni, xhetliidi basa'n Dios ni digacdi guinibeeni, niluxh naj ruhuiinu gajdni guinibee guiralii ni'c. <sup>9</sup> Alga rhuiinu Jesucrist, ni bejn Dios guxiiru sajcnj lo reangl xten Dios che guyu'ni lo guedxliuj balsi dxej. Che baluux Jesucrist xtzunni lo guedxliuj, badeed Dios yälrdimbicha' näjza xpala'nni lojni. Sa'csi sanälajz Dios nuurnu basaanni gudejd Xi'nni trabajwduxh, gujtni lacuaa niejtnu.

<sup>10</sup> Dios benchee guiralii ni yu' lo guedxliujre, najli rnibeeza Dios guira'ti. Luxh Diosre rrajz chanäni xhidajl xi'nni xhaguibaa, ni'cni baxhal Dios xi'npacni Jesucrist te guläxteijni yälruslaa bejn lo dojl che gudejdni trabajwduxh lo cruuz. <sup>11</sup> Sa'csi Jesucrist, ni rujn chasanäj bejn te yäl'nabanya, näjza reni risanäj yäl'nabanya, tejtis najc xtadreni. Ni'cni di Xi'n Dios guitujy guiniini lojreni: "betzä". <sup>12</sup> Scree caj lo xtidx Dios:

Chasule'ä lo rebetzä xho najclu,

siliä'päza xpala'nlu lojreni.

<sup>13</sup> Räjpzani:

Sibäzä gacnä j Dios narä.

Ste lajt guniini:

Bahuii loä näjza rexi'nä ni baniidx Dios loä.

<sup>14</sup> Te famiļ najc tejsi bääl, tejsiza rejn; ni'cni che biääd Jesucrist lo guedxliuj guyu' tiejxhni näj xteijnni si'c beņguedxliuj, gujtzani te gujc bejnni gunijt nani rnibee yälgujt, nalajznu, beņdxab. <sup>15</sup> Te si'c baslaani guiraa reni rdxejb yälgujt, najcreni si'c reni yu'tis loj xlamni guideb nabajnni, lacti rdxejbreni yälgujt. <sup>16</sup> Guliini dini niääd te gacnä jni reangl xten Dios, biäädni te gacnä jni guiralii rexajg toAbram. <sup>17</sup> Ni'cni gujcnj si'cpac te bejtznu, te gac gacni te bixhoz xten Dios ni rulaslajz, te bixhozsa'cza xten Dios, si'cni rrajz Dios gacni te guslaani rebejn lo dojl. <sup>18</sup> Sa'csi lagajc laani gudejdni trabajw, luxh baquuilza beņdxabni niujnni dojl, ni'c naj sajc gacnä jni renani ruquuil beņdxab gun dojl.

### 3

*Jesucrist sajcro loj Moisés*

<sup>1</sup> Ni'cni bejtznu, reni anabansa'c, sa'csi najctu reni gurejdx Dios gac xi'nni, colyembee Jesucrist ni baxhal Dios loonu. Laani najc bixhoz ni sajcro, rusule'zani xtidx Dios xcuent nani ahuililajznu. <sup>2</sup> Laani huinuutis guyu'ni lo Dios ni guleni te gunni dzuunre. Sigajc ni bensa'c toMoisés xtzun Dios che guyu'ni loj rexpejn Israel, sigajcza bensa'c Jesucrist dzuun che biäädni lo guedxliuj. <sup>3</sup> Sigajc ni yu'ru xpala'n dad lo xpala'n rexi'nni, sigajcza yu'ru xpala'n Jesucrist lo xpala'n toMoisés. <sup>4</sup> Yu' xtdad guiraa refamiļ lo guedxliuj, niluxh gule'c Dios guiralii bejn, bencheezani guedxliuj. <sup>5</sup> Basoob Moisés diidx si'c te mos, cuanä jni rexpen Dios si'cni guinibee Dios gunni, te baluiini xho gac redzuun ni gajd gac dxejc, luxh naj agujc redzuunga. <sup>6</sup> Niluxh Jesucrist basoob diidx si'c xi'npac

Dios. Cuanäjni xfamil Dios. Nurnu najcnu xfamil Dios palga chanuutis sudzu'tznu lo xtiidxni, palga guibalajztisnu, palga gutiplajznu dxejli ni guibi' Jesucrist.

### *Yälrusilajz xten rexpejn Dios*

<sup>7</sup> Ni'cni, si'cpac rni Sprit Dxan xten Dios:

Naj, palga jiendaajgtu xse'ni,

<sup>8</sup> na'c gun-najdntu lastootu si'c bejn rebejn ni bidxehnäj Dios che cuansajreni lo reyubijdz.

<sup>9</sup> Ro'c bidxehnäj retoxtadgoldootu Dios sa'csi direni nililajz Dios siädnäreni, niluxh bahuiireni redzunduxh ni bejn Dios nez lojreni tiuu ijz.

<sup>10</sup> Ni'cni laj ni cadxe'ch Dios loj rebejnğa, bejn Dios xhigab:

Sujiannäjreni xhigabguijdxreni,  
dina gusanä jiu'reni xcälrusilazä.

<sup>11</sup> Ni'cni bidxe'ch Dios lojreni,

bejn Dios te xhigabduxh,

di rebejnğa jiu' te gusilaznäjni.

<sup>12</sup> Bejtznu, colnatiro andi chu tejtü rujn xhigabguijdx, rlajz guibicaj lo Dios, ni nabajn par tejpas, sa'csi dini chalilajz xtiidxni. <sup>13</sup> Ni'cni colgulijdx resa'tu guixe-guixee, laga najcni nadxej; te di chu tejtü gacnajd lastooni xcuent reyälrusguee xten redojl. <sup>14</sup> Sa'csi palga chanuunu sudzu'tznu lo xtidx Dios ni huililajznu che biembeenuni, dxejc yu' xhi rajpnu con Jesucrist. <sup>15</sup> Si'c caj lo guijtz:

Nadxej, palga jiendaajgtu xse' Dios,

na'c gunnajdntu lastootu si'c bejn rebejn ni bidxehnäj Dios lo reyubijdz.

<sup>16</sup> ¿Chu reni'cni bidxehnäj Dios che biendiajgreni xtiidxni? ¿La et laadi guiraa rebejn ni gulää Moisés guedx Egipto, ä? <sup>17</sup> ¿Chuxh loj bidxe'ch Dios tiuu ijz lo reyubijdz, ä? ¿La et laadi reni biajb lo dojl, dxejc gujtreni, huijiajbreni nez loj reyubijdz, ä? <sup>18</sup> ¿Chu loj räjpni dipacreni jiu' lo xcälrusilajzni? Loj reni di nusoob xtiidxni. <sup>19</sup> Ni'c ruhuiinu di niajcdi niu'reni lo yälrusilajz sa'csi direni nililajz xtidx Dios.

## 4

<sup>1</sup> Ni'cni palga bia'n diidx siu'pacnu lo yälrusilajz con Dios, nanab jia'pnu lagajc nuure didi yu' chu tejnu di gun gaan jiu' lo yälrusilajzga. <sup>2</sup> Sa'csi nuure abiejn diaagzanu diidx ni rusia dojl, sigajc biejn diajg rebejnğa; niluxh xlia'si biejn diajgreni diidxga sa'csi bacuadiajgrenini niluxh direni nililajzni. <sup>3</sup> Luxh nuure ni ahuililaaznu siu'nu lo yälrusilajzga; caj lo guijtz gunii Dios rediidxre:

Ni'cni bidxe'chä lojreni, benä te xhigabduxh,  
di rebejnğa jiu' te gusilaznäjreni narä.

Mase abaluuxni xtzuunni cheni birixtiejli guedxliuj. <sup>4</sup> Sa'csi loj stee guijtz caj diidx ni guniini xcuent dxej ni rusilajz bejn:

Xho'p dxej bejn Dios xtzuunni, dxejcti basilajzni tebdxej.

Xhet bejndini dxejga.

<sup>5</sup> Stehuält guniini:

Di rebejnğa jiu' te gusilaznäjreni narä.

<sup>6</sup> Niluxh yu' reni gajd jiu' loj yälrusilajzga, luxh reni biejn diajgni diidx ni rusia dojl di niu' sa'csi direni nusoob xtiidxni. <sup>7</sup> Ni'cni basoob Dios ste dxej gac "nadxej". Gudejd xhidajl ijz che gunisac Dios xcuent yälrusilajz. Badeed Dios gunii toDavid rediidxre:

Nadxej, palga jiendaajgtu xse'ni, na'c gunnajdntu lastootu.

<sup>8</sup> Paru nudeed Josué yälrusilajzga loj rexpen Israel, diru Dios ninisac xcuent stee dxejre.

<sup>9</sup> Naj ria'nza te yälrusilajz par rexpejn Dios, <sup>10</sup> sa'csi nani riu' lo xcälrusilaznäj Dios, rusilajzzani lo xtzuunni sigajc basilajz Dios lo xtzuunni. <sup>11</sup> Nanab chanuu gusoobnu



xtiidxni te jiu'nu lo yälrusilajzga, te di chu tejnu ni gacnajd lajzni si'c ni gucnajd lajz renani di nililajz.

<sup>12</sup> Sa'csi nasesduxh xtidx Dios, yuduxhza xcälribee xtidx Dios. Najcni si'c te guchiil ni caduxh ro'ni, räazni nez neñ redzujt näj yojb. Sigajcza xtidx Dios räaz nez cadre rlia' sa' xsprit näjza xaim bejn. Ruluiiza xtidx Dios rehxigab ni yu' lastoo bejn, näjza redzuun ni rrajz lastoo bejn gun. <sup>13</sup> Xheti xhi bencheedi Dios ni naga'tz nez lojni. Guiralii guyasi ruhuii Dios. Sajpnu gudeednu cuent lo Dios.

### *Bixhojz ni sajcru najc Jesucrist*

<sup>14</sup> Jesucrist, Xi'n Dios, najc xpixhojzpacnu ni sajcru, nani abiu' loj Dios. Ni'cni nanab chanuu sudzu'tznu chalilaaznu xtidx Dios. <sup>15</sup> Xpixhojznu ni sajcru sajz gulaslajzni nuure te di jiajbnu lo dojl, sa'csi laani sigajcza gudejdni trabajw, baquiiil bendxabni te niujnni dojl, niluxh dini niujn dojl. <sup>16</sup> Riäjlpac na'c guidxeebnu cuedx-guiniabnu lo Xtiosnu ni sanälajz nuure. Na'cza guitujynu, te gulaslajzni nuure, guideb xcälracnäjni gacnäjzani nuure.

## 5

<sup>1</sup> Galooli guiraa rebixhojz ni sajcru nabee lo rebejn. Bixhojz ni sajcru rniab lo Dios xcuent rebejn. Luxh lojni rudeed rebejn regon näjza reguidxaa ni gudeedni lo Dios te jiäu lo xtojlneni nez lo Dios. <sup>2</sup> Rdejdza bixhojz trabajw sigajc benguedxliuj, ni'c sajz ga'pni yälndolajz loj rebejn nani nayääl näjza reni abanijt lo Dios. <sup>3</sup> Niluxh sa'csi näjza laani rujnni dojl, nanab gudeedni guidxaa lo Dios te jiäu lo rextojlni sigajc rudeedni guidxaa lo Dios te riäu lo xtojlni rebejn.

<sup>4</sup> Rut sajcdi gac bixhojz xcuentcni. Dios najc ni rbejdxni te gacni bixhojz, dxejc rudeedni xpala'nni lojni si'c badeednini lo Aarón. <sup>5</sup> Si'cza di Jesucrist niajc bixhojz ni sajcru xcuentcni. Dios najc nani gulälajni gacni bixhojz ni sajcru, räjpni lojni: Luj najclu Xi'nä, narä guleälu nadxej te guinibeelu.

<sup>6</sup> Scree cajza lo xtidx Dios stee lajt:

Luj najclu bixhojz par tejpas sigajc gujc te niguii ni laa Melquisedec.

<sup>7</sup> Cheni gubajn Jesucrist lo guedxliujre, gurejdx-gunabzani lo Dios, guredxa'ni biinzani lo Dios nani sajz nudzucajni lo yälgujt; Dios bacuadiajg xtiidxni sa'csi huinälajz Jesucrist Dios. <sup>8</sup> Ni'cni Jesucrist mase najcni Xi'n Dios bisieedni basoobni diidx luxh näj ni'c gudejdni trabajw. <sup>9</sup> Che bidzujn dxej baluuxni guiraa redzuun ni rrajz Dios gunni, laani gujcn nani rudeed laa bejn nani rusoob xtiidxni lo dojl par tejpas <sup>10</sup> sa'csi Dios gulälajni bixhojz ni sajcru, gujcn bixhojz sigajc gujc Melquisedec.

### *Rxhunriezgw gusa'nni xcälirililajzni*

<sup>11</sup> Rrajznu guiniinu xhidalduxhru diidx xcuent Melquisedec, niluxh naganduxh gusule'nuni lojtu sa'csi nadyejctu, ditu gachee. <sup>12</sup> Agujc xchej huililajztu rediidx xcuent Jesucrist. Ariäjl gusule'tu rediidxre naj, niluxh alga rquiinrutu chu gusule' rediidxre lojtu stehuält, luxh rediidxre najc rediidx guyasi xten Dios. Agucsactu si'c báz. Rrajztu yäsactu le'ch lacuaa gautu yäjt, bää; nalajznu, redidxnagajn xten Dios. <sup>13</sup> Reni najc si'c báz, rä' le'chtis, direni gumbesa'c redidxxsa'c xten Dios. <sup>14</sup> Niluxh reben guyajl rajw yäjt. Sigajcza redidxnagajn xten Dios najc par rebejn ni aguyajl lo xtidx Dios, renani ayu' xcäriejnni, arumbeereni nani najc dzunsa'c, nani najcza dzunguijdx.

## 6

<sup>1</sup> Nanab guisieedrunu xtidx Dios te churu xcäriejnnu. Na'c guisieedtisu didx-guyasi xcuent Jesucrist. Na'c guluiitisnu diidx xcuent yälrusiechlajz, xcuent redzuun ni rujn rejt bejn, näj yälirililajz xtidx Dios. <sup>2</sup> Na'c guluiitisnu xcuent yälrobnis, näj yälrudzubnaa yejc bejn, näj xcuent yälrbajnsac rebengut, näj xcuent yälgujhtis par tejpas. <sup>3</sup> Alga do'o guisieedru xtidx Dios te churu xcäriejnnu, palga si'c guniidx Dios jiennu.

<sup>4</sup> Yu' bejn ni abianij xcäriejnni, ni acua' reyäl'nasa'c ni rudeed Dios, ni rbäjz Sprit Dxaan xten Dios neñ lastooreni, <sup>5</sup> luxh bidxagljazreni xtidx Dios näj yäl'ribee xten Dios ni churu jiääd. <sup>6</sup> Palga laareni guibisacreni lo sa' yäl'nabajn ni gojpreni galoo, diru gacdi guidxaa xmodreni stehuält, sa'csi dxejc sajcn si'c ni lagajc laareni gucuasacreni Xi'n Dios lo cruzj, nalajznu susanxtujyreni Jesucrist nez loj rebejn. <sup>7</sup> Ben guedxliuj ni biejn diajgni najc si'c najc yuj ni rä' nis che riajtis nisguij. Palga yujga gudeed yäl'nasa'c loj reni rujn dzuun lojni, sunle' Dios yujga. <sup>8</sup> Niluxh palga gudeed yujga ganax yaguejch näjza cuaan ni xhet sajcdi, xlia'sini, sujn rebejn gac nadeni te checni.

### *Diidx ni rusudzu'tz lastoonu*

<sup>9</sup> Mase rniinu scree lojtu, anajnnu huililajztu xtidx Jesucrist näjza xtiidxni ni ruslaa lo dojl. <sup>10</sup> Sa'csi Dios najc ni rujn yäl'guxhtissa'c, diza lajzni jiäl ni rujntu la'tu näj yäl'sanälajz ni rajptu par laani che racnäjtü rebejznu lo yäl'rilibajz, luxh guixe-guixee si'c rujntu. <sup>11</sup> Naj rlabajznu teygatu chanuu ga'p lagajc yäl'rbalajzre dxe lultli, te gac guiraa ni cabäjztu. <sup>12</sup> Rlabajznu na'c gactu bejn ni rbedxitis, alga guntu sigajc bejn reben galoo, gopdzu'tzreni yäl'rilibajz ni batipduxh lajzreni, guläjzreni te cua'reni reyäl'nasa'c ni bia'n diidx gudeed Dios lojreni.

<sup>13</sup> Luxh che bia'n Dios diidx loj toxtadgoldoonu Abram, guniini por lagajc laani sa'csi ruti stee ni sajcrü lojni. <sup>14</sup> Scree gunii Dios: “Guliä sacnääl luj, sunidxäza xhidajl xi'nlu.” <sup>15</sup> Cheni aguläjz Abram xchej, gusojb diidx, cua'ni nani gunii Dios lojni. <sup>16</sup> Sa'csi cheni rniliipac bejn te diidx, rniireni diidxga por laj ste'ca bejn ni sajcrü lojreni, sas che rusä'treni laj bejn ga xhetru yu'di xhi gunreni biey. <sup>17</sup> Rlabajz Dios gacheepac rexagdo toAbram sisiojbpac diidx ni bia'nni che guniini loj Abram galooli. Sisiojbpac xtiidxni, sa'csi guniini diidx con lagajc lajzni che bia'nni diidxga. <sup>18</sup> Ni'cni naj yu' tiop diidx ni digacdi guichaa sa'csi digacdi guinii Dios didx-xhii, rusoobpacni xtiidxni, rudeedzani yäl'rbedxilajz loj renani gubig-guxun lojni, loj reni sanuu loj yäl'rilibajz xtiidxni nani abaniidxni loonu por lagajc lajzni. <sup>19</sup> Laa ni'cni cabäaznu ni rusudzu'tz lajznu si'c duu-guüib con ancl ni rniazdu'tz te barcw. Si'c rusudzu'tzni lastoonu te jionnu cadro yu'ni detz ladró. <sup>20</sup> Lagajc ro'c biu' Jesucrist xcuent nuure, te galooli baxhalni xnez Dios loonu, te gujcn bixhojzro par tejpas si'c gujca bixhojz nani laa Melquisedec.

## 7

### *Jesucrist najc bixhojzro si'c najc Melquisedec*

<sup>1</sup> Galoo che gujcn Melquisedec reii xten guedx Salem, gujcn bixhojzro xten Gueb Dios. Che gubi' Abram che gulujx guer cadro bagu'tni re'reii ni bidxe'ch lojni, huichagloj Melquisedecni, sas gunabni lo Dios te gacnäjru Dios Abram. <sup>2</sup> Dxejcti bejn Abram tzuu cuaa guiraa ni bejnni gaan, te badeedni tej cuaani loj Melquisedec. Laj Melquisedec säloj “reii ni runsa'c yäl'guxhtis”, dxejctiru reii xten guedx Salem sälojzani “reii xten yäl'rbedxilajz”. <sup>3</sup> Baluiiloini lojreni, niluxh dinu gan chu najc xtadni, niclaza chu najc xnanni, niclaza chu najc resa'ni. Dizanu gan guc gojlni niclaza guc gujtni. Gujcn si'c najc Xi'n Dios. Najctiszani bixhojzro par tejpas.

<sup>4</sup> Naj colhui, lacti te beñsa'c, te beñro najc Melquisedec. Lojni badeed toxtadgoldoonu Abram teja ni sajcrü lo teja tzuu ni bejnni gaan. Luxh Abram najc bejn ni sajcrü lo rexpejnni. <sup>5</sup> Leii xten Moisés, rnibee xca' rebixhojz ni najc xfamil Leví te cuaa lo sa'reni si'c ni badeed toAbram loj Melquisedec, mase najcreni rexagdo Abram. <sup>6</sup> Niluxh di Melquisedec gac xfamil Leví. Niluxh badeed Abram te cuaa xhixtanni loj Melquisedec. Dxejcti benle'ni Abram ni biannäj xtidx Dios. <sup>7</sup> Naj rut sajcdi guinii garenca, sa'csi nani sajcrü runle' yejc nani guxiiru saj. <sup>8</sup> Naj rebixhojz ni rca' teja lo tzuu ni rajpreni, najc bejn ni rejt. Niluxh rni xtidx Dios xcuent Melquisedec ni cua' te cuaani galooli: najcni si'c te bixhojz nani nabajn par tejpas. <sup>9</sup> Ni'cni sajcn guiniinu xcuent Leví nani rca' te

cuaa, lagajc laani agudijx te cuaaga che badeed Abram tejga yejc tzuuga lo Melquisedec. <sup>10</sup> Sa'csi mase gajd xi'n toAbram chu che huichagloj Melquisedecni, batijpni lastooni sa'csi abia'n diidx sudeed Dios xajgni. Ni'cni che agudijxni te cuaaga najcni si'cni suganäjni rexajgni.

<sup>11</sup> Rexpejn Israel cua' leii che gujc bixhojz relevitas, reni najc rexi'n toAarón. Paru niajc niujnreni nibansa'c rebejn ni huisanäj leiiga, dirureni niqiiin niääd stee bixhojz ni di gac si'c Aarón, alga si'c najc bixhojz Melquisedec najcni. <sup>12</sup> Sa'csi cheni rdxaa te cuaa bixhojz nanab näjza leiiga guidxaa. <sup>13</sup> Niluxh rnii xtidx Dios, Dad Jesucrist najc bejn xten garenca famil. Luxh nicla tej bixhojz gajd gac bejn xten familga. <sup>14</sup> Huenliisi najnnu najc Dad Jesucrist te bejn xten xfamil toJudá, niluxh di Moisés ninii gac te rexpejn Judá bixhojz.

<sup>15</sup> Luxh huenliisi najc ni rniinu, sa'csi abiricaj ste bixhojz ni najc sigajc gujc Melquisedec. <sup>16</sup> Luxh dini niajc bixhojz si'c rnii releii ni guyu' dxejc. Laani gujcnii bixhojz xcuent yälrnibee ni najc par tejpas, ni rut gacdi gutzujl. <sup>17</sup> Scree najc diidx ni gunii Dios xcuentni:

Luj najclu bixhojz par tejpas si'c gujc te niguii ni laa Melquisedec.

<sup>18</sup> Dxejcti gunijt leii sa'csi xlia'si gujcnii, di niajcdi niujn bejn si'cni rniini. <sup>19</sup> Di xleii toMoisés niujn gaan nibansa'c bejn. Naj lacuaa leiiga rajpnu te xcälirililazsa'c; ni'c rujn rbignu lo Dios.

<sup>20</sup> Dios bejn gacni bixhojz con xtidxliini, ni guniini con lagajc lajni. <sup>21</sup> Stecuaa rebixhojz gujcreni bixhojz niluxh et con didxliidire, con laj te beņro, niluxh bixhojzre guc bixhojz con didxlii, con laj nani räjp:

Agunilii Dios diidx con lagajc lajni,

niluxh dini gusiech lajzni, räjpni:

“Luj najclu te bixhojzro par tejpas,

lagajc si'c gujc Melquisedec.”

<sup>22</sup> Ni'cni, Jesucrist najc ni rujn rile' rediidxre, luxh diidxre sajcruni loj xleii Moisés.

<sup>23</sup> Guyu' xhidalduxh stecuaa rebixhojz, sa'csi rejtreni, digacdi chanuureni gacreni bixhojz. <sup>24</sup> Niluxh Jesucrist rajpni yäl nabajn par tejpas, naj najczani bixhojz par tejpas.

<sup>25</sup> Ni'c rajcza ruslaani bejn lo dojl par tejpas. Ruslaani guiraa renani rbig lo Dios por laani, sa'csi anabajnii par tejpas te canabni lo Dios xcuent laareni.

<sup>26</sup> Jesucrist najc bixhojzro nani rquiinnu. Laani najc dxan, dini niujn dojl, agubicajni lo rebeņ-dojl, huäjszani jiaaru xhaguibaa. <sup>27</sup> Dini gac si'c stecuaa rebixhojz ni nanab ju't man guixe-guixee te guze'c bixhojzroni lo Dios te ganid jiaa lagajc xtojlni. Dxejcti sajc guibi'ni guze'cnini lo Dios xcuent xtojlni rebejn. Niluxh Jesucrist tejtis huält gudejdni trabajw, bejnini cheni cuajni lo cruzj, baxhe'ni xtiejnii xcuent nuure, gujtni. Si'c gudijxni xtojlnu par tejpas. <sup>28</sup> Leii xten Moisés rusaan gac bixhojzro te bejn nani rejt, niluxh didxlii ni gunii Dios con lagajc lajni guleni tejni gac bixhojzro lagajc Xi'nni nani naya, nani nabansa'c par tejpas.

## 8

### *Jesucrist najc nani rusiäjli diidx*

<sup>1</sup> Diidx ni sajcro loj rediidx ni caniiinu najc scree: bixhojz ni najc xpixhojzronu agurej xladbee Dios lo xcälrdimbicha'ni xhaguibaa. <sup>2</sup> Neņ yu' ni najc dxan, neņ guidoo ni benchee Dios yu' bixhojzre, xhet nendi guidoo ni runchee rebeņ lo guedxliuj. <sup>3</sup> Guiraa rebixhojz rajc rudeedreni gojn lo Dios, rajcza ju'treni guidxaa te gusejcreni lo Dios xcuent xtojlni, ni'cni nanab ga'p Jesucrist xhi gudeedni lo Dios. <sup>4</sup> Paru suga'ni lo guedxliujre, nicla bixhojz dini niajc, sa'csi yu' bixhojz ni rudeed regojn si'c ni rnibee xleii Moisés. <sup>5</sup> Niluxh redzuun ni rujn rebixhojzga najc si'c te balaa xten guira'ti ni yu' xhaguibaa. Najnnu najcreni balaa sa'csi balijdx Dios Moisés cheni agojl gunni xquidoo

Dios, räjp Dios lojni: “Bahuii te gunlu guira'ti si'cpac ni baluiä lojlu lo dan Sinaí.” <sup>6</sup> Niluxh xpixhojznu Jesucrist rujn dzuun ni sajcrü, sa'csi najcni nani suga' galäii xnezyuj Dios loj reben̄ guedxliuj, gusule'ni diidx ni gunii Dios cheni bejn̄ni xhigabcoob, basa'nni didxcoob loj reben̄ guedxliuj. Luxh didxcoobre sacduxhruni.

<sup>7</sup> Paru niajc nusiejch leii ni badeed Dios galooli lo Moisés lajz rebejn̄, di niquiin niujn Dios ste xhigabcoob. <sup>8</sup> Niluxh bahuii Dios xhet cayunsa'c di reben̄ guedxliuj, dxejc räjpni: Naj rniliä sidzujn̄ redxej che gunä stee xhigab, jia'n stee diidx loj rexpejn̄ Israel näjza loj rexpejn̄ Judá te xca'reni didxcoob.

<sup>9</sup> Xhet si'c di xhigab ni benä che bia'nä diidx loj retoxtadgoldooreni nen̄ redxej ni gunazä naareni te gulääreni lajdx reben̄ Egipto.

Laareni direni nusoob xtidxä ni'c basa'näreni, diruna niuäreni.

Si'c gunii Dad, Gueb Dios.

<sup>10</sup> Niluxh diidx nani runä xhigab rlazä jia'n diidx loj rexpejn̄ Israel nen̄ redxejre gac scree, räjp Dad:

Sunä chu rexleii lo xcäriejnreni, sucuaäza xtidxä nen̄ lastooreni.

Dxejcti narä gacä Xtiosreni, laareni gac rexpenä.

<sup>11</sup> Rut chu tejdi guluii sa'ni,

nicla bejtzni, nicla chu stee bejn̄ gäbreni, “colyembee Dad”,

sa'csi alanumbee guiraareni narä, rebäz sigajc reben̄gool.

<sup>12</sup> Narä sulaslazäreni susiaä redzundxuudx ni bejnreni, diru lazä guizaj rextojln̄reni, nicla latzsiäj ni bejnreni.

<sup>13</sup> Che bia'n Dios didxcoob, diidx nani bia'nni galoo agujcni didx-biejw, luxh nani anajc didx-biejw, xhetru sajcdini.

## 9

### *Xquidoo guedxliujre näjza guidoo xhaguibaa*

<sup>1</sup> Laaca naj. Diidx ni bia'n galoo badeed leii xho gunreni che rajnreni Dios, näjza xho gac guidoo lo guidxliujre. <sup>2</sup> Guc-chee guidoo dxejcti gojl̄ te ladro galäiini te gujcni tio'p yu'. Yu' ni najc ganid laani yudxan. Ro'c suga' candilieer, näjza mex cadro naga' yätxtiil ni aguc le' <sup>3</sup> Ni rojy yu'ga najc dejtz ladro, ro'c najc yudxanduxh. <sup>4</sup> Ro'c suga' te guiib cadro ru' yaal. Najcni ganax oor. Ro'c yu'za te guijn ni laa “arco de pacto”, najcwni ganax oor, sigajc dejtzni, sigajcza nen̄ni. Nenga yu' te bo't ganax oor. Nen̄ bo'tga, yu' yätxtiil ni laa mana. Lagajcza nen̄ guijnga yu' bar xten toAarón nani biga', guyu' bid lojni, näjza guij cadro bacuaa Dios xleii toMoisés. <sup>5</sup> Yejc guijnga caj tio'p figur oor ni najc si'c xangl Dios. Laareni rujn racbee bejn̄ suga' Dios ro'c. Lagajc redee rusäuu con rexhigareni cadro ruxhe' bixhojzro xtiejn̄ guidxaa xcuent xtojln̄ rebejn̄. Ro'cti di gacdiru guiniirunu xcuentreni naj.

<sup>6</sup> Che gulujx gusucheereni, riu' rebixhojz si'csi si'c nen̄ guidoo, nen̄ yudxan te rajnreni Dios si'c gunibee Dios. <sup>7</sup> Niluxh nen̄ stee yu'ga ni laa yudxanduxh, ro'c rajc riu' bixhojzrotis. Xtebtisni riu'ni, luxh tejtis huält nen̄ teb ijz, te chanäni xtiejn̄ reguidxaa ni gudeedni te jia xtojln̄ni näjza te jia xtojln̄ rebejn̄ ni najc xpejn̄ Israel. <sup>8</sup> Luxh guiraa reni'c ruluii Sprit Dxan xten Dios loonu, gajd yudxanduxh guxal che sugasiyc yu' ganid, yu' ni laa dxan, cadro sanuu rajnreni Dios. <sup>9</sup> Guiraa ni gujc galoo najc si'c te balaa, baluiini xho gacni naj. Regon näjza reman ni rudeedreni lo Dios direni nusansa'c xcäriejn reni rudeed gojn lo Dios, sa'csi xtiejn̄ reman rusäutisni lo xtojln̄ rebejn̄. <sup>10</sup> Dee najc ganaxtis xhi rajwni, ni rä'ni, con yälrobnis, o xhi stee dzuun ni rujn bejn̄ te ria ganaxtis tiejxhreni che guidzujn̄li dxej cheni guchaa Dios guira'ti.

<sup>11</sup> Niluxh abiääd Jesucrist, naj laani najc bixhojzro xcuent redidxcoob ni sajcrü naj. Nacoob guidoro cadro biu' bixhojzre, nasa'cruni naj. Xhet con naadi bejn̄ guc-cheeni. Dizani gac guidoo guedxliujre. <sup>12</sup> Abiu' Jesucrist cadro najcpac yu' ni laa dxanduxh,



niluxh xhet xtiejndi redxib, regon; ganax lagajc xtiejn ni ca'ni biu'ni yudxanduxh tejtis huält, te si'c baslaani nuure lo dojl par tejpas. <sup>13</sup> Reni basia xtoj bejn galoo najc redee: xtiejn regon najza redxib, naj cobdaj xten reguidxaa ni rejc nen guidodxanga; bastiojbni guiro'preni yejc reni yu' xtoj ni. <sup>14</sup> Palga basia redee xtoj bejn, aticaxh xtiejn Jesucrist sajc gusia dojl, sa'csi rajpni yalnabajn par tejpas. Lagajc laani badeedni xtiejn lo Dios. Niluxh najcni renya sa'csi dini niujn dojl, rusiazani xcäriejn nu xcuent retzuun ni xhet sajcdi, te chunu loj Dios ni nabajn par tejpas.

<sup>15</sup> Ni'cni Jesucrist najc nani suga' galäii: nez lo Dios najza nez loj reben guedxliuj xcuent didxcoob. Yalgujt xten Jesucrist najc te gudzucajni xtoj reben najza xtoj renani bejn si'cni caj lo leii, te xca' guiraa reni agurejdx Dios yalnabajn par tejpas, si'c bia'n diidx galooli. <sup>16</sup> Didxcoobre najc si'c che rlanj tej bejn guinibee xho guidis xhixtenni che agojl guetni, nanab gucuaa bejnga lo te guijt xho guidisni, dxejcti gucuaani lajni. Niluxh xhet sajcdi guijtza che gajd bejnga guet. <sup>17</sup> Xhet sajcdi guijtza che nabansijc nani bejn. Sajcni che agujt bejnga. <sup>18</sup> Ni'cni che bia'n Dios diidx loj rexpejn Israel galoo, gujt te man te bixe' rejn. <sup>19</sup> Che gulujx gunii Moisés rediidx si'c ni caj lo leii loj guiraa rexpejn Israel, bagu'tni rebiser, redxib, cua'ni rejnga najza nis, bahuaajdxni guid-xiil xnäa najza te la' yajg balagbäz, hysopo, dxejcti bastiojbni rejn yejc guijt cadro caj leii, najza yejc rebejn.

<sup>20</sup> Dxejc guniini lojreni: “Rejnre najc seen sile'pac diidx ni abaxhal Dios lojtu.”

<sup>21</sup> Sigajcza bastiojb Moisés rejn guidoo naj guiraa renani rquiin rebixhojz che rajnreni Dios. <sup>22</sup> Leii xten Moisés rnibee jia guirali con rejn, palga di rejn guixe', di xtoj bejn jia.

### *Xtiejn Jesucrist rudzucaj dojl*

<sup>23</sup> Ni'cni biquiinpac gujt remanre, bixe' xtiejn te basiani reni najc xpalaa reni yu' xhaguibaa, niluxh reni yu' xhaguibaa rquiin guixe' xtiejn te ni sajcu. <sup>24</sup> Di Jesucrist niu' nen guidoo ni benchee rebejn, ni najc xpalaa guidoopac xten Dios xhaguibaa. Laani biu'ni lagajc xhaguibaa, te laani suga'ni nez lojpac Dios te caniini xcuent nuure loj Dios. <sup>25</sup> Bixhojzro xten xpen Israel biu' nen yu' ni laa dxanduxh tejtis huält nen teb ijz, ca'ni xtiejn reguidxaa. Niluxh Crist biu' xquidoopac Dios xhaguibaa tejtis huält par tejpas, luxh ca'ni lagajc xtiejn. Di guiquin jiu'runi balti huält. <sup>26</sup> Palga nanab gunni si'cni rujn rebixhojz, sajpn por niejtni te chinaduxh huält cheli birixtiej guedxliuj. Luxh naj, cheni bidzujn dxej, baluiloj Jesucrist tejtis huält, lagajc laani badeedzani xtiejn lo Dios cheni gujtni, cuajni lo cruzj te si'c badzucajni par tejpas xtoj rebejn. <sup>27</sup> Guiraa bejn nanabpac guetreni tejtis huält, dxejctiru sidejdreni yalguxhtis xten Dios. <sup>28</sup> Sigajcza tejtis huält badeed Jesucrist xtiejn ni bixe' lo cruzj te badzucajni xtoj xhidalduxh bejn. Luxh loj renani cabäjzni suluiilojni stehuält, xhet te gudzucajdiruni dojl, alga te gusa'ni xcälruslaa renani cabäjzni.

## 10

<sup>1</sup> Sa'csi leii xten to Moisés najctis si'c te balaa xten nani siääd naj. Niluxh dini gac si'cpac redidxcoobga. Ni'cni leii, con xtiejn reguidxaa ni rxe' cazob ijz digacdi gansa'cni rebejn nani guibig lo Dios, sa'csi di xtiejn man gudzucajpac rextojreni. <sup>2</sup> Paru niajc nibicajpac xtoj reni rudeed xtiejn guidxaa, aguläjz rudeedreni xtiejn guidxaa, sa'csi che gubicaj xtojreni, diru xcäriejnreni gumbee dojl. <sup>3</sup> Niluxh yälrejt man naj yälrudeedreni rejn casob ijz rusnajtisreni lajzreni xcuent dojl. <sup>4</sup> Sa'csi digacdi gudzucajpac regon najza xtiejn redxib xtoj bejn.

<sup>5</sup> Ni'cni che biääd Jesucrist lo guedxliuj räjpni lo Dios:

Di rlanjlu xtiejn guidxaa niclaza regon niluxh abejnlu gacä nigui-guedxliuj.

<sup>6</sup> Dilu nichagljaz yälrejc xten guidxaa niclaza yälrudeed rejn, niclaza gojn ni rudeed rebejn te gusiani xtojreni.

<sup>7</sup> Dxejc räpä: “Narä basiälä te gunä si'cni rlanjlu Dad, Dios, (si'cni caj nen reguijtz xcuent ni sacä).”



<sup>8</sup> Che gulujx gunii Jesucrist diidxga: “Di rlanjzlu, dizalu guidxagljajx xcälrejx guidxaa näjza regon niclaza xcälrejx guidxaa, niclaza yälruheed rejn xcuent xtojł bejn si'cni caj lo leii gun bejn.” <sup>9</sup> Dxejcti räjpni: “Narä siälä, te gunä si'cpac ni rlanjzlu, Dad Dios.” Dxejx badzucaj Jesucrist nani gujx galoo, te guläxtiejni didxcoob ni bia'n Dios loonu naj. <sup>10</sup> Abasia Dios lastoonu sa'csi bejn Jesucrist si'c rlanj Dios cheni baxhe'ni xtiejn ni lo cruzj tejtis huält par tejpas.

<sup>11</sup> Guiraa rexpixhojz Israel rujnreni dzuun guixe-guixee te rudeedreni lagajctis guidxaa, näjza xtiejn reman, guiraa si'ctis ni caj lo leii, niluxh reni'c digacdi gudzucaj dojl. <sup>12</sup> Niluxh Jesucrist tejtis huält baxhe' xtiejn ni lo cruzj te badzucajni xtojł rebejn par tejpas. Naj agurejni xladbee Dios cadro rnibeeni. <sup>13</sup> Ro'c cabäjnzi guiraa ni rdxe'ch lojni te cuereni ladzni'ni. <sup>14</sup> Ni'cni tejtis huält cuajni lo cruzj te basiani par tejpas guiraa renani ahuililajx xtiidxni. <sup>15</sup> Sigajcza rnii Sprit Dxan xten Dios loonu; najni:

<sup>16</sup> Diidx nani jiannääreni neñ redxejre gac scree, naj Dad Dios: sucuaä rextidxä lo xcäriejnreni, susäläza xtidxä neñ lastooreni. Dxejcti räjpni:

<sup>17</sup> Diru lazä guizaj rextojłreni nicla rextolguijdxreni.

<sup>18</sup> Ni'cni, cheni abia xtojł bejn, diru quiquiin gudeedreni guidxaa te jia rextojłreni.

### *Nanab guibignu lo Dios*

<sup>19</sup> Ni'cni resa'nu, na'c guidxejbtu, sajx jiu'nu yudxanduxh cadro bixe' xtiejn Dad Jesucrist nani abadeedni lo Dios. <sup>20</sup> Naj yu' te nezyuj, nezsiucoob, nezyuj xten xcäl'nabancoobnu ni baxhalni che badzucajni ladroga. Ni'c säloj cheni biu'ni neñ yudxanduxh, badeedni lagajx xtiejn ni lo Dios. <sup>21</sup> Jesucrist najx xpixhojzronu nani rnibee rexpejn Dios. <sup>22</sup> Ni'cni do'o guibigrunu lo Dios guideb lastosa'cnu, na'c guidxejbdinu, na'cza guitujydinu. Con yäl'rilitajzpac abia lastoonu xcuent rexpigabguijdx, abidiibza tiejxhnu lo nis-ya. <sup>23</sup> Do'o chanuu sudzu'tznu lo xtiidxni nani huililajznu, na'c guchaanu xhigabnu sa'csi susoob Dios diidx ni bia'nni loonu. <sup>24</sup> Naj do'o guihuii xho jiennu te gacnäj sa'nu te si'c chonälajznu sa'nu nägajcza te jiennu ganax dzunsa'c. <sup>25</sup> Na'c jiennu si'c rujn rebejn nani diru jääd che rdxagsa'nu. Nanab guiliidxnu resa'nu sa'csi naj asiäddzungenajx dxej ni guibi' Dad Jesucrist.

<sup>26</sup> Palga chanuu jienrunu dojl, niluxh abiejn diajgnu xtidx Jesucrist, diru gacdi guibicaj xtojłnu dxejx. <sup>27</sup> Dxejcsii guidxeebtisnu guilääznu yäl'guxhtisduxh xten Dios näj guiboo ni guze'c renani rdxe'ch loj Dios. <sup>28</sup> Cheni guyu' chu tej ni di niujn si'c caj lo xleii Moisés, niluxh bidxaag xtidx tio'p o chon ni nancheepac, räjpreni dini nusoob leii, gujt bejnga, rut balaslajzdini. <sup>29</sup> Maazru yäl'rusacsíduxh nanab ted renani ruläj yejx Xi'n Dios cheni direni gusobdiajg xtiidxni. Alga ru'o'nreni xtiejn ni baxhe'ni lo cruzj te basianini. Rusanxtujujzani Sprit Dxan xten Dios nani badeed didxcoob lojni. <sup>30</sup> Anancheenu gunii Dios: “Narä susquixä bejn; loä siguijx bejn”, räjp Dios. Stehuält guniini: “Dad sujn yäl'guxhtis rexpejn ni.” <sup>31</sup> iCosduxh gac bejn ni jäjb ladzña Dios nani nabajn par tejpas!

<sup>32</sup> Niluxh colsnaj lajztu xho gujcti galoo; cheni entis cua'tu xtidx Dios, xho batip lajztu, gudejdtu trabajw sa'csi cua'tu xtidx Dios. <sup>33</sup> Guyu' resa'tu gudéreni lojni, yu' reni basacsí la'tu nez loj rebejn. Guyu'za huält astoo gudejdzatu trabajw sa'csi cahuiitu rebejn nani basacsíreni, cadejdzareni trabajw. <sup>34</sup> La'tu banaj lajztu renani yu' latzguiib, guideb yäl'rbalajz batip lajztu che cua'reni guiraa xhixtentu, sa'csi gucbeetu xhaguibaa rajptu reyäl'nasa'c ni sajzru, niluxh yu'ni par tejpas. <sup>35</sup> Na'c gunijttu xcäl'rilitajz xtidx Jesucrist, sa'csi yäl'rilitajzga gun xca'tu yäl'nabajn par tejpas. <sup>36</sup> La'tu nanab cuedxitu te che abejntu ni rlanj Dios, dxejx xca'tu nani aguniini guniidxni. <sup>37</sup> Sa'csi xtidx Dios ni bia'nni: Asiäddzungenajxpac dxej ni jäädni,

asiäddzungenajxhpac dxej ni jiaäd nani siaäd, dipacni gaclaa.

<sup>38</sup> Renani nabañsa'c sibannäj yälirililajz,  
niluxh palga yu' chutej ni guidxejb chalilajz,  
dini'c gun guibaa lazä.

<sup>39</sup> Niluxh nuure dinu gac si'c reni rusaan yälirililajz te nitreni loj dojl. Nuure najcnu renani rililajz xtidx Jesucrist te laa xaimnu par tejpas.

## 11

### Yälirililajz

<sup>1</sup> ¿Xhini'c najc yälirililajz? Yälirililajz säloj cabääznu sajcpac tejni gajd gac, yu'pacza ni mase dinu fini, najcni si'cni abahuiinuni. <sup>2</sup> Dios huinälajz retoxtadgoldoonu sa'csi huililajzreni xtiidxni.

<sup>3</sup> Sa'csi rililajznu, najcnu benchee Dios reguedxliuj, bencheeni guibaa, bencheezani guiraa nani rhuiinu. Con xtiidxtisni bencheeni nani dinu guihuii.

<sup>4</sup> Gojpza toAbel yälirililajz badzubyaalni rexquidxaani lo Dios. Yälribijbyaal xtenni sajcru loj yälribiyaal xten toCaín. Ni'cni gunii Dios najc toAbel beñsa'c. Naj mase agujt Abel, sanuutis racheenu xcuent yälirililajz ni gojpmi.

<sup>5</sup> Sigajcza gojp Enoc yälirililajz, ni'c sinä Dios Enoc xhaguibaa, guideb nabajpmi, te na'c niejtni. Diru rebejn nidxälmi sa'csi asinä Diosni xhaguibaa. Luxh räjp Dios xcuentni che gajd Dios jinäni, gubañsa'cni, baspaani lajz Dios. <sup>6</sup> Rut chu tejdi sajz guspaa lajz Dios palga dini chalilajz, sa'csi che guibigni lojni, nanab chalilajzni yu' Dios, chalilajzzeni sudeed Dios xcälñasa'cni loj renani rguilmi, nalajznu renani rlajz gumbeepac Dios.

<sup>7</sup> Gojpza toNoé yälirililajz. Che räjp Dios lojni siajbpac nisguij ni gajdreni fii, huililajzni. Bejnmi si'c ni räjp Dios. Bidxejbni sa'csi najni rusoob Dios xtiidxni, ni'c bencheeni te canuduxh te di niejt rexi'nni. Sa'csi gojpmi yälirililajzga, bejnmi gubibde rebejn guedxliuj, gunijtreni sa'csi direni nililajz xtiidxni. Dxejcti cua'ni yälñabañsa'c ni siaäd xcuent yälirililajz.

<sup>8</sup> Sa'csi gojp toAbram yälirililajz, basoobni xtidx Dios che gurejdx Diosni, biriini lajdxni te huijni cadre gudeed Dios yuj lojni te cuääzmi ro'c. Biriini lajdxni, mase dini gan caro chääni. <sup>9</sup> Gojp toAbram yälirililajz, ni'c huilajzmi si'c benzijt loj reyuj ni räjp Dios gudeedni lojreni. Ro'c guläjzreni si'c lajdx benzijt. Gulajzmi neñ reyuguijd, sigajcza bejn toIsaac näjza toJacoob, sa'csi näjza lojreni räjp Dios gudeedni yujga. <sup>10</sup> Niluxh toAbram cayunloj te guejdx nani sudzu'tz, te guejdx nani cuäxtiej Dios, nani gunchee lagajc Dios.

<sup>11</sup> Sigajcza gojp toSara yälirililajz te mase anajcni bengool niluxh agudejd chu xi'nni, cua'ni yälñabee xten Dios te gujcmi nan, guyu' te xi'nni, sa'csi huililajzmi susoob Dios xtiidxni. <sup>12</sup> Ni'cni mase siäddzungenajx dxej ni guet toAbram, guyu' xhidalduxh xajgni. Si'c rebalxhaguibaa näj si'c reguibäzlule' xten yujx ni tre' ro' nisdoo, si'c najcni xhidalduxh, nicla gac guigabreni.

<sup>13</sup> Guiraa rebejnre gujt, direni nica' yuj nani räjp Dios gudeedni lojreni; niluxh sa'csi rajpreni yälirililajz, bahuiireni lo yujga zitro, ni'c bibalajzreni, sa'csi anajreni najcni benzijt, cansajsireni lo guedxliuj. <sup>14</sup> Reni rnii si'c, rniliireni caguilsijcni cadre gac lajdxreni. <sup>15</sup> Paru niujnreni xhigab lajdxreni najc guejdx cadre biriireni, pet niajc nibisacreni ro'c. <sup>16</sup> Niluxh laareni rlajzreni te lajdxreni ni sajcru, nalajznu lajdx Dios xhaguibaa, ni'c rguilreni. Ni'cni di Dios guitujy gäbreni najcni Dios xtenreni, luxh alabencheeni guejdx cadre cuääzreni xhaguibaa.

<sup>17</sup> Gojpza toAbram yälirililajz ni'cni cheni bateed Diosni preeb, räjpni loj Abram gudeedni Isaac lojni lacuaa gudeedni xhiil, cuäjbni gugu'tni xi'nni lacuaa xhiil, luxh Dios ni najc tejtis aräjp lojni galooli: <sup>18</sup> "Isaac guniidx chu xhidajl xajglu, xagdoolu." <sup>19</sup> Sa'csi nanchee toAbram rajp Dios yälñabee te guspajpmi rebengut. Luxh si'cza cuasacni xi'nni, ascanu loj rebengut cuasacni xi'nni.

<sup>20</sup> Nájza toIsaac gojp yárlililajz benle'ni toJacoob nájza toEsaú, rájpní xhini'c gun tejpgareni. <sup>21</sup> Gojpza toJacoob yárlililajz, che agojl guetní, benle'ni guiro'p rexi'n toJosé. Dxejcti huistieni guzucajni yejc baston xtenni te si'c gojnni Dios. <sup>22</sup> ToJosé gojp yárlililajz. Che agojl guetní, rájpní sirii rexpejn Israel lajdx Egipto, gunibeezani xho gunnájreni xtzujtni.

<sup>23</sup> Gojp rexcuzajn Moisés yárlililajz, ni'c cheni gojl Moisés, bacua'tzrenini chon báii, sa'csi bahuiireni bázdaanni. Direni niu xtidx reii ni gunibeeni, rájpní ju'treni báz niguii. <sup>24</sup> ToMoisés gojp yárlililajz, ni'cni che aguroobni di rlanjni nirilajni xi'n xindxa'p reii xten Egipto. <sup>25</sup> Bejnni xhigab tednájni trabajw rexpejn Dios lacuaa niujnni redzuun ni rchaglajz rujn reben Egipto, sa'csi najc reni'c dojl, luxh tera'tsi ruspaareni lajz bejn. <sup>26</sup> Par laani maazru sajc tedni lagajc trabajw ni gudejd Jesucrist lacuaa niajpni reyálnasa'c xten Egipto sa'csi laani cabájztisni reyálnasa'c nani churu gudeed Dios lojni. <sup>27</sup> Gojp toMoisés yárlililajz biriini lajdx reEgipto, dini nidxejb yáldrxe'ch xten reii, huin-uutis gusudzu'tzni si'cni najc xhigabni, ruhuiini loj nani di guzen, nalajznu Dios.

<sup>28</sup> Gojp Moisés yárlililajz bejnni lanij xten pascw. Gunibeeni baroobreni rejn ro' xpuert rexpejn Israel te che ted angl xten yálgujt nicla te xingan galoo xten rexpejn Israel di guet. <sup>29</sup> Gojp rexpejn Israel yárlililajz gudejdreni galáii nisdoo ni laa nisdoxniaa luxh asdoo loj yubijdz rsiajreni si'c gudejdreni. Niluxh che rlanj rebejn Egipto nidejd, gubi' nis, dxejc gulo'reni neñ nis.

<sup>30</sup> Xcuent yárlililajz gurebä'n paderguij xten guedx Jericó, cheni basa' gajdz dxej caded huált rexpejn Israel guejdxga. <sup>31</sup> ToRahab, te gunaguijdx, gojpszani yárlililajz ni'c dini niejt che gujt renani di nuzobdiidx, sa'csi laani bacua'tzni gaii bejn nani sagula'tz xho najc guejdxga.

<sup>32</sup> ¿Xhiruxh guiniä? Di gal'di guiniä xcuent toGedeón, xcuent toBarac, xcuent toSansón, xcuent toJefté, xcuent toDavid, xcuent toSamuel, nájza xcuent retoprofe't. <sup>33</sup> Guiraareni gojp yárlililajz ni'c bejnreni gaan xhidajl reguejdx, bensa'creni yálguxhtis, cua'reni xcálracnáj Dios ni bia'n diidx xca'reni, basäureni ro' rebeedz. <sup>34</sup> Guyu'reni neñ te balduxh luxh xhet gujcdireni, gojl baxunreni te di niejtreni con espad. Reni gujc beñrdxajg, guzutzut'zreni gujcreni nadipduxh, gujcreni beñduxh lo guer, barilaagwreni resoldaad xten reni rdxe'ch lojreni. <sup>35</sup> Guyu' regunaa ni cuasac rextogoolreni, gubañsacreni lo reben gut.

Sgaiireni gujt xcuent yálrusacsí lacuaa nicäjbreni nusiech lajzreni te nuslaa bejnreni sa'csi rlanjreni xca'reni stee yálnabajn ni sajcru. <sup>36</sup> Sgaiireni gudejd trabajw guniyaj bejnreni, gudinnáj bejnreni chiir, cuaduuzareni caden, guyu'zareni latzguiib. <sup>37</sup> Guyu'za reni gujt che bacuaa bejn guij yejcreni o che gujcreni tio'p la' con sier. Guyu'za reni basacsí bejn te guro'nreni yárlililajz. Guyu'za reni gujt con spaad. Guyu' reni cuanzaj nezree nezrec, gojtreni guid-xiil nájza guid-dxib, sa'csi xhet rajpdireni luxh entis rdejdreni trabajw rusacsí bejnreni. <sup>38</sup> Sa' rebejn ga di nungäjl reben guedxliuj niääd rebejn ga lojreni. Cuanzaj rebejn ga nez lo reyubijdz cad xhet yu'di xhi gaureni nicla nis te yäreni; cuanzajreni nez neñ redajn, nez neñ rebiliää náj nez neñ guedduxh ni yu' neñ yuj. <sup>39</sup> Guiraa rebejn ga gojp yárlililajz, luxh ni'cni huä'p xpala'nreni, niluxh direni nica' ni bia'n diidx gudeed Dios lojreni, <sup>40</sup> sa'csi bejn Dios xhigab gunni te dzunsa'c lojreni. Bejn Dios xhigab guniidxni yálnasa'c loonu, naj tejsi guica'nu con laareni nani bia'n diidx guniidx Dios.

## 12

### *Guihuiitisnu lo Jesucrist*

<sup>1</sup> Ni'c najcni si'cni suga'nu galáii guiraa rebejn re luxh cahuiireni xcárlililaaznu. Ni'c do'o guisa'n te laad guiraa reni rusäu lo xnejznu, nájza redojl ni ruxhiid nuure lo xcálnabajn nu, te di jieednu chosaanu nez lo nezyuj ni sasanäanu nez cadre chonnu. <sup>2</sup> Do'o guihuidzu'tz

nez loj Dad Jesucrist nani guläxteij, nani guluuxza xcälirililajznu. Jesucrist gudejd trabajw lo crujz, dini nitujy gujtni lo sa' yälgujtgä, sa'csi najnni cheni agudejdni trabajw, sica'ni yälrbalajz; naj agurejni xladbee Dios cadre rnibeeni.

<sup>3</sup> Colyujn xhigab la'tu xho gudejd Jesucrist ladznäa reben dojl, te na'c guidxajgtu, na'cza jieedtu laj ni cabäjtuni. <sup>4</sup> La'tu gajd xtiejntu guixe' lo yälrucuanäj dojl. <sup>5</sup> ¿La abiäl lajztu xho balijdx Dios la'tu si'c xi'nni, ä? Scree caj xtiidxni lo reguijtz; räjpni:

Xinä, na'c cuälazlu xcälnej Dad niclaza jieedlu che tilnäjni luj.

<sup>6</sup> Sa'csi si'c runnaj Dad renani sanälajzni, rujnni ríaa guiraa renani rca'ni si'c xi'nni.

<sup>7</sup> Palga gatiyp lajzlu lo xcälnej Dios, sica'ni luj si'c xi'nni, sa'csi ¿chu dad di gunnaj xi'nni?

<sup>8</sup> Niluxh palga di Dios gunnaj la'tu si'cni runnajni guiraa rexi'nni, ditu gac xi'npacni, najctu xi'n redolguijdx. <sup>9</sup> Anajntu cheni gucnu biuux lo guedxliujre, bennaj xtdnu nuure te rsoobnu xtiidxni, te runsa'czanu si'cni rlajzni. ¿Xhicuent dinu cuadiajg xtidx xtdnu ni yu' xhaguibaa te si'c jia'pnu yäl nabajn, ä? <sup>10</sup> Xtdnu lo guedxliujre bennajreni nuure tio'p-choñ dxej, te gac gusoobnu xtiidxni. Niluxh si'c runnaj Dios nuure te jia'pnu te yäl nabanya, te gac nayazanu sigajc najcni laani. <sup>11</sup> Guliini xhet xhi yäl najdi ni rchalonu najc laaca che rsiajcnuni, racnaj tiejxhnu niluxh ria'nnu et laadi. Niluxh guiraa renani agudejd loj yäl najga rusoob xtiidxni, rca'reni te yäl nabanya ni rbecdxilajzreni.

### *Riez guze'ni xtidx Dios*

<sup>12</sup> Ni'cni colsudzu'tz renaatu ni abadxajg, colsudzu'tz yecxhijbtu ni abadxajg, <sup>13</sup> te colquiiil nezyuj xten xtidx Jesucrist te sudzu'tz ni'tu. Na'c guibicajtu lo xnezyujni.

<sup>14</sup> Colquiiil xho cuedxinäjtu guiraa rebejn. Colchanä te yäl nabanya, sa'csi renani di guibanyadi, digacdi fiireni loj Dad Jesucrist. <sup>15</sup> Colhuisa'c te di gunijt chutejtu lo xcälracnäj Dios, colnatiro gac chu tejtu si'c te cuanlaa ni rujn daan, sa'csi sa' bejnga suxhiñni guiraa renani ahuililajz. <sup>16</sup> Nicla tejtu na'c ga'p stee gunaa te laad, nungäjł cuäznäjni chäältisni. Na'cza gactu bejn ni di jiu xtidx Dios, si'c gujc toEsaú cheni bato'ni xcäl nasa'cni ni najc xtenni sa'csi najcni xingan galoo xtdni. Bato'nini te cua'ni yälrajwtis. <sup>17</sup> Anajntu, cheni rlajzni niunle' xtdnini te nica'ni ni najc xten xingangalooni, dini nica'ni mase guc-huin lajzni, binduxhni. Dxejcti diru niajcdi nica'nini.

<sup>18</sup> Colnatiro, sa'csi la'tu di'tu nibig lo te dajn cadre rajc rsiaj bejn, te dajn ni galoo cayecduxh guiboo, cadre nacäy, nacäiboo, cayajcza bedonduxh. <sup>19</sup> Diza diajgtu niejn xse' trompet, xse' Dios si'c biendiajg rexpejn Israel agujc xchero. Luxh che biejn diajgreni rediidxga, direni nutiplajz, gunabduxhrene na'cru guiniini lojreni. <sup>20</sup> (Sa'csi direni nutiplajz diidx ni caniini, räjpni: “Palga ted te mantis guläj xhuj dajnga, colju'tni con guij.”) <sup>21</sup> Te yäl nadxebduxh najc nani guzen ro'c, lagajc toMoisés räjp: “Cayacditä yälrdxejb.”

<sup>22</sup> Niluxh la'tu agubigtu lo dajn xten Sión, cad najc lajdx Dios ni nabajnpac, nalajznu guedx Jerusalén ni yu' xhaguibaa cadre yu' xhidalduxh xangl Dios, <sup>23</sup> cadre re' reni calä'p xpala'n Dios. Ro'c re'za reni najc xi'n Dios, renani acaj lajni xhaguibaa. Agubigzatu lo Diospac, ni najc Juejz xten guiraanu, näjza loj respit xten rebejn nani abasia Dios te anajcreni beñnasa'c. <sup>24</sup> Agubigzanu loj Jesucrist nani suga' galäii nez loj Dios näj benguedxliuj xcuent didxcoob ni bia'n Dios, näjza lo xtiejn Jesucrist ni badeedni lo Dios xcuent nuure. Jesucrist rniab jäjł lajz Dios, luxh ni'c sajcro loj nani rniab xtiejn toAbel. Xtiejn toAbel rniab quiix nani bagu'tni.

<sup>25</sup> Ni'c colnatiro te di cuälaztu nani canii lojtu rextiidxni. Palga di rebejn nidedbia sa'csi gulälaz nani baluii bejn ni siääd guedxliujre, ¿xho jiennu tedbianu palga guilälaznu nani ruluii nani siääd xhaguibaali? <sup>26</sup> Xse' Dios basniib guedxliuj galooli, niluxh naj rnisacni: “Ste huält susnibä xhet ganaxdi guedxliuj, susnibä näjza xhaguibaa.” <sup>27</sup> Che gunii “ste huält”, ni'c säloj guibicaj renani benchee Dios ni rac rniib, te jia'n renani digacdi guiniib.



<sup>28</sup> Luxh sa'csi lajdxnu ni guniidx Dios digacdi guiniibni, do'o guideed xquixtios lo Dios xcuentni, te si'c chunu loj Dios, chonälaaznuni guideb yälrdxejb näjza yälñadolajz, <sup>29</sup> sa'csi Xtiosnu najc si'c te balduxh ni ruse'c, ni runitlojza.

## 13

### *Xho guspaa bejn lajz Dios*

<sup>1</sup> Colchanuu lo yälñälajz sa'ni. <sup>2</sup> Di gusaantu gudeedu rolijztu guidzujñ biooz, sa'csi loj reni bejn si'c, yu'reni badeed rolijzreni bidzujñ xangl Dios rolijzreni, niluxh direni niacbee chu najcreni.

<sup>3</sup> Colsnaj lajztu reni yu' neñ latzguiib, ascanu la la'tu ni yunäreni latzguiib. Colsnajza lajztu renani basacsí bejn, ascanu la la'tu ni cagusacsíreni sa'csi näjza la'tu najctu beñguedxliuj si'c najcreni.

<sup>4</sup> Colga'p xpala'n yälğuchnaa te guiban-nayatu con chäältu sa'csi sujn Dios yälğuxhtis rebejn ni resnäjä chäääl bejn näjza reni rusguee rebeñxteb.

<sup>5</sup> Na'c chanälajztu meel, colguibalaznäjä ni rajptu, sa'csi Dios agunii: “Dipacna gusanälu, dizana cuälazälu.” <sup>6</sup> Ni'c dinu guidxeeb guiniinu:

Dad ni yu' xhaguibaa najc ni rcanäj narä;  
dina guidxebä xhitis ni gunnäjä bejn narä.

<sup>7</sup> Colsnaj lajztu renani baluui guibañsa'ctu, ni basule'za xtidx Dios lojtu; colhuii xho nabajñreni te sigajcza colchanä xcälñililajzreni.

<sup>8</sup> Sigajc gujc Jesucrist nani, sigajcza najcni nadxej, sigajcza sajcnii par tejpas. <sup>9</sup> Na'c gusaantu gusiejchreni lajztu xcuent ste'ca yälñuluii ni digac si'c najc xtidx Jesucrist. Sacduxh sudzu'tz lastoonu lo yälñacnäjä ni ruluui xtidx Dios, xhet lojdi yälñajwtis. Xhet sajcdi rebejn nani rujntis xhigab xcuent yälñajw.

<sup>10</sup> Nuurnu rajpnu garenca piään, ro'c digacdi xca' rebixhojz xhi gaureni si'c ni cua'reni neñ guidoguijd galoo. <sup>11</sup> Sa'csi xpixhojzro xpejn Israel rinä xtiejn reman neñ yu' ni laa dxanduxh te biäu lo dojl xten rebejn, niluxh rize'creni xpääl remanga te laad, dejtz guejdxga. <sup>12</sup> Si'cza gujt Jesucrist te laad, dejtz guejdx, te basiani xtojñ rebejn xcuent lagajc xtiejnii. <sup>13</sup> Naj colcho' chonnu loj Jesucrist te laad dejtz guejdx te guideednu trabajw näjza yälñxujy si'cni gudejd Jesucrist. <sup>14</sup> Sa'csi lo guedxliujre dxunlaasinu, niluxh caguuilnu laadxnu ni chu jäädru, te ro'c guidxunnu par tejpas. <sup>15</sup> Guideb xcälñacnäjä Jesucrist do'o guideedtisu xquixtios lo Dios si'c te gojn ni gudeednu lojni, guiliä'pnu xpala'nni näjä jielnu redij. <sup>16</sup> Na'cza jäälajztu guntu huen, gacnäjä sa'tu, sa'csi reni'cni najc redzuun ni rdxaglajz Dios.

<sup>17</sup> Colcuadijg xtidx reni rnibee la'tu, sa'csi laareni rcanäjreni lastoonu, si'cza laareni sudeedreni cuent lo Dios. Colyujñ guibalajzreni gunreni xtzuunreni, na'c gac-huin lajzreni sa'csi palga gac-huin lajzreni, xhet sajcdini par la'tu.

<sup>18</sup> Colñab lo Dios xcuent nuunu, sa'csi racbeenu naya xcäriejnnu, rlaaznu laaca jiennu guira'ti dzuun. <sup>19</sup> Rniä lojtu, guiniabrutu loj Dios, te gun Dios jiojb guibi'ä jäälä lojtu.

### *Te didxle' näj lult xtixtios*

<sup>20</sup> Dios xten yälñbedxilajz ni baspajñ Dad Jesucrist lo rebeñgut, Jesucrist najc baxtor-duxh xten rexiil xcuent rejn ni bejn gusojb didxcoob xtenni ni najc par tejpas. <sup>21</sup> Dios gun gactu beñsa'c, beñdxojñ loj xhitis te guntu ni rlanjni, näjä gunni loj guiraa nuure si'c ni rlanjni xcuent Jesucrist. ¡Colspaa lajz Jesucrist par tejpas! ¡Sugacni si'c!

<sup>22</sup> Resa'nu, rniabä lojtu, colcuedxii lajztu, colcuadijg rediidx ni ruliidxre, sa'csi riojbgaa cacuaä te labäz guijtze lojtu. <sup>23</sup> Colyacbee abirii bejtznu Timoteu latzguiib. Palga guidzujñajni ree, siädñääni jädhuiä la'tu.

<sup>24</sup> Colgudeed xtixtios loj guiraa renani ruluui la'tu näjä loj guiraa rebejtznu ni rililajz. Rebeñ Italia ruxhal xtixtios lojtu.



<sup>25</sup> Gacnāj Dios guiraatu. Sugacni si'c.

## Guijtz Nani Bacuaa Santiaag

### *Santiaag rucuaa guiitz loj renani nare'ch lo guedxliuj*

<sup>1</sup> Narä Santiaag, xmos Dios näjza xten Dad Jesucrist, ruxhalä xtixtios loj guitzubitio'p cuaa rexpejn Israel ni nare'ch lo guedxliujre.

### *Yälñajn nani runiidx Dios loonu*

<sup>2</sup> Rebetzä lo xtidx Dios, colguibalazduxhtis che rsiajctu recos nani ruquiiltu cuälaztu xnezyuj Dios, <sup>3</sup> sa'csi che rsiajctu reni'c, rsiajctureni te don la guliipac ahuililajztu xtidx Dios, dxejc rsieedrutu yälrbecdxilajz. <sup>4</sup> Dxejcti yälrbecdxilajz sajc gunni xtzuunni neñ lastootu, te gactu beñsa'c, bejn ni aguyajl lo xtidx Dios, nani xhet cayäädxd xcalñajnni.

<sup>5</sup> Palga yu' tejtü ni cayääd xcalñajnni, suguiniabnini lo Dios, sa'csi Dios rudeedduxhni yälñajn loj guira'ti bejn, luxh dini guinii didxlaa lojni. Palga guiniab bejn, sudeedza Diosni. <sup>6</sup> Niluxh che guiniabni, suchalilajzpacni, na'c guntio'p lajzni, sa'csi bejn ni runtio'p lajzni najc si'c bāj ni sanä bej, nezree-nezre'c sääbni. <sup>7</sup> Nani najc si'c, na'c gunni xhigab yu' xhi xca'ni lo Dad Jesucrist. <sup>8</sup> Sa'csi nani runtio'p lajzni, lo guiraa ni rujnni nadxej rujnni tej xhigab, guixee rujnni xte'ca xhigab, di gacdi chanuuni tejsi xhigab.

<sup>9</sup> Te sa'nu ni najc nadolajz, suguibalajzni sa'csi najcni beñro sa'csi guläs Diosni, <sup>10</sup> sigajcza bejtznu ni yu' xhixtenni, suguibalajzni sa'csi abaluu Dios lojni najcni bejn ni xhet sajcdini, sa'csi nägajc laani sinitlojni si'c rnitloj reguii ni yu' lo cuaan ni yu' loniaa. <sup>11</sup> Sa'csi che rliejn gubijdz näjza te belaa, li rgoł recuaanga, li riuii reguii ni caj lojni, dxejc rtejbreni, dxejcti agunijt xcalñajnni. Si'cza sinitloj te bejn ni yuduxh xhixtenni lał ni yu'ni lo xnezyujni.

### *Xhi xca'ni che tedni trabajw*

<sup>12</sup> Chicbaa niguii ni rsiudzu'tz lał ni cadejdni trabajw, sa'csi che agunii Dios didxsa'c xcuent nani bejn sica'ni coron xten yälñabajn par tejpas ni bia'n Dios diidx gudeedni loj rebejn ni sanälajz Dios. <sup>13</sup> Che gunijt tejtü, rujntu dojl, na'c gäbtu: “Dios bejn banitä”, sa'csi di gacdi quiquiil Dios te gunni cosguijdx, digacdi gunijt Dios, luxh sigajcza di gacdi gun Dios gunijt te bejn, gunni dojl. <sup>14</sup> Niluxh teygatu runijt che rcäy xcariejntu sa'csi riajb yejctü guntu cosguijdx. <sup>15</sup> Che riajb yejctü guntu cosguijdx, runijttu rujntu dojl, luxh dojl che abejntuni, riädñani yälgujt.

<sup>16</sup> Sa'ä ni sanälazä, na'c gusaantu gusgueereni la'tu. <sup>17</sup> Guiraa recoshueen, guiraa recossa'c xhaguibaali siädreni loonu; Dios ruxhalreni, lagajc Dios ni benchee rebajl xhaguibaa, Dios nani di guchaa, sigajctis najcni. <sup>18</sup> Lagajc xcuentni bejn Dios gacnu xpejn sa'csi huililajznu xtidxliipacni, te gacnu rebeñ galoo loj rexpejn.

### *Xho nanab jiennu*

<sup>19</sup> Acanajntu recosre, sa'ä ni sanälazä. Niluxh teygatu nanab gusquejn te gucuaadi-ajgni, per gaclaani te guiniini, gaclaazani te guidxe'chni, <sup>20</sup> sa'csi xcalrdxe'ch bejn dini gun xcalñasa'c Dios. <sup>21</sup> Ni'cni colcuälaz guiraa recosguijdx, guiraa recoslatsiaj ni ria'n. Guideb yälñadolajz colchalilajz xtidx Dios ni basule'nu, ni yu'pac lastootu, sa'csi ni'c najc ni sajc guslaa xaimtu lo dojl.

<sup>22</sup> Niluxh baluii lo guira'ti bejn najctu bejn ni rusoobpactu xtidx Dios, xhet bejn di ni rucuaadijgtis xtiidxi, ni rusgueeni lagajc laani. <sup>23</sup> Sa'csi palga najc te bejn te nani rucuaadijgtis xtidx Dios, niluxh dini gusoob diidxga, najcni si'c te bejn ni ruhuii lojni loj te guihuaaj. <sup>24</sup> Sa'csi che ruhuii xho najcni, sägajcni, riallazgajcni xho najcni. <sup>25</sup> Niluxh nani ruhuidzu'tz lo leisa'c, nalajznu leiñ nani ruslaa bejn, luxh rusobpacni

leiiga, nani lacuaa jiallajzni nani riejn diajgni, rujnpacni ni caj lo leiiga, bejn̄ga najc ni sajp yälrbalajzpac lo xhitis ni rujnni.

<sup>26</sup> Palga yu' tejt̄u ni rujn xhigab najcni te bejn̄ ni ran̄duxh Dios, niluxh di gacdi gusauni ro'ni, guiraloj rniini, bejn̄ga rusguee lagajc laani, luxh xhet sajc̄di yälrajn̄ Dios xtenni.

<sup>27</sup> Yälrajn̄ Dios ni najc guliipac, ni xhet nu'chdi lojni najc scree: chahuiini rebisiäjb, näjza regunaa ni agujt chääl̄ni che yu' xhi rquini reni, näjza na'c säblajz̄tu guntu nani rujn reben̄ guedxliuj ni di chalilajz̄ xtid̄x Dios.

## 2

### *Nanab tebloj jiennänu guira'ti bejn̄*

<sup>1</sup> Resa'ä, la'tu ahuililajz̄tu xtid̄x Dad Jesucrist ni rajp̄ guiraa yälrdimbicha', ni'c di gacdi guntu xhigab sajcru tej bejn̄ lo sabejn̄ni. <sup>2</sup> Palga guidzujn̄ te bejn̄ xquidootu yu' niloor naani, najcwni ladsa'c, dxejcti jiu'za te bejn̄ nani xhet rajp̄di, najcwni ladyujxh, ladbeed, <sup>3</sup> dxejcti la'tu jiurutu nani najcw ladsa'cga, naatu: “Ree gurej lo yagxhilsa'cre”, dxejcti gäblu lo bejn̄ ni xhet rajp̄di: “Rec gusulii o gurej lo yujre”, <sup>4</sup> ¿la xhet rujnditu xhigab garenca najc tej bejn̄ lo sa'ni, ä? Luxh dxej̄c acayajct̄u si'c juejz̄ ni rujn xhigab guijdx.

<sup>5</sup> ¡Colgucua diajg, betzä ni sanälazä! Agule Dios bejn̄ nani xhet rajp̄di lo guedxliujre te ga'preni yälrlilaz̄duxh, te lo xcäl̄rnibee Dios xca'reni xcäl̄nasa'c ni bia'n diid̄x gudeed Dios loj renani sanälajzni. <sup>6</sup> Niluxh la'tu agulälaz̄tu rebejn̄ nani xhet rajp̄di. ¿Xhixh xhet laadi rebejn̄ ni rajp̄ ni rusacsítu, li rgobxhaxhreni la'tu, rinäreni la'tu loj reguxhtis, ä? <sup>7</sup> ¿La xhet laadi rebejn̄ ni rajp̄ ni rniyaj loj Dios ni sacduxh? La'tu abirilajtu rexi'n Dios.

<sup>8</sup> Palga guliitu cagusoobtu leii xten xreinu Dios, si'cni caj lo xquijtz Dios scree: “Colchanälajz̄ sa'tu sigajc rinälajz̄tu lagajc la'tu”, laaca rujntu. <sup>9</sup> Niluxh palga rinälajz̄rutu tej cuaa bejn̄ lo stee cuaa bejn̄, cayujntu dojl̄, luxh xleii Dios rni najct̄u bejn̄ dojl̄, bejn̄ ni rbälaz̄ leii. <sup>10</sup> Palga yu' te bejn̄ ni rusob guiraa ni caj lo xleii Moisés, niluxh runijtni lo tejtis diid̄x ni caj lo leii, abanijtpacni, najcni si'cni dini nusoob nicla tej diid̄x lo guideb leiiga. <sup>11</sup> Sa'csi lagajc Dios ni gunii: “Na'c guesnäjl̄u bejn̄ ni di gac chäällu”, lagajc laani guniizani: “Na'c ju'tlu.” Palga dilu guesnäj̄ bejn̄ ni di gac chäällu, niluxh rugu'tlu te bejn̄, abanijtlu xcuent guiralii releii. <sup>12</sup> La'tu colguinii, colguibajn̄ si'c rebejn̄ ni gun Dios yäl̄guxhtis con xtiid̄xni ni ruslaa bejn̄ lo dojl̄. <sup>13</sup> Sa'csi renani di gulaslajz̄ bejn̄, che gun Dios yäl̄guxhtisreni, dizani gulaslajz̄ laareni. Sajcru yäl̄rulaslajz̄ lo yäl̄guxhtis.

### *Yälrlilajz̄ näj̄ dzuun ni rujn̄ bejn̄*

<sup>14</sup> Resa'ä, ¿xhi sajc palga guinii te bejn̄: “Ahuililazä xtid̄x Dios”, niluxh dini gun dzuun ni riäj̄l̄ gunni, ä? Sa' yälrlilajz̄re, ¿la suslaanini lo dojl̄, ä? <sup>15</sup> Palga yu' te bejtznu o te bisiajn̄nu ni dini ga'p xhajbni, luxh xhetiza xhi gauni, xhi yäni, <sup>16</sup> luxh gäb tejt̄u lojni: “Sucuedxi lajz̄lu j̄ilu, suguidxa' lajz̄lu, suguidxaj̄ xque'lu”, niluxh dini gudeed nani caquiinni, ¿xhi sajc rediidx ni räjp̄ni lojni, ä? <sup>17</sup> Sigajcza yälrlilajz̄ nani di guquiil bejn̄ gunreni xtz̄uun Dios najc si'c te ni agujt, sa'csi dini guquiil bejn̄ gunreni dzuun.

<sup>18</sup> Yu'za reni naa: “Luj rajplu yälrlilajz̄, narä runä xtz̄uun Dios; baluii narä xcäl̄rlilajz̄lu xhet näj̄di xtz̄uun Dios, dxejcti narä suluiä xcäl̄rlilazä xcuent rextz̄uun Dios ni runä.”

<sup>19</sup> La'tu rililajz̄tu yu' tejtis Dios. Laaca rujnlu, niluxh näjza reben̄dxab rililajz̄ yu' tejtis Dios, racdiiltireni, rdxebduxhrenini. <sup>20</sup> ¿La di rlajz̄tu gacheetu, beñayääl? ¿La ditu gan, yälrlilajz̄ ni di guichagnäj̄ xtz̄uun Dios najc te yälrlilaz̄gut? <sup>21</sup> Dios badzucaj̄ xtoj̄l̄ toxtadgoldoonu Abram sa'csi bejn̄ni si'c gunibee Dios gunni, che badzuubni xingaanni Isa'c lo piään, nugu'tnini nez lo Dios. <sup>22</sup> Colhuii xho tejsi junt sadxaag xcäl̄rlilajz̄ toAbram dzuun ni bejn̄ni, dxejcti sa'csi bejn̄ni nani gunibee Dios gunni, bejn̄ Dios guj̄c xcäl̄rlilajz̄ni sa' yälrlilajz̄ nani rlajz̄ Dios ga'p rexpejn̄ni. <sup>23</sup> Dxejcti huile' xtid̄x Dios cadro caj scree: “Abram huililajz̄ ni räjp̄ Dios lojni, ni'cni badzucaj̄ Dios xtoj̄l̄ni, cua' Dios Abram si'c te beñaya.” Birilajzani “xamiigw Dios.”

<sup>24</sup> Ni'cni ruhuiitu rca' Dios te bejn si'c bennaya nez lojni xcuent xtzuum Dios ni rujnzani, xhet ganaxtis xcuent xcälirililajz bejnga. <sup>25</sup> Sigajcza gusajc toRahab, ni gujc te gunadxab. Dios badzucajza xtojlni, bejn Dios xhigab najcni te bennaya sa'csi bejnni xtzuum Dios che badeedni rolizni bacua'tzloj tio'p xpejn Israel ni gujc guixhajg ni sagula'tz guejdxga, dxejc gucnäjnireni te siireni ste'ca nez yuj. <sup>26</sup> Sigajc ni di gacdi guibajn tiejxh bejn palga xheti sprit, sigajcza di gacdi guibajn yälirililajz palga dini gun dzuun ni rnibee Dios gunni.

### 3

#### *Rediidx nani rnii luudxnu*

<sup>1</sup> Resa'ä, na'c gac xhidajltu bejn ni ruluii xtidx Dios, sa'csi anajnnu rac yälguxhtisoru rebejn nani ruluii xtiidxni. <sup>2</sup> Sa'csi guiragajcnu riennu xhidajl cuaa dojl. Palga yu' te bejn ni di gunijt lo diidx ni rniini, laani najcni te bejnsa'c, rajcza rnibeeni guideb tiejxhni. <sup>3</sup> Palga rusälnu guib ni ru' ro' cabaii te chääni cadre rlanjnu jiini, rnibeezanu guideb xtiejxhni. <sup>4</sup> Colhuii rebarcwro, mase siolduxhrene, luxh rebeduxh rulanaareni, niluxh capitán ni rusaj barcw lo nisdoo, te guibbäz ni caj xhajn barcw neñ nis, con ni'ctis rinänini cadrotis rlanjni. <sup>5</sup> Sigajcza najc luudxnu, najcni te labäz tiejxhnu, luxh colhuii lacti didxro rniini. Najcni si'c te balbäz ni rajc ruze'c guiragajc reyajg ni yu' dajn. <sup>6</sup> Luxh luudxnu najc si'c te bajl. Rnii luudxnu guiraa redidxdxuudx ni rnii rebejn guedxliujre nani rdxe'ch lo Dios. Lo guiraa rela' ni najc tiejxhnu, laa luuxdnu ni rundxuudx guideb tiejxhnu. Luudxnu ralguij con xquiboo gabijl. <sup>7</sup> Rebejn sajc gusiadcooreni guiraloj guidxaa, guiraa mane', guiraa bäl, guiraa man lo nisdoo, abasiadcoo bejnrene, <sup>8</sup> per nicla tej bejn di gacdi gusiadcoo lujdxni. Dini cuedxi, guidxani cosguijdx, najcni si'c te bäl ni rauya'ni rugu'tni te bejn. <sup>9</sup> Lagajc luudxnu rliä'pnu xpala'n Dios Xtradnu, lagajc laani rniyajnu sabejnnu ni benchee Dios sigajc najcni. <sup>10</sup> Tejsi ro'nu rnile' lo Dios nägajcza rgue lo bejn. Rebetzä, xhet si'c di nungäjldi gacni! <sup>11</sup> ¿La rbää bejn nisnejxh näjza nisrop lo tejsi bisie, ä? <sup>12</sup> Betzä, ¿la caxajsi sajc xcaj aceitun loj te yagiigw, ä? ¿O la sajc xcaj iigw lo te yaguub, ä? Sigajcza digacdi guirii nisnejxh näjza nisrop lo tejsi bisie.

#### *Yälnejn ni siääd xhaguibaa*

<sup>13</sup> ¿Chuni'c lo guiraatu yu' xcäriejnni, nanduxhni, ä? Suguluini xho najcni xcuent xcäl'nabansa'cni, sugunni xtzuumni guideb yäl'nadolajz ni rudeed xcäriejnni. <sup>14</sup> Niluxh palga yu' yälrdxe'ch lo sa'lu ni runnanlaa lastoolu, näjza rujnlu guira'ti parsi xcäl'nasa'c lagajc luj, na'c gaclu gualajz, sa'csi ni'c najc si'c ni caniilu didxrusguee xcuent xtidxlii Dios. <sup>15</sup> Sa'csi sa' yälnejnre, xhet xhaguibaadi siäädni, alga najcni yälnejn xten guedxliujre, xten rebejn guedxliuj, xtenza rebejdxab. <sup>16</sup> Sa'csi cadre yu' yälrdxe'ch lo sa'ni, näj cadre rujn bejn guira'ti parsi xcäl'nasa'c lagajc laani, ro'c yu' bieje, yu' guiraloj latsiaj. <sup>17</sup> Niluxh yälnejn ni ruxhal Dios, ganiddoo najcni naya, dxejcti rulecdxini xcäriejn bejn, dxejc rujnni rajc bejn nadolajz lo sa'reni, rujnzani saru runnäj bejn sa'reni, rulazlajz bejn sa'reni, rujnzareni guiraloj dzunsa'c, runle'pacreni xtiidxreni, direni guinii tej diidx laaga cayujnrene garenca dzuun. <sup>18</sup> Renani rguuil yälrbedxi, yälrbedxi rbe'creni te xca'reni te yäl'nabannaya nez loj Dios si'c xcäl'nasa'creni.

### 4

#### *Ni nabannäj guedxliuj*

<sup>1</sup> ¿Casiääd rebieje, reyälrdxe'ch lo sa'ni ni casiajctu? ¿La direni jääd xcuent lagajc xhigab ni yu' lastootu, ä? Lagajc rehxigabga rujn bieje neñ lastootu, ruscäyireni xcäriejntu. <sup>2</sup> La'tu rlanjtu ga'ptu nani ditu ga'p, dxejcti rugu'ttu sa'tu. Rsiäblajztu xhixten sa'tu, luxh sa'csi digacdi xca'tuni, dxejc rucuanäjtu sa'tu, rdilnäjtu sa'tu. Ditu ga'p nani rlanjtu sa'csi ditu guiniabni loj Dios. <sup>3</sup> Rniabtuni, niluxh dini guniidxnini sa'csi xhet laadi najc xhigabtu gunabtuni, alga gunabtuni sa'csi rlanjtu gunijttuni si'cni rlanjtu.

<sup>4</sup> ¡Aii! Bejn ni di gandzu' Diostis. ¿La ditu gan bejn nani rlanj gun redzuun ni rujn reben guedxliuj, bejnnga rdxe'chreni lo Dios, ä? Ni'cni palga yu' chu tejtü ni rlanj chanuu lo ni rajc lo guedxliujre, bejnnga rdxe'ch lo Dios. <sup>5</sup> O ¿la rchalotu xlia'si caj lo xtidx Dios rediidxre: "Sprit ni baxhal Dios te cuääzni neñ lastoonu, randzu'ni nuurnu sa'csi rlanjni guinibeeni nuurnu"? <sup>6</sup> Niluxh runiidxru Dios xcälracnäjni loonu. Ni'cni rnii xtiidxni scree: "Dios rdxechnäj renani runnaro lagajc laareni, niluxh rudeedrui xcälracnäjni lo rebennadolajz." <sup>7</sup> Coljiu'pac lo xnezyuj Dios. Colsudzu'tzpac te di guntu ni rlanj bendxab, te guxunni lojtu. <sup>8</sup> Colguibigru lo Dios te guibigzani lojtu. Bendojl, colquiib naatu, nalajznu na'cru guntu latsiaj; colgusia lastootu, la'tu ni runtio'p lajztu. <sup>9</sup> Sugacnaj lajztu, suchuti xliajs, colyonduxh. Colguchaa xcälruixjstu, colca' yälhuin, colguchaa xcälrbalajztu, colca' yälroon. <sup>10</sup> Colyajc si'c bejn ni xhetliidi sajz nez loj Dad Jesucrist, te laani guiliäsni la'tu gunni la'tu beñro.

### *Na'c guiniyajtu sa'tu*

<sup>11</sup> Rebetzä, na'c guiniyajtu resa'tu. Sa'csi renani rniyaj sa'ni o rujnni yälguxhtis sa'ni, reni'c rniyaj xleii Dios, rujnreni yälguxhtis xleii Dios luxh palga guntu si'c, dirutu gac renani rusoox xtidx Dios, alga najctu juejz xten leii. <sup>12</sup> Tejtis najc nani runiidx leii loonu, tejtis najc juejz; najcni nani rajc ruslaa bejn lo dojl, nani sajzca gunitloj bejn. La'tu, ¿chuxh najctu te guntu yälguxhtis lo sa'tu, ä?

### *Dinu gan xhi gac guixee*

<sup>13</sup> Naj colcuadiajg dee, la'tu ni rniitu, nadxej o guixee chonnu te guejdx nezrec. Ro'c guideednu tebijz te guiziinu, guito'nu te jiennu gaan meel. <sup>14</sup> Luxh nicla gantu xho gac xcäl nabajntu guixee. Xcäl nabajntu najc si'csi te za nani rienloj tera'tbäz, dxejcti rnitlojni. <sup>15</sup> Hueenru guiniitu scree: "Palga rlanj Dios sibaannu, te jiennu dee o dec." <sup>16</sup> Niluxh si'c ni rujntu naj, rajc gualajztu rniitu didxro; luxh guiraa redidxroga najc dojl. <sup>17</sup> Ni'cni ni najn xho riäjł gunni, palga dini gun si'c, rujnni dojl.

## 5

### *Rulijdxni rebejn ni yu' xhidajł xhixtenni*

<sup>1</sup> Colgucuardiajg xtidxä, bejn ni yu' xhidajł xhixtentu. Colyoon, colcuedxa' xcuent reca-sionduxh ni sactu. <sup>2</sup> Guiraa rehxixtentu nani rajptu aguxhijn, luxh rehxajbtu agudajw rebaguiidni. <sup>3</sup> Oor näjza pla't xtentu agubibtejnni, aguxhijnni. Lagajc dee gun gacbee Dios ditu niujn ni rlanj Dios guntu, lagajc ni'c gun chectu, nitlojtu. ¡Xlia'si batiedajntu xhixtentu neñ redxej lultga! <sup>4</sup> ¡Colhuii! Ditu niguixsa'c loj reni bejn xtzuuntu, ni'cni laareni cayujnreni yälquij lo Dios xcuenttu. Luxh xhadiajgli Dios xten reangl ni yu' xhaguibaa abidzujn yälquij xtentu ni cabe'c renani batie' xcäl nasa'ctu. <sup>5</sup> Agubansa'cpactu lo guedxliujre, bejntu lanij si'ctis ni rlanjtu, abastio'tu lastootu neñ redxej xten yälругu't. <sup>6</sup> Gudiiltu xho bagu'ttu rebeñsa'c luxh laareni dxiitis gusujreni, xhet bejndireni te na'c nugu'ttureni.

### *Colcuääz jiädxhii Diostu*

<sup>7</sup> Resa'ä, dxitis colcuääz guidzujn dxej cheni jiääd Dad Jesucrist. Colhuii xho rujn bejn ni rbe'c binij, dxitis rbäjzni gac xcäljni lał ni riabj nisguigaloo näjza nisguij ni riabj lult. <sup>8</sup> Si'cza la'tu colcuäzdx, colgustioob lastootu sa'csi asiäddzungajxh dxej ni jiääd Dad Jesucrist. <sup>9</sup> Resa'ä, na'c chale'ctu xquej sa'tu, didi gun Dios yälguxhtis la'tu, sa'csi asiäddzungajxh dxej che guidzujn Dios ni najc juejz. <sup>10</sup> Rebetzbidä, colhuii xho gudejd reniguii nani bacuaa xtidx Dios trabajw galoo, xho guläjzaren. <sup>11</sup> Colhuii xho rniinu chicbaa renani guläzdx lo trabajw ni gudejdreni. Abiejn diajgzatu xho bejn Job che gudejdni trabajw, anajnzatu xho guzajcni xcuent redzunsac ni bennäsac Diosni, ni ruluiloj xho riaduxh Dios bejn, rapduxhni yälrulasajz.



<sup>12</sup> Rebetzä, che ria'ntu diidx lo te bejn, gunatiro palga gusä'ttu xhaguibaa, o guedxliuj, o xhi steeni. Che naatu: “Mbaj”, ni'ctisza colguinii. Che naatu: “Na'c”, ni'ctisza colguinii te na'c gun Dios yälguxhtis la'tu.

<sup>13</sup> ¿La yu' tejtü ni cadejd trabajw, ä? Suguiniabni lo Dios. ¿La yu' chu tejtü ni cabalajz, ä? Sugolni dij te guiliä'pni xpala'n Dios. <sup>14</sup> ¿La yu' chu tejtü ni cayacxhuu, ä? Sucueedxni rebengool ni rnibee nen guidoo, te guiniabreni lo Dios xcuentni lal ni cagusälzarení se't lo cuajni con laj Jesucrist. <sup>15</sup> Luxh palga rililajzpacreni che canabreni, siajc benracxhuuga, siliäs Jesucrist bejnga. Luxh palga bejnni dojl, sibicaj xtojlni. <sup>16</sup> Ni'cni colguxhobdojl lo sa'tu, colnab lo Dios xcuent sa'tu te jiajctü. Che rniabduxh te ben naya lo Dios, dzunroza rujn Dios. <sup>17</sup> Elías, te bejn ni gunii xtidx Dios agujc xchero, gujczä te bejn sigajc najcnu. Gunabdipni loj Dios te na'c jiajb nisguij, luxh di nisguij niajb lo guedxliuj chon ijz garol. <sup>18</sup> Dxejc gunabsacni lo Dios, dxejc bixal xhaguibaa, biabsac nisguij, dxejcru gujc reyälNASA'c xtenreni lo guedxliuj.

<sup>19</sup> Rebetzä, palga yu' chu tejtü ni guibicaj lo xtidx Dios, luxh yu' chu gacnäj guibisacni lo xtidx Dios, <sup>20</sup> sugacbee bejn nani racnäj guirii bendojl lo xnezyuguijdxni te guibisacni lo Dios, bejnga agucnäjni te gulaa xaimni lo yälgujt, te gubicajza guiraa xtojlni, mase xhidalduxh najc xtojlni.

## Guijtz Ganid Nani Bacuaa Pedr

### *Pedr cacuaa guijtz loj reni rililajz ni nare'ch*

<sup>1</sup> Narä Pedr, te apost xten Jesucrist, cacuaä guijtzre loj renani agule Dios gac rexpejn̄ni nani rbäjz si'c beñzijt lo reguedx Ponto, Galacia, Capadocia, Asia, näjza Bitinia. <sup>2</sup> Xtdnu Dios gule la'tu galooli bencheeni niguii, aguleni la'tu par lagajc laani te gun Sprit Dxan xtenni xtzuunni neñ lastootu te gusoobtu xtidx Jesucrist te jia lastootu con xtiejn Jesucrist. Rniabä lo Dios gacnäduxhruni la'tu, guscuecdxini lastootu lo guiraliiti.

### *Te yäl̄nabajn̄ ni cabääznu*

<sup>3</sup> Colguiliä'p xpala'n Dios ni najc Xtd Jesucrist, Dios nani xcuent xcäl̄rulaslazduxhni bejn̄ni gojpn̄u te yäl̄nabañcoob sa'csi baspañsacni Jesucrist loj rebengut. Sa'csi rajpn̄u yäl̄nabañcoob, ni'c nadippac lajznu. <sup>4</sup> Ni'cni laani suniidxni te yäl̄rusalajz ni di nitloj, ni di xhin̄, ni di jiuui si'c riuii rebalajc. Yäl̄rusalajzga aguluchedzu'tzni xhaguibaa par la'tu, <sup>5</sup> nani cayapdzu'tz xcäl̄milaagwr xten Dios sa'csi rililajztu xtiidxni, te guluii Dios guira'ti ni rajpn̄i par la'tu, ni arapcheeni te guluiinireni lojtu che luux guedxliujre.

<sup>6</sup> Ni'cni rbalazduxhtu, mase nanab tedtu balti trabajw gaie'si dxej lo guedxliujre, <sup>7</sup> te guzeñ xho rililajztu. Xcäl̄rililajztu sajcr̄u lo oor nani rnitloj, niluxh xcäl̄rililajztu di nitloj, mase tedni lo guiboo, ni'cni sinii Dios didxsa'c, didxro, siliä'pni xpala'ntu che guibisac Jesucrist lo guedxliujre guideb xcäl̄milaagwrni, näjza xcäl̄rdimbicha'ni.

<sup>8</sup> Mase gajdtu fii lojni, sanälajztuni. Mase ditu fii lojni naj, ahuililajztu xtiidxni, rbalazduxhtu guideb yäl̄rbalajz ni rut rajcdi rusule', sa'ni yu' xhaguibaatis, <sup>9</sup> sa'csi xcäl̄rililajztu susläa xaimtu lo dojl̄, sica'tu yäl̄nabajn̄ par tejpas.

<sup>10</sup> Luxh xcuent yäl̄rusläa dojl̄re, rebejn̄ nani gunii xtidx Dios agujc xchero, laareni abasulexgaareni xcuent xcäl̄racnäjä Diosre nani siääd lojtu. Luxh bisiedduxhreni, gun-abdiidxzareni, <sup>11</sup> te rlanjreni gacheereni chu bejn̄ o gucpac gac nani cagusä't Sprit xten Crist ni yu' neñ lastooreni che gunixgaani xho nungäj̄l̄ ted Jesucrist trabajw, dxejcr̄u xcasacni yäl̄rnibee. <sup>12</sup> Baluii Dios lojreni, di rediidxga soob neñ redxej ni nabajn̄reni, alga par la'tu najc rediidxga. Naj agunii rebejn̄ ni rusule' xtidx Dios rediidxga lojtu. Abasule'reni xtidx Jesucrist sa'csi xhaguibaali baxhal̄ Dios Sprit Dxan xtenni te cuääzni neñ lastooreni. Näjza rexangl Dios ni rbäjz xhaguibaa rlanj gacheeruren̄i rediidxga.

### *Xcäl̄nabañnayanu nez loj Dios*

<sup>13</sup> Ni'cni, colsanij xcäriejntu, colgusudzu'tz lastootu, guideb lastootu colyenloj yäl̄racnäjä xten Dios ni abia'n diidx xca'nu che guibisac Jesucrist lo guedxliuj. <sup>14</sup> Gactu si'c biuux nani rusooob xtidx xtdni. Na'cru xcäjbtu guntu redzunguijdx ni bejntu galoo che gajdtu gumbee Dios. <sup>15</sup> Dios ni gule la'tu najc dxan. Sigajcza la'tu, loj guiralii ni rujntu colyajc beñdxan. <sup>16</sup> Sa'csi lo xtidx Dios caj scree: “Sajct̄u beñdxan sa'csi narä nacä dxan.”

<sup>17</sup> Palga la'tu rniitu “Dad” lo Dios nani tebloj rujn̄ yäl̄guxhtis loj guiraa bejn̄ xcuent dzuun ni bejn̄ni, la'tu riäj̄l̄ guidxejbtuni guiraa dxej ni nabañsijct̄u lo guedxliujre. <sup>18</sup> Anajntu di Dios nudeed yäl̄nasa'c ni rnitlojdi, si'c oor näjza pla't, te basläani la'tu lo recostumbr ni cua'tu lo retoxtadgoldootu. Recostumbrga xhet sa'cdireni. Di Dios nudeed oor nicla pla't te basläani la'tu, <sup>19</sup> badeedni rejn̄ ni sacduxh te basläani la'tu loj xtojlt̄u. Rejn̄ si'c xtiejn̄ te xiil̄ ni naya, xhetpac najcdini, xtiejn̄ lagajc Jesucrist. <sup>20</sup> Guliipacni che gajdli guirixtiej guedxliujre, gule Dios Jesucrist, niluxh najru, neñ redxelult che gajd guedxliujre nitloj, biädluilojni par xcäl̄nasa'ctu, <sup>21</sup> la'tu nani rililajz xtidx Dios xcuent Jesucrist. Luxh Dios baspañsac Jesucrist loj rebengut, badeedni yäl̄rnibee lojni, ni'cni ahuililajztu xtidx Dios, luxh Diostis cayenlojtu naj.

<sup>22</sup> Naj sa'csi abasoobtu xtidxliini, te si'c abasiatu lastootu te gac chanälajztu sa'tu, naj guideb lastootu colchanälajzpac sa'tu. <sup>23</sup> Sa'csi acua'tu xcäl'nabañcoobtu xcuent xtidx Dios ni najc par tejpas, et xcuentdi xtidx beñ guedxliuj ni rnitloj. La'tu najctu si'c cuaan ni rliejn lo bejdz ni siääd xhaguibaa, xhet lo bejdzdi ni rnitloj. <sup>24</sup> Galooli gunii Dios scree: Guiraa rebeñ guedxliuj najc si'c recuaan, guiraa xcäl'nasa'creni najc si'c reguii ni rcaj lo cuaan, recuaan rgoj, lirtejbza reguii xtenni, <sup>25</sup> niluxh xtidx xtdad Jesucristnu rsiudzu'tzni tejpas. Luxh diidre najc diidx ni basule'reni lojtu.

## 2

<sup>1</sup> Ni'cni colgusaan guiraa redzunguijdx ni yu' lo guedxliuj, na'c gusgueetu sa'tu, na'c guntiop lajztu, na'c chuguij lajztu xhixten sa'tu, na'c guiniyaj sa'tu. <sup>2</sup> Si'c riojl rebäznite' le'ch, si'cza colquiil xtidx Dios par sprittu. Coljiojl xtidx Dios te gustioobruni la'tu lo yälrusläa lo dojl, <sup>3</sup> palga agucebetu lacti hueen najc xcäl'racnäj Jesucrist.

### *Crist najc si'c te guij ni nabajn*

<sup>4</sup> Colguibig loj Jesucrist ni najc si'c te guij ni nabajn. Laani suniidx yäl'nabajn par tejpas loonu. Rebeñ badzucaj guijga, niluxh Dios gulenini sa'csi sacduxhni. <sup>5</sup> Sigajcza tejgatu najctu si'c guij ni nabajn, ni'c colgusaan xca' Dios la'tu, reguibajn, te con la'tu gunchee Dios te yu' cadre cuääz Sprit xtenni, te gactu rexpixhojz Dios, nani nayapac lastooreni. Ni'cni sa'csi najctu tejtis con Dad Jesucrist sudeedtu lo Dios guiraa xcäl'nasa'ctu con xpirt xtentu. Dee najc nani rchaglajz Dios. <sup>6</sup> Sa'csi galooli gunii Dios scree:

Agule'cä te beñ neñ guedx Siön, nalajznu Jerusalén, ni gac si'c te guisa'c, te guiro ni rsiuj squiin te yuro. Chutis beñ ni chalilajz xtiidxni, dini jianxtujy.

<sup>7</sup> Lojtu ni ahuililajz xtiidxni najcni si'c te guisacduxh, niluxh loj renani gajd chalilajz xtiidxni, najcni:

Guij ni gulälaz renani cayunchee yu', lagajc guijga gujc guijpac ni baliib squiin xten yu'ga

<sup>8</sup> näjza:

Te guij ni rliaj ni' beñ, ni ruzäl'ta'reni, laareni riabreni sa'csi direni gusoob xtidx Dios, luxh agunibexгаа Dios nitlojreni.

### *Renani gule Dios*

<sup>9</sup> La'tu najctu te cuaa beñ ni agule Dios, tejgatu najctu rebixhojz ni najc si'c reii xten Dios. La'tu najctu te beñnaya, te beñsa'c, rexpejñpacni. Aguleni la'tu te gusule'tu reyäl'nasacduxh ni beñ Dios ni gurejdxte che guyu'tu lo nezyunacäy xten guedxliujre te biu'tu lo nezyuj ni rdimbichasejz xten Dios. <sup>10</sup> La'tu galoo rut najcdu, niluxh naj najctu rexpejñpac Dios. Galoo gajd Dios gulaslajztu, luxh naj abalaslajz Dios la'tu.

### *Colguibajn lo xnezyuj Dios*

<sup>11</sup> Rebetzä ni sanälazä, nabajntu lo guedxliujre si'c beñzajt, ni rbäjz te laad, ni'c rniabduxhä lojtu, na'c guntu recosguijdx xten guedxliujre, ni rutijl neñ lastoo beñ te cuälazreni xnezyuj Dios. <sup>12</sup> Colguibansa'c laj ni yu'tu loj rebeñzajt ni di gac xpejñ Israel te palga guiniyajreni la'tu gäbreni najctu beñlatsiaj, che fiireni redzunsac ni rujntu, siliä'ppacreni xpala'n Dios che jädsac Jesucrist te gunni yäl'guxhtis.

<sup>13</sup> Ni'cni, sa'csi huililajztu xtidx Jesucrist, colgusoob xtidx guiraa reni rnibeetu lo guedxliujre, si'c najc presidento, <sup>14</sup> regubernadoor nani ruxhäni te rujnreni yäl'guxhtis rebeñdojl näjza te guiliä'pni xpala'n rebeñ nani laaca rujnreni. <sup>15</sup> Sa'csi Dios rlajz guntu recossa'c te cuecdxite rextidxnayäl ni rnii reni di rlajz gumbee didxlii xcuent Jesucrist.

<sup>16</sup> Colguibajñ si'c bejn ni rut rnibeedi, na'cza guntu latsiaj sa'csi rut rnibeeditu, colguibajñ si'c guinibee Dios. <sup>17</sup> Ga'ptu yälnadolajz loj guiraasi bejn. Colchanälajz sa'tu ni rililajz. Colguidxejb Dios, colguiliä'p xpala'n presidentro.

### *Gudejd Jesucrist trabajw te baluiini xho jiennu*

<sup>18</sup> La'tu ni najc mos, guideb yälnadolajz colgusobdiajg guiraa xtidx rexlamtu, xhet ganaxdi relamsa'c ni najc nadolajz, näjza relam ni najc benguijdx. <sup>19</sup> Sa'csi rchaglajz ruhuii Dios te bejn palga sa'csi rililajz te bejn xtidx Dios rujñ bejn huant che rdejdnı trabajw luxh xhet bejndini. <sup>20</sup> Palga la'tu rujntu latsiaj ni'cni rusacsıni la'tu, ¿xhi guntu gaan palga rujntu huant rdejdtu trabajw? Niluxh palga la'tu rdejdtu trabajw sa'csi rujntu redzunsac, luxh rujntu huant, ni'c najc laaca nez loj Dios. <sup>21</sup> Te guntu si'c gurejdx Diostu, sa'csi gudejdzä Jesucrist trabajw xcuenttu te guluiini xho guntu che chanuutu lo xnezyujni. <sup>22</sup> Laani dini niujñ nicla tej dojl, laani dini nusguee nicla tej bejn con didx-xhii. <sup>23</sup> Che guniyajreni lojni, dini nudzu' yälrniyajga. Che cadejdnı trabajw, dini nudzu' diidx niluxh bateedni lagajc laani ladzñaa Dios ni rujñ yälguxhtissac. <sup>24</sup> Gudeed Jesucrist trabajw si'c te bendolduxh, bacuaarenini lo cruzj te ro'c gusacsıduxh tiejxhni xcuent xtojñnu, te na'c gunrunu dojl, te guibañsa'cnu lo xnezyuj Dios. Gudilguijdxreni tiejxhni te basiajcnı la'tu. <sup>25</sup> Sa'csi galoo gujctı si'c rexiil ni rut rajpdi, rijreni nezree-nezrec. Niluxh naj agubisactu lo xpaxtoortu näjza nani randzu' xaimtu, Jesucrist.

## 3

### *Xho nanab guibaññajtu chäältu*

<sup>1</sup> Sigajcza la'tu, regunaa ni abachñaa, colgusoob xtidx chäältu, te mase yu' tejreni ni di chalilajz xtidx Dios, sililajzni xtidx Dios sa'csi fiini xho rujntu mase xhet rniidilu. <sup>2</sup> Sa'csi fiini xho riulu xtiidxni näjza xho rniilu nadolajz lojni, näjza xho nabannäsa'cluni. <sup>3</sup> Na'c gusucheeetu ganax lo jiaatis, si'c najc guichniil yejctı, näjza biaoör ni rcaj diajgtu, guejntu, ñaatu, näjza ladsac ni najc sacru. <sup>4</sup> Colgusuchenäj lastootu yälnadolajz, yälrbedcxi lajz, näjza yälsanälajz, sa'csi direni nitloj, luxh sacduxhreni nez loj Dios. <sup>5</sup> Galoo si'cza bejn regunaa ni gujç xpejn Dios ni huililajz xtidx Dios, basucheereni lastooreni, basobreni xtidx chäälreni. <sup>6</sup> Si'c gujç toSara, basobdiajgnı xtidx toAbram, guniizani lo toAbram, Dad. Naj najctı si'c laani palga rujntu redzunsac, näjza na'c guidxejbdıtu.

<sup>7</sup> Sigajcza la'tu, niguii ni abachñaa, colguibaññasa'c chäältu. Colgapdani sa'csi dini gacnadip si'c te niguii; nanab guntu si'c sa'csi näjza lojreni badeed Dios yälñabajn par tejpas. Colyejn si'c, te gucua diajg Dios che cuedx-guiniabtu lojni.

### *Renani rdejđ trabajw che laaca rujñreni*

<sup>8</sup> Dee najc ni cania loj guiraatu, saru colguibaññäj sa'tu. Colgulasajz sa'tu, colchanälajz sa'tu si'c rinälajz te niguii bejznı. Gactu beñsa'c, beñnadolajz. <sup>9</sup> Na'c gudzu'tu didxguijdx che guiniireni didxguijdx lojtu, na'cza gudzu'tu didxyaj che guiniireni didxyaj lojtu. Alga gunab lo Dios gacnäjñireni, sa'csi ni'cni gule Dios la'tu, te sica'zatu reyälñasac ni guniidxni lojtu. <sup>10</sup> Sa'csi scree caj lo xtidx Dios:

Nani rchaglajz guibajñni,  
luxh rlajzzani saru tedni redxej lo guedxliujre,  
sugudxojnı guinii ro'ni didxnaj näjza didx-xhii.

<sup>11</sup> Guibicajni loj redzunguijdx, sugunni redzunsac'tis.  
Suquuilni yälrbedxi te ni'c chanuuni.

<sup>12</sup> Sa'csi ruhuii Dios rebejn ni rujñ dzunsac,  
rucua diajgzani xtiidxreni che rniabreni lojni.

Niluxh rudzurėni lojni, rbälazzani renani rujñ latsiaj.

<sup>13</sup> ¿Chu laa ni gun latsiaj la'tu, palga la'tu rbaali lajztu rujntu dzunsac? <sup>14</sup> Palga caxäjsi tedtu trabajw che guntu redzunsac. ¡Chicbaatu! Na'c guntu xhigab, niclaza guidxejbtu

xcäl\_ruchejbreni. <sup>15</sup> Colgusaan guinibee Dad Jesucrist nen lastootu, gususin te gudzu'tu diidx loj reni rniabdiidx lojtu xhicuent runlojtu guibi' Jesucrist. Guideb yäl\_nadolajz saru gudzu'tu diidx. <sup>16</sup> Colguibaṅsa'c te cuedxi xcäl\_riejntu te che guiniyajreni la'tu sa'csi nabaṅsa'ctu loj Crist, jianxtujy reni rniyaj la'tu. <sup>17</sup> Sa'csi hueenru tedtu trabajw che cayuntu te dzunsa'c, palga si'c rrajz Dios, lacuaa tedtu trabajw sa'csi cayujntu dojl.

<sup>18</sup> Sa'csi sigajcza tejtis gujt Jesucrist xcuent rextoj\_lnu. Xhetliidi xtoj\_lni guyu' nez loj Dios, niluxh gudejdni trabajwduxh xcuent rebendojl. Bejnne si'c te gac guibignu lo Dios sa'csi gujt tiejxh Jesucrist, luxh guyusac sprit xtenni lo tiejxhni te gubaṅsacni. <sup>19</sup> Che gajd xpriṅni guibisac lo tiejxhni, huij spritni basule'ni diidx loj resprit ni yu' latzguibi. <sup>20</sup> Respritga najc renani di nusoob xtidx Noé che basule'ni xtidx Dios lojreni. Guläjz Dios rebejṅga guiraa redxej ni cayujn Noé barcwro agujc xchero. Bas\_laa Dios xcäl\_nabajṅ xhujntis bejṅ, xhet gujcdireni gudejdreni lo nisguiro ni biajb guideb guedxliujre. <sup>21</sup> Che robnisnu naj, rusnaalajznu rebejṅga; yäl\_robnisga ruluiloj xho rus\_laa Diosnu lo dojl. Et sa'csi riäjṅ beed lo tiejxhnu nen nisga, alga sa'csi dxejc rniabnu lo Dios guniidxni te xcäriensa'c, sa'csi sajc xca'nuni xcuent ni gubaṅsac Jesucrist lo rebengut. <sup>22</sup> Che birii Jesucrist loj rebengut, biu'ni xhaguibaa cadro gurejni xladbee Dios te ro'c rnibeeni loj rexangl Dios, näjza loj guiraa resprit ni rajc rnibee, ni yu' lo guedxliuj näjza xhaguibaa.

## 4

### *Colyejn xtzuun Dios*

<sup>1</sup> Ni'cni sa'csi agudejd Jesucrist trabajw cuajni lo cruzj xcuentnu, sigajcza la'tu riäj\_l guntu xhigab sidejdtu trabajw lo guedxliujre sa'csi nani agudejd trabajw, diruni gun dojl, <sup>2</sup> te guideb nabajṅni lo guedxliuj, guibajṅni si'c rrajz Dios, diruni guibajṅ te gunni redzunguijdx xten guedxliujre. <sup>3</sup> Sa'csi bejntu si'ctis ni rrajztu galoo, bejntu si'c rujn rebejṅ ni di gumbee Dios, bejntu si'cni rrajz tiejxhtu, bejntu latsiaj, gusojztu, bejntu relaniro, gudedcaj gusojztu, luxh bejntu cosxtuiduxh bazuxhijbzatu loj rebanäbdxab. <sup>4</sup> Dxejcti rebejṅ ni rujn recosga naj, rdxeloreni sa'csi dirutu gun ni rrajzreni, ni'c rniyajreni la'tu. <sup>5</sup> Niluxh laareni suureni nez loj Jesucrist ni agojl gun yäl\_guxhtis loj guiraa rebejṅ, rebejṅ ni nabajṅ näjza renani agujt, te gusule'reni xcuent nani bejnreni. <sup>6</sup> Ni'cni basule' Jesucrist xtidx Dios loj reni agujt, te mase che gubajṅreni lo guedxliuj gujcreni yäl\_guxhtis si'ctis ni rajc bejṅ, dxejc gujtreni, naj sprit xtenreni sinuu guibajṅ si'c ni rrajz Dios.

<sup>7</sup> Asiäddzungajxh dxej che guibisac Jesucrist lo guedxliujre. Ni'cni ganax laaca colyejn xhigab, colgusiṅ xcäriejntu te saru cuedx-guiniabtu lo Dios. <sup>8</sup> Niluxh ni maazru sajc najc yäl\_sanälajz resa'tu sa'csi che rinälajztu resa'tu, riallajztu xtoj\_l sa'tu. <sup>9</sup> Saru gurenäj bejṅ ni rdzujn rolizlu, na'c jiejy. <sup>10</sup> Abaniidx Dios loj tejgatu te dzuun ni sajc guntu. Dzuunga colyacnäj resa'tu, te si'c guluiitu lo resa'tu laaca cayunsa'ctu guira'ti nani baniidx Dios lojtu. <sup>11</sup> Palga tejtṅ najc xtzuunni guluiini xtidx Dios, suguniini ascanu najcni xtiidxpac Dios. Palga tejtṅ najc xtzuunni gacnäjni sa'ni, sugunnini, guideb yäl\_nadip yäl\_nadaan ni rudeed Dios lojni, te guira'tis ni rajc sujn guiliä'p xpala'n Dios xcuent Jesucrist. Sa'csi laatisni riäj\_l chä'p xpala'nni, laatisni riäj\_l guinibeeni tejpas. Sugacni si'c.

### *Xho nanab tednu trabajw*

<sup>12</sup> Rebetzä ni sanälazä, na'c guidxelojtu sa'csi cadejdtu trabajw ni najc si'c guiboo, ni siäd te gactu preeb. Na'c guntu xhigab xhichani'c casiajctu. <sup>13</sup> Colguibalajz sa'csi sigajc ni cadejdtu trabajw sa'ni gudejd Jesucrist, sigajcza sibalajztu che guiluiloj xcäl\_rdimbicha' Jesucrist. <sup>14</sup> Palga rniyajreni la'tu sa'csi rililajztu xtidx Jesucrist, chichaa la'tu, sa'csi rbäjz Xpriet Dxan xten Dios guideb xcäl\_rdimbicha'ni nen lastootu. <sup>15</sup> Gunatiro, andi gusaantu ted tejtṅ trabajw sa'csi bagu'ttu bejṅ, o sa'csi gulajntu xhi xten bejṅ, o sa'csi bejntu latsiaj, o sa'csi huichu'ni lo xcuent sa'ni ni xhet nungäjldi gacheeni. <sup>16</sup> Palga



yu' chu tej tedni trabajw sa'csi rililajzni xtidx Jesucrist, na'c guitujyni, alga suguiliä'pni xpala'n Dios xcuent Jesucrist.

<sup>17</sup> Abidzujñ dxej che ganid rexpejn Dios ted trabajw. Luxh palga ganid nuurnu gacnu yälguختis luxh ahuililaaznu xtiidxni, ¿xhocha gun rebejn nani di chalilajz xtidx Dios xcuent Jesucrist! <sup>18</sup> Lo xtidx Dios caj scree:

Lacti naganlajz rliaa rebenñaya lo dojl,

¿xhocha gunäjni rebejn nani di chalilajz xtidx Dios näjza rebenñojl?

<sup>19</sup> Ni'cni, guiraatu nani cadejd trabajw xcuent xtidx Dios si'cni rlajz Dios, colgudeed xprittu lo Dios ni di gusguee, ni bencheetu, te chanuutis guntu ni riäjł guntu.

## 5

### *Yälrułijdx loj renani ahuililajz xtidx Dios*

<sup>1</sup> Narä nacä te beñgool, bahuiä trabajw ni gudejd Jesucrist, bahuiäza xcälrdimbicha' Jesucrist ni guniidxni loonu che guibisacni lo guedxliujre. Ni'cni rulidxä la'tu ni najc rebenñgool, <sup>2</sup> colgajp renani rililajz xtidx Dios nani rajptu fiipactu xhi rujnreni. Colga'preni si'c te bejn ni rajp xiil, colyejnni guideb yejc, guideb lajztu. Colyejn si'c sa'csi si'c rlajz Dios guntu, na'c gunlojtu meel. Colguibalajz cayajptu rexpejn Dios. <sup>3</sup> Na'c guinibeetu lojreni si'c rnibee te lam loj reni rujn xtzuunni, colguluiireni xho gunreni con xcälñabansa'clu. <sup>4</sup> Che guibisac Jesucrist, ni rajp nuure, laani suniidxni xcuentnu, te yälñasacduxh nani dipac nitloj.

<sup>5</sup> Sigajcza la'tu ni najc bi'n, colgusobdiajg xtidx rebenñgool. Guiraatu coljju xtidx sa'tu, colguluii sa'tu guideb nadolajz. Sa'csi:

Dios rbälaz rebejn ni runnaro lagajc laareni,

niluxh racnäjni rebejn ni najc nadolajz.

<sup>6</sup> Ni'cni guideb yälñadolajz coljju lo Dios sa'csi rajpni yälñribeduxh, te guiliä'pni xpala'ntu che gal dxej ni guibisacni. <sup>7</sup> Colgudeed guiraa reyärsia' ni yu' lastootu lo Jesucrist te guscuecdxini xcäriejntu sa'csi laani sanälajzni la'tu.

<sup>8</sup> Colgusanij xcäriejntu, colsusin sa'csi rdxe'ch benñxab lojtu, cansaxhiga'tzni si'c te beedz nialajz, caguiilni chu guxhinni. <sup>9</sup> Colsudzu'tz nez lojni, guideb lastootu colchalilajz xtidx Dios, sa'csi anajntu sigajcza cayunnäjni guiraa rebetznu ni nabajn lo guedxliujre. <sup>10</sup> Che agudejdtu trabajw tiop-choñ dxej, Dios nani rajp guiraa yälracnäj, nani gurejdx la'tu te näjza la'tu xca'tu xcälrdimbicha'ni xcuent lagajc Jesucrist, lagajc laani sunsa'cni la'tu, bejn ni rsiudzu'tz lo xtiidxni, bejn ni nadip lajzni, bejn ni di guidxejb. <sup>11</sup> Laani rajpni yälñribeduxh par tejpas, guiliä'pnu xpala'nni par tejpas. Sugacni si'c.

<sup>12</sup> Siädnä Silvan guijtze lojtu. Runä xhigab najcni te bejn nani huililazsa'c xtidx Dios. Abacuaä bale'si diidxre lojtu te gulidxä la'tu, te guiniliä lojtu dee najc xcälñracnäjpac Dios. Colsudzu'tz xcuent yälñracnäjre.

<sup>13</sup> Rexpejn Dios ni re' lo guedx Babilonia ruxhal xtiixios lojtu sa'csi gule Dios la'tu sigajc guleni laareni. Marcw, ni najc si'c xi'nä, ruxhalza xtiixios lojtu. <sup>14</sup> Colguinii "xchan" lo teja sa'tu ro'c.

Rniabä lo Dios guscuecdxini lastoo guiraatu ni rililajz xtidx Crist.

## Guijtz Ni Rojp Ni Bacuaa Pedr

### *Pedr rucuaa te guijtz loj reni ahuililajz*

<sup>1</sup> Narä nacä Simón Pedr, ni rujn xtzun Jesucrist, te apost xtenni. Rucuaä guijtzre lojtu nani rililajz xtidx Dios sigajc ni rililajznu, sa'csi bahuii Dios loonu si'c beñnaya xcuent Xtiosnu Jesucrist nani baslaa nuurnu lo dojl. <sup>2</sup> Rniabä lo Dios gacnäduxhruni la'tu, guscuecdxiruni lastootu, te gacbeerutu xtidx Dios näjza Dad Jesucrist.

### *Xho riäjł gac rexpejn Crist*

<sup>3</sup> Sa'csi xcälrnibee Dios baniidx guira'ti ni rquiinnu te guibañsa'cnu, te gacnu beñnaya nez lojni, xcuent rililajzpac xtiidxni ni nansa'cnu xcuent Jesucrist nani gurejdx nuure, nani gule nuure te xca'zanu xcälrdimbicha'ni, näjza guiraa xcäl'nansa'cni. <sup>4</sup> Lagajc xcuent redee baniidxni rextidxliini, rextidxsacduxhni. Palga chalilajznu xtiidxni, sajcnu xpejn, sajcnu beñsa'c si'c najcni sa'csi abiriinu loj redzunguijdx ni chagłajz rujn rebejn ni ruxhiñ guedxliujre. <sup>5</sup> Ni'cni nanab gacbeenu xho nabañnu lo guedxliujre. Siroobru xcälrlilajztu sacnäjni la'tu te guibañsa'cnu lo Dios; luxh sa'csi nabañsa'ctu, siroobru xcäl'najntu xcuent dzunsa'c näjza dzunguijdx. <sup>6</sup> Luxh palga guroob xcäl'najntu xcuent dzunsa'c näjza dzunguijdx sajç guinibeetu tiejxhtu te na'c guntu dzunguijdx. Che guinibeetu tiejxhtu, sibedxi lajztu. Che arajptu yälrbedxilajz, sajçtu beñsa'c, beñdxan. <sup>7</sup> Che anajçtu beñsa'c, beñdxan, sinälajztu resa'tu; che asanälajztu sa'tu, arajçtu yäl'sanälajz sa'tu xten Jesucrist.

<sup>8</sup> Palga la'tu rusobtu guiraa rediidxre, luxh chanuutis caroobreni nen lastootu, ditu guibañxlia'; sujnpactu xtzun Dios, luxh rediidxre sacnäjrutu gumbeetu Dad Jesucrist. <sup>9</sup> Sa'csi renani di ga'p rediidxre, najcni si'c te lotiä'p ni di fi, o te ni di gacdi fi zijt, ni'cni abiällajzni xho basia Dios rextojłni nani bejn galoo. <sup>10</sup> Ni'cni rniä lojtu rebetzä, colsejs, colguisieed xtidx Dios te gacbeepactu, guluilojzatu lo bejn xho gurejdx, xho gule Dios la'tu, sa'csi lał ni chanuu gucuadijçtu rediidxga, dipactu gunijç lo Dios. <sup>11</sup> Palga guibajntu si'c lo guedxliujre, siu'pactu xhaguibaa cadre rnibee Dad Jesucrist par tejpas.

<sup>12</sup> Ni'cni anasuga'ä te gusnaä lajztu xcuent rediidxre, mase anajçtureni, mase risutzutztu yälrlilajz xten didxlii ni yu' nen lastootu. <sup>13</sup> Narä runä xhigab laaca runä che rusnaä lajztu, te gusnibä la'tu, te gusnaä lajztu. Si'cza gunä guideb ni nabañä lo guedxliujre. <sup>14</sup> Ananä asiäddzungajxh dxej ni xca' Dios narä, sa'csi abaluii Dad Jesucrist ni'c loä. <sup>15</sup> Ni'cni cayunduxhä dzuun naj, te che guiquiinni sinaj lajztu xtidxä che agu'tä.

### *Renani bahuii loj yäl'nasa'c xten Crist*

<sup>16</sup> Che basule'nu lojtu xcälrnibee näj xcälrdimbicha' Dad Jesucrist, xcuent ni guibisacpacni, dinu niniitisni, dizanu nusguee la'tu, sa'csi abahuiloonu xcälrdimbicha'ni. <sup>17</sup> Sa'csi che badeed Dios xtadnu yälrnibee, yälrdimbicha' lojni, dxejç biejn diajçnu gunii Dios, birii xse'ni nen te za ni gurej xhaguibaa, räjpni: "Dee najc xi'nä ni sanälazä, rbanälazduxhäni." <sup>18</sup> Lagajc nuure biejn diajçnu xse' Dios che guniini xhaguibaali che gyunäjnu Jesucrist lo dajn ni najç dxan.

<sup>19</sup> Ni'cni najç guliiru rediidx ni gunii reprof'e't. Ni'cni sujntu laaca palga gusobdiajçlu rediidxga, sa'csi najçreni si'c te bajł ni rusaniç te lajç ni nacäyç, susaniçreni xcäriejntu dxejli ni jiääd bajł xhaguibaa. Dxejç lagajc laani susaniç lastoonu. <sup>20</sup> Niluxh ganiddoo nanab gacbeetu dee: nicla tej bejn sajç guinii laatisni sajç guinii xhi säloj xtidx Dios, <sup>21</sup> sa'csi nicla tej diidx ni bacuaa reprof'e't dini gac diidx ni biajçtis yejçreni. Guiraliireni bacuaareni ganaxtis diidx ni badeed Xpřit Dxan Dios lojreni gucuaareni.

## 2

*Rebejn nani rusguee  
(Judas 4-13)*

<sup>1</sup> Niluxh galoo biricajza te cuaa bejn ni basguee rexpejn Israel, sigajcni siääd stee cuaa bejn ni susguee la'tu. Laareni guluixhiga'tzreni didx-xhii nani rujn rusiejxh lajz bejn xcälrlilajzreni, sibälazreni lagajc Dad Jesucrist nani gudijx xcuent xtojlni. Niluxh renani rusguee, siojb nitlojreni par tejpas. <sup>2</sup> Xhidajlza bejn sinajlreni lo xcäl'nabanguijdxreni, dxejcti ni'c gun siniyaj xhidajl bejn xnezyuj xtidxlii Dios. <sup>3</sup> Sa'csi ruguilajzreni xmeeltu, xhixtentu, ni'c siädgusgueereni la'tu te xca'reni xhixtentu. Niluxh xcäl'guxhtisreni nani gun Dios, näjza xcäl'rnitlojreni cabäzgjajceni agujc xchero.

<sup>4</sup> Najcni si'c sa'csi di Dios niäl'lajz rextojl rexanglni nani bejn dojl, niluxh baxhal'nireni gabijl, basäunireni neñ reguednacäy cadro cabäzreni dxej ni gun Dios xcäl'guxhtisni. <sup>5</sup> Sigajcza rebejn ni guyu' galoo, banitloj Diosreni, basläa Dios xcäl'nabajn Noétis näjza sgajdzreni, sa'csi basule' Noé xtidx guluii Dios. Luxh baxhal'ni nisguiro te biädnitlojni guiraa rebejn nani di nucuadiajg xtidx Dios. <sup>6</sup> Bejn Dios yäl'guxhtis xten guedx Sodoma näjza guedx Gomorra, base'cni reguejdxga, gujcreni cobdäj. Si'c bejn Dios te gacbee bejn xho runnäj Dios rebejn ni di gusoob xtidx Dios. <sup>7</sup> Gulää Dios Lo't ni gujc te bensa'c lo reguejdxga, sa'csi guc-huin lajzni xcuent relatsiaj ni bejn rebejdojlga. <sup>8</sup> Guideb ni guläjs Lo't, te bensa'c, lo guejdxga, dxej, yäl' guc-huin lastooni xcuent nani bahuiini, nani biejn diajgni, xcuentza latsiaj ni bejnreni, sa'csi bensa'cni. <sup>9</sup> Anajn Dios xho racnäjni rebejsa'c te rbäänireni lo retrabajw ni cadejdreni, anajnza Dios xho gusacsini rebejdojl cheni guidzujnli dxej ni gunni xcäl'guxhtisreni.

<sup>10</sup> Guliduxhni, sujnru Dios yäl'guxhtis loj rebejn nani rlajz gun si'ctisni rlajz tiejxhreni, näjza renani rbälaz xcäl'rnibee Dios. Najcreni bejn ni di guidxejb, rujnreni ni riajbtis yejcreni, direni guidxejb guiniyajreni rexangl Dios ni rdimbicha'. <sup>11</sup> Niluxh nicla tej rexangl Dios ni rajpru yäl'rnibee lo rebejnre, direni guiniyaj, cue'creni xquejreni lo Dios.

<sup>12</sup> Luxh, rebejnnga najc si'c reguidxaa nani xheti xcäriejnreni, cabäzjtisreni chu guini-aazreni te guetreni. Rniyajreni luxh direni gan xhini'c rniireni. Niluxh sigajc rnitloj reguidxaa, sigajcza sinitlojreni. <sup>13</sup> Bejnreni dojl, ni'c sinitlojreni, sidejdreni yäl'rusacsiduxh xcuent rextojlni. Laareni rchaglajzreni guntisreni laniro rdxee. Laareni najcreni si'c te cosdxuudx o si'c te manch ni rcaj lo te ladnol, rbaali lajzreni rusgueereni la'tu lañ ni cayajc lanij cayaunäjreni la'tu.

<sup>14</sup> Digacdi fiireni loj te gunaa, li rsia' lajzreni, direni guidxajg rujnreni dojl, rusgueereni rebejn te gunzaren dojl, ruluiireni lastooreni te säblajzreni meel, najcreni bejn nani batzubde Dios, <sup>15</sup> agulälazreni nezyusa'c, abanijtreni, naj sanajlreni xnezyuj Balaam, xi'n Beor, nani huichaglajzru nani rquijx yäl'latsiaj. <sup>16</sup> Niluxh gudilnäj Diosni xcuent xtojlni, bejn Dios gunii te mandip si'c xse' bejn, te bascuääzni profe'tga, dini nusaan niujnni nani cayujnni, cayujnni si'c te bejn ni rajc yejcti.

<sup>17</sup> Rebeñ latsiajre najc si'c te bisie cadro xheti nis, najczaren si'c rexkäy ni sanä bej nezree nezrec che cabi' te bero. Laareni su'reni lo xcäy par tejpas che gun Dios yäl'guxhtis. <sup>18</sup> Sa'csi rniduxhreni didxro, niluxh xhet sajcdi rediidxga luxh rniireni huenduxh najc gun bejn ni rlajztis tiejxhreni, con yäl'latsiaj rusgueereni rebejn nani entis birii loj reni rujn sa' dzunguijdxga. <sup>19</sup> Rusgueereni, rniireni rut gudxojdini palga jäädajnireni, niluxh lagajc laareni najcreni mos, sa'csi rnibee latsiajreni. Xhitis ni rnibee te bejn, ni'c rusäuni neñ latzguiib. <sup>20</sup> Sa'csi palga agubicaaj te bejn loj redzunguijdx xten guedxliuj sa'csi huililajzreni xtidx Dad Jesucrist nani rusläa rebejn lo guiraa dojl, dxejctiru gubisacni loj xtojlni, abixhidsacreni lo xtojlni, nalajz najcreni si'c che gajdreni gumbee xtidx Dios. <sup>21</sup> Huenru direni niembee xnezyuj Dios, quela che abiembeereni nezyujga, cuälazreni didx dxan, xtidx Dios ni basule'reni lojreni.

<sup>22</sup> Dxejcsii rsiojb diidx ni najc scree: “Rbisac te bā'cw loj xcälrdzujbni. Cuch ni entis gojz richusacni lo xpajñni.”

### 3

#### *Xho gac che guibisac Jesucrist*

<sup>1</sup> Rebetzä, dee najc ni rojp guiitz ni caguxhalä lojtu; lo guiro'p guiitzre cagusnibä la'tu xcuent reyälrulijdx ni gusnaj lajztu. <sup>2</sup> Colgusnaj lajztu rediidx ni gunii reprofe't agujc xchero, näjza rediidx ni gunii Dad Jesucrist nani basule' reapost.

<sup>3</sup> Ganiddoo, colgacbee dee: che asiäddzungajxh redxelult, siäd rebejn ni rgubee rextidx Dios, laareni sujnreni si'ctis ni rlanj tiejxhreni. <sup>4</sup> Siniabdiidxreni: “¿Xhicuent gajd Jesucrist guibisac si'cni bia'n diidx? Cheni gujtli rextadgoldoonu, guira'ti sanuutis najcni si'c gujcn cheni guc-cheeli guedxliujre.” <sup>5</sup> Niluxh che rniireni si'c, rlanjpac jiallajzreni agujc xchero benchee Dios xhaguibaa xcuent xtiidxtisni, näjza guniitis Dios te si'c guc-chee guedxliuj, biriini nen nis, naj tre'ni loj nisga. <sup>6</sup> Dxejcti gunitloj guira'ti ni yu' lo guedxliujga che biajb te nisguiro, gunitlojni. <sup>7</sup> Niluxh xhaguibaa näjza guedxliuj ni tre' naj, cayajp Diosreni xcuent xtiidxni te checreni che guidzujñ dxej ni gunni yälguxhtis, che gunitlojni rebeñdojl.

<sup>8</sup> Rebetzä, na'c jiallajztu, Jesucrist ruhuii tebdxej si'c te tzugayuu ijz, rhuiizani te tzugayuu ijz si'c tebdxej. <sup>9</sup> Di gaclaa gusoob Dios diidx ni bia'n, si'c rujn bejn xhigab raclaani, niluxh cabecdxiru lajzni xcuent la'tu, sa'csi cabäjzni gusiejch lajztu, sa'csi di rlanjni nitloj nicla tejtü.

<sup>10</sup> Niluxh sidzujñ dxej che guibisac Jesucrist lo guedxliujre si'c rdzujñ te gubaan, rut gacbeedi siädni. Dxejcti sibicaj xhaguibaa, gac te bieiduxh, guira'ti sialni lo te guiboduxh, guedxliujre näjza guira'ti ni tre' lojni, guiragajcni sejcni.

<sup>11</sup> Sa'csi sinitloj guiraa redee, ni'c nanab guibannayatu lo guedxliujre, na'c guntu dojl. <sup>12</sup> Colcuäjz dxejtis ni jiaäd Dios lo guedxliuj. Dxejc sejc xhaguibaa, sinitlojni, luxh guiralii ni yu' sialni lo guiboro. <sup>13</sup> Niluxh abasa'n Dios diidx loonu, ni'cni cayenloonu te guibacoob, te guedxliucoob, cadro gunreni ganaxtis dzunsa'c, xhetiru dojl.

<sup>14</sup> Ni'cni rebetzä ni sanälazä, sa'csi cabääznu guiraa ni gac, colyejn huant te che guibisac Dios, sidxälhi la'tu dxitis nabajntu, nabannayatu, xhetiru xtojltu. <sup>15</sup> Colhuii xhi dzuun bejn Dad Jesucrist ni'c rajpnu yälrusläa lo dojl. Sigajcza bacuaa bejtznu Pabl ni sanälajznu. Bacuaani sa'csi badeed Dios yälñajn lojni. <sup>16</sup> Nen guiraa rexquijtzni bacuaani xcuent rediidxre. Yu' gatii guiitz ni bacuaani ni najc naganduxh. Luxh bejn ni guxii racbee, ni runtio'p lajzreni, reni'c ruxhiid rextiidxni, sigajc runnäjreni guiraa xtidx Dios, ni'cni sinitlojreni.

<sup>17</sup> Ni'cni rebetzä ni sanälazä, sa'csi ananxgaatu rediidxre, colnatiru didi jiajbtu ladzñaa renani gusgueetu, te na'c gunijttu xcälrsiudzu'tztu lo xtidx Dios. <sup>18</sup> Colgustioob xcäriejntu con yälracnäj näjza yälñajn xten Dad Jesucrist nani rusläa nuure lo dojl. Suguiliä'pnu xpala'n Dad Jesucrist, naj näjza par tejpas. Sugacni si'c.

## Guijtz Ganid Ni Bacuaa Juan

### *Xtidx Dios ni runiidx yäl̄nabaj̄n par tejpas loonu*

<sup>1</sup> Galooli che gajd Dios gun guedxliuj, agac nabaj̄n Jesucrist. Niluxh narä bahuiä loj Jesucrist, biejn diagä rediidx ni guniini loä, gunazä naani. Laani najc Diidx ni runiidx yäl̄nabaj̄n par tejpas loonu. <sup>2</sup> Baluilojni loonu; reapost bahuiinu lojni. Ni'cni rniä lojtu, nabaj̄n Jesucrist par tejpas. Rniliäpac nabannäj Jesucrist Dios. Baluii Dios Jesucrist loonu. <sup>3</sup> Caniä stehuält lojtu, bahuiinu lojni. Biejn diajgnu rediidx ni guniini loonu. Xhigab xtennu najc tejtis con Dios, näjza Jesucrist Xi'n Dios. Ni'cni cagusule'ä rediidxga lojtu, te tejtis xhigab jiennäanu resa'nu. <sup>4</sup> Cagucuaä rediidxre lojtu te guibalazduxhtu.

### *Dios najc Bajl*

<sup>5</sup> Naj cagusule'ä rediidx nani baluii Jesucrist loonu. Dios najc bajl. Guiraa redzuun ni ruj̄nni, ganax dzunsa'cni. Xhet yäl̄nacäȳdi yu' lo Dios. <sup>6</sup> Palga chutis tejnu naa, tejtis najc xhigabnu con Dios, niluxh riennu redzunguijdx, rniinu didx-xhii, runij̄tnu dinu chasanäj xtidx Dios. <sup>7</sup> Palga nabaj̄n̄nu lo bianij si'cni nabaj̄n Dios lo bianij, tejtis xhigab riennu con resa'nu. Dxejc rusiaza xtiejn Jesucrist Xi'n Dios lastoonu che riennu dojl̄.

<sup>8</sup> Palga naanu xheti xtoj̄l̄nu, rusgueenu lagajc nuunu, luxh dinu ga'p xtidx Dios nen lastoonu. <sup>9</sup> Palga guicäj̄p̄nu lo Dios guiraa redojl̄ ni cayennu, siäl̄laj̄zni xtoj̄l̄nu, sudzucaj̄ni rextoj̄l̄nu, sa'csi laaca ruj̄nni luxh guli najc rextiidxni. <sup>10</sup> Palga guinuunu dinu niuj̄n dojl̄, rniinu najc Dios si'c te bejn ni rni didx-xhii sa'csi anaj Dios yu' xtoj̄l̄nu, luxh dizanu ga'p xtidx Dios nen lastoonu.

## 2

### *Racnäj Jesucrist nuunu nez loj Dios*

<sup>1</sup> Guejbtu, resa'ä nani huililajz xtidx Dios, cagucuaä rediidxre lojtu lo guiitz te na'c guntu dojl̄. Niluxh palga jiennu dojl̄, racnäj Jesucrist nuunu, rniini xcuentnu lo Dios, sa'csi xheti xtoj̄l̄ni. <sup>2</sup> Guj̄t Jesucrist xcuentnu lo cruzj. Gudij̄xni rextoj̄l̄nu lo cruzj. Luxh et rextoj̄l̄tisnu gudij̄xni. Gudij̄xni rextoj̄l̄ guiraa rebejn ni re' lo guideb guedxliuj.

<sup>3</sup> Palga rusoobnu rextidx Dios, huenliisi rluii riembeenu Dios. <sup>4</sup> Cheni rni te bejn, “narä rumbeäni”, niluxh dini gusoob rextiidxni, rusgueeni resabejn̄ni. Di laj̄zni nilii xtidx Dios. <sup>5</sup> Palga rusoobnu xtidx Dios, guliipac rinälaaznu Dios, ni'c naj̄n̄nu nabañ̄n̄jn̄ni. <sup>6</sup> Cheni rniinu nabañ̄n̄j̄nu Jesucrist, nanabpac guibañ̄sa'cnu si'c gubaj̄n Jesucrist lo guedxliuj.

### *Redidxcoob*

<sup>7</sup> Guejbtu resa'ä, xhet didxcoobdi ni cagucuaä lojtu. Cagucuaä lagajc diidx ni naj̄ntu galooli che huililajzl̄itu rextidx Dios, nalaj̄znu rediidx nani biejn diaj̄gtu galooli. <sup>8</sup> Niluxh naj̄cza rediidxre didxcoob loonu, sa'csi che huililaj̄znu rextiidxni gusloj dirunu guibaj̄n lo yäl̄nacäȳ. Baluii Jesucrist redidxcoobga loonu. Guliipac najc Dios si'c bajl. Dini guibaj̄n lo nacäȳ.

<sup>9</sup> Palga chutis tejnu rni, “nabanä lo nianij xten Dios”, niluxh rdxe'chni lo resa'ni, lo yäl̄nacäȳ yu'ni. <sup>10</sup> Chutis tejnu ni rinälajz sa'ni, nabaj̄n̄ni lo bianij xten Dios, ruj̄nni dzunsa'c, dizani guichaglajz gunni dojl̄. <sup>11</sup> Niluxh palga rdxe'chnu lo resa'nu, nabaj̄n̄nu lo yäl̄nacäȳ sa'csi riennu dojl̄, sasaanu lo yäl̄nacäȳ. Nicla gacbeenu canejz chonnu, sa'csi ruscäȳ beñdxab baloj̄nu.

<sup>12</sup> Cagucuaä rediidxre lo guejbtu, resa'ä ni rililajz, sa'csi abadzucaj Dios rextoj̄l̄nu, sa'csi lo cruzj gudij̄x Jesucrist rextoj̄l̄nu. <sup>13</sup> Cagucuaä rediidxre lo guejbtu, redad



ben̄gool, sa'csi huililajztu rextid̄x Jesucrist, najntu laani nabaj̄n̄ni galooli n̄ajza par tejpas. Cagucuaä rediid̄xre lojtu, rebi'n sa'csi dirutu jiu xtid̄x ben̄dxab.

Cagucuaä rediid̄xre lojtu rexi'nä, sa'csi rumbeetu Dios. <sup>14</sup> Abacuaä rediid̄xre lo guejbtu, redad ben̄gool, sa'csi numbeetu Jesucrist nani nabaj̄n̄ galooli n̄ajza par tejpas. Abacuaä rediid̄xre lojtu rebi'n, sa'csi sudzu'tztu, sa'csi yuchee xtid̄x Dios nen̄ lastootu, dirutu jiu xtid̄x ben̄dxab.

<sup>15</sup> Na'c guichagljaztu guntu renani rujn rebejn̄ nani di chalilajz xtid̄x Jesucrist; na'cza chanälaztejt̄u xhixtentu ni rajptu lo gued̄xliuj. Palga rinälaztejt̄nu rehxixtenti ni ra'pnu lo gued̄xliuj, dxejc dinu chanälajz Dios. <sup>16</sup> Reben̄ gued̄xliuj ni di chalilajz xtid̄x Dios rchagljazreni rujnreni redzunguijdxre: rujnreni dzunguijdx nani rchagljaz tiejxhreni; rujnreni dzunguijdx nani rchagljaz balojreni, n̄ajza lagajc laareni rliä'preni xpala'nreni. Niluxh guiraa reni'c najc dzun gued̄xliuj, xhet dzuundi ni gunibee Dios gac. <sup>17</sup> Luxh rnitlojpac gued̄xliuj. Sinitlojza guiraa reni rchagljaz rujn reben̄ gued̄xliuj ni di chalilajz xtid̄x Dios. Niluxh palga gusoobtisnu xtid̄x Xtadnu Dios, sibann̄aj̄nuni par tejpas.

### *Didx guli n̄ajza didx-xhii*

<sup>18</sup> Guejbtu resa'ä ni rililajz xtid̄x Dios, asiäddzungajxh dxej che guluij n̄iguii nani rdxe'ch loj Jesucrist. Abiejn̄ diajgtu siääd n̄iguiiga. Naj yu' xhidajl reniguii nani rdxechlajz lo Crist. Ni'c alaracheenu asiäddzungajxh dxejga che guluij n̄iguiiga. <sup>19</sup> Yu' xhidajl rebejn̄ ni rdxechlajz lo Jesucrist. Biriireni lo resa'nu. Direni nililajz xtid̄x Jesucrist. Palga nililajzreni xtid̄x Jesucrist si'c huililaaznu nuure xtid̄x Jesucrist, direni n̄irii lo resa'nu. Biriireni lo resa'nu, ni'c racbeenu direni gac xpejn̄ Jesucrist.

<sup>20</sup> Gule Dios Jesucrist. Jesucristre baniid̄x Sprit Dxan xten Dios loonu te gacbeenu xhini'c najc redid̄xliipac. <sup>21</sup> Et sa'csi ditu gan xhi diid̄x najc didx guli bacuaä rediid̄xga lojtu. Sa'csi najntu xhi diid̄x najc didx guliipac, ni'c bacuaäni, te gutijp lajztu. Palga rucuaä rediid̄x ni najc guli, anajntu dina gusgueä la'tu.

<sup>22</sup> Chutis ni naa di Jesús gac Crist Xi'n Dios, xhet guliidi rextiid̄xni. Renani rnii di Jesucrist gac Xi'n Dios rdxechlajzni lo Jesucrist. Di reni'c nililajz xtid̄x Dios. <sup>23</sup> Chutis reni rnii di Jesucrist gac Xi'n Dios, di reni'c gumbee xtadnu Dios. Niluxh renani rnii Jesucrist najc Xi'n Dios, huililajzreni xtid̄x Dios, numbeezareni Dios.

<sup>24</sup> Colgusoob rediid̄x ni biejn̄ diajgtu galooli che huililajztu rextid̄x Dios. Palga ru-soobtu rediid̄xga, nabañ̄aj̄tu Dios n̄aj xi'n̄ni Jesucrist. <sup>25</sup> Abia'n Jesucrist diid̄x guniid̄xni yäl̄nabañ̄coob loonu. Naj ara'pnu yäl̄nabaj̄n̄re, ra'pnuni par tejpas.

<sup>26</sup> Abacuaä rediid̄xre lojtu xcuent rebejn̄ ni rlajz chalilajztu rediid̄x ni xhet guliidi. <sup>27</sup> Baxhal̄ Jesucrist Sprit Dxan xten Dios loonu. Rbaj̄zni nen̄ lastoonu. Dinu guiquiin̄ chu stee bejn̄ guluii loonu xhi diid̄x najc guli, sa'csi lagajc Sprit Dxan xten Dios ruluii xtiid̄xni loonu. Naj ruluiini la'tu guiraa ni najc guli, dini gusguee la'tu. Colguibañ̄aj̄ Jesucrist; colgusoob xtid̄x Jesucrist si'cni ruluii Sprit Dxan xten Dios lojtu.

<sup>28</sup> Naj guejbtu resa'ä, colguibañ̄aj̄ Jesucrist, te che jädsacni lo gued̄xliuj sisiutzu'tznu nejz lojni, dinu guitujy nejz lojni. <sup>29</sup> Anajntu laaca najc Dios. Anajntu renani rusoob xtid̄x Dios sasan̄aj̄reni Dios, ni'c najczeni xi'n Dios.

## 3

### *Rexi'n Dios*

<sup>1</sup> Bahuii xho huinälazduxh Dios nuure, ni'c anaj Dios nuure najcnu rexi'n̄ni. Luxh guli najcnu rexi'n Dios. Reben̄ gued̄xliuj ni di chalilajz xtid̄x Dios, direni gumbee nuure, rexi'n Dios, sa'csi dizareni gumbee Dios ni najc xtadnu. <sup>2</sup> Resa'ä ni rinälazä, nuunu riolilaaznu rextid̄x Dios, ni'cni najcnu rexi'n Dios. Dinu gacbee xho gacnu niluxh che guibisac Jesucrist loonu, suhuiinu lojni si'c ni najcni, sa'csi suchaani nuure te gacnu si'c ni najcni laani. <sup>3</sup> Che rnaj laaznu sidzuj̄n̄ dxej gac tejganu si'c ni najc Jesucrist, dxejc rbañ̄sa'cnu si'c ni gubaj̄n̄ Jesucrist lo gued̄xliuj.

<sup>4</sup> Di rebejn ni rujn dojl gusoob leii xten Dios. Che riennu dojl, runijtnu lo leii xten Dios. <sup>5</sup> Racheenu Jesucrist biääd lo guedxliuj, gujcnu niguii te gujc badzucajni rextojlnu. Laani dini niujn dojl. <sup>6</sup> Che sasanäjnu Jesucrist, dinu gac benguijdx. Di bejn nani rujn dojl chalilajz xtidx Jesucrist, dizani gumbeeni. <sup>7</sup> Resa'ä, na'c chalilajztu didx-xhii ni rnii bejn lojtu, che rniireni cayujntu dojl. Rebejn ni rujn laaca, najczareni si'c najc Jesucrist. <sup>8</sup> Rebejn nani rujn dojl najc xi'n bendxab. Galodooli rujn bendxab dojl. Ni'cni biääd Jesucrist Xi'n Dios lo guedxliuj te gudzucajni redojl nani rujn bejn xcuent bendxab. <sup>9</sup> Rebejn nani najc xi'n Dios direni guichagljaz gunreni dojl, sa'csi abachaa Dios xcäriejnreni, sa'csi rbäjz Dios neñ lastooreni. Direni gun dojl, sa'csi najcreni xi'n Dios. <sup>10</sup> Si'c riebeenu rebejn ni najc xi'n Dios, näjza rebejn ni najc rexi'n bendxab. Chutis tejni di gun dzunsa'c, ni dini chanälajz resa'reni, dini gac xi'n Dios.

### *Nungäjł chanälajznu resa'nu*

<sup>11</sup> Lagajc rediidxre biejn diajgtu galooli che huililajztu rextidx Dios: colchanälajz resa'tu. <sup>12</sup> Xhet si'c di toCain nani gujc xi'n bendxab. Bejni dojl, bagu'tni bejtzni. ¿Xhicuent bagu'tnini? Bagu'tnini sa'csi bejn bejtzni ganax dzunsa'c, luxh toCain bejn dzunguijdx. <sup>13</sup> Na'c guidxelojtu che guidxechlajz rebejn lojtu. <sup>14</sup> Racheenu dirunu sa lo xnezyuj yälgujt, sa'csi dinu guidxechlajz loj resa'nu. Rajpnu yäl nabajn par tejpas sa'csi rionälaaznu resa'nu. Chutis tej ni di chanälajz resa'reni canzaj lo xnezyuj yälgujt, sa'csi rdxechlajzreni lo sa'reni. <sup>15</sup> Chutis ni rdxechlajz lo resa'ni, najcni nejz lo Dios si'c ni abagu'tni te bejn. Najnnu che rugu't te niguii te bejn dini ga'p yäl nabajn par tejpas. <sup>16</sup> Racheenu rinälajz Jesucrist nuunu, sa'csi gujtni lacuaa nuunu lo crujuj. Sigajcza nungäjł gacnäjnna resa'nu, mase guetnu lacuaa guetreni. <sup>17</sup> Chutis tejnu ni rajp xhidajł xhixtenu, luxh dini gacnäjn nicla tejnu ni xhet rajpdi, di bejn ga chanälajz Dios. <sup>18</sup> Guejbtu resa'ä, na'c chanälaaznu resa'nu con rextiidxtisnu, na'c guiniitisnu rionälaaznu resa'nu. Palga rionälaazpacnu resa'nu, sacnäjnna resa'nu.

### *Sisiutzu'tznu nez loj Dios*

<sup>19-20</sup> Palga rionälaaznu resa'nu, nancheenu najcnu rexi'n Dios. Palga jiajbnu xhigab dinu gac beñsa'c, dizanu gac xi'n Dios, nanab jiunu rextiidxtis Dios, na'c jiunu rexhigabnu. Dios najn rexhigabga. Niluxh Dios anaj: renani rinälaaz resa'reni, reni'c najc rexi'nni. <sup>21</sup> Rniä lo guejbtu nani rinälazä, palga lagajc lastoonu rnii loonu, “cagusooblu xtidx Dios”, sisiutijp lastoonu che rbedx-rniabnu lo Dios. <sup>22</sup> Xhitis ni rniabnu lo Dios, runiidxni loonu sa'csi rusoobnu xtiidxni, riennu redzuun ni ruspaa lajz Dios. <sup>23</sup> Dee najc rediidx ni gunibee Dios gusoobnu: chalilaaznu xtidx Dios, diidx ni rnii xho gujt Jesucrist lacuaa nuunu, chonälaazzanu resa'nu si'cni gunibee Dios. <sup>24</sup> Palga rusoobnu guiraa nani gunibeeni, nabaññajnnuni, si'cza nabaññajni nuunu. Nancheenu nabaññaj Dios nuunu, sa'csi baniidxni Sprit Dxañ xtenni te cuääz neñ lastoonu.

## 4

### *Scree gacheenu xhi didx najc guliipac*

<sup>1</sup> Guejbtu renani rinälazä, na'c chalilajztu rextidx chutis bejn nani naa, “rniä rextidx Dios lojtu”. Ganiddoo colgula'tz rextiidxni te gacheetu don chu xtidx caniiini, sa'csi xhidajł bejn sinii lojtu, “nuunu rniinu rextidx Dios”, niluxh caniiisireni si'c. <sup>2</sup> Scree gacheenu xhi diidx najc guliipac. Guiraa rebejn nani guinii “Jesucrist, Xi'n Dios, ni biääd lo guedxliuj si'c niguii”, reni'c cayacnäjn Sprit Dxañ xten Dios, reni'c canii xtidx Dios. <sup>3</sup> Guiraa rebejn nani di guinii biääd Jesucrist Xi'n Dios si'c niguii, xhet xtidx Diosdi rniireni. Reni'c rdxe'chreni loj Jesucrist. Abiejn diajgtu siääd te niguii ni rdxechduxh loj Jesucrist, luxh naj abidzujñ rextzuun niguiiga lo guedxliuj.

<sup>4</sup> Guejbtu resa'ä, najcnu rexi'n Dios. Naj abiennu gaan lo rebejn ni rdxe'ch lo Jesucrist sa'csi Dios ni rbäjz neñ lastoonu abejnni gaan lo bendxab ni nabajn lo guedxliuj. <sup>5</sup> Rebejn

ni rnii xhet guliidi xtidx Dios, rililajztisreni rediidx ni najc xten guedxliuj. Xhidalduxh rebejn ni re' lo guedxliuj riu rediidx ni xhet guliidi. <sup>6</sup> Nuunu najcnu xi'n Dios. Rebejn nani riembee Dios riu xtiidxnu. Rebejn nani di gac xi'n Dios direni jiu xtiidxnu. Scree gacbeenu chu rebejn rnii didxliipac. Scree gacbeezanu chu rebejn rnii diidx ni xhet guliidi.

### *Rinälajz Dios rebejn*

<sup>7</sup> Rniä lo guejbtu nani rinälazä, nanab chanälaaznu resa'nu, renani huililajz xtidx Dios, sa'csi Dios racnäjä nuunu te chanälaaznu resa'nu. Palga rinälaaznu resa'nu, dxejc najcnu rexi'n Dios, luxh gulii riembeenu Dios. <sup>8</sup> Palga chutis tejnu di chanälajz resa'ni, dizani gumbee Dios, sa'csi lagajc Dios racnäjä chanälaaznu Dios, racnäjäzani chanälaaznu resa'nu. <sup>9</sup> Abasule' Dios loonu lacti rinälajzni nuunu. Yu' tejtis Xi'n Dios. Abaxhalni Xi'nni lo guedxliuj te gudijxni rextojlnu lo cruzj te si'c guibaññäjnni par tejpas. <sup>10</sup> Si'c racbeenu rinälajzpac Dios nuunu. Galoo dinu ninälajz Dios. Niluxh Dios huinälajz nuunu, ni'c baxhalni Xi'nni lo guedxliuj te gudijxni xtojlnu lo cruzj.

<sup>11</sup> Rniä lo guejbtu nani rinälazä, si'cni rinälajz Dios nuunu, sigajcza rlajzni chanälaaznu resa'nu. <sup>12</sup> Nicla tej bejn gajd fii lo Dios. Niluxh palga chanälaaznu resa'nu, Dios nabajñ neñ lastoonu, dxejc gulii rinälaazpacnu Dios. <sup>13</sup> Nancheenu nabaññäjnu Dios, sigajcza nabaññajpac Dios nuunu, sa'csi abaxhalni Sprit Dxan xtenni cuääz neñ lastoonu. <sup>14</sup> Narä näjza reapost abahuiinu loj Jesucrist. Caniä lojtu abaxhal Xtadnu Dios Xi'nni lo guedxliuj te guslaani rebejn lo xtojlreni. <sup>15</sup> Chutis tejnu ni rnii “Jesucrist najc Xi'n Dios”, nabaññäjni Dios, nabaññajza Dios bejnnga.

<sup>16</sup> Racbeenu, rililaazzanu rinälajz Dios nuure. Guliduxh rinälajz Dios nuunu. Palga rinälaaznu Dios, nabaññäjnu Dios, nabaññajza Dios nuunu. <sup>17</sup> Naj sanälaaznu Dios si'cni rlajzni luxh palga chanälaaznuni guidebtis ni guibajnnu, dinu guidxejb che guidzujñ dxej ni gun Jesucrist yälguxhtis lo guedxliuj. Dinu guidxejb sa'csi guideb nabajnnu lo guedxliuj, nabaññäjnu Dios si'c nabannäj Jesucrist Dios. <sup>18</sup> Palga rinälazsa'cnu Dios, dinu guidxejb, palga rinälajzpacnu di gacdi guidxeebnu. Palga guliipacnu rinälaaznu Dios, xhetliidi rdxejbdinu. Nani rdxejb, rdejdn trabajw, gajd bejnnga chanälazsa'c Dios.

<sup>19</sup> Rinälaaznu Dios sa'csi ganiddoo Dios huinälajz nuunu. <sup>20</sup> Palga chutis tejnu naa “rinälazä Dios” niluxh rdxechlajzni lo resa'nu, xhet guliidi xtiidxni. Palga dinu chanälajz sa'nu nani cahuiinu, xhixh sajc chanälaazzanu Dios nani gajdnu fii. <sup>21</sup> Agunibee Dios, nani rinälajz Dios chanälajzni resa'ni sigajc rinälajzni Dios.

## 5

### *Riennu gaan lo guiraa redolguijdx lo guedxliuj*

<sup>1</sup> Chutis ni rililajz Jesús najc Crist nani baxhal Dios, ni'c najc Xi'n Dios. Palga rinälaaznu Xtadnu Dios, sigajcza sinälaaznu renani najc Xi'n Dios. <sup>2</sup> Palga rinälaaznu Dios, palga rusoobzanu xtiidxni, dxejc najnnu rinälaaznu resa'nu nani najc Xi'n Dios. <sup>3</sup> Ni'cni, palga rinälaaznu Dios, susoobnu xtiidxni. Luxh dinu guichalo nagajn gusoobnu xtiidxni. <sup>4</sup> Chutis tejnu ni najc xi'n Dios, riennu gaan lo redojl ni re' lo guedxliuj. Riennu gaan lo redojl lo guedxliujre sa'csi huililaaznu xtidx Jesucrist. <sup>5</sup> ¿Chuni'c cayujñ gaan lo redojl lo guedxliuj, ä? Renani rililajz najc Jesucrist, Xi'n Dios, reni'c rujñ gaan lo redojl lo guedxliujre.

### *Rediidx ni baluii Dios loonu xcuent Jesucrist*

<sup>6</sup> Biääd Jesucrist lo guedxliujre. Birobnis Jesucrist, baxhe'zani xtiejnni lo cruzj. Xhet ganaxdi te guirobnisni biäädni, näjza te guxhe'ni xtiejnni lo cruzj che biäädni. Sprit Dxan xten Dios canii rediidxre. Guliipac rextiidxni. <sup>7</sup> Yu' choñ ni baluiloj xhaguibaa. Rniireni xcuent Jesucrist tejsi diidx. Tejni najc Dios, steeni najc nani laa Diidx, steeni najc Sprit Dxan xten Dios. <sup>8</sup> Sigajcza yu' choñ ni baluiloj lo guedxliuj. Rniireni xcuent Jesucrist

tejsi diidx. Tejni najc Sprit Dxan xten Dios. Steeni najc che birobnis Jesucrist, steeni najc che baxhe' Jesucrist xtiejnni lo cruzj che gujtni. <sup>9</sup> Palga rililaaznu xtidx rebejn ni rbäjz lo guedxliuj, nungäjł chalilaazrunu xtidx Dios. Rediidx nani rnii jion reni baluiloj tejsi diidx najcreni con nani rnii Dios xcuent Jesucrist Xi'n Dios. <sup>10</sup> Palga rililaaznu xtidx Jesucrist Xi'n Dios, rnii Dios xcuent Jesucrist nen lastoonu. Chutis tejnu ni di chalilajz xtidx Dios, rujnni najc Dios si'c tej ni rusguee sa'csi dini chalilajz xtidx Dios ni rniini xcuent Jesucrist. <sup>11</sup> Scree najc rediidx ni rnii Dios. Abaniidx Dios loonu yälñabajn par tejpas. Yälñabajnga biädñä Xi'nni, Jesucrist. <sup>12</sup> Palga nabaññajnu Xi'nni, rajpnu yälñabajn par tejpas. Palga dinu guibaññäj Xi'nni, dinu ga'p yälñabajn par tejpas.

*Xtixtios con diidx ni ruliidx*

<sup>13</sup> Abacuaä rediidxre lojtu ni rililajz rextidx Jesucrist te gacbeepactu rajptu yälñabajn par tejpas.

<sup>14</sup> Ni'cni dinu guidxejb che guiniinu lo Dios, sa'csi riu Dios xtiidxnu palga tejsi najc xhigabnu con Dios che rniabnu lojni. <sup>15</sup> Luxh palga najnnu riu Dios nuunu che rniinu lojni, sigajcza najnnu suniidxni nani rniabnu lojni.

<sup>16</sup> Palga tejnu fii tej resa'nu cayujn dojl, niluxh riuruni xtidx Dios, nuunu rajpnu por guiniabnu lo Dios xcuent laani, te gudeed Dios yälñabajn lojni. Niluxh yu' te dolroduxh. Chutis te bejn ni gun dojlga, di Dios gudeed lo bejnga yälñabajn par tejpas. Dizana guiniä guiniabtu lo Dios xcuent bejn ni rujn dolroga. <sup>17</sup> Guiraa redzunguijdx nani rujn rebejn najc dojl. Niluxh yu' redojl nani di gun gunijt bejn lo Dios par tejpas palga jiu bejn xtidx Dios.

<sup>18</sup> Racbeenu guiraanu nani najc xi'n Dios di rlaaznu jienu dojl. Racnäj Jesucrist nuunu te di beñdxab gun gaan nuunu, te dizanu gusoob xtidx beñdxab.

<sup>19</sup> Nancheenu nuure najcnu xi'n Dios, niluxh guiraa rebejn nani riutis rextzun guedxliuj cagusoobreni xtidx beñdxab.

<sup>20</sup> Najnnu biääd Jesucrist Xi'n Dios lo guedxliuj. Baluini nuunu rextidx Dios te jiembeenu Dios, nani najcpac Dios gulii. Nabaññajnu Dios ni najc gulii, sa'csi nabaññajnu Jesucrist. Laani najc Dios ni najc gulii. Caguniidxni loonu yälñabajn par tejpas. <sup>21</sup> Resa'ä, na'c guzuxhijbtu lo rebanäjb ni xhet guliidi. Sugacni si'c.

## Guijtz Ni Rojp Ni Bacuaa Juan

### *Diidx gulii nājza yälrinälaaznu resa'nu*

<sup>1</sup> Narä nacä beṅgool. Cagucuaä guiitzre lojlu nane' nani agule Dios, nājza loj rexi'nlu. Rinälazäpac la'tu luxh xhet xtebädi; nājza guiraa reni rililajz xtidx Dios sanälajztu. <sup>2</sup> Nuure rinälaaznu la'tu sa'csi yuchee neṅ lastoonu rediidx nani najc gulii, luxh dilajznu jiaäl rediidxre. <sup>3</sup> Xtadnu Dios, nājza Jesucrist Xi'nni, gacnäj nuunu, jiareni nuunu, guscuedxi lajznu con xcälṅajn didxlii nājza yälrinälajz.

<sup>4</sup> Bibalazduxhä che gucebeä yu' rexi'nlu ni ruseob xtidx Dios si'c gunibee Dios loonu guseobnuni. <sup>5</sup> Nane' ni gule Dios, diidx nani rniabä guseob guejblu naj dini gac didxcoob, niluxh lagajc diidx ni biejn diaagnu galooli, che huililaazlinu xtidx Jesucrist. Lagajc dee najc nani gunibee Dios loonu: nungäjlṅpac chanälaaznu resa'nu. <sup>6</sup> Sinälaaznu resa'nu palga caguseobnu xtidx Dios. Dee najc xtidx Dios ni biejn diaagnu galooli, che huililaazlinu xtidx Jesucrist: chanälaaznu resa'nu.

### *Rebejn ni rnii garenca diidx ni xhet guliidi*

<sup>7</sup> Balti bejn birii loonu, naj cagusgueereni xhidajl bejn ni re' lo guedxliuj. Caniireni di Jesucrist najc niguii che biäädni lo guedxliuj. Sa' bejnre najc benrusguee. Sa' bejnre rdxe'chreni loj Jesucrist. <sup>8</sup> Colga'p la'tu te na'c chalilajztu xtiidxreni, didi xlia'si biennu dzuun ro'c, te xca'tu guiraa ni guniidx Dios lojtu.

<sup>9</sup> Chutis bejn ni rlajz gugu'ch xtiidxpacni lo xtidx Jesucrist, di bejnṅa gumbee Dios. Niluxh chutis bejn ni riu xtidx Jesucrist, rumbeeni Dios, rumbeezani Jesucrist Xi'n Dios. <sup>10</sup> Palga jiaäd te bejn rolijztu ni di chasanäj xtidx Jesucrist, na'c xcäjbtu jiu'ni rolijztu, na'cza guiniitu lojni, "Xchan. Biu'." <sup>11</sup> Sa'csi chutis bejn ni guinii "xchan" loj te bejn ni di chasanäj xtidx Jesucrist, cayacnäjzani redzunguijdx ni rujn bejnṅa.

### *Rudeedni xtixtios*

<sup>12</sup> Xhidalduxhru diidx rlazä guiniä lojtu, niluxh di rlazä gucuaäreni lo guiitz. Cabäzä jiaädhuiä lojtu ro'c te guiniä rediidxre lojpectu, te guibaalajztu. <sup>13</sup> Rexi'n bājllu, nani aguleza Dios, ruxhaäl xtixtios lojlu. Ni'ctis najc ni rucuaä lojtu. Sugacni si'c.



## Guijtz Ni Riojn Ni Bacuaa Juan

### *Cagucuaani didxsa'c lo Gayo*

<sup>1</sup> Narä nacä te beṅgool. Caguxhalä guiijtze lojlu, dad Gayo. Rinälazduxhälu sa'csi huililajzlu rextidx Dios.

<sup>2</sup> Sanälazälu, nanä laaca yu' lastoolu loj Dios. Naj rniabä lo Dios gacnäjni luj, guniidxzani yälṅadaanlu. <sup>3</sup> Bibalazduxhä che gubi' gaii resa'nu, guniliireni loä xho huililajzlu xtidx Jesucrist, xho basoobzalu xtidx Jesucrist. <sup>4</sup> Xheti stee diidx ni ruspaä lazä si'c rbaa lazä che racbeä rusoob resa'nu redidxlii xten Jesucrist.

<sup>5</sup> Dad Gayo, laaca cayujnlu che racnäjlü renani rililajz xtidx Jesucrist, mase dilu gumbeereni che riäädreni lojlu. <sup>6</sup> Aräjpreni lo resa'nu ni rdxagsa' ree xho huinälajzlureni näjza xho gucnäjlureni. Laaca bejnlu gucnäjlü resa'nu, badeedlu xhi biquiinreni lo nejz che biriireni rolijzlu. Si'cza nanab jiennu lo guiraa resa'nu, nalajznu rebejn ni rulüi xtidx Dios. <sup>7</sup> Rulüiireni xtidx Jesucrist sa'csi sanälajzreni Jesucrist. Xhet rca'direni lo rebejn ni di chalilajz xtidx Jesucrist. <sup>8</sup> Si'cza nanab gacnäjnu rebejn ni rilüi xtidx Jesucrist nen garen-garen guejdx, te si'c jiennänu xtzüun Dios guiraa renani rulüi xtidx Dios.

### *Di Diótrefes niujn redzunsä'c*

<sup>9</sup> Abaxhalä te guiijtze lo rexpejn Jesucrist ro'c. Niluxh Diótrefes rlanj guinibeeni lo resa'nu ro'c. Dini jiu xtidxä. <sup>10</sup> Ni'cni che guidzünä ro'c, narä siniä rediidxre lo resa'nu ro'c, che guidxaag sa'nu ro'c. Diótrefes rniyaj narä lo resa'nu ro'c. Dizani jiu resa'nu che rdzujnreni ro'c. Dizani gusaan fiitu resa'nu ni riääd ro'c, mase rlanj chu tejtü fiireni. Luxh rlanjni gudxojnni guidxagnäjtü rebejn nani ruhüi resa'nu ni rulüi xtidx Jesucrist.

<sup>11</sup> Sa'ä ni rinälazä, na'c gunlu redzunguijdx, bejn redzunsä'c. Nani rujn dzunsä'c ni'c najc Xi'n Dios. Chutis tej ni rujn redzunsä'c najc xpejn Dios. Chutis tej ni rujn redzunguijdx, di ni'c gumbee Dios.

### *Rniireni didxsa'c xcuent Demetrio*

<sup>12</sup> Guiraa rebejn ganax didxsa'c rniireni xcuent Demetrio, luxh huenliisi rusoobni xtidx Jesucrist. Sigajcza narä rniä didxsa'c xcuentni. Najnlu guliipac rediidx ni rniä.

### *Rudeedni xtixtios*

<sup>13</sup> Rlazä guiniä xhidalduxhru diidx lojlu, niluxh di rlazä gucuaä rediidxga lo guiijtze. <sup>14</sup> Runä xhigab di gaclaa jiädhüiä lojlu, dxejcti jieinu diidx.

<sup>15</sup> Gulecdxi lajzlu. Rexamigwlu ruxhalreni xtixtios lojlu. Badeed xtixtios lo tejga reexamigwä ro'c.

## Guijtz Ni Bacuaa Judas

### *Judas cagucuaa loj renani agule Dios*

<sup>1</sup> Narä nacä Judas, ni rujn xtzuun Jesucrist. Narä nacäza betz Jacob. Cagucuaä gui-jtzre loj renani agule xtadnu Dios, renani sanälazduxhni, nani cayapcheeni par Jesucrist. <sup>2</sup> Rniabä lo Dios, gulaslazduxhruni la'tu, guscuecdxiduxhruni lastootu, gacnäjni la'tu, guniidxruni yäl'sanälajz.

### *Renani ruluii yäl'rusguee (2 Pedro 2:1-17)*

<sup>3</sup> Rebetzä nani sanälazä, che cayunduxhä xhigab gucuaä lojtu xcuent yäl'rusläa lo rextojl'nu ni rajpnu, benä xhigab riojbru gucuaä te guiitz lojtu te gulidxätu sudzu'tznu, gapdzu'tztu yäl'rilihajz ni basule'reni par tejpas loj rexpejn Dios. <sup>4</sup> Sa'csi abiuxhiga'tz gaii bejn, renani galooli gunii Dios siädreni, niluxh sinitlojreni. Najcreni bejn ni di chalihajz xtidx Dios, najcreni bejguidxduxh, rutzuréreni xcäl'racnäj Dios, rujnreni xtujuj, sanäreni te yäl'nabañdxuudx. Rbälazzareni xpaxhuaannu nani rnibee loonu, Dad Jesucrist.

<sup>5</sup> Mase anajntu guira'ti rediidxga tejpas, rlazä gusnaä lajztu che gudejd gulää Dad Jesucrist rexpejn Israel lo guedx Egipto, dxejcti bagu'tni renani di nililajz xtiidxni.

<sup>6</sup> Rexangl Dios nani di nucuadiajg diidx, ni birii cadre rlazj Dios churen, reni'c basäu Diosreni cadre nacäiboo te cabäjzreni gun Dios xcäl'guxhtisni lojreni. <sup>7</sup> Si'c bejnni guedx Sodoma näjza Gomorra näjza reguedxbäz ni tre' gajxh ro'c, sa'csi bejnreni dojl, reniguii guyunäjreni niguii birääx, regunaa guyunäjzaren, regunabirääx. Dxejc gudejdreni trabawduxh huejcreni nen guiboo par tejpas xcuent xtojreni, ni'c najc te yäl'rulijdx loonu.

<sup>8</sup> Rebejn ni riu' lojtu naj najc si'c reben galoo ni bejn dojl. Nabajnreni si'c ni bisieedreni lo guiraa nani ruluii yäl'rnixcal, ruxhinreni tiejxhreni, rbälazreni xcäl'rnibee Dios, rniyazaren rexangl Dios. <sup>9</sup> Miguejl ni rnibeeru loj rexangl Dios, che gudil'diidxni bejdxab yejc tiejxh to Moisés, dini niniyaj bejdxab, alga räjpni: "Sugun Dad Jesucrist yäl'guxhtis lojlu."

<sup>10</sup> Niluxh rebejn'ga rniyajreni nicla ganreni xhini'c rniireni. Niluxh nani racbeepac rebejn'ga najc yäl'najn nani nicla niqiiin nisieedreni, lala sa' nani rujnza reguidxaa, ni xheti xcäriejn, reni'c sujn nitlojreni.

<sup>11</sup> ¡Aii! ¡Riazanuren! Sanajlreni xnezyuj Caín, luxh te gunreni gaan meel ruxhunliren, rujnreni sa' dojl ni bejn Balaam agujc xchero, näjza sa' dojl ni bejn Coré, ni gudil'näj Dios, luxh gunitlojni. <sup>12</sup> Laaren najcreni te xtuiduxh lo rexchej ni rajc guidoo, direni guidxejb gauxchenäjreni la'tu, sa'csi xque'tisreni riuren. Najcreni si'c te xcäy ni xhet nisguij siädnäni, nani sanä bej nezree nezrec; najczaren si'c te yagbigool nani di ninejxh xcaj lojni, tio'p huält agujtreni, najcreni si'c te yajg ni abiliäädx. <sup>13</sup> Laaren najc si'c nis ni räjs lo nisdoo, che cayajc te bidonduxh, säa, siädni, carii xtujujreni si'c räjs nis lo nisdoo. Najcreni si'c bale' ni rtejb xhaguibaa, rijreni lo te yäl'nacäiduxh ni benchee Dios par tejpas.

<sup>14</sup> Xcuentza redee agunixgaaza Enoc ni najc xagdodoo Adán, räjpni: "Bahuii, siädnä Dios xhidalduxh xangl'ni <sup>15</sup> te gunni yäl'guxhtis loj guiraa bejn te gusacsiduxhni guiraa rebejn ni di gumbee Dios xcuent redolduxh ni bejnreni, xcuentza redidxnaj ni guniyaj rebendolduxhre Dios." <sup>16</sup> Rebejn're laa reni rmojm, runduxhreni quej, rujnreni si'ctis ni rlazj tiejxhreni, rniireni guiraloj didxnaj, rniisireni didxsa'c loj rebejn te gun rebejn'ga si'c ni rlazjreni gunreni.

### *Rulijdxni rebejn nani ahuililajz xtidx Dios*

<sup>17</sup> La'tu, betzä ni sanälazä, riäj<sub>l</sub> guinaj lajztu rediidx nani gunii reapost xten Dad Jesucrist, <sup>18</sup> sa'csi guniireni lojtu: "Neñ redxelult che guibisac Jesucrist, su' bejn ni suxhiznäjäreni rextidx Dios, sujnreni si'ctis guisia' lajzreni." <sup>19</sup> Redee najc renani run rlia' rexpejn Dios lo sa'reni; rinuuzareni ni yu' lo guedxliuj, diza Xprit Dxan xten Dios cuääz neñ lastooreni.

<sup>20</sup> Niluxh la'tu rebetzä nani sanälazä, coltioob loj xcälrlilajztu ni siäd lo Diostis, colnab lo Dios xcuent yälrnibee xten Xprit Dxan xtenni. <sup>21</sup> Colguibajntis lo yäl<sub>s</sub>anälajz xten Dios, col<sub>s</sub>usintis la<sub>l</sub> ni cayunlojtu yäl<sub>r</sub>ulasajz xten Dad Jesucrist ni guniidx yäl<sub>n</sub>abajn par tejpas.

<sup>22</sup> Colgacnäjä renani di chalilazsa'c te chalilajzpacreni xtidx Dios. <sup>23</sup> Colyacnäjä sgaii te guibicajreni lo dojl, gudobxhajxreni, colyejn xhigab lo guiboo cayejreni. Colyacnäjä sgaii bejn, colgulasajzreni con yäl<sub>r</sub>dxejb, niluxh colnatiru te di guntu lagajc dojl ni rujnreni. Gulälaz nani rujnreni, nani ruxhinreni.

### *Redidx lult*

<sup>24</sup> Colguiliä'p xpala'n Dios nani racnäjä la'tu didi jiajbtu lo dojl, nani rujn sajc suutu lo xcälrdimbicha' Dios, nayadujtu, rbaduxh lajztu. <sup>25</sup> Yu' tejtis Dios. Laatisni rajpni yäl<sub>n</sub>naj te guslaani nuurnu lo dojl xcuent ni bejn xtadnu Jesucrist. Colguiliä'p xpala'nni, rajpni guiralii yäl<sub>r</sub>nibee, yäl<sub>r</sub>dimbicha', galooli, näjä naj, näjza par tejpas. Sugacni si'c.

## Rediidx Nani Bacuaa Juan Xcuent Recos Ni Churu Gac

### *Baluijoj Jesucrist lo Juan*

<sup>1</sup> Dee najc rediidx ni badeed Dios loj Jesucrist te guluilojnini loj rexmosni, xcuent recos nani di gaclaa gac. Jesucrist baxhal xanglni lo Juan, te baluiini guiraa recosga lojni. <sup>2</sup> Ni'cni bacuaa Juan lo guijtze guiraa xtidx Dios nani baluii Jesucrist lojni, xcuent guiraa recos nani bahuilojpacni.

<sup>3</sup> Chicbaa renani roj guijtze xcuent recos ni churu gac, renani riuza rediidxga, renani rguchee rediidxga neñ lastooni sa'csi siäddzungajxh redxej che soob rediidxga.

### *Juan cagucuaa guijtze lo gajdz guidoo*

<sup>4</sup> Narä nacä Juan. Cagucuaä guijtze loj guigajdz reguidoo ni tre' lo región Asia. Dios guspajaz la'tu, guscuedxini lajtzu, lagajc Dios ni sigajc najc nadxej, sigajcza gujcnii nani, sigajcza sajcnii par tejpas. Xca'zatu xcälruspalajz näj xcälrbexilajz guigajdz respriti ni suga' guideb gabi cadro rnibeeni, <sup>5</sup> näj xcälruspalajz, xcälrbexilajz Jesucrist nani gunilii diidx ni badeed Dios lojni, nani ganiddoo gubansac lo rebengut, nani rnibeeza lo guiraa rereii loj guedxliujre. Laani sanälazduxhni nuure, laani rudzucajni xtojlnu con xtiejnii. <sup>6</sup> Laani bejnii gacnu te beñro, te guedxro, gaczanu bixhojz lo Dios Xtadni. Suchä'p xpala'nni, suga'pni yälrnibee par tejpas. Sugacni si'c.

<sup>7</sup> ¡Colgabee! Laani sibisacni lo rexcajy, luxh guiragajc rebejn suhii lojni, nägajc renani gudzujd cuä' xcustiini. Guiraa rebejn guedxliujre soon xcuentni. Si'cti, sugacni si'c.

<sup>8</sup> —Narä nacä ganid, nacäza lult, si'c najc reletr A con Z —rnii Dad Dios—. Nabanä nadxej, sigajcza gubanä nani, sigajcza sibanä par tejpas, dipacna gacä ste'ca. Rapä yälrnibeduxhru lo chutis.

### *Bahuiä loj Jesucrist lo xcälrdimbicha'ni*

<sup>9</sup> Narä, Juan, bejtztu, näjza ni cadednäjtu trabajw xcuent Jesucrist, ni riunäjzatu cadro rnibee Dios, ni rsiudzutznäjzatu lo xtidx Jesucrist, guyu'ä lo yuj nani tre' lo nisdoo, ni laa Patmos. Ro'c baxhalreni narä pres sa'csi basule'ä xtidx Dios näjza diidx xcuent ni bejn Jesucrist lo guedxliujre. <sup>10</sup> Te duningw, lañ ni cayunää Dios, guzacä astoo canixcalä, dina niacbeä caro yu'ä, dxejcti nez detzä biejn diagä xse' te ni gunii dipduxh, astoo te trompet, <sup>11</sup> najni loä:

—Narä nacä ganiddoo, nacäza lult. Lo te guitzro bacuaa nani filu, dxejcti baxhal guijtze loj guigajdz guidoo ni yu' nez Asia, neñ reguejdxre: Éfeso, Esmirna, Pérgamo, Tiatira, Sardis, Filadelfia, näjza Laodicea.

<sup>12</sup> Dxejc gubireä te bahuiä chuni'c canii loä. Che gubireä bahuiä lo gajdz gandilier oor. <sup>13</sup> Galäii guigajdz recandilieerga, suga' te ni najc Xi'n Dios nani gujc Xi'n Niguii, najcwni te lajd ni rdzujñ lo ni'lini, lastoozani naliib te cinturon gulajg ni najc ganaxduj oor. <sup>14</sup> Yejcni näjza xquidxejcnii najczareni nolbäj si'c xquichlajd xiil, nolbäj si'c yejg. Dxejcru rbebajl lojni. <sup>15</sup> Ni'ni rdimbicha' si'c guiib ni laa bronz che cayejcni lo guiboo. Xse'ni riejn nadipduxh astoo che riäjt nisro neñ regueuu. <sup>16</sup> Ladbee ca' ñaani gajdz balxhaguibaa; ro'ni rii te espad ni guiro'p laad caj ro'ni; dxejctiru lojni rujñ si'c rujñ loj gubijdx che cagusanijni guideb lagaa.

<sup>17</sup> Che bahuiä lojni, biabrloä nez lojni si'c te beñgut. Dxejcti batzuubni ñaani xladbeeni yecä, dxejc guniini loä, najni:

—Na'c guidxejblu, narä nacä ni gubajñ galooli, narä nacäza ni guibajñ lult. <sup>18</sup> Narä nacä ni nabajñpac; gutä, niluxh naj nabanä par tejpas. Rapä yälrnibee lo yälgujt näjza lo gabijl. <sup>19</sup> Ni'cni bacuaa recos ni abahuiilu, nani cayajc naj, näjza nani churu gac.

<sup>20</sup> Dee najc laa yälxhiga'tz xten regajdz balxhaguibaa ni bahuiilu lo ñää ladbee näjza regajdz gandilier oor: guigajdz balguibaa sälojni xangl Dios xten reguidoo. Dxejc gajdz gandilieerga sälojni guigajdz reguidooga.

## 2

### *Rediidx nani chää loj rexpejn guidoo Éfeso*

<sup>1</sup> Dxejcti najni loä:

—Bacuaa rediidxre lo xangl Dios xten guidoo Éfeso: “Nani ca' guigajdz balxhaguibaa ñaani ladbee, näjza nani rsiaj galäi guigajdz gandilier oor, rnii rediidxre lojtu: <sup>2</sup> Narä numbeä xhi redzuun rujntu, xhi trabajw rdejdtu rujntu dzuunga, näjza xho rsiudzu'tztu. Dizatu guchagsa'tu beñlatsiaj; näjza bala'tztu xho rujn rebejn nani rniireni najcreni apost ni rnii xtidx Dios, luxh direni gac, luxh la'tu gucbegajctu cagusgueereni bejn. <sup>3</sup> Rsiudzu'tztu, rujntu huant xcuent xtidxä, gajdtu guidxajg. <sup>4</sup> Empac yu' te quej ni rbe'cä xcuenttu: dirutu chanälajz narä si'cni huinälajztu narä ganiddoo. <sup>5</sup> Ni'cni colguzaa lajztu caro banijttu, colgusiejch lajztu, colyejn lagajc redzuun ni bejntu galoo che guslojtu huililajztu xtidxä. Palga ditu gusiechljajztu, sudzucaä xcandilieertu cadre suga'ni. <sup>6</sup> Laaca rujntu rbälaztu xtzuun rebejn ni laa nicolaítas, sa'csi näjza narä rbixlazä xtzuunreni. <sup>7</sup> Nani yu' diajgni te cuadiajgni diidx, sucuadiajgni diidx ni rnii Sprit Dxan xten Dios loj reguidoo: loj renani gun gaan lo dojl, gudedä gauni ninejxh ni rcaj lo yajg yälñabajn, ni yu' xhaguibaa cadre yu' Dios.”

### *Rediidx ni rniini loj rexpejn guidoo ni yu' Esmirna*

<sup>8</sup> Dxejcti najni loä:

—Bacuaa rediidxre lo xangl Dios xten guidoo ni yu' Esmirna: “Nani najc ganiddoo, nani najcza lult, nani agujt, dxejctiru gubansacni par tejpas, rnii diidxre lojtu: <sup>9</sup> Narä nanä xho cadejdlu trabajw, nanäza guxilii rajplu, niluxh nez loj Dios yu' xhidajl xhixtenlu. Nanäza yu'reni rniyajlu. Reni rniyajlu rniireni najcreni rexpejn Israel, luxh direni gac. Najcreni xpejn xquidobäz beñdxab. <sup>10</sup> Na'c guidxejblu trabajw nani agojl tedlu. Aree beñdxab gusal gaii sa'tu neñ latzguuib, te gacbeeni don la guliitu ahuililajztu xtidx Dios, te tedzatu trabajw tzuu dxej. Colgutip lajztu mase guettu, dxejcti narä gunidxä te coron xten yälñabajn. <sup>11</sup> Nani rlajz cuadiajg diidx sucuadiajgni diidx ni rnii Sprit Dxan xten Dios loj reguidoo: nani gun gaan lo dojl, xhet gundi yälgujt ni rojpga lojni.”

### *Rediidx ni rniini lo rexpejn guidoo ni yu' Pérgamo*

<sup>12</sup> Dxejcti najni loä:

—Bacuaa rediidxre lo xangl Dios xten guidoo ni yu' Pérgamo: “Nani ca' spaad ni caduxh ro'ni guiro'p laad rnii rediidxre lojtu: <sup>13</sup> Narä nanä caro rbäjztu, rbäjztu lo guejdx cadre rnibee Beñdxab. Rsiudzu'tztu xcuent xtidxä. Laltis rsiudzu'tztu rililajztu xtidxä, mase neñ redxej cheni bagu'treni Antipas, ni gunii diidx xcuenta, nani gusudzutzpac nez loä, nani bagu'treni neñ guejdx cadre rnibee Beñdxab. <sup>14</sup> Niluxh yu' tiop-choñ xtojltu. Lojtu nadxaag gaii bejn ni rujn si'c bejn toBalaam agujc xchero. Laani baseedni Balac xho gunni te jiajb rexpejn Israel neñ dojl, baseednireni gaurenireni recos ni gurej lo dxan nez loj rebanäjb, baseedzani rexpejn Israel guesnäjreni chutis gunaa. <sup>15</sup> Sigajcza nadxaag lojtu gaii bejn ni riu rediidx ni rusule' reni laa nicolaítas. <sup>16</sup> Colgusiechxgaa lajztu, te di jialgacä lojtu te gucuanääreni spaad ni yu' ro'ä. <sup>17</sup> Nani rlajz cuadiajg diidx, sucuadiajgni diidx ni rnii Sprit Dxan xten Dios loj reguidoo: renani gun gaan lo dojl, lojni gudedä yätxtiil ni laa mana ni yuchee-xhiga'tz. Sudedäza lojni te guibäz ni najc nol, lojni caj te lajni ni nacoob, nani rutru racbeedi, xtebtis nani xca'ni.”

### *Rediidx nani rniini lo rexpejn guidoo ni yu' Tiatira*



<sup>18</sup> Dxejcti najni loä:

—Bacuaa rediidxre lo xangl Dios xten guidoo ni yu' Tiatira: “Xi'n Dios nani rbebajl balojni, ni rdimbicha' ni'ni si'c bronz, ni'c rnii rediidxre lojtu: <sup>19</sup> Ananä xtzuuntu, sanälajztu sa'tu, nanä xho rililajztu xtidxä, xho racnäjtü resa'tu, näjza xho rsiudzu'tztu, runduxhtu huant. Nanäza cayujntu dzunroru naj loj ni bejntu che guslojtu. <sup>20</sup> Niluxh yu' xhicuent rdxe'chä lojtu. Rcäjbtu riu'tu loj te gunaa ni laa Jezabel. Laani rniisini najcni te profe't, gunaa ni rnii xtidx Dios, rusgueetisni bejn. Luxh xcäl'ruseedni cagusgueeni rexpänä nani ahuililajz xtidxä, te naj rujnreni cosguijdx, si'c yälresnäjä ni di gac chääl'ni, rajwzarenä nani gurej lo dxan xten rebanäjb. <sup>21</sup> Aguläzä xchej te gusiechläjzni, gusaanni gunni dojl, luxh naaddini gusiechläjzni xcuent redzunguijdx ni rujnni. <sup>22</sup> Luxh palga laani dini gusaan gunni redzuun nani rujnni, narä siguixäni, gudedä te yälracxhuro. Luxh sutedä trabajwduxh guiraa renani bennäjni dzunguijdx palga direni gusiejch lajzreni, palga direni guchaa xmoodreni. <sup>23</sup> Sugutxhiä, sunitloä rexi'n gunaaga, te si'c gacbee guiraa rebejn ni yu' neñ reguidoo narä nacä ni rula'tz rexhigab ni yu' xcäriejnreni, näjza yäl'rililajz ni yu' neñ lastooreni. Te gacbeezarenä narä sunidxä lo tejgatu ni riäj'l xca'tu xcuent redzuun ni rujntu. <sup>24</sup> Dxejc loj guiraa reni yu' lo guedx Tiatira, la'tu ni di guirinajl xnezyuj Jezabel, la'tu ni di gumbee nani rniireni najc recosduxh xten beñdxab, xhetru rniädi lojtu, dirunä gutalä xtzuuntu. <sup>25</sup> Colyapdzu'tz rextidxä nani arajptu dxejli ni guibisacä lojtu. <sup>26</sup> Nani gun gaan lo dojl, näjza nani cagusoob xtidxä dxe lultli, lojni sutedä yäl'rnibee te guinibeeni renacion. <sup>27</sup> Si'cni baniidx Xtadä yäl'rnibee loä, sutedä yäl'rnibee lojni, te guinibeeni guiraa reben guedxliuj, gunnäjni yäl'guxhtis lojreni te barguiib si'c rujn ni runchee guesbajñ, rlia'ni guiraa regues nani xhet sajcdi. <sup>28</sup> Sunidxäza bale' xhaguibaa ni rii rsildoo (ni säloj guibanäjnu Dios). <sup>29</sup> Nani rlaiz cuadiajg sucuadiajgni diidx ni rnii Sprit Dxiän xten Dios loj reguidoo.”

### 3

#### *Rediidx nani rniini lo rexpejn guidoo ni yu' Sardis*

<sup>1</sup> Dxejcti najni loä:

—Bacuaa rediidxre lo xangl Dios xten guidoo ni yu' Sardis: “Si'c naj nani rajp guigajdz Sprit xten Dios näj guigajdz rebal xhaguibaa: Narä nanä guiraa redzuun nani rujntu, rnii rebejn nabajntu, niluxh narä nanä ascanu agujttu, dirutu gun xtzunä. <sup>2</sup> Colguibajñ, colgula'tzru nani rapsijctu xcuent rextidxä nani ameer nitloj neñ lastootu. Narä ruhuiä ditu niunsa'c dzuun xtenä nez loj Dios. <sup>3</sup> Colgusnaj lajztu rediidx ni basule'reni lojtu, nani abacuadiajgtu, colgusoob rediidxga, colgusiech lajztu. Palga ditu guibajñ, palga ditu guchaa xmoodtu, sidzunä nez lojtu si'c te gubaan, nicla gaantu cor guidzunä lojtu. <sup>4</sup> Niluxh yu' gaiisi bejn lo guedx Sardis nani naya, nani gajdreni gun dojl. Sajcwreni ladnolbäj te sanäreni narä xhaguibaa, sa'csi laarenä säbyäj'lreni. <sup>5</sup> Nani gun gaan lo dojl, ni'c sajc gacwni ladnol, luxh dizana guche'nä lajni loj xlibr cadre caj laj renani sibajñnäjä Dios par tejpas. Sicäpäza nez loj Xtadä näjza nez loj guiraa rexquixhajgni, bejnga najc rexpänä. <sup>6</sup> Nani rlaiz cuadiajg diidx, sucuadiajgni diidx ni rnii Sprit Dxiän xten Dios loj reguidoo.”

#### *Rediidx nani rniini lo rexpejn guidoo ni yu' Filadelfia*

<sup>7</sup> Dxejcti najni loä:

—Bacuaa rediidxre lo xangl Dios xten guidoo yu' Filadelfia: “Nani najc dxan, nani najc guliipac, nani rajp xliäii toDavid (ni säloj guiragajc yäl'rnibee), nani che ruxhalni, rut rusäuudi, nani che rusäuuni, rut ruxhaldi, laani rniini diidxre lojtu: <sup>8</sup> Narä nanä xhini'c rujntu. Si'c te puert ni naxhal, ni rut rusäudi, si'cza sunidxä yäl'rnibee lojtu te gusule'tu xtidxä, rutliidi sajc gusäuu ro'tu. Mase guxii nadip-nadaantu, atu canii xtidxä, ditu cuatzläjz xtidxä. <sup>9</sup> Suhuiitu xho gunä rebejn ni yu' lo guidobäz xten beñdxab. Rniisireni

najcreni xpejn Israel, luxh direni gac; rusgueereni bejn. Narä sunäpac jädzuxhijbreni nez lojtu, sunäza gacbeepacreni sanälazduxhä la'tu. <sup>10</sup> Sa'csi basoobtu xtidxä ni gunibeä sutijptu, na'c jieedtu, ni'cni narä sacnäätzatu che guidzujn dxej tedtu trabajw. Luxh orğa ameer guidzujn lo guideb guedxliuj, luxh sidejd guiraa reben guedxliuj trabajw, te guibee reben<sup>sa</sup>'c lo reben guedxliuj. <sup>11</sup> Narä di gaclaa jäälä; gopdzu'tz ni rajptu, te rut gudzucajdi ni gunidxä xca'tu. <sup>12</sup> Nani gun gaan lo dojl, narä gunäni si'c te pilajr nen xquidoo Xtioozä, nalajznu, sajcnı te bejn nani gac guinibee cadro yu' Dios. Sibajnnı ro'c par tejpas, diruni guirıi ro'c. Lojni gucuaä laj Dios näjza laj guejdx xten Dios ni najc Jerusalencoob, nani guirıi xhaguibaa cadro yu' Dios; lojni sucuaäza laä ni najcza nacoob sa'csi najcni xpenä. <sup>13</sup> Nani rlajz cuadiajg diidx, sucuadiajgni ni rnii Sprit Dxan xten Dios loj reguidoo.”

### *Rediidx nani rniini lo rexpejn guidoo ni yu' Laodicea*

<sup>14</sup> Dxejcti najni loä:

—Bacuaa rediidxre lo xangl Dios xten guidoo ni yu' Laodicea: “Nani laa Amén (ni säloj sugacni si'c), nani najc testiigw ni rniliipac, ni di cuääz guiniini didxliiga, nani guläxtiej guedxliujre näj guiralii ni benchee Dios, laani rniini scree: <sup>15</sup> Nanä redzuun ni cayujntu. Ditu sasa'c lo xnezyuä, dizatu cuälaz xnezyuä. ¡Maläii guntu tejni o steeni! <sup>16</sup> Ni'cni, sa'csi najctu si'c nistiib, ditu gac si'c nisnajl, niclaza gactu si'c nislää, sibäro'ä la'tu. <sup>17</sup> Sa'csi rniilu: Ri'cw narä, rapä xhidalduxh xhixtenä, xhet rquinädi. Luxh dilu gan xhet rajpdilu, alga najclu ben gubijn, te ben probduxhlu, di lojlu jien, luxh suga'lu xhabäalu nez lo Dios. <sup>18</sup> Ni'cni rulidxälu siilu loä oor xtenä nani agudejd lo guiboo te gaclu ri'cw; gusii loä ladmol gacwlu, te di guitujylu suulu xhabäalu; gusiiza unguent loä te chää balojlu, te jien lojlu. <sup>19</sup> Rebejn nani sanälazä, reni'c rulidxä, runäza riareni che et laadi rujnreni. Ni'cni colsäblajz; colgusiejch lajztu. <sup>20</sup> Colhuii, ana suga'ä roxlä' lastootu, cagusezä, cabedxa'ä. Palga yu' chu tejtı ni jiejn diajgni xse'ä, guxhalni xpuert lastooni, siu'ä lastooni, te gacnääni, te guiban<sup>sa</sup>'czani nez loä. <sup>21</sup> Loj nani gun gaan lo dojl, lojni gudedä guinibenäjni narä xhaguibaa, sa'csi näj narä abenä gaan lo dojl, ni'cni gurenää Xtadä cadro rnibeeni xhaguibaa. <sup>22</sup> Nani rlajz cuadiajg diidx, sucuadiajgni diidx ni rnii Sprit Dxan xten Dios loj reguidoo.”

## 4

### *Calä'preni xpala'n Dios xhaguibaa*

<sup>1</sup> Che gulujx bacuaä rediidxga, guläsä loä, bahuiä astoo naxhal ro puert xhaguibaa. Dxejcru gunii xse' nani biejn diagä ganiddoo, nani riejn si'c xse' te trompet, najni loä:

—Huä'p, gudaa ree, te guluiä lojlu recos ni churu gac che luux gac recosre.

<sup>2</sup> Lagajc dxejc astoocanu si'cni huij sprit xtenä xhaguibaa. Ro'c bahuiä te yagxhilro cadro rbej nani rnibee xhaguibaa, luxh ro'c sobga' nani rnibeeni. <sup>3</sup> Nani sobga' lo yagxhilga, rienni si'c te guisa'c ni rbebalsejs, si'c reguisa'c ni laa jasje, näj cornalina. Guideb gabi yagxhil cadro rnibeeni dejd te xquitgubijdx ni rbebalsejs si'c guisa'c ni laa esmeralda. <sup>4</sup> Guideb gabi cadro rnibeeni suga' sgalbitajp yagxhil, loj reyagxhilga sobga' galbitajp reben<sup>gool</sup>, najcwreni ladmol, yu' coron oor yejc tejpgareni. <sup>5</sup> Nez lo yagxhilro cadro rnibeeni riı reyälrdinya' näjza guzii. Nez loj cadro rnibeeni caya<sup>l</sup>guij gajdz bajl ni najc gajdz Sprit Dxan xten Dios. <sup>6</sup> Nez loj cadro rnibeeni yu' astoocanu te nisdoo ni rien si'c te guihuanro, rdimbichasejsni.

Galäii yagxhilroga näjza guideb gabini suga' tajp man, guideb nez lojreni näjza nez dejtzenı yu' balojni. <sup>7</sup> Manganidga najc si'c te lion; man ni rojppa najc si'c te gonbäz; man ni riojn<sup>ga</sup> rujn lojni si'c rujn loj te niguii; man ni rdajppa najcni si'c te bisiro cagutajt xhaguibaa. <sup>8</sup> Niluxh guidap remanga tejpgareni yu' xho'p xhigareni, guideb gabireni, näj nez nenrenı liguidxa balojrenı, niluxh direni gusilajz, dxej-yääl caniireni:

Dxan, dxan, dxan najc Dad Dios ni rajp yäl̄rnibeduxh,  
nani yu' galooli, nani yu' naj, nani churu jiäd.

<sup>9</sup> Guidap remanga rliä'preni xpala'n Dios, rusuxhijbreni rajnrenini, rdeedzareni xquix-  
tios loj nani rnibee par tejpas. <sup>10</sup> Dxejc guigalbitap rebengool, suzuxhijbzareni loj nani  
rbej lo yagxhilro, te ganreni nani nabajn par tejpas. Sucuaareni xcoronreni nez loj  
xyagxhilroni, siniireni lojni, säjpreni:

<sup>11</sup> Dad Dios baxhuaannu, Guejbpac lu riäj̄l xca' guiraa rebala'n, guiraa reyäl̄ruzuxhijb,  
guiraa reyäl̄rnibee,  
sa'csi Guejblu guläxtiej guira'ti nani yu' naj,  
yu'reni sa'csi rlajz Guejblu chureni,  
ni'cni benchee Guejblu guiraareni.

## 5

### *Te guijtz näj te ni najc Xiil xten Dios*

<sup>1</sup> Dxejcru narä Juan bahuiä lo nani sobga' lo yagxhilroga. Naani ladbee ca'ni te libr,  
najcni si'c te biliu guijtz. Caj diidx nez lojni caj diidx nez dejtzn, nadxe'ni, caj gajdz seii  
lojni. <sup>2</sup> Dxejcti bahuiä lo te xangl Dios ni nadipduxh, dip guniini, najni:

—¿Chuni'c riäj̄l guxhal guijtzre? ¿Chuni'c riäj̄l gutiäjs reseiire?

<sup>3</sup> Niluxh nicla tej bejn di nidxäj̄l ni riäj̄l gutiäjs reseiiga te guxhalni guijtzga; nicla  
xhaguibaa, nicla lo guedxliujre, nicla xhajiät nez neñ guedxliuj. Niclaza nidxäj̄l chu  
niajc nuhiii lo guijtzga. <sup>4</sup> Narä ronduxhä sa'csi nicla tej rut riäj̄l di gutiäjs reseiiga, niclaza  
ni riäj̄l goł guijtzga, niclaza ni riäj̄l fiitis lo guijtzga. <sup>5</sup> Dxejcti gunii te bengool loä, najni:

—Na'cru goonlu. Bahuii gan, niguii ni rniireni Lion, xagdoo toJudá, xagdoo toDavid,  
abejnni gaan lo yäl̄gajt ni'c naj riäj̄l guxhalni guijtzga, gutiäjszani guigajdz reseiiga.

<sup>6</sup> Dxejc bahuiä nez cadro suga' yagxhilroga näj guidap remanga, näj cadro suga'  
guiraa rebengool luxh te galäiiga suga' tej ni najc Xiil xten Dios, astoo abagu'trenini. Sojb  
gajdz xca'chni näjza gajdz balojni, ni najc gajdz Sprit xten Dios nani ruxhalni guiraa nez  
lo guedxliuj. <sup>7</sup> Laani gubigni, cua'ni guijtzga, guläänini naa ladbee xten nani sobga' lo  
yagxhilroga canibee. <sup>8</sup> Che cua'ni guijtzga, guidap remanga näjza guigalbitap rebengool  
bazuxhijbreni nez loj Xiilga. Tejga rebengoolga ca' te arp, ca'zareni taz oor guidxa te ni  
najc si'c yaal. Yaalga najc guiraa reyäl̄rbejdx, yäl̄rniab xten rexpejn Dios. <sup>9</sup> Cayolzareni te  
dicoob ni najc scree:

Guejblu sacduxh,  
riäj̄lpac xca' Guejblu guijtzga,  
gutiäjs Guejblu reseiiga, sa'csi bagu't rebejnlu,  
näjza xtiejnlu gudijx xcuent bejn lo Dios.  
Gudijxlu xcuent bejn ni najc garen-garen raz,  
ni rnii garen-garen didxsaj,  
ni siäd garen-garen guejdx lo garen-garen ladxbejn.

<sup>10</sup> Badeedlu gacreni reii näjza bixhojz lo Dios.

Laareni sinibeereni reben guedxliuj.

<sup>11</sup> Che bahuiä, biejn diagä xse' xhidalduxh xangl Dios ni suga' guideb gabi yagxhilro  
cadro rbej nani rnibee, näjza xse' guidap reman, näjza xse' guiraa rebengool. Luxh di  
gacdi guigab xangl Dios ni tre' ro'c sa'csi xhidalduxhtej najcreni, xhidalduxh miyon  
najcreni. <sup>12</sup> Dipduxh najc xse'reni, caniireni scree:

Sacduxh Xiil nani bagu'treni,  
ni'c riäj̄l xca'ni yäl̄rnibeduxh, yäl̄rapduxh, yäl̄nanduxh, yäl̄milagwr.  
Riäj̄lza guiliä'pnu xpala'nni, guzuxhijbnu lojni ganunni, gudeednu xquixtios lojni.

<sup>13</sup> Dxejcti biejn diagä xse' guiragajcreni, guiraa reni benchee Dios ni yu' xhaguibaa, näj guiraa reni yu' loj guedxliujre, näjza guiraa reni yu' xhajiät nez neñ guedxliuj näj lo nisdoo, biejn diagä caniireni scree:

Loj nani sobga' lo yagxhilro cadre rnibeeni,  
näjza loj ni najc Xiil xten Dios, laatisni sacduxhni,  
guiliä'pnu xpala'nni, guzuxhijbnu nez lojni gañnuni,  
gäbzanu rinibeeni par tejpas.

<sup>14</sup> Dxejcti guidap remanga rnigajcreni scree:

—Sugacni si'c.

Dxejcti guigalbitap rebeñgool bazuxhijbreni nez loj nani nabajñ par tejpas, gojñrenini.

## 6

### *Guigajdz reseii*

<sup>1</sup> Dxejcti bahuiä loj ni najc Xiil xten Dios. Batiäjsni tej seiiga. Biejn diagä gunii tej lo guidap remanga, luxh che guniini riejn xse'ni si'c che ni canii guzii, najni loä:

—Gudaa te filu.

<sup>2</sup> Dxejc bahuiä lo te cabai nol. Nani bijb dejtzn ca' te arcw nani rucuaa fle'ch. Badeedreni te coron lojni. Biriini cayujñni gaan te chanuutis gunni gaan.

<sup>3</sup> Che batiäjsni ni rojp seiiga, biejn diagä gunii ni rojp manga, najni loä:

—Gudaa te filu.

<sup>4</sup> Dxejc bahuiä lo te cabai xniaa. Loj nani bijb cabai xniaaga badeedreni yälrnibee gudzucajni yälñadoo, yälrbexilajz, lo guedxliujre, te ju't sa' rebejñ. Badeedreni te spadro cua'ni.

<sup>5</sup> Dxejcti che batiäjsni ni riojñ seiiga, biejn diagä gunii ni riojñ manga, najni loä:

—Gudaa te filu.

Dxejc bahuiä lo te cabai yas. Nani bijbni naazni te balans. <sup>6</sup> Biejn diagä astoo galäii guidap remanga, birii xse' te ni canii scree:

—Tej kil xob xca'lu gunlu dzuun tebdxej; choñ kil salbaad xca'lu gunlu dzuun tebdxej. Niluxh na'c guhuallu bin niclaza se't.

<sup>7</sup> Dxejcti che batiäjsni ni rdap seiiga, biejn diagä gunii ni rdajp manga, najni loä:

—Gudaa te filu.

<sup>8</sup> Dxejc bahuiä lo te cabai gojtz. Nani bijbni laa yälgujt, luxh dejtzn siädnaalgajc ni rnibee gabijl. Gula'ni rebejñ ni re' lo guedxliujre gujcreni tajp gala', dxejc loj redee badeedreni guinibeereni lo te cuaa rebeñguedxliuj te ju'treni rebejñga con spaad, näj yälrliaan, näj yälracxhuu, näjza remanduxh ni yu' dajn.

<sup>9</sup> Dxejcti che batiäjsni ni rajc gaii seiiga, bahuiä nez ni' xpiändxan Dios, ro'c naga' xaim rebejñ nani bagu'treni sa'csi huililajzreni xtidx Dios, näjza sa'csi gusutijpreni basule'reni xtidx Dios. <sup>10</sup> Dipduxh caniireni, canabreni lo Dios, räjpreni:

—Dad, ni najc Dxañ, ni najc guliipac. ¿Gucli cuääz, gaclaa gun Guejblu yälguxhtis loj reni bagu't nuure lo guedxliuj te quiixreni ni bejnreni?

<sup>11</sup> Dxejcti cua'reni te ladnolbäj gojt tejpgareni. Dxejc räjpreni lojreni cuäzsijcreni, gusilajzreni, lañ ni guiza' resa'reni ni rusule' xtidx Dios, ni churu gugu'treni sigajc bagu'treni laareni.

<sup>12</sup> Bahuiäza cheni batiäjsni ni rajc xho'p seiiga, luxh gujc te xuduxh, bigasboo loj gubijdx si'c te ladyas, sas bäii gujc guidebni si'c rejñ. <sup>13</sup> Rebajl ni yu' xhaguibaa bitejbreni lo guedxliujre, si'c rtejb rebetz yagxhejñ che rusniib te beduxh yajgga. <sup>14</sup> Dxejcti gunitloj guibaa si'cni rnitloj te guijtz che re'ni, rajcni te bilu. Guiraa redajñ näjza reyuj ni re' galäii lo nisdoo biniibreni, bidxaa xladreni. <sup>15</sup> Ni'cni guiraa rebeñ guedxliuj, rebejñ nani rnibee, näjza rebeñro, näjza recapitán, näjza rebeñ rapduxh, näjza rebeñ ni nadiplajzreni, näjza remos, näjza renani rut lojdi yu'reni, guiragajcreni baxunreni, huicuatlzlojreni neñ rebiliää neñ redajñ. <sup>16</sup> Dxejc räjpreni loj redajñ, loj reguilaj:

—Colguitejb yejcnu, colgucua'tz nuure loj nani rbej lo yagxhilo xhaguibaa nájza loj yälguixhtis xten nani najc Xiil xten Dios. <sup>17</sup> Sa'csi abidzujñ dxero xten xcälguixhtisni, ¿chuni'c sajc suu nez lojni?

## 7

### *Tegayuu tiubitajp mił rexpejn Israel*

<sup>1</sup> Dxejcti bahuiä lo tajp xangl Dios ni suga' loj guidajp laad guedxliuj. Caguscuaäzreni guidajp rebej xten guedxliuj te xhet bejdi guibi' lo guedxliuj nicla lo nisdoo niclaza yejc reyajg. <sup>2</sup> Bahuiä lo stee xangl Dios, ni siääd nez cadre rliejn gubijdx, ca'ni seii xten Gueb Dios ni nabajn par tejpas. Dipduxh guniini lo guidap xangl Dios ni rajp yälrnibee te gunreni daan lo guedxliuj, nájza lo nisdoo. <sup>3</sup> Räjpnı lojreni:

—Guläzsijctero, lał ni guicuaanu te seen lo cuaj reni najc xpejn Dios, te dxejcru sajc guntu daan lo yuj, náj loj nisdoo, náj loj reyajg.

<sup>4</sup> Dxejcti biejn diagä najreni bal bejn guyu' seenga lo cuajreni, basa'reni tegayuu tiubitajp mił bejn ni bibee loj rexpejn Israel. <sup>5</sup> Loj rexpejn Judá bibee tzubitio'p mił; loj rexpejn Rubén bibee tzubitio'p mił; loj rexpejn Gad bibee tzubitio'p mił; <sup>6</sup> loj rexpejn Aser bibee tzubitio'p mił; loj rexpejn Neftalí bibee tzubitio'p mił; loj rexpejn Manasés bibee tzubitio'p mił; <sup>7</sup> loj rexpejn Simeón bibee tzubitio'p mił; loj rexpejn Leví bibee tzubitio'p mił; loj rexpejn Isacar bibee tzubitio'p mił; <sup>8</sup> loj rexpejn Zabulón bibee tzubitio'p mił; loj rexpejn José bibee tzubitio'p mił; loj rexpejn Benjamín bibee tzubitio'p mił.

### *Benguixhuj ni najcw ladnolbäj*

<sup>9</sup> Dxejcti bahuiä lo xhidalduxh bejn, benguixhuj, nicla tej bejn digacdi gulabreni. Garen-garen ladx-bejn siäädreni, garen-garen najc lajdxreni, náj raz xtenreni, náj xtiidxreni. Suga'reni nez loj yagxhilo xten ni rnibee, nájza nez lojni ni najc Xiil xten Dios. Najcwreni ladnolbäj, ca'zarenı zıjn. <sup>10</sup> Dipduxh rniireni, räjpreni:

Dios ni rnibee lo yagxhilo, nájza nani najc Xiilre, baslaareni nuure lo xtojlnu.

<sup>11</sup> Suga'za guiraa rexangl Dios guideb gabi yagxhilo cadre rnibeenı, nájza guideb gabi rebengool nájza guidap remanga, dxejcti bazuxhıjbrenı, basajbrenı lojrenı nez lo Dios, <sup>12</sup> räjpreni:

Sugacni si'c. Loj Xtıostısnu colye'tz sacduxhni;  
colguiliä'p xpala'nnı;  
laatisni rajpni yälhajn;  
lojtısnı colgudeed xquixhtıos, laatisni colgan,  
colısxhıjb lojni; laatisni rajpni yälrnıbee nájza yälmilagwr.  
Sugacni si'c par tejpas.

<sup>13</sup> Dxejc gunıı te bengool loä, najni:

—Renani najcw reladnolbäjre, ¿chu najcreni? ¿Casiäädrenı?

<sup>14</sup> Dxejcti röpä lojni:

—Dad, anajn Guejblu.

Dxejc najni loä:

—Redee najc renani agudejd yältrabajwdxh, renani abia rextojlnı sa'csi xtiejn Xiil xten Dios agudıjx xtojlnı. <sup>15</sup> Ni'cni suga'reni nez loj yagxhilo xten Dios dxej-yäl cayujnrenı xtzuunı neñ xquıdoonı. Ni'cni sacnäj nani sobga' lo yagxhıloga guiraa renani suga' nez lojni, sunäjtısnı laareni. <sup>16</sup> Dirurenı guıliaan, niclaza jıojlnı, diza gubıjdx guze'c lojrenı, dizarenı gacnanlaa. <sup>17</sup> Sa'csi nani najc Xiil xten Dios ni sobga' galäıı loj yagxhilo xten Dios, laanı cayajpnırenı si'c xılböz, sinänırenı cadre yu' nısyı ni rudeed yälhıbnı par tejpas. Suspijdz Dios nısee balojrenı, dirurenı goon par tejpas.



## 8

*Ni rajc gajdz seiiga*

<sup>1</sup> Che batiäjsni ni rajc gajdz seiiga, gucdxi xhaguibaa si'cti med or. <sup>2</sup> Dxejcti bahuiä loj guigajdz xangl Dios ni suga' nez loj Dios. Lojreni badeedreni gajdz trompe't. <sup>3</sup> Dxejctiru biääd stee angl, ca'ni te bacue ni najc ganax oor, bazujnini nez loj piändxan. Badeedreni lojni naclejñ yaal te cachaagnini loj guiraa rextidx xpejñ Dios ni rniireni che rbedx-rniabreni lo Dios, te checni lo piändxan ni najc ganax oor, ni yu' nez loj yagxhilroga. <sup>4</sup> Dxejcti gujxhga nägajc rextidx rexpejñ Dios, birii ladsnaa xangl Dios ni ca' bacue, huä'preni nez loj Dios. <sup>5</sup> Dxejcti lagajc anglga cua'ni guiboo ni dzuub lo piändxanga, bachajni bacue, dxejcti baslojnini lo guedxliuj. Dxejc guyu' te guziduxh, bidinyaduxh, gujczä te xuduxh.

*Retrompe't*

<sup>6</sup> Dxejcti guigajdz rexangl Dios ni ca' guigajdz retrompe't, guzusinreni te guisloj goḷreni retrompe'tga.

<sup>7</sup> Che bil trompetganid, guixob näj guiboo nu'chreni rejn gusloj cayajbreni loj guedxliuj. Dxejcti huejc ni riojñ la' guedxliuj, huejczä ni riojñ la' reyajg näjza guiraliñ recuaan.

<sup>8</sup> Che bil ni rojp xangl Dios trompe't ni ca'ni, ascanu yu' chu bacuaani biajb si'c te danro ni cayejc loj nisdoo. Dxejcti gujc ni riojñ la' nisdoo si'c rejn. <sup>9</sup> Dxejcti gujt ni riojñ la' rebäjñ näj guiraa reman ni yu' loj nisdoo. Gunitlojza ni riojñ la' rebarcw ni sazaj lo nisdoo.

<sup>10</sup> Che bil ni riojñ xangl Dios trompe't ni ca'ni, biajb te balro xhaguibaa, cayejcni si'c te balguejd. Bitejbni loj ni riojñ la' regueuu, näjza cadre rliejñ nis. <sup>11</sup> Laj bajlga najc Ajenjo, ni säloj te cos ni nanladuxh. Ni riojñ la' nis gujc nis nanladuxh. Dxejcti gujt xhidalduxh bejñ xcuent nisnanlaaga.

<sup>12</sup> Che bil ni rdajp xangl Dios trompe't ni ca'ni, guxhiñ ni riojñ la' gubijdx, näjza ni riojñ la' bäii, näjza ni riojñ la' rebal xhaguibaa, bicäjyreni. Dxejcti dirureni guzaniñ ni riojñ la' dxej, näj ni riojñ la' yääl.

<sup>13</sup> Dxejcti bahuiä xhaguibaa, biejn diagä si'c te bisij cagutajñ nez galäii xhaguibaa. Biejñ diagä cabedxa'ni, caniini rediidxre:

—iAii! iAii! iAii! Riaduxhä rebeñ guedxliuj che guisloj goḷ schon rexangl Dios retrompe't ni ca'reni. Sidejd rebeñ guedxliuj trabajwduxhru.

## 9

<sup>1</sup> Che bil ni rgaii xangl Dios trompe't, bahuiä lo te bal xhaguibaa ni bitejb lo guedxliujli. Bajl xhaguibaaga cua'ni läii ni ruxhal ro' gabijl. <sup>2</sup> Baxhaltini ro' gabijl, dxejc huäjs te gujxh ro'ni si'c räjs gujxh ro' te orguiboro. Dxejcti gujxhga basäuni loj gubijdx, gudxajni lo bej. <sup>3</sup> Dxejcti lo gujxhga birii betzsu gusujreni guideb lo guedxliuj. Cua'reni yälñabee gacreni nialajz si'c nialajz renaxejb. <sup>4</sup> Cua' remanga yälñabee na'c gunreni daan loj reguixa', loj recuaan, loj reyagbajñ; rebejñtis nani xhet beedi xten Dios caj lo cuajreni, reni'c gusacsíreni. <sup>5</sup> Cua'reni yälñabee na'c ju'tni bejñ, gaii bäii gusacsíreni xcälñayanreni bejñ. Luxh xcälñayanreni najc si'c yälñayan cadre rauya' te naxejb te bejñ. <sup>6</sup> Neñ redxejga, siguiil rebejñ yälgujt, luxh direni guidxälñi. Luxh mase rlajzreni guetreni, sibicaj yälgujt lojreni.

<sup>7</sup> Rebetzsure najc si'c recabaii ni suchee te chääreni lo guer. Yejcreni yu' te ni najc si'c te coron oor; luxh lojreni rujñ si'c loj rebejñ. <sup>8</sup> Xquichejcreni si'c najc xquichejc gunaa; reläjyreni najc si'c läjy lion. <sup>9</sup> Luxh guideb tiejxhreni caj si'c guib ni rusäudzu'tzreni. Rubeduxh rexhigaareni, si'c rubej che ruxuñ xhidalduxh cabaii näj xcarreni che agojl chääreni guer. <sup>10</sup> Xhibaanreni najc si'c xhibaan naxejb, xcuchreni yu' yälñayan te gusacsíreni rebeñ guedxliuj gaii bäii. <sup>11</sup> Yu'za ni rnabee lojreni, xangl bendxab ni birii gabijl. Xtidx hebreo laani Abadón, xtidx griegw, laani Apolión.

<sup>12</sup> Naj agudejd tej casionroga, naj cayäädx stio'pni.

<sup>13</sup> Che bil ni rxho'p xangl Dios trompe't, biejn diagä te xse' bejn ni lascanu siädni galäii guidajp reca'ch ni caj loj xpiändxan ni nac-chee ganax oor, ni yu' nez loj Dios. <sup>14</sup> Luxh xse' bejnga canii loj ni najc rxho'p xangl Diosga, ni ca' trompe't:

—Baslaa guidap reangl nani caduu nez rogeuu ni laa Eufrates.

<sup>15</sup> Dxejcti baslaani guidap reanglga te ju'treni ni riojn la' ben guedxliuj. Luxh gule Dios reanglga parpac dxejga, bäiiga, ijzga. <sup>16</sup> Biejn diagä bal najc guiraa resoldaad ni rbijb cabaii: najcreni tio'p gayuu miyon.

<sup>17</sup> Scree bahuiä lo bacal recabaiiga näjza renani bijb recabaiiga. Lastoo reni bijb recabaii caj te guuib, najcni xnäa näj zul näj gojtz. Dxejcru yejc recabaiiga najc si'c yejc te beedz. Ro'reni carii bajl näj gujxh, näj sufr. <sup>18</sup> Ni riojn cuaa bejn gujt xcuent guichon replaag nani carii ro' recabaii, xcuent bajl näj gujxh, näjza sufr. <sup>19</sup> Recabaii runnäj daan ro'reni näjza xhibaanreni, sa'csi xhibaanreni najc si'c bäl, yu' yejcreni, näj ni'c runnäjreni daan.

<sup>20</sup> Luxh guiraa rebejn nani di replaagre nugu't, direni nusiejch lajzreni xcuent ni cayujn naareni, te rajnreni rebenxab, näjza rebanäjb ni nac-chee oor, näjza pla't, näjza latón, näjza guij, näjza yajg. Luxh rebanäjbga di gacdi fiireni, di diajgreni jiejn, di gacdi sareni. <sup>21</sup> Diza rebejnga nusiejch lajzreni xcuent xcälrugutreni, xcälrujnreni yälbidxaa, xcälresnäjreni bejn ni di gac chäälni, niclaza xcälgubaanreni.

## 10

### *Te angl ni ca' te guijtz*

<sup>1</sup> Bahuiä stee xangl Dios ni rajp yälribeduxh, siädjiäjtne xhaguibaa, li yu'ni neñ bäj, yejcti dejd xquitgubijdx, luxh lojni najc si'c gubijdx. Reni'ni najc si'c tio'p pilajr bajl.

<sup>2</sup> Ca'ni te librbäze', naxhal libre'ga. Bazujni ni'ni ladbee loj nisdoo, bazujni ni'ni ladbäjgw lo yuj, <sup>3</sup> dxejc guredxaduxh anglga si'c rbedxa' beedz. Dxejcru gunii guigajdz guzii sigajcsa. <sup>4</sup> Che gulujx gunii guziiga, narä rlazä nucuaä lo guijtz nani guniireni, per biejn diagä xse' tej ni gunii xhaguibaali, najni loä:

—Guluchedzu'tz rediidxga nani gunii reguzii, na'c gucuaaluni.

<sup>5</sup> Angl nani suj ni'ni loj nisdoo näjza loj yuj, guläs naani ladbee nez xhaguibaa.

<sup>6</sup> Guniliini diidx con laj GuebDios ni nabajn par tejpas, ni guläxtiej xhaguibaa näjza guiraa ni tre' xhaguibaa; ni guläxtiej guedxliujre näjza guiraa ni tre' lojni; ni guläxtiej nisdoo näjza guiraa ni tre' neñ nisdoo. Räjpn:

—Diru redxejre gaclaa. <sup>7</sup> Che guidzujntis dxej ni agojl goj ni najc rgajdz xangl Dios ni ca' trompe't, dxejc abaza' rextidxxhiga'tz Dios, si'c ni basule' redade' ni gunii xtidx Dios agujc xchero.

<sup>8</sup> Dxejc gunisac xse' nani gunii xhaguibaali, stehuält biejn diagä caniini loä, najni:

—Huij, te xca'lu libre' ni naxhal ni yu' ladznaa angl ni suj te laad ni'ni loj nisdoo, stelaad ni'ni lo guedxliuj.

<sup>9</sup> Dxejcti hua'ä lo anglga, räpä lojni:

—Guniidxlu libre'ga.

Laani najni loä:

—Anire, cua'ni, gudajwni. Sun nanlaani xque'lu, niluxh ro'lu sajcti nejxh si'c dzujn.

<sup>10</sup> Dxejcti cua'ä libre'ga lo naa anglga, dxejc gudauäni. Ro'ä guyu'ni nejxh si'c dzujn, luxh che gudämäni, lacti guc nanlaani xque'ä. <sup>11</sup> Dxejc najni loä:

—Nanab chasulesaclu xtidx Dios xcuent nani churu gac loj xhidalduxh bejn, näjza guejdx, näjza renani rnii garen-garen xtiidxreni, näjza loj rerei.

## 11

### *Tio'p niguii ni rusule' xtidx Dios*

<sup>1</sup> Dxejcti baniidxni loä si'c te biquii nani rurejxh. Dxejc guyu' chu naj loä:

—Huisu te charejxhlu xquidoo Dios, näjza piändxan, balabza balti bejn rusuxhijb nenga. <sup>2</sup> Na'c gutiexhlu gabi lole' guidooga, sa'csi ni'c acua' rebenzijtne te tiubutio'p bäii chaläjsreni guedxdxan si'ctis ni rlajzreni. <sup>3</sup> Narä sudedä yälrnibee lo tio'p dade' ni guinii diidx xcuentä, luxh guideb najcwreni ladyas, susule'reni xtidxä lojreni te miñ tio'pgayuu gayojñ dxej.

<sup>4</sup> Guiro'preni najc si'c tio'p yag oliib, si'c tio'p gandilieer ni suga' nez lo Dios. <sup>5</sup> Palga yu' chu bejn rlajz gun latsiaj loj redade'ga, sirii bajl ro'reni te chec nani rdxe'ch lojreni. Luxh si'cpac riäjñ guet chutis ni rlajz gun latsiajreni. <sup>6</sup> Guiro'p redade'ga rajp yälrnibee te gusaureni xhaguibaa te na'c jiajb nisguij guideb neñ redxej nani cagusule'reni xtidx Dios, rajpzareni yälrnibee te guchaareni nis te gacni rejn, rajpzareni yälrnibee te jädgusacsí xhitis plaag lo guedxliuj, si'ctis huält ni rlajzreni. <sup>7</sup> Che luux gusule'reni xtidx Dios, dxejcti ni najc si'c te man nialajz sirii gabijñ te jädchagdijñni guiro'preni. Sujñni gaanreni, sugu'tniren. <sup>8</sup> Dxejcti jia'n guiro'p rebenğutga lad caii xten guejdx cadro bacuaareni Dad Jesucrist lo cruz. Guejdxroga rbälajzareni Sodoma näjza Egipto. <sup>9</sup> Choñ dxej garol guiraa rebejn ni siädä guedxbäz, ni siädä guedxro, ni najc garen-garen raz, ni rnii garen-garen xtidx guiraa rebejn guedxliuj, suhuii loj guiro'p rebenğutga, direni gusaan guiga'tzreni neñ baa. <sup>10</sup> Guiraa renani nabajñ lo guedxliujre sibalazduxhrene sa'csi gujtreni. Luxh sa'csi rbalajzduxhrene, suxhalzareni xhi xca' sa'reni; sa'csi guiro'p redade' ni basule' xtidx Dios baxhal trabajwduxh lojreni. <sup>11</sup> Che gudejd choñ dxej garolga, baspañsac Diosreni, dxejcti huitiesacreni. Guiraa reni bahuii lojreni, bidxebduxhrene. <sup>12</sup> Dxejcti biejn diajg guiro'preni xse' te ni canii dipduxh desde xhaguibaali, räjpni lojreni:

—Colchä'p jiaare.

Dxejcti huä'preni xhaguibaa lo te za, luxh guiraa renani rdxe'ch lojreni, bahuiireni huä'preni xhaguibaa. <sup>13</sup> Lagajc orga gujc te xuduxh, gurebän tej lo tzuu la' guejdxga, gujt gajdz miñ bejn lo xu ni gujc ro'c. Rebejn ni bia'n ro'c bidxebduxhrene, guslojreni calä'preni xpala'n Dios ni yu' xhaguibaa.

<sup>14</sup> Si'cti gulujx ni rojp casioon, luxh agojñ guidzujñ ni riojnga.

### *Ni rajc gajdz xangl Dios goñ trompe't*

<sup>15</sup> Che biñ ni rajc gajdz xangl Dios trompe't ni ca'ni, dxejc biejn xse' reni dipduxh canii xhaguibaa, cayäjpreni:

Xcälrnibee guedxliuj agudejd ladzñaa Dad Dios näjza Jesucrist;  
luxh laani sinibeeni par tejpas.

<sup>16</sup> Galbitajp rebenğool nani sobga' lo tron xtenrene cadro rnibee Dios, biabrlojreni nez loj Dios te calä'preni xpala'n Dios. <sup>17</sup> Räjpreni:

Xquixtioste Guejblu Dios, nani rajp yälrnibeduxh,  
nani najclu, nani gujclu, nani churu gac,  
sa'csi acua'lu xcälrnibeduxhlu te agusloj canibeelu.

<sup>18</sup> Bidxe'ch rebenğ guedxliuj lojlu,

luxh abidzujñ dxej guidxe'chlu lojreni,

gunlu yälğuxhtis rebenğut, te gudeedlu cossa'c loj rexpejñlu,

lo renani gunii xtidx Dios, lo renani huililajz xtiidxlu, lo renani rusuxhijbni nez lojlu;

rebenğproob sigajc rebenğro.

Abidzujñza dxej che cuäcajlu renani bejn daan guedxliujre,  
te nitlojreni par tejpas.

<sup>19</sup> Dxejc bixal xquidoo Dios ni yu' xhaguibaa, neñ guidooga bien te guijn cadro yu' guij cadro caj rediidx ni bia'n Dios loj rexpejñ Israel. Dxejcti lacti bidinya', lacti guiniiza reguziro, gujc te xu, dxejc biajb te guixobroduxh.

## 12

### *Te gunaa näj te ni najc si'c te gutiatzro*

<sup>1</sup> Dxejcti guyu' te senro xhaguibaa: te gunaa ni najcw si'c gubijdx, ni'ni sojb bäii, yejcti yu' te coron ni nac-chee tzubitio'p balxhaguibaa. <sup>2</sup> Gunaare nuxi'nni. Rbedxa'ni sa'csi agusloj cayu' yoob xque'ni te gaal xi'nni, cadejdni trabajwduxh. <sup>3</sup> Dxejcti bahuiä stee seen xhaguibaa: te manxniaa ni rujn lojni si'c loj te gutiatzro, manduxhni. Yu' gajdz bitiuvejcti, sojb tzuu xca'chni. Tejga yejcti yu' te coron, najcreni gajdz coron. <sup>4</sup> Dxejcti xhibaanni cagobxajxhni ni riojn la' rebalxhaguibaa, dxejcti bacuaanireni lo guedxliuj. Dxejcti biädsu manroga nez loj gunaaga ni ameer gaal xi'nni, te gauni xi'nni che gaalni. <sup>5</sup> Dxejcti gojl xi'n gunaaga, najcni te niguii, luxh te bar guuib nungäjl guinibenäjni lo guiraa reben guedxliuj. Guläsgajcreni bäzga te sanärenini xhaguibaa cadro rnibee Dios. <sup>6</sup> Dxejcti baxuñ gunaaga, siini nez loj reyubijdz cadro yu' te lajt ni basuchee Dios te cuääzni, te ro'c guyaannini te miñ tio'p gayuu gayojñ dxej.

<sup>7</sup> Dxejc guyu' guer xhaguibaa, xangl Dios nani laa Miguejl näj resa'ni bacuanäjreni gutiatzro. Gutiatzroga näjza rexanglñi gudilduxhni, <sup>8</sup> niluxh direni niujn gaan, luxh di niajcdiru nia'n manga näjza resa'ni xhaguibaa. <sup>9</sup> Dxejcti bacuaareni manroga näjza resa'ni lo guedxliujre. Laani najc ni gujc bäl galoroga, ni najc gueb Beñdxab, ni laaza Satanás, ni rusguee guideb guedxliujre.

<sup>10</sup> Dxejcti biejn diagä xse' te ni canii dipduxh xhaguibaali, räjpni:

—Abidzujñ yälruslaa lo dojl, näj yälmilagwr, näj yälrnibero xten Dios, näjza yälrnibee xten Jesucrist, sa'csi agulääreni bejn nani entis rbe'c xquej rexpejn Dios loj Dios dxej-yääl.

<sup>11</sup> Laareni gujc bejnreni gaan loj beñdxabre, xcuent xtiejn ni najc Xiil xten Dios, näjza sa'csi huililazsa'creni xtidx Dios, dizareni nidxejb mase niejtzareni. <sup>12</sup> Ni'cni, guiraa la'tu ni yu' xhaguibaa näjza gueb xhaguibaa, colquibalazduxh. Niluxh riaduxhnu renani rbäjz lo guedxliujre, näjza lo nisdoo, sa'csi abiäjt beñdxab lo guedxliuj, luxh cadxechduxhni sa'csi anajnni guxii dxej räjpni.

<sup>13</sup> Che gucbee gutiatzroga abacuaarenini lo guedxliuj, birinajlñi gunaa nani guyu' xi'ngaanni te gusacsínini. <sup>14</sup> Dxejc badeed Dios lo gunaaga tio'p xhiga xten bisiro, te gac gutajtni nez lo reyubijdz cadro nac-chee cadro cuääzni. Choñ ijz garol guyu'ni ro'c, nacuatzlojni lo bälga. <sup>15</sup> Dxejcti ro' gutiatzrore birii nis si'c te gueuu te nuslo'ni gunaaga. <sup>16</sup> Dxejc gucnäj guedxliuj gunaaga, baxhal guedxliuj ro'ni, gu'ni gueuu ni birii ro' gutiatzroga. <sup>17</sup> Dxejc bidxechduxh gutiatzroga loj gunaaga, ni'c sääni te gucuanäjni sgaii rexi'n gunaaga, renani cagusoob diidx ni gunibee Dios, renani rililajzza xtidx Jesucrist.

## 13

### *Tio'p manduxh*

<sup>1</sup> Narä gusuä lo yujxh ni tre' ro' nisdoo, dxejc bahuiä carii te manro lo nisdoo. Sojb tzuu xca'chni. Dxejc lo tejga xca'chni yu' te coron. Yu' gajdz bitiuvejcti cadro caj diidx ni rniyaj Dios. <sup>2</sup> Manduxhre najc si'c te beedz, ni'ni najc si'c ni' te os, luxh ro'ni najc si'c ro' te bedzro. Gutiatzroga badeed xcälmilaagwrni lojni, näjza tron cadro rbejni, näjza xcälrnibeduxhni. <sup>3</sup> Dxejcti bahuiä te yejcti najc ascanu yu' chu batiuugni con madxed, ameer guetni, luxh biajc cadro guruj yejcti. Ni'cni rdxeloduxh guiralii rebejn guedxliuj, sanajlreni manduxhga. <sup>4</sup> Bazuxhijbreni gojnreni gutiatzroga sa'csi badeedni xcälrnibeeni lo manduxhga, dxejctiru bazuxhijbreni gojnzareni manroga, räjpreni:

—¿Chu stee najc si'c manrore, ä? ¿Chu laa ni gac guichagdijlñi, gucuanäjnini?

<sup>5</sup> Yu' chu badeedza lo manroga diidx dxejcti gusloj caniini guiraloj didx-guyalajz, diidx ni rniyaj Dios. Yu'za chu badeed ga'pni yälrnibee tiubitio'p bäii, gunni si'ctis ni rlanjni. <sup>6</sup> Baxhalni ro'ni, guniyaduxhni Dios, guniyajni laj Dios, näjza xquidoo Dios,

nalajznu renani yu' xhaguibaa. <sup>7</sup> Dxejcti yu' chu basaan bacuanäj manroga rexpejn Dios. Bejn manroga gaan rexpejn Dios, dxejcti gunibee manroga guiraa reguedxbäz, näj guiraa rebejn ni rnii garen-garen xtiidxreni, näjza guiraa reguedxroduxh. <sup>8</sup> Dxejcti guiraa reben guedxliuj sazuxhijbreni, sagajreni manroga, guiraa rebejn nani di lajreni nicaj lo libr xten yäl nabajn xten Xiil nani gujt xcuentreni, sa'csi galooli guirixtiej guedxliuj cuaj lo guijtzre laj guiraa ni gac xpejn Dios.

<sup>9</sup> Palga yu' chu rlajz cuadiajgni, sugucuadiagsa'cni. <sup>10</sup> Palga yu' chu nungäj jläuu nen latzguiib, siäupacni. Chutis ni ju't te bejn con te madxed, con madxeda guetni. Ni'cni renani anumbee Dios, riäj gunreni huant, chanuutis chalilazsa'creni xtidx Dios.

<sup>11</sup> Dxejcti bahuiä loj stee manro, cariini nen yuj. Sojb tio'p xca'chni si'c xca'ch te xiil, rniini si'c rnii te gutiatz. <sup>12</sup> Luxh rnibeezani si'cni rnibee manroga lagajc nez loj manroga, rujnzani rusuxhijb reben guedxliuj loj manrogalooga ni gurujc yejcn, luxh biaj yejcn. <sup>13</sup> Manroga ni birii nen yuj rujnzani remilagwrro, rujnni rtejb bal-guiboo xhaguibaali, rtejbni lo guedxliuj nez loj rebejn. <sup>14</sup> Rusgueeni rebejn nani nabajn lo guedxliuj xcuent remilagwrro nani rujnni nez loj manrogalooga. Guinibeeni gun reben guedxliuj te banäjb si'c najc manroga nani batiuug madxed yejcn, luxh biajza yejcn. <sup>15</sup> Dxejcti man ni rojpga baspajn banäjbga te guinii banäjbga, dxejcti gunibeeni guet guiraa rebejn nani di guzuxhijb lojni te ganrenini. <sup>16</sup> Gunibeezani chu bejn te seen lo cuajni o naani ladbee, guiraa rebejn ni xhet rajpdi, guiraa rebejn ni rajp, guiraa reni najc mos, guiraa reni najc lam, guiraa reni najc benro, guiraa reni najcza benbäz. <sup>17</sup> Gunibeezani digacdi sii, digacdiza guto' bejn palga xhet seendi caj naani o lo cuajni. Seenga najc laj manga o numbr xten laj manga. <sup>18</sup> Dee rquiin yäl najn. Renani rajp yäl najn sugulabreni xseen manga, numbrga najc si'c xnumbr bejn; numbr xten manga najc xho'p gayuu gayonbixho'p.

## 14

### *Dij ni rol te gayuu tiubitajp mil*

<sup>1</sup> Che bahuiä stee, bahuiä suga' Xiil xten Dios yejc dajn ni laa Siön. Suganäjni te gayuu tiubitajp mil bejn nani caj lo cuajreni laj Xiil näj laj Xtadni. <sup>2</sup> Biejn diagä rubej xhaguibaali, rubeduxh, riejnni si'c rubej xhidajl gueuro, näj te guziro; riejnzani si'cni riejn che cayol xhidajl bejn ni rol arp. <sup>3</sup> Cayolreni te dicoob nez loj tron cadro rbej nani rnibee, näjza nez loj guidap reni najc si'c man ni nabajnpac, näjza nez loj rebengool. Rutliidi gujc bisieeddi dijga, xtebtis tegayuu tiubitajp mil bejn nani gulaa lo reben guedxliuj. <sup>4</sup> Reniguiire najc renani gajd xhin con gunaa; nicla tejreni di niesnäj te gunaa, najcreni ben dxan. Laareni rinajlreni Xiil xten Dios cadrotis sääni. Redee gulaa lo reben guedxliuj si'c te gojn lo Dios näjza lo Xiil xten Dios. Gojnre najc si'c gonganid ni rudeed bejn xten te cose'ch. <sup>5</sup> Nicla tej didx-xhii di guirii ro'reni, sa'csi xhetliidi xtojreni, nayareni suga'reni nez loj tron cadro rnibee Dios.

### *Rediidx nani bazule' jion rexangl Dios*

<sup>6</sup> Dxejcti bahuiä loj stee xangl Dios, rutajtni nez galäii xhaguibaa, siädnäni diidx ni najc par tejpas xten Dios te gusule'nini loj reben guedxliuj, guiraa lo reguedxro, guiraa lo reguedxbäz, loj reben ni najc garen-garen raz, nani rnii garen-garen xtiidreni. <sup>7</sup> Dipduxh guniini, räjpni:

—Colguidxejb Dios, colguiliä'p xpala'n Dios sa'csi abidzujn or gunni yäl guxhtis guiraa rebejn. Colguzuxhijb loj nani benchee xhaguibaa, näjza guedxliuj, näjza nisdoo, näjza cadro rliejn nis.

<sup>8</sup> Dxejcti siädnajl stee angl nani canii:



—Abiajb, abiajb guejdxroga nani laa Babilonia, sa'csi baquiilni guzojz guiraa reguejdx xten guedxliuj xcuent xcäl-latsiajni, xcuent dojl ni bejnri guideb lagaa; najcni si'c reni rä' nejp.

<sup>9</sup> Dxejc biädnajl ni riojn xangl Dios, dipduxh guniini, Räjpni:

—Palga yu' chu bejn guzuxhijb loj manroga o loj banäjb ni najc si'c manroga, o xcäjbni xca'ni xseen manro lo cuajni o lo naani, <sup>10</sup> sidxechduxh Dios lojni, di xcäl\_guxhtisduxh Dios tedcaj lojni. Sidejdpacni trabajwduxh neñ balro näjza azufr nez loj rexangl Dios näjza nez loj Xiil xten Dios. <sup>11</sup> Luxh gujxh xten reni cayejc sä'p nez lojreni guixe-guixee par tejpas. Digacdi gusilajzreni dxej-yääl, renani guzuxhijb, reni gojn manroga näjza reni gojn banäjb ni najc si'c manroga, chutisza ni rca' seen xten lajni. <sup>12</sup> Ni'cni renani huililajz xtidx Dios, reni rusoobza xtidx Dios, ni rinuutis lo xnezyuj Jesucrist, nanab di guidxajgreni.

<sup>13</sup> Biejn diagä xse' te ni caniini loä xhaguibaali:

—Scree bacuaa: “Chicbaa rebejn ni guet najli nani rililajz xtidx Jesucrist.” “Guliini”, naj Sprit Dxaan xten Dios: “Te gusilajzreni, na'cru gunreni dzuun, sa'csi anancheenu xhi dzuun bejnreni.”

### *Yäl\_nasa'c ni rudeed guedxliujre*

<sup>14</sup> Dxejcti bahuiä tre' te bänol, loj bänolga sobga' te ni najc si'c Xi'n Dios ni gujc Niguii. Yu' te coron ganaxduj oor yejcn, dxejcti naani ca'ni te guiboz ni caduxh ro'ni. <sup>15</sup> Dxejcti birii te xangl Dios loj xquidoo Dios, dipduxh caniini loj ni sobga' loj bäjga, räjpni:

—Basäl xquibozlu, batiuug, te batie' yäl\_nasa'c, sa'csi agojl or guire' yäl\_nasa'c, guideb guedxliuj aguyajlni.

<sup>16</sup> Dxejcti nani sobga' lo bäjga basniibni xquibozni, batiuugni yäl\_nasa'c ni caj lo guedxliujre.

<sup>17</sup> Dxejcti stee xangl Dios birii neñ guidoo ni yu' xhaguibaa, ca'zani te guiboz ni caduxh ro'ni. <sup>18</sup> Dxejcti birii stee xangl Dios nez loj piändxaan xten Dios. Laani rajpni yälrnibee lo balro. Dipduxh guniini, räjpni loj ni ca' guiboz ni caduxh ro'ni, räjpni:

—Basäl xquibozlu nez ni' reyaguub, batiuug guiraa reresim uub ni yu' lo guedxliujre, sa'csi aguyajlreni.

<sup>19</sup> Dxejc batiuug anglga guiraa reresim uub ni yu' lo guedxliujre nalajznu rebeñgujdx, basäl\_nireni neñ tanc cadro guläjreni yejcn sa'csi rdxechduxh Dios lojreni. <sup>20</sup> Dxejcti baläjreni yejc reuub nez orii te guejdx. Biriiduxh rejn yejcreni, gutiäs rejnga, bidzujn rejnga ro'li recabaii, gujcn si'c che riu' nisro gueuu, biäjtni si'cti choñ gayuu mil metr guideb gabi cadro baläjreni yejc reuub.

## 15

### *Guigajdz xangl Dios näj lult xcäl\_guxhtis Dios*

<sup>1</sup> Dxejcti bahuiä stee senro xhaguibaa, nani bascheloduxh narä. Bahuiä loj gajdz xangl Dios, tejegareni ca' te plaag ni gusacsí rebeñ guedxliuj. Redetis najc lult, sa'csi che ted redee ati agulujx yälrdxe'ch xten Dios.

<sup>2</sup> Dxejcti bahuiä loj tej ni najc si'c te nisdoo ni najc si'c biidr nu'chni bajl. Dxejcti galäii nisdoooga suga' renani bejn gaan loj manroga näjza lo banäjb ni najc si'c manroga, ni bejnza gaan di nica'reni seen xten lajni. Ca'reni arp xten Dios. <sup>3</sup> Cayolreni dij xten toMoisés ni gujc xpejn Dios, cayolzaren, dij xten Xiil xten Dios. Scree najc dijga:

Sacduxh, ruscheloy guiraa redzuun ni rujn Guejblu, Dad Dios, ni rajp guiraa yälrnibee. Rujn Guejblu ganax dzunsa'c, rnii Guejblu ganax didxlii.

Guejblu rnibee loj guiralii reguejdx ni yu' lo guedxliuj.

<sup>4</sup> Bahuii, Dad, ¿chu laa ni di guidxejb Guejblu ni di guiliä'p xpala'n Guejblu?

Sa'csi Guejbtislu najc dxan, ni'cni guiraa reguejdx ni yu' guedxliuj siädzuxhijbreni,

siädgajñreni Guejblu,  
sa'csi abaluiloj guiraa rextzunsacpac Guejblu.

<sup>5</sup> Dxejcti bahuiä xhaguibaa, bixal ro' yu' ni najc dxanro neñ guidoo, cadre yuchee guij cadre caj xleii toMoisés. <sup>6</sup> Ro' yudxanroga birii gajdz xangl Dios ni ca' plaag te gusacsíreni rebeñ guedxliuj. Najcwreni te ladlin ni najc nolbäj, ni rdimbichaduxh. Dejd si'c te cinturon lastooreni ni najc ganaxduj oor. <sup>7</sup> Dxejcti yu' tajp reni najc si'c man nabajn ni yu' nez loj Dios xhaguibaa. Tej reni badeed loj tejga reanglga te co'p ni najc ganaxduj oor. Guidxa tejga rexhijgga xcälguxhtisro Dios nani nabajn par tejpas. <sup>8</sup> Gudxaj guidoo ni najc yudxanroruga gujxh ni siääd xcuent xcälmilaagwr, xcälrdimbichaduxh xten Dios. Rut gujcdi biu' neñ yudxanroruga che gulujxli guiraa replaag ni ca' guigajdz reanglga.

## 16

### *Rexhijg ni guidxa xcälguxhtis Dios*

<sup>1</sup> Dxejcti biejn diagä xse' te ni canii dipduxh xquidoolini, caniini loj guigajdz rexangl Dios, räjpni:

—Colchäj, colchasloj guigajdz rexhijgga lo guedxliuj, colca' rexhijg ni guidxa xcälguxhtis Dios.

<sup>2</sup> Anglgaloo ni huij, baslojni ni yu' neñ xhijg ni ca'ni lo guedxliuj. Dxejc loj guiraa rebeñ nani caj xseen manduxh, reni rusuxhijb, rajñreni banäjb ni najc si'c manroga, birii tiejxhni te guedxyanduxh ni najc si'c cancer.

<sup>3</sup> Dxejc ni rojp anglga baslojni ni yu' neñ xhijg ni ca'ni loj nisdoo, te bejnni gubixhloj nisdooa gujcní si'c rejn xten te beñgut. Dxejcti gujt guiralii reman ni yu' lo nisdoo.

<sup>4</sup> Ni riojn anglga baslojni ni yu' neñ xhijg ni ca'ni loj regueuu näjza cadre rliejn nis. Gubixhlojreni gujcreni rejn. <sup>5</sup> Dxejcti biejn diagä gunii angl ni rajp yälñibee lo nis räjpni:

—Huenduxh najc Guejblu Dad ni najc naj sigajc gujc Guejblu galoo, dxanduxh najc Guejblu sa'csi cayujñ Guejblu yälguxhtis redzunguijdx. <sup>6</sup> Sa'csi laareni baxhe'reni rejn, bagu'treni rexpejnlu näjza renani gunii xtiidxlu, luxh naj badeed Guejblu rejn cayä'reni. Si'cpac nungäjlgacreni.

<sup>7</sup> Dxejcti biejn diagä canii steeni lagajc lo piändxan, räjpni:

—Guliipacni Dad Dios ni rajp guiralii yälñibee, xcälguxhtis Guejblu najc laaca, si'c riäjlgacni.

<sup>8</sup> Dxejcti ni rdajp anglga cua' xhijg ni ca'ni, baslojni ni yu' neñ xhijgga lo gubijdx, te badeedni lo gubijdx yälñibee guze'cnäjni rebeñ guiboo. <sup>9</sup> Guiraliireni gusloj cayejcreni, lacti nanladuxh, dxejc gusloj caniyajreni Dios ni rajp yälñibee loj recosga. Niluxh direni nusiechlajzreni, niclaza niliä'preni xpala'n Dios.

<sup>10</sup> Dxejcti ni rajc rgaii anglga cua' xhijg ni ca'ni baslojni ni yu' neñ xhijgga lo tron cadre rnibee manroduxh. Bicäjy guideb cadre rnibee manduxhga, luxh rebeñ rauya'tisreni lujdxreni sa'csi cayajcreni yälñayanduxh. <sup>11</sup> Guniyajreni Guejb Dios ni yu' xhaguibaa sa'csi rajcreni yälñayanduxh, xcuentza rexquedxnayanreni. Luxh direni nusiechlajzreni xcuent xtojñreni.

<sup>12</sup> Dxejcti ni rajc xho'p anglga cua'ni xhijgni, baslojni ni yu' neñ xhijgga loj gueuro ni laa Eufrates. Gueuga gubidzlii nisni te guc-chee te nezyuj xten rereii ni jiääd nez cadre rliejn gubijdx.

<sup>13</sup> Bahuiäza birii ro' gutiatzro, näjza ro' manro, näjza ro' ni najc profe't ni rusguee, birii choñ spritguijdx ni najc si'c bedz, <sup>14</sup> sa'csi najcreni resprit xten beñdxab, rujnreni milagwr, senro. Rijreni loj guiraa rereii loj guedxliuj te gutie'reni guiraa beñ loj guedxliuj te gac guerroduxh, te gucuanäjreni Gueb Dios ni rajp guiralii yälñibee che guidzujñni lo guedxliuj. <sup>15</sup> “Narä siädxhiga'tzä si'c riääd te gubaan. Chicbaaza renani cabäjz, cagutie'chreni bacal lojni che guibi'ä si'c rujn nani najcw guiraa xhajbni, te na'c

guiga'ni xhabäälni, jianxtujyni che guibi'ä.” <sup>16</sup> Dxejc gutie'reni guiraa rebejnre te lajt ni laa lo didx hebre “Armagedón”.

<sup>17</sup> Dxejcti ni najc rgajdz anglga cua'ni xhijgni baslojni ni yu' neñ xhijgni loj bej. Dxejcti biejn xse' te ni gunii dipduxh xquidooli Dios xhaguibaali cadre yu' tron cadre rnibee Dios, räjpni:

—Agujcni, agulujxhni.

<sup>18</sup> Dxejc guyuduxh yälrdinya' näj guziro. Gujca te xuroduxh lo guedxliuj, te xu sa' ni gajdpac gac. <sup>19</sup> Che gujc xuroga, biräjs guedxroduxhga, gujcn chon la', dxejcti gurebä'n guiraa reguejdx guideb guedxliujre. Dxejc banaj lajz Dios guedxro ni laa Babilonia, bialoj bejn Dios yälguxhtis guedxga. <sup>20</sup> Li gubicaj, gunitloj reyuj ni tre' lo nisdoo, gunitlojza redajn. <sup>21</sup> Xhaguibaali biajb te guixhobro yejc rebejn; tejga guixhobga na' si'cti tiuu kil. Guniyaj rebejn Dios xcuent guixhobroga, sa'csi cuentroduxh gujcn.

## 17

### *Gun Dios yälguxhtis te gunadxab*

<sup>1</sup> Lo regajdz anglga ni ca' gajdz xhijg birii tej ni gunii loä, najni:

—Gudaa ree te guluiä lojlu retrabajwduxh ni ted gunadxabre ni sobga' cadre yu sijn nis. <sup>2</sup> Guiraa rereii lo guedxliujre bennäjreni gunaaga dojl, sigajca guiraa reben guedxliuj bennäjreni gunaaga dojl. Gusosnäjreni gunaaga bejnreni si'ctis ni rlajzreni.

<sup>3</sup> Dxejcti huinäni narä si'c lo te bacal nez lo reyubijdz. Bahuiä loj te gunaa, bijbni dejtz te manro ni najc xniaa, luxh guidebni caj diidx ni rniyaj Dios. Gajdz najc bitiuycjni, sojbza tzuu xca'chni. <sup>4</sup> Gunaaga najcw te lad moraad con xniaa, sucheduxh gunaaga oor, näj reguisa'c, näj perl ni sa'cduxh. Ca'ni te copro ni najc ganaxduj oor ni guidxa ganax recosguijdx, recosdxab ni bennäjni reben guedxliuj. <sup>5</sup> Caj te diidx lo cuajni, luxh rut racbeedi xhi sälojni. Scree rnii diidxga: “Babilonro, xnan regunadxab, xnan recosdxab ni rajc lo guedxliuj.” <sup>6</sup> Bahuiä agusojz gunadxabga. Agusosnäjni xtiejn rexpejn Dios nani bagu'tni, näj xtiejn renani basule' xtidx Jesucrist ni bagu'tzani. Che bahuiä lojni, bidxeloduxhä. <sup>7</sup> Dxejcti gunii anglga loä, najni:

—¿Xhicuent rdxelojlu, ä? Narä siniä xhi säloj gunadxabga, näjza manroga ni sojb gajdz bitiuycjni näj tzuu xca'chni. <sup>8</sup> Manroga ni bahuiilu gubajni galoo, niluxh agunitlojni naj, luxh agojl guiriini gabijl, dxejcti sinitlojni stee, sejtne par tejpas. Rebejn ni nabajn lo guedxliuj nani di lajreni nicaj lo guijt xten yäl nabajn xten Dios, guijt ni guc-chee che birixtiejli guedxliuj, rebejnga sidxeloduxhrene che fireni loj manroga nani gubajn galoo, ni gunitloj, niluxh naj agubansacni.

<sup>9</sup> Ree nanab ga'pni yäl najn. Gajdz rebitiuycjni säloj gajdz dajn cadre sobga' gunaaga, <sup>10</sup> sälojzareni gajdz reii. Agujc gaii reiiga ni cayajb. Tej rereiiga canibee naj. Stee reiiga churu jiääd. Luxh che jiääd lult reiiga, guxii dxej guinibeeni. <sup>11</sup> Manro ni gubajn galoo, ni agunitloj naj, ni'c rac xhujn reii, najczani tej loj guigajdz rereii, luxh sinitlojni, sejtne par tejpas.

<sup>12</sup> Guidzuo rexca'chni ni bahuiilu säloj tzuu reii. Gajdreni guisloj guinibee naj. Laareni näjza manroga xca'reni yäl rnibee teb or, nalajznu guxii dxej. <sup>13</sup> Tejtis xhigab gun rereiiga, gudeedreni xcäl nadipreni, xcäl rnibeereni lo manroga. <sup>14</sup> Laa redee ni sucuanäj Xiil xten Dios. Dxejcti sujn Xiilga gaan lojreni sa'csi laani najcni Dad ni rnibee loj guiraa redad, najcni Reii ni rnibee lo guiraa rereii. Luxh renani siäd najlni najc reni agurejdxni, reni aguleni, sisiudzu'tznäjrenini.

<sup>15</sup> Dxejcti najza anglga loä:

—Reni ni bahuiilu cadre sobga' gunadxabga säloj guiraa guejdx, guiraa ben guedxliuj, guiraa bejn ni rnii garen-garenca xtiidxreni, ni siääd garen-garen reguejdx.

<sup>16</sup> Guitzuo reca'chga näjza manroga ni bahuiilu, sidxe'chreni loj gunadxabga, suro'nreni

gunadxabga, susa'nreni gunadxabga xhabäälni, saiwreni bältiejxhni, suze'creni gunadxabga lo guiboo. <sup>17</sup> Sa'csi abasniib Diosreni te gunreni tejsi xhigab, te gudeedreni xcälrnibeereni lo manroga che guidzujñli dxej ni chale' guira'ti ni gunii Dios gac. <sup>18</sup> Gunadxabga ni bahuiilu säloj guedxro ni rnibee loj guiraa rereii loj guedxliuj.

## 18

### *Xho jiajb guedx Babilonia*

<sup>1</sup> Dxejcti bahuiä loj stee xangl Dios ni siädyäjt xhaguibaa. Siädnäni yälrnibeduxh, xcälrdimbicha'ni bazanij loj guedxliujre. <sup>2</sup> Dxejcti dipduxh gunii anglga, guredxa'ni:

—Abiajb, abiajb guedx Babilonia, agubixhlojni, naj najcni guejdx cadre rbäz rebenḁxab, ro'c rcanzaj guiralii cuaa spritdxab, najczani xpitiääz guiraa reman xhaguibaa ni najc mandxab, mandxuudx. <sup>3</sup> Sa'csi guiraa rebenḁ guedxliuj agusozreni xcuent dojl ni bennäjreni gunadxabga, guiraa rereii loj guedxliuj bejn dojl guläsnäjreni gunadxabga, luxh guiraa rebenḁ guedxliuj ni ruto' abejnreni ganduxh, agujcreni ri'cw xcuent recosdxab ni rujn gunabdxabga.

<sup>4</sup> Dxejcti biejn diagä xse' stee nani canii xhaguibaa:

—Colguirii guejdxga rexpenä, te di näj la'tu gunnäjtu gunadxabga dojl, te di tedtu trabawduxh lo replaag xtenni. <sup>5</sup> Sa'csi yuduxh rextojñni, abidzujñreni xhaguibaali, luxh abanajza lajz Dios rextojñni. <sup>6</sup> Colgudeed loj gunaaga sigajc ni badeedni lojreni. Colquijx loj gunaaga tio'pli huält lo ni bejn ni laani. Neñ co'p cadre badeedni gu' bejn (te trabajw ni badeedni bejn), lagajc nenga colyejn te ni najc tio'p huält maazru fuert yä gunadxabga, nalajznu tedni trabajw tio'p huält. <sup>7</sup> Lacti gulä'p gunaaga xpala'nni, gubajñni si'ctis ni rlajzni lo guedxliuj. Naj colguteed gunaaga trabajw, si'cti mediid ni gulä'pni xpala'nni; si'cti mediidza ni bibalaznäjni mood ni gubajñni, sigajcza gac-huin lastooni sa'csi bejn ni xhigab neñ lastooni: “Narä sobga'ä ree si'c te rein, te beñroduxh, dina gacä biuud, niclaza gac-huin lazä.” <sup>8</sup> Ni'cni tejsi dxej siajb yejcnii guiraa replaag xten Dios: yälgujt, yälhuin lajz, näj yälriaan, luxh seiczani lo balguiboo, sa'csi rnibeduxh Dad Dios ni gunxcälguixhtisni.

<sup>9</sup> Guiraa rereii lo guedxliujre ni bennäj gunaadxabga cosguijdx, reni cuansanäjnini, sonduxhreni, siaduxhreni che fiireni gujxh ni carii cadre cayejcnii. <sup>10</sup> Zijtru sisiujreni sa'csi rdxejbreni replaag xten gunadxabga, dxejc siniizarenii:

—Aii, aii, riaduxhnu guedxrore, Babilonia, guedxdipduxh gujclu, luxh chela gucbeenu, ala bidzujñ yälguixhtis yejclu.

<sup>11</sup> Rebejn ni ruto' loj guedxliuj sonduxhreni, siareni guejdxga sa'csi rutru rsiidi xhixtenreni ni ruto'reni. <sup>12</sup> Laareni ruto'reni oor, pla't, guiraloj reguisa'c, perl, ladliñ, ladmuraad, ladseed, näjza guiraloj baräjd yagdo, näj guiraloj cos saru, ni nacchee läi elefant, näj cos saru ni nacchee bronz, näj guiib, näj márm, <sup>13</sup> näjza caneel, guiraloj laj comiid, näjza yalnejh, näj perfum, näjza yaal, näjza bin, näjza se't oliib, näjza arinsa'c, näjza triuu, näjza gon, näjza rexiil, näjza cabaii, näjza gare't, näjza bejn ni ruto'reni tiejxhreni, xaimreni. Guiraa reni'c ruto'reni. <sup>14</sup> Dxejc guniiza xse' ni canii xhaguibaali, najni:

—Ninexhsa'c ni rlazduxhlu, agunitloj. Guiraa recossa'c, recossaruduxh agubicajreni lojtu, luxh di gacdiru guidxäl bejn reni'c.

<sup>15</sup> Reni ruto' guiraloj recosga, nani gujcreni ri'cw xcuent guedxroga, zijtru sisiujreni sa'csi rdxejbreni trabajw ni cadeed guejdxga, sonduxhreni, sac-huinduxh lajzreni, <sup>16</sup> säjbreni:

—Aii, aii, riaduxhnu guedxrore, nani gojtni ladsacduxh, guiraa ladliñ, ladmuraad, ladxniaa, gusucheeni con oor, con guisa'c, con perl, <sup>17</sup> tera'tbäztis baralii recosro ni najc xhixtenni, guxhijñreni.

Guiraa recapitán xte barcw, nájza guiraa remarineer, nájza rebejn ni rij biaj lo rebarcw nájza guiraa reni rujn dzuun lo nisdoo, gusujreni zijt, <sup>18</sup> nájza laareni cahuiireni cayäjs gujxh guejdxga, cabedxa'reni, caniireni:

—¿Xhi stee guejdx najc si'c najc guedxrore, ä?

<sup>19</sup> Bachajreni yuyol yejcreni sa'csi rac-huin lajzreni, binduxhreni, guredxa'reni:

—¡Aii! ¡Aii! Riaduxhnu guedxro sa'csi xcuenttis guedxduxhre gujc ri'cwduxh guiraa rebejn ni rajp barcw ni rujn dzuun loj nisdoo. Luxh naj tera'tbäzsi aguxhijn guedxrore.

<sup>20</sup> Guniiza xse' ni yu' xhaguibaa, najni:

—La'tu ni yu' xhaguibaa, la'tu rexpejn Dios, reapost xtenni, rebejn ni gunii xtidx Dios galoo, colbalasduxh sa'csi abiajb guedxrore, abejn Dios yälguxhtis xcuent ni bejnni lojtu.

<sup>21</sup> Dxejcti te xangl Dios ni rajp yälrnibee, guläs te guiro ni najc si'c te guij ni ro't dojb, bacuaanini loj nisdoo, dxejc najni:

—Screeza gac guedxro ni laa Babilonia siajbni lo trabajwduxh, sinitlojni par tejpas, dirutu fii lojni. <sup>22</sup> Diru guibi' jiejn cayel nez xladcailu reharp, reflaut, retrompe't; diru guibi' chu tej ni gun xhitis dzuun; diruza guibi' chubej molin ni cayo't. <sup>23</sup> Diru guibi' jien xcälrdimbicha' te bajl ni cagusanij; diruza guibi' jiejn xse' bi'n náj dxa'p loj te sa' sa'csi rexpejnlu ni ruto' gujcreni beñroduxh lo guedxliuj sa'csi basguezalu reben guedxliuj xcuent rextzundxablu.

<sup>24</sup> Nen guejdxga bidxäjza xtiejn renani gunii xtidx Dios, nájza xtiejn rexpejn Dios, nájza xtiejn guiraa reben guedxliuj ni bagu'treni.

## 19

<sup>1</sup> Che gulujx recosre, biejn diagä lascanu xse' xhidaltro bejn ni canii xhaguibaa, cayäjpreni:

¡Colguiliä'p xpala'n Dios!

Xtentis Dios, xtenni najc yälruslaa lo dojl,

náj yälrdimbicha', náj yälmilagwr.

<sup>2</sup> Sa'csi xcälguxhtisni najc ganax laaca,

huentis najcni, sa'csi abejnni yälguxhtis gunadxabga nani caguxhin reben guedxliuj xcuent xcäl'nadxabni.

Abejn Dios yälguxhtisni,

agudijxhni xcuent xtiejn rexpejn Dios ni baxhe' gunadxabga, che bagu'tnireni.

<sup>3</sup> Guibi' guniizareni:

—¡Colguiliä'p xpala'n Dios! Gujxh xten gunadxabga sanuutis cayä'p par tejpas.

<sup>4</sup> Guiraa regalbitajp reben gool nájza guidap remanbajnga bazuxhijbreni, biabrojreni gojnreni Dios ni rbej lo tron cadre rnibeeni, caniireni:

—Sugacni si'c. ¡Colguiliä'p Xpala'n Dios!

<sup>5</sup> Dxejcti nez lo tron cadre rnibee Dios biejn xse' tej ni canii:

Colgudeed xquixtios lo Dios,

guira'tu ni rujn xtzuun Dios,

guira'tu ni rajntu Dios, rebenro sigajc reben nadolajz.

### *Sa' xten Xiil xten Dios*

<sup>6</sup> Dxejcti biejn diagä ascanu xse' xhidalduxh bejn, riejnni si'c che cayäjt nisro xhidajl gueu, nájza si'c che caguidxaduxh guzii, caniireni:

¡Colguiliä'p xpala'n Dios!

Sa'csi Gueb Dios, Dad xtennu ni rajp guiralii yälrnibee, ani acanibee.

<sup>7</sup> Guibalajznu, guibalazduxhnu, guiliä'pnu xpala'nni sa'csi abidzujn dxej guchnaa Xiil xten Dios, aguzucheeza dxa'p.

<sup>8</sup> Abadeedreni ladlin ni najc nuiduxh gacwni.

Ladnolni, luxh rdimbicha'ni sa'csi nayadujni.



Ladnayare säloj redzunsac ni bejn rexpejn Dios.

<sup>9</sup> Najza anglga loä:

—Bacuaa diidre: “Chicbaa renani bidon jiaad lo xsa' Xiil xten Dios.”

Guniizani loä, najni:

—Rediidre najc didx-guliipac xten Dios.

<sup>10</sup> Dxejcti bazuxhibä lojni te ganäni, dxejc laani najni loä:

—Na'c gunlu si'c, sa'csi narä nacä sigajc najclu, nacä te ni rujn xtzuum Dios, näjza bejtzu ni rusule' xtidx Jesucrist. Bazuxhib lo Diostis sa'csi Dios rudeed gusule' bejn xcuent Jesucrist, gusule'zareni xtidx Dios.

### *Nani bijb te cabainol*

<sup>11</sup> Dxejcti bahuiä bixal xhaguibaa, biricaj te cabainol. Luxh laj nani rbijbni säloj casobsa'cpacni diidx, rniizani ganax didxgului. Entis laaca rujnni yälguxhtis, entis laaca rucuaani che rujnni guer. <sup>12</sup> Rebalojni rbebajl, yejcti yu' xhidalduxh coron, luxh caj te laj lojni nani rutliidi rachee, luxh laatisni racbeeni xhi sälojni. <sup>13</sup> Najcwni te lajd ni nadiini rejn; lajni najcza Xtidx Dios. <sup>14</sup> Guiraa resoldaad guibaa xten Dios siädnajni najcwreni ladnol, ladnaya, bijbzareni cabainol. <sup>15</sup> Ro'ni carii te spaad ni caduxh guiro'p laad ro'ni te ni'c tilnäjni guiralii reguejdx lo guedxliuj, te guinibeeni guiraa reben guedxliuj ca'ni si'c te barguib. Sujnzani yälguxhtis lo reni rdxechlajz lo Dios, si'c ruläjreni yec uub che rbääreni bin, si'c sujnza Dios ni rajp guiralii yälrnibee. <sup>16</sup> Lo xhajbni näjza cuä' cujdni caj lajni: “Reii xten rerei, Dad xten redad.”

<sup>17</sup> Bahuiä loj te angl suga'ni galäi gubijdx, cabedxa'ni caniini loj guiraa reman ni rutajt xhaguibaa, räjpni:

—Coltaa, colguire' ree, te gautu xcheroduxh xten Dios; <sup>18</sup> te gautu xpääl rerei, näjza xpääl recapitan, näjza xpääl rebenro, näjza xpääl recabaii, näjza xpääl renani rbijb recabaii, näjza xpääl guiraasi bejn, bejn ni rdo' si'c rdo' guidxaa sigajc rebejn ni di gun xtzuum bejn, rebenbäz sigajc rebenro.

<sup>19</sup> Dxejcti bahuiä loj manro näjza loj rerei guedxliuj, abire'reni te gucuanäjreni nani rbijb cabainol näjza guiraa resoldaad xtenni. <sup>20</sup> Biga' manroga näjza profetxhii ni bejn senro nez loj manroga te basgueeni guiraa renani cua' seen xten manroga, näjza renani bazuxhib lo banäjb xten manroga. Guiro'p redee bacuaareni guideb nabajreni nen te bal guiboduxh ni recnäj sufr. <sup>21</sup> Dxejc guiraa reni bia'n bagu't spaad ni birii ro' ni bijb cabainol. Guiraa reman xhaguibaa gudajw xpäälreni.

## 20

### *Te mil ijz*

<sup>1</sup> Dxejcti bahuiä loj te xangl Dios ni siädjiäjt xhaguibaa, siädnäni läi ni ruxhal guedro ni laa gabijl. Ca'zani te cadenro. <sup>2</sup> Anglre gunaa gutiatzroga, ni gujc bäl galooli, ni najcza ben dxab, ni laaza Satanás. Bacuaduunini te mil ijz. <sup>3</sup> Basälnini nen gabijl, te ro'c basäunini, bacuaani läi te na'cru gusgueeni reben guedxliuj la ni guiza' te mil ijz. Che guiza' reijzga, empac sibi' lasacni bale'si dxej.

<sup>4</sup> Dxejc bahuiä retron cadre rbejreni rnibeereni, bahuiäza loj renani rbej lo retron, cua'reni yälrnibee te gunreni yälguxhtis. Dxejcti bahuiä xaim rebejn nani biru' yejcti sa'csi huililajzreni xtidx Jesucrist näjza sa'csi basule'reni xtidx Dios. Direni nuzuxhib loj gutiatz niclaza lo banäjb ni najc si'c manroga, dizareni nica' seen lo cuajreni nicla lo naareni. Gubansacreni loj reben gut, gurenäjreni Jesucrist te laani gunibenäjreni te mil ijz. <sup>5</sup> Dee najc yälrbañsac galoo lo reben gut. Niluxh stecuaa reben gut, direni guibañsac che guisa'li te mil ijz. <sup>6</sup> Chicbaa rebejn nani guibañsac ganiddoo, najcreni ben dxan ni agubicaj xtojlreni. Ni rojp yälgujt di guidzujn lojreni. Laareni sajcreni xpixhojz Dios näjza Jesucrist, sibenäjreni Jesucrist, sinibenäjreni Jesucrist te mil ijz.

<sup>7</sup> Che guiza' te mil ijzga, suslasacni Satanás nen gabijl. <sup>8</sup> Che guiriini ro'c, gusgueeni guiraa reguejdx ni tre' lo guidap laad guedxliujre. Susgueeni reben Gog nájza reben Magog te gutie'nireni te gunreni guer. Xhidalduxh gacreni, pet si'cti yujxh ni tre' ro' nisdoo. <sup>9</sup> Huá'preni lo te camp cadre gulagduxh. Gudäjyreni guideb gabig cadre rnibee rexpejn Dios nen guejdx nani sanälajz Dios. Per baxhal Dios bal guiboo xhaguibaali bitejbni, te guyejc guiragajcreni. <sup>10</sup> Dxejc bacuaareni bendxab nani biädgusguee rebejn lo bal guiboo ni cayecnäj sufr, lagajc cadre yu' manro, nájza profetxhii nani basguee; lo bal guibooga susacsírenini sidejdreni trabawduxh dxej-yääl par tejpas.

### *Yälguxhtis ni gujc nez loj tronronol*

<sup>11</sup> Dxejcti bahuiä lo te tronronol nájza lo nani sobga' lojni te rujnni yälguxhtis. Nez lojni gunitlojli guedxliuj nájza guibaa, xhetru lajtdi bidxäj par laareni. <sup>12</sup> Bahuiä lo rebengut, benro sigajc benadolajz, tre'reni nez lo Dios. Bixal rexquijtz Dios, dxejcti bixalza stee xquijtz Dios ni najc guijtz xten xcälñabannäj Dios par tejpas. Dxejcti bejnni yälgutxhtis rebengut xcuent ni bejnreni, xcuentza rediidx nani caj loj reguijtzga. <sup>13</sup> Guiranejz biäd rebengut: nisdoo batzuug rebengut ni yu' lojni, gabijl nájza yälgujt batzuugza rebengut ni yu' lojreni. Dxejcti bejn Dios yälguxhtis tejegareni xcuent ni bejnreni. <sup>14</sup> Dxejcti bacuaani yälgujt nájza gabijl lo bal guiboo ni najc si'c te nisdoo te ro'c checreni par tejpas. Dee najc yälgujt ni rojp. <sup>15</sup> Guiraa bejn ni di lajni nidxäj lo xlibr yälñabajn bacuaazani reni'c lo bajlga.

## 21

### *Xhaguibacoob nájza guedxliucoob*

<sup>1</sup> Dxejcti bahuiä te xhaguibacoob nájza te guedxliucoob, sa'csi agunitloj guibabiejw, nájza guedxliubiejw, luxh xhettiruzá nisdoo. <sup>2</sup> Narä Juan, bahuiä lo guedx Jerusaléncob, guedxdxan, siädjiäjtni xhaguibaali cadre rnibee Dios. Sucheduxhni si'c rsiuchee te dxa'p nani agojl guchñaa. <sup>3</sup> Dxejcti biejn diagä te xse' te ni canii dipduxh, ascanu lo tron cadre rnibee Diosli carii se'ga, scree caniini:

—Colhiii, aguzuj xquidoo Dios galäii rebejn, anabannäj Dios rebejn, sajczareni rexpejn. Sibannäj lagajc Gueb Diosreni. <sup>4</sup> Sutia Dios guiraa nisbee balojreni te na'cru goonreni. Sinitloj yälgujt, xhetru xliajsdi chu, diru bejn goon, dirureni jiajn, sa'csi guiraa redee ni guyu' galoo agunitloj.

<sup>5</sup> Dxejcti ni sobga' lo tron cadre rnibeeni guniini, najni loä:

—Bahuii, najrä guscobä guira'ti.

Guniizani loä:

—Bacuaa rediidxre, sa'csi guliipacreni, sajchhalilajz bejn rediidxre.

<sup>6</sup> Dxejcti najzani loä:

—Agujcni. Narä nacä A nájza Z, ni säloj nani rbaxtiej nájza nani ruluux. Lo chutis ni cayojl, sudedxlia'ä nis yäni, nalajznu yälñabajn par tejpas. <sup>7</sup> Chutis nani gun gaan lo dojl, sica'zani guiraa dee si'c yälñasa'c, luxh narä sacä Xtiosni, laani sacni xi'nä. <sup>8</sup> Niluxh renani rdxejb, renani di chalilajz xtidxä, reni rdxe'ch loä, reni rugu't sa'reni, reni runnäj gunaa dojl, renani najc bidxaa, renani rusuxhijb lo banäjb, guiraa renani rusguee rniireni didxxhii, guiragajc reni'c sij lo nisdoo ni najc ganax bal guiboo, cadre rejch guiboo nájza sufr par tejpas. Dee ni najc yälgujt ni rojp.

### *Guejdx Jerusaléncob*

<sup>9</sup> Dxejcti lo guigajdz xangl Dios ni ca' guigajdz xhijg ni guidxa guigajdz reyälguxhtis xten Dios, birii tejni, najni loä:

—Gudaa, te guluiä lojlu dxa'p nani guchñaa Xiil xten Dios.

<sup>10</sup> Dxejcti bejnni gunixcalä, huinäni narä lo te danro ni jiaduxh, ro'c baluiini loä te guedxro, te guedxdxan ni laa Jerusalén, luxh xhaguibaali siädjiäjtni nez lo Dios.

<sup>11</sup> Guejdxga rdimbicha' guideb xcälrdimbicha' Dios. Luxh yälrdimbicha'ga najc si'c najc te guisacduxh ni laa jaspe, rdimbicha'zani si'c biidr. <sup>12</sup> Guideb gabi guejdxga dejd te paderro cadro caj tzubitio'p xportonroni. Te angl xten Dios suga' ro' tejga portonga. Loj tejga portonga, caj laj tej retzubitio'p cuaa xten rexpejn Israel. <sup>13</sup> Chon portonga caj nez cadro rliejn gubijdx, yu'za chon portonga nez ladbee, yu'za chon portonga nez ladbäw, yu'za chon portonga cadro räaz gubijdx. <sup>14</sup> Yu' tzubitio'p guiro lo cimient xten guejdxga. Lo tejga reguijga caj laj tej retzubitio'p apost xten Xiil xten Dios.

<sup>15</sup> Angl ni caninäj narä ca' si'c te biquii ni najc ganaxduj oor te gurejxhni guejdxga, näj reportonga, näjza padeerga. <sup>16</sup> Guejdxga najc cuadraad: sigajc ni siolni, sigajcza ni gulajgni. Dxejcti cua'ni biquii barejxni guejdxga, barejxni tio'p mil tio'p gayuu kilómetros tejga laad. Sigajc siolni, sigajcza gulajgni, sigajcza jiaani. <sup>17</sup> Dxejcti barejxni padeerga, yu'ni gayonbitajp metr segun mediid xten bejn, sa'csi ni'c najc ni cagutiexhnäjza anglga.

<sup>18</sup> Padeerga naccheeni guij ni laa jaspe. Guejdxga najc ganaxduj orsa'c, rdimbicha'ni si'c guihuajn. <sup>19</sup> Recimient xten padeerga nac-chee guisa'c. Guiganid najc guijaspe; ni rojppga najc zafiro; ni riojnga najc ágata; ni rdajppga najc esmeralda; <sup>20</sup> ni rgaiiga najc onix; ni rxho'pga najc cornalina; ni rgajdzga najc crisólito; ni rxhujnga najc berilo; ni rgaaga najc topacio; ni rtzuuga najc crisopraso; ni rtzubiteebga najc jacinto; ni rdzubitio'pga najc amatista. <sup>21</sup> Guitzubitio'p portonga najc tzubitio'p perl. Tejga portonga guc-chee tej perl. Nezyuro ni rdeed galäii guejdxga najc ganaxduj oor, rieni si'c te guihuajn.

<sup>22</sup> Dina nuhuiä nicla tej guidoo nen guejdxga, sa'csi suga' Gueb Dios ni rajp guiralii yälrnibeduxh, näjza Xiil xten Dios. Laani najc xquidoo guejdxga. <sup>23</sup> Guejdxga dini guiquiin gusanij nicla gubijdx niclaza bäii, sa'csi lagajc xcälrdimbicha' Dios näjza Xiil xten Dios ruzanij ro'c. <sup>24</sup> Rebejn guedxliuj ni rililajz xtidx Dios sajc sareni lo bianijga, luxh rereii ni siääd lo guedxliujre siädnäzareni xcälrnibeereni, näj xpala'nreni ro'c. <sup>25</sup> Di ro' reportanga jäuu rdxej, luxh ro'c xhettiza yääl. <sup>26</sup> Ro'c chanäzareni yäl'nasa'c näj xpala'n reguejdxro ni yu' lo guedxliuj. <sup>27</sup> Niluxh di gacdipac jiu' nicla tej cosguijdx ro'c, niclaza te bejn ni rujn cosguijdx näj yälrusguee. Ro'c siu' ganaxduj renani caj lajni lo libr xten yäl'nabajn par tejpas nani ca' Xiil xten Dios.

## 22

<sup>1</sup> Dxejc baluii anglga te gueuro loä, cadro yu' nisya xten yäl'nabajn. Rdimbicha'ni si'c te guihuajn, luxh cariini lo tron cadro rnibee Dios näjza Xiil xten Dios, <sup>2</sup> rdejdni loj nezyujro ni rdejd galäii guejdxga. Guiro'p laad gueuga sojb reyajg xten yäl'nabajn, lojreni rcaj tzubitio'p cuaa ninejxh nen tebijz, tejga cuaani tejga bäii; luxh rebalajg ni rcaj lo reyajgga najc te gusiajcní reben guedxliuj. <sup>3</sup> Dxejcti ro'c xhettiru yälrdzubde, sa'csi ro'c yu' tron cadro rnibee Dios näjza Xiil xten Dios, ruzuxhijbza rexpejnni, rajnreni laareni. <sup>4</sup> Suhuiireni lojpacni si'cpac ni najcni, sicajza laj Dios lo cuajreni. <sup>5</sup> Ro'c diru yääl chu. Luxh reni rbäyz ro'c di guiquiin nicla bajl, niclaza xhanij xten gubijdx, sa'csi Gueb Dios susanij lojreni. Luxh sinibenäjrenini par tejpas.

### *Siäddzungajxh dxej ni guibisac Jesucrist*

<sup>6</sup> Dxejc naj anglga loä:

—Guliipac najc rediidxga, sajcpac chalilajzlureni. Dad Dios lagajc nani basniib lastoo rebejn ni gunii xtiidxni agujc xchero, lagajc laani baxhalni xanglni te baluilojni loj rexpejnni guira'ti nani agojl gac.

<sup>7</sup> —Sajngalu gan, siojb jäälä. ¡Chicbaa nani riu rediidx ni caj lo libbre!

<sup>8</sup> Luxh narä, Juan, biejn diagä rediidxre, bahuiäza recosre. Luxh che bahuiä, che biejn diagä bazuxhibä te ganä xangl Dios nani baluii loä guiraa redee. <sup>9</sup> Luxh laani najni loä:

—Na'c gunlu si'c, sa'csi narä runä xtzuunni sigajc rujnluni, sigajc rujn rebejn ni gunii xtidx Dios agujc xchero, sigajc rujn rebejn ni rusob rediidx ni caj lo libbre. Bazuxhijb loj Diostis.

<sup>10</sup> Dxejc najni loä:

—Na'c gusäuuulu guiitz cadro caj rediidxre xcuent nani churu gac, sa'csi asiäddzungenajxh redxej ni chale'reni. <sup>11</sup> Luxh laĵ ni guidzujn dxejga, basaan suchanuu gun dojl renani cayungajc dojl; basaan suchanuu gun dzunguijdx renani cayungajc dzunguijdx. Per renani cayujn dzunsa'c, chanuu gunreni dzunsa'c, nani najcza ben\_naya, si'cza chanuu gacni ben\_naya.

<sup>12</sup> Gunajtiro:

—Siojb jiälä, luxh siädnää xhi gunidxä loj tejgatu si'c ni riäjl xca'tu xcuent dzuun ni bejntu. <sup>13</sup> Narä Jesucrist nacä si'c najcza A näjza Z, ni säloj nani rbäxtiej näjza nani ruluux.

<sup>14</sup> 'Chicbaa renani riu xtidx Dios, najcreni si'c ni rguiib xhajbreni te sajc jiu'reni nez porton xten guejdxga, sajcza gauni ninejxh ni caj lo yajg xten yäl\_nabajn par tejpas. <sup>15</sup> Per dejtz guejdxga chajia'n reni najc si'c bä'cw, nalajznu rebidxaa, renani rusguee chälbejn, renani rugu't sa'reni, renani ruzuxhijb lo rebanäjb, näjza ni rchagljaz rnii didx-xhii te gusgueeni.

<sup>16</sup> 'Narä Jesucrist, abaxhalä xanglä lojlu te gusule'ni lojtu diidx xcuent guiraa redee, te gusule'zalu rextidxä nen reguidoo loj rexpenä. Narä nacä te xajg toreii David, nacäza si'c balxhaguibaa nani rdimbidxa' cäjysi che gajd jianij lo guedxliuj.

<sup>17</sup> Sprit Dxan xten Dios näjza chääl Xiil canii, najreni:

—Coltaa.

Suguiniiza nani riejn diajgrenti diidxre, gäbreni:

—Coltaa.

Sujiäädza chutis ni cayojl, sujiädyäxlia'ni nis yäl\_nabajn par tejpas.

<sup>18</sup> Sa'csi narä rniliä'ppac lojtu, guiraa tu ni riejn diajgtu rediidx ni caj lo guiitzre xcuent recos ni churu gac, palga yu' chu tejtü gutajlru diidx ni caj guiitzre, suteedru Dios bejnga replaag yejcnii loj ni caj lo guiitzre. <sup>19</sup> Palga yu' chu gudzucaj loj rediidx ni caj lo guiitzre, sudzucajza Dios nani nica'ni lo yajg xten yäl\_nabajn par tejpas, näjza lo guedx Dxan, ni caj xcuentreni lo guiitzre.

<sup>20</sup> Nani cagusule' diidx xcuent guiraa redee guniini, najni:

—Guliipacni siojb jiälä.

Sugacni si'c. Gudaa Dad Jesucrist.

<sup>21</sup> Sujiääd xcälracnäj Dad Jesucrist lo guiraa tu. Sugacni si'c.